

Esuquidistu Chuiquin  
Tantiamete



New Testament in Matsés (PE:mcf:Matsés)

# Esuquidistu Chuiquin Tantiemete

## New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
446da786-5bd1-5ffa-85e2-9eff4052cf8b

## Contents

Mateyon Dada uaid . . . . .	1
Madcosën Dada uaid . . . . .	74
Ducasën Dada uaid . . . . .	117
Uanën Dada uaid . . . . .	188
Esus Chuibenequidon Naid . . . . .	242
Doma yacnocquidon Iste . . . . .	305
Codinto yacnocquidon Iste 1 . . . . .	339
Codinto yacnocquidon Iste 2 . . . . .	368
Cadasia yacnocquidon Iste . . . . .	385
Epeso yacnocquidon Iste . . . . .	398
Pidipos yacnocquidon Iste . . . . .	408
Codosas yacnocquidon Iste . . . . .	416
Tesadonica yacnocquidon Iste 1 . . . . .	423
Tesadonica yacnocquidon Iste 2 . . . . .	430
Timoteyon Iste 1 . . . . .	434
Timoteyon Iste 2 . . . . .	443
Titon Iste . . . . .	450
Pidemonën Iste . . . . .	454
Ebedeyon Isadaidbon Iste . . . . .	456
Santiacon Dada uaid . . . . .	477
Petedon Dada uaid 1 . . . . .	485
Petedon Dada uaid 2 . . . . .	495
Uanën Dada uaidëmpi 1 . . . . .	500
Uanën Dada uaidëmpi 2 . . . . .	508
Uanën Dada uaidëmpi 3 . . . . .	509
Udasën Dada uaid . . . . .	511
Esusën Uan Ismiaid . . . . .	514

## MATEYON DADA UAID

### *Esuquidistun tsusedpabotedi chiaid (Duc 3.23-38)*

<sup>1</sup> Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

<sup>2</sup> Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

<sup>3</sup> Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. <sup>4</sup> Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. <sup>5</sup> Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. <sup>6</sup> Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

<sup>7</sup> Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. <sup>8</sup> Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. <sup>9</sup> Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. <sup>10</sup> Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. <sup>11</sup> Osiasën madobic Eonias cuëmëdquid. Aid Eonias caid aton matsesadobëdtabi yuanuen Babidonia yacnocquidon aton naididën buampampic.

<sup>12</sup> Buanac shubu dadpen icquid Babidonia caid yacnoshon Eoniasën aton mado Sadatied tishmepampic. Sadatiedën mado Sodobabed cuëmëdpampic. <sup>13</sup> Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. <sup>14</sup> Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. <sup>15</sup> Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. <sup>16</sup> Acobon madobic Ose cuëmëdpac caondash. Aidquoio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquo nec. Isadaidbon cainaidquo nec.

<sup>17</sup> Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuiquoquin padpiden bedanquin aidën matses 14tedbidi chuiquin Eonias aton matsesbëdta buanaid ënquin chiombi. Adoshombic Eonias ënquin chuiboed chuiquoquin padpiden bedanquin aton matses 14tedbidi chuiquin Esusquioibi ënquin chiombi.

*Esuquidistu tishaid*  
(Duc 2.1-7)

<sup>18</sup> Nēbi aid tishaidquio chinu. Esus tishabi yec aton tita Madia icpac caondash. Abi inuequidēn Osen bedabi icshobi Nuquin Papan Mayanēn bacuē usundomepac caondash. <sup>19</sup> Usundoacsho isun abi inuequidēn Osen dada utsin chudaïd danec: —“Nēbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bēdambo icquid icquin naden chiampo icpac caondash. —Bedabi bacuē usundoaque. Cuidquimbien ictiad —quequin aton matses chienquio yequi: —Bedēnquio icnuen dada uaid menenu —queuidpac caondash.

<sup>20</sup> Adnubien Nuquin Papan abi yacnoshon uaidēn mayan bēdan Ose ushquin ismepac caondash. —Dabid yampidēn tsyuecquid icsho mibi chinu, Ose. Tanta. Chudenquio icquin Nuquin Papan Mayanēn Madia bacuē usundomiaye. Dacuēdēnda. Dacuēdenquio icquin Madia min shubuno buanta. <sup>21</sup> Adoshombic dada bacuē tishacsho Esus cuēnta. “Matses icsaid bedshunquin Nuquin Papa aton matses cuidmenquio iquendac,” quequin Esus cuēnta —quequin mayan bēdan Ose ushquin ismepac caondash.

<sup>22</sup> Aden mayan bēdan Esus tishte chiacpadomboen Nuquin Papan ambi chiaïd naden dada uamepampic.

<sup>23</sup> “Dadan inacmaidēmbi bacuē usundoshon dada bacuē tishendac.

Aidi Imanued cuēnendac.

‘Nuquin Papapadquidquobidi matsesbēd tabadnuec choash nec,’ quequin Imanued cuēnendac,” quequin Esus tishte Nuquin Papan dada uamepampic.

<sup>24</sup> Aden mayan bēdan chiac isucunshumbien aidēn chiacpadomboen Osen aton shubuno Madia buampac caondash. <sup>25</sup> Buanshun Osen chudenquio icnubi dada bacuē tishpac caondash. Tishacsho Esus cuēmpac caondash.

## 2

*Uispa isquido Esus isec choaid*

<sup>1</sup> Nidaïd Udeya caïd yacno tabadquin shubu daēdpactsēcquid Beden caïd yacnoshon Esus tishpac caondash. Adnubien shubu dadpen icquid Edu-saden caïd yacno isadaïdbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin <sup>2</sup> anocquido chuituidpac caondash. —Min matses isadaïdbo chuiquid dapa ictequidquio nēbi tishtsaidēmpi ¿midambo ictseque? Isnu. Aid tishaid tantiamēte uispa isombique. ¿Mitsimbo ictseque? Isnu. “Chuiquid dapa bēdamboshē ictequid nec,” quishaid isnuec chopobi —quetuidpac caondash.

<sup>3</sup> Adsho tantiash dacuēdcuededpac caondash abitedimbo. —Padtec. ¿Mida-padquid bacuē nependabac? —quecuededpac caondash Edodes isadaïdbo ancaquid ambi ancaïdobēdi. <sup>4</sup> Adshumbien Edodesēn abi yacno tsusiobo cho-chomepac caondash. —¿Mitsicquid caique? Tiantianu —gueshun abi yacno Moisesēn dada uampid chuibanquido abi chuiquid dapabobēnta cho-chomepac caondash. Cho-chomeshumbic: —¿Mitsishunquio Nuquin Papan chomiaïd min matses chuiquid dapa ictequid tishpash? ¿Ada Nuquin Papan chiaïd isbanquin tantio? —caquien: <sup>5</sup> —Ai, tantiembi. “Nidaïd Udeya caïd yacno tabadquin shubu daēdpactsēcquid Beden caïd yacnoshon aid bacuē tishendac,” quiampicpadembi tantiembi. Nuquin Papan ambi chiaïd nuquin tsusedpa dada uamepampic naden. <sup>6</sup> Shubu daēdpactsēcquid Beden caïd yacnocquido chiec:

“Beden yacno tabadec nidaid Udeya caidën tabadquido mibi nec. ‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,” —quequin Nuquin Papan Esus tishte chiaid chuipac caondash tsusiobon Edodes caid chuiquin.

<sup>7</sup> Adoaquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantaranu —cac chuisho <sup>8</sup> tantiashun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

<sup>9</sup> Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaïd shubu nëid iquec —quec. <sup>10</sup> Adsho isashien cuishonquepac caondash uispa isquido. <sup>11</sup> Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chichshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidedi menepac caondash. Adoash ushtopac caondash. <sup>12</sup> Adec ushtoacsho Nuquin Papan ushquin ismepac caondash. —Isadaidbo ancaquid Edodes chuïbidanenda —quequin ushquin ismiac isucunanec abi choboedën nidenquo yec podqued utsin nidpac caondash aton shubuno nidec.

### *Equipito yacno Osen buanaid*

<sup>13</sup> Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

<sup>14</sup> Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash. <sup>15</sup> Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuïbanquidën Esus Equipito yacno buante chuïquin dada uapampic naden chuiquin. “Equipito yacno nidash tabadsho: ‘Auëshquo cho, Mado, caindambi,’ quioosh Nuquin Papa,” quequin Nuquin Papan chiaid dada uapampic.

### *Bacuëbo dadpen cuesun siatanaid*

<sup>16</sup> Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuïbocpadtsëcquid comapenec onquecuenabi ictscquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash. <sup>17</sup> Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

18 “Abi yacnuësh aton bacuëbo nibëdänsho isash isadaidbon chidobo seden-  
quecuededendac.

Unësaid tantiec baded ënëdenquo yec sedenquebudnendac,”

quequin chiampicpadomboen aton bacuëbo nibëdamepac caondash.

19 Yuecquo ictaniashic isadaidbo ancaquid Edodes caid unëspac caon-  
dash. Adambic nidaid utsi Equipito caid yacno tabadsho Nuquin Papan  
abi yacnoshon uaidën mayan bëdan Ose ushquin ismepac caondash. 20 —  
“Bacuëbo cuesun siatan,” quiondaid unësaccoshe. Min chido min bacuëbëdta  
buanec min nidaid Isadaid caidën nidoata —caquien 21 isucunanec aidën  
chuibocno buanuec nidpac caondash.

22 Aton nidaidën nidshun aton matsesën chiaid tantiapac caondash. —¿Ada  
tantio? Udeya yacnocquido ancadened unësaidën mado Adquedayo caid  
ancanquidquibidien nechitec —quesho tantiashien dacuëdtampac caon-  
dash Ose. Adshobien Nuquin Papan Ose ushquin ismeoapac caondash.  
—Cuesunenushë. Min nidaid Udeya caidën nidenda —quequin ushquin  
ismiac isucunanec aid nidaid Isadaid caidëmbidi nidec aid nidaid cuëshë  
utsi Cadidia caidën nidpac caondash. Udeya caidën nidenquo yec uquëmbo  
nidpac caondash. 23 Uquëmbo nidec shubu dadpen icquid Nasaded caid  
yacno choash ambo tabadtuidpac caondash. “Nasaded yacnocquid nendac,”  
quequin Nuquin Papan chiaid dada uampicpac anobi tabadpac caondash.  
Auëshquo canipac caondash Esus.

### 3

#### *Uan acten mentoanquidën chuibeniaid* (Mad 1.1-8; Duc 3.1-9, 15-17; Uan 1.19-28)

1 Adash yuecquo ictaniashien Uan caid Nuquin Papa tantiabenquido  
acten mentoquid icpac caondash. Nidaid Udeya caid yacno shubu  
nibëdacno capucuenequin Nuquin Papan chiaid chuibenequid nepac caon-  
dash. 2 Adquid icquin Esus chote chuibampac caondash naden. —Mibi ic-  
said ënash bëdamboec tabadta. Nuquin Icbombo choeque —quequin chuipac  
caondash. 3 Aden Uanën chuite chuiquin Nuquin Papan isadaidbo tsusedpa  
Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho  
chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

4 Nadquid Uan icpondash. Aton dashcute nëish yua dapa cameyo caidën  
bu daëdcaid dasiuidpondash. Tspantebic nidaidën capuquid yua bitsi nacen-  
naid tsiupondash. Aton pete bacumbëd shioshbimboecquid icpondash.

5 Aidën Nuquin Papan chiaid chuibenesho tantianuec nëidtedi matses cho-  
chopac caondash. Nëidic shubu dadpen icquid Edusaden caid yacnocquido.  
Nëidic nidaid Udeya caid yacnocquido. Nëidic acte Odan caid cuëman  
tabadquido. Aidtedi cho-chopac caondash. 6 Cho-choshon Uanën chuisho  
tantiaash: —Nuquin Papan chiaid niac-niaquec icsapobi. Icsaboedi aid  
tantiec bëdamboec tabadtiaquid iquebi —quesho: —“Nëid Nuquin Papa  
tantianu,” quequid nec —quequin acte Odan caidën mentopac caondash  
Uanën.

7 Adnubien padiseyobobëd saduseyobo Uan isec cho-chopac caondash.  
Padiseyobo isadaidbo tsusedpabon chiaid namequido nec. Saduseyobo-  
bic: —Matses unësaid uincuenenquo iquendac —quequido nec. Aido  
cho-chosho isun Uanën: —Nisibimboecquido mibi nec. Adquidën icsa

uacbimboen matses icsa uaquido mibi nec. Bëdambo icquid damian-queiec mibi iquec. “Nuquin Papan mibi cuidnushe. Tantiatan,” quequin çtsuntsin chiac cho? <sup>8</sup> Mentomete bunec Nuquin Papan chiaid niac-niacboedi ënash bëdamboec tabadta. <sup>9</sup> “Ëbipadquid Abadauanën tsyuecquiduidtsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsho isun nëid cuënotëbi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. <sup>10</sup> “Icsambo icquid nec,” qeshun ambi nitsinaid cuëte bacuëesa dëdshun nëdëncacimbboen ambi chiacpadomboen naisa Nuquin Papan cuidendac —quepac caondash Uan padisoyobo saduseyobobëdta chiec.

<sup>11</sup> Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactsc tantiaquid ictsëcnuic aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc çatotsieshun icsaquidquio: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmibi chuiboed choshon: “Ëbi tantiaquid nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac. <sup>12</sup> Piacbo choeshashun putu bushcaquin secacimbboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

### *Uanën Esus mentoaid*

*(Mad 1.9-11; Duc 3.21-22; Uan 1.32-34)*

<sup>13</sup> Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Ëbitsen mento —quetuidpac caondash. <sup>14</sup> Adshobien Uanën: —Padenquio iquembi. Nuquin Papan chomiaid icquin mimbibi ëbi naquien bëdambo ictsiash. ¿Atotsieshun ëbi aden chie? Padi —qeshobien: <sup>15</sup> —En na. Bëdambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —qesho tantiaishun Esus acten mentopac caondash Uanën.

<sup>16</sup> Adoac Esus pudundonobien canchedacimbboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec.

<sup>17</sup> Adnubien abucuëshquio Nuquin Papa onquiampac caondash. —Nëid ëmibi tantiaidquio con Mado nec. Ëmibi chiacpadomboen nasho isash bëdambo iquebi —quepac caondash Esus caic.

## 4

### *Satanasën Esus icsamenuequin tanuidaïd*

*(Mad 1.12-13; Duc 4.1-13)*

<sup>1</sup> Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshëncquid Satanasën Esus icsamenuequin ma tanu —quequin ambo nidmepac caondash.

<sup>2</sup> Adoacien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnuic 40tedec ushquin penquio yec comapenec bumpac caondash. <sup>3</sup> Bunec tsadshobien Satanasën



istuidpac caondash. Istuidtanquimbien: —¿Nuquin Papan Madombobida mibi neque? Aidèn Madombo icquin nèid cuènote cain: “Pete icta,” cata —caquien <sup>4</sup> Esus: —Padi. Nuquin Papan chiaid dada uapampid nad iquec. “¿Peteuidi tantieta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash,” quequin dada uapampid iquec —quepac caondash Esus.

<sup>5</sup> Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasèn Esus manidtomepac caondash abucquio. <sup>6</sup> Adotanguimbien padpiden chuioaquin: —¿Nuquin Papa caidèn Madombobida mibi neque? Aidèn Mado yec nèuëshquio pudunta. Nuquin Papan mibi paèdmenquio ictsiashe. Nadentsen Nuquin Papan chiaid dada uapampic.

“ ‘Uidèn uata,’ quequin ambi abi yacnoshon uaido mayan bédabo Nuquin Papan chiac mibi uidèn uaindac paèdenquio icnuc.

‘Cuènoten tadquèdnushe,’ qeshun adoendac,”

quequin Nuquin Papan chiaid dada uapampique. Pudunta —caquien <sup>7</sup> Esus: —Padi. Nuquin Papan chiaid dada uapampid nad iquec. “ ‘¿Icsamboen tantiaquin èmbemi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

<sup>8</sup> Adoaquien Satanasèn padpiden buanquin macuèsh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobèd icquido ismequinc aidon dayun uaidtedi ismequinc capac caondash. <sup>9</sup> Adoshombic: —Nèidtedi mibi menetsiambique.

Èbi con icbo cata. Èbi aden chuiquin ismenuen danèshèn sebudta. Adsho isun èmbi ismiactedi mibi menembi. Aidèn icbo mibi icmembi —caquien

<sup>10</sup> Esusèn: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsècquiobi mimbi tantiaiduidtsèqui min Icbombo neque. Aidèn namiaidquio icta,” quequin dada uapampique. Cuenta —capac caondash Esusèn. <sup>11</sup> Adoaquien Satanas cuempac caondash.

Cuenubien Nuquin Papan abi yacnoshon uaido mayan bédabo choshon abèdi tabadquin Esus bédambo icmepac caondash.

### *Cadidia yacnoshon Esusèn chuibeniaid*

*(Mad 1.14-15; Duc 4.14-15)*

<sup>12</sup> Adashic aton nidaid Cadidia caidèn Esus nidpac caondash. —Mibi acten mentondauid Uan beshun quènèn nauedac caosh —quesho tantiash nidpac caondash. <sup>13</sup> Nidashic shubu dadpen icquid Nasaded caid yacno tabadash nidec chian dapa cuèman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsèqui icquid nidaid utsi con tsusedpabon Sabudon capampic. <sup>14</sup> Esus ambo tabadte chuiquin Nuquin Papan con tsusedpa Isayas cuèmedquid dada uamiampicpadec ambo tabadpac caondash Esus. Naden dada uapampic.

<sup>15</sup> “Nuquin Papa tantiamequidèn chuisho nèidtedishun tantiendac.

Nèidic nidaid cuèshè utsi Netadi caidèn tabadquidon.

Nèidic nidaid cuèshè utsi Sabudon caidèn tabadquidon.

Nèidic chian dapambo anoentsèqui tabadquidon.

Nèidic acte dapa Odan caid cuèman tabadquidon.

Nèidic isadaidpembo dadpen tabadacno Cadidia caidèn tabadquidon.

<sup>16</sup> Aidedishun Nuquin Papan chomiaid tantiendac.

Pabiacte cuènedacnimboec icsamboec tabadquin Nuquin Papa tantienquio icboedombi tantiabenendac.

Nuquin Papa tantiamenuen chuibansho tantiashun matsesèn paposhquiacnimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenedac ushash isucunacimboen,”  
quequin Isayas Esus choash tabadte dada uamepampic Nuquin Papan.

<sup>17</sup> Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bëdamboec tabadta. Nëbi Nuquin Papan abëd tabadtequido icmequin matses bëdamboen tabadmendac —quepac caondash Esus ambibi naid chiequi.

*Nuëcquid bedquido Esusën: Cho, caid*  
(Mad 1.16-20; Duc 5.1-11)

<sup>18</sup> Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapamo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. <sup>19</sup> Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu <sup>20</sup> —caquien aton nëshaid nianec nidquimbi Esus tsibanampac caondash.

<sup>21</sup> Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bëdnun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien <sup>22</sup> aton papabëdta cano nianec Esusbëd icnuec nidpac caondash.

*Matses dadpen Esusën chuibeniad*  
(Duc 6.17-19)

<sup>23</sup> Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste matses chuibeniad caondash. Adshumbic daic-saidotedi bëdamebampac caondash. <sup>24</sup> Adosho istanquin: —Bëdamequidquo nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniad caondash. Aden chiac daic-saidotedi bë-bëpac caondash. Dada paëmboshë icquido yec podobitsi icsa dapuedaido yec unësanquido yec dada shëquëquenquo icquido yec quenuc bë-bëacsho aittedi bëdamepac caondash Esusën. <sup>25</sup> Aden: —Bëdamiosh —quequin chiac isec cho-choash dadpenquo tsucus-tsucustsëcquo yec tsidash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aidedtedshun Esus tsibanampac caondash.

## 5

*Nadquido bëdambo iquendac, quequin Esusën chiaid*  
(Duc 6.20-23)

<sup>1</sup> Matses dadpenshun tsibananac macuësh dapa cuëte nibëdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abëd icquido Esusën dayunquo tabadpondash. <sup>2</sup> Adshobien Nuquin Papan matses bëdamboen isquin bëdambo icmete Esusën matses abitedi chuibanpondash.

<sup>3</sup> —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbemi bēdamboec tabadtiapimbo iquebi. Bēdapenquoio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

<sup>4</sup> “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

<sup>5</sup> Aton nauidi tantienquoio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yueshun ambi nidaid chuca uaidēn tabadmendac.

<sup>6</sup> Pete bunachimboec ambi chiacpadec bēdamboec tabadte bunquid Nuquin Papan bēdamboen tabadmendac.

<sup>7</sup> Abi chieshēnquidi chieshēnenquoio icquin bēdamboen isquid Nuquin Papan bēdamboen isendac.

<sup>8</sup> Ambi chiacpadomboenuidi nate bunquid Nuquin Papan bēdambo icmequin abibi bēismendac.

<sup>9</sup> Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi ademibidi con champi caindac.

<sup>10</sup> Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. <sup>11</sup> “Esus tantiaquid nec,” qeshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso ademibidi mibi bēdambo icmendac. Ademibidi mibi muauasho Nuquin Papan mibi bēdambo icmendac. <sup>12</sup> Aden utsibon: “Esus tantiaquid nec,” qeshun chieshēnaqui cuis-honqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Ademibidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishtonqueta —quequin chuipondash Esusēn.

### *Abi tantiaquido bēdamboec tabadte chiaid*

*(Mad 9.50; Duc 14.34-35)*

<sup>13</sup> Abi macuēsh dapa poctse tsadquin Esusēn chuibampondash. —“Ma utsibotsen Nuquin Papa tantianu,” quec sa pambid casecac batambo yec petiadquio yacchimboec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo ichoedi batapenquoio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquoio icquin secatequid nec. Ademibidi matses bēdamboec tabadenquoio yec icsambo icsho Nuquin Papan chian anēdēnquiacno nēsecatequid nendac —quepondash Esus.

<sup>14</sup> Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntanshunda ēapadic? Padenquoio. Umanucshumbien ma tantianueshun ēaquid. Ademibidi: “Ma Nuquin Papan chiacpadec tabadte tantianu,” quiash ēnēdenquoio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

<sup>15</sup> ¿Utsibo chuinuecta abentsēqui uano icpadic? Padenquoio. “Ma nēidēn tantianu,” quec aibēdi bēdamboec tabadquin chuibanquid. <sup>16</sup> Ademibidi ēbi tantiesabobēd tabadquin: “Ma Nuquin Papa tantianu,” quequin ēnenquoio icquin Nuquin Papan chiacpadomboen nata. “Nuquin Papa bēdambo iquec,” mā utsibotsen quenu,” qeshun adota —quequin Esusēn chuipondash.

### *Nuquin Papan Moises chuimiaid chiaid*

<sup>17</sup> Nadentsen Esusën chuipondash. —Ëmbi chuibansho tantiasun: “Nuquin Papan chiaidquo chienquo iquec,” quequin tantienda. “Nuquin Papan Moises dada uamiampidbēda con tsusedpabo utsibo dada uamiampid chienquo icquin utsi uapēc,” mimi ēbi capec. Mambi utsi uainquo yoc. Nuquin Papan chiaid utsi uainquo icquin ambi chiactedimbo namenuc nebique. <sup>18</sup> Abimbo chuinu. Tantia. Abubēda nidaid nibēdamiabi icnuc Nuquin Papan chiaid bēnudtiapimbo iquendac. Ambi chiactedimbo naquin Nuquin Papan nainendac.

<sup>19</sup> Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac. <sup>20</sup> Moisesën dada uampid chuibanquido padiseyobobēd Nuquin Papa yacno puduedtequidoen mimi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusën.

### *Chieshēmēnquido nēish bēdante chiaid*

*(Duc 12.57-59)*

<sup>21</sup> Adshumbic Esusën padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuipampid mimi tantiec. <sup>22</sup> “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquo icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac. <sup>23</sup> “Chieshēmēnquid Nuquin Papan cuidtequid nendac,” quequin ëmbi chuisho tantiasun bēdamboen nata. Nuquin Papa tabadte shubu uashunaidēn puduedash: “Ambi chiacpadomboen musuc menenu,” mibi quepec. Aden musuc menenumbi mimi naid tantiata. “¿Ada ēbi chieshēnquid icpec? ¿Ëmbi chieshēmeboedta icpec?” quequin tantiata. <sup>24</sup> Adshun: “Ai, ëmbi chieshēmeboed iquec,” qeshun Nuquin Papa tantiaquin mimi bēboed meniabi mibēd chieshēnamboed yacno nidash aidbēd bēdamboec onqueta. Adec bēdamboec onquiash padpidec choashun Nuquin Papa tantiaquin meneta. Adec mibēd chieshēnamboedbēdi bēdamboec onqueta.

<sup>25</sup> Mibēd chieshēnamboed utsimbic: “Nēid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedēn nidec aidbēd bēdamboec onquenidta: “Ma nēish bēdanu,” quiash. “Matses cuidte chuiquidēn cuidchitoshe,” quiash badedquo mibēd chieshēnamboedbēd bēdamboec isnanta. Abi yacno buanacsho cuidte chuiquidēn: “Icsambo iqueque. Quēnēn nauedta. Ëmbi chiacted piucquid ëmbi bedabi icnuc ma tsadpanu,” mibi catsiash. Quēnēn nauedshun <sup>26</sup> ambi chiacted piucquid nibēdnuc mibi cuemenquo ictsiashe. Mibēd chieshēnamboedbēdi bēdamboec onqueta. “Nuquin Papan adembidi cuidnushē,” quiash adta —quequin Esusën chuipondash.

### *Icsaquin chudaid chiaid*

<sup>27</sup> Adshumbic naden Esusën chuipondash. —Chiaid utsitsen mimbi tantiec. “Min chidopenquoio chudenda. Min bënëpenquoio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. <sup>28</sup> Aden chiaid niacniaquec icsambo icquid icnubi nadquid icsambo icoaic. Aton chidopenquoio isec: “Aidquoio chudtiadquoio icchitebi,” quequin otacquoio tantiequi matses icsapec. <sup>29</sup> Èshën isec mibi min chidopenquoio bunec icsaic. Èshë chicshuniac bimboec icsainquoio yec ènëdash mibi bëdambo ictsiaic. Icsaid ènenquoio icquid Nuquin Papan chian anëdënquiacno nësecaquin cuidendac. <sup>30</sup> Min chidopenquoio chudte bunquin mèismec mibi icsaic. Mëteshuniac bedtiapimbo yac bimboen mibi icsaid ènta. Ènenquoio icquid Nuquin Papan cuidendac —quequin Esusën chuipondash.

*Aton chidobëd cuëshëdte chiaid  
(Mat 19.3-9; Mad 10.11-12; Duc 16.18)*

<sup>31</sup> Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquoio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. <sup>32</sup> Utsitsen chuinü. Aton chidon bënëpenquoio chudmesho istuidshun Moisesën chiacpadomboen nac bëdambo ictsias. Aton chido dada utsi chudmesa icshobi dadan ambembi dada uaid menequin nidmiac icsambo ictsias. Aden nidmequin chido icsametsias. Chido nidmiacsho bedquidtsen icsatsias —quepondash Esus.

*Abimbo chiac bimboen chienda, quequin Esusën chiaid*

<sup>33</sup> Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “Nuquin Papa utsi uatiapimbo yac bimboen abimbo caimbi,” quequin chiaid niactemaid nec. Niacsho Nuquin Papan cuidendac,” quequin Moisesën chuipampic. <sup>34-36</sup> Aidën chiacpadec muainquoio ictiadquidi mimbi abimbo chiac bimboen utsi uain icsamboen chiec. “Abi cuëmëdquid cuënec muasho èbi cuidtsias. Nuquin Papa cuëmëdquid cuënenquoio yec muasho Nuquin Papan èbi cuidenquoio ictsias,” qeshun mimbi utsi chiec. “Abu utsi uatiapimbo yac bimboen èmbi chiacpadomboen naimbi. Muainquoio iquebi,” mibi quepec. Adecbidi: “Nidaid utsi uatiapimbo yac bimboen èmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiac bimboen chienda. “Nuquin Papa cuëmëdquid cuënenquoio iccombi,” mibi quenubi abu abi tabadaid icnuc ashunquoio Nuquin Papan abitedi namendac. Nidaicid Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuechun. ¿Min mapin icboda mibi nedi? Padenquoio. ¿Mimbida min mapi masedcamedi? Padenquoio. Aton Icbombien Nuquin Papan naique. Abimbo chiac bimboen icsamboen chienda. <sup>37</sup> Adec muainquoio icquin abimbo chuita. “Ai, adembi naimbi,” quequin mimbi chiacpadomboen nata muainquoio icquin. Adembidi: “Padí. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

*Chieshë nec cuidnanenda, quiaid  
(Duc 6.29-30)*

<sup>38</sup> Adashic padpidec Esus onquec: —Nuquin Papan Moises chuiquin dada uamiapid mimbi tantiaboed nad iquec. “Chieshë nquin èshë ansiac

adecbidi cuidnanec ëshë ansenanquid. Chieshënquin sëcsiac adecbidi cuidnanec sëcsenanquid,” quequin chiaid icnuc<sup>39</sup> utsitsen chuinu. Tantia. Mibi cuesquid cuidenda. Chieshënaqui cuidnanenquio icquin adembi bédamboen ista. <sup>40</sup> Min matses: “Ëbi cuidquin mimbi ëbi meniampo iqueque. Min dashcute beccho,” qesho mimbi menenquio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bédamboec tabadta. <sup>41</sup> Utsibic: “Nëbi nidtuidquin con na buanec nid,” quequin ancabudac nëbi nidtuidenquio icquin udimbo buanshunta. <sup>42</sup> Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata — quepondash Esus.

*Chieshënquidobi bédamboen iste chiaid*  
(Duc 6.27-28, 32-36)

<sup>43</sup> Adshumbic abi macuësh dapa poctse tsadquin bédamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënquido chieshënta,” quequin chuiampic. <sup>44</sup> Utsi mibi chuinu. Tantia. Mibi chieshënquidobi bédamboen isquin tantiata. Chieshënaqui: “Ëbi chieshënquid bédamboen ista, Papa,” quequin Nuquin Papa chianeta. <sup>45</sup> Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnoidida Nuquin Papan ushë chëncamepadic? Padenquio. Icsaido yacnotsen ushë chëncamec. ¿Bédambo icquido yacnoidida ue chomepadic? Padenquio. Icsaido yacnotsen ue chomec. Bédambo icquidobëdtabi icsambo icquido Nuquin Papan bédamboen nashunec. <sup>46</sup> ¿Mibéd tantiananquido min shubun icquidoidi mimbi bédamboen nashunsho isunda Nuquin Papan mibi: “Bédambo iquec,” capec? Padenquio. Mimbi icsambo iquec caidontsen ambi tantiaido nashuntsias. Aidombien piucquid bedshumënquido icquimbi aton shubun icquidoidi nashuntsiashe. Aden nainda. Utsibotsen bédamboen nashunta. <sup>47</sup> ¿Min shubun icquidobëduidida mibi onquec tabadpe? Nuquin Papa tantiesaboen adpec. Utsibotsen bédamboen ista. <sup>48</sup> Nuquin Papabimboec icta. Bédambo icquid icta. Bédambo icquidobëdta icsambo icquidobi Nuquin Papan bédamboen tantiacpadomben utsibotsen bédamboen tantiata — quepondash Esus.

## 6

*Utsibo bédamboen nashunte chiaid*

<sup>1</sup> Adshumbic abi macuësh dapa poctse tsadquin Esusën chuipondash. — Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin utsibo ismenquio icquin nata. <sup>2</sup> “Aton na nibédquido menenu,” qeshun utsibo ismequin menenda. Ismenquio icquin meniac bédambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bédamboen isnubi Nuquin Papan bédamboen istiapimbo iquec. <sup>3</sup> Aton na nibédquido menequin utsibo ismenda. Meneshun: “Menebanombi,” quequin utsibo chienda. <sup>4</sup> Adsho isun mimbi utsibo ismenquio icquin naid tantiaquid icquin Nuquin Papan bédamboen isquin abëdi mibi tabadmendac — quequin Esusën chuipondash.

*Nuquin Papa chianete Esusën chiaid*  
(Duc 11.2-4)

<sup>5</sup> Adshumbic Nuquin Papa chianetetsen Esusën chuipondash naden. — Bédambo icquid damianquidën nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidí nidtoshon comapenec onquequin Nuquin Papa chianepec. Adash umanuc puduenshun matses dadpen ismenuenuidí padpiden adembidi chianec. Adquid aton matsesën: “Bédambo iquec,” canubi Nuquin Papan padenquio iquec. Bédamboen istiapimbo iquendac. <sup>6</sup> Mibi adenda. Utsibo ismenuenuidí nainquio icquin matsesën isacmaidquio Nuquin Papambo tantiaquiquin chianeta. Aden chianequid mibi icsho Nuquin Papan mimbi utsibo ismenquio icquin naidtedí tantiaquid icquin mibi bédamboen isquin abédi tabadmendac.

<sup>7</sup> Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboben Nuquin Papa chuibudenda. “Yuenquio chuibudac nuqi tantiaboedën nuqi nashuntsiash. Padenquio icac nuqi nashunenquio ictsiash,” qeshun Nuquin Papa tantiesabon yuen chuibudacimboben nainda. <sup>8</sup> Adoenquio icquin Nuquin Papa chianeta. Mimbi chiabi: “Adopashuni. Aid nibédnuc unësebi. Útsi icnuc bédambo ictsiabi,” quequin mimbi otacquio tantiaid Nuquin Papan tantieque. <sup>9</sup> Naden Nuquin Papa chuita.

“Bédamboshë icquid icsho matses abitedishunquio mibi tantiapashun, Papa.

<sup>10</sup> Matses abitedishunquio mibi con Icbo capashun. Mibi yacnoshon mimbi uaido mayan bédabon mimbi chiacpadomboenuidí naic.

Adomboembidi mimbi chiacpadomboen matses abitedishunquio napashun.

<sup>11</sup> Bumianenda, Papa. Badiadquidën badiadquidënquien con pete icmeta.

<sup>12</sup> Utsibon chieshënaqui ëbi cuidnanenquio icsho isun ëbi icsashobi cuidenquio icquin ëbi bédamboen ista, Papa.

<sup>13</sup> Mimbi chiaid ëbi niacmenda, Papa.

‘Icsamenuše,’ qeshun Satanas ëbi yuamenda, Papa.

Abitedishun Icbombo yec abitedimbo namequidquio mibi nec, Papa.

Ëmbi mibi chuisho tantiata, Papa.

Ënenquio icquin abitedishunquio: ‘Bédambo iquec,’ mibi capashun. Padi,” quequin Nuquin Papa chianeta —quequin Esusën chuipondash.

<sup>14</sup> Adashic nadpondash: —Utsibo bédamboen ista. Cuidnanec chieshënanenda. Cuidnanec chieshënanenquio icsho isun Nuquin Papan mibi cuidenquio icquin bédamboen istsiash. <sup>15</sup> Cuidnanec chieshënansho isun Nuquin Papan mibi bédamboen istiapimbo ictsiash —uequin Esusën chuipondash.

*Buna mëmunte chiaid*

<sup>16</sup> Adshumbic utsibo ismenquio icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nacimboben ismenda. Muaquido: “Buna mëmunquid nec,” aton matses camenuc abibi maniumédash nënquidbitsëcquiec mamënenquio iquec. Adec buna mëmunquid tanec muaic. Adsho isun matsesën bédambo icquid danubi Nuquin Papan: “Icsambo icquid nec,” qeshun bédamboen istiapimbo iquec. <sup>17</sup> “Nuquin Papauidi tantiaquin nëidtedec ushqin buna mëmunu,” qeshun Nuquin Papambo tantiaquin nata. “Utsibon tantianushë,” qeshun bédamboen min manëdaid shueshcata. Adash bédamboec mamënta. Aden utsibo ismenuenuidí nainda. <sup>18</sup> Aden bédamboen manëdaid shueshcata isun: “Buna mëmunec nec,” cainquio ictsiash utsibon mibi

chuiquin. Nuquin Papambien: “Ēbiuidtsēqui tantianuen naic,” quequin tantiatsiash. Adshun mimbi utsibo ismenquoio icquin naidtedi tantiaquid icquin abēdi mibi tabadmendac —quequin chuipondash Esusēn.

*Nuquin Papa yacno tabadte bunta, quiaid*

*(Duc 12.34)*

<sup>19</sup> Adshumbic padpiden Esusēn chuipondash. —Ēmbi chuiboedquoio tantiashun mimbi dayun uatequiduidi tantienda. Dayun uatequid nadquoio iquec. Chodquetequid yec shocosh chiuidtequid yec matsesēn ampeshuntequid yec quec icsabudtequid nec. Adquiduidi tantienda. <sup>20</sup> Icsabudesambo tantiata. Nuquin Papambo tantiec aidbēd tabadte bunquin ambi chiacpadomboen nata. Chōdquetiapimbo icquid yec shēnibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquoio tantiata. <sup>21</sup> Mibi bunaidquoio ēnenquoio icquin tantiec mibi tabadtsiac. Nuquin Papabēd tabadte bunquin aid tantiata —quepondash Esus.

*Pabiate shēcuē cuembo icquid chiaid*

*(Duc 11.34-36)*

<sup>22</sup> Adshumbic abi macuēsh dapa poctse tsadquin utsitsen Esusēn chuipondash. —Pabiate shēcuē cuembo icquin Nuquin Papa tantiaquiec mitsanauidi tantienquoio yec mibi bēdamboec tabadtsiac. <sup>23</sup> Pabiate cuēnēdacimboc yec Nuquin Papa tantienquoio yec mitsanauidi tantiec ĵbēdamboecta tabadtsia? Padenquoio. Adec mibi icsamboec tabadtsiaque. Adenda —quequin chuipondash Esusēn.

*Bedteuidi tantienda, quiaid*

*(Duc 16.13)*

<sup>24</sup> Adshumbic naden Esusēn chuipondash. —Mitsanauidi tantiec mibi icsamboec tabadtsiac. ĵ“Naic cho,” quequin daēdshun chiacna aid daēdi mimbi nashumpatsia? Padenquoio mimbi ictsia. Abentsēc nashunquin utsin chiaid mimbi natiapimbo ictsia. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsēqui tantiata —quequin Esusēn chuipondash.

*Nuquin Papan abi tantiaquido dayun uaid*

*(Duc 12.22-31)*

<sup>25</sup> Adshumbic Esusēn padpiden chuipondash. —Ēmbi aden chuisho tantiash dacuēdenda. “ĵAtotsimbi pepe? ĵAtotsimbi acpe? ĵAtotsibi dasiuidpe?” quec dacuēdenda. Nuquin Papan nac unēsabi mibi tabadeque. Aidēmbien petebēda dasiuidte icmeque. “Con na nibēdtsiash,” quiaish dacuēdec tabadenda. <sup>26</sup> ĵUicchunēnda ambibi cuēte ēshē siac bacuēacsho chepadic? Padenquoio. Adecbidi ambi pete dayun uatequid shubumpi nibēdec. Adquid icsho Nuquin Papan aton pete bedmec. Uicchun abipadquidpenquoio icshobi aton pete Nuquin Papan bedmec. ĵAd icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuēdenda. <sup>27</sup> ĵ“Unēstiapimbo iquebi. Dacuēdebi,” quequidta unēsenuquoio icpadic? Adequi dacuēdquid unēsstiashe. Unēsteuidi dacuēdēnenda.

<sup>28</sup> “ĵAtotsibi dasiuidpeba?” ĵquecta mibi dacuēdec tabadpe? Tantia. Chuinu. “Cuēte bacuēec bēdamboshē isadtsec,” quepec nuquin matses. ĵAton sedquidi shoyontsēcshun abi dasiuidte daēdcash dasiuidtsashta bēdamboshē isadpadic? Padenquoio. Nuquin Papan uacpadquidobi iquec. <sup>29</sup> ĵCuēte bacuēec bēdamboshē isadquidbimboecta nuquin tsusedpa chuiguid dapa Sadomon cuēmēdquidēn dashcute icpampic? Padenquoio. Adpenquien



icpampic. <sup>30</sup> Cuète bacuëec bédamboshë isadboed abadiadtsëcshumbi isac ènden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquio. Mibi dasiuidte icmeque. Dacuëndenda. Mitsana nibédquio icte dacuëndënuimbi mimbi Nuquin Papa bēdiactsëc tantiatseque. <sup>31</sup> Dacuëndec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. <sup>32</sup> Nuquin Papa tantiesaboen adquid bedteuidi bunquieque. Adenda. Mitsana nibédsho isun Nuquin Papan mitsana icmetsiashe. Abi tantiaquido yec dacuëndec tabadenda. <sup>33</sup> Adenquio yec: “Con Icho mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibédnuc nësebi,” quequin mimbi tantiaidtedi Nuquin Papan mitsana icmetsiashe. <sup>34</sup> Èbi adsho tantiashe badiad utsi caic: “Aid badiadën ¿atotsimbi nape?” quec dacuëndenda. Aid badiadën Nuquin Papan ambi tantiacpadom-boen mibi nametsiashe. Nēid ushēmbi: “Naden naimbi,” quequin tantiec tabadnuna dacuëndequio yec —quequin chuipondash Esusën.

## 7

### *Utsibo icsaid chienda, quiaid* (Duc 6.37-38, 41-42)

<sup>1</sup> Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. <sup>2</sup> “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. <sup>3-4</sup> ¿Abi bētsiadaid bēchish nua bēuequid bēbedadabi icquidēnda: “Mibi bētsiadaque. Bēbednu,” capatsiashe utsi chuiquin? Padenquio. <sup>5</sup> Abi bētsiadaid abia bēbedadashien: “Mibitsen bēbednu,” quetsiashe. Adembidi mimbia mibi icsaid ènshun: “Icsaid ènash bédamboequien tabadtiad,” quequin utsibo bédamboen chuita. Bédambo icquid damianquidën abi icsaid ènabi: “Aid icsambo iquec,” quequin utsibo icsaid chuibanec. Adquid tanenda. <sup>6</sup> Mimbi bédamboen chiaqui tantienquio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbinboen mibi chieshëntiashe. Chanchon icbon dashcute nebudshun bēchish uaquin tin-tincacbinboen Nuquin Papan chiaid niac-niacsiashe. Adquid chuidonenda —quepondash Esus.

### *Ènenquio icquin Nuquin Papa chianete chiaid* (Duc 11.9-13)

<sup>7-8</sup> Nadembidi Esusën chuipondash. —Nuquin Papa ènenquio icquin chuidoneta. Bacuëbon: “En na,” cadoniacbinboen chuidoniac Nuquin Papan mibi tantiasiashe. Adembidi: “Èbi bédamboen name, Papa,” mimbi cacpadomboen bédamboen mibi nametsiashe. Adembidi: “Èbi nashunquin èbi bédambo icmeta, Papa,” quequin chuidoniac Nuquin Papan mibi bédambo icmendac.

<sup>9</sup> ¿Icsambo icquidta Nuquin Papa icpadic? Padenquio. Bédambo icquidquio nec. Bacuëmpi: “Bundobique. Penu. Beccho, papa,” ¿queshoda amèn cudasënquin cuënotebi menepadic? Padenquio. <sup>10</sup> ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquio. <sup>11</sup> Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Èbi nashunta, Papa,” quesho tantiashun bédamboen nashuntsiashe. Nuquin Papa chianeta.

(Duc 6.31)

<sup>12</sup> Nuquin Papan tantiaido icquin utsibo bēdamboen isquin bēdamboen nashunta. Utsibo caic: “Aidon nashumpashuni,” quequin mimbi otacquo tantiapadomboembidi utsibotsen nashunta. Aden Nuquin Papan chiaid Moisesbēttan nuquin tsusedpabo utsibon dada uaqin chiampicpadomboen mimbi natsiaque. Aden utsibo nashunta —quequin chuipondash Esusēn.

*Daēdpactsēcshun Esus tantiabente chiaid*

*(Duc 13.24)*

<sup>13-14</sup> Adshumbic Esusēn naden chuipondash. —Nuquin Papabēd tabadnuec aid tantiec bēdamboec tabadta. Shēcuē aniambo icquidēn matses abentse-abentsec puduedachimboec abentse-abentsec Nuquin Papa yacno puduednuec aid tantiec bēdamboec tabadec. Padnuen antied dapan abi maisi nidachimboec matses dadpenquo abi tantiesabo yec Nuquin Papan icsaido nēsecacno nidendac —quepondash Esus.

*Icsambo icquid nec, quequin tantiante chiaid*

*(Duc 6.43-44)*

<sup>15</sup> Abi macuēsh dapa poctse tsadquin naden Esusēn chuipondash. —Utsibo: “Nuquin Papan chiaidquo chuiquid nebi,” quec bēdambo icquid damianquid iquendac. Adquid choshon Nuquin Papan chiaid niacniacmequin icsamendac. Bēdi dapa nēish yua pete bunquiacimboec mibi icsamete bunquieque. Adquidēn chuisho tantienda. <sup>16</sup> “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuēte dada matsesēn tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adecbidi echo bacuē bēsho isash: “Bata nec,” quesa matses neoaic. <sup>17</sup> Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. <sup>18</sup> ¿Cuēte bēdan bacuē chetemaidta nepec? Padenquo. ¿Cuēte icsan bacuē chetequidta icpec? Padenquo. <sup>19-20</sup> Chetemaidbimboec muaquid bēdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncacimboen: “Nuquin Papan chiaid chiemi,” quec muaquid Nuquin Papan icsaido cuidacno nēsecaindac —quepondash Esus.

*Nuquin Papa yacno puduednu, queuidte chiaid*

*(Duc 13.25-27)*

<sup>21</sup> Utsitsen Esusēn chuipondash. —Ēbi caic: “Con Icho mibi nec. Mibi tantiembique. Mibi yacno ēbi puduedme,” ¿quequidtedida Nuquin Papa yacno puduedpatsias? Padenquo. Nuquin Papan chiapadomboen naquidquien abi yacno puduedtsias. <sup>22</sup> Nuquin Papa yacno ēmibi yuedte ushēn matses dadpenhun ēbi chuiuidendac. “Con Icho mibi nec. Mibi caic: ‘Aidēn nami-aidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuedaido cuemequinc comapenen tantiacquin ismequinc caombique. Nuquin Papa yacno ēbi puduedme,” <sup>23</sup> quesho ēbimbo tantiec Nuquin Papan chiapadec bēdamboec tabadabi icsho: “Ēmibi tantiacmaidquo mibi neque. Baded cuenta. Icsamboec tabadquid mibi neque,” caindambi. Ēbi adsho tantiash muainquo yec bēdamboec tabadta —quepondash Esus.

*Shubu uaquidbimboecquid chiaid*

*(Duc 6.47-49)*

<sup>24</sup> Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bédamboen natsiaque. Shubu uaqin bédamboen tantiaquidbimboec mibi icsiaque. Tantia. Chuinu. Bédamboen tantiaquidën mananënquo shubu uaqin buintad nitsinquid. <sup>25</sup> Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid. <sup>26</sup> Aden ëmbi chiacpadomboen naquid icnubi utsibo ëbi tantiesa iquendac. Aido shubu uaqin tantienquo icquidbimboec iquec. Tantienguo icquidën nadoquid. Acte cuidi cuëmanquiobi shubu uaqin badedi unëstsëcquidquo cuate nitsinquid. <sup>27</sup> Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(*Mad 1.22*)

<sup>28-29</sup> Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquo comapenen tantiaquin chuiposh —quecuededpondash matses dadpenquo.

## 8

*Esusën daicsaid bédamiaid*

(*Mad 1.40-45; Duc 5.12-16*)

<sup>1</sup> Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenhun tsi-banampondash.

<sup>2</sup> Adnubien dada ushumbo yec daicsaidquo choshon Esus ismenuen danëshën sebudpondash. —Ëbi bédamete bunquin mimbi ëbi bédametsiaque. Ëbi bédame, Icbo —caquien Esus: <sup>3</sup> —Ai, mibi bédamete bunebi. Mibi bédanendac —quequin mishtemaidquiobi mishnubi badedquo bédampondash daicsaid nibëdquiec. <sup>4</sup> Adsho Esusën: —Utsibo chienquo yec nëish yua abided unës uaquido ismenuec nidta. Mibi isash: “Bédamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bédamiaid*

(*Duc 7.1-10*)

<sup>5</sup> Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. <sup>6</sup> —Tantia. Chuinu, Icbo. Con shubun icquid con yua shëquëquenquo iccosh. Nati-ambo yec unëstiadtsëcquo iccoshe. Bédameta <sup>7</sup> —quesho tantiaashun: —Ai, bédamec nidnu. Nid —caquien: <sup>8</sup> —Padi. Mibi bédamboshë icquidquo nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bédameta. Nidenquo icquin nëshunquiobi mimbi: “Bédanta,” cac con yua bédantsiashe. Mimbi tantiacpadomboen namequidquo mibi nec. <sup>9</sup> Ëbibic chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquo choec. Con yuan ëmbi: “Nata,” cac ëmbi chiacpadomboen naic. Mibi adquidquiobidi neque. Con yua bédameta —quequidpondash chuiquid dapa.

<sup>10</sup> Adsho tantiashun Esusën abi tsibambëquido chuipondash. — Bédamboen nëidën chuipec. “Comapenen tantiaquin chuiquinuidi con

yua bēdametsiash,” quequin ēbi bēdamboen tantiaquid nec. Isadaidbo adquid nibēdec. Isadaidbon ēbi bēdiactsēc tantiabededtsec. <sup>11</sup> Tantia. Chuinu. Matses utsi icquimbi sondado chuiquid dapan ēbi bēdamboen tantiec. Adec nidaid utsi-utsiec yacnocquido isadaidpemo ēbi tantiaquido yanash Nuquin Papa yacno puduedendac. Ambo puduedash isadaidbo tsusedpabobēd tabadendac. Abadauan caid yec Acobo caid yec Isac caid yec quequidobēd tabadendac. <sup>12</sup> Padnuen Nuquin Papan con matses caido isadaidbo dadpenquo Nuquin Papa yacno puduedenquo iguendac. Abi tantiesabo icsho Nuquin Papan cacumequin icsaido nēsecacno mibi nidmendac. Adoac mibi tēnquebudquiendac —quequin abi tsibambēquido isadaidbo chuipondash Esusēn. <sup>13</sup> Adshumbic sondado chuiquid dapa chuiquin: —Nidec nid. Mimi tantiacpadec min yua bēdaneque —cac nidshun isquien bēdanac Esusēn chuibocpadequi.

*Petodon nachi Esusēn bēdamiaid*  
(Mad 1.29-31; Duc 4.38-39)

<sup>14</sup> Adash yuec-yuecpactsēc ictanec Esus Petodon shubun puduedpondash. Puduedshun isquien Petodon nachi chumbo yec ueten uepec. <sup>15</sup> Uesho istuidshun mēdinquin Esusēn bēdamepondash. Aden bēdamiac Esus pemepondash.

*Esusēn matses dadpen bēdamiaid*  
(Mad 1.32-34; Duc 4.40-41)

<sup>16</sup> Petodon nachi bēdamiaid inchēshbudtsēqui Esus ismenuequin matses daicsaido dadpen bē-bēpondash. Bē-bēshobien podobitsi icsa dapuduedaido comapenec cuēdquin cuemeshumbic daicsaidotsen Esusēn bēdamebampondash. <sup>17</sup> “Nuqui icsaid ucquin nuqui daicsaidobi bēdamiac,” quequin ēndenquo Nuquin Papan Esusēn nate Isayas dada uamepampicpadomboen nanuen adopondash Esusēn.

*Abēd icte bunquido Esusēn chiaid*  
(Duc 9.57-62)

<sup>18</sup> Adashic abi isnuec matses dadpenquo datsidadsho isash abēd icquido chiec: —Chian potec nidnu. Nid —quianec chian yacno nidec puduampondash Esus. <sup>19</sup> Puduane nidaneshobien Moisesēn dada uampid chuibanquidēn Esus chinuntuidpondash. —Con Icbo mibi caindambi. Mibēd nidendabi —caquien: <sup>20</sup> —¿Ēbēdta nide? Tantia. Mibi chuinu. Bēdi chēshē shēcuēn ushquid. Uicchun shubu uash abuc ushquid. Padnueni con shubu nibēdmic Nuquin Papan matsesmiaid yec quenenenquo yec capucuenendac. ¿Ada mibi adpatsia? —capondash Esusēn Moisesēn chiampid chuibanquid chuiquin.

<sup>21</sup> Adnubien abēd capucuenoed utsin: —Chiata, Icbo. Con pa unēsoshe. Chococatambo —caquien: <sup>22</sup> —Padi. Cho. Ma unēsaidēn tantienquo yacimboen ēbi tantienquo icquidon ma papa chococanu. Ēbēdta bēdamboen naic cho —capondash Esusēn amē unēsaid chuiquin. Adobidanec nidanepondash chian yacno.

*Natiambo cunquenuc acte tēccuasquiaid Esusēn ēnēdmiaid*  
(Mad 4.35-41; Duc 8.22-25)

<sup>23</sup> Chian budash Esus chedo cano antabēdtopondash. Adashic potenuec puduampondash. <sup>24</sup> Aden potenubi nēnantanquo icnuc cunquetuidpondash. Adnubien acte comapenec tēccuasquiampondash. Adec acte tēccuasquenuc cano acte ancushad-ancushadquiec yampondash cano mentoadtiadtsēcquo yec. Adsho isun abēd icquidon: —Dacuēdampambo iquēc —quetanquin isquien Esus ushpec.

<sup>25</sup> Adshobien tinquin: —Nuqui mentoadeque. Isucun, Icho. Baded ëbi nashun —caquien: <sup>26</sup> —¿Atotsi quiash dacuëde? Ëbi bëdiactsëc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquio ënëdpondash cano mentoadtsevenquionobi. Actetsen tēcuasquenquio yampondash. <sup>27</sup> Adsho isashien: —¿Mitsipadquidëdquio actebëdta cunquequid ënëdmepashba? —quecuededpondash Esusbëd icquido.

*Dada daëd dapuedaido podobitsi icsabo Esusën cuemiaid*  
(*Mad 5.1-20; Duc 8.26-39*)

<sup>28</sup> Aden chian potiash pudundonobien Cadada yacnocquid podobitsi icsa dadpen dapuedaid dada daëd choshon Esus chuituidpondash. Aid daëd unësaïdo chococaid shëcuëmbi tabadpondash. Matses cuesunete bunquiecdacuëdampambo icscho isash aid yacno matses nidenquio icpondash. <sup>29</sup> Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaïd chuiquin.

<sup>30</sup> Uano chanco dadpenshun natiacquin udquin pebededpondash. <sup>31</sup> Adnubien podobitsi icsabon aid dada daëd oncameoac: —Ëbitedi cuemiachanco icho-ichoec dapuededtsiabi —quecuededpondash podobitsi icsabo. <sup>32</sup> Adsho tantiaashun Esusën: —Ai, mimbi tantiacpadec nid —cac nidash chanco icho-ichoec dapuednubi chanco abitedi macuësh budec acte nësebudec mentoadbudnepondash nibëdquieç yec. Adeç podobitsi icsabo dapuedenanec nidnubi dada daëd bëdambo yampondash.

<sup>33</sup> Adsho istanequien chanco pemequido aton matses chieç niquianec shubu dadpen yacno nidanepondash. Chanco mentoadbudneboëdëdta podobitsi icsabo dapueduemeboed uesquin chuituidpac caondash. —Nuqui dacuëdëmboedobi bëdambo yanosh —quequin <sup>34</sup> chuituidaquien anocquido abitedi Esus isec cho-chopondash. Adeç cho-choshombien: —Dacuëdampambo mibi iqueque. Ëbi yacno choenda. Nideç nid —cabededpondash. Adoac Esus nidpondash.

## 9

*Shëquëquenquio icquid Esusën bëdamiaid*  
(*Mad 2.1-12; Duc 5.17-26*)

<sup>1</sup> —Nid —cac nidanec chian budash cano antabëdtoshon chian potiash abi iccondacnobidi Esus choapondash. <sup>2</sup> Adnubien utsibon dada shëquëquenquio icquid Esus ismenuen aton uetechobi bëpondash. Bësho isumbien Esusën: —Ëbi caic: “Aidën bëdametsiash,” qeshun bëac —quequin daicsaid chuipondash naden. —Dacuëdenda, madosio. Ambi chiaïd niac-niaqueç icsaboedi cuidmenquio icquin Nuquin Papa mibi bëdamboen ismembique —capondash Esusën.

<sup>3</sup> Adsho tantiaash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iqueç. Icsamboen chieç —quecuededpac caondash Esus caic.

<sup>4</sup> Uanuësh adsho ambembi tantiaashumbien Esusën aïdo chuipondash. —¿Atotsi quequin mimbi ëbi chieshëmpe? <sup>5</sup> Ambi namiaïd icquin ëmbi: “Nuquin Papa cuidmenquio icquin mibi bëdamboen ismembic” cac Nuquin Papan nëïd cuidenquio iquendac. Adembidi ambi namiaïd icquin ëmbi: “Caputa,” cac nëïd capuendac. <sup>6</sup> Istac. Mibi ismembique. “Nuquin

Papan chomiaid nec. Icsaidobi Nuquin Papa bēdamboen ismequid nec, mabi canu,” qeshun naimbique. Istac —quetanquin dada shēquēquenquo icquid chuiquin: —Caputa —capondash Esusēn. <sup>7</sup> Adoac bēdanash aton shubuno nidpondash. <sup>8</sup> Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bēdambo iquec —quecuedēdpondash isquido.

*Ēbēd iquec cho, quequin Esusēn Mateyo chiaid*  
(Mad 2.13-17; Duc 5.27-32)

<sup>9</sup> Adnubini con matses aton piucquid bedshunuec podqued cuēman tsadquid shubumpin tsadpondac. Con matses yuaquid ancaquid dapan: —Min matsesēn na ěmbi chiacledi piucquid bedshun ěbi meneta —cac niondabi. Ambo tsadshobini Esusēn ĩstuidpondash. ĩstuidshumbini Esusēn: —Nuquibi icnu. Cho —capondash. Adoac badedi tsibanane <sup>10</sup> nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbēd pec tabadnuec ěbēdtan piucquid bedshunquidobēdi con matsesēn: “Īcsaido nec,” caidombo pudued-puduedpondash. <sup>11</sup> Adsho ĩsumbien Esus chieshēnquido Padiseyobo caidon Esusbēd icquido chuituidpondash. —¿Atotsi quiash mibi chuiquid Esus caid icsaquidobēdi pec tabadpec? Īcsambo iquec —capondash Esus chieshēnquidon.

<sup>12</sup> Adsho tantiasħ Esus nadpondash. —¿Bēdambo icquidta dauēchoquidēn dauē menepadic? Padenquo. Ma daicsaidi dauēchoquidēn menepaid yoc. Adembidi icsaidobi abi icsaid uacquin bēdambo ĩcmenuec nebi. <sup>13</sup> Nuquin Papan naden dada uamiampid pausudshun bēdamboen naic nid. “Ēmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen ĩstiapimbo iquec. Adsho ĩsun: ‘Mibi bēdambo iquec,’ catiapimbo iquebi” quequin Nuquin Papan dada uamiampid pausudta. Ēbibi matses bēdamboen ismequid nebi. Muaquido: “Bēdambo icquid nebi,” qesho bēdambo ĩcmetiapimbo iquebi. Īcsaquidobi: “Nuquin Papan chiaid ĩac-niaquec ĩcsapobi,” qesho: “Īcsainquo yec ěnēdta,” canuec nebi —quepondash Esus abi chieshēnquido chiec.

*Esusēn buna mēmunquido chiaid*  
(Mad 2.18-22; Duc 5.33-39)

<sup>14</sup> Adnubien Uan acten mentoanquidbēd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mēmunquidquo nebi. Padiseyobo adembidi naquidquo nec. ¿Atotsiesħun mibēd icquidon aden nainquo icpec? ¿Natiapimboda iquec? —caquien <sup>15</sup> Esus nadpondash. —¿Īcbon: “Pec cho,” cacta aid tantiec sedenquecuededquin buna mēmumpadic? Padenquo. Adquidbēdtan pec cuishonquec tabadquid. Īcbo nibēdanan sedenquecuededquin buna mēmunquid. Ēbi nibēdanan ěbēd icquidon ěbiuidi tantianuen buna mēmunenac —quepondash Esus.

<sup>16</sup> Adshumbic Esusēn naden chuipondash. —Dashcute chuca cuēshun dashcute shēni nedesquaidbēdta tuscaisa. Aden tuscashun panac shēni badedquo nedesquequid. <sup>17</sup> —¿“Machi sandono,” qeshun tsitsan shēnimbida sandopadic? Padenquo. “Machi sebudnushe,” qeshun tsitsan shēnin sandoenquo icquid. Tsitsan chuca daēdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquo icquin ambi bēdamboen ĩste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbēd icquido chiec.

*Champi uincuemaiidbēda chido bēdamiaid**(Mad 5.21-43; Duc 8.40-56)*

<sup>18</sup> Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadsēcquo iccoshe. Mīshēc cho. Mīmibi mishac bēdantsiashe —capondash. —Mibi con Ico canu —quequin danēshēn sebudquin ismepondash. <sup>19</sup> Adoquien Esus aibdēdi nidpondash.

<sup>20-21</sup> Nidnubien chido intac budted-budtedec seta 12tedi matamec bēdanenquo yec nacchoadbudquidēn Esusēn cachochsēqui choquin: —Bēdamianquidēn dashcute mishec bēdampatsiashe icmanendac —qeshun ismenquo icquin dashcute cuēmano mishtsac caondash. <sup>22</sup> Adoquien bidiadquin isun Esusēn chuipondash. —Dacuēdenda. Mibi: “Aidēn nac bēdantsiabi,” quiacpadec mibi bēdanendac —Esus quenubi bēdampondash.

<sup>23</sup> Aid bēdamebidanec nidequi chuibante shubun tabadsho isquidēn shubun puduedshun isquien matses dadpen tabadec. Champi unēsacsho isash sedenquecuededec tabadec. Nēdic matses unēsān con matsesēn nacpadom-boen shoncate shoncaquido. Nēdic comapenec sedenquecuededquido dadpen. Aidedti icpondash. <sup>24</sup> Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —qeshun Esus mamēnshumbedpondash.

<sup>25</sup> Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. <sup>26</sup> Adsho isun champi unēsaid uincuemaiid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

*Bēshuaid daēd Esusēn bēdamiaid**(Duc 18.35-43)*

<sup>27</sup> Auēshquo puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquin ēbi bēdame —quebud-quebudpondash. <sup>28</sup> Shubu utsin puduedash abēdi tabadshobien Esusēn: —“Ēbi bēdametsiashe,” ¿caindabi ique? —caquien: —Ai, adebi —quepondash.

<sup>29</sup> Adshobien aid daēdi bēmishquin: —Mīmibi tantiapadec bēdanta —cac <sup>30</sup> bēdampondash. Adsho isun Esusēn: —“Bēdamioshi,” quequin utsibo chienda —capondash. <sup>31</sup> Adoboqui anocquidotedi chuiben-chuibempac caondash.

*Esusēn onquesa bēdamiaid*

<sup>32</sup> Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash. <sup>33</sup> Bēacsho isun Esusēn podobitsi icsa dapueduemiāc bēdanash onquiampondash. Aden bēdamēsho isash: —Nuquin nidaid Isadaid caidēnshun adoēn ictenec —quecuededpondash isquido.

<sup>34</sup> Adnubien Esus chieshēnquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

*Esusēn matses tantiaquiaid*

<sup>35</sup> Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaidō bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnoamboen chuibanquimbi matses bēdamebampondash. <sup>36</sup> Abi tantienquo icquido dadpen cho-chosho isash unēsquo icnuc shubiantiadquico icpondash Esus. —Abi isquid nibēdnuc bacuēbo icsamboec tabadacimboec icsambo iquec. Nuquin Papa bēdamboen ismete chiabi yac tantienquo yec natia

chieshēmēnec bēdamboec tabadtiapimbo iquec —quiash shubiantiadquo icpondash Esus.

<sup>37</sup> Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudneqid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquo iqueque. <sup>38</sup> Nuquin Papa chianeta. “Matses dadpenhunquo mimbi bēdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

## 10

### *Esusbēd icquido 12tedi chiaid (Mad 3.13-19; Duc 6.12-16)*

<sup>1</sup> Adshumbic Esusēn abēd icquido 12tedi chuipondash. —Ĕmbi naid chuibeneta. Ĕmbi namiaid icquin Ĕmbi nabocpadomboen podobitsi icsa matses dapuedaid mimbi cuemendac. Adembbidi daicsaido abitedi mimbi bēdamendac —quequin chuipondashi nēidtedi. <sup>2</sup> Nēidic Petedo caidbidi Simon cuēmēdquid. Nēidic abēdta tishaid Andedes cuēmēdquid. Nēidic Sebedeyon mado abi daēdi. Abentsēc Acobo icnuc utsi Uan icpondash. <sup>3</sup> Nēidic Uedipe. Nēidic Badtodome cuēmēdquid. Nēidic Tomas. Nēidic Ĕbibi Mateyo con matses piucquid bedshundenēdi. Nēidic Acobo cuēmēdquid utsi Adpeon mado. Nēidic Debeyo caidbidi Tadeyo cuēmēdquid. <sup>4</sup> Nēidic Simon cuēmēdquid utsi con matses yuaquido cuemete bunquid. Nēidic Iscadiote caidbidi Udas cuēmēdquid abi chieshēnquido Esus bedmequid. Aidtedi abēd icquido icsho chuipondashi.

### *Abēd icquido: Chuibeneta, caid (Mad 6.7-13; Duc 9.1-6)*

<sup>5</sup> Adshumbic: —Ĕmbi chiacpadomboen chuibenenuec nidshun isadaid-pembo chienda. Aido yacno nidenda. Nidaid cuēshē Samadia caid yacnocquidon shubu datambidanta. <sup>6</sup> Nuquin matses isadaidbouidi chuibeneta. Bēnudshun podqued tantienquo yacimboen nuquin matsesēn Nuquin Papano tantienquo iqueque. <sup>7</sup> “Mibi icsaid Ĕnash bēdamboec tabadta. Nēbi abēd tabadtequido icmequin Nuquin Papan matses bēdamboen tabadmendac,” quequin chuibeneta. <sup>8</sup> Adembbidi daicsaido bēdamequinc unēsaido uincuemequinc dada ushumbo yec daicsaido bēdamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ĕmbi nabocpadomboembidi mibi namembique. “Piucquid beccho,” quequin nainquo iccombique. Adembbidi nashumbanta. <sup>9</sup> Aden chuibenec nidquin min piucquid buanenda. <sup>10</sup> Adembbidi pete sandoaib buanenda. Dashcute utsibēdta tapucudte utsi sandoshon buanenda. Mibi tidinquete cuate abentsēqui buanta. Adec mēdadauidquo chosho isun mimbi bēdamaidon: “Mibi bēdambo iquec. Ĕbi yacno ushec cho,” mibi cac bēdambo ictsiash. Adembbidi: “Mitsana nibēdsho isun mibi menenu,” mibi cac bēdambo ictsiash.

<sup>11</sup> Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidēn shubun ushta. Auēshquo nidabi yec aidēn shubunuidi ushta. <sup>12</sup> Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. <sup>13</sup> Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo



icmendac. Anocquidon mibi chieshënsho Nuquin Papan aido bédamboen istiapimbo iquec. <sup>14</sup> Shubu dadpen icquid utsi yacno mibi nidacsho anocquidon cuemiác naden ismeta. Áuëshquío puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. <sup>15</sup> Mimi adosho isun matses cuidte ushëmbi Nuquin Papan aido comapenen cuidendac. Èndenquimbo shubu dadpen yacnocquidotedi cuidquin Nuquin Papan uesquin unës ua-pampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daëd yacnocquido bēdiactsëc cuidshun mimi chiaid tantienquío icquido comapenen cuidendac —quepondash Esus abëd icquido chiec.

### *Esus tantiaquido chieshënte chiaid*

<sup>16</sup> Adashic padpiden chuioaic: —Èmbi naid chuibenequido icsho utsin-utsinquien mibi chieshënendac. Bēdi nēish yua acte bunacbimboec chieshëmēnquido mibi cuate bunendac. Aidobëd chieshënanenda. “¿Mitsipadomboen chiac Nuquin Papan chiaid tantiabempatsiash?” qeshun bédamboen tantiaquin bédamboen chuita. <sup>17</sup> Mibi chieshënquin cuesnetiadquío iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquío mibi cueshcaten cueshcaindac. <sup>18</sup> Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabëdta isadaidpembo ëmbi naid chuibanu,” ëbi quenuc mibi aden buanendac. <sup>19</sup> Adoac dacuëdenda. “Chuiquid dapa yacnoshon ¿atotsimbi chuipatsiaba? ¿Adambi bédamboen chuipatsiaba?” quec dacuëdenda. Chuiquid dapa mimi bēisnubi Nuquin Papan ambi tantiacpadomboen mibi oncamendac. <sup>20</sup> Aden aton Mayanën ambi tantiacpadomboen mibi oncamendac —quepondash Esus.

<sup>21</sup> Adashic padpidec onquec: —Èbi chieshënquidon ëbi tantiaquidotsen comapenen chieshënendac. “Esus tantiaquid nec,” qeshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac. <sup>22</sup> “Esus tantiaquid nec,” qeshun matses dadpeshun aden chieshënaqui chieshtoenquío icquin ëbi tantiasho Nuquin Papan abi yacno mibi puduedmendac. <sup>23</sup> Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nēid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

<sup>24</sup> Mibi tantiamequid nebi. Èmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icho chieshënquimbi yuabotsen chieshënquid. <sup>25</sup> Adembidi ëmbi chiacpadomboen natiadquío icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icho Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedquido icsho mibitsen chieshënendac —quequin chuipondash Esusën abëd icquido chuiquin.

### *Dacuëdenquío icquin chui, quequin chiaid*

(Duc 12.2-7)

<sup>26</sup> Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac.

Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bēdamboen naidtedi Nuquin Papan utsibo tantiamendac. <sup>27</sup> Nēbi ěmbi mibitedictsēqui chuiboed dacuēdenquo icquin utsibo chuibeneta. <sup>28</sup> Chuibenesho min dadauidsēqui cuesunetequid dacuēdenenda. Min tantiate unētiapimbo icquid icsho nibēdametiapimbo iquec. Min dada unēsan min tantiate abi icsho cuidnuequin chian anēdēnquequid nēsecanquid tantiaata. Adquid Nuquin Papa icsho dacuēdēnta.

<sup>29</sup> Utsibon chieshēnaqui dacuēdēnta. Nuquin Papan mibi tantieque. ¿Padichucu cuesaid isashta unēsqiuo icti? Padenquo. Padnuen ambi tantiapadomboembi padichucu dadpen icquid abentsēc cuesac paēdsho Nuquin Papan tantiec. <sup>30</sup> Adembidi min manēdaid Nuquin Papan tambanaidquo nec. Aden min manēdaid abentsēc paēdsho aidēn tantiec. <sup>31</sup> Aden min manēdaid tambanquid icquin padichucu bēdiactsēc tantiatsequin mibien comapenen tantieque. Mibi chieshēnquido dacuēdēnta —quequin chuipondashi Esusēn.

*Esus con Icho nec, quequido chiaid  
(Duc 12.8-9)*

<sup>32</sup> Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ěbi puduedmequid nec,” quequin chianequid Nuquin Papa yacno chosho isun: “Nēid ěbi tantiaquid neque. Puduedmeta, Papa,” quequin Nuquin Papambo chiendambi. <sup>33</sup> Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bēdamboen istiapimbo iquebi. “Nuquin Papa yacno puduednu,” qesho: “Padi. ěbi tantiaquidpenguio neque. Puduedmēnta,” quequin Nuquin Papa chiendambi —quequin Esusēn chuipondashi.

*Esus tantiaquidobēdi cuēshēdte chiaid  
(Duc 12.51-53; 14.26-27)*

<sup>34</sup> Adshumbic padpiden chuiquin: —Ěmbi chuiboed tantiaashun: “Nuquin Papa yacnuēsh choquid icquin abitedimbo bēdamboen tabadmetsiash,” ¿caquindabi ique? Padenquo ictsiambi. ěbi tantiaquidobēd ěbi tantiesabo cuēshēdenquo icte danēnta. ěbi tantiaquidobēdi ěbi tantiesabo cuēshēdēntac. <sup>35</sup> Amēbēd aton mado cuēshēdēntac. Adecbidi anibēd aton champi cuēshēdēntac. Adecbidi aton chayabēd aton babanēn cuēshēdēntac. <sup>36</sup> Aden aton shubun icquidombi ěbi tantiaquid chieshēntac.

<sup>37</sup> Padnubic aton matesuidi tantiaquidēn ěbi bēdiactsēc tantiatsectsiash. Aton tita tantiaquinc aton papa tantiaquinc cain aidēn chiapadomboenuidsēqui naquidēn ěbi bēdiactsēc tantiatsequin ěmbi chiapadomboen natiapimbo ictsiash. Adembidi aton mado tantiaquinc aton champi tantiaquinc cain aid bēdambo icmeteuidsēqui bunquin ěbi bēdiactsēc tantiatsequin ěmbi chiapadomboen natiapimbo ictsiash. Adquido bēdamboen istiapimbo iquebi. ěbi tantiesabo nec. <sup>38</sup> Utsibon chieshēnac ěbi tantiatsechoedi badedi chieshtoshon ěmbi chiapadomboen natiapimbo yantsiash. Adquidotsen ěbi tantiaquidpenguio iquēntac. <sup>39</sup> Matses ambi naiduidi naquid Nuquin Papa yacno puduedtiapimbo iquēntac. Padnuen ěbi tantiaquinc ěmbi chiapadomboen naquid Nuquin Papa yacno puduedēntac. Adquid chieshēnaqui chieshtoenquo ictsiash —quequin Esusēn chuipondashi.

*Nuquin Papan bēdambo icmete chiaid  
(Mad 9.41)*

40 Adshumbic Esusën ëbi chedo padpiden chuipondash. —Mibi chieshënquido icnubi mibi bédamboen isquid iquendac. Ëmbi naid mimbi chuisho tantiash: “Ai, abimbo caic,” queshun ëbi tantiabenquin ëbi chomequidtsen tantiabenendac. 41 “Naden naindami,” quequin ambi chiaid chuibenequid Nuquin Papan bédamboen isaïdo nec. Adquid shubu utsi yacno nidacsho isash: “Nuquin Papan chiaid chuibenequid choeque. Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiacpadec bédamboec tabadquid Nuquin Papan bédamboen isaïdobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” queshun bédamboen isquidotsen Nuquin Papan bédamboen isendac. 42 Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

## 11

### *Uan acten mentoanquidën chuimiai*

(Duc 7.18-23)

1 Esusën: —Chuibenetan —cac abéd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaïd cuëshë Cadidia caïdën capucuenequin adoac caondash. Adnubini yuec-yuecpambo ictanec Esusbéd icoaic cho-chopondac.

2 Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abéd icquido chuiquin: —¿Nuquin Papan chomiaïd nuqui cainaidta nepec? Esus chuitan —cac choshon Uambéd icquidon Esus chuituidpondash. 3 —Uanën: “Chuitan,” cac chobi. ¿Ëmbi cainaid Nuquin Papan chomiaïdquïda mibi nepe? Mibi adqaidpenquo icnuc ¿ada utsi chopatsiash? —caquien 4 Esusën: —Ëmbi nadatiampo icquin nabamboedbëdta ëmbi chuiboed Uan chiec nid. 5 “Bëshuachoedën isbenosh. Canite icsaïdi capucuenosh. Daushumbo icquid nami mishadenquo icquid bédanosh. Pashuachoedën tantiabenosh. Adoshombic unësaiïdi uincuemïosh. Adoshombic Nuquin Papa tantienquo icquido Nuquin Papan bédamboen iste chuïposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaïdquïdo nec,” quequin ëbi tantiendac. 6 Adshumbic nadentsen chuita. “Muambo nec, ëbi cainquo icquin: Ambi chiacpadquid Nuquin Papan chomiaïdien nec, quequin ëbi tantiaquid Nuquin Papan bédambo icmendac, quïosh,” quequin chiec nid —cac nidanepondash Uambéd icquido.

### *Uan acten mentoanquid chiaïd*

(Duc 7.24-35)

7 Aïdo nidanebon Esusën Uan acten mentoanquid chuiquin abi datsidquido naden chuipondash. —Matses nibëdacno ¿atotsi quenuc nidonda? ¿Cunquëquidën ishacunaid isnuecta nidtionda? Padenquo. 8 ¿Dashcute bëdaïdquïdo dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bédamboshë icquid dasiuidquïdo ancanquidën shubu dapan tabadquïdo nec. 9 Ad icnuc ¿atotsi quenuc nidonda? “Naden naindami,” quequin Nuquin Papan chiaïd chuibenequid chuïsho tantianuec ma mibi nidondac. Adëc Nuquin Papan oncamiaïdquïdo Uan nec. 10 Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bédambo icquid choeque. Icsainquo yec ènèdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. <sup>11</sup> “Nuquin Papan chomiaidquo choec,” quequin chuiquid Uanpadquid utsi nibèdec. Adquid yequi: “Abi choec,” quequin ambi chuiboedèn èmbi nabansho isabi yequi bédapabi Uan icctsec. Padnuen èmbi Nuquin Papan chiacpadomboen nabansho isash èbi tantiaquido bédamboshè iquendac. <sup>12</sup> Uanèn chuisho Nuquin Papa tantiabenacpadomboen èmbitsen Nuquin Papan bédamboen iste chuisho tantiashun adembidi abi icsaid ènshun icsaboedon dadpenshun Nuquin Papa tantiendac. <sup>13</sup> Nèbi Uanèn: “Nuquin Papan abi yacnoshon bédambo icquid chomendac,” quequin chuipondash. ¿Ambiada adopondash? Padenquo. Èndenquimboshè tauamboen nuquin tsusedpa Moisesèn chuiebpampic. Adshumbic utsintsen. Adshumbic utsintsen. Aden Nuquin Papan ambi bédambo icquid chomete chuiquin dada uamianepampic. <sup>14</sup> Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuèmèdquid choendac,” quequin Ediasbimboecquid Uan chote chuipampic. Bédamboen tantiaquin: “Nuquin tsusedpa Ediasbimboecquid Uan nec,” mimi catsiac. <sup>15</sup> Bédamboen tantiaquidèn adembidi tantiatsiash —quepondash Esus abi datsidadquido chieci.

<sup>16</sup> Aden chuisho tantiash chieshtoshobien Esusèn chuipondash naden. —Nuquin Papan chiaid tantienquo icquido yec nèmbo icquido ¿midapadquidoen nec? Bacuëbo nèishnanacbietsècquieci mibi iquec. Bacuëbo: “Èmbi chiacpadomboen nanuna,” queuidash ambi chiacpadomboen aton utsibon nainquo icsho isash nèishash chushcananquid. <sup>17</sup> “‘Cuèdènnuna,’ queuidbosh èbi cuèdènnubi ma mibi cuèdènnenquo icboc. ‘Sedenquenuna,’ queuidbosh èbi sedenquenubi ma mibi sedenquenquo icboc,” quetsash bacuëbo nèishnanacbietsècquieci ma mibi iqueyoc. Adec nèishèmèndquido yec icsambo ma mibi iqueyoc. <sup>18</sup> Uan pete utsi-utsien pesa iccosh. Adecbidi acte paèmbo icquid aquesambo niosh. Adquid icsho isash nèishash: “Èmbi nacpadomboen naisa nec. Podobitsi icsa dapuduedashien nechitec,” mibi quepondac. <sup>19</sup> Èbien nuquin matsèsèn piacbimboen pequid nec. Adembidi actequid acquid nebi. Adsho isash nèishun èbitsen icsamboen chuishunquin: “Petuiddi tantiaquin nua pequid nec. Tantiadenuen acte paèmbo icquid acquid nec. Adecbidi nuquin matsès piucquid bedshunquidobèd onquec icsambo icquid caidobèd onquec quequid ma aidobèdi icsambo icquid nepayoc,” mimi èbi capec. Padnuen bédamboen tantiaquidèn Nuquin Papan chiacpadomboen nasho isun Umbèdta èbi: “Bédambo iquec,” caindac —quepondash Esus abi chieshèndquido chieci.

*Shubu dadpen icquidèn tabadquido cuidte chiaid*  
(Duc 10.13-15)

<sup>20</sup> Adshumbic Esusèn padpiden chuipondash. —Nèbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiaquido iquebi,” quetiadquidi chieshec adenquo iquec —queshun Esusèn naden chushcapondash. <sup>21</sup> —Shubu dadpen icquid Codasin caid yacnocquidobèdi shubu dadpen icquid utsi Betsaida caid yacnocquido Nuquin Papan cuidtequido nec. Èmbi aido ismebocpadomboen ismiac isadaidpembocuidadenquo icctsempampic. Aden ismiacqui: “Ai, icsapobi,” quish shubibudequi icsainquo yec ènèdtsempampic. Shubu dadpen icquid Tido caid yacnocquidobèdi shubu dadpen icquid utsi Sidon caid yacnocquido adtsempampic. <sup>22</sup> Nuquin Papan matsès abitedi cuidte ushèn: “Nadatiambo

icquin nabanquin ismiacmaido nec,” qeshun Tido caid yacnocquido Sidon caid yacnocquidobêdta bêdiactsêc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobêdta Betsaida caid yacnocquido comapenec sidquenec cuidendac. <sup>23</sup> Adembidi nêmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshênquido cuidacno nidmetequido ma mibi nepayoc. Êndenquimboshê yampido shubu dadpen icquid Sodoma caid yacnocquido cuidquin Nuquin Papan nibêdamepampic. Êmbi mibi ismebocpadomboen ismiac aidon abi icsaid êntsempampic. Abi icsaid ênsho Nuquin Papan cuidenquo ictsempampic. Cuidenquo yac nêbi aton matses abi ictsiash. <sup>24</sup> Nuquin Papan matses abitedi cuidte ushên: “Comapenen tantiaquin ismiacmaido nec,” qeshun Sodoma caid yacnocquido bêdiactsêc cuidendac. Nuquin Papan chomiaid icquin êmbi ismeboedo Capednaun caid yacnocquidoen comapenec sidquenec cuidendac — quequin abi tantiesabo Esusên chushcapondash.

*Esusên dayacquiobimboecnuc icmete chiaid*  
(Duc 10.21-22)

<sup>25</sup> Adshumbic Esusên Nuquin Papa chuipondash. —Mibi bédamboshê iquec, Papa. Mibi yacnocquidotedishun Icbombi yec nidaidên tabadquidotedishun Icbobidi mibi nec. Mimbi tantiamiabi: “Dadpen tantiaquid nêbi,” quequidombi êbi tantiabi iquec. Mimbi tantiamiac nêidon êbi tantiec. Aden mimbi bédamboen naic. <sup>26</sup> Mimbi tantiacpadomboen mimbi bédamboen naic. Mibi bédamboshê iquec, Papa —quequin Esusên Nuquin Papa chuipondash.

<sup>27</sup> Adshumbic abi datsidadquido chuipondash. —Nuquin Papan ambi tantiaidtedi êbi chuimec. Êmbi naboedbêdta êmbi nate abitedi con Pan ambentsêqui tantiec utsibon tantienquo icnuc. Adembidi Nuquin Papan natebêdta ambi naboed abitedi êmbentsêqui tantiembi. Aden Nuquin Papa tantiaquin: “Nêidtedi matses bédamboen tantiamembi,” qeshun: “Nuquin Papa nadquio iquec,” quequin tantiamembi. <sup>28</sup> Êbi tantiata. Dayacquo yacimboecnuc mibi bédambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidên êbi tantiasho Nuquin Papa yacno puduedtequid mibi icmembique. Êbi tantiata. <sup>29</sup> Con Icho êbi cata. Con yuambo icquin êmbi chiapadomboen nasho mibi bédamboen isquin dayacquo yacimboecnuc mibi bédambo icmembique. Ancanesambo yec bédambo icquidini neque. Con Icho êbi cata. Adsho mibi bédambo icmembique. <sup>30</sup> Mibi ancainquo icquin dayacquo yacimboecnuc bédamboen mibi tabadmembique. Con Icho êbi cata —quequin chuipondash Esusên.

## 12

*Esusbêd icquidon petsêcsho istuidshun chushcaid*  
(Mad 2.23-28; Duc 6.1-5)

<sup>1</sup> Adshumbic chonoadtemaid ushên Esusbêd capucuenequin tied matanquin bundotsêcshun tiedên caniquid êshchicshun petempi petsêccondambi. <sup>2</sup> Pesho istuidshumbini con tsusedpabon chiampid namequido padiseyobon: —Is. Mibêd icquido chonoadtemaid ushêmbi chonoadeque — capondash Esus chuiquin.

<sup>3</sup> Adoquien Esus: —Ma icsapenquo icpayoc. ¿Nuquin tsusedpa Dabidên bundoshôn ambi petemaidquio pepampid chuiquin dada uapampid

isamboda ictio? <sup>4</sup> Aidën Nuquin Papa tabadte shubu uashunaid abi puduedtemaidën puduedshun ambi petemaid pan sanaid istuidpampic. Aid panëmpi nëish yua abided unës uaquidon petequid nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaidi napampic. <sup>5</sup> Adembidi chonoadtemaid ushën natemaid chiaid niacquimbi nëish yua abided unës uaquidon aid ushëmbi Nuquin Papa tabadte shubu uashunaidën puduedshun nacenendenepec. Nuquin Papan chiacpadomboen naiqui icsainquo icpec. <sup>6</sup> Nuquin Papa tabadte shubu uashunaid tantiaquin adopec. Aid shubu bëdapabi icnuc bëdamboshë icquid nebi. <sup>7</sup> Nuquin Papan naden chiaid mimbi bëdamboen tantienquo iquec.

“Ëmbi chiacpadomboen abentse-abentsen mimbi naic.

Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bëdamboen tantiaquidshun ëbëd icquidon bëdamboen nasho mimbi chushcainquo ictsenoc. <sup>8</sup> Tantia. Nuquin Papan chomiaid icquin chonoadtemaid ushë ëmbibi chiampid icnuc ëmbi tantiacpadomboen aid ushëmbi ëbi tantiaquido namembique—quepondash Esus ëmbi petsëcsho istuidquido chieci.

*Mëicsatsaid bëdamiaid  
(Mad 3.1-6; Duc 6.6-11)*

<sup>9</sup> Adanec nidec Nuquin Papan chiaid chuibante shubun puduedshun <sup>10</sup> isaquien mëicsatsaid icpondash. Adnubien padiseyobon: —Chonoadtemaid ushëmbi bëdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —qeshun Esus chuituidpondash. —¿Nadquid chonoadtemaid ushëmbi matses bëdamequinda Nuquin Papan chiaid niacpec? —caquien <sup>11</sup> Esusën: —¿Ada min nëish yua obeca caid icpec? Adquid chonoadtemaid ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushëmbi mimbi chonoadquin chicpatsiac. <sup>12</sup> Aden min obeca bëdiactsëc tantiec mibi bëdapabi icnuc matses tantiaquiquin nashunquid bëdamboshë ictsiash. Nadquid chonoadtemaid ushëmbi matses aden bëdamboen nashunquidën Nuquin Papan chiaid niaquenquo ictsiash —quequin Esusën abi icsamenu caquido chuipondash.

<sup>13</sup> Adotanquimbien Esusën mëicsatsaid chuiquin: —Mëcueta —cac mëcuëc bëdampondash aton mëdante abiuc daëdi bëdambo yec. <sup>14</sup> Adsho isashien abi chieshëquido padiseyobo nëishquiopac caondash. Adec nëishanec nidash aton matses utsibobëd: —Cuesunequimbien Esus ictiad —quecuededpac caondash.

*Esusën nate ëndenquimboshë chiampid*

<sup>15</sup> Adnubien Esus: —Ëbi cuesunetiadquido iquec —quianec auëshquiobi puduanec nidpondash. Nidsho isumbien matses dadpenshun tsibanampondash. Adshumbic aidon bëaid daicsaidotedi bëdamebampondash. <sup>16</sup> Adshumbic ambi bëdamiaido chuiquin: —“Bëdamioshi,” quenda —quequin chuipondash Esusën: —Ëbi abi chuiquid dapa icmenushë —quiash adpondash Esus. <sup>17</sup> Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

<sup>18</sup> “Ëmbi chomiaid ëmbi chiacpadomboen naquidquido nec. Aid tantiaquieci bëdambo iquebi.

Con Mayan bēdambo icquid abēdi tabadmembī.

Adoac ěmbi bēdamboen iste isadaidbobēdta matses utsibo abitedi bēdamboen chiendac.

19 Chushcanante bunenquio yec ancanenquio iquendac.

Chuiquid dapa ictiapimbo iquendac.

20 Icsambo icquido yec shubiquido yec natiaic tabadquido yec daicsaido yec quequidon abi bēdiactsēc tantiabentsēcsho bēdamboen isquin bēdamboen tantiamendac.

Nuquin Papan chiapadec cuidte ushē choabi icnuc adoendac.

21 ‘Nuquin Papan tantiapadomboen matses bēdamboen namendac,’ queshun nidaid utsi-utsiec yacnocquidon matses dadpenshun aidi tantiendac,”

quequin Esusēn bēdamboen nate chuipampic Isayasēn.

*Podobitsi icsan namiaidi Esus nec, quiaid*

(Mad 3.20-30; Duc 11.14-23; 12.10)

22 Adnubien Esus ismenuen daicsaid bēpondash. Dapuduedshun podobitsi icsan bēshu uain eme uaidi onquesa nepondash. Isenquio yec onquenquio icshobien Esusēn bēdamepondash. Adoac isbenequi onquiampondash.

23 Adsho isashien Esus datsidadquido: —Is. Comapenen tantiaquin nabanquidquio nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquio Nuquin Papan chomiaidien nechitec — quequededpondash.

24 Adsho tantiaish Esus chieshēnquido padiseyobo: —¿Aidta nedic? Ma aidpenquio neyoc. Betsibu caidēn podobitsi icsan icbon namiaid icquimbien Esusēn podobitsi icsa cuemehitec —quequin otacquo tantiapanēdash.

25 Adshobien Esusēn aidon otacquo tantiaid ambembi tantianshun naden chuipondash. —¿Adquidēnda aton yuabi cuemepatsiash? Padenquio. Chuiquid dapan aton yuabo nēishtanquin chushcac cuēsh-cuēshēdec aton yuabo uesadec nietsiash. Aido nibēdnuc chuiquid dapa ictiapimbo ictsiash. Adecbidi shubu dadpen icquidēn tabadquido chushcananash cuēsh-cuēshēdec niquan shubu dadpen icboedi daēdpactsēc yanec. 26 “Betsibu caidbidi Satanas caidēmbi namiaquien podobitsi icsa cuemehitec,” mimbi ěbi capoc. ¿Ambi naid nashobidā Satanasēn aton yuabo podobitsi icsabo cuemepatsiash? Padenquio ictsiash. Satanasēn cuemiatic aiddēdi aton yuabo cuēsh-cuēshēdtsiash. Adnuc Satanas aton icbopenquio yantsiash. 27 Mibēd icquidon podobitsi icsa dapuduedaid cuemiatic caosh. ¿Cuemesho isun mimbi ěbi chiapadomboen: “Betsibu caidēn namiaquien nachitec,” cainda ictio? Ma mimbi padenquio icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibēd icquido.

28 Nuquin Papan Mayanēn namiaquimbi podobitsi icsa cuemiatic. ěmbi adosh isash: “Nēbi matsesbēd icquin Nuquin Papan namiaidēn naosh,” quetiadquidi mibi nec —quepondash Esus.

29 Adashic abi onquec: —Tantia. Mibi chuinu. Ampenuesho icbon istuidac ampequidēn icbo uidēn uabi ampeshuntiapimbo iguec. Icbo uidēnquio icquid bucen cataneshun ampeshunquid. Adecbidi Satanas bēdiactsēc tantiaquid icnuc ěbien comapenen tantiaquidquio nec. Uidēn uacbimboen nadatiambo icquin nabanquin aton yua cuemepombi. 30 ěbi con icbo cainquio icquido Satanasēn yuabo nec. Adquid icquin ěbi chieshēnquin ěbi tantiatsēcquido cuēshēdendac. Adquidbidi mibi nec —quequin Esusēn abi chieshēnquido chuipondash.

31 Adshumbic nadentsen chuipondash. —Nuquin Papan chiaid niacniacboedēmbi ěnacsho Nuquin Papan bēdamboen isec. Nuquin Papan

icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquo icsho Nuquin Papan bëdamboen istiapimbo iquec.

<sup>32</sup> Èbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquo icquin icsamboen tantiasho adembidi ënenquo icquin bëdamboen istiapimbo iquendac —quequin abi chieshënquido Esusën chuipondash.

*Bëdambo icquid nec, quequin tantiate chiaid*

(Mat 7.15-20; Duc 6.43-45)

<sup>33</sup> Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. <sup>34</sup> Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. <sup>35</sup> Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc. <sup>36</sup> Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. <sup>37</sup> Adoac abimbo chiec: “Ai, bëdamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

*Padiseyobon: Èbi isme, quequin Esus chiaid*

(Mad 8.12; Duc 11.29-32)

<sup>38</sup> Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaidini nec,” quequin ëbi ismequin nadatiambo icquin nabanta. Isnü —quepondash padiseyobo Moisesën dada uapampid chuibanquidobëdi.

<sup>39</sup> Adoaquien Esus: —Padi. Nuquin Papan chiaid niac-niaquec mibi icsamboshë iquec. Èbi tantiate bunenquo icquimbi mimbi: “Èbi isme,” ëbi capec. Adsho nëbi mibi ismenquo iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. <sup>40</sup> Chishcambiecquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. <sup>41</sup> Èbi tantienquo yec mibi icsambo iquec. Padnuen Nuquin Papan chiaid Onasën chuibanac shubu dadpenquo icquid Ninibe caid yacnocquido badedi icsainquo yec ënëdpampic. Nuquin Papan chiaid chuibanquid Onas bëdambo icpampic. Èbien bëdamboshë icquidquo nec. Adquid icquin nadatiambo icquin dadpen ismiaqui mimbi ëbi tantienquo iquec. Aden ëbi tantienquo icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. <sup>42</sup> Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsën: “Icsambo mibi iquec,” mibi caindac. Aid ancaquid chido nepampic. “Isadaidho ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquo Sadomonën bëdamboen chuipoc,” quepampic. Èmbien abitedi tantiaquid



icquin nadatiambo icquin ismeuidpoc. Adoalui mimbi tantienquo icpec — quepondash Esus abi chieshēnquido chiec.

*Abi nianaid podobitsi icsa dapuedoaid*  
(Duc 11.24-26)

<sup>43</sup> Adshumbic naden Esusēn chuipondash. —Icsaquido mibi nec. Podobitsi icsa dapuedaidimbocquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibēdacno yec capucuen-capucuenec. Adtanequi: “Ēbi icbocnobidi dapuedoaic nidebi,” quianec choec. <sup>44</sup> Chonobi ambi niamboed matses: “Ēbi dapuedaid podobitsi icsa nibēdnuc bēdambo iquebi. Adquid chomeoati-apimbo iquebi. Ēmbimbo naic bēdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nēid nec,” quianec <sup>45</sup> abipadquid utsi bedec nidoaic. Nidshumbic <sup>7</sup>tedi icsamboshē icquido istuidshun bēash aidobēdi dapuedec. Adnuc podobitsi icsa abentsēc dapuedaid yec ēnden icsambo icboedi aido dadpen dapuedaid yec buēdanquiec aid matses icsamboshē yanec. Adquo mibi iquec. “Bēdambo iquebi,” queboedi nēbi mibi icsamboshē yanec — quequin Esusēn chuipondash.

*Anibēdi Esusēn utsibo choaid*  
(Mad 3.31-35; Duc 8.19-21)

<sup>46</sup> Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuēc chopac caondash. Umanuc tabadnubi <sup>47</sup> utsin puduedshun Esus chuituidpondash. —Mibi isec tita min utsibobēdi choaccosh. Umanuc tabadec —caquien badedi nidenquo yec <sup>48</sup> Esus: —Utsitsen con ta caimbi. Adembidi utsitsen con utsi caimbi —quetanquin <sup>49</sup> abēd icquido mēdquin ismepondash. —Nēid ēbēd icquido con utsibo caimbi. <sup>50</sup> Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

## 13

*Piacbo ēshē siaid chiaid*  
(Mad 4.1-9; Duc 8.4-8)

<sup>1</sup> Adtanec nidec chian budash cuēmano tabadtuidpondash. <sup>2</sup> Tabadtuidsho isash matses dadpenquo cho-choash tsucus-tsucustsēcquo yec Esus datsidadpondash. Adsho istanec cano dapa antabēdtoash cuēma anoentsēc canon nuadquin Esusēn chuipondash cuēmano tabadquidon tantianubi.

<sup>3</sup> Adshumbic abi tantiate chuinen naden ompoacbimboen chuipondash. —Piacbo ēshē siaid utsi-utsiec bēdamboec caniec. Utsi-utsiec padenquo. <sup>4</sup> “Abitedi ansecanu,” caidi utsi-utsiec shēcuē nibēdacno paēdec. Paēdacsho paēdaid uicchunēn chequid. <sup>5</sup> Ēshē utsibic nidaid tsasimbo yacno siac badedi dēyucuidash <sup>6</sup> aton tapun nidaidēn puduedenquo icnuc ushē chēnquequidēn badedi unēsquid. <sup>7</sup> Ēshē utsibic nisanquid diadacno siaid dēyucash caniduidtsēcsho nisanquidēn dayunac unēsquid. <sup>8</sup> Padnuen ēshē utsi-utsiec nidaid bēdanquo siac dēyucash canish dadpenquo ēshēquid. Utsi-utsiec 100ted ēshēquid icnubi utsi-utsiec 60ted ēshēquid icnuc utsi-utsiec 30ted ēshēquid —quepondash Esus.

<sup>9</sup> Adashic: —¿Min pabiate shēcuē nibēdquiecta iquec? Ēmbi chuiboed bēdamboec pausudta —quepondash Esus.

*Ompoacbimboen chiec nebi, quiaid*  
(Mad 4.10-12; Duc 8.9-10)

<sup>10</sup> Adsho tantiasun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien <sup>11</sup> Esus nadpondash. —Utsibo tantiamenquo icquin Nuquin Papabëd tabadte chuiquin nëbi mibiuidtsëqui tantiamembi. <sup>12</sup> Nuquin Papa tantiatadquo icquidën ëbi tantiasho bëdamboen tantiamendambí. Nuquin Papa tantiauidtsëcquidën ëbi tantienquo icsho ëmbi ompoacbimboen chiac tantienquo ictsiash. <sup>13</sup> Ompoacbimboen aido dadpen chuibanembi. Ëmbi naid isun ëbi tantienquo iquec. Ëmbi chuisho pamumëdabimboen tantienquo iquec. Adsho aidon tantiatapimbo icnuc chiembi. <sup>14</sup> Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic. “Chiac tantiaboshombi tantienquo iquendac. Ismiac isquioboshombi: ‘Ai, aidi nec,’ cainquo iquendac.

<sup>15</sup> Ai, ëmbi chiaid tantiatapimbo iquec.

Ushacimboen tantienquo yec pamumëdabimboec chieshëmënuquidombo iquec.

Ëbi tantiate bunenquo iquec.

Ëmbi chiaid tantiaquidombien paposhquiacimboen bëdamboen tantiabentsiash.

Pausunacimboen tantiasun ëmbi chiacpadomboen natiadquo yansho aton chiesh bëdametsiambi. Aton chiesh bëdamete bunenquo iquec,” quequin Nuquin Papan dada uamepampic —quepondash Esus abëd icquido chiec. <sup>16</sup> Adashic aidobidi chiec: —Isayasën chiacpadomboen utsibon ëbi tantienquo icnubi mimbien ëbi tantiec. Ëbi isec mibi tabadec. Ëmbi chuibansho tantias: “Ai, abimbo caic,” quec mibi bëdambo iquec. <sup>17</sup> Ëbi chote chuiampidobëdtan bëdamboec tabadquido dadpenshun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatadquo yequi tantiambobi unëspampic —quepondash Esus.

*Piacbo siaid sebadënquo chiaid*  
(Mad 4.13-20; Duc 8.11-15)

<sup>18</sup> Adashic abi onquec: —Tantia. Ëmbi piacbo ëshë siaid quequin chuiboed sebadënquo mibi chuinu. <sup>19</sup> Nuquin Papabëd tabadte chiaid piacbo ëshë siaidbimboecquid nec. Nuquin Papan chiaid chiaqui tantiaidenquo icsho Satanasën nac badedi bëshumpec. Uíchunën piacbo ëshë paëdaid badedi chiacimboen adopec. <sup>20</sup> Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishongueuidtsec. <sup>21</sup> Adsho: “Nuquin Papan chiaid tantiaquid nec,” queshun utsibon chieshënac badedi chieshtoshon tantienquo yanendac. Piacbo ëshë tapunuidtsash unësacimboen adoendac. <sup>22</sup> Utsibic Nuquin Papan chiaid tantiatasashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Ísitodon dayunac unësacimboen adoendac. <sup>23</sup> Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquishon ambi tantiaid bënuainquo icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusën.

*Ëshë icsambo icquid seuanaid chiaid*

<sup>24</sup> Adshumbic Esusën naden chuipondash. —Tantia. Nuquin Papan nami-aid tantiamenuen utsi chiacbimboen chuinu. Tiedën caniquid pete adosbiequid icbon siac caondash. <sup>25</sup> Adanec nidambic inchëshëmbi choshon chieshëmënkuidën êshë icsambo icquidtsen daëd uain seuanac caondash. <sup>26</sup> Adoac adosbiequid canidotsëcnubi abëdi tancandaëdpamboec icsambo icquid canidotsac caondash. <sup>27</sup> Adsho istanquin yuabon aton icbo chuituidpac caondash. “¿Pete êshëda sio?” cac: “Ai,” qesho tantias: “Icsambo icquidbëd tancandaëdec canidopaboc. ¿Mitsipaden sio?” quequin yuabon icbo chuipac caondash. <sup>28</sup> Adoquien: “Chieshëmënkuidëmbien seuanchitash,” cac: “¿Chicshunetanquindambi icpe?” yua qesho: <sup>29</sup> “Padi. Petebëdi chiquidtsias. <sup>30</sup> Aidbëdi ma canipanuna. Êshëacsho tacuesquimbi teshun sianun nanuna. Adoshombic icsambo icquid tsindobanshun nêdëncanun nanuna. Icsambo icquid nêdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

*Esus tantiaquido dadpen yante chiaid*

(Mad 4.30-32; Duc 13.18-19)

<sup>31</sup> Adshumbic abi tantiaquido dadpen yante tantiamenuen Esusën naden chuipondash. —Cuëte bacuë êshëmpi <sup>32</sup> pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac —quepondash Esus.

*Abi bëdamboen tantiate Esusën chiaid*

(Mad 4.33-34; Duc 13.20-21)

<sup>33</sup> Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactëc nami uashun utsibëdta daëd uain cabiunac abichobi batambo yanec. Adembidi ëbi bëdiactëc tantiatsëcboedi ëmbi chiaid tantias ëbi bëdamboen tantiaquid yanendac <sup>34</sup> —quequin Esusën chuipondash. Sebadënquo chienquo icquin ompoacbimboenuidi Esusën chuipondash. <sup>35</sup> Aden Esusën chuite chuiquin Nuquin Papan dada uamepampic-padomboen nanuen adopondash. Nuquin Papan dada uamepampid nad iquec.

“Sebadënquo chienquo icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

*Êshë icsambo icquid seuanaid sebadënquo chiaid*

<sup>36</sup> Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënkuidën êshë icsambo icquid siaid nec,” quequin mimbi chuiboed en sebadënquo chui, Icho. Tantianu. ¿Atotsi chuitiadquo icquin aden chio? <sup>37</sup> —caquin Esusën chuipondash naden. —Tantia. Mibi chuinu. Pete êshë bëdambo icquid sequidbimboecquid nebi. Nuquin Papan chiaidquo tantiamequin matses bëdambo icmequid nebi. <sup>38</sup> Padnuc tied dapabimboecquid nidaidën tabadquidtedi nec. Padnuc pete êshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec. <sup>39</sup> Padnuc êshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquo iquec. Adsho badedi cuidenquo

icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. <sup>40</sup>Icsambo icquid tsindoshon nëdëncacimboen Nuquin Papan cuidte ushëmbi icsambo icquido cuiddac. <sup>41</sup>Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac <sup>42</sup>bedshun chian anëdënquiacno nësecaindac. Adoac natiac mëyadbudec sidquequiendac. <sup>43</sup>Padnuen ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiaishun ëmbi chiacpadomboen nata —quepondash Esus.

#### *Nuquin Papabëd tabadte bunquiota, quiaid*

<sup>44</sup>Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” qeshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiacpadomboenuidi nac bëdambo ictsiash.

<sup>45</sup>Tantia. Casëdu bëdaidquio bunaidtsen mibi chuinu. Dadan casëdu bëdaidquio bunquin bednuen nibëbenepac caondash. <sup>46</sup>Adshun bëdaidquio istuidash: “Nadquid utsi nibëdec,” quiaish comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bëdambo ictsiash —quepondash Esus.

#### *Nuquin Papan cuidte ushë Esusën chiaid*

<sup>47</sup>Adshumbic Esusën naden chuipondash. —Tantia. Mibi chuinu. Nuëcquid nibedacimboen naindambi. Isadaidbon nuëcquid dadpenquio bedte nëshaid dapa acte nënequin <sup>48</sup>nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. <sup>49</sup>Adomboebidi namendambi. Nuquin Papan cuidte ushë chonoc ambi abi yacnoshon uaido mayan bëdabo namendambi. Adoac choshon nibedacimboen matses bëdambo icquido Nuquin Papa yacno nidmequimbo <sup>50</sup>icsambo icquido chian anëdënquiacno nësecaindac. Adoac natiac shubiquiendac —quequin Esusën Nuquin Papan cuidte chuipondash.

<sup>51</sup>Adshumbic: —¿Ada ëmbi chuiboedtedi tantie? —caqini: —Ai, tantiembi —quepondac. <sup>52</sup>Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac —quepondash Esus.

#### *Nasaded yacno Esus nidaid*

*(Mad 6.1-6; Duc 4.16-30; Uan 4.44)*

<sup>53</sup>Adanec auëshquiobi nidequi <sup>54</sup>abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoacqui: —¿Mitsipaden comapenen tantiabempash neba? ¿Mitsipadec comapenen tantiaquin bëdamequid yampash? <sup>55</sup>¿Nuqui isacmaidta nedic? Ma aton papa cuëte

nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidedi aton utsibo iccosh. <sup>56</sup> Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquo neyoc — quequin <sup>57</sup> Esus chieshënquin tantienquo icpondash.

Adsho tantiaashun Esusën nadopondash: —Nuquin Papan: “Ëmbi tantiami-acpaden chuibanta,” caidën chiac utsibon tantiaquid. Adquidën abi caniac-noshon chuibansho tantienquo icquid —quepondash Esus. <sup>58</sup> Adshun natiambo icquin nabanquin daëdpactsëc ismetsëccondash: —“Nuquin Papan chomiaidquo nec,” quetiapimbo iquec —queshun.

## 14

### *Uan acten mentoanquid*

#### *unës uaid*

*(Mad 6.14-29; Duc 9.7-9)*

<sup>1</sup> Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. <sup>2</sup> Adshumbic aton yuabo chuipac caondash. —Uan pado acten mentoandened nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

<sup>3-4</sup> Edodesën Uan cuesuniac caondaïd chuïnu. Tanta. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaïd mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

<sup>5</sup> Adshumbic Uan cuesunetiadquo icquimbi aton matses: —Nuquin Papan chiaïd chuibanquidquo nec —quesho tantiaashun aïdo dacuëdënquin Uan badedi cuesunenquo icpac caondash.

<sup>6</sup> Adshumbic Edodesën: —Ëbi tishaid ushë nec —queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaïdo baidaquin ismepac caondash. Adsho isumbic Edodesën: —Bëdamboenshë mimbi naic —queshun <sup>7</sup> naden chuipac caondash. —Tantia, champi. ¿Atotsi buneque? Mibi bunaidquo mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën. <sup>8</sup> Adoaquien champin aton tita chuitampac caondash. Chuitanec choshon anin chiaïd chuituidpac caondash. —Uan acten mentoanquidën mapi butetanquin pada-padaïd dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

<sup>9</sup> Adoaquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuïboed niactiadquo icpac caondash. —Ëbi isedquidon: “Mibi muambo nec,” canushe —quetanquin champin chiac-padomboen aton yuabo: —Uan mapi butetan —capac caondash.

<sup>10</sup> Adoac quënën tsadacnobi Uan mapi buteshun <sup>11</sup> mapi pada-padaïd ananshun buanshun champi menepac caondash yuabon. Adoaquien champin ani menenun buampac caondash.

<sup>12</sup> Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

### *Comapenen tantiaquin 5000tedi pemiaïd*

*(Mad 6.30-44; Duc 9.10-17; Uan 6.1-14)*

<sup>13</sup> Nidshumbic: —Mibi acten mentondaid mapi butiaccosh — catuidpondash. Adsho tantianec cano antabédtoanec chian potiash pudundoanec matses nibédacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dēquiadec podqued nidquidēn nidanepac caondash.

<sup>14</sup> Adnubien Esus matses nibédacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daicsaidotedi bēdamēbampondash.

<sup>15</sup> Ushē budambi Esusbēd icquidon: —Inchēsheque. Pete nibédacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien <sup>16</sup> Esusēn: —Padi. Ma tabadnu. Mimbibi peme —capondashi.

<sup>17</sup> Adoquini: —Ma panēmpi 5tedpactsēc icpayoc. Nuēcquidēmpi daēdquioibi icctec —quepondac. <sup>18</sup> Adsho: —Aidtedtsēqui beccho —cac meniondambi.

<sup>19</sup> Adoquien Esusēn abi datsidadquido chuiquin: —Uasinēn tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bēdambo iquec, Papa —quetanquin panēmpi cuēsh-cuēshun abēd icquido menebanac aidontsen matses abitedi menebampondash. Adembidi nuēcquidēmpi bushtebantsēcshun menebampondash.

<sup>20</sup> Adoquien nua cubuduededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsēcquio iquec pete cuēsh-cuēshaid napi uaid. <sup>21</sup> Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuēbobēdta tambanambo iccondambi.

### *Acte bēntse Esus choaid*

*(Mad 6.45-52; Uan 6.16-21)*

<sup>22</sup> Adshumbic Esusēn abēd icquido chuiquin: —Chian potec nidta —capondash. Adoac cano antabédtoanec potec nidnubi Esusēn abi datsidadquidotsen: —Nidanec nid —cac nidanepac caondash. <sup>23</sup> Adec nidanebon Nuquin Papa chuinuec macuēsh dectatoash abentsēqui Esus inchēshpac caondash.

<sup>24</sup> Adnubien chian dapa potequi abēd icquidotsen inchēshpondash. Chian nēnantanquio yanubi cunquetuidpondash. Adnuc acte comapenec tēccuasquiampondash uncadenquio yec. Comapenec acte ishucdnuc cano mentoadtiadpambo icpondash.

<sup>25</sup> Adnubien badiadte anoentsēqui acte bēntse Esus chopondash. <sup>26</sup> Acte bēntse chosho isashini: —Podobitsi nec —quiash dacuēdtanec sidqueuededpondac. <sup>27</sup> Adshobini Esusēn: —Ēbien neque. Dacuēdenda —capondash. <sup>28</sup> Adoquien Petedon: —¿Con Icbombobida ne? Con Icbo icquin: “Acte bēntse cho,” ēbi ca —capondash.

<sup>29</sup> Adsho tantiaashun Esusēn: —En cho —caquien Petedo canonoēsh budanec acte bēntse Esus bēquedbanec niduidtsēccondash. <sup>30</sup> Esusuidi isec bēdamboec niduidtsequi acte comapenec tēccuasquesho isash dacuēdtanec acte bēntse niduidtsēcboedi mentoadtsempondash. —Ēbi bed, Icbo. Mentoadebique —caquien <sup>31</sup> Esusēn badedquio bedtanquin indopondash. Aden indoequi: —“Con icbon ēbi bēdamboen nametsiash,” queboedi ¿atotsi quiash dacuēdtano? Ēbi bēdiactsēc tantiatsēcquid mibi nec —quepondash Esus Peto caic.

<sup>32</sup> Adtanec Petedobēdi cano antsadtonobien cunqueboedi cunquenquio yampondash. Actetsen tēccuasquenquio yanondash. <sup>33</sup> Adsho isun cano

antabëdquidon: —Mibi bédamboshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bédamiaid  
(Mad 6.53-56)*

<sup>34</sup> Adashic chian potiaash Quenesaded yacno pudundopondash.  
<sup>35</sup> Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bē-bēpondash. <sup>36</sup> Bē-bēshumbic: —Dashcuteuidtsēqui mishashi bédantsiash —queshun Esus chuituidquin: —Min dashcute cuēmano daicsaido mishme —cac mishmiaqui bédampondash abitedi.

## 15

*Padiseyobo icsaid Esusën chiaid  
(Mad 7.1-13)*

<sup>1</sup> Adnubien padiseyobo Moisesën dada uampid chuibanquidobēdi shubu dadpen icquid Edusaden caid yacnuësh cho-choquin Esus istuidpondash.

<sup>2</sup> Istuidashic: —¿Atotsieshun mibēd icquidon nuquin tsusedpabon chiaid niac-niacpob? Penush mēpamēdenquio icquin nuquin tsusedpabon chiaid ma niac-niacpaboc —quepondash Esus chieshēnquido.

<sup>3</sup> Adsho tantiaashun Esusën: —Ma mimbi. ¿Atotsieshun Nuquin Papan chiaidquio niac-niaque? Nuquin tsusedpabon chiacpadomboen naquin ma mimbi Nuquin Papan chiaidquio niac-niacpayoc. <sup>4</sup> Tantia. Mibi chuinu. “Titabēda papa chieshēnenquio icquin bédamboen tantia,” quequin Nuquin Papan chiampidquio ma mimbi niacpaboc. Adembidi: “‘Con pa unēspashun,’ quec chieshēmēnquid icsho unēs uaquid. Adembidi ani icsamboen chuishunsho unēs uaquid,” quequin Nuquin Papan chiampid utsi mimbi niacpec. <sup>5</sup> Aid niacquin nuquin tsusedpabon ambembi chiaidni mimbi chiec. “Anibēda amē naden cudasēnac bédambo ictsias,” mibi quepec. “‘Nuquin Papa menetequid nēidted con piucquid iquec. Mitsana nibēdsho menetiadquidi mibi menenquio iquembi. Nuquin Papa menetequid nec,’ quequidēn <sup>6</sup> cudasēnac bédambo ictsias,” mibi quepec. Aden nuquin matsesën chiaid naquin Nuquin Papan chiaidquio ma mimbi niac-niacpayoc. <sup>7</sup> “Nuquin Papa tantiaquidquio nebi,” quec muaquid mibi nec. Èdenquimboshē Nuquin Papan chuimiac nuquin tsusedpa Isayas caidēn mimbi icsamboen tantiate chuiquin dada uapampic naden.

<sup>8</sup> “Isadaidbo: ‘Nuquin Papambo tantiembi,’ quepec.

Adboedēmbi ēmbi chiaid niacquin ēbi tantienquio iquec.

<sup>9</sup> “Ma Nuquin Papan ēbi bédamboen isnu,’ queboedēmbi ēbi bédamboen tantienquio iquec.

Èmbi chiaidquio namenquio icquin aton matsesën chiaiduidi namepec,” quequin Isayasën Nuquin Papan chiaid dada uapampic —quequin Esusën abi chieshēnquido chushcapondash.

*Ana shēcūēnuësh choaid chiaid  
(Mad 7.14-23)*

<sup>10</sup> Adshumbic abi isec datsidadquido ompoachimboen chuipondash. —Tantia. Mibitedi chuinu. <sup>11</sup> Ana shēcūēn puduedaidēn matses ic-saten mimbi dampec. ¿Adquidēnda matses icsapec? Padenquio. Ana

shëcuënuësh choaidëmbien matses icsatsiash —quequin Esusën chuipondash. <sup>12</sup> Adnubien abëd icquidon: —Mimbi aden chuiboed tantiashun padiseyobon mibi chieshënosh, Icho —caquien: <sup>13</sup> —Dacuëndenda. Icsa bescatanquin tsindoshon nêdëncacimboen ambi tantiamiabi yaido ambembi chuiquido Nuquin Papan cuideque. <sup>14</sup> Dacuëndenda. Padiseyobo bëshuaidbimboec icquido neque. Bëshuaidën aton matses bëshuaid utsi bédamboen buantiapimbo iquec. Buanuec abi shëcuë ampaëdtsiash. Adembidi Nuquin Papan chiaidpenquoio namequin aton matses bédamboen tantiametiapimbo iquec —quepondash Esus abëd icquido chiec.

<sup>15</sup> Adshobien Petedon: —Mimbi ana shëcuënuësh choaid quequin chuiboed tantiambo iccombique. Aid sebadënquoio chui. Tantianu, Icho —caquien: <sup>16</sup> —¿Tantiamboda icco? <sup>17</sup> Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquoio iquec. <sup>18</sup> Matses onquaidimbi ana shëcuënuësh choaid caoc. Abibi uquëducuësh onquec: “Adoëmbi,” quequin otacquoio tantiaquin naic matses icsatsiash. <sup>19</sup> Icsambo icquido yec: “Ai, adoëmbi,” quequin otacquoio tantiashun Nuquin Papan chiaid niactsiash nadquidën. Nêdic unës uanquid. Nêdic aton chidopenquoio chudquid. Nêdic aton bënëpenquoio chudmequid. Nêdic aben uequid. Nêdic ampequid. Nêdic muaquid. Nêdic icsamboec chuishumënquid. <sup>20</sup> Adquidtedi: “Ai, adote bunebi” quequin otacquoio tantiash icsaquid nec. Padnuen penush mëpamëdenquoio icquin Nuquin Papan chiaid niaquenquoio ictsias —quepondash Esus abëd icquido chiec.

*Isadaidpembo chidon Esus tantiaid  
(Mad 7.24-30)*

<sup>21</sup> Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

<sup>22</sup> Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bédamboen ista. Con champi podobitsi icsa dapuedaid yec natiambo iqueque. Con champi bédameta —caquien <sup>23</sup> Esusën ëcbedenquoio icpondash. Ècbedenquoio yaqui chidon tsibanbanquin cuënbanpondash. Adsho tantiashun Esusbëd icquidon: —Chieshanquiec cuëdpeque. Cuemepa —caquien <sup>24</sup> Esusën cuemenquoio icquimbi aid chuiquin: —Nuquin Papan chiacpaden Isadaidbo matsesba Nuquin Papa bédamboen ismete tantiamenuec nebi. Bënudacimboec icquin Nuquin Papa tantienquoio icsho aidoba tantiamenuec nebi —quepondash Esus.

<sup>25</sup> Adsho tantiash nidenquoio yec chido cuëdboed Esus ismequin danëshën sebudtsec: —Èbi nashunta, Icho. Con champi bédameta —queshobien Esusën: <sup>26</sup> —¿Aton bacuëbo pemenquoio icquimbi aton opa pemiacta bédambo icpatsiash? Padenquoio. Adembidi Nuquin Papan con matses caidotedi tantiamiabi utsibo ëmbi nashunac icsambo ictsias. Isadaidboba tantiamenuec nebi —quepondash Esus.

<sup>27</sup> Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bédanubi isadaidpembo abentsëc tantiaquid icsho ëbi nashunquin con champi bédameta <sup>28</sup> —caquien Esusën: —Ai. Èbi tantiaquidquoio mibi nec. Mimbi chiacpadec min champi bédanendac —quesho tantianec aton shubuno nidshun isquien aton champi bédanac Esusën chuinubi.



### *Daicsaido dadpen Esusën bēdamiaid*

<sup>29</sup> Adanec auēshquiobi nidec chian dapa Cadidia caid cuēman nidquid podquedēn nidanepondash. Adashic macuēsh dapa dectatoec poctsebi tabadtuidpondash.

<sup>30</sup> Tabadtuidsho isun matses dadpenquo cho-choquin daicsaido dadpen Esus ismenuen bē-bēpondash. Tidinguequido yec bēshuaido yec shēquēquenquo icquido yec onquesabo yec daicsaido utsibotedi yec quenuc bē-bēpondash. Adsho Esusën bēdamebampondash. <sup>31</sup> Bēdamiac onquenquo icboedi onquianondash. Bēshuacboedēmbi isbenondash. Capuenquo icboedi capucuenondash. Daicsaido utsibo adecbidi bēdanondash. Adsho isquido nadpondash. —¿Adquidta ictenec? Nuquin matses isadaidbon tantiaidēn Nuquin Papan namiaid icquin bēdamepash icnui. Nuquin Papa bēdambo iquec —quepondash Esusën bēdamiaid tantiaish.

### *Matses 4000tedi pemiaid* (*Mad 8.1-10*)

<sup>32</sup> Adec tabadsho isashien Esus: —Nēido tantiac unēsquo iquec. Ēmbi nabansho isnuec choash 3tedec ushquin piac ambi bēboed pete naimēdaccosh. Ēmbi: “Nid,” cac nidnuequi bunambi padishtsiash. Pemiai bi nidmetiapimbo iquebi —quepondash. <sup>33</sup> Adsho tantiaishun abēd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

<sup>34</sup> Adoaquien Esusën: —¿Tedtsi panēmpi iquec? —cac: —Sieteted ictsec. Nuēcquidēmpi daēdpactsēc ictsec —quesho <sup>35</sup> tantiaishumbien abi datsiadquido chuiquin: —Nēmbo tabadbud —capondash. Adoac tabadbudpondash abitedi.

<sup>36</sup> Adshumbic panēmpibēdta nuēcquidēmpi bedshun Nuquin Papa chuipondash. —Nēid mimbi uaid bēdambo iquec, Papa —queshun pete cuēsh-cuēshbantsēcshun abēd icquido menebampondash: —Pemeban —quequin. Adoac abitedimbo pemebampondash. <sup>37</sup> Aden pemic abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsēcquo icnuc sandobampondambi. <sup>38</sup> Esusën pemiaido dadpenquo icpondash. Tambanac 4000tedi dada icpondash. Chido bacuēbobēdta tambanambo iccondambi. <sup>39</sup> Adashic: —Nidanec nid —quepondash Esus ambi pembeodo caic. Aido nidanenubi chian budash cano antabēdtoshon Esusën chian potepondash. Chian potiaish nidaid Mac-tada caid yacno pudundopondash.

## 16

### *Saduseyobon: Ēbi isme, quiaid* (*Mad 8.11-13; Duc 12.54-56*)

<sup>1</sup> Pudundoanec nidshobi anocquidon abi chieshēnquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdtan saduseyobon.

<sup>2</sup> Adshobien Esusën: —Nuquin matsesën chiaid mimbi tantiec. “Inchēshbudtsēqui abu piumbo icsho isash: ‘Tanunquo badiadec,’ quequid. <sup>3</sup> Badiadnubi abu inchēshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiaicbimboen bēdamboen tantiatiaidquidi Nuquin Papan nēbimbobi naid mimbi tantienquo iquec. <sup>4</sup> Icsambo icquid icquimbi mimbi: “Ēbi isme,” cadednepec. Nēbi mibi ismenquo iquembi. Nuquin Papan nuquin tsusedpa Onas chishcambiequid dapan chebudacsho daēdec ushun

ucbudmiac bimboec unēs uacsho chococac daēdec ushash uincuenendabi. Aden ēbi tantiesabo ismendambi —quianec nidpondash Esus.

*Padiseyobon chiaid tantienda, quiaid*  
(Mad 8.14-21)

<sup>5</sup> Adanec nidec chian budash cano antabēdtoshon chian poteapondash. Chian potequien Esusbēd icquido: —Pete nianchitombi. Bētiadquidi nepobi —quepondash. <sup>6</sup> Adshobien Esusēn abēd icquido chuiquin: —Padiseyobēdtan saduseyobon naid pan bidiscamete bimboecquid iqueque. Ista —caquien <sup>7</sup> tantienquo yec abēd icquido nadec onquecuededpondash. —Nuqui niamboed pete chiequi nepanui —quepondash. <sup>8</sup> Adsho ambembi tantiash Esus: —Ēbi bēdiactsēc tantiatsēcquid mibi nec. ζMimbi pete niamboed chiectabi nedi? Padenquo. <sup>9</sup> ζBēshunashta mibi nepe? Pete 5tedtsēcboedi ěmbi 5000tedi pemiaidēn napi uaid dadpen iccondaid ζtantienquioda yano? <sup>10</sup> ζAdembidi pete 7tedi ictsēcboedi ěmbi 4000tedi pemiaidēn napi uaid dadpen tsitsanēn sandoboed tantienquioda yano? <sup>11</sup> ζAden comapenen tantiaquid icquimbidambi pete niamboed chuipadi? Padenquo. Pan bidiscamete pictsēc cabiunac pan abichobi nua bidisquiac bimboecquid padiseyobēdtan saduseyobon chiaid iquec —quepondash Esus.

<sup>12</sup> Aden chuisho tantiash abēd icquido nadpondash. —Pan chienquo icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbēdta saduseyobon chiaid tantienda,” quepecshenda niosh —quepondash Esusbēd icquido.

*Nuquin Papan Mado mibi nec, quiaid*  
(Mad 8.27-30; Duc 9.18-21)

<sup>13</sup> Adash yuectaniash puduanec nidequien Esus nidaid utsi Sesadeya Uedipo caidēn nidanepondash. Adshumbic abēd icquido chuimepondash. —Utsibon ζtsutsi ēbi caosh? —caquien: <sup>14</sup> —“Uan pado acten mentoanondaidien nec,” mibi caosh. Utsimbic: “Edias cuēmēdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuēmēdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abēd icquidon. <sup>15</sup> Adsho tantiashun Esusēn: —Ma mimibi. ζtsutsi ēbi mimibi cao? —caquien <sup>16</sup> Petedo Simon caidēn: —“Quidistu caid Nuquin Papan chomiaidquo nec,” caombi mibi. Aton Madombo mibi nec —capondash.

<sup>17</sup> Adsho tantiashun Esusēn: —Nuquin Papan aden tantiamiac mimbi bēdamboen chioc, Petedo. Onasēn mado Simon caid yec matsesien mibi nec. Adquid icquimbi matsesēn tantiaid chienquo icquin Nuquin Papan tantiamiaidquo mimbi abimbo chioc. <sup>18</sup> Tantia. Ēmbitsen mibi chuinu. “Cuēnote bimboecquid nec,” quequin mibi Petedo cuēnondambi. “Cuēnote dapa utsi ictiapimbo yac bimboec chieshtoenquo icquid iquendac,” qeshun mibia ēbi tantiaquido chuiquid dapambo icmendambi. Adec mimbi nami-aido ēbi tantiaquido iquendac. Satanasēn aido: “Nēid yuanu. Utsibic chieshtomenu. Utsibic unēs uamenu,” caqui abi ēbi tantiaquido iquendac. <sup>19</sup> Padnuc Nuquin Papan chiapadomboen ēbi tantiaquidon nate mimbi chiendac. Adembidi ēbi tantiaquidon natemaidtsen mimbi chiendac —quepondash Esus Petedo chiec.

<sup>20</sup> Adashic abēd icquido abitedi chuoiaic: —“Nuquin Papan chomiaidquo nec,” quequin utsibo ēbi chienda —quepondash Esus.

*Abi unēs uate Esusēn chiaid*  
(Mad 8.31-9.1; Duc 9.22-27)

<sup>21</sup> Adshumbic tauaquin abi unēs uate chuidondash. —Shubu dadpen icquid Edusaden caid yacno nidendabi. Anoshon nuquin matsesēn ēbi chieshēnquiadac nēidtedshun. Nēidic tsusiobon. Nēidic nēish yua abided unēs uaquido chuiquid dapabon. Nēidic Moisesēn dada uampid chuibanquidon. Aidtedishun mēyanquioquin ēbi unēs uamendac. Adoacsho chococac daēdec ushash uincuenendabi —quequin chuisho <sup>22</sup> tantiashun Petedon uano-tantsēcquin tsadumbudshun Esus chuipondash. —Unēsquio icnuc mimbic chieque. Aden chienda. Ma mibi unēs uatiapimbo icpayoc —capondash Petedon. <sup>23</sup> Adoquien Esusēn: —Satanasēn oncamiac Petedo adec onquec —queshun Petedo isquin Satanas chushcapondash naden. —Cuen, Satanas. Nuquin Papan chiaid mimbic ēbi niacmetiadquio iqueque. Cuen —quetanec Petedobi chieque: —Matsesēn tantiaid chuiquimbi Nuquin Papan tantiaidquio mimbic chienquio iccoco —capondash.

<sup>24</sup> Adashic abēd icquidotedi chuoiaic: —Ēbi tantiaquidon aton nauidi nainquio icquin ēmbi chiacpadomboen natsiash. Adsho chieshēmēnquidon: “Unēs uachifomane,” cac chieshtoenquio icquin ēbi tantiatsiash. Adquid ēbi tantiaquidquio nec. <sup>25</sup> Padnuen ēbi tantiatsēcquid: “Esus tantiasho unēs uachitoshe,” quiashe ēbi tantienquio yanec unēsash Nuquin Papan cuidaidobēd nidendac. Padnuen chieshtoenquio icquin ēbi tantiaquid Nuquin Papa yacno tabadendac. <sup>26</sup> ĴNuquin Papa tantienquio yec tabadecta matses bēdambo icpatsiash? Abi bunaidtedi bedquin Nuquin Papa tantienquio yec unēsash Ĵmitsimbo tabadpatsiash? Nuquin Papabēd tabadte bunquin Ĵatotsi menepatsiash? ĴPiucquid meniashta Nuquin Papa yacno tabadpatsiash? Padenquio. Adotiapimbo iquec. ĴAtoda meniantiapimbo iquec? <sup>27</sup> Ēmbien matses cuidte chiendac. Nuquin Papa yacnuēsh ambi abi yacnoshon uaido mayan bēdabobēd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantie bēdamboec tabadquid Nuquin Papabēd tabadmequin Nuquin Papa tantienquio yec icsaquido icsano nidmendambi. <sup>28</sup> Tantia. Chuinu. Utsi-utsiec unēsabi icquin ēbi tantiaquido dadpen yansho mimbic isendac —quepondash Esus.

## 17

### *Esus bēchamauanquiesho isaid (Mad 9.2-13; Duc 9.28-36)*

<sup>1</sup> Aden chiash 6tedec ushanec nidquimbi Esusēn abēd icquido 3tedtsēqui buampondash. Petedo yec Acobo yec Acobon buchi Uan yec quetsēcnic buanash macuēsh dapa dectatoash mananēnquio tabadtuidpac caondash. <sup>2</sup> Tabadtuidshun isquien Esus utsiacimboec isadpec. Aton dashcutebēdi aton bētantete ushēbimboec bēchamauanquiequec yanac caondash.

<sup>3</sup> Esus bēchamauanquiequec icnubien dada utsi daēd isadcuenash Esusbēd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiaipid icpac caondash. <sup>4</sup> Adsho isashien Petedo: —Mibi adec tabadsho isash bēdambo iquebi. Mibi nēmbobi tabadmenun abentsēc chotsecnuc shubumpi uatsēcununa, Icbo. Mitsana natsēcquinc Moisesēn na natsēcquinc Ediasēn na natsēcquinc canuna. ĴAda bēda icpec? —quenubi <sup>5</sup> abu ushu bēchamauanquiequec icquidēn isadenquio icnuc bētipac caondash. Adnubien abu ushu nēnantanuēshquio Nuquin Papa onquiampac caondash. —Nēid con Madombo nec. Ēmbi tantiaidquio yec ēmbi bēdamboen isaidquio neque. Nēidquio tantiata —quec dacuēdampamboec onquenubien <sup>6</sup> uinte paēdtampamboec dacuēdtanec uebudcuededpac caondash Petedo chedo.

<sup>7</sup> Adshobien Esusën camishquin: —Dacuëdenda. Nidto —cac <sup>8</sup> nidtoquin isquien Esus abentsëqui iquec.

<sup>9</sup> Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

<sup>10</sup> Adsho tantiash Petedo chedo: —“Nuquin Papan chomiaidquo nec,” quequin nëbi mibi tantiambi. Mibi adquid icnuc çmitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —qeshobien <sup>11</sup> Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. <sup>12</sup> Adquid Ediasbimboecquid chondash. Choacsho tantienguo icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënguin unës uaindac —quesho tantiashien: <sup>13</sup> —“Ediasbimboecquid nec,” quequinhenda chuiposh. Uan pado acten mentoandened caquinshenda Edias capec —quepac caondash Petedo chedo.

*Madompi dapuduedaid podobitsi icsa cuemiaid*  
(*Mad 9.14-29; Duc 9.37-43*)

<sup>14</sup> Bëchamauanquieic ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. <sup>15</sup> —Con mado bëdamboen isquin bëdameta, Icbo. Badedbadëdquieic unësanec cuëten pichiquianec. Adecbidi unësanec acten mentoatdsenaccosh. <sup>16</sup> Mibëd icquidon bëdamete danquin bëuidombi. “Në bëdame,” cac bëdamenuen tanüidosh. Bëdamenguo iccoshe. Mimbimbo bëdameta —caquien <sup>17</sup> Esusën ambo icquidotedi chuipondash. —Ëmbi natiambo icquin nabanquin ismiaqui mimbi ëbi tantienguo iquec. Adsho isash chieshtoash cuentiadquio icchitebi. Adtiadquio yequi padenguo iquec nebique. Min mado beccho —cac <sup>18</sup> bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

<sup>19</sup> Adsho isun abëd icquidon Esus chuipondash utsibo tantiamenguo icquin. —Ëmbi: “Cuemenu,” cac çatotsi quiaish podobitsi icsa cuenenguo icposh? —caquien: <sup>20</sup> —Nuquin Papa bëdamboen tantiaquin mimbi bëdamboen natsenoc. Mimbi bëdiactsec tantiatsec. Pete ëshëmpi mostasa caid pistëcquidi siac nua yec canitsiash. Adecbidi Nuquin Papa tantiatsëchoedi: “Ambi natiapimbo ictequid nibëdec,” quequin abimbo tantiaquidquo yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. <sup>21</sup> Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

*Abi unëste Esusën chuioaid*  
(*Mad 9.30-32; Duc 9.43-45*)

<sup>22</sup> Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshënguido ëbi

bedmendac. <sup>23</sup> Bedshun ëbi unës uamendac. Aden unës uamiacscho chocoquin daëdec ushash uincuenendac —quesho tantiatanequien abëd icquido: —Unësquio icnuc chiec —quiash shubiantiadtsëcquio icpondash.

### *Chuiquid dapa menetequid piucquid Petedon istuidaid*

<sup>24</sup> Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuquin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? —cac <sup>25</sup> Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aído bedshunenquio icquin ¿ada ambi bedaido aton yuabo piucquid bedshumpec? —caquien <sup>26</sup> Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. <sup>27</sup> Aden tantiaquimbi: “Nëishnushe,” queshun menenun nanuna. Chianën ansemetan. Tauaquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aíd bedshun piucquid bedshumënguio menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.

## 18

### *¿Mitsicquid chuiquid dapa mimbi icmepatsia?*

#### *quequin chiaid*

(*Mad 9.33-37; Duc 9.46-48*)

<sup>1</sup> Adshumbic abëd icquidon Esus chuipondash. —Abitedishun Icho icquin matses mimbi namendac. Èbi chedo caic ¿mitsicquid mibëdtan chuiquid dapa mimbi icmepatsia? —quesho <sup>2</sup> tantiashun abi tabadacno nënantanquio bacuë tsaduntsëcshun Esusën chuipondash. <sup>3</sup> —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nachimboen ëbi tanti-aquiota. Adash ambi namiaid yanash Nuquin Papa yacno mibi puduedendac. <sup>4</sup> Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac. <sup>5</sup> Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

#### *Tantiabentsëcquido icsamete chiaid*

(*Mad 9.42-48; Duc 17.1-2*)

<sup>6</sup> Adshumbic padpiden chiec: —Èbi tantiabentsëcquid caic: “Nuquibi Nuquin Papan chiaid niac-niacqueic icsaunionona,” quequid Nuquin Papan cuidendac. Icsamiabi yec unësacscho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsamiant bunquidquio. <sup>7</sup> Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

<sup>8</sup> Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yacimboec icsainquio yec ënëdta. Taën capuec mibi icsaic. Tateshuniac caputiapimbo yacimboec icsainquio yec ënëdta. Ènëdenquio icsho Nuquin Papan mibi cuidendac. <sup>9</sup> Adecbidi ëshën isec mibi icsate bunquieic. Èshë chicshuniacimboec icsainquio yec

ënédacsho: “Bédambo iquec,” catsiambi. Ënēdenquo icsho Nuquin Papan chian anēdēnquiaco nēsecaindac —quequin Esusēn chuipondash.

*Matses ëbi tantiamete Nuquin Papa bunaid  
(Duc 15.3-7)*

<sup>10</sup> Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquiobida bédamboen tantiapec?” cainda. Nuquin Papan abi yacnoshon uaid mayan bēda aid bacuēbo dayun uaquid icquin Nuquin Papa yacno puduedshun mimbi mamēnshumboed Nuquin Papa chuinushe. Adtsëcquidëmpi mamēnshunenda. Ëbi tantiabentsëcquido con Pan tantiaquieque. <sup>11</sup> Ëmbitsen aido tantiemi. “Bēnudaid istuidachimboen ëbi tantienquo icquidobi ëbi tantiaquido icmenu,” quiash matsesondabi —quepondash Esus.

<sup>12</sup> Adashic padpidec: —¿Mitsipadquo nuquin matses icpec? Nēish yua obeca dadpen 100ted dayun uaquidēn aton yua tambanac abentsëc nibēdsho istanquin utsitedi nianshun aid abentsëc nibēnbenequin istuidquid. <sup>13</sup> Aden istuidash comapenec cuishonquequid: “Con yua nibēdantsenquiac,” quiash. Aton yua utsi yacno bēash abi ichoctedi icsho isash bédambo icquid. Adecbidi matsesēn ëbi tantiabensho isash Nuquin Papabēd cuishonquebi bēnudaid istuidachimboec. <sup>14</sup> Icsaido cuidacno matses nidmete Nuquin Papa bunenquo iquec. Matses bédamboen isquin abēd tabadmete Nuquin Papa bunquiec —quepondash Esus.

*Chieshēnquidobēdi onquete chiaid  
(Duc 17.3)*

<sup>15</sup> Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshēmiantiadquo icchitosh,” qeshun nadoac bédambo ictsiash. Aid abentsëqui chuiquin aidbēd bédamboec onquequin: “Ëbi icsa uaquin Nuquin Papan chiaid mimbi niac-niaccoc. Adece icsainquo yec ënēda,” mimbi cac: “Ai, adebi,” quiash mibēdi bédamboec tabadtsiash Nuquin Papa tantiesabimboec icuiddoedi. <sup>16</sup> Mimbi: “Icsainquo yec ënēda,” caqui: “Padi. Adequi icsaibi,” qesho tantiashun ëbi tantiaquid utsi beduanshun aidbēdtan chuitanta. “Nuquin Papan chiaid niac-niacsho isun daēdshun chiaid abimbo chiaid nec,” quequin chiaid tantiaquin adota. <sup>17</sup> Mimbi buanaidēntsen: “Adec icsainda,” caqui: “Adequi icsaibi,” qesho tantiatanec choashun mibēdtan ëbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuēdēnacno chomenda. <sup>18</sup> Aden mimbi: “Esus tantiesabimboecquid neque. Cuēdēnacno chomenquo ictiad,” casho Nuquin Papan: “Bédamboen naic,” mibi catsiash. Adembidi mimbi: “Adec icsaboedi icsainquo yec ënēdsho isun cuēdēnacno chomeoanuna,” qeshun chomeoasho Nuquin Papan: “Bédamboen naic,” catsiash.

<sup>19</sup> Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbēdtan mimbi Nuquin Papa chianiac mimbi chiacpadomboen Nuquin Papan natsiash. <sup>20</sup> Ëbi tantiec daēd tabadnuc aidbēd con Mayan yec ëbēd yacimboec tantiadendac. Adece tabadsho isun: “Con Mado tantiaquido nec,” qeshun aidon chianiaid Nuquin Papan tantiadendac.

*Yuan bédamboen istiapimbo yaid*

<sup>21</sup> Adece: —Icsa uanec chieshtomiantiadquo iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquo icquin bédamboen ispe? Chieshēnquin padpiden

icsa uac ¿padpidendambi bédamboen isoape? ¿Médante utsiuc daëd tauadoquin sietetedembi nashun padpiden bédamboen isenquio icquin ênacta bédambo icpatsiash? —caquin <sup>22</sup> Esusèn: —“Médante utsiuc daëd tauadoec sietetedi” quequin daëdpactsëcquio mimbi chuipec. 70 por 7 caid ¿tedtsi icpec? Aidteden 490tedembi ênenquio icquin bédamboen isoadoniac bédambo ictsiash — quepondash Esus.

<sup>23</sup> Adashic abi onquec: —Nuquin Papan chiacpadomboen matses bédamboen iste mibi chuïnu. Tanta. Tsusion yuabo dadpen icpac caondash. “Ma bēnu,” quequin ambi meniactedi piucquid bednuen aton yuabo aton shubuno chomepac caondash. <sup>24</sup> Abia chomiaidēn piucquid dadpenquioshē bedshun aton icbo meniambo icpac caondash. <sup>25</sup> Adsho icbon: “Mimbi bedactedi beccho,” cac: “Nibēdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuēbobēdtabi cuēsh-cuēshēdmeshun aidtedi piucquid bednu. Mibi icsambo iqueque,” cac <sup>26</sup> yua abi yuaquid ismequin danēshēn sebudash: “Padi. Ēbi yuamenuen cuēsh-cuēshēdmenda. Chiata. Yuecshun aidtedi bedshun mibi menenun nanu,” capac caondash. <sup>27</sup> Adoquien icbon bédamboen isquin: “Padi. Ēbi menenda. Mibi utsibo yuamenquio iguembique. Dacuēdenda. Nidec nid,” quequin icbon aton yua bédamboen nidmepac caondash.

<sup>28</sup> Adoac nidquimbien aid yuan icbon bédamboen isboedēn ambi: “Ma bēnu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin tēdēdinquin: “Mimbi bedactedi piucquid beccho. Unēs uachitomane,” caquin <sup>29</sup> aidtsen ambi piucquid bedshunoidaid ismenuen danēshēn sebudtsec: “Chiata. Ēbi unēs uainda. Yuecshun bedshun mibi menenun nanu. Chiata,” quepac caondash yua utsi. <sup>30</sup> Adsho tantiashun icbon bédamboen isboedēmbi chieshēnquin: “Padi. Mibi cuidmembi,” qeshun quēnēn nauedmepac caondash. “Piucquid aidtedi abi menianenquio yapdadequi ma quēnēnuēsh mēyadbudchitono,” qeshun nauedmiac caondash.

<sup>31</sup> Aden chieshēnquin quēnēn nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bédamboen isboedēmbi min yua utsi quēnēn nauedmiac: ‘Piucquid menianenquio iquec,’ qeshun,” quequin icbo chuipac caondash. <sup>32</sup> Adsho tantiashun icbon ambi cuidenquio icquin bédamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi qesho: ‘Padi. Ēbi menenda,’ quequin mibi bédamboen isombi. <sup>33</sup> ¿Ēmbi mibi adobocpadomboen utsi bédamboen istiapimboda icco? ‘Ma bēnu,’ qeshun mimbi meniactedi bēabi icsho bédamboen isec mibitsen bédambo ictsenac. Mibi yapdadec nēishun mibi cuidembi,” quepac caondash icbo. <sup>34</sup> Adshun quēnēn nauedmepac caondash. “Ambi bedactedi piucquid dadpenquio meniash ma puduemanu,” qeshun quēnēn nauedmiac caondash. <sup>35</sup> Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bédamboen istiapimbo iqueque. Chieshēnanenda. Mibi chieshēnquidobi bédamboen ista — quepondash Esus.

## 19

<sup>1</sup> Adanec nidaid cuëshê Cadidia caid yacnuësh puduanec nidec nidaid cuëshê utsi Udeya caidên nidquin acte Odan caid potebidanec Esus nidpondash. <sup>2</sup> Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusên bêdamepondash.

<sup>3</sup> Adnubien tsusedpabon chiampid namequido padiseyobon chieshênquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tantianu —capondash.

<sup>4</sup> Adoquin Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. <sup>5</sup> Adembidi: “Dadan canite chido uaid icsho dadan aton chido bedquid. Amê chedobêd icboedi aton chido bedash aid nianenquo yec aibbêd tantiananquiec dada aton chidobêd abentsêc yaczimboec tabadquid,” quequin dada uaid ma mimbi ispaboc. <sup>6</sup> Aden Nuquin Papan tantiacpadomboen aton chido nianenquo yec aibbêdi tantiananquiec abentsêc yaczimboec tabadac bêdambo ictsiash. Padnuen aton chido nianec aibbêdi cuëshêdquin Nuquin Papan chiaid niactsiash. Adecbidi chido aton bènê nianec icsaquid —Esus qesho <sup>7</sup> tantiashumbien abi chieshênquidon: —¿Abimboda mimbi capadi? Nuquin Papan chiaid dada uaquin ¿atotsieshun Moisesên naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesên dada uapampid ma icpayoc —quequin chuipondash Esus chieshênquidon.

<sup>8</sup> Adsho tantiashun Esusên chuipondash. —Ai, Nuquin Papan chiacpadec aton chidobêd bêdamboec tabadtiaimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chambo icpampic. <sup>9</sup> Tantia. Mibi chuinu. Aton chidobêd cuëshêdshun chido utsi bedquin Nuquin Papan chiaid niactsiash. Padnuen aton chidon bènêpenquo chudmesho istuidash aibbêd cuëshêdquin Nuquin Papan chiaid niaquenquo ictsiash —quepondash Esus.

<sup>10</sup> Adnubien abêd icquidon: —Adotiapimbo icte mimbi chuipec. Aton chidobêd cuëshêdenquo icte mimbi chuisho tantiashun: “Aton chido bedesambo dada bêdambo ictsiash,” caimbi —quepondash abêd icquido.

<sup>11</sup> Adsho tantiash Esus: —Ai, utsi-utsiec pabiate shêcuê nibêdacimboen êmbi chiaid tantiatiapimbo iquec. Utsiboen aton chido bedash Nuquin Papan chiacpadec bêdamboec tabadquid nec. <sup>12</sup> Utsibic mimbi chiacpadquid chido bedesa iquec. Nêidtedi chido bedesa iquec. Nêidic aton padibi împadishtsaid. Nêidic matsesên inicsa uaid. Nêidic: “Nuquin Papan yuambo icquin aidên chiacpadomboenuidi naquin chido bedtiaimbo iquebi,” qeshun chido bedesa. Adquidtedi chido bedesa nec. Êmbi chuiboed tantiashun êmbi chiacpadomboen nac bêdambo ictsiash —quepondash Esus.

*Esusên bacuêbo chiaid  
(Mad 10.13-16; Duc 18.15-17)*

<sup>13</sup> Adnubien Esus ismenuen bacuêbo bê-bêpondash. —Mamishquin ma Nuquin Papa Esusên chuinu —quequin bê-bêsho isumbimbi: —Padî. Bêenda —cauidpondac. <sup>14</sup> Adshobini Esusên: —Chên. Ma benu. Cuemenda. Bacuêbimboecquid Nuquin Papa yacno puduedtequid nec. Amên chuisho tantiash bacuê badedi: “Abimbo caic,” quiacimboen êbi tantiaquid Nuquin Papa yacno puduedtequid nec. Bacuêbo bêdambo iqueque. Beccho —cac bê-bêpondash. <sup>15</sup> Adshobien mamishbanquin Nuquin Papa chuipondash. Adobidanec nidondash Esus.



*Cania aton na dadpenquoio dayun uaquid Esusbēd onquiaid  
(Mad 10.17-31; Duc 18.18-30)*

<sup>16</sup> Adnubien dada caniampinquoio Esus chuituidpondash. —Mibi bēdambo iquec. Bēdamboen chuiquidquoio mibi neque. Ēbi chui. Padpidec unēstiapimbo icquid icmenun bēdambo icquid Nuquin Papan abi yacno puduedmetsiash. ĴAtotsi nasho Nuquin Papan ēbi bēdambo capatsiash? —caquien <sup>17</sup> Esusēn: —ĴMitsipadquid bēdambo icquid cai? Nuquin Papauidtsēqui bēdambo icquid nec. Aidbēd tabadnuen ambi Moises dada uamiampictedi nata —capondash. <sup>18</sup> Adoquien cania: —Nuquin Papan chiaid Ĵmitsipadquid cai? —quesho tantiashumbien: —Naden chiaid cāimbi. “Cuesunenda. Min chidopenquoio chudenda. Min bēnēpenquoio chudmenda. Ampenda. Muainda. <sup>19</sup> Titabēdta papa chieshēnenquoio icquūn bēdamboen tantiata. Adembidi mibibi datantiadachimboen matses ufsi abitedi tantiaquiota,” quequin chiaid caimbi —capondash Esusēn. <sup>20</sup> Adsho tantiash cania: —Aidtedi niaquenquoio icquūn nabanquidquoio nebi. Bacuēctšec icquimbi tauaondambi. “Nuquin Papabēd tabadnuen Ĵatotsimbi utsi nape?” cāimbi —quepondash.

<sup>21</sup> Adsho tantiashumbien Esusēn: —Nuquin Papan chiaid niaquesambo ictiadquoio icquūn mimi dayun uaidtedi uesquin menequin piucquid bedta. Piucquid bedshun piucquid nibēdquido min piucquid uesquin menebanta. Adsho abēd tabadmenun Nuquin Papan mibi bēdamboen ištiashe. Adota. Adotanequic ēbēd iquec cho —caquien <sup>22</sup> cania: —Con na dadpenquoio icsho uesquin menefiapimbo iquebi —quiash shubiantiadtsēcquio ictanec nidpondash Esusēn chiacpadomboen natiapimbo yec.

<sup>23</sup> Adsho isun Esusēn abēd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedēmbi ēbi tantiatiapimbo iquec. Aton nauidtsēqui tantiec. <sup>24</sup> ĴAda nēishamēn pinchuc chichte ancumpadic? Padenquoio. Adecbidi aton na dadpenquoio dayun uaquidēn aton nauidtsēqui tantiaquin ēmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusēn chuipondash.

<sup>25</sup> Adec: —ĴAda nēishamēn pinchuc chichte ancumpadic? —quesho tantiashien abēd icquido nadpondash. —ĴTsudain Nuquin Papa yacno puduedtequid icchitotsiash? Nibēdchitequien iquec —quesho tantiashumbien <sup>26</sup> Esusēn abēd icquido bēisquin naden chuipondash. —Matses namiantiapimbo icnuc Nuquin Papain namianquidquoio nec. Ambi natiapimbo ictequid nibēdec —quepondash.

<sup>27</sup> Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibēd icnuec chopondabi. ĴMitsimbo tabadtequidini nepe? ĴAtotsimbi nape? —caquien <sup>28</sup> Esusēn: —Tantia. Mibi chuinu. Nuquin Papan ambi uaid abitedi chuca uabocnoēshquoio ēbēdtan chuiquid mibitedi iquendac ēmbi abitedi namiacnuēshquoio. Ēbēd icquido icsho isun Nuquin Papan mibi chuiquid icmendac. Nuquin tsusedpa Acobon mado Ĵtedtsi icpampic? Aidtedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. <sup>29</sup> Utsibontsen ēbi tantiendac. Aton shubu nianquinc abēdta tishaido nianquinc aton tita nianquinc aton papa nianquinc aton bacuēbo nianquinc aton tied nianquinc cain ēbi tantiaquin ēmbi chiacpadomboen naquid iquendac. Adsho nēbi unēsabi icsho ambi nianaidobēd tabadachimboecnuc bēdambo icmendambi. Adoshombic unēsacsho Nuquin Papa yacno tabamdendambi padpidec unēsenoquoio icnuc. <sup>30</sup> Nidaidēnuēsh chuiquid dapambo icboedi Nuquin Papa yacnuēsh utsi-utsiec chuiquidpenquoio iquendac. Utsibic nēuēshquoio chuiquidpenquoio icboedi Nuquin Papa

yacnoshon: “Bëdambo icquid nec,” quequin chuiquid dapa icmendac — quepondash Esus.

## 20

### *Chonoadquido chiaid*

<sup>1</sup> Adshumbic abëd icquido Esusën ompoacbimboen chuipondash. — Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. <sup>2</sup> Istuidshumbic: “Badiadnubi tauashun ushë budtsambi mimbi ènacsho nëidtedi piucquid mibi menenu. Naic cho,” cac chonoadec cho-chopac caondash. <sup>3</sup> Ushë abucquio yanubi tied icbon pete meniacno nidshun utsibo nainquo yec samëdsho istuidpac caondash. <sup>4</sup> Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac <sup>5</sup> tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. <sup>6</sup> Inchëshbudtsëqui nidoaquin utsibo nainquo yec samëdsho istuidoashun: “¿Atotsi quiaish samëduidequi ique?” cac <sup>7</sup> samëdquido: “Chonoa uanquid nibëdosh,” qesho tantiaashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

<sup>8</sup> Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ènquimbi meneta,” cac menequin tauapac caondash. <sup>9</sup> Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquio piucquid menepac caondash.

<sup>10</sup> Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” qeshobi aidtedtsëcbidi piucquid menepac caondash. <sup>11</sup> Aidtedtsëcbidi meniaquien tied icbo chushcapac caondash. <sup>12</sup> “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquiec iquec. Èbi dadpen meniac bëdambo ictsiash,” quequin chushcapac caondash.

<sup>13</sup> Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc. <sup>14</sup> Mimbi bedboed buanec nid. Èbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? <sup>15</sup> ¿Icbon ambi tantiapadomboen aton na dadpen meniac ada aid icsambo icpec? ¿Utsibotsen menesho isunda mimbi èbi nëishëmpe? Aden nëishënac ¿ada bëdambo iquec?” quequin tied icbon chuipac caondash — quequin ompoacbimboen chuipondash Esusën. <sup>16</sup> Adashic: —Adembidi abi yacnoshon ambi tantiapadomboen Nuquin Papan naindac. Utsi-utsien chuiquid dapa icmequin utsi-utsien padenquo icmendac — quequin chuipondash Esusën.

### *Abi unëste Esusën padpiden chuoaid*

(*Mad 10.32-34; Duc 18.31-34*)

<sup>17</sup> Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abëd icquido 12tedi icquid

chuinuen uanotantsëcquin buampondashi. <sup>18</sup> Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” qeshun <sup>19</sup> matses utsibo isadaidpembo ëbi bedmendac. Aden bedmiac matses utsibon mamënshunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqi daëdec ushash uincuenendabi —quequin Esusën abi unës uate padpiden chuiopondashi.

*Uanën titan chiaid  
(Mad 10.35-45)*

<sup>20</sup> Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiacpadomboen ëbi nashunta, Icbo —caquien: <sup>21</sup> —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: <sup>22</sup> —Ëmbi naid tantienquido icquin mimbi chuipec —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquido icpatsia? —caquien Uan: —Ai, chieshtoenquido ictsiabi. Mibëd mëyadtsiabi —quepondash.

<sup>23</sup> Adsho tantiaashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmenac —quequin Esusën chuipondash.

<sup>24</sup> Adnubimbi: —Chuiquid dapa ëbi icme —Esus casho tantiaashun Uan chedo nëishëmpondac. <sup>25</sup> Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. <sup>26</sup> Ëbi tantiaquido icquin mimbi adoenquido iquendac. “Bëdambo mibi iquec,” Nuquin Papa cametiadquido icquin utsibo tantiaquin mimbi utsibo nashuntsiac. <sup>27</sup> Bëdambo icquid ictiadquido icquin yuan aton icbo nashunacimboen mimbi utsibo nashuntsiac. <sup>28</sup> Adembidi Nuquin Papan matsesmiaid icquin matses nashunquid nebi. Ancainquido icquin matses tantiaquin Nuquin Papa icsaquidobi cuidmenquido icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamiaid  
(Mad 10.46-52; Duc 18.35-43)*

<sup>29</sup> Adashic yuecquido ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash. <sup>30</sup> Adnubien aid podqued cuëman bëshuaid dada daëd tsadpondash. —Esus cuenec —quesho tantiaashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquido icquin ëbi bëdamboen ista, Icbo —quepondash Esus caic.

<sup>31</sup> Adsho tantiaashun matses dadpenshun chushcapondash. —Padi. Chën. Adec cuëdec chieshanquieci mibi iqueque —caquien abi niacbidanec buëdanquieci cuëdpondash. —Tsusedpa Dabidën tsyuecquid Nuquin Papan namiaidquido icquin ëbi bëdamboen ista, Icbo —queopondash.

<sup>32</sup> Adoaquien Esusën nidtuidshun ëcbedpondash. —¿Atotsi chuinuec ne? —caquien: <sup>33</sup> —Isbente bunquiebi, Icho —quepondash. <sup>34</sup> Adsho tantiash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdanshun aidëntsen Esus tsibanampondash bëshuacboedëmbi.

*Edusaden yacnoshon chuiquid dapabimboecnuc Esus bëdamboen isaid*

## 21

*Edusaden yacnoshon chuiquid dapabimboecnuc Esus bëdamboen isaid  
(Mad 11.1-11; Duc 19.28-40; Uan 12.12-19)*

<sup>1</sup> Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. <sup>2</sup> —Nëid podquedën nidquin shubu daëdpactsëc yacno nidshun cabayobitsecquid aton bacuë caniatsecbëdta mimbi badedquio istuidendac. Istuidshun tënëshaid tëdiadsho tëchicta. <sup>3</sup> Mimbi tëchicsho isquidën: —¿Atotsi acnun nai? —cac: —Nuquin Icho: “ ‘Bedtan,’ quiosh,” mimbi cac: “Ai, buantan,” quendac —quequin Esusën chuipondash. <sup>4</sup> Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

<sup>5</sup> “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatseëc catsadtoash choeque. Ancanenquio yec bëdamboshë icquidquio neque. Is,’ quequin chui,”

quequin dada uapampic. <sup>6</sup> Aden dada uampicpadomboen ambi: —Bedtan —caidon bedtampondash.

<sup>7</sup> Adotanquin cabayobitsecquid anibëdta caniatseëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseëquën Esus catsadtopondash.

<sup>8</sup> Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobieccquid tetanequin podqued ansambampondash: —Chuiquid dapa Esus nec —queshun. <sup>9</sup> Matses dadpen bëyuc nidnubi aidtedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyueccquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,” quec cuëdëncuededpondash.

<sup>10</sup> Adec Edusaden yacno matses dadpenquio cuëdënidëc nidsho isashien Edusaden yacnocquido: —¿Tsutsi tantieë cuëdëncuededpec? —quepondash.

<sup>11</sup> Adsho tantiashun Esusbëd nidquido: —Esusquio tantieë nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantieë nec —quepondash.

*Esusën chushcaquin cuemiaid  
(Mad 11.15-19; Duc 19.45-48; Uan 2.13-22)*

12 Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio pudueden-  
quio yec. Adshun isquien piucquid bednuequido dadpen tabadpec. Utsi-  
utsiec nidaid utsin icquido piucquid dadpen bedshunquimbi muaquin pi-  
ucquid utsi daëdpectsëc menequid icnubi utsi-utsiec: —Nëid bedquidën: “Ma  
Nuquin Papan ëbi bëdamboen isnu,” qeshun picchicametsiash —quequin  
aton nëish yua menequin piucquid dadpenquio bedquid nepondash. Ad-  
sho istanquin Esusën cuemepondash. Ambi tabëcaid bidiacbanquin aton  
yua dëbimbitsecquido cuemequin piucquid bednuequidotedi cuemepondash  
naden chuiquin. 13 —¿Adenda mimbi Nuquin Papan chiaid bëdamboen nape?  
Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”  
quequin Nuquin Papan chiacpadomboen aton shubun puduedshun aid  
chianetiadquidi mimbi adoenquio iquec. Mitsana bedteuidi bunec ampec  
tabadte shubu mimbi icmiaye. Cuen —quequin cuemepondash.

14 Adnubien Nuquin Papa tabadte shubu uashunaid yacno bëshuaid yec  
daicsaid yec quenuc bë-bëpondash. Aden bë-bëshobien Esusën bëdamepondash.

15 Adsho isashien Esus chieshënquido nëishpondash. Adec nëish yua abided  
unës uaquido chuiquid dapabobëd Moisesën dada uampid chuibanquido  
nëishpondash. Adec comapenen tantiaquin Esusën nabansho isash nëishboedi  
bacuëbotsen: —Nuquin tsusedpa Dabidën tsyuecquid Nuquin Papan nami-  
aid yec mibi bëdambohë iquec —quec Esus caic cuëdëncuededsho tantiash  
nëshiquiopardash. 16 Adshumbic: —Icsambo iquec —qeshun Esus chuitu-  
idec: —¿Ada bacuëbo cuëdënsho tantio? —caquien: —Ai, tantiombi. ¿Nuquin  
Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

“Nuquin Papa bëdambo iquec,” caindac.”

quequin chuipampic —quepondash Esus. 17 Adanec nidec shubu dadpen  
icquid Betaniã yacno nidash ushtuidpondash.

*Esusën cuëte unës uaid  
(Mad 11.12-14, 20-26)*

18 Badiadnubi ënden aubidi nidoaic Edusaden yacnobidi nidoapondash.  
Piabi nidec bundoshon 19 podqued cuëman nidquid cuëtempi icueda caid  
istuidash: —¿Ada bacuëaye? Chenun isbono —quepondash Esus. Ad-  
shun isquien bacuë nibëdec. Podouidquio icpec. Adsho isumbien Es-  
usën: —Adequi bacuëesambo yec unësta —capôndash. Adoac badedquio  
unëshpondash.

20 Adosho isun abëd icquidon: —¿Atotsi quiash badedquio unëshposh? —  
caquien 21 Esusën: —Tantia. Mibi chuinu. Adembidi mimbi natsiac.  
“Nuquin Papan ambi chiaid nainquien icchitec,” quenquio icquin: “Nuquin  
Papan ambi chiacpadomboen naquidquio nec,” qeshun mimbi Nuquin  
Papa chianesho aidëmbi mimbi: “Natiapimbo iquec,” caidi mibi nametsi-  
ash. Aden tantiaquin mimbi nëid macuësh caïn: “Mananuc tabadboedi  
adquiecbidi acte nantan tabadoata,” mimbi cac nëid macuësh acte nantan  
tabadoatsiash. 22 “Ambi chiacpadomboen naquidquio Nuquin Papa nec,”  
qeshun mimbi aid chianiac mimbi chiaid Nuquin Papan mibi nashuntsiash  
—quequin Esusën abëd icquido chuipondash.

*¿Tsuntsin: Naic nid, cac nai? quequin Esus chuimiai  
(Mad 11.27-33; Duc 20.1-8)*

23 Adcuidanec Edusaden yacno padpidec nidshun Nuquin Papa tabadte  
shubu uashunaid daquënë uaidën puduedshun Esusën Nuquin Papan chiaid  
chuipondash. Adsho tantiashun con matses tsusiobon Esus chieshënquidon

chuituidpondash. —¿Tsuñtsin: “Naic nid,” cac nai? En chui. Tantiñu —caquien <sup>24</sup> Esusën: —En mimbía chui. Ēmbía tantiñu. Mimbí chuisho tantiñshun ēbī namequidtsen chuinu. <sup>25</sup> ¿Tsuñtsin namiac Uan padon acten mentopadenec? ¿Ambembida napadenec? —capondash Esusën. Adoquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuquĩ chuipeba? “Nuquin Papan namiadquio Uan pado nepadenec,” cac Esusën: “¿Atotsieshushun aidën chiacpadomboen nainquio ique?” canushe. Aden chienquien ictiad. <sup>26</sup> Nuqui: “Ambembi napondash,” quesho tantiñshun nēmo icquidon nēishēñushe: “Nuquin Papan namiad Uan pado niondash,” queshun. Aden chienquien ictiad —quepac caondash Esus chieshënquido. Isadaidbo tsusiobobēdi nēish abided unēs uaquido chuiquid dapabo adpac caondash. <sup>27</sup> Adashien Esus padpiden chuiōaic: —Tsaudi. ¿Tsunñan chiauquien nachitondash? —queshobien: —Mimbí chienquio icsho tantiñshun ēmbitsen ēbī namequid chienquio iquembi —capondash Esusën abī chieshënquido cuidquin chuiquin.

### *Mado daēdshun nacbimboecquido chiaid*

<sup>28</sup> Adshumbic Esusën padpiden chuipondash. —Tantía. Mibí chuinu. Ēmbí chiaid tantiñshun ¿mitsicquid: “Bēdambo iquec,” catsiá? Dada aton mado mado daēdpambo icquid icpac caondash. Abentsēc chuiquin: “Neshcaic nid, mado,” cac: <sup>29</sup> “Padi,” quec chieshuidboedi yuec-yuecpactsēctanec: “Tiedimbi neshcatanchitec,” quiash neshcaic nidac caondash.

<sup>30</sup> Adshumbic amēñ aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash.

<sup>31</sup> ¿Mitsicquidēñ aton papan chiacpadomboen napac caondash? En chui. Tantiñu —caquien Esus chieshënquido: —Abiá chiac chieshuidboedēñ —quesho tantiñshumbien Esusën: —Adquidpñquien mibí nec. Mibí tantiñtiapimbo yec tabadnubi mimbí icsambo caido Nuquin Papan yacno puduedendac. Chieshuidacimbocquid aido nec. Aton matses piucquid bedshunedeno yec aton piucquid bednuen dada chudmeboedo chido yec quequin Nuquin Papan tantiñbenash abēd tabadtequido yanendac. Mibien padenquio iquec. <sup>32</sup> Uan pado acten mentoandenedēñ Nuquin Papan chiaid chuiquin bēdamboec tabadte chuipadenec. Adsho mimbí tantienquio icnubi mimbí icsambo caidombi Nuquin Papan tantiñbempondash. Adsho isun Uan padon chiacpadomboen mibí icsaid ēñtiadquidi mimbí ēñenquio iccondac. Aton papan chiaid nianquidbimboecquid mibí nec —quepondash Esus abī chieshënquido chieç.

### *Abi chieshënquido icsaid Esusën chuiōaic* (Mad 12.1-12; Duc 20.9-19)

<sup>33</sup> Adshumbic Esusën abī chieshënquido ompoachimboen chuipondash naden. —Tied icbon chetequid nidtsinac caondash. Adoshombic aid tied daquēñē uatanquimbic chetequid chintetsen nacnempac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Nēid tiedēñ caniquid chetequid iquec. Aid chequin ēbī neshcashunta,” utsibo canec ēñapen nidpac caondash.

<sup>34</sup> Adash yuectaneshumbien abēd nidondaído aton yuabo chuiquin: “Nēñ chetequid sinashe. Bedtan,” cac aton yuabo nidanepac caondash. <sup>35</sup> Adec aton icbon tiedno nidaniacshobien neshcaquidon cudasēñquin chieshēmpac caondash. Abentsēc cuesunetanquin utsi cuēñoten seshuenequio pac caondash. Utsibic cuesquin cuemepac caondash. <sup>36</sup> Aden cuemiaid choshon chuituidaquien icbon nidboedtedpenquio dadpenquio aton yua utsibo chui pac

caondash. “Bedtan,” cac nidanec tiedno choacsho isun adembidi cuesun siapac caondash.

<sup>37</sup> Adoacsho tantiash aton madombo caic: “Bedtan,” quepac caondash. “Con mado cuesunenquo icquin ëmbi chetequid menetsiash,” qeshun aton madotsen nidmepac caondash <sup>38</sup> Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiash,” qeshun <sup>39</sup> tied tsitsuno buanshun cuesunepac caondash —quequin Esusën chuipondash.

<sup>40</sup> Adshumbic ambi chuiboedquo abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho <sup>41</sup> tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcಾಮetsiash —quecuedpondash datsidadquido.

<sup>42</sup> Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquio shubu uanun nitsinemi,’ quetiadquidi isuidacimboen Nuquin Papan namiaid chieshënac. Aden buintad isuidaid utsin bedshun shubu uanun nitsinacimboen Nuquin Papan tantiamicpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,” quequin dada uapampic. <sup>43</sup> Aden ambi namiaid ëbi chieshënsho isash mibi caic Nuquin Papa nadpec. “Ëmbi con matses caid isadaidbo ëbi bëdamboen tantiametiadquidi chuiquid dapabon namenquo icsho isun utsibotsen: ‘Ëbi chuiquid icta,’ caindami,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac.

<sup>44</sup> Mibien Nuquin Papan cuidtequido nec. Cuëte uebudquin catashac canite uesadec podquëd-podquëdacimboecnuc mibi comapenen cuidendac —quepondash Esus abi chieshënquido chiec.

<sup>45</sup> Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash.

<sup>46</sup> Adshumbic Esus cuesunemenuen bedtiadquido icquimbi bedenquo icpanëdash. —Abi datsidadquidon: “Nuquin Papan chiaid chuibanquidquido Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquo icpanëdash.

## 22

### *Cacuidanaid chiaid* (Duc 14.15-24)

<sup>1</sup> Adshumbic Esusën padpiden ompoacimboembidi chuipondash naden.

<sup>2</sup> —Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaid mibi chuinu. <sup>3</sup> Chuiquid dapan aton yuabo chuiquin: “‘Con icbon madon chido bedequë. Aidbëd cuishonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquo icpac caondash.

<sup>4</sup> Adsho isumbien chuiquid dapan aton yua utsibo chuiquin: “Nëish nua bëchichoquidquido dadpen codoquiaccoshe. Padpiden chuitan,” cac chuitanoaqui <sup>5</sup> choenquobidi icpac caondash. Adec cacuidanquie abentsëc aton tied nantan nidnubi utsi piucquid bednuequin ambi aton

na menebante shubuno nidpac caondash. <sup>6</sup> Utsimbic abi: “Pec cho,” cashobi yuabo mëyanquin cuesun secapac caondash.

<sup>7</sup> Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash.

<sup>8</sup> Adomeboshombic chuiquid dapan: “Abi pete codocaid dadpen iqueue. ‘Pec cho,’ cac cacuidanoshe. Utsibo chuitan. <sup>9</sup> Èmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun <sup>10</sup> ambi istuidaidtedi chuibenetanac matses dadpenquoio pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcueded-pac caondash tsucos-tsucustsëcquoio yec.

<sup>11</sup> Adshun chuiquid dapantsen puduedshun isquien dashcute bëdaidquoio dasiuidabi icquid abentsëc tsadtsec. <sup>12</sup> Adshobien chuiquid dapan: “¿Atotsi quiash dashcute bëdaidquoio dasiuidambobi cho, buchi?” caqui ëcbedenquoio yec tsadec. <sup>13</sup> Adshobien chuiquid dapan: “‘Chido bedacno isnuec dashcute bëdaidquoio dasiuidquid,’ guepadenec. Mibi icsambo iqueue. Mibi cuidnu,” queshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquieq natiaic shubiquiopac caondash.

<sup>14</sup> Adembidi Nuquin Papan ambi matses bëdamboen iste dadpen tantiamaqui utsin-utsinquenti tantienquoio iquendac. “Abi yacno puduednu,” queuidboedi bëdambo icte bunenquoio yec abi tantiatiapimbo icsho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac —quequin Esusën chuipondash.

### *Chuiquid dapa piucquid menete chiaid* (Mad 12.13-17; Duc 20.20-26)

<sup>15</sup> Adsho tantianec nidash abi chieshënquido padiseyobo: —Esus icsamboen chuimenuna. Icsamboen chuisho tantiashun bedshun unës uamechitono —qeshun ambi chuibanquin tantiamiaido chuipac caondash.

<sup>16</sup> —Icsamboen chuimetan —caquien chuiquid dapa Edodes caid tanti-aquidobëditan icsamboen chuimenuec cho-choshon chuituidpondash. —Bëdamboen chuiquid mibi neque. En ëbi chui. Tiantianu. Muesambo icquin Nuquin Papan chiacpadec bëdamboec tabadte mimbi abimbo chuipoc. Matses dacuëdënenquoio icquin Nuquin Papan chiaidquoio mimbi chuipoc.

<sup>17</sup> Adquid icquin ¿atotsi mimbi chuipe? Tiantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bëdambo icpatsiash? —capondash. <sup>18</sup> Adoquien Esusën ambembi tantiashun: —Bëdambo icquid damianquieq mibi muambo nec. ¿Atotsieshun ëbi icsamboen chuimetiadquoio ique? —quetanquin:

<sup>19</sup> —Chuiquid dapa menetequid piucquid shocoshëmpi beccho —ambi cac <sup>20</sup> bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tiantianu —caquien: <sup>21</sup> —Ma nuqui yuaquid chuiquid dapambo Sesad neyoc —quepondash. Adsho tantiashumbien Esusën: —Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adëcbidi Nuquin Papa nuquin Icbombo neque. Aidën chiacpadomboen nabanta —quequin Esusën bëdamboen chuipondash. <sup>22</sup> Adsho tantiash icsamboen chuimetiadquoio icboedi: —Bëdamboen chuieq —quetanec nidanepondash.



*Matses uincuemete chiaid*  
(Mad 12.18-27; Duc 20.27-40)

<sup>23</sup> Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash. <sup>24</sup> —Bëdamboen chuiquidquo mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin madobimboec-nuc tishmenu,’ quequin tishmequid,” quequin Moisesën dada uapampic. <sup>25</sup> Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash <sup>26</sup> bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Ade-nuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. <sup>27</sup> Adashic bacuë tishambobi aid chidotsen unëspac caondash. <sup>28</sup> Aid abitedi uincuemiac ¿mitsicquidën chido icpatsiash? —caquien <sup>29</sup> Esusën: —Nuquin Papan chiaidquo tantienquo icquin Nuquin Papan nadatiambo icquin nabanquin uincuemete mimbi tantienquo iqueque. Chuinu. Tantia.

<sup>30</sup> Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matsës uincuemiaido iquendac. Aden uincuemiaidën chido bedesa —quepondash Esus. <sup>31</sup> Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ¿isbanabida ictio? Ma mimbi aid isbampaboc. <sup>32</sup> Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. <sup>33</sup> Adsho tantiash abi datsidadquido: —¿Mitsipadquid nepec? Bëdamboenshëen chuipec —quepondash.

*Moisesën dada uampid chiaid*  
(Mad 12.28-34)

<sup>34</sup> Aden unësaid uincuemete chuisho tantiashumbien Saduseyobon padpiden: —En chui —cainquo icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. <sup>35</sup> Cho-choquin abentsëcshun Nuquin Papan Moises dada uamiampid tantiaquidquo icquin chuimetuid-pondash. <sup>36</sup> —Chuiquidquo mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? —caquien <sup>37</sup> Esus: —“Nuquin Papa tantiaquiec ambi chiacpadec tabadte bunquiota,” quequin <sup>38</sup> chiampidba naic Nuquin Papan chiacpadec mibi bëdamboec tabadtsiandac. <sup>39</sup> Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. <sup>40</sup> Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënquido chuiquin.

*Nuquin Papan chomiaidquio chiaid*  
(*Mad 12.35-37; Duc 20.41-44*)

<sup>41</sup> Adshumbic Esusēnsen abi icsamboen chuimete bunquido Padiseyobo chuipondash. <sup>42</sup>—Ĕmbitsen mibi chuimenu. Tantia. Nuquin Papan chomiaid ĩmitsipadquid nec? ĩMatesēn madouidida nepec? —capondash Esusēn abibi cadquimbi. Adoaguien badedi: —Nuquin tsusedpa yampid Dabidēn tsyuecquid icsho Dabidēn mado caimbi —quepondash Padiseyobo.

<sup>43</sup> Adsho tantia shumbien Esusēn: —Ĕbēdamboenda chuidio? Mimi chiacpadquid aton mado icsho ĩatotsieshun Nuquin Papan Mayanēn tantiamiacpadomboen Dabidēn con Icho capampic? Naden Dabidēn dada uapampic.

<sup>44</sup> “Nuquin Papan con Icho naden chiendac.

‘Con abiuic tsadash abitedishun Icbombo icnush nēmo cho.

Mibi chieshēnquidobi con Icho mibi camenu,’ quequin Nuquin Papan con Icho chiendac.”

quequin Dabidēn dada uapampic. <sup>45</sup> Con mado cainquio icquin con Icho capampic Dabidēn. ĩAtotsieshun mimi: “Dabidēn mado nec,” quequin tantiape? —caquien <sup>46</sup> ĩcbedenquio yec otacquo tabadpondash. Esusēn bēdamboen chuisho tantia sh: —Icsamboen chienquien icchitec. Ĕmibi padpiden: “Icsamboen chuimenu,” cac bēdamboembidi chuiotsiash —queshun abi chieshēnquido abitedishun Esus padpiden chuimenquo icquin ĩnaccondash.

## 23

*Bēdambo icquid damianquido tanenda, quiaid*  
(*Mad 12.38-39; Duc 11.43, 46; 20.46*)

<sup>1</sup> Adshumbic Esusēn abēd icquidobēdta abi datsidadquido tantia mequin chuipondash. <sup>2</sup> —Tantia. Moisesēn dada uampid chuibanquidobēd tan tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec. <sup>3</sup> Aden Moisesēn dada uampid abimbo chiac adenuidi mimi nac bēdamo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec.

<sup>4</sup> Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquio namepec chushcanquin. “Matesēn aidtedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenquo iquec.

<sup>5</sup> Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuic daēdi pēdectamēdec quesun matses ismenuenuidi naic. Adembidi aton dashcute tēdiadte nacnenuequin: “ ‘Nuquin Papa chianequidquido nec,’ ma ĩbi canu,” quesun sedquid shoyonaid ĩnapenpactsēcnuc cuididicash matses ismenuec matses tabadacno capucuenepc. Adec Nuquin Papa chianequid damianquiec. <sup>6</sup> “Chuiquid dapa nec,” cameteuidi bunec. ĩsedec puduedash: “Chuiquid dapa icsho ichon abēdi tsadmequid,” quiaish icbobēdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuc utsibobēd tabadenquio yec tsusiobobēduidi tabadquid nec. <sup>7</sup> “Chuiquidquido yec mibi bēdambo iquec,” camete bunquiec matses dadpen tabadacno nidtenepec.

<sup>8</sup> Mibitsen adenda. Utsibo: “Mibiuidtsēqui bēdambo iquec, Icho,” camenuc adenda. Min Icho abentsēcquidobi ĩbi iquec. Ĕbi abentsēqui con Icho cata. Con yuabo yec con utsibo mibi neque. Bēdamboec isnanta. <sup>9</sup> Adembidi mibi chuibanquid chuiquimbi: “Mibiuidtsēqui bēdambo iquec, Papa,” cainda.

Nuquin Papauidsëqui aden chuita. <sup>10</sup> Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Ĕbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquio utsi nibëdec.

<sup>11</sup> Padnuen ambi chiacpadomboen utsibo nashunquidquio utsibo dëniacte bunenquio icquid Nuquin Papan bëdamboshë catsiash. <sup>12</sup> Utsien abibi cad- equi: “Ĕbiuidtsëqui bëdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bëdambo caindac —quepondash Esus abi datsidadaido chiec.

*Abi chieshëquido Esusën chushcaid*

*(Mad 12.40; Duc 11.39-45, 52; 20.47)*

<sup>13</sup> Adshumbic abi chieshëquidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” queshobi mimbi bëdamboen chienquio iquec. Ĕmbi Nuquin Papabëd tabadte bëdamboen chuisho mimbi tantienquio iquec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiameti- apimbo iquec.

<sup>14</sup> Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquio damenuen utsibo tantiaquidquid mibi buëdpambo cuëdquin Nuquin Papa chiacbimboen mimbi chianepec. Aid abimbo mimbi chienquio iquec. Adëc chieshanquiec- sho isun Nuquin Papan mibi comapenen cuidendac.

<sup>15</sup> Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasën yuambo yanec Nuquin Papan cuidtequidombo iquendac.

<sup>16</sup> Nuquin Papan cuidtequido mibi nec. Isadaidbo chuiquid icquin bëdamboen tantiamenquien mimbi icchitec. “Nuquin Papa utsi uatiapimbo yacpaden abimbo caimbi,” quequid muaisa nec. Muaquidën Nuquin Papan chiaid niacquid,” quetiadquidi mibi adenquio iccoc. “Nuquin Papa tabadte shubu uashunaid utsi uatiapimbo yacpaden abimbo chiombi,” que- quid muaisa nec,” quetiadquidi mibi adenquio iccoc. Padenquio yec: “Nuquin Papa tabadte shubu uashunaid dapan icquid shocosh piu nacne- naidquio utsi uatiapimbo yacpaden abimbo chiombi,” quequid muaisa nec,” quechitequien mibi iquec. <sup>17</sup> Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bëdapenquioda icpec? “Aid bëdamboshë icnubi aid nuntan icquid bëdiactsëc bëdambo iquec,” caimbi. Mimbien icsamboen tantiec. <sup>18</sup> Nadentsen mimbi icsamboen chiec. “Nuquin Papa tabadte shubu uashunaid dapa yac- noshon: Mabi Nuquin Papan bëdamboen isnu, quequin nëish pichicate nacnenaid dapa utsi uatiapimbo yacpaden abimbo caimbi,” quequid muaisa nec,” quetiadquidi mibi adenquio iccoc. “Nuquin Papa mabi bëdamboen isnequin pichicatequid nëish utsi uatiapimbo yacpaden abimbo caimbi,” quequid muaisa nec,” mibi quepec. <sup>19</sup> ¿Adenda mimbi bëdamboen chuipe? Pashuacbimboen mimbi bëdamboen tantienquio iquec. ¿Mitsicquid bëdambo iquec? “Mabi Nuquin Papan bëdamboen isnu,” quequin nëish pichicate nacnenaid dapa bëdambo icnuc aidën pichicatequidi nëishquio bëdapabi icctec. Nuquin Papamboen bëdamboshë iquec. <sup>20</sup> Nëish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid

nèish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. <sup>21</sup> Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. <sup>22</sup> Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidēn chiaidquio tantiec: “Abimbo cacbimboen chuiquid icsaquid nec,” quetiadquidi mibi adenuo iccoc.

<sup>23</sup> Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bēdamboen ista,” guesho bēdamboen istiapimbo mibi iguec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iguec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. <sup>24</sup> Tantesa uatsēcquimbi mimbi utsibo icsamboen chiec. Manuampi nibedbantsēcquimbi utsi nuacquid nibedquiabi abi nēsamedpanumbobi acacbimboembien mimbi nachitec. “Nuquin Papa meneta,” quequin chiaiduidtsēqui natsēcshun adenuidtsēqui mimbi utsibo namepec. Adenuidtsēqui namequimbi Nuquin Papan chiaid utsien mimbi niac-niacchitec.

<sup>25</sup> Nuquin Papan cuidtequido mibi nec. Padiseyobo yec Moisesēn dada uapampid chuihanquido yec quequimbi mimbi icsamboen naic. Pada-padaidbēda dēshote chieshquin cachocuidtsēqui dapanshun anauc ampanambo icquidi ampanaid damianacbimboec mibi bēdamboec tabadquid damianquiec. Nuquin Papan chiaid dadpen nainquio icquin mitsanauidi bednuen mibi bunaiduidi mimbi napec. <sup>26</sup> Pamumēdacbimboec tantiatiapimbo mibi iguec. Dēshote abichobi bēdamboen ampanacbimboec icsaid ucudash bēdambo icta. Adec icsainquio yec ēnēdash Nuquin Papan chiacpadec mibi bēdamboec tabadtsiac.

<sup>27</sup> Bēdamboec tabadquido mimbi damesho isun Nuquin Papan mibi cuidendac. Unēsaid chococacno bēdamboen nacnenac bēdambo isadec ēnden pisenambi. <sup>28</sup> Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

### *Padiseyobo chedo cuidte chiaid*

*(Duc 11.47-51)*

<sup>29</sup> Nuquin Papan cuidtequidombo mibi nec. Nuquin Papan oncamiaidobēda bēdamboec tabadquido nuquin tsusedpabon unēs uampido tantiaquin aido chococampicno shubu uaquin mimbi nacnempec. <sup>30</sup> Adoshombic: “Nēmbo con tsusedpabon chieshēnquin unēs uampid chococac. Aidbēd tabadquin ēmbi unēs uainquio ictsenēdac. Ēmbien bēdamboen istsenēdac,” queshun mimbi aido chococacno nacnempec. <sup>31</sup> Adoboedēmbi nuquin tsusedpabon bēdambo icquid unēs uampicpadomboen adoante bunquin mimbitsen chieshtoshon adoaindac. <sup>32</sup> Ai, nuquin tsusedpabon Nuquin Papan oncamiampid unēs uacpadombota—quequind Esus abi unēs uate chiec.

<sup>33</sup> Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nēscaquin mibi cuidendac. <sup>34</sup> Icsaido icsho isun: “Ma Nuquin Papan bēdamboen iste tantiamenu,” queshun Nuquin

Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unēs uaindac. Utsi-utsien cuesten decetanquin utsi-utsien Nuquin Papan chiaid chuibante shubunoshon cueshactan mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. <sup>35</sup> Adosho isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cunesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ēnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquo cunesunepampic. Aīdtedi unēs uampido tantiaquin aido unēs uaquido cuidacimboen Nuquin Papan mibitsen cuidquiendac. <sup>36</sup> “Yuecshun min tsyuecquido cuidendac,” quec nenquo iquebī. Nēbi caimbi —capondash Esusēn abi chieshēnquido chuiquin.

*Edusaden yacnoquido Esusēn shubi uaid  
(Duc 13.34-35)*

<sup>37</sup> Adshumbic Esusēn chuioapondash. —Tantia, Edusaden yacnoquido. Mibitsen chuinu. Mibi tantiac unēsquo iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unēs uapampic. Adembidi Nuquin Papan: “Isadaidbo chiec nid,” caido chosho utsi-utsien cuēnoten seshūnequiopampic. Adembidi mimbi nēbi naindac. Adquidombo icsho mibi tantiaquiēmbi. ¿Mitsipadec cachina aton bacuē cudaspec? “Penushe,” quiash aton bacuēmpi nua shoccoshon madadec cudasquid. Adecbidi: “Satanasēn yuanushe,” quiash cudasquieci mibi Nuquin Papa bēdamboen ismete tantiametiadquio iccobi. “Tantiamentu,” cac tantiate bunenquo mibi icchitoc. <sup>38</sup> Ēbi nidambic ēbi tantiatiapimbo icsho Nuquin Papan namiac min shububēdtabi mibi nibēdamendac. <sup>39</sup> Nēbi mimbi ēbi isenquo yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēs choquid bēdambo iquec,” min matses quendac —quequin Edusaden yacnoquido Esusēn chuipondash.

## 24

*Nuquin Papa tabadte shubu uashunaid nibēdante chiaid  
(Mad 13.1-2; Duc 21.5-6)*

<sup>1</sup> Adash Nuquin Papa tabadte shubu uashunaid daquēnē uacno tabadanec nidequi Esusbēd icquido Nuquin Papa tabadte shubu uashunaid caic: —En is, Icho. Nēid shubu bēdamboen nacnenaidquio neque —quepondash. <sup>2</sup> Adsho tantiaishun Esusēn: —Mimbi isboedquio cuēnote bēdamboen nacnenaid matses utsibon cuēnote chic-chiquendac nibēdquiecnuc —capondash.

*Nuquin Papan cuidte ushē chiaid  
(Mad 13.3-13; Duc 21.7-19)*

<sup>3</sup> Adanec nidequi macuēs dapa Odibos caidēn pudundoeoc poctsebi tabadtuidshun abēd icquidon utsibo tantiamenquo icquin Esus chuipondash. —En mibi chote chuī. Tantianu. “Nēbi choec,” quequin mibi chote ¿mitsipadem-bimbi tantiape? Adecbidi ¿atotsi isashini: “Nuquin Papan cuidte nēbi nec,” quepe? —capondash abēd icquidon. <sup>4</sup> Adoquien Esusēn naden chuipondash: —Tantia. Mibi chuinu. Muaquidoba choendac. Aidon chuisho tantiaash: “Abimboen chuichitec,” quenda. <sup>5</sup> Adquido choshon: “Nuquin Papan chomiaidquio Quidistu caid nēbi,” quequin muaquin chiaqui dadpenshun: “Ai, abimboen mimbi caic,” capendac.

<sup>6</sup> Ēbi choabi icnuc: “Matses dadpenquo cunesnan-cuesnanac caosh,” quecuedendac. Adsho tantiaash dacuēdenda. Nuquin Papan matses abifedi

cuidte ushë choabi icnuc ambi tantiacpadec matses adonanendac. <sup>7</sup> Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquiec icted-ictedendac. Nidaid utsi-utsiec yacno nidaidquobi comapenec uëdëquedenendac. <sup>8</sup> Adsho isash chido bacuë nëncuenacsho isun: “Nëbïen tishchitec,” quequin tantiacbimboen tantiaata. “Nuquin Papan abitedi cuidte nëbi nec,” quequin tantiaata —quepondash Esus.

<sup>9</sup> Adashic abi onquec: —Ëmbi chiapadquio icnuc chieshëmënquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquiendac. <sup>10</sup> Adoac ëbi tantiatsëcboedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

<sup>11</sup> Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac. <sup>12</sup> Matses dadpenquio icsamboecshë tabadsho isun ëbi tantiatsëcboedëmbi ëbi tantienquio yanendac. <sup>13</sup> Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

<sup>14</sup> Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

*Matses icsamboshë icquid chote chiaid*  
(Mad 13.14-20; Duc 21.20-24; 17.22-24)

<sup>15</sup> Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiapadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec. <sup>16</sup> Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsias.

<sup>17</sup> Adec cuenec shubu dayun icquido puduedenquio yec: “Con na bednu,” quenquio yec umanucüeshi cuenac bëdambo ictsias. <sup>18</sup> Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsias. <sup>19</sup> Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac. <sup>20</sup> Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushënquio cuemenquio icpashuni,” queoata. <sup>21</sup> Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmënquiec tabadendac. Nuquin Papan tauamboen matses uac adec tabadenquio ictenec. Nëbi adec tabadenquio iquec. Aido icsamboecshë tabadquido nibëdanambic utsibo adquidpenquio yanoaindac. <sup>22</sup> Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquio icsamboen tabadmenquio icquin ënëdmendac —quepondash Esus.

<sup>23</sup> Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin

icsamboen chuoaindac. Adsho tantiashun: “Nuquin Icho Esus choashien nec,” cainda.

<sup>24</sup> Adec muaquidoba choendac. “Nuquin Papan chomiaidquoio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiado yec adtiapimbo iquendac. <sup>25</sup> “Chieshëmënkuido iquendac,” quequin tantienquoio icquidën ëbi tantienquoio yanushe,” qeshun: “Aden ëbi tantiaquido chieshënquendac,” quequin chiombi —quepondash Esus.

<sup>26</sup> Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquoio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque.

<sup>27</sup> Èbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquoio isenquoio icpadic? Ai, isec. Adembidi ëbi choasho matses abitedishunquoio isendac. <sup>28</sup> Adec choendabi. ¿Ada edeste pisen chec budenquoio icpadic? Ai, budec. Adechidi Nuquin Papan cuidte ushë chonoc choendabi —quepondash Esus.

*Abi chote Esusën chiaid*  
(Mad 13.24-37; Duc 21.25-33)

<sup>29</sup> Adashic padpiden chiech: —Aden matses icsamboshë icquidon ëbi tantiaquido natiamenubi ushë chënquenquoio yanendac. Inchëshën ushëtsen chënquenquoio yanendac. Uispa chedo paëdbudnendac. Uispabimboecquid abitedimbo uëdëquendac. <sup>30</sup> Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquoio yec chosho isash cuidadtequido abitedimbo dacuëdec natiaic shubiquendac. <sup>31</sup> Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

<sup>32</sup> Ëmbi chuibocpadquiech yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquaiad isun: “Nëbi seta taëec,” quequin tantiaquid. <sup>33</sup> Adembidi ëmbi chuiboed isun: “Nëbimbobi Esus choec,” quequin tantiata. <sup>34</sup> ¿Muetabi nedî? Ëmbi chuibocpadquoio iquendac. Ëmbi chiacpadech yanabi matses abitedi nibëdantiapimbo iquendac. <sup>35</sup> Abimbo caimbi. Abu nibëdanendac. Nidaidt-sen nibëdanendac. Padnuen ëmbi chuiboedquoio nibëdantiapimbo iquendac. Bënuendenquoio iquendac. Ucuttiapimbo iquendac. Ëmbi chuibocpadquoio iquendac —quepondash Esus abëd icquido chiech.

*Esus chote ushë tantienquoio icte chiaid*  
(Mad 13.32-33; Duc 17.26-35)

<sup>36</sup> Adashic abi onquec Esus: —Ëbi chote tantienquoio iquembi. “Aid ushënquoio choendabi,” quetiapimbo iquebi. Adembidi mayan bëdabon tantienquoio iquec. Ëmbibi Nuquin Papan Madonquioibi tantienquoio iquembi. Nuquin Papanuidtsëquien tantiec. <sup>37</sup> Matses ëbi caic: “Nëbi choec,” quetiapimbo icnuc choendabi. Noen cano nacenubi ¿mitsipaden aton matses icsambo icquidon tantiapampic? <sup>38</sup> Nidaid abichobi mauanabi icnuc: “Nuquin Papan nuqui cuidendac,” quequin tantienquoio icquin peshun

acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. <sup>39</sup> Aton matses: “Nëbimbobini Nuquin Papan cuidchitec,” quenquio icnubi ue dapambo choec mauangquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquio icnubini choendac.

<sup>40</sup> Choquin Nuquin Papa yacno tabadmenuen beduamendambi. Ëmbi: “Bedtan,” cac tiueq nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac. <sup>41</sup> Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

<sup>42</sup> Aden ëmbi chuiboed tantiashun: “¿Nëbida con Icho chopeba?” quequin ënenquio icquin tantiata. Ëbi chote mimbi tantienquio iguec. <sup>43</sup> ¿“Nëbi ampequidën ampec,” quequinda tantiapadic? Padenquio. Tantiaquidënquien aid ushënquio aton na bédamboen isquin ampemenquio ictsiash. Aden tantienquio icquin: “Ampesho isnu,” quequin ënenquio icquin isquid. <sup>44</sup> Adembidi ëbi chote ushë mimbi tantienquio ye. ¿“Nëbida nuquin Icho chopeba?” quec Nuquin Papabéd tabadte bunec bédamboec tabadta. Matses dadpen: “Nëbien chochitec,” quenquio icnubini choendac —quepondash Esus abëd icquido chiec.

*Esus bédamboen cainte chiaid*  
(Duc 12.41-48)

<sup>45</sup> Adshumbic abi bédamboen cainte Esusën chuipondash. —Tantia. Aton icho tantiaquin yua bédambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. <sup>46</sup> Adnubien icbon choshon ambi chiacpadomboen yuan nasho isun bédamboen itsiash. <sup>47</sup> Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. <sup>48</sup> Padnuen yua icsambo icquid: “Ëndenquimbo con icho nidondash. Choenquien icchitec. Con nauidi nanu,” <sup>49</sup> quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. <sup>50</sup> Adec: “¿Nëbida con icho chopeba?” quenquio icnubien aton icho chotsiash. <sup>51</sup> Choshon ambi chiacpadomboen nainquio icsho istuidshumbic: “Icsambo iguec,” qeshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bédamboen cainte Esusën chuipondash.

## 25

*Chido 10tedshun cainaid*

*chiaid*

<sup>1</sup> Adshumbic Esusën ompoacbimboen chuiquin abi chote ushë tantienquio icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aibëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icho-icboen buanuen sanambededpac caondash. <sup>2</sup> Aid



chido 5tedi tantienquo icquido icnubi 5tedbidi bēdamboen tantiaquido icpac caondash. <sup>3</sup> Tantienquo icquidon: “Tabote bēchi naimēdsho cushtonon buanu,” quenquo icquin bēchi uesadbudtsaid taboteuidtsēqui sananquin caimpac caondash. <sup>4</sup> Padnuen bēdamboen tantiaquidon naimēdsho cushtonoequin tabotebēdta sedunten cushtoid bēchi sananquin caimpac caondash. <sup>5</sup> Aden cainaqui: “Chido bedtanu,” quianec nidboed choenquo icsho isash abitedi ushcastoash ushcuededpac caondash. <sup>6</sup> Inchēsh poctsemboen: “Choeque. Bēquednu. Nid,” cac <sup>7</sup> isucunshun chidobon tabonoequin tabote dēbedpac caondash. Adoshon bēdamboen tantiaquidon ambi bēboed bēchi cushtonobien <sup>8</sup> icsamboen tantiaquidon: “Bēchi beccho. Con na naimēdeque,” caquien bēchi bēboedēn <sup>9</sup> bēdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchēshtsiac. Piuquid menequin bēchi cushtoid baded cushtometan,” capac caondash. <sup>10</sup> Adoac bēchi bedec nidnubien chido bedtanec dada chopac caondash. Chosho bēdamboen tantiaquidon aton tabote taboshon chido bedtanec choquid bēquedampac caondash. Adtanec abēdi choash puduedshun bētashte puduedtiapimbo icnuc bēdamboen bētashpac caondash. <sup>11</sup> Adnubien bēdamboen tantienquo icquido bēchi bedtanec chopac caondash. Choshon shēcuē bētashacsho isun: “Shēcuē shēcne, buchī. Ēbitsen puduednu,” <sup>12</sup> caquien chido bedquid: “Padi. Ēmbi tantiacmaido mibi nec,” quepac caondash.

<sup>13</sup> Ēmbi chuiboed tantiashun chido icsamboen tantiaquido tanenda. Bēdamboen nabi icsho: “Ēmbi tantiacmaid mibi neque. Puduedenda,” aido cacimboen Ēbitsen Nuquin Papa yacno puduedmenquo icquin cacumechitomane. Ēbi chote ushē tantiadenquo icnuc: “¿Nēbida con Icho chopeba?” quequin Ēbi bēdamboen tantiec Ēmbi chiapadec bēdamboec tabadta —quepondash Esus abēd icquido chiec.

*Icbon piucquid daēd uaid chiaid  
(Duc 19.11-27)*

<sup>14</sup> Adshumbic abi tantiaquidon ambi chiapadomboen nate Esusēn ompoachimboen chuoapondash. Ēnapen nidnun aton piucquid dadpen dayun uaquidēn aton yuabo: “Ēbi piucquid daēd uashunta,” quequin chuipac caondash. <sup>15</sup> “Nēidēn bēdamboen tantiaquidquo icquin con piucquid Ēbi daēd uashuntsiash,” qeshun aton yua piucquid 5tedi meniac caondash. Adshumbic: “Nēidēnsen bēdamboen tantiaquin adembidi con piucquid Ēbi daēd uashuntsiash,” qeshun utsitsen 2tedi menepac caondash. Adshumbic: “Nēidēnsen bēdiatsēc tantiatēcquin adembidi Ēbi con piucquid daēd uashuntsēctsiash,” qeshun utsitsen piucquid abentsēcquiobi menet-sac caondash. Adanec nidpac caondash icbo. <sup>16</sup> Adnubien piucquid 5tedi bedboedēn aton matsesēn nacpadomboen piucquid daēd uanuen ut-sibo menequin yuecshun ambi meneboed uidctēc dēniacquin bedoapac caondash. Sincoted icboedi 5tedbidi bedoapac caondash 10ted icnuc. <sup>17</sup> Adembidi piucquid 2ted meneboedēn 2bidi daēd uapac caondash 4tedi icnuc. <sup>18</sup> Padnuen abentsēc meneboedēn chieshquin aid daēd uainquo icquin ambi uēdēshcaboed shēcuē anantsēcquin piucquid abentsēqui ompopac caondash.

<sup>19</sup> Yuecquio ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac <sup>20</sup> sincoted meniondaidēn: “Is, icbo. Mimi Ēbi meniondaidtedbidi daēd uaombi. Nēbi mitsana 10tedi iquec,” caquien <sup>21</sup> icbon: “Ai, con na daēdpactēc icboedi daēd uaqin mimi

bëdamboen nac. Nëbi ëbëdtan chuiquid dapa icta. Ëbëd cuishonquec tabadec cho,” capac caondash. <sup>22</sup> Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien <sup>23</sup> icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

<sup>24</sup> Adnubien piucquid abentsëcquiobi meniondaidën chieshquidëntsen: “Mimbi ancaidon nidsinaid peteuidi bedquid mibi nec, icbo. Mimbi chiacpadomboen nainquo icsho isash chushcanquidquo mibi nec. <sup>25</sup> Adec dacuëdampambo icquid icsho mibi dacuëdënquin mímibi meniondaid piucquid ompoquin chococaondambi. Në mimbi meniondaiduidtsëqui ictsec,” caquien <sup>26</sup> icbon: “Chieshquiec mibi icsac. Ëmbi chiacpadomboen nambo mimbi iquec. Ëbi caic: ‘Ancanquid icquin ëbi chushcanushe,’ qeshun <sup>27</sup> nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshqin mimbi icsamboen nac,” <sup>28</sup> quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. <sup>29</sup> Adembidi naindambi. Ëbi tantiaquin ëmbi chiacpadomboen naquid adembidi namequin bëdamboen tantiamendambi. Ëbi tantiesabo ëmbi chiaid niacquid bëdamboen tantiamenquo iquendambi. <sup>30</sup> Aid yua icsambo icquid cuidacimboen Nuquin Papan ëbi tantiesabo cuidquiendac. Ambi icsaido cuidquiacono nësecac natiaic shubiquiendac — quepondash Esus abëd icquido chïec.

### *Matses nashunesa cuidte chiaid*

<sup>31</sup> Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiaish bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. <sup>32</sup> Adshumbic matses abitedimbo cho-chomequin tsadmendambi. Adshumbic icbon aton nauidquo tsi-nacacimboen ëbi tantiaquido naden chiendambi. <sup>33</sup> “Ëbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Ëbi tantiesabo cuidadtequido mibi neque. Con copioc tabadec cho,” caindambi. <sup>34</sup> Adshumbic ëbi tantiaquido padpiden chuiaindambi. “Ëbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. <sup>35</sup> Mimbi ëbi nashundenec. Bundoacsho mimbi ëbi pemedenedec. Acte bundoacsho adem-bidi mimbi ëbi acmedenedec. Mimbi isacmaidquo icsho mimbi ëbi yuedtenec. <sup>36</sup> Con dashcute nibëdsho mimbi ëbi dashcute menenedec. Daicsabudt-sash unëstiadtsëcquo icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi. <sup>37</sup> Adoquien bëdamboec tabadquido: “Tantiadenquo icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. <sup>38</sup> ¿Ëmbi isacmaidquo icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. <sup>39</sup> Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquo icnuc chuipec,” ëbi caindac. <sup>40</sup> Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin

mimbi nashundenec. Aden ëbibi nashunacimboen mimbi utsibo nashundeneque. Èbëdi tabadec cho,” caindambi.

<sup>41</sup> Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. <sup>42</sup> Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenec. Acte bundoacsho mimbi ëbi acmenquio ictenec. <sup>43</sup> Mimbi isacmaid icsho mimbi ëbi cacumedenec. Dashcute nibëdsho mimbi ëbi menenquio ictenec. Daicsacsho isash mibi ëbi datsadenquio ictenec. Quënën nauedacsho mimbi ëbi istanenquio ictenec,” caindambi. <sup>44</sup> Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc mimbi chupec,” caindabi ëmbi chiacpadomboen naisabon. <sup>45</sup> Adoac naden chiendambi. “Èbi tantiaquido nashunenquio icquin ëbibi nashunenquio yacimboen ëmbi chiacpadomboen naisabo mibi neque. Nuquin Papan cuidacno nid,” caindambi. <sup>46</sup> Adoac icsamboec tabadquido ënenquio icquin cuidacnombo nidnubi bëdamboec tabadquido Nuquin Papa yacno ënëdenquio yec tabadendac —quequin Esusën chuipondash.

## 26

### *Esus bedshun unës uanuequin chiaid* (Mad 14.1-2; Duc 22.1-2; Uan 11.45-53)

<sup>1</sup> Aden abi chote ënquin chuitanquimbic abi unës uatetsen abëd icquido Esusën chuipondash. <sup>2</sup> —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” queshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

<sup>3</sup> Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash.

<sup>4</sup> Adashic: —Nëbien Esus unës uametiad utsibo ismenquio icquin bedshun.

<sup>5</sup> Nuquin matses obeca pec tabadnuc bedenquien ictiad. “Esus bëdambo icquidi cuesunec,” queshun obeca penuec cho-choquidon nuqui cuesnushe —quepac caondash.

### *Chidon Esus machiuinaid* (Mad 14.3-9; Uan 12.1-8)

<sup>6</sup> Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. <sup>7</sup> Puduedshun pec samëdshobien chidon puduedshun ambi piucquid dadpenquio menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —queshun. <sup>8</sup> Adsho isumbien Esusbëd icquidon: —¿Adenda bëdamboen nai? Ma icsambo yoc. <sup>9</sup> Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

<sup>10</sup> Adsho tantiashumbien Esusën: —¿Atotsieshun chido chushcai? Èbi bëdamboen tantiaquin ëbi ismequin bëdamboen nashunebique. Chushcainda.

<sup>11</sup> Mimbi chuiboed piucquid nibëdquido ënëdenquio yec mibëdi tabadendac.

Ëbien mibëdi tabadenquoio yanendac. <sup>12</sup> Ëbi unës uashun chococate tantiac bimboen machiuinoshibique. Chushcainda. <sup>13</sup> Ëmbi chiaid chuibeniachonshon nëid chidon ëbi machiuimboed chiendac —quepondash Esus abëd icquido chiec.

*Udasën Esus bedmenun piucquid bedaid*

*(Mad 14.10-11; Duc 22.3-6)*

<sup>14</sup> Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. <sup>15</sup> Nidshumbic chuituidpac caondash. —Utsibo ismenquoio icquin mibiuidtsëqui Esus bedmenu. ¿Tedsiti piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. <sup>16</sup> Meniac bedanec nidec: —¿Mitsishunquiemi utsibo ismenquoio icquin Esus bedmepeba? —quepanëdash Udas. Adashic Esusbëdi tabadoaic chopondash.

*Unësnuh abëd icquidobëd Esus pec tabadaid*

*(1Cod 11.23-26)*

<sup>17</sup> Adnubien Esusbëd icquidon: —Equipito yacnuësh cuenun pan bidiscamiabi yampid 7ted ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquoio icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: <sup>18</sup> —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid <sup>19</sup> —cac nidquimbi shubu icbo chuituidac caondash. Adoac: —Ai, ma chobono —quesho tantiaishumbien abia nidboedon aidën shubun puduedshun penuen nëish yua obeca codocapacandash. Adnubien Esus chedo puduedpondash.

<sup>20</sup> Inchëshëmbi abëd icquido 12tedbëd samëdquin Esusën pepondash. <sup>21</sup> Pec samëdquin Esusën chuipondash. —Tantia. Mibi chuinu. Ëbi chieshënquido ëbi bedmequid abentsëc nëmbobi iquec —quesho tantiaishun <sup>22</sup> unësquoio yanshun abentsëcshun abentsëcshunquien Esus chuipondash abëd icquidon. —¿Ëbida cai, Icho? —quequin abi chuishobien <sup>23</sup> Esusën: —Ëbëdtan pete codocaid ënë punquid ëbi bedmequid nendac. <sup>24</sup> Ëbi Nuquin Papan chiaid dada uamepampicpadquid matsesmiaid yec unësëndabi. Padnuen ëbi bedmequid comapenen cuidtequidquoio nec. Anin aid tishenquoio icpatecnëdan. Cuidac natiaquiendac —quepondash Udas caic.

<sup>25</sup> Adoaciquien Udasën abi bedmequidënquoio: —¿Ëbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

<sup>26</sup> Adshumbic Esusën pete sananquin: —Mimbi pete uaid nëid nec. Mibi bëdamo iquec, Papa —quequin Nuquin Papa chuitanquin cuëshcuëshbanshun abëd icquido menebampondash. —Nëid cuësh-cuëshquin nibëdamiac bimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi. <sup>27</sup> Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdamo iquec, Papa —quequin Nuquin Papa chuishun: —Nëid abitedishun abceded —cac dëshoten abentsen cushtoaid pictsë-pictsen acbampondambi. <sup>28</sup> Aid actequid acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësëndabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquoio iquec,” quequin nëid acquin tantiatia —capondashi.

<sup>29</sup> Adashic: —Nadquid actequid padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec. <sup>30</sup> Adashic cuëdënten abentsec cuëdënash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid*

(*Mad 14.26-31; Duc 22.31-34; Uan 13.36-38*)

<sup>31</sup> Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niquendac. Nuquin Papan naden chuipampic. “‘Icho cuesnu,’ canubi aton yuabo niquendac,” quequin Nuquin Papan dada uamepampicadec mibitedi adec niquendac. <sup>32</sup> Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

<sup>33</sup> Adoaquien Petedo: —Mibi cuesnuec cho-chosho isash utsibo dacuëdec niqenuc ëbimboen cuenenquimbo ictsiandac —qeshobien <sup>34</sup> Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien <sup>35</sup> Petedo: —Pada. Adtiapimboeni iquec. Chieshëmënuquidon: “Ësubëd icquid mibi neque. Mibi cuesnenu,” caqui: “Ëmbi isacmaid neque. Padi,” quenquo iquendabi. Mibëdquibobi unëstsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

*Quetsemani caid yacnoshon Esusën Nuquin Papa chiaid*

(*Mad 14.32-42; Duc 22.39-46*)

<sup>36</sup> Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

<sup>37</sup> Adashic Petedobëdta Sebedeyon mado daëd buanec nidpondash. Udicsëc nidequi unësquo yanec shubiantiadtsëcquo yampac caondash.

<sup>38</sup> Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiaish unësquo iquebi. Ëbi yacpadec ushenquo yec nëmbobi isec tabadta —quianec <sup>39</sup> udicsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquo icpatsia, Papa? Mimbi: “Ai, mibi unës uamenquo iquembi,” cac bëdambo ictsiabi. Mimbi: “Nëbi mibi unës uamenu,” cac mimi tantiapadepqui unësendabi —quepac caondash Esus Nuquin Papa chiec.

<sup>40</sup> Adtanec choshon isquien Petedo chedo ushpec: —Ushenquo yec isequi tabadta —caboqui. —¿Yuec-yuecpactsec ushenquo icquin istiapimboda icco? <sup>41</sup> “Satanasën icsamenush,” qeshun ushenquo icquin Nuquin Papa chuita. “Ushenquo iquebi,” queboedobi ushcas mëmunenquo yec mibi ushpec —capac caondash Esusën Petedo chedo chuiquin.

<sup>42</sup> Adtanec padpidec nidoashun Nuquin Papa chuioaic: —Ëbi unës uame tiadquo icquin ëbi unës uameta, Papa. Ëbi unës uametiapimbo icquin mimbi ëbi unës uamenquo ictsiac. Mimbi tantiapadomboen nata, Papa —quetanec <sup>43</sup> choaquin isquien Petedo chedo ushoaic ushcas mëmuntiapimbo yec.

<sup>44</sup> Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

<sup>45</sup> Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd icboedëmbi icsambo icquido ëbi bedmeque.

<sup>46</sup> Nidnu nid. Is. Ĕbi bedmenuec Ĕbi bedmequid choeque —quepondash Esus Udas chosho isash.

*Abi chieshēnquidon Esus bedaid*

(*Mad 14.43-50; Duc 22.47-53; Uan 18.2-11*)

<sup>47</sup> Adnubien Udasēn Esusbēd icboedēn bedtanac matses dadpen cuesantiadpambo yec chēshtebēdta cueste sanambededtsēcquiec cho-chopondash. Nēish yua abided unēs uaquido chuiquid dapabobēdtan con matses tsusiobon: —Bedtan —cac cho-chopondash. <sup>48</sup> Ambi bedtanaidobēd cho-choquimbien Udasēn: —“Nēid Esus nec,” quequin adoendambi —abi quiacpadembi <sup>49</sup> Esus tansudcatuidpondash: —Chobi, Icho —quequin. <sup>50</sup> Adoquien Esusēn: —Ĕmbi tantiaboedquo mibi nec. Ĕmbi adoboedēnquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

<sup>51</sup> Aden Esus bedshobien abēd icquidēn abi tsiusudaidd chēshte chictanquin chuiquid dapan yua pateshunepondash. <sup>52</sup> Adoshobien Esusēn: —Padi. Chēn. Min chēshte tsiusudoata. Cuesanquid icsho adembidi cuidnushe.

<sup>53</sup> ¿Tantienquioda ique? Ĕmbi chiac con Pan ambi abi yacnoshon uaido mayan bēdabo dadpenquioshē Ĕbi cudasmenuen chometsiash. <sup>54</sup> Nuquin Papan aden Ĕbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen Ĕbi naden bedpatsiash? —capondash pateshunianquid chuiquin.

<sup>55</sup> Adashic abi bedquido chiec: —¿Atotsi quenuc chēshtebēdta cueste sanambededtsēcquiec Ĕbi bednuec cho? ¿Nuqui chuiquid dapan chiaid niacniacquin matses cuesanquido chuiquid dapadabi nedi? Mabi mimbi is-bedquiqiobi neyoc. Badiadquidēn badiadquidēnquien Nuquin Papa tabadte shubu uashunaid daquēnē uaidēn puuedshun chuideneshobi ma mimbi Ĕbi bedenquio icboc. <sup>56</sup> Padenquio icboedombi Nuquin Papan tantiacpadēnquiobi mimbi Ĕbi bedec. Ĕbi bedte chuiquin Nuquin Papan nuquin tsusedpa dada uamiampicpadomboen mimbi Ĕbi bedec —quequin Esusēn chuinubini niquepondac: —Cuenenquio ictsiabi —queboedi.

*Caipas caid yacno Esus buanaid*

(*Mad 14.53-65; Duc 22.54-55, 63-71; Uan 18.12-14, 19-24*)

<sup>57</sup> Adnubien chuiquid dapambo Caipas cuēmēdquid yacno Moisesēn dada uampid chuibanquidobēdi tsusio utsibo cho-chopac caondash. Adnubien ambobi Esus bēpac caondash. <sup>58</sup> Adnubien Petedo uanoshon isbēec tsyuec chopac caondash. Choash chuiquid dapabo tabadacno daquēnē uaidēn puuedpac caondash. Adashic Esus mēyansho isnuec puueddash chuiquid dapan namiaido sondadobēdi tsadtuidpac caondash Petedo.

<sup>59</sup> Adnubien cho-choboedo tsusio dapabo: —Esus unēs uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dadpeshun: —Esusēn icsamboen nasho isombi —quequin chuipac caondash. <sup>60</sup> Aden Esusēn naid muaquin chuiquin Esus unēs uatiadquio icquid chiamo icpac caondash. Adnubien muaquid daēdshun chuituidpac caondash. <sup>61</sup> —Nuquin Papa tabadte shubu uashunaid caic: “Uesquin chic-chictanquin padpiden nacnoaquin daēdec ushquin nainendambi,” ma Esus quepondac —quepac caondash.

<sup>62</sup> Adshobien chuiquid dapabo chuiquidēn Esus chuiquin: —¿Atotsi quenuc ado? ¿Atotsi nēidēn chiec? —caquien <sup>63</sup> Esusēn Ĕcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquio aton

Madombobida mibi nepe? —caquien <sup>64</sup> Esusën: —Ai, mimbi chiaidquoio nebi. Tantia. Mibitedi chuinu. Nuquin Papan abitedishun Icbombo icmicashobini mimbi isendac. Adechidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

<sup>65</sup> Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec mua-posh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun <sup>66</sup> ¿Atotsi natiadquoio ique? —caquien abédtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

<sup>67</sup> Adshumbien Esus chieshënquin bêcuishtuabudnetanquin mëshëbudtanquin mëdanten bêse-bêsepac caondash. Bêse-bêsesho istanquin utsibontsen isti-apimbo icnuc Esus dashcuten bêpuctanquin mëdanten bêcues-bêcuespac caondash. <sup>68</sup> Bêcuestanquin: —“Nuquin Papan madombobien nec,” canu. En chui. Tantanu. ¿Tsundan mibi naoshe? —cabededtsêcquien mamênshumpac caondash Esus.

*Esus caic: Ěmbi isacmaid nec, quequin Petedon chiaid  
(Mad 14.66-72; Duc 22.56-62; Uan 18.15-18, 25-27)*

<sup>69</sup> Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbéd ma mibi icpaboc —caquien: <sup>70</sup> —Tantiadenquoio icnuc mimbi chiec. Ěmbi isacmaidquoio mimbi chiec —quec Petedo muaic taêpac caondash.

<sup>71</sup> Adanec daquënë uaidën puduedte shêcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbéd ma nêid icpaboc —caquien <sup>72</sup> Petedo: —Ma ěmbi isacmaidquoio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

<sup>73</sup> Adash yuec-yuecpactsêcshumbien ambo tabadquidontsen Petedo chuipac caondash. —Aidbéd icquidien mibi nec. Cadidia yacnocquid onquiacbimboec ma mibi onquepayoc —quesho tantiash <sup>74</sup> Petedo: —Comapenen Nuquin Papan cuidchitoshe muasho. Abimbo caimbi. Ma ěmbi isacmaidquoio neyoc —queoapac caondash.

Adec 3tedec Petedo muanubien cachina bënë cuêdampac caondash.

<sup>75</sup> Adsho tantiashun Petedon Esusën chuiboedquoio tantiactampac caondash. —Cachina bënë cuêdanabi icnuc mimbi ěbi caic: “Ěmbi isacmaid nec,” capendac tedesteden —quequin Esusën chuiboedquoio tantiactanec umanuc puduenanec nidec Esus muauabosh natiac shubinidpac caondash.

## 27

*Pidato caid yacno*

*Esus buanaid  
(Mad 15.1; Duc 23.1-2; Uan 18.28-32)*

<sup>1</sup> Adnubien chuiquid dapabo aton tsusio utsibobédi Esus isec ushenquoio badiadpondash. Badiadshun Esus chieshënquin: —Nuqui yuaquid ancانquid Esus unës uamec nidnu. Nid —queshun <sup>2</sup> podo cataneshun ancانquid Pidato cuêmêdquid ismenuen Esus buampac caondash.

*Esus bedmequid Udas têtaniadaid*

<sup>3</sup> Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ĕmbi bedboed piucquid shocoshēmpi 30ted me-neoatanu —quianec abi meneboed tsusiobo menenuc nidpac caondash. <sup>4</sup> Nidshun tsusiobo chuituidpac caondash. —Icsachitobi. Unēs uanuequido bēdambo icquidi bedmechitombi. Nēid mimbi meneboed mibi menuec chobi. Nē bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. <sup>5</sup> Adoaquien Nuquin Papa tabadte shubu uashunaid shēcuēn ambi bedboed shocoshēmpi piucquid ansecanec nidash uano cuenash tētaniadpac caondash Udas. <sup>6</sup> Aden piucquid shocoshēmpi ansecacsho bedashien tsusio dapabo: —Nuqui dayun uaid shocosh utsibēda dayun uatiapimbo iquec. Unēs uanuen meniaid shocoshēmpi dayun uatemauid quedeneque. <sup>7</sup> Matsu nacnenguidēn tied bedquin nēid menenuna. Nuquin matsespenquio isedquido unēsacsho ambo chōcocanun aid tied bednuna —queshun piucquid meniāc caondash. <sup>8</sup> Aidon bedacsho isun nēbi aid tied cuēnquin nadopec. —Unēs uamequidēn bedauid tied nec —capec. <sup>9</sup> Aden Udasēn shocoshēmpi 30ted menete nuquin tsusedpa Edemias caidēn dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshēmpi 30ted meneuidaid bedoashun <sup>10</sup> matsu nacnenguidēn tied bedquin meneoapon-dash,’ quequin Nuquin Papan chiaid dada uaombi,” quepampic Edemias.

*Pidato caidēn Esus chuimaid*

*(Mad 15.2-5; Duc 23.3-5; Uan 18.33-38)*

<sup>11</sup> Adnubien isadaidbo yuaquid ancanquid Pidaton Esus bēacsho chuipac caondash. —¿Min matses isadaidbo chuiquid dapamboda mibi nepe? —caquien Esusēn: —Ai, aid nebi —capac caondash. <sup>12</sup> Adnubien abi chieshēnquidon muaquin Esusēn naid Pidato chuipac caondash. Adsho tantiasun Esusēn ēcbedenquio icpac caondash.

<sup>13</sup> Adshobien Pidaton Esus padpiden chuoquin: —Mibi icsaid dadpen chuipac. ¿Tantienquioda ique? ¿Ĕcbedantiaimboda ique? —caquien <sup>14</sup> ēcbedenquio icpac caondash Esusēn. —Nēidon muauac nebi —quequin chienquio icsho tantias: —Adquid tantiambo iquēmbi —quepac caondash Pidato.

*Esus unēs ua, quequin chiaid*

*(Mad 15.6-15; Duc 23.13-25; Uan 18.38–19.16)*

<sup>15</sup> Nuquin Papan isadaidbo unēs uainquio icquin matamiampid tantiate ushēmbi seta utsin-utsinquien Pidaton quēnēn nauedauid isadaidbo abentsēc cuemedened. Pidaton: —¿Tsutsi abentsēquimbi cuemepe? —cac isadaidbon chiapadquid abentsēc cuemedened. <sup>16</sup> Esus bēabi icnuc uimanēmēnquidquio Badabas cuēmēdquid nauedpac caondash.

<sup>17</sup> Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsēquimbi cuemepe? ¿Badabastambi cuemepe? ¿Nēbi mimbi bēboed Esus Quidistu caidambi cuemepe? —capondash. <sup>18</sup> —Esus chieshēnquidon: “Nuqui padenquio yanuc nuqui dēniaquec Esus chuiquid dapa yanushe,” quesun Esus bēaccosh. Nēmo tabadquidon: “Esusquio cuēme,” capashunī —quequin tantiaquin aden chuipanēdash Pidaton.

<sup>19</sup> Adashic matses icsaido cuidte chuinec tsadte dapan abucquio tsadto-pondash Pidato. Adshobien yuan chuituidpondash. —Min chidon: “Chui-tan,” cac chobi. Esus caic: “ ‘Aid dada bēdambo icquid neque. Unēs uamenda. Dacuēdampambo icsho ushquin isombique. Unēs uamenda, quiosh’ quequin



chuitan,” min chidon cac chobi mibi chiec —quequin aton yuan chuituidpac caondash.

<sup>20</sup> Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

<sup>21</sup> Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. <sup>22</sup> Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

<sup>23</sup> Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiecuëdec: —Cuesten dectanquin unës ua —quecuededpondash.

<sup>24</sup> Adsho —Padi icnuna —caqui niacbidanquiecuëdecuëdec unës uate bunquiecuëdec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Èmbien adotiapimbo iquecuëdec. Mëpamëdec bëchish ucudacimboec mimbi icsamiaid ucudebi —quiash mëpamëdquin ismepondash Pidaton. <sup>25</sup> Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

<sup>26</sup> Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

### *Esus mamëshunaid*

(*Mad 15.16-20; Uan 19.2-3*)

<sup>27</sup> Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbedepac caondash unës uanumbi. <sup>28</sup> Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin <sup>29</sup> mauete pinchuc-pinchucpambo icnuc nacenaid mauemepac caondash. Adshumbic aton matses chuiquid dapan sananacimboen sananuc abiucshun cueste sanamepac caondash. Adshumbic aton matses chuiquid dapa ismiacimboen mamëshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash. <sup>30</sup> Adshumbic dacuishtucatanquin ambi cueste sanameboed bedshuntanquin aidëmbi matombudnepac caondash. <sup>31</sup> Aden mamëshuntanquin ambi dasiuintanquin chictanquin aton dashcutebidi dasiuintanquin caondash. Adoshon: —Ma unësneuequin cuesten dectanec nidnu. Nid —quequin Esus buampac caondash.

### *Esus cuesten dectanaid*

(*Mad 15.21-32; Duc 23.26-43; Uan 19.17-27*)

<sup>32</sup> Buanquin Esus abi dectante cueste yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadto mebidampondash. <sup>33</sup> Adobidanec nidec macuësh dapa yacno matses mapi canitebimboec isadquid Codocota caid yacno chopondash.

<sup>34</sup> Choshombien sondadon uba chinaid actequid paëmbo dauë nëcushaid Esus meneuidpondash. —Në. Ac —cac pictsëc tantanec: —Padi —quepondash acuenquio yec. <sup>35</sup> Adshobien cueste napotiain bëboedëdec dectampondash. Dectanshumbic ambi chicshumboed Esusën dashcute bedneuequin sondadobon abi cuëmëdquidtedi dada uabanshun tëchun sandoshon

cadotanequin dada uatempi puduemiaid isbanquin Esusën dashcute bed-bampondash. <sup>36</sup> Adash: —Esus unëso isnu —quec sondado tabadcueded-pondash.

<sup>37</sup> Adshumbic: —“Nadquid icsho cuidquin unës uac,” quequin ma isquidnon tantianu —queshun cueste cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. <sup>38</sup> Ampequid daëd cuesten ëquë dectambudcuenquin dectantanquin nënantanquio Esus dectampondash.

<sup>39</sup> Adshobien podqued cuëmanquio Esus diadsho isbidanequin chieshënnquin chuipondash. <sup>40</sup> —“Nuquin Papa tabadte shubu uashunaid chic-chictanquin daëdec ushqin nacnenquin nainendambi,” quiondaid yec bud. Nuquin Papan madombo yec unësenquio yec uëshquioobi bud —cabidanepondash. <sup>41</sup> Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshunec nadpondash. <sup>42</sup> —Utsibo ismenuembien comapenen tantiaquin matses bédamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma büdnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. <sup>43</sup> “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu —quepondash tsusiobo. <sup>44</sup> Adnubien abëdta cuesten dectamboedon ampequidontsen Esus mamëshumpondash.

### *Esus unësaid*

*(Mad 15.33-41; Duc 23.44-49; Uan 19.28-30)*

<sup>45</sup> Adnubien ushë cuembo icnuc inchëshbocpadquiec inchëshpondash. Ushë cuembo icnuc inchëshstanec ushë budambi ushëmbö yanoapondash.

<sup>46</sup> Ushëmbö yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bédamboen isenquio yanö, Papa Edoen? —quec adondash.

<sup>47</sup> Adec cuëdsho tantiasch isquido nadpondash. —Edias yampid cuëchitequien nec —quiampondash. <sup>48</sup> Adnubien Esus isec tabadquid abentsëc titinguanec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cueste dëdectanshun abuc sananec: —Chishmenu —queuidpondash. <sup>49</sup> Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

<sup>50</sup> Adnubien padpidec buëdanquiec cuëdtanec Esus unëspondash. <sup>51</sup> Esus unësnubi Nuquin Papa tabadte shubu uashunaid yacnuësh: —“Quënë uquëduquidën Nuquin Papa tabadtembo nec,” caidën utsi puduednushë —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bédamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. <sup>52</sup> Adec unësaid nauedaidd shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. <sup>53</sup> Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

<sup>54</sup> Nidaidd uëdëquenec dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

<sup>55</sup> Adnubien chidobo Cadidia yacnuësh Esusböd choquin abi codocashumboedo Esus unëso isnuec ancuenshun isec tabadpac caondash. <sup>56</sup> Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

### *Esus chococaid*

*(Mad 15.42-47; Duc 23.50-56; Uan 19.38-42)*

<sup>57</sup> Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. <sup>58</sup> Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. <sup>59</sup> Aden bedtanshun Osen Esus dashcute bëchish nibëdquidënquio nuamboshë icnuc datanedonepac caondash. <sup>60</sup> Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Èbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. <sup>61</sup> Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

### *Esus nauedaid isec sondado tabadaid*

<sup>62</sup> Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. <sup>63</sup> —Esus nadpadenec. “Unësash daëdec ushash uincuenendabi,” quec muapadeneque. <sup>64</sup> Daëdec ushquin min sondado Esus nauedaid cudasmeta. Esusböd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita —capac caondash Esus chieshënquidon. <sup>65</sup> Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëdta,” cata —capac caondash. <sup>66</sup> Adoaquien isadaidbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo iquebi,” ma quenu —queshun bucun bëbitaccapac caondash. Adoshon: —Beduanushe. Isquieq tabadta —capac caondash sondado chedo chuiquin.

## 28

### *Esus uincuenaid*

*(Mad 16.1-8; Duc 24.1-12; Uan 20.1-10)*

<sup>1</sup> Esus unësbon abentsec ushash abi chonoadtemaidëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. <sup>2</sup> Choash isec tabadnubi nidaid uedëquiampac caondash. Adnubien Nuquin Papan abi yacnoshon uaid mayan bëda abucësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. <sup>3</sup> Mayan bëda yec abu bed-bedquiacbimboec ushëmboshë bëchamauanquieq icpac caondash. Aton dashcute adquiobidi

bëchish nibëdquiec ushumboshë icpac caondash. <sup>4</sup> Adec dacuëdampambo icsho isashien unësaid cudasquido sondado dacuëdtanec uëdëquec tantiadem-pambo yec padishbudnepac caondash abitedi.

<sup>5</sup> Adnubien mayan bëdan Madia chedo chuipac caondash. —Dacuëdenda. Cuesten decanquin unës uaboed Esus isnuec mibi tabadec. <sup>6</sup> Nibëdec. Nidosh. Ambi chuibocpadegui uincuenash nidosh. Abi uebocono en isec cho —cac chidobon anisnubien padpidec onquequin chuiopac caondash. <sup>7</sup> —Mimbi isboed Esusbëd icboedo chiec nid. Badedquo nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien <sup>8</sup> auëshquiobi chidobo dacuëdboedi cuishonquec titinquier nec nidanepac caondash.

<sup>9</sup> Titinquier nec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. <sup>10</sup> Adoaquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

### *Esus uincuencho isun sondadon muauaid*

<sup>11</sup> Madia nidnubien Esus nauedaid isquido sondado abi chomeboedo isadaidbo chuiguoid chiec chopac caondash. Mayan bëda chonoc Esus uincuenboedo chuituidpac caondash.

<sup>12</sup> Adoaquien isadaidbo chuiguoid aton chuiguoid utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash. <sup>13</sup> —Mimbi isboedquo chienquo icquin naden chuita. “Ëbi chedo ushtoan abëd icboedon Esus ampequin beduanacosh,” quequin utsibo chuita. <sup>14</sup> Mibi caic: “Sondado ushtoac caosh,” quequin chiac mibi chuiguoid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun <sup>15</sup> piucquid meniac bedanec nidec isadaidbo chuiguoid chiacpadec muapac caondash sondado. Adembidi nëbi isadaidbo dadpeshun: “Esus ampiac,” quequin chuioaic.

### *Ëbi chuibeneta, quequin Esusën chiaid*

*(Mad 16.14-18; Duc 24.36-49; Uan 20.19-23)*

<sup>16</sup> Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac. <sup>17</sup> Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —queshun danëshën sebudpondambi. Utsibombien: —¿Con Icbombobida nepeba? —capondash.

<sup>18</sup> Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu. <sup>19</sup> Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta. <sup>20</sup> Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosh isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

## MADCOSËN DADA UAID

*Bëyuc choshon Uanën Esus chote chiaid*

*(Mat 3.1-12; Duc 3.1-18; Uan 1.19-28)*

<sup>1</sup> Madcos nebi. Nuquin Papan tantampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

<sup>2</sup> Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chome-ndambi. Aidën chuibanac ambi tantiaid icsa ënshun mibi cainquidombo iquendac, mado.

<sup>3</sup> Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

<sup>4</sup> Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibanpondash. Mibi icsaid ënshun Nuquin Papan chiaid tantiaquin nabanta. Aden tanti-  
 aquidquio icsho mibi cuidenquio yec mibi icsaid Nuquin Papa bëpiscudendac  
 quequin chuibanpondash. Aden chuibanquimbi ämbi chiacpadomboen  
 naquid acten mentobampondash Uanën. <sup>5</sup> Aden Uanën chuibanubien  
 matses dadpen tantianu quec choded-chodedpondash. Nidaid Udeya caid  
 yacnoësh chopondash. Edusaden caid yacnoëshbidi cho-choapondash. Cho-  
 choash tabadquin tantiashien, Icsapobi, quec abi icsaid chiec utsi-utside  
 onquequedpondash. Aden abi icsaid chuibanquidtedictsëqui Uanën acte  
 Odan caidën mentobampondash. <sup>6</sup> Ambo iquec Uan nidaidën capuquid  
 cameyo bu daëdcaid dasuquidquid niondash. Nidaidën capuquid yua bitsi  
 nacnenaicd tsuquidquid niondash. Shioshbimboecquid shuishun pequid nion-  
 dash. Bacun chequid niondash. <sup>7</sup> Aidëmbi naden chuibanpondash: —  
 Con tsyuequid choendac. Aidi nadatiambocquin naquidquio nendac. Aidi  
 bëdamboshëcquid icnuc ëbi icsaquid icsho ¿atotsieshun aid choec quequin  
 chuiquidquio Nuquin Papan icmiosi? quec tsadebi. <sup>8</sup> Mibi acten mento-  
 quid nebi; aidien abipadquiocquid aton Mayan menianquidquio nendac —  
 quepondash Uan.

*Esus acten mentoaid*

*(Mat 3.13-17; Duc 3.21-22)*

<sup>9</sup> Adnubien ambi chian-chianaidquio Esus chopondash. Nidaid Cadidia  
 caid shubu dadpen icquid Nasaded caid yacnoësh chopondash. Adshobien  
 Uanën Esus acten mentopondash. <sup>10</sup> Aden acten mentoac Esus pudundonobi  
 abu bëcadoacnoëshquio dëbimbimboec isadquid abipadquiocquid aton Mayan  
 bede-bedequemboec Esusbëd icnuec budpondash. <sup>11</sup> Aden budmetanec  
 ambi bëcadoacnoëshi: —Mibentsëcquioibi icsho ëmbi tantiaidquio mibi nec,  
 mado. Embi bëdamboen isaidquio mibi nec —quepondash aton Papa Esus  
 chiec.

*Esus Nuquin Papan chiaid niacmenuequin Satanasën tanaid*

*(Mat 4.1-11; Duc 4.1-13)*

<sup>12</sup> Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. <sup>13</sup> Ambo tsadquimbi ushë abentsëc nidmec utsi choaid abutometsëcquieci tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

*Cadidia yacnoshon tauamboen chuibanaid*

*(Mat 4.12-17; Duc 4.14-15)*

<sup>14</sup> Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmëpondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. <sup>15</sup> —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

*Ëbëd iquec cho Esusën abia caido*

*(Mat 4.18-22; Duc 5.8-11)*

<sup>16</sup> Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. <sup>17</sup> Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. <sup>18</sup> Adsho tantiash nëshaid abëd icquid menianec abi chuiquidbëd nidanepondash.

<sup>19</sup> Adanec uidictëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin.

<sup>20</sup> Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

*Mayan icsa Esusën dapuduemaiid*

*(Duc 4.33-37)*

<sup>21</sup> Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaiid ushë icnuc ënapen capuenquo yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. <sup>22</sup> Aden chuisho tantiashun: —Ambia tantiaquien chiacpadomboen Esusën chuibanec. Utsimbien adomboen chienquo iccosh —quec onquec tabadcuededpondash. <sup>23</sup> Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: <sup>24</sup> —Esus Nasaded yacnoësh choquid mibëd icquidpenquo nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. <sup>25</sup> Adoquien: —Otaquio tabad —quetanquin: —Dapuduen —capondash Esusën. <sup>26</sup> Adoac comapenec abi dapuduedaid uëdëquenuc sidquianec dapuduempondash.

<sup>27</sup> Adsho isash: —¿Abimbodambi ispo? ¿Mitsipadquidquo nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chieci. <sup>28</sup> Adec onquecuededash auëshquo nidaneshun

ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bēdamiaid  
(Mat 8.14-15; Duc 4.38-39)*

<sup>29</sup> Ambi chuisho tantiaboedo nidanenubien Petedo Simon caidën shubu yacno Esus Acobo Uan aitedi nidpondash. Aidën shubun icquidbidi aton utsi Andeces icpondash. <sup>30</sup> Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. <sup>31</sup> Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bēdampondash. Adec bēdanash nidoashon codocashun abi choquidtedi pemebampondash Simonën nachin.

*Esusën dadpen bēdamiaid  
(Mat 8.16-17; Duc 4.40-41)*

<sup>32</sup> Adnubien inchëshbudtsëqui Capednaun caid yacnocquidën daicsaidtedi bē-bēpondash. Adembidi mayan icsa dapuduedaidtedi bē-bēpondash. <sup>33</sup> Bē-bēash Simonën shubu shëcuë cuëmano puduedabi tabadcuededpondash. <sup>34</sup> Adsho isun daicsaidtedi Esusën bēdamebampondash. Adembidi mayan icsa dapuduedaid dapuduebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

*Shubu nibēdacno Nuquin Papabē onque Esus onquiaid  
(Duc 4.43-44)*

<sup>35</sup> Adashic badiadte anoentsëqui yanubi isucunanec puduanec shubu nibēdacno Esus nidpondash. Nidëc tabadtuidshun Nuquin Papabē onquequin chuibampondash. <sup>36</sup> Esus nidacshobi isucunshun Petedo Simombëd icquidën nibënampondash. <sup>37</sup> Aden nibënquin istuidashi: —Mibi isec chochoquidtedishun mibi nibëmbededec —quepondash Esus caic.

<sup>38</sup> Adoaquien Esus: —Capucuenëquin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. <sup>39</sup> Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapuduemeoapondash.

*Nami mishac tantiadenquiocquid bēdamiaid  
(Mat 8.2-4; Duc 5.12-13)*

<sup>40</sup> Aden Esusën chuibanubien daushacbinboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bēdame —quequin Esus chiec comapenec cuëdpondash.

<sup>41</sup> Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bēdamëbique. Bēdambo icta <sup>42</sup> —quenubi daicsaid nibëdquio yec bēdampondash.

<sup>43</sup> Aden bēdametanquin nidmepondash: —Nidëc nid. <sup>44</sup> Nidquimbi, Esusën bēdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidëc puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dëbimbiëcquid daëd meneta Moisesën

chiacpadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquin cuesuniaidën intac puntanequin intac mibi daseccashun dëbimbicquid utsi cuemeshun naden aidën mibi chuipec. Nuquin Papan mibi bëdamboen istiapimbochoedi nëbi bëdamboen mibi isendac. Aden chuiquin mibi bëdamiaid Nuquin Papan naid nec quequin tantiatsiash —quepondash Esus ambi bëdameboed chieç. <sup>45</sup> Adsho tantiaboshombi niacbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibë nec nidaid utsi-utsieç yacnoësh dadpen cho-chopondash.

## 2

### *Cuembo yec uishquiaid Esusën bëdamiaid (Mat 9.2-8; Duc 5.18-26)*

<sup>1</sup> Adashic Capednaun yacno nidoash shubun puduedpondash Esus. Adnubien, Esus chosh quesho tantiash padpidec dadpen cho-choapondash. <sup>2</sup> Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. <sup>3</sup> Adnubien cuembo yec uishquiaid bëc dada daëd-daëdquieç 4ted cho-chopondash. <sup>4</sup> Cho-choshon matses tsucus-tsucustsëcquio yec tabadsho isun dectatoshon macano nacenaid chic-chictanquin Esusën dayunquo uishquiaid imbudpondash. <sup>5</sup> Aton dayunquo imbudsho isun Esusën bëdamec quequin abi imbudboedën tantieç quequin ambibi tantiapondash Esusën. Adashic: —Mado, mibi cuidenquo yec mibi icsaid bëpiscudobi —quepondash Esus.

<sup>6</sup> Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. <sup>7</sup> ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bëpiscudquid nec, quetsëcquieç tabadpondash.

<sup>8</sup> Aidon tantiaid tantieç nadpondash Esus: —¿Atotsieshun aden mimbi icsamboen tantiape? <sup>9</sup> ¿Mibi cuidenquo yec mibi icsaid bëpiscudobi quequin ëmbi chiaidquo bëdantequidpenda nedic? Adecbidi, ¿Mibi icsambochoedi mibi bëdanoque. Nidtoшон mibi imbudboed chiadtoshon buanec nid quequin ëmbi chiaid bëdantequidpembidida neoadic? <sup>10</sup> Ai, adquidquibidi nec. Mibi cuidenquo yec mibi icsaid bëpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ëbi tantiamenuequin <sup>11</sup> cuembo yec uishquiaid naden chiembique Tantia. Mibi icsambochoedi mibi bëdamiombique. Nidtoшон mibi imbudboed chiadtoshon buanec nid —capondash Esusën. <sup>12</sup> Adoaquien nidtoшон abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsëcquieç onquiash Nuquin Papan naid nec quec cuëdëncuededpondash.

### *Ëbëd iquec cho Esusën Debi caid (Mat 9.9-13; Duc 5.27-32)*

<sup>13</sup> Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanapondash Esusën. <sup>14</sup> Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na utsibon buan-buansho



isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ēbēd iquec cho —Esusēn cac: —Ai, mibēd nidnu. Nid —quianec badedi Esus tsibananec Debi nidpondash.

<sup>15</sup> Adshumbic Debin shubuno nidshun Esusbēd icquidon pepondash. Ashunquiobidi aton na buansho isun piucquid bedshunquid Debipadquidēn utsin-utsinquier pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquier pepondash. Debin shubuno Esus tsibanec choquid dadpen icpondash.

<sup>16</sup> Aden adquidbēdan Esusēn pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantaranu. Ēbi chui —quepondash padiseyobo Esusbēd icquido chiec.

<sup>17</sup> Adsho tantiashien Esus: —¿Dada bēdamboquidta dauēchoquidēn bēdametequid nedic? Padenquo. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ēnta. Aden ēnash ēbēd icquid mibi iquendac quequin chiesha nebi. Icsaquid nebi qeshun mibi icsaid ēnta. Aden ēnash, ēbēd icquid mibi iquendac quequin chuiquid nebi —quepondash Esus.

*¿Atotsi quiash mibēd icquid buna mēmunesa nec? quiaid  
(Mat 9.14-17; Duc 5.33-39)*

<sup>18</sup> Adnubien abi chuiquid quēnēn nauedan aid tantiec unēsquiocquin Uan acten mentoanquidbēd icquidēn buna mēmunubi padiseyobobēd icquidon unēsaid tantiec unēsquiocquin buna mēmunoapondash. Aden buna mēmunsho isanec nidequi Esus yacno nidash Esusbēd icquidon buna mēmunenquo icsho isash utsibo: —¿Atotsieshun Uambēd icquidon adembidi padiseyobobēd icquidon buna mēmunubi mibēd icquidon buna mēmunenquo icpec? Tantaranu. Chui —quepondash.

<sup>19-20</sup> Adoaquien Esus: —Aton chido bednun pambid meniac chidon codocacsho abi inquidēn abēd icquido menec. Aden meniac isuidesa abēd icquido nec. Adecbidi ēbi abi chuiquid icnuc ēbēd icquidon buna mēmunenquiocquin isuidenquo iquec. Yuecash chido inquid nibēdanan abēd icboedo unēsquiocquin buna mēmunquin isuidpec. Adecbidi ēbi nibēdanan ēbēd icboedo unēsquo yampec.

<sup>21</sup> “Adembidi dashcute shēnibēdta chucambocquid bētuscaisa matses nec. Shēnibēdta chucambocquid bētuscatsaid amēec canchedoaic. Adecbidi abi icsaid ēnesa tantiaid bēda pausudtiapimbo yec icsabudec. <sup>22</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shēnin icsa sandoshon nequid bēenquiocquin. Adecbidi Nuquin Papan tantiacpadec pausudnu qeshun mibi icsaid ēnacsho isun Nuquin Papan pausunendac —quepondash Esus.

*Chonoadtemaid ushē icbo nebi quiaid  
(Mat 12.1-8; Duc 6.1-5)*

<sup>23</sup> Adnubien chonoadtemaid ushē utsi icnuc ēnapen capuenquiocquin tied matanquin adosbiecquid trico caid ēshē bedshun Esusbēd icquidon pepondash. <sup>24</sup> Adshobien: —Mibēd icquido is. Chonoadtemaid ushēn chonoadeque. Abi chuiquid mibi iquec ¿atotsi quiash, Padi. Chēn, quenquo ique? —quepondash padiseyobo Esus caic.

<sup>25</sup> Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda?

<sup>26</sup> Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniã sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa mases chiec onquianequid, Abiatad abentsëqui icnubi aïd quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

<sup>27</sup> Aden chuishumbic naden padiseyobo Esusën chuiopondash: —Nabanash tiboedte mases bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi mases tiboedte ushë aton icbo ictiapimbo iquec. <sup>28</sup> Aid ushë icbo icquin ëbëd icquidon bunquin pebedesho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënquido padiseyobo chiec.

### 3

#### *Mëuesadaid Esusën bëdamiãd* (*Mat 12.9-14; Duc 6.6-11*)

<sup>1</sup> Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi <sup>2</sup> Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënën nauedmenu quetsëcquieç padiseyobo tabadcuededpondash. <sup>3</sup> Aden tantieç padiseyobo tabadnubien mëuesadaid chuiquin Esusën: —Nënantanquo nidto —capondash.

<sup>4</sup> Adoac nënantanquo nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën mases tantiaquindambi nape? ¿Adoenquiocquin mases icsa uapendambi ique? ¿Nëid ushëndambi mases bëdamepe? ¿Bëdamenquiocquindambi cuesunepe? —quepondash. Aden chiec Esus onquenubien onquenquo yec tabadpondash padiseyobo.

<sup>5</sup> Adoaquien nëishtanquimbi abi chieshënquido bëisbanec Esus, Nuquin Papan chiaid tantibanquin naisa yec pausudtiapimbo icquido nec, abibi quiashic, Unësquo iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bëdampondash. <sup>6</sup> Adosho isash puduenanec nidquin edodesho padiseyobon badedquido istuidpondash. Aido istuidash: —Esus cuesunete mibi bunacpadquieç bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

#### *Esus yacno mases dadpen choaid*

<sup>7</sup> Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen chochoapondash. <sup>8</sup> Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiash cho-chopondash. <sup>9</sup> Adec cho-choash

tsucus-tsucustsëcquio yec tabadquin tsicatiac nēnantanquio tsadacnoëshi catashnushe quiash Esus: —Cano bec cho —quiampondash abëd icquidquiao caic. <sup>10</sup> Dadpen bēdamiosh cadoshe. Èbitsen bēdanu quequin ambibi tantiaquin Esus mishbededpondash. <sup>11</sup> Adembidi tantiaquin mishnuec mayan icsa dapuduedaid choquin Esus istuiequi uebudec comapenec sidquianec: —Nuquin Papan madombobi mibi nec —quec comapenec cuëdpondash. <sup>12</sup> Adoaquien: —Padi. Aden ëbi chienda —quepondash Esus.

*Abëd 12ted icquid Esusën tantiamenu caid*  
(Mat 10.1-4; Duc 6.12-16)

<sup>13</sup> Adashic macuësh dapa yacno nidnushi abëd 12ted icquido chomeshun nadopondash: <sup>14</sup> Èmbi tantiacpadomboen mibitedi tantiamembi. Adquid icquin èbëd tabadquin èmbi chiacpadomboen mimbi tantiabenedac. Aden tantiabencasho isun èmbi chiacpadomboen chuimenuen mibit-sen nidmembi. <sup>15</sup> Adembidi mayan icsa dapuduedaid dapuduequidbidi mibi icmembi quequin abëd icquido Esusën chuipondash. <sup>16</sup> Ambi tantiamenu caid nēdtedi icpondash: Simon cashumbic Esusën Petedo capondash, <sup>17</sup> utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. <sup>18</sup> Utsibic Andedes, utsibic Uedipe, utsibic Badtodome, utsibic Mateyo cuëshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. <sup>19</sup> Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidedi Esusën tantiamequin chuiquin ismiaido niondash.

*Bedtsibu caidën dausunaid Esus nec quiaid*  
(Mat 12.22-32; Duc 11.14-23; 12.10)

<sup>20</sup> Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquo icpondash. <sup>21</sup> Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

<sup>22</sup> Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduec —quepondash.

<sup>23</sup> Adoaquien Esus: —Mimbi icsamboen tantieque. Mibi chuibanu. Tantiec tabadta. ¿Mayan icsan icbo ambi dapuduedmiaid dapuduequidta nepadic? Padenquo. <sup>24</sup> Adquiecbidi shubu icbo abëd icquido cuëshëdmesa nec. <sup>25</sup> Ichon abëd icquido cuëshëdmiash shubu abentsëquën tabadtiaimbo iquendac. <sup>26</sup> Adembidi ambi dapuduedmiaid dapuduemias adquidën icbo ictiapimbo Satanas iquec. Icbo icnuequid abëd icquid puduemesa nec. <sup>27</sup> Dadpenshun icbo Satanas nec. Adquid icquin ambi matses dapuduedmiaid dēnicanquidēnuidquiao nadatiambocquin nabanquin cuemepec. Adquid icquin èmbi nac mayan icsa dapuduedaid Satanasën yua icboedi icombo tantiec bēdamo yanec èbëd iquendac. <sup>28</sup> Abimbo chiembique. Tantiata. Matses cuidenquocquin abi icsaid bēpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho

tantiaşhun Nuquin Papan aid pauquendac. <sup>29</sup> Utsien Nuquin Papan Mayan abipadquidën tantiamiac nasho isun Satanasën naid nec quesho pauquengüo iquendac. Adquid ënëdenquio yec icsaquid nendac —quepondash Esus <sup>30</sup> Satanasën tantiamiac mayan icsa dapudemequid Esus nec abi caquido chiec.

*Esus yacno aton utsibo anibëd choaid*  
(*Mat 12.46-50; Duc 8.19-21*)

<sup>31</sup> Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec. <sup>32</sup> Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. <sup>33</sup> Adoquien Esus: —Adquid utsi chuinu. Tantiata. <sup>34</sup> Në tabadquido ëbëd icquido neque. Is —quepondash Esus abëd iccuededquido chiec. <sup>35</sup> Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

## 4

*Tantiamequin pete ëshë nësecain chiaid*  
(*Mat 13.1-9, 18-23; Duc 8.4-15*)

<sup>1</sup> Adashic padpidec chian cuëmano nidshun Esusën tantiamequin chuibanoapondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. <sup>2</sup> Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: <sup>3</sup> —Tied icbo pete ëshë nësecanuec aton tied yacno nidquid. <sup>4</sup> Adec nësecanuec nidshun pete ëshë nësecac maisec pudun-pudunaid uicchunën chequid. <sup>5</sup> Adnubien nidaid cuënote dadpen samëdacno utsi-utsiec paëdash badedquio dëyucuidtsash <sup>6</sup> tapunenquio iquec ushën shoedec. <sup>7</sup> Adnubien pete ëshë utsi-utsiec nisanquid dëyucacno paëdash dëyucash caniduidtsacsho nisanquidën bëtinac podò sinash bacuëtiapimbo iquec. <sup>8</sup> Adnubien nidaid bëdambo yacno paëdaid dëyucaid caniaş dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

<sup>9</sup> Aden chiash: —Ëmbi chuiboed tantianu quiaş bëdamboen tantiec papuuedta —quepondash Esus.

<sup>10</sup> Aden chuibanash uidtsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibamboed tantianu. Ëbi chui —capondash Esus chuiquin.

<sup>11</sup> Adoquien: —Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc. <sup>12</sup> Aden chiac: “Nuquin Papan nabamboed isto-istoboedi ma padenquio tabadteneyoc. Adembidi tantiado-tantiadoneboedi ma padenquio tabadteneyoc. Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac” —quepondash Esus abëd icquido caic.

<sup>13</sup> Aden chiashic: —¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiape? Ëmbi chuiboed nad iqueque. Tantiata. Chuinu. <sup>14</sup> Pete ëshë sequid-bimboecquid Nuquin Papan chiaid chuibanquidquio nec. Ëshë ambi siaid-bimboecquid Nuquin Papan chiaid nec. Abí paëdacno nidaidbimboecquid

matsesën tantiate nec. <sup>15</sup> Nidaidën paëdash pete ëshë dëyuctiapimboesho uicchunën chiaidbimboec matses utsi-utsiec iquec. Adquid Nuquin Papan chiaid tantiaish papuduednu quesho Satanasën bēpiscudmiac tantienquo yanec Nuquin Papa yacno puduedtiapimbo iquec. <sup>16-17</sup> Nidaid cuēnote dadpen samēdacno pete ëshë paëdash badedquo dëyucuidtsash tapunenquo yec ushën shoedaibimboec matses utsi-utsiec iquec. Adquid Nuquin Papan chiaid tantiauidash bēdambo iquec queboedi ¿Esus tantiaquid nebi quecta icco? quequin utsibon mamēnshunac badedquo tantiesa nebi quen-dac. <sup>18-19</sup> Nisanquid dëyucacno pete ëshë paëdash dëyucash canidoudtsacsho nisanquidën bētinac podo sinash bacuēsabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nēnaid, abi ic-said aidtedī tantiaquin Nuquin Papan chiaid tantiesa yanshun bēdamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. <sup>20</sup> Ëshë utsibic nidaid bēdamboquidën paëdash dëyucash caniaish dadpen bacuē icquidbimboec matses utsi-utsiec iquendac. Adquid Nuquin Papan chiaid tantiadonec bēdamboec tabadquin utsi ismequid nec. Aden ismiac Nuquin Papan chiaid tantiaquid daēdpactsēc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac —quepondash Esus abēd icquido tantiamenuec.

*Tabote nēnantan nanac chēnquiacimboec ictiad quiaid*  
(Duc 8.16-18)

<sup>21</sup> Aden chuishumbic abēd icquido naden Esusën chuipondash: —¿Tabote ichon ambi dayun uaboed taboshon tsadte tēdion nanshun isaidta nedic? Adembidi ¿Tabote matsun bētashun isaidta neoadic? Padenquo. Nēnantan yacno nanac chēnquiacimboec ismenu quec ictiad. <sup>22</sup> Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adembidi con mado chuiban quenquiochoedēmbi nēbi ēbi ismec ma con mado chuibanu quequid con Pa nec. <sup>23</sup> Ambi chiaid tantianu queshun tantiaquiec papuduedta —quepondash Esus.

<sup>24</sup> Aden chias Esus: —Chiaid bēda tantiatequidquo iquec queshun tantiaquiec papuduedquid icta. Aden chiaiduidī tantiec papuduedquid abipadquid bēdamboquid ambia tantiaquidën Nuquin Papan mibi icmendac. <sup>25</sup> Adquid ambi tantiadoniaidquo iquendac. Aden tantienquioctšēcquidën tantiaid bēda uesadendac nibēdquiec —quepondash.

*Ambi siaboed ichon isenquiocnoc bacuēc quiaid*

<sup>26</sup> Adec onquequin abēd icquidquo chuishumbic cho-choquidtsen naden Esusën chuipondash: —Nuquin Papan shubu abentsēquēn tabadec caidaidquo chuibanu. Tantiata. Nidaid bēdan tiedën caniquid pete ëshë siash <sup>27</sup> tabadquin cainquidquo icbo nec. Dadpen ushquin ambi seboed isenquo yec icbo tabadnubi <sup>28</sup> ambi seboed dëyucash caniec taitanec bacuēc. <sup>29</sup> Ambi siad isenquiocnoc canitanec bacuēcsho badedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuduedquioshon tantiabenece. Adquid isash con shubun puduedquido neque. Bednu quependac Nuquin Papa —quepondash Esus.

*Mostasa caid ëshë chiaid*  
(Mat 13.31-35; Duc 13.18-19)

<sup>30-32</sup> Adec onquequin chuibanashic Esus: —Nadquo Nuquin Papan shubun icquido iqueque. Chuinu. Tantia. Mostasa caid pistšēc ëshēmpi

ictsëcquid nēsecaid dēyucash nuamboshē caniec cuidi-cuidipambo iquec shubu-shubupambo yec podoc. Ambo uicchunēn shubu uaic. Adomboembidi aton shubun abi tantiaquid dadpen dayun uaquid Nuquin Papa nec — quepondash.

<sup>33</sup> Aden chuibanshumbic adomboembidi Esusēn chuibampondash. Aden chuibanash, aidtedquo tantiapēc abibi queshumbic aden chiaid chuiquin ēmpondash Esusēn. <sup>34</sup> Aden abited chuibanshumbic abēd icquiduidtsēqui bēdamboen tantiamēquin chuipondash.

*Acte tēccoasquiaid ēnēd cac ēnēdaid*

*(Mat 8.23-27; Duc 8.22-25)*

<sup>35</sup> Adashic abi ushēmbi inchēshbudtsēc cano antabēdtoanec Esus: —Chian uquē cuēma utsiuc nuquiduidtsēqui nidnu. Nid —quiampondash abēd icquido caic. <sup>36</sup> Aden chiac chian cuēman tabadcuēdedquido niananec badēdquo nidquin canon Esus buampondash. Abēd icquidon potenubien cano antabēdtoanquin utsin-utsinquinien potepondash. <sup>37</sup> Aden potenubien cunquequid dapan acte tēccoasquequin cano acte uemiaidēn mentoadtsempondash Esus tēotadec ushnubi. <sup>38</sup> Adec uec usho: —Cunquequid dapan acte tēccoascaidēn nuqui mentoeque. Isucunta, icbo —quequin Esus timpondash.

<sup>39</sup> Aden tinac uētsēdtoshon Esusēn: —Mibi comapenec cunqueque. Ēnēd —cac badedquo ēnēdpondash. Adembidi: —Mibi comapenec tēccoasqueque. Ēnēd —cac badedquo ēnēdoapondash acte.

<sup>40</sup> Aden ēnēdmetanec Esus: —¿Atotsi quiash ēbi tantienquo yec dacuēdcuēdede? Ēbi tantiesa mibi nepec —quepondash abēd icquido caic.

<sup>41</sup> Adec Esus cuēnubi badedquo cunquequid dapa ēnēdposh. Adecbidi acte tēccoasquequid ēnēdoaposh. ¿Mitsipadquidēn napeba? Ēnēd cacpadequi ēnēdposh —quec abibi onquecuēdedequi uēdēquianquipoondash abēd icquido.

## 5

*Mayan icsa dadpen dapuduedaid bēdamiaid*

*(Mat 8.28-34; Duc 8.26-39)*

<sup>1</sup> Adshumbic acte tēccoasquec ēnēdmēbon nidquimbi cuēma utsiuc potiash nidaid Cadada cashumbic Quedasa caid yacno choapondash. <sup>2</sup> Ambobi choash pudundosho mayan icsa dapuduedaidēn Esus bēquēdpondash. Cuēnote dapa macuēsh dāpaten icquid yacnoēsh choquin bēquēdpondash.

<sup>3</sup> Aidi unēsaid chococate cuēnote dapa shēcuē uaidēn tabadquid icpac caondash. Aidi shocosh bucn mēdantebēdta taē taniaid icboedi nadatiambu yanshobi mētanetiapimbo yampac caondash. <sup>4</sup> Abi mētaniaid shocosh bucu secduatanquin tēs-tēstēnēpac caondash. Adosho isac abi tanebocpadquid utsi nibēdpac caondash. <sup>5</sup> Aidi inchēshēn capucuenequi mēyanacimboec sidquecuenēpac caondash. Adec capuequi cuēnoten abibi dasiadcuēnēpac caondash. Adec siadcuēnēqui dastidquebudnēpac caondash.

<sup>6</sup> Aidi abi yacno Esus canon chosho isanec titinquianec choash: —¿Tsusio, ada cho? —quishic: <sup>7</sup> —¿Mibēd icquidtabi nedi? Mimi namiaidpenquo nebi. Abia Yāmpidēn madombo mibi icquin naden ēbi chuita. Mibi chian anēdēnquiacono nēsecainquo iquēmbi. Abimbo chiēmbi quequin ēbi chuita —quepondash mayan icsa dapuduedaid Esus chiec. <sup>8</sup> Adec mayan icsa dapuduedaid abi onqueshobien Esusēn: —Dapuduen —cashic: <sup>9</sup> —¿Ttsutsi cuēmēdquid mibi ne? —quepondash Esus.

Adoquien: —Dadpenquioshē. Cuēte podotedi dapuduedondaid nebi — quepondash mayan icsa dapuduedaid abentsēc yacimboec onquec.

<sup>10</sup> Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

<sup>11</sup> Adnubien macuësh potseshun chanco dadpeshun pec tabadpondash.

<sup>12</sup> Aden pec tabadsho isashien: —¿Ada mimbi ëbitedi chanco dapudedmet-sia? —quepondash mayan icsa Esus caic.

<sup>13</sup> Adoaquien: —Dada dapuduencuededash chanco dapudedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chanco nibëdquiec.

<sup>14</sup> Adsho isash chanco pemequin isquido chiec nidanepondash. Adeç nidquimbi shubu dadpen icquid uano-uanoec tabadquido chuituidac aidot-sen isec cho-chopondash. <sup>15</sup> Esus yacno cho-choshon mayan icsa da-puduedaid bëdamiosh quequin chuituidac mayan icsa dapudedaid icboed naden isbededpondash. Dashcute dasiuidesa icboedi dasiuidash tsad-sho abimbo iquec quequin isbededpondash. Aidën tantienquicoeboedi tantiec tsadsho adembidi isbededoapondash. Adeç tsadsho comapenen isbededequi nadatiambocquin naid nepec quetsëcquiec tabadcuededpon-dash. <sup>16</sup> Adeç tabadsho isun mayan icsa dapudedaid bëdamequin chanco dapudedmesho isboedon cho-choquido tantiamenuen chuibaampondash.

<sup>17</sup> Aden chuisho tantiaishun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chush-caquin.

<sup>18</sup> Adsho tantiaish cano yacno nidequi cano Esus antabëdtonobien mayan icsa dadpen dapuduemboed choash: —Mibëd icte bunebi. ¿Adabi buane? —quepondash. <sup>19</sup> Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemeboed Nuquin Papa tanti-aquin chuiban. Nuquin Papan ëbi ad icsho unësquiocquin dapuduemiac que-quin chuiban —quepondash Esus. <sup>20</sup> Aden Esusën chiaquien nidpondash. Nidequi shubu dadpen icquid yacno-yacnomboc nidanec nidaid Decapodis caid yacno choshon Esusën naid chuiban-chuibaampondash. Aden chuiban-chuibansho tantiaquidtedi, Adopenshenda Esusën bëdamiaish, quec abibi onquec tabadcuededpondash.

*Nua intac budaid bëdameshun champi unësaid bëdamiaid*

*(Mat 9.18-26; Duc 8.40-56)*

<sup>21</sup> Adshumbic canon Esusbëd icquidon padpiden abi chobocmibidi chian poteoapondash. Adeç chosho isash matses dadpen chian cuëmano pad-pidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. <sup>22</sup> Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adeç choquimbi Esus istuidash mibi bëdambocquid nec quequin ismenuec Esus tauebudshun: <sup>23</sup> —Con champi unëseque. Aid mishquin bëdamec cho —cac

<sup>24</sup> Aidobëdi Esus nidpondash. Adeç nidshobi matses dadpeshun tsibanampondash. Tsucus-tsucustsëcquio yec nidquin Esus tsibanampondash. <sup>25</sup> Esus tsibanquidquio chido utsi icpondash. Aid chido seta 12ted matamec intac budash bëdanenquiocquid icpac caondash. <sup>26</sup> Dauë meniaqui bëdanenquio icpac caondash. Dauëchoquid utsi-utsien piucquid menequin dauë bedshun chequi bëdanenquio yec intac nuambo yampac caondash aton piucquid naimëdnubi. <sup>27</sup> Adeç intac icnubi capuquin Esusën nabanaid chuisho tantianec nidquimbi matses dadpeshun tsibananubi aidënsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. <sup>28</sup> Aden aton

dashcuteuidtsëqui mishec bēdampatsiash icmane queshun mishtsequi bēdampac caondash. <sup>29</sup> Intac bēdanenquiocquid Esus mishec bēdampac caondash. Ēmbi tantiacpadqueiqui bēdanobi quequin ambibi tantiapondash.

<sup>30</sup> Adec chido bēdanubien ěmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

<sup>31</sup> Aden chuisho tantiashun abēd icquidēnquo: —Tsucus-tsucustsēcquo matses dadpen iquec, ¿tsuntsimbini mishosh, quecta ique? —capondash.

<sup>32</sup> Adec abēd icquid cuēdnubi onquenquiocquin, ¿Midaquidēnquo mishoshibique? Isnu, abibi quequin matses utsi-utsien bēispondash Esusēn. <sup>33</sup> Aden bēisbanubi, ěmbi mishoc quenquo yec bēdamboed uēdēquec choequi mibi nadatiambocquin naquid nec quequin tantiequi Esusēn taēno uebudshun abi mishec bēdanaid chuibampondash. <sup>34</sup> Adoquien Esusēn: —Champi, mimbi tantiacpadqueiqui mibi bēdanoc. Dada icsambo ichoedi nēbi dada bēdambo mibi iqueque. Bēdambo yec nid —capondash chido chuiquin.

<sup>35</sup> Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

<sup>36</sup> Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ěbi tantiata —quepondash Esus.

<sup>37</sup> Aden Aido chuishun Esusēn: —Cho-choenda —capondash abi tsi-banuequido chuiquin. Aden chianec Petedobēdta Acobo Uan, Acobon ut-simbo aidtedi buanec Esus nidpondash. <sup>38</sup> Adec nidequi Aidon shubuno choquin comapenec shubicuededsho tantiatuidpondash. <sup>39</sup> Aden tantiequi puduedash Esus: —¿Atotsi quec comapenec shubicuedede? Champi unēsenquo yec ushachimboec uec nec —quepondash.

<sup>40</sup> Adshobien tantiesa icquin mamēnshumbededpondash. Adoquien aidtedi puduemiasch champin tita aton papa chedo abēd icquidbēd champi yacno Esus puduedpondash. <sup>41</sup> Ambo choshon mēdante mēdintanquin Esusēn: —Talita, cumi —capondash. Aton onqueten, Champi, isucunash nidto, quequin adopondash. <sup>42</sup> Adoac badedquo isucunash nidtoash capupondash. Champi seta 12ted icquid niondash. Aidi bēdansho isun abitedishun, Adopenshenda iquec quequin isbededpondash. <sup>43</sup> Aden champi bēdameshun Esusēn: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

## 6

### *Abi icnēdacnoshon Esus chieshēnquido (Mat 13.53-58)*

<sup>1</sup> Auēshquo puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. <sup>2</sup> Ambo tabdashic chonoadtemaīd ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusēn. Aden chuibansho tantienquiocquid abentsēc: —¿Mitsishun chuibansho tantiashun adomboen Esusēn chuibampec? —quepondash.

Adnubien utsi: —¿Mitsicquidēn ismiac Esusēn nadatiambocquin nabampec? —queapondash.

<sup>3</sup> Adnubien utsi: —Nēmbocquid, cuēte nacnenquid, Osen mado nec —queapondash.

Adnubien utsi: —Ani Madia nec. Aton utsibo nēidtedi nēmbo tabadquid nec. Nēdic Acobo, utsibic Ose, utsibic Udas, utsibic Simon. Nēmbobidi aton



chibi chedo tabadoaic —quetsëcquieq tabadec onquecuededec chieshcued-  
edpondash.

<sup>4</sup> Aden chieshënaquin Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matsëquendac. Aton shubun icquido adecbidi iquendac —quepondash Nasaded yacnoquido chiec. <sup>5</sup> Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquo daëdpactsëc icsho mishquin bédamepondash. <sup>6</sup> ¿Atotsi quiash ëmbi chiaid tantiatipimbo icpec? Adembidi nadatiambocquin nasho isti-  
apimbo icpec quepondash Esus abibi onquec.

*Abëd icquido Esusën nidmiad*

(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno  
puduedcuenequin Nuquin Papan chiaid Esusën chuibenepondash.

<sup>7</sup> Adec cuenadquin chuibanëqui abëd icquido caic: —Cho —quetanec  
tabadtuidpondash. Adec tabadtuidash Esus: —Nëbi mibi daëdshun-

daëdshunquien chuibanec nid. Chuibanquimbi mayan icsa dapudedaid  
dapudumeta. <sup>8</sup> Nidquin dadpen mitsana sauedshun buanenda.

<sup>9</sup> Tapucudte sandadia caiduidtsëqui tapucudash nidaneta. Adecbidi utsi  
bedenquio yec mibi dasiuidaiduidtsëqui dasiuidec nidaneta. <sup>10</sup> Shubu

dadpen yacno nidash mibi yuedaid shubun puduedash ambouidi tabadquin  
chuiabanta. Auëshquio puduanec nidequi shubu dadpen yacnobidi nidshun

adquiecbidi tabadquin chuibanota. Adenuidi naquin chuibanta. <sup>11</sup> Mibi  
yuedquid nibëdsho isash nidaneta. Auëshquio nidash shubu ënëdacno choash,

Nëmbo icquido tantiate icsachoquid yec abibi cuidatëquido nec, Papa.  
Adquid icsho isun abi capuaid nidaid pututedi tasequequin Nuquin Papan  
chiacpadomboen ismeta —capondash Esusën abëd icquido chuiquin.

<sup>12</sup> Aden Esusën chiaquien nidanepondash. Adec nidshumbic, mibi ic-  
said ënshun padpiden tantianu quenquiocquin Nuquin Papan chiacpadom-

boen nabanta quequin chuibampondash Esusën nidmiaidon. <sup>13</sup> Adembidi  
mayan icsa dapudedaid dadpen dapudumepondash aidëmbidi. Adembidi

nënquid dadpen daicsaid chedo cuëte bacuë bëchichoquid ënë dachinquin  
bédameopondash Esusën nidmiaidon.

*Uan acten mentoanquid mapi butiaid*

(Mat 14.1-12; Duc 9.7-9)

<sup>14</sup> Adnubien, Chuibanquimbi Esusën nadatiambocquin nabanosh, que-  
quin isboedon ancänquid Edodes chuipondash. Aden chuiban-chuibanac

dadpëshun Esusën nabanaid tantiapondash. Aden tantias: —Uan acten  
mentonanonda mapi butemeboed uincuempash icnu. Adec uincueyshun

nadatiambocquin nabanec nepanui —quecuededpondash tantiaquido.

<sup>15</sup> Adnubien utsibo: —Ediasien nechitec. Nuquin Papan chiampic-  
padquieq choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash  
—quecuededpondash.

<sup>16</sup> Adnubien Edodes: —Èmbi mapi butemiondaid, Uan pado, uincuempash  
icnu —quepac caondash.

<sup>17</sup> Ènden aidëmbi Uan bedmeshun tanemeshun quënën nauedmepac caon-  
dash. Aidëmbi aton utsin chido, Edodias caid, bedacsho isash: <sup>18</sup> —Min utsin

chido mimi bedaid natemaid niosh —queshun Nuquin Papan Moises dada  
uamepampicpaden Nanën Edodes chuipac caondash. Adoac, Uanën chuisho  
dadpëshun tantianushe quesshun Uan bedmeshun quënën nauedmepac

caondash Edodesën. <sup>19</sup> Adoaquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic. <sup>20</sup> Uan bédambocquid Nuquin Papan Chomiaidbidi nec queshun Edodesën Uan cuesunemetiapimbo iquec cudaspac caondash con chidon cuesunemenushe quish. Aden tantiaquin Edodesën abi tsadacno Uan chuibamenuen chome-denepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi queshumbic Edodesën chomedednepac caondash chuisho tantianuen.

<sup>21</sup> Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. <sup>22</sup> Aden aitedi cho-chomias tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Èbi chui. <sup>23</sup> Abimbo caimbi. Mibi bunaid èbi chuita. Mitsanatedi bunebi èbi casho tantiashun dadpen mibi menembi —quepondash.

<sup>24</sup> Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Èbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

<sup>25</sup> Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon èbi mene —capac caondash anin chuibocpadomboen chuituidquin.

<sup>26</sup> Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec èmbi chomiaido quenushe queshun adoembi abibi queshun: <sup>27</sup> —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin <sup>28</sup> maspanën nandoshon bëshun champi meniac bedshun champin aton tita menefuidpac caondash. <sup>29</sup> Adnubien, Uan mapi butiac, quesho tantiash Uambëd icquido nidshun Uanën dada bedshun buanshun chococapac caondash.

*Dada 5000ted Esusën pemiaid*  
(*Mat 14.13-21; Duc 9.10-17; Uan 6.1-14*)

<sup>30</sup> Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. <sup>31</sup> Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

<sup>32</sup> Aden chiashic cano antabëdtoanec matses nibëdacno nidpondash aidtedsëqui. <sup>33</sup> Adec nidsho isash matses dadpen abi nidte yacno tantiec: —U nidanec —quish titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. <sup>34</sup> Adec

aidtedi abia cho-choambien Esusbëd icquido choapondash. Pudundo-quimbi matses dadpeshun abi cainec tabadsho isashien Esus, Abi tantamequin Nuquin Papan chiaid chuiquid nibëdabimboecnuc matses choeoc quequin tantiec unësquio iquebí qeshun tauain chuibampondash Esusën. Yuen chuibanpondash.

<sup>35</sup> Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. <sup>36</sup> Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

<sup>37</sup> Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquoio yoc —quepondash abëd icquido Esus caic.

<sup>38</sup> Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

<sup>39</sup> Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. <sup>40</sup> Adoac ambi chiacted-tedquiec tabadbudpondash. <sup>41</sup> Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismemb —qeshun cuësh-cuëshun: —Meneban —Esusën cac abëd icquidon menebampondash. <sup>42</sup> Menebanac piash: —Padi. Piombi —quecuededpondash pequido. <sup>43</sup> Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. <sup>44</sup> Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanquiocquin dadatedictsequi tambampondash 5000ted iquec quequin.

### *Acte bëntse Esus choaid*

*(Mat 14.22-27, 34-36; Uan 6.16-21)*

<sup>45</sup> Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matses-tedi nidmemb —quepondash Esus abëd icquido caic. <sup>46</sup> Adoac canon potenubi matstedti nidmianec matses nibëdacno macuësh yacno Nuquin Papa chuinuac Esus nidpondash. <sup>47</sup> Adnubien inchëshbudtsëqui abëd icquido acte nënantanquoio canon noadpondash. Ambobi noadnubi Esus abentsëqui mananuc tsadpondash. <sup>48</sup> Ashunquoio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadti-apimboocno acte bëntse choquin abëd icquido Esusën ismetuidpondash. <sup>49</sup> Datantsensho isash, Mayambien nechitec, quequin ambibi tantiec sidquecuededec <sup>50</sup> dacuëdcuededpondash.

Adsho isumbien: —Ëbibi nebique. Dacuëdenquoio yec tabadta —capondash Esusën. <sup>51</sup> Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepc —quepondash abëd icquido. <sup>52</sup> Panëmpi daëdpactsëc ictseqquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquoio icoapondash pamunabimboecquin.

<sup>53</sup> Ashunquoio chian potiashic nidaid Quenesaded caid yacno choshon cano nëshpondash. <sup>54</sup> Aden nëshash mananuc pudundosho isec anocquido, Aidi bédamianquid nec, quequin ambibi tantiaquimbi <sup>55</sup> daicsaid aton ueten nandoshon Esus yacno bē-bēpondash. <sup>56</sup> Adecbidi shubu dadpen yacno-yacnomboec Esus puduedcuenesho isun adembidi anocquidon, Bédamequid nec, qeshun daicsaido bē-bēpondash. Adoac —Min dashcute èbi mishme — capondash bē-bèaidon. Aden ambi tantiacpaden Esusën dashcute mishash bédancuededpondash.

## 7

### *Nuquin Papan paucaid (Mat 15.1-20)*

<sup>1</sup> Adashien Edusaden caid yacnoësh padiseyobobèdi isadaidbo tsusedpabon chiaid tantiaquin chuiquido Esus yacno choshon, <sup>2</sup> Èmbi mishboed mishtemaid ictsiash, qesa iquec tsusedpabon chuinèdacpadquiec mëpanudabi Esusbèd icquidon pesho ispondash. <sup>3</sup> Padiseyobo isadaidbobidi yec tsusedpabon chuinèdacpadquiec penush mëpanudanequid nec. <sup>4</sup> Tiedën caniquid ambi piucquid menèquin bedacnoësh choec adecbidi penush tsusedpabon chuinèdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinèdaid utsi-utsiec dadpen iquec. Ambi chuinèdacpadomboen dëshotetsen cachonouidi dapanquidquibidi nec. Adembidi matsu nacnenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinèdacpadomboen naquidquio nec.

<sup>5</sup> Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinèdaid tantiaquid neoaic. Adec tsusedpabon chuinèdacpadquiec Esusbèd icquido mëpanudenquiocsho isash padiseyobo: —Atotsieshun mibèd icquidon tsusedpabon chuinèdacpadomboen nainquiocquin mëpanudabi pepec —quepondash Esus caic.

<sup>6</sup> Adoaguien Esus: —Isayasën èdenquio dada uaquin mibitedi bédamboen chiampidpadquid mibi nec. Ambi dada uampid nad iqueque. Tantia: “Nuquin Papa bédambocquid nec quequin chiacpadomboen tantiesa isadaidbo nec.

<sup>7</sup> Abia Yampidènquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinèdaid tantiaquidquio nec.”

<sup>8</sup> Aden tsusedpabon chuinèdacpadomboen nabanquin Abia Yampidènquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuec.

<sup>9</sup> Aden chuishumbic adomboembidi chuoaic: —Badedquio Nuquin Papan chiaid chieshènquinn tsusedpabon nadomboen nata quequin chuinèdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape? <sup>10</sup> Nuquin Papan chiacpadomboen Moisesën dada uampid nad iquec: “Titan papabèdtan chiaid chieshenquiocquin naban.” Adquidèn chiaid utsi nad iqueque. Tantia: “Aton papa icsamboen chuiquid unès ua. Adembidi aton tita icsamboen chuiquid unès uaoa,” quequin Nuquin Papan chiac Moisesën dada uampid nec. <sup>11</sup> Mibien tsusedpabon chuinèdaid tantiaquin adoesa nec. Papan na naimèdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun èmbi dayun uaid nec, papa, quequin mimbi

chiec. Adembidi titatsen mimbi chuiuoaic. Aden chuiquin papabêdta tita tantiaquin nashunenquiocquin Nuquin Papan chiaid niacquid mibi nec. <sup>12</sup> Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. <sup>13</sup> Aden chuiquimbi titabêdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinêdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinêdaid nata quequin mimbi chiec —quepondash Esus isadaidbo tsusiobo caic.

<sup>14</sup> Aden Nuquin Papan chiacpadomboen niacquido chiashic: —Utsibo, tantiec cho. Mibi bêdamboen chuinu. Bêdamboec papuduedta. <sup>15</sup> Tsusedpabon chuinêdacpadquiec mēpanudabi mimbi piaid min tantiate icsabudtemaid nendac. Icsamboen tantiec mibi icsaic. <sup>16</sup> Ēmbi chiaid tantiaquin utsi chuibanta —quepondash Esus.

<sup>17</sup> Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ēbitedi tantieme —quepondash abêd icquido. <sup>18</sup> Adoquien: —Utsitedishun tantienquo icbocpadquido mibitedi neque. Tanta. Mimbi piaidēn mimbi tantiaid icsabudtiapimbo iquec. <sup>19</sup> ¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auêshquo chimu nēncuenash puduenec —quepondash abêd icquido caic.

<sup>20</sup> Aden chiec onquiashic: —Mimbi tantiacpadquiequi mibi icsabudec. <sup>21</sup> Chido mimbi inacmaid isash chudtiadquo iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquo iquebi quequin mimbi tantiacpadomboen mimbi ampec. Cuesunetiadquo iquebi quequin mimbi tantiacpadomboen mimbi cuesuneppec. Utsin chido chudtiadquo iquec quequin mimbi tantiacpadomboen aidi mimbi chudpec. Dada utsin ēbi bēdaidquiocsho ispec quequin mimbi tantiacpadomboen min bēnēpenquo chudmequid mibi nec. <sup>22</sup> Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaïd isash adomboembidi bednu queshun isuidesa iquec adomboen bedbanquidquo mibi yampec. Mibibi icsambocquid nec quish chieshēmēnquid mibi nendac. Adquid ābimbo chiacimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquo nebi, quequin mamēnshunquid mibi nendac. Adembidi nasho mamēnshunoquidbidi mibi nendac. Ēmbia tantiaquid nebi, quequin mimbi nabanaid icsa isash bēdambo iquec quec mibi mamēnec tsadec. <sup>23</sup> Ēmbi chuiboedtedi icsaquidēn naid nec. Aden tantiaquid icsabudte nec —quepondash Esus.

*Sidopenisia caid yacnoēsh chido ambi tantiacpadquiec bēdanaïd  
(Mat 15.21-28)*

<sup>24</sup> Aden chiashic isadaidbo yacnoēsh puduanec nidequi isadaidpembo yacno nidpondash. Shubu dadpen icquid Tido caid anoentsēqui yacno choash shubun puduedash: —Nēmbo ēbi choaid chienda —quepondash Esus. Ambi chiacpadpenquioc chuiho tantiapondash anocquidien. <sup>25</sup> Adoac: —Esus chosh —quesho tantiasien mayan icsa dadpuedaidēn tita Esus tabadacno nidpondash. Adec nidec puduedequi Esus taebudpondash chuiquid dapa nec quequin tantiec. <sup>26</sup> Isadaidpembon chido

nidaid Sidopenisia caid yacnocquid niondash. Aidi Esus tauebudash: — Con champi mayan icsa dapuduedaid dapudueme, tsusio, —quepondash comapenen chiec.

<sup>27</sup> Adoaquien Esus: —Mabi con matses isadaidboba bēdamenuc choboc. ¿Bacuēbo cubudabicnubi opashēmpida pete menequin anin bēnepadic? Padenquo. Adembidi, ¿isadaidbotedi bēdamiabidambi matses utsibo, isadaidpembo, bēdamepadi? —quepondash Esus.

<sup>28</sup> Adsho tantiashien chido: —Icho, mimbi bēdamboen chiec. Padnuen anin meniac bacuēbon pete sananaid cuēshēmpi paēdtsacsho opashēmpin ambibi bedshun pec. Adembidi mimbi nadatiambocquin nabanac isadaidbo dadpen bēdanubi isadaidpembo abentsēc tantiaquid yec bēdanoapēc — quepondash chido.

<sup>29</sup> Aden chidon chuishobien: —Bēdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusēn isadaidpembon chido chuiquin.

<sup>30</sup> Adsho tantianec choec shubun puduedquin isaquien aton champi uebocno ēnden mayan icsa niqiuian bēdanash abī ushaidēmbi uec.

### *Pashu buēd onquenquicoquid Esusēn bēdamiad*

<sup>31</sup> Adashien Tido caid anoentsēcūēsh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. <sup>32</sup> Ambo choash tsadnubien dada icsa, pashu buēd onquenquicoquid, Esus yacno bēash tsadquin: —Nēid mishquin bēdame —capondash.

<sup>33</sup> Adsho tantiashun iccuededquido ismenquiocnuen uidictsēc dada icsa buanshun aton mēdante bushbi pashun pabiate pausuntanquin chicpondash Esusēn. Adshun, min anatsen mishnu quetanquin ismequin uicchun mēpidantanquin pashun ana mishpondash. <sup>34</sup> Aden amishec abuc isec: — Epata —quepondash. Paucud, quec adpondash Esus. <sup>35</sup> Adec Esus cuēdnubi pashu buēd onquenquicochoedi tantiadcuenash onquiampondash.

<sup>36</sup> Aden pashuaid bēdamiash: —Esusēn naid nec quequin chienda — quepondash Esus. Adoboqui niacbidanquin chuibampondash. <sup>37</sup> Aden chuisho tantiash: —Adquidshenda Esus nepec. Ambī naidtedi bēdambo iquec. Pashu paucquid nec. Adembidi ana onquesa oncamequid nec —quec onqucuededpondash.

## 8

### *4000ted matses Esusēn pemiaid (Mat 15.32-39)*

<sup>1</sup> Adashic Esus yacno matses dadpen padpidec cho-choash yuec tabadec bundocuededpondash. Adsho isun abēd icquido chomiash Esus nadpondash: <sup>2</sup> —Matses bunec tabadsho isash unēsquio iquebi. Daēdec ushec ēbēd tabadquin aton pete uesquin piac. <sup>3</sup> Aton pete nibēdsho isash, Pec nid, quetiapimbo iquebi padishnushe quiash. Ēnapenuēsh dadpen cho-choash nec —quepondash Esus abēd icquido chiec.

<sup>4</sup> Adoaquien: —Pete nibēdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abēd icquido.

<sup>5</sup> Adsho tantiashien: —¿Tedtsi panēmpi mitsana iquec? —quepondash Esus.

Adoaquien: —Siete iquec —quepondash abēd icquido.

<sup>6</sup> Adnubien: —Tabadbud —quetanquin Esusēn panēmpi sieteted bedshun sananquin Nuquin Papa ambi pete icmiaid chuishun panēmpi cuēsh-cuēshun:

—Nëid meneban —cac abëd icquidon iccuededquido menebampondash. <sup>7</sup> Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiemi, Papa —queshun: —Nëidtsen meneban —Esusën cac menebanoapondash. <sup>8</sup> Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. <sup>9</sup> Peboedo dada caniaid dadpen 4000ted icpondash. Chidon aton bacuëbøbëdtambi pepondash. <sup>10</sup> Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

*Nadatiambocquin nata. Isnu, padiseyobo quiaid*  
(Mat 16.1-4; Duc 12.54-56)

<sup>11</sup> Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

<sup>12</sup> Adsho tantiash, Èbi tantiesa nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquio iquembi. Abimbo caimbi —quepondash Esus. <sup>13</sup> Aden chianec nidec cano antabëdtoanquin uquë cuëma utsiuc poteoapondash.

*Nuquin Papan chiaidbëdta ambi chiaid daëd uaqin chuiquid padiseyobo*  
(Mat 16.5-12)

<sup>14</sup> Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. <sup>15</sup> Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquëc. Adembidi padiseyobon Nuquin Papan chiaidbëdtabi ambibi tantiaquin chiaid daëd uaqin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane queshun ambi tantiacpadomboen nabanenda —capondash Esusën abëd icquido chuiquin.

<sup>16</sup> Adsho Esusën chuiboeid icsamboen tantiec abëd icquido: —¿Èmbi panëmpi bëambo yaidta icbon chuipec? —quec onquecuededpondash.

<sup>17</sup> Aden chiec onquecuedednubien tantiaquidquido icquin Esusën nadopondash: —¿Atotsi quiaish ¿ada panëmpi bëambo yaid con Icbon chuipec? quepe, mibi? ¿Èmbi nabamboed isenquio yec bëshu tsadacimboecta tsadpo? <sup>18</sup> Adecbidi ¿Èmbi chuibanaid tantienquio yec pashuacimboecta tsadoapo? <sup>19</sup> ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoquien: —Doseted iccosh —quepondash abëd icquido.

<sup>20</sup> Adoquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoquien: —Siete iccosh —quepondash abëd icquido.

<sup>21</sup> Adoquien Esus: —¿Nadatiambocquid Esus nec quequin èbi tantienquioda mibi icpe? —quepondash abëd icquido caic.

*Betsaida caid yacnoshon bëshu bëdamiaid*

<sup>22</sup> Adshombic Betsaida caid yacno poteoapondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquido icquin mishquin bëdame —capondash Esus chuiquin. <sup>23</sup> Adsho Esusën bëshu mëdianquin Betsaida caid

anoentsëqui buanshun uicchun bëcuishtuatanquin bëmishec: —¿Ada mimbi iseque? Èbi chui —capondash Esusën.

<sup>24</sup> Adsho tantiash Esus isquin: —Bëdamboen isenquiocquin cuëte podo inchëshquio yacbimboecnuc mibi isembi —capondash bëshuaidën. <sup>25</sup> Aden chuishobi Esusën bëshuaid padpiden bëmishoquien bëcudquiopondash bëdamboen isec. <sup>26</sup> Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

*Quidistu mibimbo neyoc, Petedo quiaid*

*(Mat 16.13-20; Duc 9.18-21)*

<sup>27</sup> Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

<sup>28</sup> Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampid-paquidien Esus nechitec, quec —quepondash abëd icquido Esus caic.

<sup>29</sup> Adsho tantiashun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiachimboen chuioaic.

<sup>30</sup> Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid*

*(Mat 16.21-28; Duc 9.22-27)*

<sup>31</sup> Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsuibon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash. <sup>32</sup> Abi unës uatequid chuipecshenda niondash. Aden Esusën chiaquien aibdëtsëqui uano nidshun Petedon: —Aden tantiaquin chienda —capac caondash.

<sup>33</sup> Aden Petedon chuisho tantiash aucbidi bidadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Pëdeto Satanasbimboecquid nec quequin Satanas capondash Esusën Petedo chuiquin.

<sup>34</sup> Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Èbi mëyanacpadembidi mibi mëyante icnuc niaquenda. <sup>35</sup> Esus tantiaquin ambi chiacpadomboen nanu queboedi unësmanc quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmanc quenquiocquin ëbi chuibanec tabadquid Nuquin Papa yacno tabadendac. <sup>36</sup> Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta bëdambo icpadic? <sup>37</sup> ¿Nuquin Papa mitsana menecta abi yacno puduedpatsia? Padenquio. <sup>38</sup> Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic,



Con utsi nec, quequin Nuquin Papa chienquo iquendambi. Chuiquid dapa abipadquidquo con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënuquid isec, Con utsi nec, queoatiapimbo iquendabi —quepondash Esus cho-choquido caic.

## 9

<sup>1</sup> Aden chiashic Esus: —Nëbimbobi tabadquid ëbi tantiaquid utsi-utsiec unësabiquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

*Esus bëdaidquo icmiaid*  
(*Mat 17.1-13; Duc 9.28-36*)

<sup>2</sup> Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitededi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. <sup>3</sup> Abi dasiuidaid dashcute icboedi nac-nacquio yampac caondash. <sup>4</sup> Edias, Moises, aid daëd ënden yampidi Esusbëd onqesho ispac caondash Esusbëd choboedon. <sup>5</sup> Aden isequi: —Chuiquid Dapa, nuquiibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aiteded icnuc —quepac caondash Petedo. <sup>6</sup> ¿Atotsimbi chuipe? quetiapimbo yec dacuëdcuededquin aden chuipac caondash Petedon.

<sup>7</sup> Adec tabadshobien abu ushu choquidën ambo tabadquidtedi bëtimpac caondash. Aden bëtinaconoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibanasho bëdamboen tantiata —capac caondash Nuquin Papan.

<sup>8</sup> Adsho isbanquin isaquien Esusbëd choboeduidi icoapac caondash.

<sup>9</sup> Adanec macuësh yacnoësh budtanequi: —Mimbi isboed nëbi chienda. Èbi Nuquin Papan mado matsesacsho unësmiac ëbi uincunen mimbi isboed chuita —capac caondash Esusën. <sup>10</sup> Adsho tantiash utsi chienquo yec abi uincumete ¿mitsipadquo icpec? quec abibi onquecuededpac caondash Esusbëd choboedo.

<sup>11</sup> Adec onquecuededash: —Nuquin Papan chomiaidquo choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

<sup>12</sup> Adoaquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adem-bidi Nuquin Papan chomiaidquo yec matsesash nëbi tabadsho matsesën chieshënuquin mëyanendac quequin chuipampid nec. <sup>13</sup> Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënuquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënuquidën mëyanondash —quepondash Esus abëd icquido chiec.

*Mayan icsan buëd onquetiapimbo icmiaid Esusën bëdamiaid*  
(*Mat 17.14-21; Duc 9.37-43*)

<sup>14</sup> Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamquidon comapenec onquecuededquin bëtimpandash. <sup>15</sup> Adnubien Esus

choso isash iccuededquido, Bëdamanquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

<sup>16</sup> Adoaquien: —¿Atotsi quec ëbëd icquidbëd comapenec onquecuedede? —quepondash Esus.

<sup>17</sup> Adshobien: —Chuiquid Dapa, mibi ismenuen con mado bëombi. Mayan icsan buëd oncamenquid yaid nec. <sup>18</sup> Aid Mayan icsan comapenen nebudteniac ëbcacush-ëbcacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquid iccosh —quepondash mayan icsan buëd onquetiapimbo icmiaidën papa.

<sup>19</sup> Aden chuisho tantias abëd icquido caic: —Esus nadatiambocquid nec quequin ëbi tantiesa mibi nepec. ¿Tedectsi icshun ëmbi chiacpaden mimi tantiabempe? Mibi tantiesa icsho ¿mitsipadembimi tantiamepe? —queshumbic: —Madompi bec cho —capondash Esusën.

<sup>20</sup> Adsho tantiasun bëpondash. Bëshobi Esus istanquin mayan icsan abi dapuedaid comapenen cuididicamiampondash. Aden nac madompi uebudec ëbcacush-ëbcacushpambo yec cuididiquepondash.

<sup>21</sup> Adsho isash: —¿Tedtsi seta matamec ad iccondashe? Chui. Tantianu —quepondash Esus madompin papa chiec.

Adoaquien: —Bacuë ictsequi ad iccondash. <sup>22</sup> Cuëte dëtsiadaoid nënedeniosh abi dapuedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun —quepondash madompin papa Esus caic.

<sup>23</sup> Adoaquien: —¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquin naquid nec quequin tantiqidën tantiacpadomboën Nuquin Papan naindac —quepondash Esus.

<sup>24</sup> Adsho tantias: —Tantiambi. Ëmbi abimbo tantienquiocsho isun ëbi tantiam, Icho —quepondash madompin papa Esus caic.

<sup>25</sup> Adsho tantiasun matses dadpen titinquec choso isun mayan icsa chuiquin: —Matses buëd oncamenquiocquid mibi nec. Adembidi tantiametiapiambo icmequidbidi mibi neque. Ambo tabadenquio yec dapuduen —capondash Esusën.

<sup>26</sup> Aden chiaquien sidquec madompi cuididiquenubi dapuduempondash. Adnubien unësbimboec madompi uesho isash: —Unësosh —quepondash isquido. <sup>27</sup> Adnubien madompi mëdintanquin Esusën uëtsëndopondash. Adoac abembi nidtopondash.

<sup>28</sup> Adnubien shubun puduedacsho: —¿Atotsieshumbimbi mayan icsa dapuduemetiapiambo icpo? —quepondash abëd icquido Esus caic utsibon tantienquiocnobi.

<sup>29</sup> Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

### *Abi unës uate chuioaid*

*(Mat 17.22-23; Duc 9.43-45)*

<sup>30-31</sup> Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash. <sup>32</sup> Aden chuisho bëdamboen tantienquio yequi dacuëdec ëbi bëdamboen tantiamequin chui quetiapiambo icpondash abëd icquido.

*¿Mitsicquid chuiquid dapa icpec? quequin chiaid  
(Mat 18.1-5; Duc 9.46-48)*

<sup>33</sup> Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onqueuedo? —capondash Esusën abëd icquido chuiquin. <sup>34</sup> Adsho tantiaash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tiantianu, quec onquequin ambi chiaid chienquio yec tabadpondash. <sup>35</sup> Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

<sup>36</sup> Adec onqueshumbic bacuëmpi abentsëc mëdintanquin abëd icquid tabadacno nënantanquio tsadumbudpondash. Aden tsadumbudshun bacuë icuquequi: <sup>37</sup> —Esus tantiaquid nebi quequin ismequin bacuë yuedquin nashunquid ëbi yuedquin nashunacnimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacnimboecquid neoaindac —quepondash Esus abëd icquido chiec.

*Nuqui chieshënesa nuqui bëdamboen chuibanquid nec quiaid  
(Mat 10.42; Duc 9.49-50)*

<sup>38</sup> Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiambocquin naquidquio nec, quequin tantiemi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquio mibi neque. Adenda quequin chuipombi —quepondash Uan.

<sup>39</sup> Adoagain Esus: —Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. <sup>40</sup> Nuqui chieshënesa nuqui bëdamboen chuibanquid adquid nec. <sup>41</sup> Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

*Icsa uanquin tantiabenabicquid ismequid cuidendac quiaid  
(Mat 18.6-9; Duc 17.1-2)*

<sup>42</sup> Abi Esusën onquequin chuibanec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta têtaneshun acte dapa nënepatecnëdan. <sup>43-44</sup> Adembidi mimbi icsamboen tantiaquin mishaid ëntiapimboquin ismedeniad adomboembidi utsin tantiec. Bednu quenquio yec mëtaniacimboec tsad ënëdenquio yec chian anëdënquiacno nidmane quiash. <sup>45-46</sup> Adecbidi capuquin mibi icsaid mimbi ismebeneque. Capunu quequin tantienquio yec tateshuniacimboec tsadta ënëdenquio yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. <sup>47</sup> Adecbidi ëshën isec mibi icsaid ëntiapimboquin mimbi ismedoniad adomboembidi utsin tantiec. Ëshë chichshuniacimboec tsad ënëdenquio yec chian anëdënquiacno nidmane quiash ma mibi tsadacpadece mimbi ismiaid tsadoapanu. <sup>48</sup> Icsa uadenequin ënenquio yash unësash chian anëdënquiacno nidash unësenuiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. <sup>49</sup> Sa casecac pambid batambo yachimboec Esuspadquid icnu quiash mibi icsaid ënëdnuen mëmunec mibi bëdambo yampec. <sup>50</sup> Sa batamboquid bëdambo iquec. Sa batambochoedi batapenquio yec icsasho

¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

## 10

### *Aton chido bedshun nidmequid*

*(Mat 19.1-12; Duc 16.18)*

<sup>1</sup> Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen chö-choapondash. Adec cho-chosho isun Nuquin Papan chiaid chuibanoapondash Esusën.

<sup>2</sup> Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bëdambo iqueque? Tantaranu. Chui —capondash Esus chuiquin.

<sup>3</sup> Adoaquien: —¿Atotsi quequin Moisesën chuiampic? —queoapondash Esus.

<sup>4</sup> Adoaquien: —Aton chido bedash bunenquio yanshun, Con chido icsambocquid nec, quequin ambi tantiapaden aton bënëdada uashun nidmiachsho isash, Padi, quenquiocpampic Moises —quepondash padiseyobo.

<sup>5</sup> Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. <sup>6</sup> Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. <sup>7</sup> Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec.

<sup>8</sup> Aden aton chido bedash tabadequi matses abentsëc icboedi daëdec. Matses daëd icboedi abentsëc yacimboec tabadec. <sup>9</sup> Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

<sup>10</sup> Aden chiash shubun puduedacsho: —Mimbi chuibod ebitedi tantiam —capondash abëd icquidon.

<sup>11</sup> Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. <sup>12</sup> Adembidi chido aton bënëdada aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

### *Esus yacno bacuëbo bë-beaid*

*(Mat 19.13-15; Duc 18.15-17)*

<sup>13</sup> Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon.

<sup>14</sup> Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aidonec. <sup>15</sup> Abimbo chiembique. Tantia. Nuquin Papan chiaid bacuëbon badedquio tantiapaden tantiesa Nuquin Papa yacno puduedtiapimbo iquendac —quepondash Esus. <sup>16</sup> Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

### *Na dadpen icquid chiaid*

*(Mat 19.16-30; Duc 18.18-30)*

<sup>17</sup> Aden bacuëbo chianec auëshquio puduanec nidshobien dada abentsëc titingec choquin bëquedtanec danëshën sebudash tsadec: —Chuibanquin

tantiämianquid, bēdamboquid mibi neque. ¿Nuquin Papan shubu abentsēquēn tabadnuequin atotsimbi napeba? —quepondash choboed Esus chiec.

<sup>18</sup> Adoaquien Esus: —¿Nuquin Papabēdtabidabi mibi bēdamboquid nec, ēbi cape mimbi? Nuquin Papauidtsēqui bēdamboquidquo nec <sup>19</sup> —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapēc. Nad iqueque. Tantia: “cuesunianenda; adembidi min chidouidi chudquid icta; adembidi, ampēda; adecbidi, utsi chiec muainda; adecbidi, utsin na bedesabimboec muainda; adembidi papabēdtan titan chiaid chieshēnenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

<sup>20</sup> Adoaquien: —Abimbo chiembique. Tantia, Icho. Aidtedi nabanquidquo nebi. Bacuētsēc icquimbi adquid nabanondambi ēnenquiocquin —quepondash choboed.

<sup>21</sup> Adsho tantiash, Aidbēd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio mēnabanquin piucquid bedshun aton na nibēdquid mēnaban. Aden mēnabanash Nuquin Papan chiaid tantiaquidquo mibi iquēdac. Adec Nuquin Papa tantiaquidquo yec ēbēd iquec cho —quepondash Esus.

<sup>22</sup> Adsho tantiash choboed mamēnenquio yec unēsquio yec nidpondash con na mēnabantiapimbo iquebi quiash.

<sup>23</sup> Adec nidsho isun abitedi bēisbanec Esus: —Aton na dadpen icquidēn, Con na tantiequi Nuquin Papan shubu abentsēquēn tabadnu, quequin tantiuidtsec. Adquid Nuquin Papan shubun puduedesa nec —quepondash abēd icquido chiec.

<sup>24</sup> Aden Esusēn chuisho tantiash, ¿Abimboda capec? quequin ambibi tantiec abēd icquido otacquo tabadsho isec Esus: —Abuido, Nuquin Papan shubu abentsēquēn matses badedquio puduedtiapimbo iquec. <sup>25</sup> Adembidi shēcuēn puduedte nidaidēn capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsēquēn puduedmianquid matsesēn badedquio tantiatiapimbo iquec. Ambi tantiacpadequi puduedte bunec —quepondash Esus.

<sup>26</sup> Adsho tantiash abēd icquido, ¿Abimbobida capec? quetsēcquiec onquēcudedpondash. Adec tabadequi: —Ambi tantiacpadequi puduedtiapimbo noc ¿tsutsi puduedquid icpeba? —quepondash abēd icquido Esus chiec.

<sup>27</sup> Adoaquien compānen bēisec Esus nadpondash: —Ambibi tantiaquin naquid Nuquin Papan shubu abentsēquēn puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamēdac —quepondash Esus.

<sup>28</sup> Aden chiaquien Petedo nadpondash: —Chuinu. Tantia, Icho. Mibēd icnu, quequin abitedi nianondambi. Adembidi mibēd icquid utsibon abitedimbo nianondash. ¿Atotsi ēbitedi menetsia? —quepondash Petedo Esus chiec.

<sup>29</sup> Adoaquien: —Abimbo chiembique. Tantia. Esusbēd icnu queshun Nuquin Papan shubu abentsēquēn tabadte iquec quequin chuinequidēn aton shububēdta nianquin aton shubun icquid aton tied chedobēdta nianēdac. Adquid ambi nianēdaidtedimboesho <sup>30</sup> daēd uaquin Nuquin Papan menēdac. Nēbi shubu utsin-utsingquiec mibi puduedcuēnec. Adecbidi Nuquin Papan shubu abentsēquēn tabadquid abi tantiaquid mibēd icquid dadpen iquec. Adquid icnuc mibi chieshēnquidbidi iquēdac. Yuecash ēnēdenquio yec Nuquin Papan shubun mibi tabadēdac mibi chieshēnquid

nibëdacno. <sup>31</sup> Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid*  
(Mat 20.17-19; Düc 18.31-34)

<sup>32</sup> Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuioanu —quiash Esus nidtuidshun cho-chosho isquin naden abi mëyante chuiquin tauapondash: <sup>33</sup> —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpëmbo ancaquid ëbi meneoaindac. <sup>34</sup> Aden meniac bedshun aidon ëbi oncain mamëنشumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid*  
(Mat 20.20-28)

<sup>35</sup> Aden chiaquien Acobo Uambëd Esusën dayuntsëqui choash: —Mibi chinu. Tantia. ¿Ëbi daëdshun chiacpadomboen ëbi daëdi nashunquioda mimbi icpe? —quepondash.

<sup>36</sup> Adoquien: —¿Atotsimbi mibi nashuneque? Ëbi chui. Tantanu —capondash Esusën.

<sup>37</sup> Adoquien: —Abuc nidoash chuiquid dapambo mibi icquin utsi ismequin min dayunquio ëquë tsadumbüdcuenquin ëbi daëdi tsadunta —capondash Uanën Acobobëdtan Esus chuiquin.

<sup>38</sup> Aden aid daëdshun chiaquien: —Tantienuiocquin mimbi chioc. Icsaquid matsestedi nec, quequin Nuquin Papan aidö cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

<sup>39</sup> Adoquien: —Ai, adquid tantiembi —quepondash.

Adoquien: —Ai, adomboembidi mimbítsen tantiendac —quepondash Esus. <sup>40</sup> Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

<sup>41</sup> Aden Esusën chiaqui abëd icquidquio utsitedi Acobobëdtan Uanën chuiböed tantiash nëshcuededpondash. <sup>42</sup> Adec nëishash tabadsho isash: —Cho —quepondash Esus. Aden chomiash: —Utsi namequid isadaidpëmbo nec quequin mimbi tantiec. Aidon matses utsi yuaquin mëyanquin namebanec. <sup>43</sup> Aden namesa mibi nec. Chuiquid dapa icnu quiash utsi nashunquid icta. <sup>44</sup> Adecbidi tsusio icnu quiash yuabimboe yec utsin namiaid icta. <sup>45</sup> Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi —quepondash Esus.

*Bëshuaid, Badtimeyo cuëmédquid bédamiaid**(Mat 20.29-34; Duc 18.35-43)*

<sup>46</sup> Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Puduash nidquin isaquien bëshuaid, Timeyon mado, Badtimeyo cuëmédquid podqued cuëman tsadpondash. Pucquid bednu quequin cainec podqued cuëman tsadpondash. <sup>47</sup> Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

<sup>48</sup> Adec cuëdsho tantiashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

<sup>49</sup> Adoac nitudidshun Esusën: —Cuënquid chome —capondash.

Adoquien: —“Chome,” queque. Nidoash nid —capondash utsibon.

<sup>50</sup> Adsho tantiash bëshuaid aton dashcute bëntsecquid chicanec badedquo nidoanec Esus yacno chopondash. <sup>51</sup> Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icho —quepondash bëshuaid.

<sup>52</sup> Adoquien: —Esusën ëbi bëshuaid bëuquec quequin mimbi tantiacpadquiec mibi bédanoque. Nidec nid —Esus quenubi isbenquopondash bëshuaidën. Adec bédanshun Esus nidsho isun tsibampondash.

**11***Chuiquid dapimboec yec Edusaden yacno Esus choaid**(Mat 21.1-11; Duc 19.28-40; Uan 12.12-19)*

<sup>1</sup> Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid potsembo icpondash. Ambo choash ëbéd icquid daëd shubuno nidmenu quequin tantiec nadpondash Esus: <sup>2</sup> —Në shubu dadpen yacno nidec nid. Ambo nidshun cabayobiecquidën bacuë caniabictëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. <sup>3</sup> Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

<sup>4</sup> Aden Esusën chiaquien abi daëdi nidpondash. Adec nidanequimbi cabayobiecquid caniabictëcquid shubu shëcuë cuëmano tënëshac tsadsho istuidshun tënëshaid tëchicpondash. <sup>5</sup> Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantanu. Chui —capondash anocquidën.

<sup>6</sup> Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

<sup>7</sup> Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtoneshun. Adoaidën Esus catsadtopondash. <sup>8</sup> Adembidi chuiquid Esus nec quequin ismequin utsibontsen aton dashcute bëntsecquid chichededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbiecquid podotëbedeshun podqued ansambanoapondash. <sup>9</sup> Aden ansambanash matses dadpen bëyucanec nidanenubi Esus nënantanquo nidnuc aidtedbidi tsyuec

choquin tsibambëpondash. Adec abitedi nidanec Esus tantiec naded cuëdëncuededpondash: —¡Adeduya! Nuquin Papan bëdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapamuo choec nec. <sup>10</sup> Èbi chuiquid dapa Nuquin Papan abuc tabadquidën chomiaid Esus nec. Nuquin Papa bëdamboshë iquec. ¡Adeduya! —quec cuëdëncuededpondash Esusbëd nidquido.

<sup>11</sup> Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneopondash Esus.

*Cuëte bacuëesa chiaid*  
(Mat 21.18-19)

<sup>12</sup> Abadiadtsashi Betania yacnoësh nidanec Esus bundopondash. <sup>13</sup> Adec bundoshombi cuëte icueda caid podò buntac-buntacpambo ancuenquid nidsho istuidec Esus: —Icueda podò buntac-buntacpambo podòash nid-que. Isbono. ¡Bacuëashida neque? —quianec nidpondash. Adec nidquimbi icueda podouidquio icsho ispondash. Ushë utsin bacuëtiadquidi bacuëabi podopac. <sup>14</sup> Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

*Nuquin Papa tabadte shubu uashunaid yacnoshon cuemiaid*  
(Mat 21.12-17; Duc 19.45-48; Uan 2.12-22)

<sup>15</sup> Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidicabanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. <sup>16</sup> Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. <sup>17</sup> Aden chushcasic: —¿Èbi tabadte shubu uashunaid matsesën èbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. <sup>18</sup> Aden Esusën chuisho tantias, Icsambocquid Esus neque. Unës uatiad, quequin amibibi tantiabedec isadaidbo tsusiobo tabadcuededpondash. Utsiboen: —Chuiquid dapan chiapadomboen Esusën chiec —quepondash. Adsho tantias, Esus bednu, quetiapimbo yec dacuëdcuededec tabadpondash isadaidbo tsusiobo. <sup>19</sup> Adnubien inchëshbudtsëqui Edusaden yacnoësh nidoapondash Esus.

*Cuëte bidiquiaid*  
(Mat 21.20-22)

<sup>20</sup> Abadiadtsashi Edusaden yacno nidoaquimbi cuëte icueda caid bidiquiacsho istuidpondash. <sup>21</sup> Aden istuidash Esusën icueda bacuëesa chiaid tantiec Petedò: —Cuëte bacuëabicsho mimbi chuiboed bidiquiaye. Is, Icbo —quepondash.

<sup>22</sup> Adoquien Esus: —Nuquin Papa nadatiambocquin nabanquid nec, quequin tantiaquiota. <sup>23</sup> Abimbo chiembique. Nuquin Papa nadatiambocquin nabanquidquid nec, quequin abimbo tantiasho isun mimbi chiapadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh



acte nantan tabadoaindac. <sup>24</sup> Ęmbi chiacpadomboen Nuquin Papan naindac, quequin abimbo tantiaquin mimbi chuisho tantiaashun Nuquin Papan adomboembidi naindac. <sup>25</sup> Aden Nuquin Papa chuinish mibi utsin icsambocquin naid tantienquo yec bëpiscudta. Adsho abuschun isash Nuquin Papan mimbi icsa uanquin naid tantienquo yec bëpiscudendac. <sup>26</sup> Adenquin mibi icsa isun Nuquin Papan mibi icsa uanaid bëpiscudenquiocquin mimbi chiaid tantiatipimbo iquendac —quepondash Esus abëd icquido caic.

*¿Mitsicquidën chuibanta caid mibi ne? quiaid*  
(Mat 21.23-27; Duc 20.1-8)

<sup>27</sup> Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: <sup>28</sup> —¿Mitsicquidën chuibanta cac chuiquid dapabimboecquin mimbi chieque? Tantienu. Chui —capondash.

<sup>29-30</sup> Adoaquien: —Adembidi ¿Atotsi tantiaquin mimbi chuipe? Chui. Tantienu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantienu. Aden mimbi chiac ëmbitsen mibi chiemi —capondash Esusën tsusiobo chuiquin.

<sup>31</sup> Aden Esusën chuisho tantiaash udictsëc nidash isadaidbo tsusiobo onquec nadcuededpondash: —Nuquin Papan tantiamiapadomboen Uan padon naondash, nuqui qesho tantiaash, ¿Atotsieshun aidën chiaid tantienquo icconda? quetsiash Esus. <sup>32</sup> Naden Uan padon ambi tantiacpadomboen naondash, nuqui qesho tantiaashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuënoten seshunetsiash —quecuededpondash.

<sup>33</sup> Aden chiech onquecuededashic —¿Tsuntsin tantiamiapadomboen Uan padon nabampondash? quequin tantienquo iquembi —quepondash isadaidbo tsusiobo Esus chiech.

Adoaquien: —¿Tsuntsin tantiamiapadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiech.

## 12

*Tied icbo nashunta quequin chiaid*  
(Mat 21.33-46; Duc 20.9-19)

<sup>1</sup> Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquo nitsinshun cueste bënitsinaidën otadnidec cuidiancuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuechun uba ënë chinun tsuc-tsuctë nacnemposh. Aden nacnenshun uba ampenushe qeshun isec tabadte shubutsen shubu uaposh. Aden aid shubu uash nidnequin abi tied nashunquid, Ista, quequin chianec nidposh icbo.

<sup>2</sup> “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. <sup>3</sup> Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeaposh. <sup>4</sup> Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeaposh tied icbo nashunquidon.

<sup>5</sup> “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiad utsi-utsien abi tied nashunquidon cuesosh. Aden nabanquimbi utsi-utsien cuesuneposh.

<sup>6</sup> “Adosho isash tied icbo naposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembidi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

<sup>7</sup> “Aden nidmiac ancuenquo chosho isash, Tied icbon madombo choeque. Is. Aton papa unësan aton papa yapadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

<sup>8</sup> “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. <sup>9</sup> Adoacsho tantiashun jatotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac — quepondash Esus.

<sup>10</sup> Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaidi utsin abia nitsinaid icoaposh. Adquiobidi Nuquin Papan chuimiad matsesën tantiauidaid iquendac.

<sup>11</sup> Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquo tantiec”

—quepondash Esus Nuquin Papan chiampidquido chiec. Nuquin Papan shubu abentsëquën abi tantiaquido yuedanquid nendac, quequin utsi chiacimboec abibi chiadquin Esusën chuibampondash.

<sup>12</sup> Adsho tantiash, Èbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquido icpondash. Adnubien Esus onquesho dadpeshun tantiabededpondash. Dadpen icsho isash dacuëdcedec Esus bednu quenquo yec nidanepondash chieshëmënquido isadaidbo tsusiobo.

*Bec cho quequin bedshunquid nec, quequin chiaid*

*(Mat 22.15-22; Duc 20.20-26)*

<sup>13</sup> Isadaidbo tsusiobo nidshun padiseyobo edodesbobëdta istuidshun: — Nëidon Esus icsamboen chuimetsiash —qeshun aido Esus yacno nidmepondash.

<sup>14</sup> Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? <sup>15</sup> ¿Adambi menepeba? — quepondash padiseyobobëd edodesbo Esus caic.

Adoquien, Èbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

<sup>16</sup> Adsho tantiashun bëpondash. Adoquien: —Sananquin isme. ¿Tsuksibimboecnuc dada uaid iqueque? Chui. Tantianu —capondash Esusën.

Adoquien: —Isadaidpembo ancaquid, Sesadbimboecnuc dada uaid nec —quepondash.

<sup>17</sup> Adoquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bēdamboen chuisho tantiash, Bēdamboenshenda tantiapēc, quequin ambibi tantiec Esus chieshēnquido tabadcuēdedpondash.

*Abuc tabadequi, ¿mitsicquidēn chido neque? chui quiaid  
(Mat 22.23-33; Duc 20.27-40)*

<sup>18</sup> Adnubien saduseyobotsen Esus yacno cho-chopondash. Unēsaid uincuentiapimbo iquec quequin tantiaquido aido nēpondash. Aido cho-choash nadpondash: <sup>19</sup> —Moisesēn dada uapampid nad iqueque. Tantiā. chuinu. Chidochoquid bacuē tishmiabi yec unēsan unēsboedēn chido aton utsin bedtequid nec. Aden bedshun ma bacuē tishmepanuna. Aden tishmiac unēsaidēn tishmiaidbimboec ma icpanuna, quequin chuipampid nec —quepondash saduseyobo. <sup>20</sup> Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuē tishmiabi yec unēspondash. <sup>21</sup> Adsho isun abi tsibanquidēn aid chidobidi bedshun bacuē tishmiabi yec unēsopondash. Adembidi abi tsibanquidēn <sup>22</sup> aton utsi unēsan aid chidobidi bedshun tishmiambo yec unēsopondash bacuē nibēdquio yec. Adecbidi dadatedi unēsbudnepondash. Adecbidi chidotsen unēsopondash. <sup>23</sup> Adec unēsash abuc tabadequi, ¿mitsicquidēn chido aid icpatsiashe? Chui. Tiantianu —capondash saduseyobo Esus chuiquin.

<sup>24</sup> Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. <sup>25</sup> Nad iqueque. Tantiā. Unēsaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bēda unēsasa yacpadquiec matses uincuenash unēsasa iquec caidasa nendac. <sup>26</sup> Adembidi unēsash uincuenaid tiantianu qeshun ¿Moisesēn dada uaid isenquioda ictionda? Aidēn cuētempi abibi nēdēnquesho istanec nid-tuidquin naded Nuquin Papa onquesho tantiapampic: “Min tsusedpabon Papa nebi. Abadauanēn Papa nebi. Adecbidi Isaquēn Papa nebi. Adecbidi Acobon Papa nebi.” quequin Nuquin Papan chuisho tantiampic Moisesēn. <sup>27</sup> Nuquin Papan chiacpadpenquiocquin Moisesēn dada uapampid nec quequin mimbibi muaquin chienda. Chuinu. Tantiā. Unēsaidēn Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiāte icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuēc.

*Naden nata quequin chiaid ¿mitsicquid adquidpadquid utsi nibēdpec? quiaid  
(Mat 22.34-40)*

<sup>28</sup> Adec Esusbēd saduseyobo onquecuēdednubien tsusedpabon nadomboen nata quequin chiaid tantiamēquid abentsēc chopondash. Bēdamboen Esusēn saduseyobo chuisho tantiash Esus icsamboen chuimenuēc aidtsen: —Ēmbitsen tiantianu. Chui. Nadomboen nata quequin chiaid Nuquin Papan dada uamepampid daden iquec. Dadpen icnuc, ¿mitsicquid aidpadquid utsi nibēdpec? —quepondash.

<sup>29</sup> Adoaquien Esus nadpondash: —Nēid chiaidpadquid utsi nibēdeque. Chuinu. Tantiā. “Nuquin Icbo Nuquin Papa nec. Nuquin Icbo Abentsēcquiobi iquec. <sup>30</sup> Adquid icsho ēbi tantiāquid isash bēdambo iquebi camequin Nuquin Papa tantiadoneta. Adecbidi ēbi yacpadcuēdi icnū quenquio yec Nuquin Papa bunacpadquiec icnū quec bēdamboec tabadta. Adembidi ambi tantiacpaden tiantianu quequin adombota. Adembidi aid tantiāquin bēdamboen nabanquiota. <sup>31</sup> Aden nabanquin Nuquin Papa bēdambo icmequin utsibo

adembidi bédambo icmequin nabanta. Èbi tantiaquin utsibon èbi nashunti-adquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibèdec — quepondash Esus.

<sup>32</sup> Adoquien Esus icsamboen chuimenuc choboed nadpondash: — Mimbi chuiboed abimbo iquec. Nuquin Papa abentsècquiobi iquec. Aidpadquid utsi nibèdec. <sup>33</sup> Adembidi, èbi tantiaquid isash bédambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bédamboec tabadta. Adquid icquin ambi tantiacpaden tantianu quequin adombota. Adem-bidi abi tantiaquin bédamboen nabanquiota quequin chuitequidpadquid utsi nibèdec. Aden Nuquin Papa bédambo icmequimbi utsibo adembidi bédambo icmequin nabanta. Èbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibèdec. Aden naquid Nuquin Papan bédamboen isendac. Aden naisa, Con na Nuquin Papa menenu, qesho Nuquin Papan bédamboen istiapimbo iquendac — queoapondash choboed.

<sup>34</sup> Aden choboedèn bédamboen chuioasho tantiash: —Nuquin Papan shubu abentsèquèn tabadain mimbi bédamboen tantiatempoc —quepondash Esus. Adoac Esus icsamboen chuimenu quetiapimbo icpondash utsibo.

*¿Tsuinsin mado Quidistu nepec? quiaid  
(Mat 22.42-46; Duc 20.41-44)*

<sup>35</sup> Abi icsamboen chuimenuquid utsi nibèdnuc Nuquin Papa tabadte shubu uashunaidèn tabadquimbi Esusèn Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidèn mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. <sup>36</sup> Naden Nuquin Papan Mayanèn Dabid chuiamiampic: “Icho utsi icsho mibi chiembique. Tantia, mado, quequin chiec Icho Dapa nadpampic:

Èquè con dayun abiucquio cainec tsadec cho ma mibi chieshènquidtedi mimbi namiaid ma icpanu,”

quequin chuipampic. <sup>37</sup> Aden Nuquin Papa icho dapanquio aton dayunquio chomiaid chiec Dabid pado, Con icho nec, quishac, ¿mitsipadquiec, Con mado nec, queopampic? Nuquin Papan chometequid, aton mado, Dabidèn icho yec ¿mitsipadectsi Dabidèn tsyuecquid icoapec? —quepondash Esus abibi chiaidequi.

Aden chiec onqesho tantiash badedquio tantiatiadquio yampondash utsibo. Bédamboen chiec, quequin comapenen tantiapondash.

*Nuquin Papan chiaid tantiamequidon chuisho tantienda quiaid  
(Mat 23.1-36; Duc 11.37-54; 20.45-47)*

<sup>38</sup> Aden tantiamequimbi Esusèn nadopondash: —Tsusedpabon nadomboen nata quequin chiaid tantiamequidèn chuibansho tantienda. Aido nadquid iqueque. Tantia. Tsusiobimboec isadnu quiaish abi dasiuidaid ènapen icquid dasiuidtenequid aido nec. Adecbidi tantiaquidquio yec tsusiobimboec isadnu quiaish aton matses dadpen yacno capuquid nec.

<sup>39</sup> Adomboembidi èbi isoanu quiaish Nuquin Papan chiaid chuibante shubun puduedash tsusiobèd tsadec. Adomboembidi ismenu quiaish isedquido dadpen yacno choash shubu icbon dayunquio tsadoaic. <sup>40</sup> Aido bédamboen nashumbimboen nianten na ampequid nec. Adem-bidi bédamboquid nec camenuen yuen Nuquin Papa chiec. Adquid comapenen cuidequid nendac —quepondash Esus.

*Nuquin Papa tantiaquin nianten meniaid*  
(Duc 21.1-4)

<sup>41</sup> Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacnentsiash quequin aton na bedtequid bë-bëquin sandobansho isec tsadpondash. Adeç tsadquin isquimbi aton na dadpen icquidën aton na bedtequid sando-sandonobi <sup>42</sup> aton na daëdpactsëccquidquio niante choquimbi aton shocosh piucquid daëdquibictsëccquid sandopondash aton na utsi nibëdquiocnoc.

<sup>43</sup> Adosho isun abëd icquido chomeshun Esusën nadopondash: —Abimbo chiembique. Tantia. Niante aton na bedtequid dayun uanu quenquioctsëcquin Nuquin Papa tantiaquioquin sandoquidquio nec utsibon aden sandoenquiocnobi. <sup>44</sup> Utsibon aton na bedtequid dadpen uesenquiocquin sandoededposh. Aido daëdpactsëc icquid sandoacimboen sandoquido nec quequin tantiembi. Adquidpenquio niante nec. ¿Bednun tedtsimbi dayunoape? quenquiocquin aton na daëdquibictsëccquidi nibëdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

## 13

*Nuquin Papa tabadte shubu uashunaid chic-chicte chiaid*  
(Mat 24.1-2; Duc 21.5-6)

<sup>1</sup> Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaid bëdaidquio iqueque. Is, Icho —quepondash abëd icquid abentsëc Esus caic.

<sup>2</sup> Adoaquien: —¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaic chic-chiac nibëdquiendac —quepondash Esus.

*Abitedi naimbudte tauanun ismete chiaid*  
(Mat 24.3-28; Duc 21.7-24; 17.22-24)

<sup>3</sup> Aden chiashic auëshquio nidanec macuësh Odibos caid yacno tabadtu-idpondash Nuquin Papa tabadte shubu uashunaid uano tsadnuc. Ambo tabadec abëd icquid 4fed icpondash. Petedo, Acobo, Uan, Andedes aidted icpondash. Utsibon tantienquiocnoc aidon: <sup>4</sup> —Cuënote nacnenaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icoapeque? Tantianu. Aid chuioa —capondash.

<sup>5</sup> Adoaquien Esusën nadopondash: —Muaquin chiaid tantiamane qeshun Nuquin Papan chiaid isban-isbanquiota. <sup>6</sup> Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquent, Abimbo caic, quequin tantiabededendac. <sup>7</sup> Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiaish dacuëndenda. Ad icnuc abitedi naimbudte ushë choabi iquendac. <sup>8</sup> Ai, adquio iquendac. Adashic abëd tabadquidobëdi cuesnancuededendac. Adecbidi abí ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcedendac canchednuec. Adecbidi bunquioite iquendac. Aidedi icsamboshëccquid taëyendac.

<sup>9</sup> “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. <sup>10</sup> Nuquin Papa yacno yuedanquid

iquec quequin mimbi chiendac. Nidaidtedi yacnoshon aden Nuquin Papa tantiaquidèn chuitiad. Aden chiabicnuc abitedi naimbudtiapimbo iquec. <sup>11</sup> Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanèn mibi tantiamiacpadomboen mimbi chuibanendac.

<sup>12</sup> “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nèid cuesuneta, quendac. Adembidi aton papan aton bacuè cuesuneta, caindac. Adembidi aton bacuèbo tantiesa icquin aton papan chiaid niacquin adembidi aton titan chiaid niacoaquin cuesunemen-dac. <sup>13</sup> Esus tantiaquid chieshènquid dadpen iquendac. Adquidèn mëyanaqui Esus tantiaquid nebi quec niaquesa icta. Aden niaquenquio yec unèsash Nuquin Papa yacno nidacsho bédambo icmiaid mibi iquendac.

<sup>14</sup> “Adnubien Nuquin Papa chieshènte ushè choendac. Aid chonoc Edu-saden yacno abi chieshènquid dapa choash, Nuquin Papa caid nebi, quiash Nuquin Papa tabadte shubu uashunaidèn tsadendac. Adsho isash cuesunenushe quiash anoentsèqui icquido cuenenquiocboedi ma cuempanuna. Abimbo chiembique. Bédamboen tantiata caimbi. <sup>15</sup> Adecbidi shubu macano pada-padapambo yacno tabadquido yec umanuc dectatote uaid dectan-doaidèn budanec con na bednu quenquio yec cuenta. <sup>16</sup> Adecbidi aton tied nantan tabadquid yec aton dashcùte bèntsecquid chicshun dectanaid bednuec bidiadenquio yec badedquio cuenta. <sup>17</sup> Bacuè usunquid adecbidi bacuè chishmequin buanquid badedquio cuentiapimbochsho mëyampec. Adquid tantiec utsibo unèsquio icchitec. Nuquin Papa chieshènte ushè icsamboshè iquendac. Adnuc badedquio cuenta. <sup>18</sup> Nuquin Papa chieshènte ushè icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu. <sup>19</sup> Comapenen Nuquin Papa chieshènquin abi tantiaquido icsa uaquin mëyanendac. Yuen naindac. Adoaidpadquid ènden nibèdondash. Adecbidi adoaidpadquid nibèdendac. <sup>20</sup> Nuquin Papa èmenuen chuideneta. Nuquin Papa chuiquin, Chèn, Papa, mimbi cainquiocnoc matestedi nibèdtsiandac. Èbi tantiaquid ambi cuènaido tantiec, Chèn, quequin Nuquin Papan èmendac. <sup>21</sup> Nuquin Papa chieshènte ushè icnuc, Nèid, Quidistu, Nuquin Papan chomiaid neque. Isec cho, quesho tantienquio icta. <sup>22</sup> Aid ushè icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaið nebi, quec muaquid dadpembidi iquendac. Nuquin Papan cuènaido èbi tantiaquid icmenu quequin abi chieshènquidombidi nadatiambocquin naba-nendac. Adosho isun èbi tantiaquidèmbi utsin-utsinquin tantiauidtsendac adquid. Nuquin Papapenquio aid nec, quequin Nuquin Papambo tantiata. <sup>23</sup> Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota —capondash Esusèn.

### *Nuquin Papan madombo choaid*

*(Mat 24.29-35, 42-44; Duc 21.25-36)*

<sup>24</sup> Aden chiash abi onquec: —Adnubien Nuquin Papa chieshènte ushè nidan inchèshquio yanendac. Badiadèn ushèbèdtabi inchèshèn chènquequid nibèdquiocnoc unès uaindac. <sup>25</sup> Adecbidi uispa paèdted-paèdtedendac. Adecbidi abuc tabècaid nibèdnuc ambo icquido Satanasbèd icquido ¿mitsimbo nuqui cuempeca? quendac.

<sup>26</sup> “Adnubien Nuquin Papan madombo matsesaid èbi choasho matsesèn isendac. Abu ushun nadatiambo yec ushumbo yec bèdaidquio iquequi èbi choasho isendac matsesèn. <sup>27</sup> Adnubien Nuquin Papan uaido mayan bédabo,

Ëmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

<sup>28</sup> Aden chiashic: —Abi chiembique. Tantia. Suc seccuduquiac nëbi cunquecueneq, quequin matsesën tantiec. <sup>29</sup> Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. <sup>30</sup> Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac. <sup>31</sup> Aden matsesën isnubien nidaidbëdi abu ënëndendac. Ëmbi chiaidtedi abimbo yec adquiuidi iquendac.

*Nëid ushënquio tauadoendac, quetiapimbo matses iquec quiaid*

<sup>32</sup> “Adnuc nëid ushënquio Nuquin Papa chieshënquin tauaindac quetiapimbo matses iquec. Ambi uaido mayan bëdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquiobien adquid tantiaquid nec. <sup>33</sup> Aid tauadote ushë choaid tantiatiapimboquin Nuquin Papan chiaid niacmane qeshun isbanquin nabanta. <sup>34</sup> Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. <sup>35</sup> Adec icbo nidan abi choate ushë mïmbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash qeshun adem-bidi tantiaquiota. Adembidi, cachina cuëdanubi chopatsiash, qeshun isunshun tantiadenequiota <sup>36</sup> ëmbi tantienquiocnoc con icbo chochitondac, qeshun. <sup>37</sup> Adquiecbidi bëdamboec tabadquin Nuquin Papan chiaid istedïstedta Nuquin Papa chieshënquidën niacmenushe qeshun —quepondash Esus.

## 14

*Esus cuesunete bunaid chiaid*

*(Mat 26.1-5; Duc 22.1-2; Uan 11.45-53)*

<sup>1</sup> Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonöshe qeshun isadaidbo tsusiobon Esus nibëmbededpondash. <sup>2</sup> Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedta. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.

*Esus unësec qeshun nachimboen noadte machiuinte chiaid*

*(Mat 26.6-13; Uan 12.1-8)*

<sup>3</sup> Adnubien Betania caid yacno tabadquin Esusën Simonën shubun puduedshun pepondash. Simon daushachimboecquid, nami mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëec chido puduedpondash. Pucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

<sup>4</sup> Aden machiuinsho isash utsibo nëishun: —¿Atotsieshun machiuino?

<sup>5</sup> Noadte menequin piucquid dadpen bedshun aton na nibëdquid dadpen menetsiandac —quec onquecuededpanëdash Esus machiuimboed chido

chushcaic. <sup>6</sup> Aden chushcasha tantiashien Esus onquec nadpondash: — Chushcainda. ¿Mitsanada nediosh? Ambi noadte machiuimboed bédaidquio nec. <sup>7</sup> Badiadquidën-badiadquidënquiec ënëdenquio yec aton na nibédquid ënabi iquiec. Aidi menenu queshun mimbi menepec. Ëbien nashuntiapimbo iquen-dac. <sup>8</sup> Ëbi unësabicnuc nëid chidon tantiaquin chococanuequin nachimboen noadte machiuimpaboc. <sup>9</sup> Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

*Esus bedmëmbi, Udas quiaid*  
(Mat 26.14-16; Duc 22.3-6)

<sup>10</sup> Adnubien Udas Iscadote, Esusbéd icquid abentsëc, Esus bedmenu, quianec isadaidbo tsusiobo yacno nidpondash. <sup>11</sup> Adec nidequi isadaidbo tsusiobo yacno choshon Esus mibi bedmëmbi quequin chuituidac bédambo icpac caondash aido. Adëmbidi: —Esus ëbi bedmësho isun piucquid mibi menëmbi —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

*Nidaidën capuquidded cuesuniaid abéd icquidobëdtan piaid*  
(Mat 26.17-29; Duc 22.7-23; Uan 13.21-30; 1Cod 11.23-26)

<sup>12</sup> Adashien penun isadaidbo utsibon nidaidën capuquid cuesunenubien: —Cuesuniaid pambid penu queshun, ¿mitsishunquiëmbi nacnempatsia? — quepondash Esusbéd icquido.

<sup>13</sup> Adsho tantiash Esus abéd icquid daéd chiec nadpondash: —Edusaden yacno nidquimbi dadan acte bësho istuidash tsibananec aibdëdi nïdta. <sup>14</sup> Aden aid tsibanec puduedash, ¿Ëbi tabadte quënë mitsimbo iquiec? ëbéd icquidobëdtan penu, quiosh chuiquid, quequin shubu icbo chuita. <sup>15</sup> Aden chiac buanshun dectatomeshun abuc quënë dapa mibi ismendac. Ambo pete sante cueste iquendac. Ashunquio penun nacnenta —quepondash Esus ambi daéd chuimiäid caic.

<sup>16</sup> Aden chiac abéd icquid daéd Edusaden yacno nidquin Esusën chiac-padomboen bëquedshun tsibananash puduedshun penun nacnempondash.

<sup>17</sup> Adnubien inçëshbudtsëqui aid daëdtsëqui yacno Esusbéd icquid utsibo chopondash. <sup>18</sup> Adec choash pec tabadnubien: —Abimbo chiembique. Tantia. Ëbëdtan pequid abentsëcshun isadaidbo tsusiobo ëbi bedmendac — quepondash Esus.

<sup>19</sup> Adsho tantiash, Icsambo iquiec, quequin tantiec: —¿Ëbida chienquio ique? —quepondash abéd icquidtedi.

<sup>20</sup> Adoacquien: —Mibéd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquido bedmendac.

<sup>21</sup> Nuquin Papan chuimiäcpadomboen aton madombo chidon tishac mat-sesaid ëbi unës uate anoentsëqui yanec. Ëbi bedmequid icsamboshë iquendac. Abi cuidte icsamboshë icnushe queshun aidi tishenquiocpatecnëdan — quepondash Esus.

<sup>22</sup> Adashic pebededquin pete bedshun Nuquin Papa chiec onquetanquin pete cuësh-cuëshun abéd icquido menëbanquin: —Nëid pete cuëshë ëmbi piaid con dadabéd daëdacpadquiec Esus unësash abi tantiaquid ëbi icnuc Esus ëbëdi iquiec quequin tantiata —capondash Esusën.

<sup>23</sup> Adëmbidi dëshote bedshun uba caid actequid icnuc Nuquin Papa padpi-den chuishun abéd icquido menëbanac apongondash.

<sup>24</sup> —Nëid acquin Esused Nuquin Papan cuidac aton intac siebudpamboec unësposh. Atón madoded cuidshun Nuquin Papan ëbi padenquio iquiec



quequin nëid acquin tantiata. <sup>25</sup> Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi—quepondash Esus abëd icquido caic.

<sup>26</sup> Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid*  
(*Mat 26.30-35; Duc 22.31-34; Uan 13.36-38*)

<sup>27</sup> Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëndendac,”

quequin Nuquin Papan chuipampid nec. <sup>28</sup> Unës uac uincuenash Cadidia yacno ëbia nidoaindabi. Mibitsen ambo nida —capondash Esusën abëd icquido chuiquin.

<sup>29</sup> Adoaquien: —Esus tantiaquid nebi quenquo utsitedi icnuc ëbien padenquo iquec —quepondash Petedo.

<sup>30</sup> Aden Petedon chuisho tantiaash: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimi tedesteden chiendac —quepondash Esus Petedo caic.

<sup>31</sup> Adsho tantiaash: —Esus tantiaquid mibi icsho mibi aibdëta unës uaimbi, cac, Esus tantiesa nebi, quenquo iquendabi —quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid*  
(*Mat 26.36-46; Duc 22.39-46*)

<sup>32</sup> Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

<sup>33</sup> Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. <sup>34</sup> Adquio iquec: —Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec.

<sup>35</sup> Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. <sup>36</sup> Aden chuishumbic: —Papa, mimi natiapimbo ictequid nibëdec. Adquid icquin matses cuidtequid bedshunquid com mado icmenquo iquemi qeshun mimi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

<sup>37</sup> Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiaash yuecpactsëc iquec ushenquo yec tabadtiapimboda icco? <sup>38</sup> Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquo iquebi quiaash dacuëdash badedquo mibi chieshendac —quepac caondash Esus.

<sup>39</sup> Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. <sup>40</sup> Adtanec choashumbic abëd choboedo adecbidi ushachso istuidoapac caondash. Ushcasquie tabadec, Ushenquioccobi, quequin chuitiapimbo yec otacquo tabadpac caondash.

<sup>41</sup> Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac matesaid ëbi icsho nëbimbobi ëbi chieshënnquidon bedmeque. <sup>42</sup> Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

*Esus bedshun buante chiaid*

*(Mat 26.47-56; Duc 22.47-53; Uan 18.2-11)*

<sup>43</sup> Aden chuinubien Esusbëd icboedquiobi Udasbëd matses dadpen chochopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aided Udasën chiac isadaidbo tsu-siobon chomiaido nepondash.

<sup>44</sup> Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe queshun bëdamboen ista —capac caondash. <sup>45</sup> Aden chiasich aidobëdi choquimbi: —Icbo —quequin Udasën Esus tanchoccatuidpondash.

<sup>46</sup> Aden Udasën tanchoccasho isun Esus bedpondash. <sup>47</sup> Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

<sup>48</sup> Adnubien: —¿Cuesanquid Esus nec, queshun utsin cueste sananubi utsibon chështe sananec ëbi bedecta cho-choec ne? <sup>49</sup> Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. <sup>50</sup> Adec onquesho tantiashun cuenquin abëd icquidtedishun Esus niampondash.

<sup>51</sup> Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënnquidon bedpondashi. <sup>52</sup> Aden bedac dasiuidte bëdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid*

*(Mat 26.57-68; Duc 22.54-55, 63-71; Uan 18.12-14, 19-24)*

<sup>53</sup> Adnubien, isadaidbo tsusio dapa, matses tantie Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. <sup>54</sup> Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. <sup>55</sup> Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënnquin adquid tsusiobon istuidabicpondash. <sup>56</sup> Abimbo chiacimboen dadpenshun chuibedepondash. Aden chuiquin abentsëcshun chiacpadomboen chienquiocquin utsin chuioapondash.

<sup>57</sup> Adnubien, Chuinu. Tantia, queshun Esusën chiacimboen utsi uain chuipondash utsibon. <sup>58</sup> Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicanendambi. Aden chicanshumbic daëdec ushquin matesën naidpenquio isadnuc ëmbi naindambi,” quequin Esusën chuipondash —quepondash utsi. <sup>59</sup> Aden abentsëcshun chuinubi utsin aden chienquiocquin chuipondash.

<sup>60</sup> Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

<sup>61</sup> Adsho tantiash ëcbedenquio yec otacquoio nidsho isash: —¿Nuquin Papan chomiaidquoio, Quidistu caid, Bëdambocquidën mado nebi, quecta mibi ique? —queoapondash isadaidbo tsusio dapa Esus caic.

<sup>62</sup> Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquoio tsadash abu ushun ëbi chosho matsesën isendac —quepondash Esus.

<sup>63</sup> Adsho tantiash, Icsamboen chiech, quec abi daëd dasiuidaid bëntsecquid dached-dachedquiash: —¿Atotsieshun Èsusën icsamboen naosh, quequin chuimenuen utsi nibëmpe nuqui? <sup>64</sup> Nuquin Papa icsamboen Esusën chuisho mimbi tantioc. ¿Midapaden mimbi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

<sup>65</sup> Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquoio mibi neque. Èbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

*Esus ëmbi tantiacmaidquoio nec quiaid*  
(*Mat 26.69-75; Duc 22.56-62; Uan 18.15-18, 25-29*)

<sup>66</sup> Adnubien Petedo umanuc daquënë uaidën tsadnubi isadaidbo tsusio dapan yua chido chopondash. <sup>67</sup> Choshon Petedo cuëte cuëc tsadsho isun: —Nasaded caid yacnocquid Esusbëd icquid mibi nec —capondash.

<sup>68</sup> Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuio yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

<sup>69</sup> Adec Petedo ambo tsadsho chido yuaidën istuidtanquin padpiden: —Esusbëd icquidquoio nëid nec —quequin anocquido chuoapondash.

<sup>70</sup> Adoaquien: —¿Aidbëd icquidtabi nedi? —quepondash Petedo.

Adnubien yuecpactsëc yash: —Aidbëdi Cadidia yacnocquid mibi nec —quepondash ambobidi tabadquido.

<sup>71</sup> Adoaquien: —Èmbi tantiacmaidquoio nec quequin abimbo chiembi. Èmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiech.

<sup>72</sup> Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquoio Esus nec, quequin mimbi chiendac tedestedec onquequin,” quequin Esusën chioshi quequin tantiec unësquio yanec shubianquidpondash Petedo.

## 15

*Pidato yacno nidshun Esus meniaid*  
(*Mat 27.1-2, 15-31; Duc 23.1-5, 13-25; Uan 18.28-19.16*)

<sup>1</sup> Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun

buanshun isadaidpembo ancaquid Pidato caid menepondash. <sup>2</sup> Aden me-  
niac Pidato: —¿Isadaidbo ancaquidta mibi neque? Ēbi chui. Tiantanu —  
capondash Pidaton Esus chuiquin.

Adoaquien: —Mimbibi aden chuiipayoc —quepondash Esus.

<sup>3</sup> Adnubien, Esus icsaded-icsadedosh, quequin chiec isadaidbo tsusiobo  
onqueuedednuc cuēdenquoio yec Esus tsadpondash. <sup>4</sup> Adec tsadsho isun: —  
¿Ēcbedanenquoio yec otacquioda tsade? Mibi icsaid dadpen nēidon chuiabanec  
—Pidaton caqui <sup>5</sup> adquiecbidi Esus tsadpondash. Adec tsadsho isash  
¿Mitsipadquidquoio Esus nepec? Utsimbien, Icsapenquiocquid nebi, quequin  
chuipec, Aden chienquoio Esusēn iquec, quequin ambibi tantiec Pidato tsad-  
pondash.

<sup>6</sup> Adashic, isadaidbon nidaidēn capuquidded cuesunepampid tantiaid  
Pascuas caid ushē choaidēn-choaidēnquien, Quēnēn nauedmiaid abentsēc  
nidmenu. ¿Mitsiquidimbi nidmepeque? Chui. Tiantanu, quequin isadaidbo  
Pidaton chuided-chuidedpadenec. Adoaquien ismequin, Nēid nidme, cac  
nidmedenepadenec. <sup>7</sup> Aden chuidenequin ambi quēnēn nauedmiaid Bad-  
abas cuēmēdquid nepondash. Aidēmbi utsibobēdtan Domanobo bunenquioc-  
quin cuesquin tauasho isun bedmeshun quēnēn nauedmepac caondash.  
<sup>8</sup> Adnubien Pidaton seta utsin quēnēn nauedmiaid abentsēc ambi nidmion-  
dacpaden nēbi adquid utsi nidmepatsiash icnui quequin tantiec Pidato  
yacno chopondash isadaidbo iccuededquido. Aden tantiec choash: —  
Quēnēn nauedmiaid abentsēcta mimbi nidmepatsia —quecuededpondash  
aido Pidato caic.

<sup>9</sup> Adec onquesho tantiaish Esus nidmetiadquiocquin Pidaton: —Mibi an-  
caquid caid, Esus, nidmependambi iqueque. Isadaidbon, ēbi chui. Tiantanu  
—capondash. <sup>10</sup> Esusbidi tsusio icpec matses quenushē quiash isadaidbo  
tsusiobo Esus unēs uate bumpec quequin tantiaquin Pidaton aden chuipon-  
dash. <sup>11</sup> Aden tantiec, ¿Adambi Esus nidme? quequin Pidaton chiac,  
Padi. Badabas nidmeta, quequin isadaidbo iccuededquin chuipondash  
aton tsusiobon chiacpadomboen. <sup>12</sup> Aden chuibededaquien: —Badabas  
nidmequimbi mibi ancaquid caid Esus ¿atotsimbi napeque? Chui. Tiantanu  
—capondash Pidaton.

<sup>13</sup> Adoaquien: —Cueste nitsinshun dectan —quec comapenec  
cuēdcuededpondash isadaidbo.

<sup>14</sup> Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoac comapenec  
cuēdcuededpondash.

<sup>15</sup> Adsho tantiaish Esus ēmbi nidmesho isun, Pidato icsambocquid nec, que-  
quin ēbi chuiquid dapa isadaidbo tsusiobon chuinushē queshun Badabas  
nidmepondash. Adshumbic: —Cueshcaten Esus comapenen cuesmebeded-  
shun cuesten dectanun buanec nid —capondash Pidaton sondado chuiquid  
chuiquin.

### *Sondadon Esus mamēnshumbedaid chiaid*

<sup>16</sup> Adoac Esus bedshun Pidaton shubu umanuc daquēnē uaid yacno son-  
dadon buampondash. Aden buanshumbien sondado utsibo 600ted icnuc  
chomepondash. <sup>17</sup> Choshon dashcute abichobicquid bēdaidquoio bedshun an-  
canquid dasiuidac bimboecnuc dasiuinshun pinchuc-pinchucquid mauete  
uashun Esus matoncashun <sup>18</sup> ancanquid cuēnacpaden cuēnec: —Mibi isash  
bēdambo iquebi. Isadaidbo ancaquid dapa caid mibi nyec —quequin  
Esus oncaic onquecuededpondash sondado. <sup>19</sup> Adoquimbi ancanquidēn  
sanante cueste bēdaidquibimboecnuc sananquin sondadon abentsēcshun-  
abentsēcshunquien Esus macuestanquin dacuīstucabudniash Esusēn taēno

danëshën sebudash uepondash. <sup>20</sup> Aden mamëshumbededquin mëyanshun dashcute bédambocquid ambi dasiuimboed dachicshun aton dashcutebi da-siunshun cuesten dectanuequin Esus buampondash.

*Esus cuesten dectante chiaid*

(*Mat 27.32-44; Duc 23.26-43; Uan 19.17-27*)

<sup>21</sup> Aden abi dectante cueste Esusën buantiapimboconoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecadedo, Dupo chedon papa Simon cuëmédquid niondash. <sup>22</sup> Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. <sup>23</sup> Ambo choshon uba sicaid paëacsho paëmbocquid dauë cacushtanquin meniäc aguenucioqpondash Esusën. <sup>24</sup> Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmédquidtedi dada uabanshun tēchun sandoshon cadotanequin dada uatsaidēmpi puduemaiäid isbanquin Esusën dashcute bedbampondash.

<sup>25</sup> Ushë dectatoec 9 yanuc Esus cuesten dectampondash. <sup>26</sup> Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. <sup>27</sup> Cuesunetanquin ampequid daëd èquë dectambudcuenshun nënantanquio Esus dectampondash. <sup>28</sup> “Dectanquin icsaquidbëdta dectanendac,” quequin Nuquin Papan chuimiampicpadembi napondash. <sup>29</sup> Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshënda diadpec, quequin tantiaquin datanquin mamëshumbededpondash. Adec cuenquin mamëshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque. <sup>30</sup> Abimbo chuiquid yec unēstiapimboquid nebi quianec mibibi budta —cabidanepondash.

<sup>31</sup> Aden cuenquidën chuinubi adembi isadaidbo tsusio dapabotedi tsusedpabon nadomboen nata quequin chiaid tantiaquid chedo onquecuededec: —Utsi-utsien bédamequimbi utsi unēsacsho uincuemboed yec mëtoccaid abembi chiquidtiapimboquid nec —quepondash isadaidbo tsusiobo Esus caic. <sup>32</sup> —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantien-dambi —quepondash. Aden cuenquidën mamëshunubi abëdta dectanaidën adembi chuiopondash.

*Esus unēs uate chiaid*

(*Mat 27.45-56; Duc 23.44-49; Uan 19.28-30*)

<sup>33</sup> Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash. <sup>34</sup> Ushë 3 yanuc: —Eloi, Eloi, çlama sabactani? —quequin aton papa chiec Esus comapenec cuëdpondash. Aton onqueten: Papa Edoen, çatotsieshumbini bidiaidquin isenquio ique? quec adpondash Esus.

<sup>35</sup> Aden Nuquin Papa Esusën chuisho tantiaquido, Nuquin Papa cuënec, quenquio yec: —Edias cuëneque. Tanta —quepondash.

<sup>36</sup> Aden tantianubi badedi titinqueshun sicaid mucambocquid nëcushtanquin puntanquin cueste dëdectanshun acmenuequin èccuëscadonequi: —Chiata. Edias Esus bedec chonoshe caimbono —quepondash.

<sup>37</sup> Adnubien comapenec cuëdec Esus unësbudpondash.

<sup>38</sup> Esus unësbudnubi abi inchëshacimbocnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. <sup>39</sup> Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

<sup>40</sup> Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. <sup>41</sup> Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

### *Esus chococate chiaid*

*(Mat 27.57-61; Duc 23.50-56; Uan 19.38-42)*

<sup>42</sup> Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. <sup>43</sup> Aidi, Ose Adimateya caid yacnoshon tishaid Pidato yacno nidpondash. <sup>44</sup> Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unëso? —capondash.

<sup>45</sup> Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

<sup>46</sup> Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bëtashpondash. <sup>47</sup> Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

## 16

### *Esus uincuenta chiaid*

*(Mat 28.1-10; Duc 24.1-12; Uan 20.1-10)*

<sup>1</sup> Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menëquin comapenec noadte dadpen bedpondash Esus danoshcanuequin. <sup>2</sup> Bedtsash badiadtsëcnubi dominco ushë caidën Esus chococacno nidanequi: <sup>3</sup> —¿Tsuntsin cuënote shëcnepeba? —quec onquecuedepac caondash.

<sup>4</sup> Adec onquequin ancuenquio isquien cuënote ënden shëcniac. Cuënote dapa yuëmbocquid nepondash. <sup>5</sup> Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

<sup>6</sup> Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. <sup>7</sup> Nadoshi: “Cadidia caid yacno ëbia nidebi. Ambo nidshun ëmbi chiapadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiapaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiech.

<sup>8</sup> Aden chuisho tantiash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

*Esus abuc indote chiaid*

(*Mat 28.16-20; Duc 24.13-53; Uan 20.11-23*)

<sup>9</sup> Adnubien abi nibëmboed uincuenshun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. <sup>10</sup> Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. <sup>11</sup> Esus uincuenash capusho isombi, Madia quesho tantiash, Aidquo mimbi isambo iquec, quec tantienquo yec tabadcuededpondash.

<sup>12</sup> Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. <sup>13</sup> Aden ismiac aid daëdi auchidi Edusaden yacno nidshun ambi isboed chuiopondash. Adembidi tantienquo icoapondash utsibon.

<sup>14</sup> Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi icpoc. Chobique. Is —capondash Esusën.

<sup>15</sup> Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbit-sen chuiban. <sup>16</sup> Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin actën menfomiaid äbi yacno Nuquin Papan puduedmendac. Tantie-sain Nuquin Papan cuidendac äbi yacno puduedtiapimbocnoc. <sup>17</sup> Äbi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi on-quiaid tantienquiochoedëmbi tantiaquin ëbi chuibanendac. <sup>18</sup> Adecbidi, nis-inquo piaqui bidisquenquo iquendac. Adecbidi, unësmenuequin acmiaqui unësenquo iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquo adobanendac —quepondash Esus.

<sup>19</sup> Aden chuiquin ënacsho Esus abuc buanaqui Nuquin Papan dayun abiucquo Esus tsadtuidpondash. <sup>20</sup> Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuiboedquo mimbi isec aidquo tantianeta. Padi. Aidedi dada uaombi.

## DUCASËN DADA UAID

Mibi ismenuequin dada uaquid Ducas nebi.

<sup>1</sup> Utsin-utsinquien ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

*Uan, acten mentoanquid tishte chiaid*

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. <sup>9</sup> Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsi-bobëdtan abi cuëmëdquid-cuëmëdquidquien dada uashun dada uatempï tëchun sandoshon cadotaniac ambi dada uatsaidëmpi abia puduenacsho isacpadeç Sacadias puduedpanëdash. <sup>10</sup> Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chieç onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. <sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash. <sup>13</sup> Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. <sup>15</sup> Aidi Nuquin Papan bëdamboen isaidquio iquendac. Paëmboçquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. <sup>17</sup> Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid



niacboedi min madon chiac Nuquin Papan chiaid naquidquo iquen-dac. Nuquin Icbon matses aido icmenuen min madon chuibanendac — quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: — ¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

<sup>19</sup> Adoaquien: —Ëbibi, Cabaded nebi. Nuquin Papan abëd tabadquin namiaidquo nebi. Nuquin Papan ambi chiacpadomboen mibi chuimenuen chomiaid nebique. <sup>20</sup> Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquo icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenen-quiocsho isash, Baded puduenenquiopec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenuequi buëd cuëdenquioapanëdash Sacadias. Adsho isun: —Ushquin isacimboen isbenac —cabededpanëdash. Adnubien Sacadiasën iccuededquido nidmenuen mëdante uic-uicapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. <sup>24</sup> Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. <sup>25</sup> Adec tabadec Nuquin Papan naid chiec nadec Edisabed onquepanëdash: —Bacuë usundoenquiopec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

### *Esus tishendac, quequin chiaid*

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. <sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. <sup>28</sup> Adec choshon: —Mibi tantiaquin Nuquin Papan bëdamboen icmiaidquo mibi nec. Nuquin Icho mibëdi tabadendac —capanëdash Cabadedën.

<sup>29</sup> Adoaquien Madia, ¿Atotsi quepeba? quequin otacquo tantiec tsadpanëdash. <sup>30</sup> Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. <sup>31</sup> Chuinu. Tantiata. Bacuë usundoshon min mado mimbi tishendac. Tishun, Embi tishaid Nuquin Papa yacno yuedanquidquo nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquobi aid iquendac. <sup>33</sup> Adec tsusedpa Acobon tsyuecquido ënenquioquin chuiquid dapa min mado Esus iquendac —quepanëdash Cabaded Madia chiec.

<sup>34</sup> Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiochoedëmbi nëbi bacuë usundoac.

Usundoenquiocquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquio nec —quepanëdash Cabaded.

<sup>38</sup> Adoquien Madia: —Ai, con Icbon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

*Madia Edisabed isedec nidaid*

<sup>39</sup> Adashic, aton na nacenanec Madia tsusedpa Udan tsyuecquidon nidaid macuësh yacno badedi nidpanëdash. <sup>40</sup> Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembi bëdamboshë icmiaidquio nec. <sup>43</sup> Nuquin Icbon tita mibi yec çatotsi quiash ëbi isnuec cho? <sup>44</sup> Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

*Nuquin Papan naid chiec Madia cuëdënaid*

<sup>46</sup> Adnubien Madia nadec onquec cuëdëmpañdash: “Nuquin Papan naid chuibanu. Tantia.

<sup>47</sup> Èbi usundomiaid Nuquin Papa yacno Yuedanquid nec, quequin tantiec bëdambo iquebi.

<sup>48-49</sup> Èbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembi aton tsyuecquidon tantiabededoac. Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadacbimboecnuc adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio Nuquin Papa nec.

Èmbibi tantiacpadomboen naimbi, quequid icsho isun Nuquin Papan cacumiac uano tabadendac.

<sup>52</sup> Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

<sup>53</sup> Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

<sup>54</sup> Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.

<sup>55</sup> Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpanëdash. <sup>56</sup> Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

*Uan tishaid*

<sup>57</sup> Adnubien Edisabedën bacuë tishte ushë chonoc dada bacuë tishpanëdash. <sup>58</sup> Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsinquidotedi Edisabedëbëd bëdambo icpanëdash.

<sup>59</sup> Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi <sup>60</sup> Edisabed: —Padenquio. Abi cuëmëdquid Uan nec —quepanëdash.

<sup>61</sup> Adoaquien utsibo: —Min matses utsi Uan cuëmëdquid nibëdec —qeshun <sup>62</sup> Sacadias ismenuequin mēdante uic-uiccaquin: —Abi cuëmëdquid chui. Tantanu —capanëdash utsibon.

<sup>63</sup> Adoaquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

<sup>64</sup> Adnubien Nuquin Papan oncameoac Nuquin Papan naid Sacadiasën chuibanpanëdash. <sup>65</sup> Aden chuibancho tantiash: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibanpec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. <sup>66</sup> Adoac: —¿Mitsipadquidquio aton mado nepec? —quecuededpanëdash Sacadiasën mado Nuquin Papan tantiami-aidquio isbededec.

*Sacadias oncamiad*

<sup>67</sup> Adnubien Uanën papa Sacadias Nuquin Papan Mayanën oncamiac nadec Esus chiec onquepanëdash:

<sup>68</sup> “Nuquin Papa isadaidbon Icho nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mēnchictequidquio isadaidbo iquendac.

<sup>69</sup> Abi mēnchicquid nadatiamboquid nendac. Tsusedpa Dabidën tsyuecquidquio aid nendac.

<sup>70</sup> Ambi chuimiadon chiampicpadembi Nuquin Papan adquidquio icmianac.

<sup>71-73</sup> Nuquin tsusedpa Abadauan tantiaquin Nuquin Papan ambi chiampicpadembi nuquin tsusedpabo aton tsyuecquidbëdtabi abi chieshēnquido nidtiapimbo yacnombo abi yacno yuedanquid Nuquin Icho Abentsëcquiobi nec.

<sup>74</sup> Abi cudasquin mēnchicaid yec dacuëdenquio yec Nuquin Papan namiaidombo iquendac.

<sup>75</sup> Adquid yec icsaisa abipadquio bēdamboec tabadquid icsho nuqui aidën isendac ēnenquioequin.”

Adec Esus chiec onquiashic nadec aton mado chiec Sacadias onqueoapanëdash:

<sup>76</sup> “Adnubien nëbi Nuquin Papan chomiaid chuibanquidquio mibi nec, quequin utsibon mibi cuënendac, mado. Nuquin Icho choec, quequin utsibon tantiabicnuc bēyuc tantiashun abi chuiquidquio mibi iquendac.

<sup>77</sup> Adquid icquin mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquio yec bēpiscudendac,

quequin chuibanquid mibi iquendac, mado.

<sup>78</sup> Nuquin Papan matses tantiaquin naquidquio icquin abipadquidquio icsaisa abi yacnoshon chomiaidquio iquendac.

<sup>79</sup> Aidën tantiamiac unēsash abi iquendac.

Adquid shubu abentsëquën tabadacpadec tabadendac, quequin mimbi chiendac, mado.”

quec Uanën papa Sacadias Nuquin Papan Mayanën oncamiac onquepanēdash.

### *Matses nibēdacno Uan tabadcueniaid*

<sup>80</sup> Adashic, Sacadiasën bacuë Uan caniacsho Nuquin Papan tantiamiaid yequi matses nibēdacno tabadcuenepanēdash ambi Esus chuibante ušhë choabicnuc.

## 2

### *Esus tishaid*

*(Mat 1.18-25)*

<sup>1</sup> Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ¿Ĕmbi ancaido isadaidbo aton nabēda tedtsi iqueque? Isquin tantiaata, quequin Sidenio cuēmēdquid chuipanēdash. <sup>2</sup> Sidenio nidaid Sidia caid yacnocquido chuiquid, cobednadod caid icpanēdash.

<sup>3</sup> Min tsusedpa tishampid yacnoshon mibi cuēmēdquid mitsanabēdtabi dada uanuec nidtan, cac abēd icquido buanec isadaidbo nidanepanēdash.

<sup>4</sup> Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanēdash. <sup>5</sup> Aton chido Madia bacuë nua usunquidbēdi Ose abi cuēmēdquid aton nabēdtabi dada uanuec Beden yacno chopanēdash. <sup>6</sup> Ambo choquin aton bacuë nuambo usumpanēdash. <sup>7</sup> Ambo matses dadpen cho-choash shubu abitedi puduedash tsucus-tsucustsēcquio tabadnuc nidaidën capuquid tabadacno puduedshun ambi bëyuc usundoaid Madian tishpanēdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanēdash.

### *Obeca pemebanquin buanquido Nuquin Papan uaidon chiaid*

<sup>8</sup> Aden Beden yacnoshon Esus tishnubien shubu nibēdacno obeca dadpen pemebanquin buanquido inchëshbudtsëqui choec tabadtuidpanēdash.

<sup>9</sup> Inchëshbudtsëqui choash tabadnubien inchëshnuc Nuquin Papan chomiac ambi uaid mayan bēda abuc chopanēdash. Aid uëshëmbo chēnquenec obeca pemebanquin buanquido dacuëdcuededpanēdash. <sup>10</sup> Dacuëdsho isash: —

Chiaid bēda chuinuec chobique. Dacuëdenquiocquin tantiaata. Chuinu. Ĕmbi chuitequid bēda mibi, Cuishon, quetequid nendac. <sup>11</sup> Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup> Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieac uesho istuidash, Nuquin Papan chomiaid Quidistu nec, mibi quependac. <sup>13</sup> Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadec cuëdëncuededpanēdash:

<sup>14</sup> “Nuquin Papa abucquio tabadquid abitedi uaquidquio bēdamboshë iquec.

Nuquin Papan bédamboen isaïdo ma abëdi tabadpanuna,”  
 quec cuëdëmpañëdash. <sup>15</sup> Adec cuëdëñash Nuquin Papan uaido mayan bédabo  
 abuc nidoapanëdash. Adec nidan obeca pemebanquin buanquido Nuquin  
 Icbon chiaïd nanuec: —Nuquin Papan nuqi tantiameboed bacuëmpi is-  
 nuec Beden yacno nidnu. Nid —quianec nidpanëdash. <sup>16</sup> Adec nidshun  
 nidaidën capuquidën pete santen bacuë nanacsho istuidpanëdash. <sup>17</sup> Isanec  
 nidquimbi ambi isboedbëdta ambi tantiaboed chiac <sup>18</sup> tantiaquidtedi: —  
 ¿Midapadquidien capec? —quecuededpanëdash. <sup>19</sup> Aden obeca pemebanquin  
 buanquidon chiaïd tantiash bëpiscudenquio yec Esusën tita, Madia, ¿Mitsi-  
 padquid con bacuë nepec? quequin bëpiscudenquiocquin tantiadenepañëdash.

<sup>20</sup> Adnubien Nuquin Papan chiaïd chuïbocpadquiocsho isash obeca yacno  
 choash obeca pemebanquin buanquido: —Ëmbi isboed ëmbi tantiaboed  
 Nuquin Papan naidquio nec —quequin chiec onquecuededpanëdash.

### *Nuquin Papa tabadte shubu uashunaid yacno Esus buanaid*

<sup>21</sup> Adnubien 7tedec ushtanquin aton madon shui dëbid dëtemiacsho isun,  
 Nuquin Papan uaid mayan bédan chiacpadomboen cuëñaid Esus nec, que-  
 quin Madián aton mado cuëmpañëdash.

<sup>22</sup> Adshumbic, bacuë tishun aid bacuën shui dëbid dëtemeshun ushë  
 abentsëc nidan utsi chotsëcnuc Moises Nuquin Papan dada uamiacpaden  
 nanuen Madiabëdñan Osen Esus Edusaden yacno buampanëdash. Edusaden  
 yacno choash Nuquin Papa tabadte shubu uashunaid yacno choshon, Con  
 bacuë Nuquin Papan namiaïdquio nec, quequin ismepañëdash. <sup>23</sup> Nuquin  
 Papan naden nata quequin chiaïd nad iquec: Bëyuc tishaid dada bacuë  
 ëmbi namiaïdquio con na nec. <sup>24</sup> Mimbi bëyuc tishaid bedte bunquin ëbi  
 tabadte shubu uashunaid yacno mimbi buanaid min mado cuidtequidoain  
 dëbin daëd cuesunemeta. Dëbin nibëdnuc masën bédambocquid daëd cue-  
 sunemeta. Aden nanuec Edusaden yacno choash aton mado niantiapimbo  
 yec Madiabëd Ose Nuquin Papan chiacpadomboen nanuec aton madobëdi  
 puduedpanëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin  
 Papan naden nata quequin chiaïd tantiaquin naquidquio icpañëdash. Aidi  
 isadaïdbo chuïquid dapa abentsëcquiobi cainquidquio icpañëdash. Aidi  
 Nuquin Papan aton Mayan meniaïdquio icpañëdash. <sup>26</sup> Aidi Nuquin Pa-  
 pan Mayanën tantiamiac, Chuïquid Dapa Abentsëcquiobi Nuquin Papan  
 bédamboen isaïdquio choacsho unësabicquin isendambi, quequin tantia-  
 panëdash. <sup>27</sup> Adembidi Nuquin Papan Mayanën nidmiac Nuquin Papa  
 tabadte shubu uashunaid yacno nidequi Simeyon puduedpanëdash. Ambo  
 puduedash capunubi Nuquin Papan naden nata quequin chiaïdquio  
 nanuen aton bënëbëdtambi Madián Esus bëpañëdash. <sup>28</sup> Esus bësho isun  
 Simeyonën Esus bedshun icucquin Nuquin Papan naid naden chuïbam-  
 panëdash:

<sup>29-30</sup> “Abitedishun Icho icquin mimbi ëndenquio chiampid nëbi nëid isembi.  
 Nëid isash unësmane quenquio yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaïd icsho ma abitedishunquio ispanuna.

<sup>32</sup> Nëidëmbi mimbi tantiacpaden chuïbanquin  
 isadaïdbo bédambo icmendac,”  
 quepañëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. <sup>34</sup> Esus chuibanquin naimbudshun Osebëda Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiauidtsëqui naden Simeyonën chuioapanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uguë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiaishun matses dadpeshun icsamboen chuided-chuidendac. <sup>35</sup> Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon nati-ambo iquebi, mibi quendac —quepanëdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiaid chuiquid chido Ana cuëmëquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamiash tabadnubi <sup>37</sup> aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquioquin Nuquin Papauidi tantiaquin buna mëmumbudnequin Nuquin Papa chuidenapanëdash. <sup>38</sup> Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiacpaden nainash Osëbëd Madia nidaid Cadidia caid yacno nidoash Nasaded caid yacno abi tabadacno choapanëdash. <sup>40</sup> Ambo tabadnubi aton bacuë Esus dada bëdambo yec canicuempañëdash. Aidi comapenen tantiaquidquio Nuquin Papan bëdamboen isaïdquio icpanëdash.

### *Canicuenash Nuquin Papa tabadte shubu uashunaidën Esus tabadaid*

<sup>41</sup> Adashic, Èmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquioquin Nuquin Papan uaid mayan bëdan matampampid tantiate ushë yanuc Madia Osëbëd Edusaden yacno nidoapanëdash. Nuquin Papan chiacpadequi setan-setanquiec nidtenapanëdash. <sup>42</sup> Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. <sup>43</sup> Adec ambo nidashic nami uabicquid petequid tantiaid ushëtedi tantiec tabadtenapanëdash. <sup>44</sup> Adec ambo tabadquin nainash Esus ambobi icnubi tantienquio yec Madia Osëbëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenapanëdash. <sup>45</sup> Aden nibënquin istuidabi yec Edusaden yacno padpidec nidoapanëdash. <sup>46</sup> Daëdec ushquin nibëshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onqueuedesho istuidpanëdash. <sup>47</sup> Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpanëdash. <sup>48</sup> Adnubien, ¿Mitsipadquid con mado nepec? quequin otacquio Madian tantianapanëdash. Aden tantiequi: —¿Atotsi quiash ëbi daëdi tantienquio yec nëmbo choash mibi tabade, mado? Unësquioquin papabëdtambi mibi nibëmbeniombi —capanëdash anin.

<sup>49</sup> Adoquien Esus: —¿Atotsieshshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? <sup>50</sup> Aden Esusën chuisho anibëdtan Osen tantienquioapanëdash.

<sup>51</sup> Adashien: —Nidnu. Nid, mado —anin cac cacuidenquoio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusnën nadenepanëdash. Adëc tabadnubi aton titan ambi isboedbëdta ambi tantienquoio yaid bëpiscudenquiocquin tantiadepanëdash.

<sup>52</sup> Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

### 3

#### *Esus choec, quequin Uan mentoanquidën chiaid (Mat 3.1-12; Mad 1.1-8; Uan 1.19-28)*

<sup>1</sup> Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash. <sup>2</sup> Ancanquid aitedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash. <sup>3</sup> Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquoio yacnimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantiasun mibi acten mentono, quequin cho-choquid cho-choquidquien Uanën chuidednepanëdash.

<sup>4</sup> Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uampicp:

“Matses nibëdacnombo tabadquidën ëcauanshun naden chiendac:  
Nuquin Icbombo choeque. Aid tantianu, quequin mimbi tantiaid icsa ëmbanta.

<sup>5</sup> Umbo ancuenquoio chosho isnu quequin cuembocnoc andëdshun ambescabanachimboen abimbo chuiquidënuquoio chiaid tantianu, quequin mimbi tantiaid icsa ëmbanta.

<sup>6</sup> Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”  
quequin Isayasën Uan tishabicnuc chuiquin dada uapampid nec.

<sup>7</sup> Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aid bimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho?

<sup>8</sup> Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquoio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquoio nebi, quequin tantienda. Abadauampadquid ambi chiaid tantiaid bunquin, Matses icta, Nuquin Papan cac cuënotëbi matses iquendac —quepanëdash Uan. <sup>9</sup> Adequi onquebudec: —Cuëte icsatedi matenu, quequin cuëte bacuësa dëdshun mateshun icbon

nëdëncaquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

<sup>10</sup> Adoaquien: —Chian anëdënquequid Nuquin Papan nësiate ictiapimbocquin çatotsimbi napeba? —quepanëdash incuededquido.

<sup>11</sup> Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

<sup>12</sup> Adecbidi ancanquid dapan matses utsin na bedtequid nëitded bedta caidotsen acten mentomenuc cho-chopanëdash. Choshon Uanën chuibancho tantiash: —Chian anëdënquequid nësiate ictiapimbocquin çatotsimbi napeba? —quepanëdash.

<sup>13</sup> Adoaquien: —Ancanquid dapan chiactedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

<sup>14</sup> Adashic, adecbidi sondado cho-choash: —çAtotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëitdedi menenu, cac, Utsi bec cho, quenda —capanëdash Uanën sondado chuiquin.

<sup>15</sup> Aden Uanën chuibancho tantiash: —çTsutsi nepec? çNuquin Papan chomiaidta nepec? —quecuededpanëdash cho-choquido.

<sup>16</sup> Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho çatotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. <sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tanties cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibanpanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. <sup>20</sup> Aden ambi tantiaid icsa chuibancho tantiashun Edodesën Uan bedmeshun quënën nauedmepanëdash abitedishun tantianushe qeshun.

### *Esus acten mentoaid*

*(Mat 3.13-17; Mad 1.9-11)*

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec <sup>22</sup> dëbimbimboec cuemo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadeç aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaïdquio mibi nec —quepanëdash aton Papa.

### *Esuquidistun tsusedpabo chiaidtedi*

*(Mat 1.1-17)*



<sup>23</sup> Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiasn aton matses nadpanëdash. Osen mado nec, quiasn, Nuquin Papan mado nec, quenquoio yec matses onquepanëdash. Esusën papapenquoio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. <sup>24</sup> Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, <sup>25</sup> aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, <sup>26</sup> aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, <sup>27</sup> aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, <sup>28</sup> aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, <sup>29</sup> aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matic cuëmëdquid, <sup>30</sup> aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, <sup>31</sup> aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, <sup>32</sup> aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, <sup>33</sup> aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, <sup>34</sup> aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, <sup>35</sup> aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, <sup>36</sup> aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid, <sup>37</sup> aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid, <sup>38</sup> aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquoio nec. Abi tabadec. Aidtedi Esusën tsusedpabo nec.

## 4

### *Satanas Esus icsamete bunaid* (Mat 4.1-11; Mad 1.12-13)

<sup>1</sup> Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoquin Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. <sup>2</sup> Ushë utsi nidash utsi choaid abuc-totsëcquiecnuc ambobi tsadpanëdash. Aidtedi ushquin penquoio yash Esus bundopanëdash.

<sup>3</sup> Bundoacsho isash Nuquin Papa chieshënuqid choash Satanäs nadpanëdash: —Nuquin Papan madombo icquin penun cuënotebi pete icta cata —capanëdash Satanäsën Esus chuiquin.

<sup>4</sup> Adoaquien: —Padi: “Peteuïdi pec bëdamboec tabadtemaid nec,” quequin dada uapampic —quepanëdash Esus Satanäs caic.

<sup>5</sup> Adoshombic, macuësh dapa abucquio yacno Esus buanshun Satanäsën badedquio nidaidtedi ismebampanëdash. <sup>6</sup> Ismiash: —Nidaidën icquidtedishun icho icmiaidquio nebi. Abitedi con na nec. Èmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. <sup>7</sup> Nidaidën tabadquidtedi chuiquid dapa icnu quequin, Con icho mibi nec, èbi casho adquid mibi icmëmbi —quepanëdash Satanäs Esus caic.

<sup>8</sup> Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min ichombo neque. Aidën namiaidquio icta” —quepanëdash Esus Satanäs caic.

<sup>9</sup> Adoshombic Edusaden yacno Esus buanshun Satanäsën Nuquin Papa tabadte shubu uashunaid macano abucquio tsadumpanëdash. Adën tsadunshun: —Mibi Nuquin Papan madombo yec nëuëshquio dacuëdenquo yec pudunta. <sup>10</sup> Naden dada uapampid iqueque. Tantia. Chuinu.

“Mibi pudunsho isun, Tscatequin bëdamboen budmeta, quequin Nuquin Papan ambi uaido mayan bëdabo chiendac.

<sup>11</sup> Aidombi min taën tsasimbocquid tincanushe qeshun uidën uaquin mibi bëdamboen budmendac.”

Aden min Papan chiaid icnuc dacuëdenquo yec pudunta —capanëdash Satanäsën Esus chuiquin.

<sup>12</sup> Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanäs caic.

<sup>13</sup> Aden chiaquien Satanäsën Esus icsamboen namenuen tanquin naimbudpanëdash. Aden naimbudequi, Padpidemboen èmbi chiaid namenuequin Esus tanun nanuna, quequin ambibi tantianec Esus nianec Satanäs nidpanëdash.

### *Nasaded yacnocquido Esus bunesabo*

*(Mat 4.12-17; 13.53-58; Mad 1.14-15; 6.1-6)*

<sup>14</sup> Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. <sup>15</sup> Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuïsho tantias, Nuquin Papan chiaid tantiaquidquio Esus nec, quec cuëdëncuededpanëdash.

<sup>16</sup> Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onguenush nidtopanëdash. <sup>17</sup> Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec naded Esus onquepanëdash:

<sup>18</sup> “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa èmenuen chuibanta caidquio nebi. Aidëmbidi Satanäsën yuaid Nuquin Papan bacuë icmenuequin chuibanta caidquio nebi.

19 Aidën Nuquin Icbon bēdamboen iste chuibanta caidquio nebi.”

20 Adec isec onquequin nainshun dada uaid bidicashun meniash tsadpanēdash Esus. Adec tsadsho shubu nuntan icquidtedishun bēisbededpanēdash. 21 Adoac: —Nuquin Papan chiaid mimbi tantiaboed nēimbobi tauadoec —quepanēdash Esus abibi chiadequi.

22 Adoaquien: —Bēdamboen chuipēc. ¿Mitsipaden tantiaid ambi chiaid nepeba? —quecuededpanēdash. Adec onqueboedobi: —¿Osen mado Esus nenquioda ictic? —queoapanēdash.

23 Adoaquien: —Bēdamequid yequi abibi daicsambo yanash bēdamiadacsho isash, Bēdamequidquio nec, quequin matsesën tantiapēc, quequin chuipampid nec. Ēmbi Capednaun yacnoshon nabambocpadomboen nēshuntsen nabansho isun, Nadatiambocquin nabanquid nec, quequin mibitedishun tantiapēc. 24 Abimbo chiembique. Tantiata —quiash Esus abi onquec: —Nuquin Papan ěmbi tantiamiacpaden chuibanta caidēn abi caniacnoshon chuibansho tantienquiocquid icpēc. 25 Ēndenquimboshē adomboembidi Nuquin Papan ěmbi tantiamiacpaden chuibanta caid Edias cuēmēdquidēn chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēcncuc matamec aton pete nibēdquiec yanubi isadaidbon bēnuabo bunec tabadpampic. 26 Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenech nidta cac Edias nidshun ambi chiacpadomboen isadaidpembon bēnuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsēqui icpampic. 27 Adashic, adecbidi isadaidbo abi daushumbo yacno mishac mishadenquio yachimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidēmbi isadaidbo daushumbocquido bēdamenquiocquin isadaidpembon abentsēc Naman cuēmēdquid Ediseyon bēdamepampic. Ēbi bēdamepēc, quequin tantiec aton nidaid Sidia caid yacnoēsh choacsho Ediseyon Naman bēdamepampic —quepanēdash Esus.

28 Aden Esusēn isadaidpembon nashumpampid chuisho tantiash iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquēc, quec iccuededquido nēishpanēdash. 29 Adec nēishash nidanc nuntanuēsh puduenanec shubu ěnēdacno nidshun acte dapa quiusudacnombo nebudnequin Esus buampanēdash. 30 Aden nidmiaquien matses dadpen icquid natsusash Esus nidpanēdash.

### *Mayan icsa dapuduedaid cuemete (Mad 1.21-28)*

31 Adec abi caniacnoēsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtēmaid ushē icnuc Nuquin Papan chiaid chuibante shubun puduedshun Nuquin Papan chiaid chuibampanēdash. 32 Aden chuibansho tantiash: —Ambia tantiacidēn chiacpaden chuibanquidien Esus nechitec —quecuededpanēdash anocquido.

33 Aden Esusēn chuibanubien Nuquin Papan chiaid chuibante shubu nuntan mayan icsa dapuduedaid icpanēdash. Aidi comapenec sidquetanec onquec: 34 —¿Nasaded yacnocquid Esus caid atotsi quec mibi cho? ¿Ēbipadquidtedi naimbudmenuecta cho? Ēmbi isaid mibi nec. Nuquin Papan bēdamboen isaidquio, icsapenquiocquidquio mibi nec —mayan icsan caquien: 35 —Otaquio tabad. Adec tabadec dapuduenta —Esusēn cac

mayan icsan abi dapuduedaid tacpanën nebudec icsa uainquoio yec dapuduempanëdash.

<sup>36</sup> Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchiteguin nec —quepanëdash Capednaun yacnocquido. <sup>37</sup> Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

*Daicsambocquid dadpen Esusën bëdamiaid*  
(*Mat 8.14-17; Mad 1.29-34*)

<sup>38</sup> Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

<sup>39</sup> Simonën nachi yacno choash dayunquoio nidtuidec: —Chumbocquid dauebudta —Esus quenubi badedquoio dauebudpanëdash. Adec dauebudash nidtoshon codocashun Esusbëd icquido pemepanëdash Simonën nachin.

<sup>40</sup> Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. <sup>41</sup> Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantiashun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

<sup>42</sup> Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquoio yec ëbëdi tabadta —capanëdash istuidquidon.

<sup>43</sup> Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquïn chuibanun nabono —quepanëdash Esus abi nibënquin istuidquido chiec.

<sup>44</sup> Aden chiashic Nuquin Papan chiaid chuibante shubu utsin-utsingieuc puduedcuenequin Nuquin Papa yacno tabadte iquec quequin chuibampanëdash. Nidaïd Udeya caid yacno shubu dadpen icquid utsi-utsiec yacno choshon aden Esusën chuibampanëdash.

## 5

*Abëd tabadmenuen chomiaid*  
(*Mat 4.18-22; Mad 1.16-20*)

<sup>1</sup> Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash.

<sup>2</sup> Adnubien masi yacno aton cano daëd nëshun icbon aton nëshaidtedi pam-bampanëdash. <sup>3</sup> Adsho isanec nidash Simonën cano antsadtoshon, Udicsëc ëbi buan, Esusën cac Simonën udicsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoaquien: —Icho, inchëshëmbi nuëcquid bednuec nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. <sup>7</sup> Adsho isun abëdta nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icbo, ëbéd iquenquío yec nidaneta. Icsambocquid nebique —capanëdash Esus chuiquin. <sup>9</sup> Abëd icquidobëdtan nuëcquid dadpen bedboed tantiadempambo iquëc, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuibanachuibanendac —quepanëdash Esus Petedo caic. <sup>11</sup> Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid  
(Mat 8.1-4; Mad 1.40-45)*

<sup>12</sup> Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquocquin damishec Esas: —Mibi bëdamete bunebique. Mibi bëdamenu —quenubi badedquío bëdampanëdash.

<sup>14</sup> Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquío meneta —capanëdash Esusën ambi bëdameboed chuiquin.

<sup>15</sup> Adnubien Esusën bëdamesho isquidon Esusën bëdamiaid chuibanac mases dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash. <sup>16</sup> Adashien mases nibëdacnombo nidash Nuquin Papa chiec onquepanëdash.

*Dada shëquëquenquiocquid bëdamiaid  
(Mat 9.1-8; Mad 2.1-12)*

<sup>17</sup> Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Útsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquid naquid icmiac mases bëdamenuc Esus icpanëdash.

<sup>18</sup> Aid icnubien dada shëquëquenquiocquid aton din nandoshon aton ut-sibon bëpanëdash. Aden bëquin shubu nuntan nënantanquío Esus icnubi

<sup>19</sup> mases tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec decatashon macano chic-chichshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bëdamec, quequin tantiaguin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquío yec bëpiscudtequidquío mibi nendac —quepanëdash Esus.

<sup>21</sup> Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibanposh? ¿Tsutsi aden chuibanquid nepec? Nuquin Papauidi tantiaid icsa

cuidenquoio yec bëpiscudquidquoio nec —quepanëdash ambibi tantiacpadec onquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquoio yec bëpiscudtequidquoio nendac ëmbi chiaidquoio bëdantequidpenda nedic? Adecbidi, ¿Mibi icsambochoedi mibi bëdanoque. Nidtoash nidta, quequin chiaid bëdantequidpenda nedic? <sup>24</sup> Nuquin Papan chomiaid icquimbi mimbi tantiaid icsa cuidenquoio yec bëpiscudtequidquoio nendac ëmbi cac ad iquendac. Nuquin Papan chuimi-aidquoio nec mibitedi camenuen dada shëquëquenquiocquid naden chiembique Tantia. Nidtoash nidquin min di buanec nid —capanëdash Esusën dada shëquëquenquiocquid chuiquin. <sup>25</sup> Adoac nidtoshon aton di bedanec Nuquin Papan naboed chuibanëqui aton shubuno nidpanëdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquiochoedëmbi nëbimbobi aid isempombi —quecuededpanëdash.

*Debi, ëbi tsibanec cho, quequin Esusën chiaid*  
(Mat 9.9-13; Mad 2.13-17)

<sup>27</sup> Adashic, capucuenëquin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac <sup>28</sup> Debi nidtoanec aton natedi nianec Esus tsibananec nidpanëdash.

<sup>29</sup> Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. <sup>30</sup> Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

<sup>31</sup> Aden chuisho tantiaish Esus nadpanëdash: —Ëbi bëdamec cho, quenquoio bëdambocquid iquec. Daicsambocquidien, Ëbi bëdamec cho, quendac. <sup>32</sup> Adecbidi, Nuquin Papan bëdamboen isaidquoio icsho, Mimbi tantiaid icsa ënta, quequin chuinuec choenquoio iccondabi. Nuquin Papan icsamboen isaidquoio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

*Buna mëmunaid*  
(Mat 9.14-17; Mad 2.18-22)

<sup>33</sup> Aden Esusën chuibansho tantiaishun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquoio mibëd icquido iquec. Aidon buna mëmunenquiocquid peshun sicaid actenec —quepanëdash padiseyobo Esus chiec.

<sup>34</sup> Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquid isuidenquoio iquec. <sup>35</sup> Yucash chido inquid nibëdanan abëd icboedo unësquioçquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

<sup>36</sup> Aden chuibanëqui abi Esus onquec: —Dashcute chuca cuëshun dashcute shënebëda nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. <sup>37</sup> Adembidi dadpen icquid chodo uashun sandoc. Adotanquimbic istuidshun chuca uain

chodo uashun sandoaic chodo shënin icsa sandoshon nequid bëenquiocquin. <sup>38</sup> Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash. <sup>39</sup> Adashic ambi ënden chiaid tantienquiochoedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

## 6

### *Chonoadtemaid ushë tantiaquid*

*(Mat 12.1-8; Mad 2.23-28)*

<sup>1</sup> Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. <sup>2</sup> Aden pesho isquin padiseyobon: —¿Atotsieshun chonoadtemaid ushën chonoadpeque? Tantianu. Èbi chui —capanëdash Esusbëd icquido chuiquin.

<sup>3</sup> Adoaquien: —¿Tsusedpa Dabid caidbëd icquidon piasquin pepampid tantiamboda ique? <sup>4</sup> Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënëd puduedshun Nuquin Papa tantiaquin pan meniac nanaid chuiquid dapan bedshun abëd icquido mënebanshun aidobëdtambi pepampic. Aid pan Nuquin Papan namiaidënuidsëqui petequid nepampic —quequin padiseyobo chuishun Esusën nadopanëdash: <sup>5</sup> —Èbia: Tiboquenu, quiaish tsadacpadec matses: Nëid chonoadtemaid ushë nec, quequin tantiec. Adnubini aid ushë icho yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

### *Mëuesadaid bëdamiaid*

*(Mat 12.9-14; Mad 3.1-6)*

<sup>6</sup> Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup> Ambobidi tabadquimbi Esus chieshënuquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. <sup>8</sup> Aden cainubien abi chieshënuquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

<sup>9</sup> Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

<sup>10</sup> Aden chuishumbic iccuededquido isbanquin: —Èbi mëd —cac Esus mëdequi mëuesadaid bëdampanëdash.

<sup>11</sup> Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënuquido.

### *Esusën, Èbi chuibeneta, caido*

*(Mat 10.1-4; Mad 3.13-19)*

<sup>12</sup> Adashic, ushë utsin macuësh yacno matses nibëdacno Nuquin Papa chiec onquenuec nidash inchëshën ushenquio yec Nuquin Papa chiec Esus onquepanëdash. <sup>13</sup> Badiadshun abëd icquido dadpen chomeshun, Èbi chuibeneta, quequin 12tedictsëqui chuipanëdash. <sup>14</sup> Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Usan; utsibic, Uedipe; utsibic, Badtodome; <sup>15</sup> utsibic, Debi cashumbic Mateyo caid;

utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; <sup>16</sup> utsibic, Udas, Acobon mado; utsibic, Udas Isca-diote, yuecshun Esus chieshënquido Esus bedmequid. Aidedi, Esusën, Èbi chuibeneta, caido icpanëdash.

*Nuquin Papan bëdamboen isaïdo icnuc ambi icsamboen isaïdo (Mat 4.23-25; 5.1-12)*

<sup>17</sup> Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëitded icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Èbi bëdamepec, quequin tantiec utsibo choash tabadpanëdash. <sup>18</sup> Adec choquido mayan icsa dapuduedaid icsho isun Esusën dapuduemepanëdash. <sup>19</sup> Adsho isun nadatiambocquid Esus neque. Mishnu, qeshun mishequi bëdancuededpanëdash.

<sup>20</sup> Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

<sup>21</sup> “Nëuëshquio bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquio matses Nuquin Papan chiaid tantiesa icsho isash unësquio yec shubidednequid Nuquin Papan bëdamboen isaïd yec abuc nidash ëbëd tabadec bëdambo iquebi quependac adquido.

<sup>22</sup> “Esus tantiaquid icsho chieshënquin pudued cainquio yaid adembidi mua uaquin chuishunaid Nuquin Papan bëdamboen isaïdquio nec.

<sup>23</sup> “Adomboembidi ëmbi ëndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaïdënshun adoaid iquec Nuquin Papa yacno choacsho ambi bëdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

<sup>24</sup> “Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaïdo mibi nec. Nidaïdënshun mimbi bedeniaiduidi tantiec Nuquin Papa yacno puduedtiapimbocquid mibi iquendac. Nidaïdën bëdamboec tabadquin ënden bedondaïdi mibi nec.

<sup>25</sup> “Nidaïdënshun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaid tantianu qeshun tantiatipimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bëdamboquid nec, quequin mibi dadpenshun chuisho tantienda. Adomboembidi mua uain Nuquin Papan ëndenquimbo chuimiaidpembon chuipampic. Aidon chiaid tantiaishun tsusedpabon Nuquin Papan chiaid tantienquio yanampic. Adquido Nuquin Papan icsamboen isaïdo nec — quepanëdash Esus.

*Mibi uïmanënquido tantiaquin nabanta, quiaïd (Mat 5.38-48; 7.12)*

<sup>27</sup> Aden chiashic abi Esus onquec: —Èmbi chiaid tantiaquidquio nad iqueque. Chuinu. Tantiata. Mibi chieshënquido bëdamboen tantiaquin



nabanta. <sup>28</sup> Adembidi mibi icsamboen chuiquid bēdamboen chuita. Adem-bidi, ēbi icsamboen naquido bēdamboen tantiaquin cuidenda, Papa, quequin Nuquin Papa chuita. <sup>29</sup> Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bēdamboen nabanta. Adembidi ampequin min dashcute bedanec nidsho isun, Chiata. Dadam-icquidtsen buan, cata. <sup>30</sup> Utsibic, aton na nibēdquid, Bec cho, quesho meneta. Adembidi utsin mitsana ampesho isun cuidenquiocquin bēdamboen naoata. <sup>31</sup> Adembidi ēbi bēdamboen nashuntiadquidi nepec quequin mimbi tantiacpadomboen utsi tantiaquin nashunta.

<sup>32</sup> “Ēbēd tantiananquiduidi tantianu, quec ḷbēdamboda mibi icpe? Paden-quoio. Adembidi Esus tantiesan abipadquiocquido tantiec. <sup>33</sup> Adecbidi, Ēbi bēdamboen tantiaquin nashunquiduidi tantiaquin nashunoanu quec ḷbēdamboda mibi icpe? Padenquoio. Esus tantiesan adembidi nashun- quidquido nec. <sup>34</sup> Adecbidi, Ēbi menequiduidi menenu, quec ḷbēdamboda mibi icpe? Padenquoio. Esus tantiesan adenuidi menec. <sup>35</sup> Naden nata, quequin chuinu. Tanta. Mibi chieshēnquid icsho aid tantiaquin bēdamboen nabanta. Adembidi mibi meniantiapimbocquid, Bec cho, quesho, Yuecash cuidna- nunanuna, quenquiocquin meneta. Mimbi adoshō isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. <sup>36</sup> Nuquin Papan abi chieshēnquido nashun- deniacpadomboen mibi chieshēnquido nashundeneta —quepanēdash Esus.

*Icsambocquid nec, quequin chienda, quiaid*  
(Mat 7.1-5)

<sup>37</sup> Aden chuibanashic Esus abi onquec: —Ēmbi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquoio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquoio yec bēpiscudta. Adquid, Cuidnu, quenquoio yec mimbi icsamboen tantiaquin naid Nuquin Papa bēpiscudendac. <sup>38</sup> Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniactpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

<sup>39</sup> Aden chuishumbic utsin tantienquoio ictequid abēd icquido naden Es- usēn chuipanēdash: —ḷPodquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash.

<sup>40</sup> Adembidi tantianequidēn abi tantiamequid dēniactiapimbo iquec. Tanti- amiac abi tantiamequidpadquid iquendac —quepanēdash Esus.

<sup>41</sup> Adoshombic adembi tantiamequin naden Esusēn chuipanēdash: — ḷAtotsi quiash utsi bētsiadaid pistsēcquid isequi mibi bētsiadaid dapa isadti- apimbo icpec? ḷMibibi bētsiadaid dapa bēbedadabicquin mitsipadentsi mimbi utsi bētsiadaid pistsēcquid bedshunuen ispe? <sup>42</sup> Adembidi, utsin tantiaid icsa abentsēc icnubien mimbi tantiaid icsa utsi-utsiec icnuc ḷatotsieshun, Mimbi tantiaid icsa ēnta, quequin utsi chuipe? Mimbi tantiaid icsa nibēdacimboen mimbi chuipeque. Adoenda. Mimbi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

*Cuēte abipadquid aton bacuē nec, quequin chiaid*  
(Mat 7.17-20; 12.34-35)

<sup>43</sup> Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. <sup>44</sup> Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic. <sup>45</sup> Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

*Tantiaquidquo icnuc tantiauidquid nec, quequin chiaid*  
(Mat 7.24-27)

<sup>46</sup> Adoshombic: —¿Atotsieshun, Con Icho mibi nec, qeshumbi ëmbi chi-acpadomboen naisa mibi ne? <sup>47</sup> Èbi yacno choshon ëmbi chuibansho tantiaquiash nidshun nadomboen naquidquio iqueque. Chuinu. Tanti-ata. <sup>48</sup> Cunquequid dapan chimeshnushe qeshun shubu uaquidën shëcuë èquëduc uëdëshcashun buintad nitsinquid. Adembidi, natiamanquiec came-tequid yanabicnuc tantesa uainquiocnuen èbi tantiaquidquio icquin ëmbi chiaid papuduedshun adomboembidi nabanquid nec. Adquidën tantesa uainquio iguendac. <sup>49</sup> Utsibic nad iqueque. Tantia. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudue-duidtsacpadomboen nabanenquio yec natiamanquid chonoc abi papudue-duidtsaid bëpiscudendac. Adquid uquë nësecatequid nendac —quepanëdash Esus.

## 7

*Sondado chuiquidën tantiaid*  
(Mat 8.5-13)

<sup>1</sup> Aden iccuededquido chuiquin nainash Capednaun caid yacno Esus nidoapanëdash. <sup>2</sup> Capednaun caid yacno choash Esus tabadnubien isadaid-pembon sondado chuiquidën yua abi cudasaid unëstiadtsëcquio icpanëdash. <sup>3</sup> Aton yua unëstiadtsëcquio icnubien, Nënquid bëdamequid Esus nëmbobi iquec, quequin utsibon chiac:

—Aidën con yua bëdametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

<sup>4-5</sup> Adoaquien: —Ai —quianec Esus yacno isadaidbo tsusiobo nidshun chuituic: —Sondado chuiquidën chuitan caido nebi. Con yua unëstiadtsëcquio iqueque. Esus bëdamequid neque. Chuitan, cac mibi chiec chobi. Sondado chuiquid bëdambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bëdametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adec aidobëd Esus nidshobi sondado chuiquidën chomiaid utsibo choquin bëquedtuidash nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bëdambocquid iquec con shubun puduedenquioctiadquidi mibi nec. <sup>7</sup> Èbi icsambocquid iquec mibi bëquedec nidenquioccobi. Mibi bëdamequid yec con shubun puduedenquiocquin mibi yacnoshombi, Bëdanta, mimbi cac con yua bëdampec. <sup>8</sup> Èbien sondado chuiquid nec. Èmbi nidta cacpadquiequi sondado nidec. Adecbidi, Cho, ëmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi

mibi chuipombi —quepanëdash sondado chuiquidën chuitan caido Esus caic.

<sup>9</sup> Adoquien: —¿Abimbobida cai? —queshun ambi chiaid tantiamenuquin iccuedquido Esusën bëisbanquin nadopanëdash: —Chuinu. Tantiata. Sondado chuiquid isadaidpembu ëbi tantiaquidpadquid isadaidbo nibëdec —quepanëdash Esus. <sup>10</sup> Aden chiaquien sondado chuiquidën chuitan caido auchidi nidoash shubun puduedshun sondado chuiquidën yua bëdamaiaid istuidpanëdash.

### *Nianten mado uincuen uaid*

<sup>11</sup> Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. <sup>12</sup> Adec nidequi Nain tsasi uaid quënë shëcuë anoentsëqui choquimbi unësaid bëquido bëqueduidpanëdash. Unësaid epa icnubi ani nianten icpanëdash. Niantebëd Nain yacnocquido dadpen cho-chopanëdash. <sup>13</sup> Adec cho-choec nianten shubisho isash Esus unësquio yec: —Shubienquio yec ënëd —quepanëdash. <sup>14</sup> Adec, Ënëd, quetanec uidictëc nidshun unësaid nanaid Esusën mishnubi abi bëquido nidtuidpanëdash. Nidtuisho isun: —Abuido, uëtsëdtota —cac <sup>15</sup> uëdtsëdtoash tsadec unësboed onquepanëdash. Adsho isash ani caic: —Në, unësboedi min mado uincuenoshe. Abëdi nidec nid —capanëdash Esusën.

<sup>16</sup> Aden unësaid uincuemesho isash cho-choquido: —Adopenshenda uincuemec —queshun Nuquin Papan naid chuibampanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmiosh —quec isquido onquecuededpanëdash.

<sup>17</sup> Aden isash nidshun unësaid uincuemiaid isquidon chuibancho isadaidbon nidaid Udeya caid yacnocquidontantiabempanëdash. Adembidi chiac dëuequidontsen tantiapanëdash.

### *Ëbitedishun cainaid mibi nec, quequin Uanën chiaid (Mat 11.2-19)*

<sup>18</sup> Adnubien, acten mentoanondaid Uan cuëmëdquid quënë nauedaid icsho abëd icquidon Esusën nabanaid chuibampanëdash. Adoquien abëd icquido daëd chomeshun Uanën nadopanëdash: <sup>19</sup> —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

<sup>20</sup> Adec Esus yacno choash: —Acten mentoanondaidëmbi Uanën chomiaid nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaid Esus caic.

<sup>21</sup> Aden chiaquien icsambocquid bëdamequinc, mayan icsa dapuduedaid dapuduemequinc, bëshuaid bëdamequinc caquin Esusën ismebampanëdash.

<sup>22</sup> Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bëdanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ëmbi aden nabansho isun tantesa uainquiocquin Nuquin Papan bëdamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiech.

<sup>24</sup> Adashic, Uanën chomiaido nidambi iccuededquido tantiamebanuec Uan chiech Esus nadpanëdash: —¿Atotsi isnuec matses nibëdacno nidonda?

¿Cunquequidën ishacunaid isnuecta nidtionda? <sup>25</sup> ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquid aton na dadpenquio icquido ancanquid dapan shubun tabadquido nec. <sup>26</sup> Ad icnuc, ¿atotsi isnuec mates nibëdacno nidonda? ¿Nuquin Papan ambi chiaid chuimi-aid isnuec nidenquioda ictionda? Ai, mates nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. <sup>27</sup> Ëbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cain-  
quidombo iquendac.”

Aden ëbi cain Uan chuiquin dada uapampid nec.

<sup>28</sup> “Adembi Uan chuibanu. Tantiata. Nuquin Papan chuimiaid Uam-  
padquid matsesën tishaid utsi nibëdec. Aidën ëbi chotequid chuibanac  
choshon ëmbi nabansho isenquio icposh. Isash, Nëid Nuquin Papan chomi-  
aid nec, quetsemposh Uan. Aidi quënën nauedac ëmbi nabanaid istiapimbo  
yec tsadec, Nuquin Papan chomiaid, ëbitedishun cainaid mibida ne, quepec  
—quepanëdash Esus.

<sup>29</sup> Aden Esusën chuibansho tantiaish: —Nuquin Papan naid bëdambo iquec  
—quepanëdash Uanën mentobanondaido. <sup>30</sup> Utsiboen ambi tantiaid icsa  
ënenquio icquin Uan Esusën chuisho tantiaish, Nuquin Papan naid bëdambo  
iquec, quetiapimbo aido icpanëdash. Aido padiseyobobëd matsesën naden  
nata quequin chiaid tantiaimequido icpanëdash.

<sup>31</sup> Aden Uan chiaish Esus: —¿Nuquin Papan chiaid nëbi chuisho tantiesa  
mitsipadquid nepeque? <sup>32</sup> Adquid chuinu. Tantia. Ambi tantiacpaden  
naisa icsho isash bacuëbo yacimboec nëishun mimbi icsamboen tantiec.  
Adembidi ambi tantiacpaden naisa icsho isun Nuquin Papan chiaid tantien-  
quio iquec. Adquidën Nuquin Papan chuimiaidën nabansho icsamboen  
ispec. <sup>33</sup> Nua cubudquin pesa Uan icsho isash, Mayan icsa dapuduedaid nec,  
queposh Uanën chuisho tantiesa. <sup>34</sup> Ëmbi peshun acsho isec, Nua peshun  
tantienquiocquin acquid nepec. Aidbidi icsambocquidobëd icquid nec, ëbi  
caposh. <sup>35</sup> Aden tantienquiocquid, Bëdamboen tantianu, queshun bëdamboen  
tantiaquidënquio chuibansho tantiaish abi tantiaimequidpadquid iquendac  
—quepanëdash Esus.

### *Chidon Esus tanoshcaid*

<sup>36</sup> Adashic, Ëbi yacno pec cho, padiseyobo abentsëcshun cac aidbëd nidash  
shubun puduedash pete santen cuëshnudash Esus uepanëdash. <sup>37</sup> Adec  
Esus puduedash uesho isquidon chiac utsin, Icsambocquid nec, caid chido  
choquin noadte bëda danoshquete aton shubumpichobi bëpanëdash. <sup>38</sup> Aden  
bëequi Esus yuedacno choash puduedshun abi bëdamequid Esus istuidash,  
Ëbi bëdamequid bëdambo iquec, quequin ambibi tantiec shubiec Esusën taëno  
tsadbudshun aton bëunën tapascapanëdash. Aden tapascac taë chucusho  
isun aton manëdaidën taucshun taë tachocabanshun noadte bëdan chidon  
tanoshcapanëdash. Chidon aton na bedtequid dadpen menequin comapenec  
noadte bëda bedshun Esusën taë tanoshcapanëdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ëmbi  
yuedaid Nuquin Papan chuimiaid iquec, Ëbi mishquid icsambocquid nec,”  
quequin chido mishmenquio icpec, quepanëdash Simon.

<sup>40</sup> Adoquien, tantiaquidquio icquin Esusën: —Mibi tantiaimequin chuinu.  
Tantiata, Simon —capanëdash.

Adoaquien: —Aden chuiban. Tiantianu —quepanëdash Simon.

<sup>41</sup> Aden tantiashun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuecs hun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. <sup>42</sup> Aden bedshunshun yuecs hun ambi bedshunacted abi daëdi meniantiapimbo icpondash. Adsho isun: “Padi. Mímibi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantieç bëpiscudenquo icpec? —quepanëdash Esus Simon caic.

<sup>43</sup> Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash <sup>44</sup> Simon ismenuc Esus chido yacmi bidiadshun naden chuipanëdash: —Min shubun puduedacsho mimbi taë pante ëbi menenquiococ. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. <sup>45</sup> Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. <sup>46</sup> Bëchin manoshcanesa mibi iccoc. Padnueni nëid chidombi noadte bëdan tanoshcaniosh. <sup>47</sup> Adembidi mibi chiembico. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

<sup>48</sup> Aden Simon chiashic chido caic: —Icsaquid nec, quenquiocquin icsainquo yac bimboecquid mibi isembi —quepanëdash Esus chido chuioaic.

<sup>49</sup> Adsho tantiash: —Icsainquo yac bimboecquid mibi isembi, quec ¿mitsipadquid Esus nepec? —quepanëdash iccuededquido. <sup>50</sup> Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

## 8

### *Chidobo abi nashunquido*

<sup>1</sup> Adshumbic, Esusën shubu dadpen yacno-yacnoamboen chuibanquin Nuquin Papa yacno shubu abentsëqui yac bimboec nidaidën tabadaid chuibenapanëdash. Abi bëdamequid tsibananec chidobo nidpanëdash.

<sup>2</sup> Ambi mayan icsa dapuduemiaidobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash.

<sup>3</sup> Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenapanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

### *Pete ëshë sequid*

(*Mat 13.1-23; Mad 4.1-20*)

<sup>4</sup> Aden chuibenias tabadtuidtsëcnubi ambi chuiquin tantiambeoedo chochoquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash: <sup>5</sup>—Tiedën caniquid pete ëshë sianuec

aton tied yacno nidquid icbo. Adec nidshun tiedën caniquid pete ëshë se-cabanac maisec utsi-utsiec podqued nantan paëdacsho matsesën manenubi utsi-utsien uicchunën chec. <sup>6</sup> Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. <sup>7</sup> Utsibic, nisanquid dëyucacno secac aibdëdi dëyucash canidouidsacsho nisanquidën bëtïnac unësquid. <sup>8</sup> Utsibic, nidaid bëdan secac dëyucash canïash dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

<sup>9</sup> Adoaquien: —¿Mitsipadquid tantiaid mimbi chuiboed icpec? Èbitedi tantiaequin chuioa —capanëdash abëd icquidon.

<sup>10</sup> Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isen-quiopanuna.

Adembidi tantiate bëdambocquid icquimbi tantiesa icquin ma abimbo chiaid tantienquiopanuna”

—quepanëdash Esus.

<sup>11</sup> Aden chiashic: —Èmbi chuiboed nad iqueque. Tantia. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. <sup>12</sup> Podquedën nidaid tsasimbocquidbimboecquid nad iquec. Nuquin Papan chiaid tantia-ash papuduedtiapimboçsho Satansën bëpiscudmiaid adquid nec. <sup>13</sup> Cuënote dadpen samëdacno nidaidbimboecquid nadquid iquendac. Nuquin Papan chiaid tantia-ash, Bëdambo iquebi, quiashic natiamianquieç cametequid icnuc aid tantiec Nuquin Papan chiaid papuduedquidquid iquendac. <sup>14</sup> Nisanquid dëyucuid dadpen yacno nidaidbimboecquid nad iquec. Nuquin Papan chiaid tantia-ash abi bunaid, abi nënaid, ambi natequid adquid tantiaquin Nuquin Papan chiaid bëtashac bimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantia-tiapimbo iquendac. <sup>15</sup> Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiamianquid chonoc tantesa uainquocquin ënenquocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuec.

### *Tabote nënantan nanac chënquiaçbimboecquid*

*(Mad 4.21-25)*

<sup>16</sup> Aden chuishumbic naden Esusën chuioapanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. <sup>17</sup> Adomboembidi mimbi ompoquin chuibanaid Nuquin Papan ompoenquocquin chuibanendac. Adomboembidi mimbi tantiamenquio yaid aidëmbi chuibanendac.

<sup>18</sup> Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiaçpadec tabadquid. Adec tabadquin ompoenquocquin utsi ismequid. Nuquin Papan chiaid tantiauidboed, Bëdamboen tantiembi, queshun papuduedmen-quiocquin bëdamboen ismesa nec. Aden ambi tantiauidaïd uesadendac —quepanëdash Esus.

### *Aton utsibo aton titabëd choaid*

*(Mat 12.46-50; Mad 3.31-35)*

19 Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Ëbi choaid chuita, cac <sup>20</sup> shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

21 Adoquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Ütsibic tita caindambi —quepanëdash Esus.

*Acte tēccoasquesho ënëdmiaid*

*(Mat 8.23-27; Mad 4.35-41)*

22 Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ush-topanëdash. Adec ushnuvien cunquequid dapa comapenec cunquenubi acte tēccoasquequidëd acte uemiac cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: —Nuqui mentoad-egue. Isucun, Icho —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tēccoasqueque. Ënëd —Esusën cac badedquio acte tēccoasquequid ënëdoapanëdash. <sup>25</sup> Aden ënëdmetanec: —¿Atotsi quiaish ëbi tantienquio yec dacuëcuedede? —Esusën caquien abëd icquido dacuëdcededquiequi, ¿Mitsipadquid nepec? Cunquequidbëdtabi acte tēccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduemequin bëdamiaid*

*(Mat 8.28-34; Mad 5.1-20)*

26 Adshumbic, acte tēccoasquec ënëdan nidaid Cadidia yacno chian cuëma utsiuc Esusbëd icquidon poteoac nidaidëmpi Cadada caid yacno aido nidpanëdash. <sup>27</sup> Ambo nidequi canon choash decatasho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien <sup>29</sup> mayan icsa chuiquin: —Dapuduenta —capanëdash Esusën. Mayan icsa dapuduedaid nau icpanëdash. Shocosh bucuñ abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

30 Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sincó midted dapuduedondaid nebi —quepanëdash mayan icsa dapuduedaid onquec. <sup>31</sup> Aden chiasic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiaish <sup>32</sup> chanchó dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoquien: —Aido dapuduedtan —Esusën cac <sup>33</sup> dapuduequequi chanchó mayan icsa dadpen dapuduedash acte quiusudacno chanchó comapenec niuec chian pudun-pudunec mentoadbudnec nibëdquieciq ënësbunepanëdash.

34 Adsho isash chanchó pemequin isquido titinquecan shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin

bëdamiaid dashcute dasiuidash bëdamboen tantiec Esusën taëno tsadsho is-tuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapudue-mequin bëdamiaid isquidon ambi isboed dacuëdquido chuipanëdash. <sup>37</sup> Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapudue-mequin bëdamiaid Esus chiec.

<sup>39</sup> Adoaguen: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapudue-miaid anocquido chuibanta —quianec Esus canon nidpanëdash. Aid nidnubien mayan icsa dapudue-mequin bëdamiaid nidanec aton shubu yacno choshon anocquidtedi Esusën naid abi mayan icsa dapudue-mequin bëdamiaid chuibanopanëdash.

*Chido intac budaid bëdanaid icnuc champi uincuemiaid  
(Mat 9.18-26; Mad 5.21-43)*

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> —Con champi abentsëc tishaid unësanecquidquido iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpeshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

<sup>45</sup> Aden mishac: —¿Tsuntsimbini mishosh? —quepanëdash Esus. Aden chuisho tantiahi abi datsidash capuquido mishambo yec otacquio tabadcuèdedpanëdash. Adec tabadnubien: —Mates dadpeshun tsucus-tsucustsëcquiocquin mibi cuëscabedec —capanëdash Petedon.

<sup>46</sup> Adoaguen: —Mates abentsëcshun ëbi mishosh. Èmbi nadatiambocquin natequid bëuesadsac —quepanëdash Esus.

<sup>47</sup> Adec Esus onquesho tantiahi chido, Ambi tantiacpadomben ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoaguen: —Mimbi tantiacpadquiec mibi bëdanaye. Dacuëdenquo yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

<sup>50</sup> Aden chuisho tantiahi: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

<sup>51</sup> Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aيتد buanec Aido cuëmëdquidën champi yacno Esus puduedpanëdash. <sup>52</sup> Ambo puduedshun anocquido unësquio yec shubisho tantiahi: —Mibi shubieque. Ènëdta. Champi unësenquo yec usheque —capanëdash Esusën.



<sup>53</sup> Adsho tantiashun, Champi unësacsho isombi, quequin Esus tantien-  
 quioquin shubiquidon mamënshumbededpanëdash. <sup>54</sup> Mamënshumbedednubi  
 Esusën Aido cuëmëdquidën champin mëdante mëdinquin: —Nidto, champi  
 —comapenen cac <sup>55</sup> aton tiboedte unësabi yec champi badedquio nid-  
 topanëdash. Champi nidtoshu isash: —Peme —quepanëdash Esus. <sup>56</sup> Aton  
 champi nidtoshu isash: —Adopshenda iquec —quepanëdash ani amëbëdi.  
 Adoaquien: —Mimbi isboed chuibanenda —quepanëdash Esus.

## 9

### *Esusën ëbi chuibeneta, quequin ambi nidmiaido* (Mat 10.5-15; 14.1-12; Mad 6.7-29)

<sup>1</sup> Adashic ambi ëbi chuibeneta caido 12tedtsëqui chometanquin Esusën  
 nadopanëdash: —Ëmbi nadatiambocquin nabanacpaden mibitedishun na-  
 banendac. Mayan icsa dapuduemequinc daicsaido bédamequinc cain mibi  
 capucueniacnoshon mimbi ismebenendac. <sup>2</sup> Nëbi mibi nideque. Adec  
 capucuenequin chuibenequimbi bédamebeneta. <sup>3</sup> Nidquin cueste uidën nidte  
 buanenda. Shictoadte buanenda. Petequid buanenda. Mitsana bedtequid  
 buanenda. Dashcute utsi buanenda. Buanenquio yec dadauidquio nidfan.  
<sup>4</sup> Adec nidash mibi yuedquidën shubun puduedshun ëmbi chiacpadomboen  
 nabanec anouidi tabadta. <sup>5</sup> Mibi nidacno mibi yuedquid nibëdsho isun  
 naden nata. Mimbi tantiad icsa mibibi cuidadte nec, quequin nidaid putu  
 tasequequin ismeta —capanëdash Esusën abëd icquido chuiquin.

<sup>6</sup> Aden chiac nidash abëd icquido abi yuedacno puduedash tabadquin Es-  
 usën chiacpadomboen Nuquin Papabëd tabadaid chuibanquimbi daicsaido  
 bédamebenepanëdash.

<sup>7</sup> Adnubien Esusën nabansho isquidon Edodes chuibanpanëdash. Edodes  
 Cadidia yacnocquido ancaquid icpanëdash. Aden Esusën nabanaid chuisho  
 tantiashun, ¿Tsudain nepec? Edodesën caquien,

Acten mentoanondaïd, Uan cuëmëdquid uincuempash icnui, quenubien;  
<sup>8</sup> Edias Nuquin Papan ambi chiaïd chuimiampid padpidec choapash icnui,  
 utsi-utsiec quenubien, Nuquin Papan chuimiampid utsi uincuenoapash  
 icnui, utsi-utsiec quecuededpanëdash, quequin chuipanëdash Esusën naban-  
 sho isun chuiquidon Edodes tantiamequin.

<sup>9</sup> Adoaquien: —Mambi uincuentiapimbocon Uan mapi budtemiondac.  
 ¿Tsudain ëmbi tantiacmaidquio adobanquid icpec? —quiashic Esus iste  
 bumpanëdash Edodes.

### *Matses dadpen pemiaid* (Mat 14.13-21; Mad 6.30-44; Uan 6.1-14)

<sup>10</sup> Adashic ambi nidmeboedo Esus yacno padpidec choapanëdash.  
 Choashumbic ambi nabamboedtedi chuibanpanëdash. Aden chuiban-  
 sho tantiash Esus abëd icquido bëyucanec shubu dadpen icquid Betsaida  
 caïd anoentsëqui nidpanëdash. <sup>11</sup> Aido nidsho isun cho-choquidon  
 tsibanampanëdash. Adsho isun Esusën Nuquin Papa yacno tabadaid  
 chuibanquimbi daicsaido bédamepanëdash.

<sup>12</sup> Adashic ushë budtsan Esusbëd icquidombo Esusën dayunquio choshon:  
 —Nëmbo shubu nibëdeque. Shubu utsi-utsiec yacno nidshun pete bedshun  
 pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.  
 Aden chiaquien: —¿Ma nëmbobi panëmpi mëdante auc abentsëdi icnubi  
 nuëcquid daëd iquec. Aïdtedtsëqui icsho isunda cho-choquidtedi pemenu-  
 quin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen tabadmepanëdash. <sup>16</sup> Aden tabadmesho isun panëmpi 5tedbëda nuëcquid daëd sananquin abuc isec: —Mibi bëdamocquid icquin mimbi meniaid nëid pete nec, Pàpa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

*Chuiquid dapa abentsëcquiobi iquec, quiaid*

*(Mat 16.13-19; Mad 8.27-29)*

<sup>18</sup> Adashic, matses nibëdacho abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

*Abi unëste chiaid*

*(Mat 16.20-28; Mad 8.30-9.1)*

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. <sup>22</sup> Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënkuido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaquido yec quec aiddedi ëbi chieshënkuido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmanc quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. <sup>24</sup> Cuesunenu cac unësmanc quiaish Esus tantiaquid nebi queboedi Esus tantiesa nebi quequid unësh Nuquin Papa yacno tabadenuio iquendac. Utsibo, Esus tantiaquid nebi, quiaishic abi cuesunuequid icnuc adecbidi Esus tantiaquid nebi, queoapec. Adquid unësh Nuquin Papa yacno tabadendac. <sup>25</sup> ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedted? Mimbi bedaidënkuido Nuquin Papa yacno puduedtiapimbo mibi iquec. <sup>26</sup> Esusbëdtabi ambi chiaid tantiaquid nebi nidaidënuësh queti-apimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. <sup>27</sup> Nad iquendac. Tantiapiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

*Esus bed-bedquesho istiapimbo yaid*

*(Mat 17.1-8; Mad 9.2-8)*

<sup>28</sup> Aden chiashic Esus mēdante utsiuc tauadoec ushash Nuquin Papa chiec onquenuc macuësh yacno nidoapanēdash. Petedo, Uan, Acobo aited buanec macuësh yacno Esus nidpanēdash. <sup>29</sup> Adec macuësh yacno nidash Nuquin Papa chiec Esus onquenubi aton bēshed aton dashcutebēdi nacnacquoio ushē chēnquiabimboec icpanēdash. <sup>30</sup> Adsho isnubien badedquoio dada utsi daēd choash adquiobidī Esusbēd nidec. Nēdic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. <sup>31</sup> Aid daēdi Esusbēd tabadquin Nuquin Papan tantiampicpadec Edusaden yacnoshon Esus unēs uate ushē chiec onquenedpanēdash. <sup>32</sup> Adnubien Esusbēd choboedo abēd icquido 3ted ushcasmash tabadtuidquin Esusbēd utsi daēd nac-nacquiocquid dasiuidacimboec bed-bedguesho isbededpanēdash. <sup>33</sup> Esusbēd daēd nidtuidsho isash Petedo nadpanēdash: —Nēmbobi iquec bēdambo iquebique. Nēmbobi mibi tabadmenun abentsēc chotsēc nuc shubumpi uanuna, Icho. Abentsēc mitsana, utsibic Moisesën na, utsibic Ediasën na, quequin shubu uanuna —quepanēdash Petedo.

<sup>34</sup> Adec Petedo onquenubien abu ushun isadenquiocnoc abitedi bētimpanēdash. Adsho isash Esusbēd choboedo dacuēdpanēdash.

<sup>35</sup> Adnubien abu ushunuësh onquec: —Nēdic ēbēd icte bunquidquoio, con madombo, ēmbi bēdamboen isaidquoio neque. Aidēn chiaidquoio tantiata —quepanēdash Nuquin Papa Esusbēd icquido tedestedshun isenquiocnobi.

<sup>36</sup> Adec onquiash ēnēdambi Esusuidtsēqui nidsho abēd icquidon ispanēdash. Adoshombic Esusbēd icquidon ambi isboed utsibo chienquiocpanēdash.

### *Mayan icsa dapuduedaid madompi* (*Mat 17.14-21; Mad 9.14-29*)

<sup>37</sup> Adashic badiadash macuësh dapa yacnoësh Esus budsho isash bēquedec matses dadpen cho-chopanēdash. <sup>38-39</sup> Cho-choash abentsēc nadpanēdash: —Con mado abentsēc icquid mayan icsa dapuduedash icsambo iccoshe. Isec chota. Aidēn bedto-bedtoac badedquoio sidquianesho aidēmbidi bedshun bēcunedeniac con mado ēcbacushaniosh. Dapuduenenquoio icquin con mado aidēn uimambo icmedeniosh. <sup>40</sup> Adsho isash choshon mibēd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquoio iccosh —quepanēdash dada abentsēc Esus caic.

<sup>41</sup> Adoaquien ambi nianaido caic Esus nadpanēdash: —Nadatiambocquid Nuquin Papa nec, quequin tantias mibitedi neque. ¿Tedectsi icshun ēmbi chiacpaden mimbi tantiabempe? ¿Mimbi tantienquiosho isash tedectsiashini chieshtope? —quetanquin: —Min mado bec cho —Esusën cac aton mado aton papan bēpanēdash. <sup>42</sup> Aden bēnubi mayan icsan bēcuniac madompi uēdēquiampanēdash.

Adsho isun: —Padi. Chēn —capanēdash mayan icsa chuiquin. Aden madompi bēdametanquin aton papa Esusën meneoapanēdash.

<sup>43</sup> Adsho isash: —Nuquin Papan nadatiambocquin naid uinsadpambo iquec —quenedpanēdash isquido.

### *Abi unēste chuioaid* (*Mat 17.22-23; Mad 9.30-32*)

<sup>44</sup> Adoaquien: —Chuinu. Bēpiscudenquiocquin tantiaquiota. Matsesacsho nēbi bedmendabi —quepanēdash Esus abi unēs uate chiec.

<sup>45</sup> Aden chuisho abēd icquidon tantienquiocpanēdash. Aden tantienquoio yec, Mimbi chiaid tantienquoio iquembi, quetiāpimbo yec otacquoio tabadquedpanēdash abēd icquido.

*¿Tsutsi chuiquid dapa icpec? quequin chiaid*

(Mat 18.1-5; Mad 9.33-37)

<sup>46</sup> Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onqueuededpanëdash. ¿Ëbida chuiquid dapa icpe? quec ambibi tantiequi adpanëdash.

<sup>47</sup> Adoquien Esus tantiaquidquio icquin bacuëmpi chomeshun aton dayunquio tabëcash: <sup>48</sup> —Chuiquid dapa icnu, guesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquëndac. Nuquin Papan chiapadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

*Abimbo tantiaquid ëbëd icquid nec quiaid*

(Mad 9.38-40)

<sup>49</sup> Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

<sup>50</sup> Adoquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

*Esus bunesabo, Samadia yacnocquido*

<sup>51</sup> Adashic Esus abi abuc indote ushë chote anoentsëqui yanan, Unësmanc quenquio yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

<sup>54</sup> Adoquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

<sup>55</sup> Adoquien: —Padicnuna. ¿Matses unësmenuectabi chodio? —quianec

<sup>56</sup> shubu daëdpactsëc yacno nidoapanëdash abëd icquidobëd.

*Esus tsibante bunquidën natequid*

(Mat 8.19-22)

<sup>57</sup> Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananc nidendabi —quepanëdash Esus databëdquid abentsëc.

<sup>58</sup> Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

<sup>59</sup> Adoshombic: —Ëbi tsibanta —Esusën caquien utsi:

—Con pa unëscasho chococashun mibi tsibanec nidendabi, Icho —quepanëdash.

<sup>60</sup> Adoquien: —Nuquin Papa yacno tabadno quequin unësaid chococquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

<sup>61</sup> Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

<sup>62</sup>—Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

## 10

### *Abi bëyucanec nidquid 72ted icquido* (*Mat 11.20-27; 13.16-17*)

<sup>1</sup> Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. <sup>2</sup> Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpacksëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. <sup>3</sup> Aden mimbi chiapaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. <sup>4</sup> Ëbi chuibenec nidanequin mitsana buanenda. Mitsana bedtequidbëdta shictoade buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. <sup>5</sup> Shubun puduedshun naden shubu icbo chuita: Nuquin Papabëd abi yacnoquido bëdamboec tabadacpadquiec ma nëid shubun icquido tabadpanuna. <sup>6</sup> Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquido iquendac. <sup>7</sup> Mibi yuedacnouidtsëqui tabadta. Adembidi, mibi yuedquidën meniaid peshun acta. Mibi chuibanaid cuidquin aidëmbi mibi menendac. Adoac anouidi tabadta.

<sup>8</sup> “Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup> Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. <sup>10</sup> Shubu dadpen yacno choshon mibi yuedquid nibëdsho isun aton podquedën nidquin naden chuita: <sup>11</sup> Nuquin Papan Chomiaid mibi chuineuc chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. <sup>12</sup> Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnoquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

<sup>13</sup> Aden ambi nidmetequid 72ted icquido chuibanshumbic utsibo isacimboben Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Bet-saida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid

ëntsempampic. <sup>14</sup> Aden Tido yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. <sup>15</sup> Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

<sup>16</sup> Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquio yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

<sup>17</sup> Adec nidanequin Esusën chiapaden nabeniashic, Bëdambo iquebi, quecudedec Esus yacno cho-choapanëdash. Adec cho-choash: —Mimbi chiapaden nabanombi. Aden nabanquimbic, Esusën nadatiambocquin naidënquio dapudenta ëmbi caidtedi mayan icsa dapuduemposh, Icbo —quecudedepanëdash ambi nidmiaido 72ted icquido ambi naboed Esus chuibanec.

<sup>18</sup> Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacbimboecnuc bedquetanacbimboec Satanas abucuësh badedquio paëdsho isec niobi.

<sup>19</sup> Ëmbi nadatiambocquin nabanacpadquid mibitedi icmëbanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiapadomboen nabanac mibi icsa uatiapimbo iquendac. <sup>20</sup> Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccudededquido caic.

<sup>23</sup> Aden iccudededquido chuibanshumbic naden ambi 72ted icquido nidmian choboedouidtsëqui Esusën chuiopanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon isti-pimbo icpampic. Adembidi, ambi chiaid Nuquin Papan chomiaid abi yacno

puduedmianquid chosho iste bunquin aidon ëbi istiapimbo icoapampic — quepanëdash Esus.

*Utsi tantiaquin bëdamboen naquidquio*

<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdäcpadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo ademvidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquo icsho isash Nuquin Papan chiacpadpenquidquid nepec, quequin iccuededquid utsibon ëbi chuitsiash quequin tantiahun Esusën chuimeboed: —¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. <sup>31</sup> Adoambi, cuestanquin nianaid uiacno podquedën choquin isadaïdbo tsusion, Con matses nenushe. Isnu, quenquiocquin uano datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin ademvidi uano datanoaposh. <sup>33</sup> Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin <sup>34</sup> aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. <sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. <sup>36</sup> Aden chuishumbic: —Ëmbi chuiboed utsi-utsec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

<sup>37</sup> Adoaquien: —Ampequidon cuestanquin nianaid istuidash unësquio yanguin abi nashumboedien con utsi nec, capendac —quepanëdash Esus chuimequid.

Adoaquien: —Ademvidi mimbemi ëmbi chuiboedbimboecnuc utsibo tantiaquin nashunoata —quepanëdash Esus.

*Madtan nabanubi Madian tantiaid*

<sup>38</sup> Adashic, Esusbëd nidequi abëd icquido shubu daëdpectsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. <sup>39</sup> Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. <sup>40</sup> Adec tsadquin Madian tantianubi Madtan ambi natiadquo yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

<sup>41</sup> Adoquien: —Mimbi natiadquo yaid dadpen tantiaquidquo mibi iqueque. <sup>42</sup> Èbi tantiaquidquo icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

## 11

### *Nuquin Papa chiec onquianete (Mat 6.9-15; 7.7-11)*

<sup>1</sup> Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

<sup>2</sup> Adoquien: —Nuquin Papabëd onquequin naden chuita:  
“Bëdamboquidquo mibi nec, Papa.

Adquid mibi icsho matstedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquo napashun, Papa.

<sup>3</sup> Tantiaquidquo, mibi cadoque. Bumianenguiocquin badiadquidën-badiadquidënquien con pete ëbi bedmedene, Papa.

<sup>4</sup> Adecbidi utsin ëbi chieshënsho cuidenquo yec ëbi abi icsaid bëpiscudacpadquiequi ëbi icsasho cuidenquo yec bëpiscudoata, Papa. Adembidi, Satanasën icsa uanushe queshun ëbi cudasquin dayun uata, Papa, quequin chuita”  
—quepanëdash Esus.

<sup>5</sup> Adtaneguc Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia?

<sup>6</sup> Inchëshpotsembo pete bedshunuec mibëd nashunanquid yacno nidash: ‘Èbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidi mibi meneoaimbi,’ quepatsiac mibi mibëd nashunanquid caic.

<sup>7</sup> “Adoquien, nuntanuëshi: ‘Padi. Shëcnandombi. Con bacuë ishcnec din ictoshon mibi menetiapimbo iquebi,’ quequin mibëd nashunanquidën mibi chuitsiash.

<sup>8</sup> “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquo. Mimbi nidenguiocquin chuidonesho tantiashun mimbi chuibodtedi mibi menepatsiash —quepanëdash Esus.

<sup>9-10</sup> Aden chiec abi onquec: —Adomboembidi Nuquin Papa chuidonesho mimbi bedtiadquo yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.



<sup>11</sup> “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? <sup>12</sup> Adembidi, ¿Cachinan bacuë bec cho, queshoda mimbi chichun menedi? <sup>13</sup> Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiaashun menenquioda mibi ictic? — quepanëdash Esus.

*Bedtsibun namiaid Esus nec, quequin chiaid*  
(Mat 12.22-30; Mad 3.19-27)

<sup>14</sup> Adashic, mayan icsa dapuduedquin eme uaid icsho Esusën istanquin: — Dapuduen —cac mayan icsa dapuduemanëdash. Adec dapuduenan ambi eme uaid onquepanëdash. Adsho isash tantiadempambo yec iccuedquid dadpen tabadcuededpanëdash. <sup>15</sup> Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshëquido.

<sup>16</sup> Adnubien iccuedquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuedquid utsibo Esus caic.

<sup>17</sup> Aden chuisho tantiaash tantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quiã nec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Sãtanã caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? <sup>19</sup> Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido quesho tantiaash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? <sup>20</sup> ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiaata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. <sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

<sup>23</sup> Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

*Abibi dapuduemboed mayan icsa dapuduedoaid*  
(Mat 12.43-45)

<sup>24</sup> Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduebocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. <sup>25</sup> Adec nidshun abi dapuduemboed naden istuidposh. Mayan icsa nidã, Ëbibi bëdambo iquec. Adash bëdambo tabadnu, abibi quiashic, Nuquin Papa tantianu,

quenquiocposh. Aden chienquiocsho aton Mayan Nuquin Papan aid mene-  
tiapimbo icnuc abi dapuduemboed choshon aid abentsëcquio <sup>26</sup> istuidashic  
nidoashun abipadquid chuituidac utsi 7ted abëdi choash abitedi dapudued-  
cuededac dada icsamboshë yamposh —quepanëdash Esus.

<sup>27</sup> Aden Esusën chiambien iccuededquid chido: —Mibi tishacsho shuma  
chishmiondaid Nuquin Papan bëdamboen isaid icpec —quepanëdash Esus  
caic.

<sup>28</sup> Adoaquien: —Aden nasho padenquio. Nuquin Papan chiaid tantiashun  
nabansho Nuquin Papan bëdamboen isaidquio nec —quepanëdash Esus chido  
caic.

*Onasën ismiampicpaden ismiaid*  
(*Mat 12.38-42; Mad 8.12*)

<sup>29</sup> Adnubien abi yacno cho-choash utsi dadpen iccuededsho isun Esusën  
nadopanëdash: —Nëbi nidaidën tabadquido icsanuequido yec Nuquin Papan  
abucshun nadatiambocquin naid iste mibi bunacpaden mimi isenquio  
iquendac. Nuquin Papan Onas ismiampicpaden ismiaid mimi isendac.

<sup>30</sup> Ninibe yacno nidshun ambocquido icsaid cuidte Nuquin Papan chuimi-  
acpaden Onasën comapenen chuisho tantiash, Abimbo chuiquid nec, queshun  
abi icsaid Ninibe yacnocquidon ëmbededpampic. <sup>31</sup> Utsibic, Nuquin Pa-  
pan dadpen tantiamiaid, Sadomon iquec quesho tantiash chuiquid dapa  
chido Sadomonën chiaid tantianuec ënapenuësh choshon tantiash, Abimbo  
iquec, quepampic. Nuquin Papan matsesën naid icsa ambi naid bëdabëdta  
chuibante ushë chonoc aid chidon tantiampicpadomboen Nuquin Papan  
chiaid abimbo iquec quequin mibitedishun tantienquiocsho Nuquin Papan  
mibi isendac. Nuquin Papan bëdamboen tantiaquin chuiquid dapa Sadomon  
icmepampic. Abitedi tantiampidquio nëmbobi iqueque. Ëmbi chiaid tanti-  
atiata. <sup>32</sup> Adembidi, matses icsaidbëdta ambi bëdamboen naid Nuquin Pa-  
pan chuibante ushë chonoc Ninibe yacnocquidon Onasën chiaid tantiac-  
padomboen Nuquin Papan chiaid abimbo iquec, quequin tantienquio icsho  
Nuquin Papan mibitedi isendac. Nuquin Papan chuimiac Onasën chuisho  
Ninibe yacnocquidon tantiabededpampic. Onas Nuquin Papan matses  
icsaid cuidte chuimiaidquio icpampic. Padnuen mibi icsaid bedshunash  
abided cuidatquid nëmbobi iqueque. Ëmbi chiaid tantiata —quepanëdash  
Esus abibi chiadequid.

*Tabote taboshon bëtashenquio yachimboec abi bëdamboec tabadaid ismequid*  
(*Mat 5.15; 6.22-23*)

<sup>33</sup> Aden chuishumbic Esusën abi chuibanec: —Tabote taboshon ompoesa.  
Adembidi matsun bëtashesambo icbo nec. Ma ëmbi yuedaidon isnueshun  
tabote nënantan nanquid. <sup>34</sup> Adoaidbimboec min tantiate iquec. Min  
tantiate bëdamocquid icquin bëdamboec tabadquin ismequid mibi nendac.  
Bëtashacimbocquid min tantiate icnuc icsamboen ismequid mibi nendac. <sup>35</sup> Con  
icbo ëbi bednuec choec queshun bëpiscudenquiocquin isted-istedta. <sup>36</sup> Min  
tantiate icsaisa icsho Nuquin Papan chiacpadomboen tantiaquidquio aidi  
nec, quequin utsibon mibi isendac —quepanëdash Esus.

*Nuquin Papan icsamboen isaidquio*  
(*Mat 23.1-26; Mad 12.28-40; Duc 20.45-47*)

<sup>37</sup> Aden Esusën chuibanshobien padiseyobo abentsëcshun: —¿Ada ëbi  
yacno pec nidtsia? —capanëdash. Adoac aibëdi nidash pete sanaid cuesto  
dayunquio Esus tsadbudpanëdash. <sup>38</sup> Adec Esus tsadsho isash, ¿Adpecshenda  
iquec. Penush mëpamëdenquio Esus icpec? quec abibi onquequin padisey-  
obon Esus yuedquidëmbi tantiaipanëdash.

<sup>39</sup> Adoaquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matsës uaqin dadabëdtabi tantiate uainquioda icpampic. <sup>41</sup> Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadesho isun Nuquin Papan min tantiatebëdta min dada bëdamboen isendac —quepanëdash Esus.

<sup>42</sup> Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matsës bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. <sup>43</sup> Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusio btsadacno mibi tsadtenec. Adomboembidi tantiec matsës iccuededacno nidequi, Èbi bëquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. <sup>44</sup> Adembidi, matsës unësaid chococate manenushe gueshun ismequin mabiunu, quenquio yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiembi, quiash utsibo tantiamequid abentsëc: —Padiseyobo chuiquin ëbipadquido mimbi chuoapec —quepanëdash.

<sup>46</sup> Adoaquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matsës mimbi namec. Adoac aitedë matsësën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

<sup>47</sup> “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiachimboen mimbi shubumpi uabanec. Èmbi shubumpi uaido isun utsibon bëdamboen ispashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiachimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec. <sup>49</sup> Èmbi chiacpaden chuibanta, cabicquin naden Nuquin Papan chuipampic. Èmbi chuimiaid utsiutsien aton matsësën mëyampec. Utsi-utsien mëyanshun cuesuneppec, quec Nuquin Papa abitedi tantiaquidquio adpampic. <sup>50</sup> Aden min tsusedpabon Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. <sup>51</sup> Tsusedpan abia abed

cuesunepampid icnubi ambi tsyuec Sacadias cuesunepampic. Aid Nuquin Papa tabadtë shubu uashunaïd dayunquïobi aidon cuesunepampic. Ai, Nuquin Papan chiaïd tantiesatedi ambi chuimiaindo cuesuniampidpadquïdo nëbi icquïd neoaic.

<sup>52</sup> “Nuquin Papan naden nata quequin chiaïd tantiembi, qeshun utsibo tantiamenquïocsho Nuquin Papan icsamboen isaido mibi nec. Nuquin Papan chiaïd tantienquïocquin abi yacno yuedanquïd tantiesa mibi nec. Adquïd iquec mibi abi yacno puduedtiapimbo iquec. Adquïd mibi icquin naden nata quequin chiaïduidi mimbï chiac utsibotsen abi yacno puduedmiantequïd tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaïduidi tantiaquïdo chiec.

<sup>53</sup> Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquïdombo padiseyobo: —Esus icsamboen chuimenu —quiampänëdash. <sup>54</sup> Adquïd icquin Esusën chuibanacno nidaneshun chuimeoanuequin naden padiseyobon tantiaipanëdash: Èbitedishun chuimiac Nuquin Papan chiaïd icsamboen Esusën chuïtsiash. Aden icsamboen chuïsho tantiash, Nuquin Papan chomi-aid nec, quec mibi muasho tantiashun, Unës uametiadquïo iquebi, quequin Esus chiembi, quequin tantiaquin Esus chuimepanëdash padiseyobon.

## 12

### *Natiamiantequïdbëdtabi dayacmetequïd (Mat 10.28-31)*

<sup>1</sup> Aden padiseyobon: Esus icsamboen chuimeoanembi, quequin tantianubien matses dadpenquïoshë Esus yacno cho-choash tsucus-tsucustsëcquïo yec tabadpanëdash. Aïdo tsucus-tsucustsëcquïo yec tabadnubien abëd icquïdo Esusën nadopanëdash: —Sicaïd nami uaid cabiunac amëec bidisque-  
doec matsesën isenquïocnobi. Adembidi padiseyobon Nuquin Papan naden nata quequin chiaïdbëdta ambibi tantiaipaden naden nata quequin dadpen chuioaic. Aden padiseyobon ambibi tantiaipaden naden nata quequin chuïsho, Nuquin Papan naden nata quequin chiaïdta nec, quequin Nuquin Papan chiaïd bëdamboen ista. <sup>2</sup> Matsesën ompoquin naid Nuquin Papan abitedi ismendac. Matsesën ompoquin chienquïo yaidbidi abitedi tantiamendac. <sup>3</sup> Inchëshën min nuntanuësh mibi icsamboec onquïaid Nuquin Papan matsestedï tantiamequin chuibanendac. Nuntanuësh shoshquequin mimbï chiaïd Nuquin Papan matsestedï tantiamenuen chuïoaindac.

<sup>4</sup> “Adembidi chuïnu. Tantiata. Mibi cuesunuequïd dacuëdënenda. Adquïdën mibi cuesunequin mibi nibëdametiapimbo iguendac. <sup>5</sup> Nuquin Papanuidtsëqui dacuëdënta. Icsadënequïd ichso aïdën mibi cuesunemeshun chian anëdënquequïd nësecaïndac. Adoanquïduïdtsëqui dacuëdënta. <sup>6</sup> Nuquin Papa tantiaquïd yec dacuëdënda. Nuquin Papan ambi uaidtedi tantiec. Padichucu dadpen icquïd abentsëc cueso isun aid Nuquin Papan tantiapec. ¿Adquïd tantiaquïda Nuquin Papan mibi tantienquïo ictic? <sup>7</sup> Ai, mibi tantiaquïec. Min manëdaïdtedi ambi tambanaïd nec. Aid pistsëcquïdtedi tantiaquïn Nuquin Papan mibi tantienquïoda ictic? Mibi comapenen tantiec.

### *Esus tantiaquïd nebi, quequin utsibon tantianubi chiaïd (Mat 10.32-33; 12.32; 10.19-20)*

<sup>8</sup> “Abi chiembique. Tantiacquïota. Utsibo icnubi Esus tantiaquïd nebi, quequin abimbo chuïquïd Nuquin Papa yacno chosho isun, Nëïd ëbi tantiaquïd neque. Puduedme, quequin chiendambi. <sup>9</sup> Adecbidi, utsibo icnubi, Esus tantiaquïd nebi, quetiapimbocquïd Nuquin Papa yacno chosho isun, Nëïd ëbi tantiesa neque. Puduedmenda, quequin Nuquin Papan uaido mayan

bëdabo chiendambi. <sup>10</sup> Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquo yac bimboec bëpiscudta, Papa, qesho tantiash aidën icsamboen chienquo yac bimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquo iquendac.

<sup>11</sup> “Adembidi chuinu. Tantiaquiota. Mibi chieshënkuido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiameque —quepanëdash Esus abëd icquido caic.

### *Aton na dadpen icquidën tantiaid icsa*

<sup>13</sup> Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

<sup>14</sup> Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. <sup>15</sup> Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquo mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icho nadposh: <sup>17</sup> ‘Con tiedën caniquid bacuë dadpen iqueque. ¿Atotsimbimbi aidtedi dayun uapeba? <sup>18</sup> Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquo con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquo iquec. Ad icnuc nainquo yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

<sup>20</sup> “Adec abibi onqesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

<sup>21</sup> Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unëdash Nuquin Papa yacno tabadtiapimbo iquec —quepanëdash Esus.

### *¿Atotsimbi napeba? quesa icta, quequin chiaid (Mat 6.25-34)*

<sup>22</sup> Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsimbi dasiuidpeba? quec dacuëdenda. <sup>23</sup> Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda.

<sup>24</sup> ¿Uicchunënda ambibi cuëte ëshë siac bacuëacsho chepadic? Padenquo. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papan padquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan?

<sup>25</sup> Adecbidi, ¿mibi unëste ushë abimbo chonoc, Padi, quepecta mibi icti?

Padenquoio. <sup>26</sup> Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquoio. Adoenquoio yaid aton bacuë ictequid bēdaidquoio iquec. Cuëtempi bacuë ictequid bēdaidquoio yacpadquid chuiquid dapa Sadomonën dashcute adquoio ictiapimbo icpampic. <sup>28</sup> Padnuen cuëte bacuë ictequid bēdaidquoio icboedi badedquoio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquoio ictsiash quequin Nuquin Papa bēdiactsēc tantienda. <sup>29</sup> Aden tantienquoio yec ¿Atotsimbi peshun aque? quec dacuëdenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquoio icquin pete actequidbēdta èbi bedmedonec, quequin tantiec tabadta. <sup>31</sup> Adembidi, Nuquin Papabēd tabadnu quequin tantiec tabadta. Aden tantiaquin mimbi bedtiadquoio yaid mimbi bedendac.

*Abi yacno choacsho meniaid*  
(Mat 6.19-21)

<sup>32</sup> “Nuquin Papan abi yacno mibi chomeque. Dacuëdenda, èbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibēdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidēn bedtemaidquoio iquendac. Capishton petemaidquoio aid iquendac. <sup>34</sup> Mimbi tantiaidquoio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanēdash Esus.

*Chieshenquiocquin caintequid*  
(Mat 24.45-51)

<sup>35-36</sup> Aden chuishumbic Esusën nadopanēdash: —Aton icbo u isec nidan con icbo chonoshe quiash dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bēdambo icmequin nadopec: “Èmbimbo mibi pemenu. Nēmbō tabadec cho,” qeshun ambi yuaido icbonquoio pemequin bēdambo icmendac. <sup>38</sup> Adembidi, icbo inchēshpotsembo choshon abi nashunuequin cainquido icsho icbon bēdambo icmiaido iquendac. Adembidi, cachina cuēdanabi badiadabicnuc choshon abi cainquido icbon bēdambo icmiaido iquendac. <sup>39</sup> Adquidpenquoio icbo utsi chuinu. Tantia. Aidi abi cainquid nibēdnubi aton na icnuc isedtanec choshon isac ampequid ènden nidac. Adsho isash, Ampequid choec, quequin tantiaquid yec nidenquoio ictsenobi, quependac icbo. <sup>40</sup> Adquiecbidi ampequid choachimboec Nuquin Icbo choeque. Ad icnuc, Chosho èmbibi tantienquiocchitomane qeshun chieshenquiocquin èbi cainta —capanēdash Esusën.

<sup>41</sup> Aden Esusën chuisho tantias Petedo: —¿Utsi chuiquin mibēd icquidoidi tantiamenuenda chio? ¿Abitedi tantiamenuenda chio? Tantienu. Èbi chui —quepanēdash Esus caic.

<sup>42</sup> Adoquien: —¿Icbon chiac mitsipadquiocquin ambi namiaido bēdamboen napeba? Adquid chuinu: Petē tambanshun musucshun èmbi namiaid utsifedi bēdamboen menebanta, quequin ambi namiaid utsi abentsēc chianec icbo nidac. <sup>43</sup> Adec nidashic choshon ambi chiacpaden ambi namiaidēn chieshenquiocquin nabanacsho isun icbon bēdambo icmiaid nendac. Adquid naden chuipic: Èbi nidan chieshenquiocquin

mimbi nabanogue. <sup>44</sup> Ëmbi namiaid utsibotedi ëbipadquiocquin chuiguid icta. Adquid icquin con natedi dayun uata, quequin chiendac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiosho isun aton icbon namiaid utsibo chieshënquin cuesbanshun ambentsëqui nua peshun tantienquio yanquin aquec. <sup>46</sup> Aden nabanquin tantienquiocnoc aton icbo choshon ambi namiaidën icsamboen cuesbañaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac. <sup>48</sup> Aton icbo bunaid tantiabicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquiao iquendac. Adembidi, icbon dadpen meniaidon dadpen meneoatiadquidi nëndac — quepanëdash Esus.

*Utsibëd bëdamboec tabadnu quesa icquin cuëshëdmequid  
(Mat 10.34-36)*

<sup>49</sup> Aden chiashic abi onquec: —Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi. <sup>50</sup> Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi. <sup>51</sup> ¿Nidaidënsnun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. <sup>53</sup> Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin, aton champi ëbi tantiaquid icnuc aton tita padenquio yec cuëshëdendac. Shubu utsin aton chaya ëbi tantiaquid icnuc aton babanën padenquio yec cuëshëdendac. Shubu utsin, aton babanën ëbi tantiaquid icnuc aton chaya padenquio yec cuëshëdendac —quepanëdash Esus. Abi tantiesa cuëshëdtequid chuibanec.

*Nuquin Papan ismiente isun nad iquendac, quequin tantiaid  
(Mat 16.1-4; Mad 8.11-13)*

<sup>54</sup> Aden abëd icquidombo chuishumbic Esusën naden iccuededquido chuoapanëdash: —Inchësh chosho isec, Ue choec, quiacpadec choec. <sup>55</sup> Adecbidi, ushë chënquec chosho isash, Chumbo yampec quiacpadec iquec. <sup>56</sup> Aden isquin mimbi ëmbi nidaidënsnun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquiao icquin çatotsiashun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

*Utsibëd chushcananquid  
(Mat 5.25-26)*

<sup>57</sup> Aden chiashic: —Utsibëd chushcananquido mibi nec. Adec tabadec çatotsi quiash, Naden natiadquidi nebi, quequin tantiasnun mibi icsaid ënenquio ique? <sup>58</sup> Utsi icsambocquin mimbi nadenec. Adsho isun matses cuidte chuiguid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquid icsho matses cuidte chuiguid yacno buanshun mibi icsaid chiac matses

cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. <sup>59</sup> Aden nauedaqui mimbi icsamboen naboed cuidnante meniabicnuc quënë yacnoësh mibi puduenti-apimbo iquendac —quepanëdash Esus.

## 13

### *Utsibo unësmiacpadec unësmemane quequin mibi icsaid ënta caid*

<sup>1</sup> Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiaashun iccuededquid utsibo: —Chuinu. Tantia. Cadidia yacnocquidon Nuquin Papan chiäcpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaiðen intacbëd daëdash chididiquiosh, quequin chuipañëdash. Aid chiaid tantiaashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

<sup>2</sup> Adoaquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemiash, quequinda mimbi tantiape? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. <sup>4</sup> Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaïd uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiape? <sup>5</sup> Mimbi icsamboen tantieque. Utsibo unëscapadec unësmemane quequin mibitedishun mibi icsaid ënta —capanëdash Esusën abi chuimeboedo chuiquin.

<sup>6</sup> Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choidobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

<sup>8</sup> “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaïd chëshë chodquiaïd ëbi bëdamboen tasiameta. Adoac bacuëtsiash. <sup>9</sup> Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh — quepanëdash Esus. Ëmbi tantiacpadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

### *Cashuebudaïd bëdamiaïd*

<sup>10</sup> Adashic, chonoadtemaïd ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien <sup>11</sup> seta dadpen 18tedi matamequin mayan icsan shuabudaïd icpanëdash. <sup>12</sup> Adquid icsho isun Esusën: —Shuabudaïd icboedi nëbi cacueoaid mibi iquendac, chido —cashun <sup>13</sup> mishac cacuiash, Nuquin Papan nadatiambocquin naid nec, quequin chiec chido onquepanëdash.

<sup>14</sup> Aden chonoadtemaïd ushën Esusën chido bëdamesho isun Nuquin Papan chiaïd chuibante shubu isquidon: —Nëid ushë chonoadtemaïd ushë neque. Bëdamenu quequin nëid ushënquo bëdamenda. Chonoadtequid ushënquo bëdameta —capanëdash iccuededquido chuiquin.



<sup>15</sup> Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaid tēneshacchobi acte yacno buanenquioda mimbi icpe? <sup>16</sup> ¿Aden chonoadtemaid ushën mimbi min yua acmenuc nēid ushëmbidi chido, min matses Abadauanēn tsyuecquid, dadpen seta matamequin Satanasën yuaid icsho mēnchiqenquiodambi icpe? —quepanēdash Esus nēid ushën bēdamenda quequido tantiamequin chiec.

<sup>17</sup> Aden Esusën chuisho tantiash, Adenda, quequin bēdamboen chiombi, quetiapimbo yec otacquoio tabadcuedednubi utsibotedi, Esusën nadatiambocquin naidtedi bēdambo iquec, quec bēdambo yec tabadpanēdash.

*Cuēte ēshēmpi chiaid*

(*Mat 13.31-32; Mad 4.30-32*)

<sup>18</sup> Adashic: —¿Nuquin Papan shubun icquido mitsipadquidquoio icpec? <sup>19</sup> Nadquidquoio iqueque. Chuinu. Tantia. Icbon cuēte ēshë pistsēcquiocquid mostasa caid nēsecaid dēyucash nuamboshë caniec. Aid cuēte caniaidēn cuidin podochoquidēn shubu uabededec. Adquiecbidi, Nuquin Papan chiaid chuisho tantiatsēcquidēn tantiabenash bēdamboquid icsho isash matses utsibo ēbi tantiaquid Nuquin Papan shubun icquido dadpen yanec —quepanēdash Esus.

*Sicaid nami uaidpadquid*

(*Mat 13.31-33*)

<sup>20</sup> Aden chuishumbic utsitsen chuioaic: —¿Nuquin Papan shubun icquido mitsipadquidquoio icpec? <sup>21</sup> Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amēec bidisquedoec. Adomboembidi ēmbi chiaid ēbi tantiaquidēn chuibanac ēbi tantiaquid dadpen yanec utsibon isenquiocnobi —quepanēdash Esus.

*Pudued-puduedtequid shēcuē pistsēcquoio chiaid*

(*Mat 7.13-14, 21-23*)

<sup>22</sup> Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daēdpactsēcquid utsi-utsiec yacnotsen isbidanoquin anocquidotsen tantiamenuen chuibenenu, quec Esus nidpanēdash. <sup>23</sup> Adec nidsho isun iccuededquid abentsēcshun nadopanēdash: —¿Nuquin Papa yacno matses daēdpactsēcta nidpec? Tantanu. Ēbi chui.

Adoaquien Esusën nadopanēdash: <sup>24</sup> —Nuquin Papa yacno pudued-puduedtequid shēcuē pistsēcquoio iquendac. Esusquino tantiec aidēmpinquoio mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, <sup>25</sup> Nuquin Icbon, Ēbi yacno puduedte ushë naimbudosh, caqui cho-choshon, Ēbi puduedme, quequin comapenen cuēmbededpec.

“Adoaquien: ‘Ēbēd icquidpenquoio mibi neque. Mibi puduedmetiapimbo iquebique. Mibēd icquido yacno nidtan,’ caindac Nuquin Icbon adquid.

<sup>26</sup> “Adoaquien: ‘Mibēdtambi peshun acbededombi. Ēbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

<sup>27</sup> “Adoaquien: ‘Icsaquido mibi neque. Nēmbō puduedenda,’ quepec Icho. <sup>28</sup> Aden chiaqui Abadauan yec Isac yec Acobo yec quec Nuquin Papan chuimiaoio aidtedi Nuquin Icho yacno tabadsho isash abi tantiesā adtiapimbo yec chian anēdēnquiagno tabadec shubiquiec, Nuquin Papa icsambo iquec, quec nēishpec. <sup>29</sup> Nuquin Papa yacno abi tantiesā puduedtiapimbocnobien nidaidtedi yacnoēsh utsibo dadpen cho-choshon Nuquin Papan abia

yuedaidobëdtan tsyuec choquidon peshun aquendac. <sup>30</sup> Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

*Edusaden isash anocquido Esus unësqiotequid*  
(Mat 23.37-39)

<sup>31</sup> Aden Esusën chuibanquin naimbudnubien padiseyobo utsi-utsiec choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

<sup>32</sup> Adoquien: —Edodes cuesunemenuecbimboec onquequidquo nec. Aid yacno nidshun naden chuita. Nëbi mayan icsa dapudumequin ut-sibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquier adomboembidi nabanoaimbi. Adobanquimbi naimbudembi. <sup>33</sup> Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimaido cuesunequido mibi nec. Adem-bidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshënuquid choec, qeshun nua shocotsëcshun aton bacuë cudasquin mabësec aton podon. Adembidi: Mibi chieshënuquid choec, qeshun mibi cudasquin chuibanombi. Aden chuisho tantiatipimbo yec mibi tabadpoc. <sup>35</sup> Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshë nec cuesunenuequido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquido nec, quequin tantienquicoëdëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

## 14

*Padiseyobon shubun Esus puduedash tabadaid*

<sup>1</sup> Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun is-nuequid padiseyobo utsibo tabadquin caimbededpanëdash. <sup>2</sup> Aden caimbedednubien podon nide chedo bidisquaiid uano tsadsho isun Esusën: <sup>3</sup> —¿Chonoadtemaid ushën daicsambocquid bëdamenquicoete ushë nec, quequinda mimbi tantiap? —caquien <sup>4</sup> abi caimbededquido otacquo tabadcu-edpanëdash. Adec aido otacquo tabadcuenednubien podon nide chedo bidisquaiid dada Esusën bedshun bëdameshun: —Nidec nid —cac bëdambo yec nidpanëdash.

<sup>5</sup> Aden aid nidmeshun abi bëdamenushe quequin caimbededquido caic: —¿Chonoadtemaid ushën nua uedëshcaidën min baca ampaëdacsho isun bad-edquido bedtanquin indoenquioda mimbi ictsia? —quepanëdash Esus. <sup>6</sup> Aden chuisho tantias adquobidi otacquo tabadcuenedpanëdash.

<sup>7</sup> Adashic, tsusiobon dayunquio tsadsho isash, Chuiquid dapa nec, ut-sibo quetsias, quec padiseyobo cho-choec, quequin tantiasshun Esusën nadopanëdash: <sup>8</sup> —Pec cho, cac choshon tsadte bëtinennda. Tsadte mimbi bëtinambien shubu icbon ambi pec cho caid utsi mibi chuiquid tsusio chosho

9 isun: “Chuiquid dapa choeque. Uano tabadad,” icbon cac icsamboen naombi quiash natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. <sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

<sup>12</sup> Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidouidi pec cho cainda. Aido pemiac, mibi pec cho caoaic. <sup>13</sup> Pemenu, quequin aton na nibëdquido, daicsaidobëdta bëshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

### *Nuquin Papa yacnoshon pequido*

<sup>15</sup> Aden Esusën chuisho tantias abëdta pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

<sup>16</sup> Adoquien aidi tantiamenuen utsi chiacbimboec Esus nadpanëdash: —Yuednu, quequin nadënuquo pec chota, quequin ambi yuedtequid dadpen chuiposh. <sup>17</sup> Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. <sup>18</sup> Adec nidshun chuituidaquien: ‘Nidtiapimbo iquebi,’ queposh abitedi. Abia chuituida abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

<sup>19</sup> “Utsibic: ‘Baca bedshun, Bëdamboen nimbanquinda buaneque. Isnu,’ queshun isedtanenquiocquin ambi bedboed nimbameposh.

<sup>20</sup> “Utsibic: ‘Con chido bedombique. Nidenquo iquebi,’ queposh.

<sup>21</sup> “Aden chuisho tantias nidshun aidon chiacpaden aton yuan icho chuioposh. Adsho tantias nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

<sup>22</sup> “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

<sup>23</sup> “Adoquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquo yec ma adquido tabadpanuna.

<sup>24</sup> Abia ëmbi pec cho caidon ëbëdtambi petiapimbo iquendac,’ queposh icho —quepanëdash Esus.

### *Esuspadquo ictequidquo*

<sup>25</sup> Adashic, nidsho matses dadpenshun tsibanac abi choacmi bidiadshun isec Esus nadpanëdash: <sup>26</sup> —Ëbipadquo icnequid aton papabëduidi icquid iquec ëbipadquo ictiapimbo iquec. Adecbidi, aton titabëduidi icquid iquec ëbipadquo ictiapimbo icoaic. Adecbidi, aton chidobëduidi icquid iquec ëbipadquo ictiapimbo icoaic. Adecbidi aton bacuëbobëduidi icquid iquec ëbipadquo ictiapimbo icoaic. Adecbidi, aton utsibobëduidi icquid iquec ëbipadquo ictiapimbo icoaic. <sup>27</sup> Unësmanc quish mëyanac dayactiapimbocquid ëbipadquo ictiapimbo icoaindac —quepanëdash Esus.

<sup>28</sup> Aden chiec Esus abi onquec: —¿Shubu uanu, queshun abia shubu uaid isec, Nëidtenquo nanu, queshun aitedtequibidi bëshun toccashun shubu uainquioda icpec? <sup>29</sup> Aden tantienquiocquidën abentse-abentsen bëbëtsëcquin baded naintiapimbo iquec. <sup>30</sup> Adsho isun utsibon mamëshumpec.

Bëdamboen isun shubu uaquidpadquid, Esuspadquio icnu, queshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

<sup>31</sup> “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. <sup>32</sup> Padnuen, abëd icquido dayactiapimbo icsho isun chuiquidën: Chuiquid utsi bëqued tanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh.

<sup>33</sup> Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiapadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananguido chiec.

*Sa batapentsëcquiocquid  
(Mat 5.13; Mad 9.50)*

<sup>34</sup> Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? <sup>35</sup> Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tiantianu, qeshun tantiapadomboen nabanta —quepanëdash Esus.

## 15

*Obeca abentsëc bënudtequid  
(Mat 18.10-14)*

<sup>1</sup> Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tiantianu, quiash Esus datsidadpanëdash. <sup>2</sup> Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidoëdtambi peshun Esusën aquec, quec abibi onquecuedepanëdash.

<sup>3</sup> Adoaquien, tantiaquidquio iquec Esus: <sup>4</sup> —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibë nec nidenquioda mibi icpe? <sup>5</sup> Aidi nibë nquin istuidash, Con obeca istuidbosh bëdambo iquebi, qeshun chiadquin buanec icbo nidec. <sup>6</sup> Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin ichon chuipec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd badquido bëdambohë iquebi, quecuedependac —quepanëdash Esus.

*Aton na bedtequid bënudtequid*

<sup>8</sup> Aden ichon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? <sup>9</sup> Ai. Aden nibë nquin istuidshun abëd icquido chomeshun: ‘Con shocoshëmpi abentsëc niadacboedi nibë nquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

### *Aton mado cuëshëdquid*

11 Aden chido chiashic utsi chiacbimboec Esus nadpanëdash: —Aton mado daëd icnubi <sup>12</sup> tsyuec tishaid aton papa caic: ‘Tsusio budquin mimbi chiondacadpen nëbi ëbi aïdted meneta, papa,’ quepondash. Adoac aton na musucshun aton mado abi daëdi menebampondash.

13 ‘Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. <sup>14</sup> Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuedeppondash. <sup>15</sup> Adec bundoquieci abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmeppondash. <sup>16</sup> Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

17 ‘Adec natiambo bunec tabadquin aton papa ambi nianondaïdbëdta abi icsaid utsitedi tantieci abibi onquec nadpondash: ‘Con pan namiaïdon pete dadpen icnubi con na nibëdnuc unëspebi. <sup>18</sup> Nëbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique. <sup>19</sup> Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiembi, <sup>20</sup> abibi quianec aton papa yacno nidoapondash. Adec nidec ancuenquio yacno aton mado nidondaïd casenash chosho isash unësqiocnoc aton mado bëquedquin dayumbudshun shubi uatanquin aton papan tanchoccapondash. <sup>21</sup> Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

22 ‘Aden chiaquien bëdambo yanshun ambi namiaïdombo naden aton papan chuipondash: ‘Con mado ënden nidondaïd choaoshe. Dasiuidte bëdaïdquio bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. <sup>23</sup> Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. <sup>24</sup> Con mado unësbimboecboedi nëbi ëbëdi tabadoaic. Aidi bënudacbimboecboedi nëbi istuidacbimboec choash iquec,’ cac bacan bacuë cuesuneshun codocacsho pebedeppondash.

25 ‘Adnubien bëyuc tishaid tied nantan icpondash. Auëshquio nidec shubu anoentsëqui choquin tentenate cuëdëmec matses cuëdënsho tantiatuidpondash. <sup>26</sup> Aden tantiatuidashien aton papan namiaïd istuidash: ‘¿Atotsi naic nec?’ quepondash bëyuc tishaid.

27 ‘Adoaquien: ‘Min utsi ënden nidondaïd choaposh. Aidi chosho isash unësqiocquin nuquitedi bëdamboec tabadquin pemenuequin aton bacan bacuë nuacquid dapa papan cuesunemiosh,’ cac <sup>28</sup> bëyuc tishaid nëishash shubun puduedenquio icpondash.

‘Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobëd bëdambo icnuec cho, mado,’ capondash aton papan. <sup>29</sup> Adoaquien: ‘Seta dadpen matamequin mimbi chiacpadomboen nabante-niombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. <sup>30</sup> Nëbi mimbi meniaïdtedi naimbudquinc, chido dada dadpen chudmequic chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

<sup>31</sup> “Adoaquien: ‘Mado, ëbëd icquid mibi nec. Adquid icnuc con natedi mitsana neyoc. <sup>32</sup> Min utsi unësacimboeçoedi nëbi choash tabadoaic. Aidi bënudacimboeçoedi nëbi istuidaid nec,’ quequin aton papan choboedën buchi chuipondash —quepanëdash Esus.

## 16

### *Icbon na icsamboen isquid*

<sup>1</sup> Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. <sup>2</sup> Adoac, ambi con na ista caid chomias icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ðËmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,’ queposh icbo.

<sup>3</sup> “Aden chiac icbon na isquid otacquio onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. <sup>4</sup> Naden natsi-ambi. Con icbon na meniondaid abitedi cuidmenquio yac ëbi yuedtsiash,’ queposh.

<sup>5</sup> “Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuiden-quiocpaccoc?’ caquien:

<sup>6</sup> “ ‘Bëchi shocosh nuacquid dapan cushtoaid 15tedi bedshun cuidamboc-combi,’ queposh.

“Adoaquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

<sup>7</sup> “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aiteded bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

<sup>8-9</sup> “Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meni-aidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

<sup>10</sup> Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. <sup>11</sup> Adembidi mimbi nidaidëshun bedquin mimbi icsamboen nabansho isun, ¿Ëbi tantiaquid bëdamboen ista, quequinda Nuquin Papan mibi chuipeba? Padenquio iquec. <sup>12</sup> Adembidi, ¿utsin na isquin bëdamboen nashunenquio icsho isun abi yacno chosho isun mibi menependa ictic? Padenquio.

13 “Adechbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec — quepanëdash Esus.

14 Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. 15 Adec tabadsho isun Esusën: — Bëdamboen nashumbimboen ismequido mibitedi icsho mimbi ompoquin naidtedi Nuquin Papan asquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

16 “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadece puduedte bunec. 17 Abubëd nidaid ënëdtequid icnuc Nuquin Papan naden nata quequin chiaid ënëdiapimbo iquendac.

*Aton chido nianquid*  
(*Mat 19.1-12; Mad 10.1-12*)

18 “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic — quepanëdash Esus.

*Aton na dadpen icquid icnubien aton na nibëdquid*

19 Adequi onquequimbi utsi chiacbimboen Esusën naden chuipanëdash: — Dada, aton na dadpen icquid bëdaidquio dasiuidquidën badiadquidën badiadquidënquien nua peshun acposh. 20 Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. 21 Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

22 “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi 23 chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. 24 Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebuduquin ëbi ëcpanun Dasado acte bëme, papa,’ caposh.

25 “Adoquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. 26 Adboedi, uguëmbo mibi iquec cuëma utsiuc potetemaid icnuc nëuëshquio nidiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiquid.

27 “Adoquien: ‘Ëbi yacno potetemaid icnuc con pan shubu yacno Dasado nidme. 28 Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe queshun Dasado aido chuimetanta, papa,’ queposh aton na dadpen icboed.

29 “Adoquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanën chuiquid.

<sup>30</sup> “Adoaquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

<sup>31</sup> “Adoaquien: ‘Padicnuna. Nuquin Papa tantiesa icquin uincuemaiidën chiaid min utsibon tantienquio icpatsiash,’ caposh Abadauanën aton na dadpen icboed chuiquin — quepanëdash Esus.

## 17

*Mates icsaid chiaid, ambi Esus tantiaid chiaid, ambi natequid chiaid (Mat 18.6-7, 21-22; Mad 9.42)*

<sup>1</sup> Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. <sup>2</sup> Adquid ëbi tantiabenabicquid icsa uanabicsho cuënote yuëmboequid têtanetanquin acte shodomboshë yacno nënepatecnëdan. <sup>3</sup> Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimi cac: ‘Ai, icsaobique. Ënëdnuna,’ qesho tantiash aidi icsainquio yacimboc bëpiscudta.

<sup>4</sup> Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquio yacimboc bëpiscudoata — capanëdash Esusën abëd icquido chuiquin.

<sup>5</sup> Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo — capanëdash abëd icquidon Esus chuiquin.

<sup>6</sup> Adoaquien: —Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimi bëdiactëc tantiapëc. Aden bëdiactëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtempi caic, Cuëte mananuc tabadboedi adquecbidi acte nantan tabadoata, quequin mimi chiacpadec acte nantantsen abi tabadacpadebidi tabadoaindac — quepanëdash Esus.

<sup>7</sup> Aden chiashic Esus abi onquec: —¿Min yua mimi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquina mimi icpe? <sup>8</sup> Padenquio. “Con pete codocashun ëbi pemeshun acte menetanquin mimbisen peshun acta,” mimi caic. <sup>9</sup> Aden mimi chiac mimi chuiboedtedictëqui nabanquin mimi yuaidën naimbudec. Aden naimbudsho isash: “¿Bëdamboen mimi naoc,” quecta mimi icpe?

<sup>10</sup> Padenquio. Ambembi nainquio iccosh. Mimi chiacpaden min yuan nabanosh. Adembidi Nuquin Papan chuiboedtedictëqui nabanash Nuquin Icho caic: “Mimi chuiboedtedi nabampombi. Mimi namiaid icquin ëmbi naboed ëmbi natequiduidi napombi,” quequin mimi chuite nendac — quepanëdash Esus.

*Daushumbocquido bëdamiaid*

<sup>11</sup> Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec <sup>12</sup> shubu daëdpactëc yacno Esus chopanëdash. Ambo choshobien daushumbocquidon 10tedishun Esus bëquedtuïdpanëdash. <sup>13</sup> Adquido yec uano tabadquin: —Ëbitedi bëdamboen tantiaquin nadatiambocquin naban, icbo — cabededpanëdash comapenen cuëntquin.



14 Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bédambudnepanëdash.

15 Adoac bédamboed abentsëc dëbidiadanec Nuquin Papan naid chiec onquec choaic 16 Esusën taëno tsadbudash: —Mimbi bédameboc bédambo iquebi —quepanëdash Esus caic. Aidi Samadia yacnocquid isadaidpembo nepanëdash.

17 Adoaquien: —¿Diestededambi bédamepo? —quepanëdash Esus dëbidiadanec choboed caic. 18 Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bédamboed utsibo isadaidbo icquimbi Nuquin Papan naid chienquo icpec —quepanëdash Esus. 19 Aden chuishumbic: —Mimbi tantiacpadequi mibi bédanoque. Nidtoanec nid —capanëdash Esusën daushumbo icboedi chuiquin.

*Chuiquid dapabëd bédamboec tabadte chote ushë*  
(Mat 24.23-28, 36-41)

20 Adshumbic: —¿Chuiquid dapa abentsëcbëd bédamboec tabadte ushë choaid mitsipadënquo nuqui ispeque? Tantanu. Ëbi chui —capanëdash padiseyobon Esus chuiquin.

Adoaquien: —Chuiquid dapabëd bédamboec tabadte ushë chote ismete nibëdendac. 21 Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

22 Aden padiseyobo chuishumbic abëd icquido Esusën nadopanëdash: —Yuecash natiamantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquo mimbi iquendac. 23 Adec ëbi iste bunubien: “Bédamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. 24 Nuquin Papa yacno bédamboec tabadte ushë chonoc abu bedquetani-acbimboec uëshëmbo chënquec ëbi chosho abitedishun isbedendac. 25 Aid ushë choabicnuc ëbi natiametequid iquendac. Adembidi, chuiquid dapa naid cainquiocquin ëbi isadaidbon chieshëmbededec —quepanëdash Esus.

26 Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacpadomboen ëbi choate ushë icnuc adem-bidi matsesën tantiadenepec. 27 Naderc tabadpampic: Nuquin Papan chiaid tantiesia cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

28 Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesia iquec abi bunaiduidtsëqui tantiaquid icoapampic. Nidaidën tabadaiduidquo tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. 29 Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec

sequequidën Sodoma yacnoquidtedi Nuquin Papan chiaid tantiesabo unës uabunepampic —quepanëdash Esus.

<sup>30</sup> Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. <sup>31</sup> Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc äid ushë chosho isash shubu yacno mitsana bednuec nidenquo yec badedquo cuenta. <sup>32</sup> Mibi yacnoquidtedi unës uanushe bidadshun isenquo yec cuenta, cac Dod cuenubien aton na tantiec aton chido auchbidi bidiadsho unës uampidpadquid iquenda. <sup>33</sup> Unësmene queshun ambi tantiacpadecec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. <sup>34</sup> Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

<sup>37</sup> Aden chuisho bëdamboen tantienquiocquin abëd icquidon: —¿Mitsimbo budpec, icbo? —capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

## 18

### *Cadonequidquo chido chiaid*

<sup>1</sup> Adashic, Èbëd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanëdash: <sup>2</sup>—Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. <sup>3</sup> Adnubien uano tabadquid niantie chido icposh. Aidi icsambocquid cuidte chuiquid yacno nidshun: ‘Ëbi icsamboen naquid ma cuidnu chuiquiota,’ quequin chuioposh. Aden chiaqui padenquiocsho isash choded-chodedquin adomboenuidi chuided-chuidedposh.

<sup>4</sup> “Aden chuidoniaqui abi icsambocquin naquid cuidte chienquiocboedëmbi chido ënëdenquo yec <sup>5</sup> choded-chodedquin adomboembidi chuiasho tantiasun: ‘Nuquin Papabëdta matses tantiesa nebi, quequimbi niantie ënëdenquo yec chodednesho isun uimabudmane queshun abi icsamboen naquid cuidte chuiquiono,’ queshun cuidte chuiquidën chuiquioposh.

<sup>6</sup> Aden chiashic Esus: —Choded-chodedquin chidon chuiasho tantiasun: “Mibi icsamboen naquid cuidte chuinu,” quepoch icsambocquid cuidte chuiquid. <sup>7</sup> ¿Adomboembidi ambi cuënaidon, Ëbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquiocquin choshon cuidendac. Badedquo cuidenquiocsho isash choquin ¿tedectshumbimbi ëbi tantiaquin caimbudnequido istuidpendac? —quepanëdash Esus.

*Padiseyobo abentsëc icnuc ancanquidën utsin na bedtequid bedmianiaid chiaid*

<sup>9</sup> Adashic, bēdamboquid nebi, quish utsitedi icsambo iquec, quequido tantiamenuen adquidēn tantiaid icsa chuiquin Esusēn nadopanēdash: <sup>10</sup> —Nuquin Papa tabadte shubu uashunaid yacno Nuquin Papa chiec onquenuc nidnuequid daēd icposh. Abentsēc padiseyobo icnubi ancanquidēn utsin na bedmianiaid utsi icposh. <sup>11</sup> Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bēdamboquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidēn utsin na bedtequid bedmianiaidpadquidpenquo nebi, Papa. <sup>12</sup> Adembidi, chonoadtemaid ushē yambi chonoadtemaid ushē utsi choabicnuc daēdec ushquin mibi tantiaquin buna mēmundenembi. Adembidi, uno bedanquin dies yacno cuēscaquin con na tambanshun 9ted dayun uaquin abentsēc mibi mēdenembi, Papa, quequin padiseyobon chuiposh.

<sup>13</sup> “Aden padiseyobon uanoshon chuinubien ancanquidēn utsin na bedtequid bedmianiaid puduedash nidtuidash: ‘Icsamboquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquo yec abi onquec: ‘Icsamboquin nabanquid nebique. Ēbi tantiaquin pauc, Papa,’ queposh —quepanēdash Esus.

<sup>14</sup> Aden chiasic: —Chuinu. Tantia. Ancanquidēn utsin na bedtequid bedmianiaid Nuquin Papan bēdamboen isaidquio icnubien padiseyobo ambi icsamboen isaidquio icposh. Icsaisa yacimboec, Bēdamboquid nebi, quequid yuecshun Nuquin Papan aidēn icsamboen tantiaid ismequin chien-dac. Padnuen, icsamboquid nebi, quequin tantiaquid yuecshun ambi bēdamboen naid Nuquin Papan ismequin chuiaindac —quepanēdash Esus.

*Bacuēbo Esus yacno bē-bēaid  
(Mat 19.13-14; Mad 10.13-16)*

<sup>15</sup> Adshumbic, aton bacuēbo Esus mishmenuequin utsin-utsinquien bē-bēsho isun: —Bacuēbo bē-bēenda. Esusēn nabanaid utsi iqueque. Nidanec nid —capanēdash Esusbēd icquidon.

<sup>16</sup> Aden chuisho tantiaish Esus nadpanēdash: —Bacuēbo nidmenquiocquin con dayunquo cho-chome. Chiac, Abimbo caic, quequin tantiaquidquio bacuēbo nec. <sup>17</sup> Adomboembidi, Nuquin Papa yacno tabadte iquec, quequin chiac bacuēbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanēdash Esus.

*Nēbi caniquid chuiquidēn chiaid  
(Mat 19.16-30; Mad 10.17-31)*

<sup>18</sup> Adshumbic, nēbi chuiquid caniquidēn: —Nuquin Papa yacno nidnuequin ¿atotsimbi nape? Bēdamboen tantiaquidquio icquin ēbi chui. Tantianu —capanēdash Esus chuiquin.

<sup>19</sup> Adoaquien: —¿Mitsipaden tantiec bēdamboquid nec, quepe mibi? Nuquin Papauidtsēqui bēdamboquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbēda titan chiaid tantiaquin nabanta,” quequin chiampid mimbi tantiapec —capanēdash Esusēn nēbi chuiquid caniquid chuiquin.

<sup>21</sup> Adoaquien: —Canidotsēcquimbi aden nadeniondambi —quepanēdash nēbi caniquid.

<sup>22</sup> Aden chuisho tantiaish: —Abentsēc mimbi nabicquid iqueque. Mitsanatedi menequin bedtequid bedbanshun aton na nibēdquid menebanta.

Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

<sup>23</sup> Aden Esusën chuisho tantiash aton na dadpen tantiec unësquio yanshun Esusën chiapaden natiapimbo icpanëdash. <sup>24</sup> Adsho isun: —Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac.

<sup>25</sup> Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamiac puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

<sup>26</sup> Aden chuisho tantiash iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

<sup>27</sup> Adoaquien: —Matses ambibi tantiacpadeq puduedtiapimbocnoc Nuquin Papambien abi yacno yuedanquid matses tantiamendac —quepanëdash Esus.

<sup>28</sup> Adoaquien Petedo: —Mibëd icnu, quequin ëbëd icquidbëdtan con natedi nianondambi, icbo —quepanëdash Esus caic.

<sup>29</sup> Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdambohë icmiaid mibi iquendac —quepanëdash Esus Petedo chiec.

*Ëbi unës uaindac, quequin Esusën chiaid*  
(Mat 20.17-19; Mad 10.32-34)

<sup>31</sup> Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. <sup>32</sup> Anoshon bedshun buanshun isadaidbon isadaidpembo ëbi menendac. Aden meniäc bedshun ëbi mamënsumbedequimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuenstendectanquin unës uaindac. <sup>33</sup> Adoaqui daëdec ushtanec uincuenendabi —quepanëdash Esus abëd icquido chiec.

<sup>34</sup> Aden abi unëste Esusën chuisho abëd icquidon bëdamboen tantienquio yec tabadpanëdash.

*Bëshuaid bëdamiaid*  
(Mat 20.29-34; Mad 10.46-52)

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

<sup>36</sup> Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. <sup>37</sup> Adoaquien choquid abentsëc: —Nasaded yacnoësh choquid Esus cuenec nec —quepanëdash.

<sup>38</sup> Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

<sup>39</sup> Adshobien: —Adec cuëdenquio yec tsad —capanëdash choquidon. Adoaquien bëdiactëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

<sup>40</sup> Adoac nidtuidshun Esusën: —Aidi bec cho —cac abi yacno bësho isun:

<sup>41</sup> —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Ëbi bëucshune, Icbo —capanëdash.

<sup>42</sup> Adoquien: —Mimbi tantiacpadomboen padpidemboen is —cac  
<sup>43</sup> badedquio isbenshun bëshuacboedën Esus tsibanquimbi Nuquin Papan  
 naid chuibanquin isbanec onquec nidpanëdash. Aid bëdänsho isun Esusbëd  
 nidanequidotedishuntsen Nuquin Papan naid chuibededpanëdash.

## 19

### *Saqueyo, ancanquidën utsin na bedtequid bedmianiaid dapa*

<sup>1</sup> Adec nidequi Edico caid yacno datambidanec Esus nidpanëdash. <sup>2</sup> Edico  
 yacnocquid Saqueyo cuëmëdquid icpanëdash. Aidi ancanquidën utsin na  
 bedtequid bedmianiaid dapa iquec aton na dadpen icquid icpanëdash.

<sup>3</sup> Adoaid icquimbi utsi, Esus cuenec, quesho tantiaash, ¿Mitsipadquidquio Esus  
 neque? Isnu, abibi quianec nidquimbi matses ënapen icquid dadpen Esus  
 datsidadacsho bushcuctsëcquid icquin Esus Saqueyon isenquio icpanëdash.

<sup>4</sup> Adash, Nëid podquedën Esus choec, quianec podqued cuëman nidquidën  
 cuëte dapan dectatoash isec cuidin tsadpanëdash.

<sup>5</sup> Adec tsadnubien aid podquedënquio choec niduntidshun Saqueyo  
 bushcuctsëcquid istuidshun Esusën: —Nëbi mibi yacno nuquibi tabadec  
 nidnu. Baded bud —cac <sup>6</sup> Saqueyo badedi budpanëdash. Budanec nidquin  
 Esus buanec aton shubuno choshon: —Mibi ëbëd icte bunsho isash bëdambo  
 iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus  
 puduedosh —quecuededpanëdash.

<sup>8</sup> Adnubien, aton shubu nuntanuësh nidtoash Saqueyo: —Chuinu. Tania,  
 Icho. Nëbi con na mais uaquin aton na nibëdquid menenun nabono.  
 Adoshombic, con matses: “Con na mimbi ampioc,” quesho tantiaashun ëmbi  
 ampiaidbëdta daëd-daëdquiecnuc daëd uaquin menebanembi —quepanëdash  
 Esus chieci.

<sup>9</sup> Adoquien: —Chian anëdënquequid nësiatsemboedi aton tsusedpa  
 Abadauan yanampicpaden tantiaquid Saqueyo yanacsho nëbi mënchicaid  
 iquec. <sup>10</sup> Icsambocquid Saqueyo icbocpadquid nibënquin istuidshun  
 nësecanushe qeshun mënchicnuec chopobi —quepanëdash Esus Saqueyobëd  
 icquido caic.

### *Aton na bedtequid 10ted icquid meniaid*

<sup>11</sup> Aden Esusën chuisho tantiaashun Edusaden yacno choash chuiquid dapa  
 Esus yantsiash, quequin utsibon icsamboen tantiaapanëdash. <sup>12</sup> Aden tan-  
 tianubi tantiaquidquio icquin utsi chiacbimboen aido tantiamenuen Esusën  
 nadopanëdash: —Chuiquid dapan mado: ‘Ënden caniaid iquebique. Nëbi  
 ëbitsen chuiquid icnuec chuiquid dapa yacno nidaid utsi yacno nidendabi.  
 Anoshon chuiquid icmiac nëmbo choaindabi,’ <sup>13</sup> qeshun ambi namiaido  
 10ted icquido chomeshun aton na bedtequid abentse-abentsen menebam-  
 posh. Aden menebanash: ‘Ëbi nidan ëmbi meneboed bëdamboen naban-  
 quin daëd uata ma choshon dadpen bedoapanuna,’ quianec chuiquid icti-  
 adquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh:  
 ‘Aidi ëbitedi chuiquid icmenushe qeshun chuiquid dapa yacno chuitanta,’  
 qeshun abëd icquido chuimenuen chuiquid dapa yacno nidmeposh.

<sup>15</sup> “Adoquai, Chuiquid icnu, quianec nidboed chuiquid icneposh. Aden  
 chuiquid icmiac aton shubuno choash, Con na bedtequid ¿tedsi daëd ua-  
 pashba? abibi qeshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted  
 icnuc daëd uaombi, icho,’ queposh.

17 “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

18 “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

19 “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. 21 Mitsana bedtequid mimbi tantiactedimbo daëd uatiapimbo ictsiabi, queshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

22 “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? 23 ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshënnquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

26 “Adoaquien: ‘Chuinu. Tantia. Ëmbi chiapaden nabanquin daëd uacsho isun ëmbi meneboed daëd uaquin menembi. Ëmbi chiapaden chieshquin daëd uainquiocsho isun ëmbi meneboed bedshunembi. 27 Ademibidi ëbi chieshënc abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

*Chuiquid dapabimboec yec Edusaden yacno Esus choaid  
(Mat 21.1-11; Mad 11.1-11; Uan 12.12-19)*

28 Aden chuibanashic Esus Edusaden yacmi nidequi anoentsëqui choash nidtuidpanëdash. 29 Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: 30 —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta. 31 Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

32 Adoac nidshun istuidtanquin 33 cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash icbon.

34 Adoaquien: —Con Icho bunaid nec —queshun Esus yacno nimbanquin abi tënëshaidën buampanëdash Esusbëd icquidon.

35 Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsadunpanëdash. 36 Aden Esus catsadunash nidnubien iccuededquidonsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, queshun aidontsen adopanëdash.

<sup>37</sup> Adec nidanec macuësh Odibos caid budtuidequi iccuededquidtedimbo bēdambo iquec comapenen Nuquin Papan nadatiamboquin naid ambi isboed naden chiec comapenec onquecuededpanēdash:

<sup>38</sup> —Nuquin Papan chomiaid ambi chuiquid dapa icmiaid ambi bēdambo icmiaidquibidi nec. Nuquin Papa yacno abēdi bēdamboec tabadequi ic-saisatedi iquendac —quepanēdash iccuededquido comapenec cuēdcuededec.

<sup>39</sup> Adec cuēdcuededsho tantiashun padiseyobon: —Adec onquenda, quequin mibēd icquido chuita —capanēdash Esus chuiquin.

<sup>40</sup> Adoaquien: —Ēmbi naid chiec aitedi cuēdcuededenquiocnoc cuēnote podqued cuēman samēdquido onquianendac —quepanēdash Esus padiseyobo chiec.

<sup>41</sup> Adashic, adanec nidequi Edusaden anoentsēqui choquin anocquido abi tantiesabo tantiec shubiec Esus nadpanēdash: <sup>42</sup> —Ēbi bēdambo icmequid Esus nec, quec nēbi ēbi tantiaquid mibi ictsiandac. Tantiesa icquin mibi chuiquid mimbi nibēnacpadquid mimbi istuidtiapimbo iguendac. <sup>43</sup> Yuecash choquin uimanēmēnquidon mibi cuentiapimbocon tsicatabudcuendac. <sup>44</sup> Aden mibi tsicatabudcuenshun min bacuēbobēdtabi naimbudquin mibi unēs uashun nendac. Min shubutedi nibēdquendac. Nuquin Papan chomiaid ēbi tantiesa icsho cuīdtequido mibi nendac —quepanēdash Esus. Edusaden uano icnuc abi tantiesabo tantiec unēsquo icnuc anocquido chiacimboec adpanēdash.

### *Nuquin Papa tabadte shubu uashunaid yacnoshon cuemiaid*

<sup>45</sup> Adashic, Edusaden yacno Nuquin Papa tabadte shubu uashunaidēn puduedshun nuntanshunquo aton na bedtequid bednun menebanquido Esusēn cuemepanēdash. <sup>46</sup> Cuemec: —Nuquin Papan chuipampid nad iqueque. Tantia: “Ēbi tabadte shubu uashunaid ēbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanēdash Esus aitedi cuemec.

<sup>47</sup> Adoshombic, badiadquidēn-badiadquidēnquiec Nuquin Papa tabadte shubu uashunaidēn puduedtenequin Nuquin Papan chiaid tantiamenuen Esusēn chuibampanēdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepaba? quequin caimbededpanēdash. <sup>48</sup> Aden caimbededquimbi Esusēn chiaid tantianu quec dadpen Esus datsidadacsho isun ashunquo isadaidbon Esus cuesunemenuen bedtiapimbo icpanēdash.

## 20

### *¿Tсандан chuibanta caid mibi ne? (Mat 21.23-27; Mad 11.27-33)*

<sup>1</sup> Adashic, Nuquin Papa tabadte shubu uashunaidēn puduedshun, Nuquin Papa yacno yuedanquid iquec, quequin Esusēn chuibanubien isadaidbo tsusiobo cho-chopanēdash. <sup>2</sup> Cho-choshon: —¿Tсандан chuibanta caid mibi neque? Tantianu. Ēbitedi chui —capanēdash.

<sup>3</sup> Adoaquien: —Ēmbia tantianu. Ēbi chui. <sup>4</sup> ¿Nuquin Papan ēmbi chiaid chuibanshun mentobanta caidta Uan icpondash? Padenquo mibi quenuc, ¿Matsēsēn nata caidta nepondash, quequinda mimbi tantie? —quepanēdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanēdash: —Nuquin Papan nata caid Uan pado nepondash, ēbitedi guesho tantiash Esus nadpendac. ¿Atotsieshun Uanēn chuisho mibitedishun tantienquo icponda?

6 Matsesën nata caid Uan pado niondash, ëbitedi quesho tantiashun icuededquidon cuënoten nuquitedi se-sependac. Nuquin Papan chuimaid, Uan icpondash, quequin iccuededquidon tantiec —quepanëdash isadaidbo tsusiobo.

7 Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

8 Adoquien: —Mimbi chienquo yacpadembi ëmbitsen ëbi chuita caquid mibi chienquo icoaimbi —quepanëdash Esus.

### *Neshcashunquidon icsambocquin naid*

(*Mat 21.33-44; Mad 12.1-11*)

9 Aden isadaidbo tsusiobo chuishumbic, Utsi chuinu, quiacimboen Esusen nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: <sup>10</sup> ‘Tiedën caniquid ënden bacuëpash. Ëbi neshcashunquidën musucaid con na bedmenu,’ queshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh. <sup>11</sup> Adoshombic, icbon aton tied yacno ambi namiaid utsi nidmeoposh. Aid chosho isun adem-bidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. <sup>12</sup> Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

<sup>13</sup> ‘Netamboedi nidoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bëdamboen ispec,’ quequin aton mado nidmeposh.

<sup>14</sup> ‘Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. <sup>15</sup> Aden cuesunian icbo unësan aton natedi nuquin na ictsiandac,’ quecuededshun tied tsitsuno icbo mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec?

<sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenuo icpashun —quepanëdash iccuededquido.

<sup>17</sup> Adoquien iccuededquido bëisequi Esus nadpanëdash: —¿Nuquin Papan dada uamiaiðen naden chienquioda icpampic? Ai, aidën chuipampid nad iquec: “Shubu uanuequidën isuidaid buintad utsin ambia nitsinaid icposh.” <sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac —quepanëdash Esus.

<sup>19</sup> Aden Esusën chuisho tantiash: —Nuqui naid chiacimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

### *Sesadën shocoshëmpi neque. Mene, quequin chiaid*

(*Mat 21.45-46; 22.15-22; Mad 12.12-17*)

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuishiash.



Aden chuisho isadaidpembo ancaquidën Esus bedpashun, quequin tanti-aquin nidmepanëdash. <sup>21</sup> Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. <sup>22</sup> Adquid mibi icquin ëbi chui. Tantienu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun choaedën icsamboen tantiaid tantiaquin Esusën nadopanëdash: <sup>24</sup> —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanëdash.

*Uincuen uaid chido bedesa nec, quequin chiaid*  
(Mat 22.23-33; Mad 12.18-27)

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. <sup>32</sup> Yucash chidotsen unësoaposh. <sup>33</sup> Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantienu —quepanëdash saduseyobo Esus caic.

<sup>34</sup> Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec.

<sup>35</sup> Uincuen uate ushë choan Nuquin Papan bëdamboen isaïdo abëdi tabadquin chido bedenquo iquendac. Adëmbidi, aton champi menenquo aton papan iquendac. <sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. <sup>37</sup> Adembidi chuinu. Tantia. Cuëtëmpi nëdënquiacbimboecquid isun Moisesën dada uapampid nec. Cuëtë nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaïd mibi nec. Adecbidi tsusedpa Isaquën papa cain cuënaïd mibi neoac. Adecbidi tsusedpa Acobon papa cain cuënaïd mibi nec,” quequin Moisesën chuiampic. <sup>38</sup> Moisesën tsusedpabo ambi chuiboed ënden unësampidën nami chodquiaïdën papa cain Nuquin Papa cuëntiapimbo iquec. Aton nami chodquiash abi tantiaquidquidicquid tantiec tsadquidën papa cain Nuquin Papa cuënac —quepanëdash Esus saduseyobo chiec.

<sup>39</sup> Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. <sup>40</sup> Aden Esusën chuisho tantiashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaïd*  
(Mat 22.41-46; Mad 12.35-37)

<sup>41</sup> Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? <sup>42</sup> Dabidën ambibi Sadmo caid dada uaquin naden chuipampic: “Icho utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquo cainec tsadec cho

<sup>43</sup> ma mibi chieshënquidtedi mimbi namiaid ma icpanu,’ ”

quequin Nuquin Papan Esus chiaid Moisesën dada uapampid nec. <sup>44</sup> Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënquido caic.

*Naden nata quequin chiaid tantiamequidpadquid iquenda, quequin chiaid (Mat 23.1-36; Mad 12.38-40; Duc 11.37-54)*

<sup>45</sup> Aden chuishun iccuededquidon tantianubi abëd icquido Esusën nadopanëdash: <sup>46</sup> —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadteneç. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadteneç. Adquidpadquid iquenda. <sup>47</sup> Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

## 21

*Nianten piucquid shocoshëmpi meniaid*

*(Mad 12.41-44)*

<sup>1</sup> Adashic, Nuquin Papa tabadte shubu uashunaid yacno tabadtuidash tsadquin Esusën isbanpanëdash. Ambi isaido Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi <sup>2</sup> nianten aton na nibëdquidëmbi aton na bedtequid shocosh daëd ictsëcquid sandosho ispanëdash. <sup>3-4</sup> Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantie isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite*

*(Mat 24.1-35, 42-44; Mad 13.1-37)*

<sup>5</sup> Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

<sup>6</sup> Adoquien: —Mimbi nëbi isaid yuecash niddëdquidendac. Matses utsibon nëid shubutedi chic-chicbudendac —quepanëdash Esus.

<sup>7</sup> Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tantianu. Chui —quepanëdash utsibo.

<sup>8</sup> Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. <sup>9</sup> Adecbidi: “Cuesnancuedec,” qesho tantiaish dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badequio choenquio iquendac —quepanëdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. <sup>11</sup> Adecbidi, nidaid utsi-utsiec yacno canchednuec ishucud-ishcudendac. Adecbidi, utsi-utsiec yacno bunquioite iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimi isacmaid abucësh natiambo icsho mimi isbededendac.

<sup>12</sup> “Aidtedi choabincuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuid-nuequid yacno mibi buanendac. Utsi-utsien ancanquid yacno buanac <sup>13</sup> aidotsen tantiaquid yantsiash qeshun ëbi chuibanta. <sup>14</sup> Aden buanaqui, ¿atotsimbi ancanquid cape? quequin tantiec tsadenda. <sup>15</sup> Nuquin Papan Mayanën tantiamiacpadomboen mimi chuibanendac. Adoac, Icsambocquid mibi nec, quetiapimbo mibi chieshënquido iquendac. <sup>16</sup> Adembidi, Nuquin Papan chiaid tantiesan min shubun icquidën mibi bedshun cuid-nuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. <sup>17</sup> Èbi tantiaquid chieshënquid dadpen iquendac. <sup>18-19</sup> Aden nabanquin mibi cuesunemenu, cac chieshenquio yec, Èsus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimi tantiendo. <sup>21</sup> Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna. <sup>22</sup> Aid ushë icnuc Nuquin Papan chiacpadomboen cuidtequid iquendac. <sup>23</sup> Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiquendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup> Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

<sup>25</sup> “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismientequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindanc. <sup>26</sup> Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. <sup>27</sup> Adnubini Nuquin Papan chomiaid matsesaid

ëbi dasiuidaid bëchomauanquieç ushë chënquiacbimboec uëshëmbo yec nadati-ambocquin nabanquidquio abu ushun ëbi budsho matsstedishun isbede-dendac. <sup>28</sup> Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bédambocquin abuc isteneta —quepanëdash Esus.

<sup>29</sup> Aden chuishumbic ambi chuiboeç ushë chote tantiamenuen nadopanëdash: <sup>30</sup> —Cuëtèmpì bacuëacsho isash, Ènden suc seccuduquiac nèbi seta taëc, quequin matsesën tantiec. <sup>31</sup> Adembidi ëmbi chuiboeç icsho isun, Nuquin Papabéd tabadte ushë choec, quequin mimbi tantiec. <sup>32</sup> Abimbo chiembique. Tantia. Èmbi chuibamboed naimbudabicnuc con tan matses isadaidbo naimëdbudenquio iquendac. <sup>33</sup> Abubëdta naimbudtequid nidaid nendac. Èmbi chiaid abimbo iquendac.

<sup>34-35</sup> “Adembidi chinu. Tantiata. Nidaidën capuquidën, Nèbi ëbi sec, quequin tantienquio yec capusho badequio siac cuentiapimbo iquec. Adembidi, Natiate ushë choec, quequin tantienquio yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matses-tedi cuidte ushë choenda ictic? Ai, aid ushë choendac, quequin caimbudec bédamboec tabadta. <sup>36</sup> Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

<sup>37</sup> Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieç macuësh Odibos caid yacno nidash tabadtenepanëdash. <sup>38</sup> Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

## 22

### *Esus bedmenu, quequidquio Udas*

(*Mat 26.1-5, 14-16; Mad 14.1-2, 10-11; Uan 11.45-53*)

<sup>1</sup> Adashic, nami uabicquid pete tantiate ushë, Pascuas caid, anoentsëqui yampanëdash. <sup>2</sup> Aid ushë choabicnuc isadaidbo tsusiobobéd Nuquin Papan naden nata quequin chiaid utsibo tantiamequido iccuèdedtenequin, ¿Mitsipaden Esus bedshun cuesunegue? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdqin Esus bedenquio icpanëdash. <sup>3</sup> Adnubien Udas cashumbic Iscadiote caid Esusbéd icquid dapuedeshun Satanasën tantiamiac <sup>4</sup> Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Èsus bedmete bunebi, quequin chuipanëdash. <sup>5</sup> Aden chiac isadaidbo tsusiobo bédambo iquebi quetanquin: —Esus bedmiacsho mibi piucquid menenu —capanëdash Udas chuiquin. <sup>6</sup> Adoaquien: —Adonuna —quianec Esus yacno nidoash abéd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembì, quequin isted-istedpanëdash Udasën.

*Ënquin nidaidëshun Esusën pebanaid**(Mat 26.17-29; Mad 14.12-25; Uan 13.21-30; 1Cod 11.23-26)*

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë êcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. <sup>8</sup> Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoaquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc decatashon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

<sup>14</sup> Adashic, inchëshën choash abëd icquidobëd pete sante cuate dayun uequi Esus: <sup>15</sup> —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiaquio yanobi.

<sup>16</sup> Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

<sup>17</sup> Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun.

<sup>18</sup> Tiedën caniquid ënë nidaidëshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

<sup>19</sup> Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

<sup>20</sup> Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquëc unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquëc matses icsaid bedshunash Esused cuidadac, quequin tantiatequidquido nendac.

<sup>21</sup> Ëbi chieshënquido ëbi bedmenuequin chuiquid pete sante dayun ëbëdi uec. <sup>22</sup> Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

<sup>23</sup> Aden Esusën chuisho tantias abëd icquido: —¿Midacquidien capec? —quequededpanëdash.

<sup>24</sup> Adashic: —Dosedet nuqui iquëc. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëshash comapenec chushcanampanëdash. <sup>25</sup> Adec chushcanansho tantias

Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. <sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. <sup>28</sup> Ëbi chieshënquido icnuc ëbi nianesa <sup>29</sup> icsho con Pan ëbi chuiquid icmiacpadquid chuiquid mibitedi icmendambi. <sup>30</sup> Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid*  
(Mat 26.31-35; Mad 14.27-31; Uan 13.36-38)

<sup>31</sup> Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacho macuesquin nainshun bitsi secacbimboen mëyantankuin ëbëd icboedi mibi cuëshëdmetiadquio iquec. <sup>32</sup> Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuadnushë queshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtdsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

<sup>33</sup> Adoquien: —Mibi caic, Quënën nauednu, quenuc mibëdi naudedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

<sup>34</sup> Adoquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

*Buanenda, queboedëmbi, Buanta, quequin chiaid*

<sup>35</sup> Aden Petedo chuishumbic abëd icquidtedi chuiquin: —Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoquien: —Padenquio —quepanëdash abëd icquido.

<sup>36</sup> Adoquien: —Ënden adquid buanenda, queboedi, Ëbi nibëdnuc mit-sana bedtequid shictoachtebëdtabi buanta. Chështe bednu, queshun mit-sana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

<sup>38</sup> Adoquien Esusën chuiboed tantienquio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

*Macuësh Odibos caid yacnoshon Esusën Nuquin Papa chiaid*  
(Mat 26.36-46; Mad 14.32-42)

39 Adashic, Edusaden caid yacnoësh macuësh Odibos caid yacno abi nidteniaccpadën nidnuc abëd icquidon tsibanampanëdash. 40 Adec nidequi abi tabadteniagno choshon Esusën: —Chieshëmëñquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. 41 Aden chiashic abiuidsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: 42 —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. 43 Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. 44 Aden uidën uaqi adec uëshquec Nuquin Papa chuiquiequi ichacbëd intacash nidaidën siquepanëdash.

45 Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantie uimabudash ushec uesho istuidshun: 46 —¿Atotsi quiaash ushe? Nidtoson ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

### *Esus bedaid*

(*Mat 26.47-56; Mad 14.43-50; Uan 18.2-11*)

47 Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: 48 —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

49 Aden Udasën nac Esus bednuesho isash Esusbëd icquido: —¿Chochoquido nuquida cuesten cuespe? —quec 50 onquetanquin abentsëcshun isadaidbo tsusio dapan yuan pabiate opioc pateshunepanëdash.

51 Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bëdamepanëdash.

52 Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, qeshunda utsin-utsinquier chështe sananubi utsin-utsinquier cueste sananec cho-chopec? 53 Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

### *Ëmbi isacmaid nec, Petedo quiaid*

(*Mat 26.57-58, 69-75; Mad 14.53-54, 66-72; Uan 18.12-18, 25-27*)

54 Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. 55 Adec choec umanuc cuëte dëtsiadaid cuëec utsibo tabadacno Petedo cuëte cuëec tsadpanëdash. 56 Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

57 Adoaquien: —Bëboed ëmbi isacmaidquio nec —quepanëdash Petedo.

58 Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

59 Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

<sup>60</sup> Adoquien: —Mimbi chiaidbëd icquidpenquoio nebi —quepanëdash Petedo. Aden chuinubien cachina bënë cuëdampanëdash. <sup>61</sup> Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash <sup>62</sup> unësquoio yec umanuc nidash Petedo shubiquiopanëdash.

*Esus sondadon mamëshunaid*  
(*Mat 26.67-68; Mad 14.65*)

<sup>63</sup> Adshumbic Esus cuenushe qeshun abi isquidon, sondadon, Esus mamëshumbedequin cuesbededpanëdash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquoio icquin ¿midaquidën mibi nëbi cueseque. Tiantianu. Chui —capanëdash Esus chuiquin. <sup>65</sup> Aden cuesbededquin Esus icsamboen chuiapanëdash.

*Isadaidbo tsusiobo yacno Esus buanaid*  
(*Mat 26.59-66; Mad 14.55-64; Uan 18.19-24*)

<sup>66</sup> Adshumbic badiadnubi isadaidbo tsusiobo iccuededacno Esus buan-shun <sup>67</sup> nënantanquoio nidtomesho isash: —Nuquin Papan chomiaid, Quidistu caid, nebi, quecta ique? Tiantianu. Chui —quepanëdash isadaidbo tsusiobo Esus caic.

Adoquien: —Ëmbi abimbo chuisho mibitedishun tantienquoio iquendac. <sup>68</sup> Ademibidi, ¿Mitsipadquidquoio Nuquin Papan chomiaid neque? Tiantianu. Ëbi chui, cac ëcbedenquoio mimbi iquendac. <sup>69</sup> Nad iqueque. Chuinu. Tantia. Matsesash nidaidën tabadboëdi ambi nadatiambocquin naidënquoio Nuquin Papan dayunquoio tsadendabi —quepanëdash Esus isadaidbo tsusiobo tantiamequin chiec.

<sup>70</sup> Adoquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

<sup>71</sup> Adoquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquoio iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

## 23

*Pidato yacno Esus buanaid*  
(*Mat 27.1-2, 11-14; Mad 15.1-5; Uan 18.28-38*)

<sup>1</sup> Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buapanëdash. <sup>2</sup> Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancانquid dapa Sesadën, Shocoshëmpi bec cho, cac menenda quiosh. Aiddidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

<sup>3</sup> Adoquien Pidato: —¿Isadaidbo chuiquid dapada ne? —quepanëdash Esus caic.

Adoquien: —Mimbi chiaidquoio abimbo iquec —quepanëdash Esus.

<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoquien: —Ambi tantiamiaidënquoio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno



choshon adomboembidi tantiameoaposh —quepanëdash isadaidbo tsusiobo Pidato caic.

### *Edodes yacno Esus buanaid*

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaguien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec <sup>9</sup> Esus chuimenu quec Edodes onquepanëdash. Adoagui Esusën ëcbedenquo icpanëdash. <sup>10</sup> Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin mamëns humbededshumbi chuiquid dapan dashcubimboecquid abichobicquid Esus dasiunshun Pidato yacno buameoapanëdash. <sup>12</sup> Mimbi tantiapaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

### *Esus cuesten dectameta quiaid*

*(Mat 27.15-26; Mad 15.6-15; Uan 18.39-19.16)*

<sup>13</sup> Adashic, isadaidbo tsusiobobëdta isadaidbo utsibo chomeshun <sup>14</sup> Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëdmianquidta nedic? quendabi. <sup>15</sup> Aden ëmbi tantiapadomboen tantiaquin Edodesën ëbi yacno chomeoaposh. Esus unës uainquioctiadquidi nec. <sup>16</sup> Aden tantiaquin mëyanshun aidi nidmenuna —quepanëdash isadaidbo tsusiobo caic.

<sup>17</sup> Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiapaden nëbi adquid utsi Pidaton nidmetsiash, quequin tantiec isadaidbo naded cuëdcuededquin: <sup>18</sup> —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. <sup>19</sup> Ancanquid bunenquiocquin utsibo cuëdcuededmiøndaid utsi cuesuniondaidbidi Badabas icsho quënën nauedmepanëdash.

<sup>20</sup> Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

<sup>21</sup> Adnubien: —Cuesten dectame —capanëdash isadaidbon yuec comapenec cuëdcuededquin.

<sup>22</sup> Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantanu. Ma unës uainquioctiadquidi neyoc. Aden tantiaquin mëyameshun Esus nidmimbi —quepanëdash Pidato.

<sup>23</sup> Adoaguien: —Cuesten dectame —quepanëdash cuëdcuededoaic isadaidbo Pidato, Ai, camenuc.

<sup>24</sup> Adoac iccuededquidon chiacpaden namenuen <sup>25</sup> Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

*Esus mëyanaid**(Mat 27.32-44; Mad 15.21-32; Uan 19.17-27)*

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëqueduidtanquin Esus dectante cueste Simon buamiac Esus tsibambëpanëdash. <sup>27</sup> Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. <sup>28</sup> Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnoquidon chidobo. Mibibi tantiadec min bacuëbobëdta tantiec shubicuededta.

<sup>29</sup> Yuecash mëyanatequid ushë choendac. Aid ushë chonoc bacuë tsishtiapim-bocquid caic utsibo nadendac: “Bacuëbo nibëdquid icquin min bacuëbo natiasho isenquoio mimbi iquec. Adquid yec bëdamboshë mibitedi iquec.”

<sup>30</sup> Mëyanatequid ushë chonoc matses utsibon natiambocquin mëyanacui naden mimbi Nuquin Papa chiendac:

“Natiambanqueque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

<sup>31</sup> Ëbi buansho isec shubiequi, Ëbi mëyanatequid ushë choec, quequin tantiesa mibi icpec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio icpec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio icpec,” queoapecta mibi ique? Ai, quequin tantiatid —quepanëdash Esus.

<sup>32</sup> Adnubien Esusbëdta icsambocquid dada daëd nidmequimbi <sup>33</sup> macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. <sup>34</sup> Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibiquë. Aidon icsamboen nambo yacimbocëc bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempì puduemebanquin isquin Esusën dashcute bedbampañdash.

<sup>35</sup> Adnubien matses dadpeshun isnubi Isadaidbo tsusiobo isec tabadquin mamënschumbededec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamënschumbededquin paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiaish nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiad nad icpanëdash: “Nëid, isadaidbo chuiquid dapa nec.” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistudà ne? Adquid icquin mimbi budmiac ëbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onquesho tantiash aibëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

<sup>43</sup> Adoaquien: —Abimbo chuinu. Tantia. Nèid ushëmbi abuc ëbi bédamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

*Esus unësaid*

(*Mat 27.45-56; Mad 15.33-41; Uan 19.28-30*)

<sup>44</sup> Adec onquenubi ushë cuembo yanuc bëtinaçbimboec inchëshquio yashic ushë budtsan chënquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquinq dectanëdaid tembi daëdquio yec canchedbudcuempañdash. <sup>46</sup> Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpañdash.

<sup>47</sup> Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bédambocquid niosh. Aidi unësenquioctiadquidi unës uaposh —quepanëdash.

<sup>48</sup> Ambo tabadquin isquid utsibo Esus unëso isash unësquio yec aton shubuno nidanepañdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpañdash.

*Esus nauedaid*

(*Mat 27.57-61; Mad 15.42, 47; Uan 19.38-42*)

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bédambocquid icpañdash. <sup>51</sup> Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpañdash. Aidi Nuquin Papan chomiaid chuiquid dapa iste bunquin cainquidquio icpañdash. <sup>52</sup> Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipañdash. <sup>53</sup> Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpañdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpañdash.

<sup>55</sup> Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanashun shëcuën Esusën dada Osen nauedsho aidon isbededpañdash. <sup>56</sup> Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempañdash. Nacnenash inchëshbudtsëqui seis icnu Nuquin Papan chiapadec chonoadtemaid ushë nec, quiash Esus nauedacno nidenquio yec tabadpañdash. Nuquin Papan chiapadec tabadpañdash.

## 24

*Esus uincuente*

(*Mat 28.1-10; Mad 16.1-8; Uan 20.1-10*)

<sup>1</sup> Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpañdash. <sup>2</sup> Ambo choshon Esus nauedshun bëtashaid cuënote shëcniacsho isashi <sup>3</sup> shëcuën puduedash aton Icho Esusën dada nibëdsho isec tabadpañdash. <sup>4</sup> Adec tabadnubien dada daëd dashcute dasiuidacimboec dasiuidash chënqued chopañdash. <sup>5</sup> Aid isash dacuëdcuededequi isenquio yec chidobo tabadpañdash. Adsho isash dada daëd: —¿Atotsi canuen unësacsho nauedac uincuemiaid nibëne? <sup>6</sup> Nëmbo

nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? <sup>7</sup> Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoaiibi,” quequin Esusën chiondash —quepanëdash dada daëd chidobo caic. <sup>8</sup> Aden chiac chidobon Esusën chiaid abi bëpiscudaïd padpiden tantiapanëdash.

<sup>9</sup> Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuïbampanëdash. <sup>10</sup> Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuïbeneta caïdo chuïpanëdash. <sup>11</sup> Aden chuïsho tantiash: —Mimbi chiaïd tantiatiapimbo iquebi —quecuededpanëdash iccuededquido. <sup>12</sup> Adnubien Petedo nidtoanec titinquec nauedaid shëcuë yacno choash shuebudquin shëcuë anisquin datanaïd dashcuteïdi uesho ispanëdash. Aden isanec nidequi: —¿Atodain nechitec? —quepanëdash Petedo tantienquio yec.

### *Emaus yacmi nidte*

*(Mad 16.12-13)*

<sup>13</sup> Adashic abi ushëmbi Edusaden yacnoësh utsibobëd iccuededboed dada daëd shubu daëdpectsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chinunash aidobëd nidpanëdash. <sup>16</sup> Aden abi chinuntuidsho isac utsibimboec Esus isadpanëdash.

<sup>17</sup> Adec nidequi Esus: —¿Atotsi chuïbanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtuïdquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaïd chuïmiaïd icquin ambi chuïbanaïd ambi nabanaïdbidi Nuquin Papabëdtan matses dadpenshun bëdamboen isaïd icposh. <sup>20</sup> Nuquin tsusio dapabobëdtan nuqui chuïquid utsibon Esus bedshun: “Unës uata,” quequin isadaïdpembo chuïquid meniac cuesten dectanquin unës uaposh. <sup>21</sup> Nëbi chuïquid dapa isadaïdpembo iquenquicpashun, quequin Esus isadaïdbo yec isadaïdbo chuïquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuïbededposh: “Esusën dada nauedbocno badiadnuc nidshun isac <sup>23</sup> nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaïd nibëdec. Uincuenac,’ quiosh,” quequin chidobon chuïposh. <sup>24</sup> Aden chidobon chuïsho tantiënquio yec ëbëd icquido Esusën dada nauedbocno nidshun chidobon chuïbocpadembi unës uaboed nibëdsho isposh —quepanëdash ambi chinunaido Esus chiec.

<sup>25</sup> Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaïd chuïmiaïdon dada uampid bëdiactsëc tantiatsec tantiesabidi ma mibi neyoc. <sup>26</sup> ¿Bëdamboec tabadacno chuïquid dapa icnuec Esus mëyanaidba iquendactiosh? —quepanëdash Esus. <sup>27</sup> Aden chuïbanquin Moisesën dada uampidbëdtabi Nuquin Papan ambi yuecshun nanun chiaïd chuïmiaïdon dada uampid tantiamequin Esusën chuïbampanëdash.

28 Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun: 29 —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

30 Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshshun Esusën menebampanëdash. 31 Aden nasho isun badedi, Esus nec, quequin tantianubi Esus nibëdquio yampanëdash. 32 Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

33 Aden chuitanequin Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi ut-sibo iccuededacno puduedacsho isash: 34 —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. 35 Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

*Abëd icboedo yacno Esus chote  
(Mat 28.16-20; Mad 16.14-18; Uan 20.19-23)*

36 Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

37 Adec aid chosho isash: Podo bitsi nec, quec dacuëdequi abëd icquido tabadpanëdash. 38 Adsho isashien Esus: —¿Atotsi quiash, ¿Esusida nepec? mibitedi quepe? 39 Con mëdantebëdta con taë is. Èbibi nebique. ¿Mëtoccaid taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

40 Aden chuitanquin abi bëchun shuin mëtoccoaid chiuë aton mëdantebëdta aton taë Esusën ismepanëdash. 41 Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentquidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien 42 nuëcquid shëaid cuëshë menepanëdash. 43 Aden meniac bedshun Esusën pepanëdash abëd icquidon isnubi.

44 Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc. 45 Aden chuishumbic abëd icquido tantiamequioquin: 46 —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqi daëdec ushash uincuenendac. 47 Aid tantiashun mibi icsaid mimbë ãnsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac. 48 Mëyanquin unës uaqi ëbi uincuenacsho mibitedishun ispec. 49 Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aid Nuquin Papan nadatiamboquin natequid iquec. Aid mibitedi meniabicnuc Edusaden yacnoshon aidi caïmbudta,” —capanëdash Esusën.

*Esus abuc indote  
(Mad 16.19-20)*

<sup>50</sup> Adashic, bëyucanec nidequi Betania yacno anoentsëqui choash nidtuid-shun aton mëdante abuc sananquin ismec: —Nëidtedi bëdamboen ista, Papa — quepanëdash Esus. <sup>51</sup> Aden chiacsho abëd capucuenequido niamequin Esus aton Papan abuc indopanëdash. <sup>52</sup> Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nitted-nittedquin Nuquin Papan naid chuidenepanëdash.

Padi. Aiteded dada uaombi, Teyopido.

## UANËN DADA UAID

### *Nuquin Papa tantiamanquid chiaid*

<sup>1</sup> Èndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquio nec. <sup>2</sup> Aidëmbi Nuquin Papabëd icquin <sup>3</sup> abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. <sup>4</sup> Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiabimboencuc tantiamanquidbidi Esus nec. <sup>5</sup> Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niacniaques mibi icsamboec tabadec —quequin chuisho tantiatiapimbo icquin matsesën Esus chieshëmpondash.

<sup>6</sup> Aden Esusën chuibeniabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. <sup>7</sup> —“Nuquin Papa yacnuësh abi tantiamequidquio choendac,” quequin Uanën chuibansho tantiasun ma dadpeshun ambi chuibod tantianu —quequin Nuquin Papan con shënisio abi chuibanquid icmepanëdash. <sup>8</sup> Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. <sup>9</sup> Aden ambi chuibodquio Nuquin Papa tantiamenuec matsespanëdash Esus.

<sup>10</sup> Adash matsesbëd tabadsho ambi matses uaidombi tantienquio icquin chieshëmpondash. <sup>11</sup> Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquibidi dadpeshun Esus tantienquio icpondash. <sup>12</sup> Utsibombien daëdpactsëcshun: —Nuquin Papan Madombo Esus nec —quequin tantiasun Nuquin Papan: —Con mado nec. Con champi nec —cabempanëdash. <sup>13</sup> —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin çambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasun dada con mado caquin chido con champi capanëdash. Adembidi Esus tantiasun adoendac.

<sup>14</sup> Aden Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. <sup>15</sup> Aid con shënision chuibondash. —Èmbi chuibodquio nec. “Èbi icsaquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ènden icpampic,” èmbi caboedquibidi Esus nec —quepondash con shënisio.

<sup>16</sup> Con shënision chiacpadquidquio icquin abi tantiaquid Nuquin Papan bëdamboen isaïdo icmeshun adenuidi Nuquin Papa nuqui bëdamboen ismec. <sup>17</sup> Èndenquimboshë Nuquin Papan chiaid dada uaquin Moisesën Nuquin Papan matses icsaïdo cuidte tantiamepampic. Padnuen Esuquidistun Nuquin

Papan bédamboen iste tantiamequin: —Nadquio Nuquin Papa iquec — quequin matses bédamboen tantiamepondash. <sup>18</sup> Ambi isacmaidquio icsho matsesën Nuquin Papa bédamboen tantiatiapimbo iquec. Padnuen aton Mado abentsécshunquio aton dayun tsadquidênquiobi matsesun Nuquin Papa bédamboen tantiamepondash. Aidquio chuinu. Tantia.

*Tsusiobon chuimiac Uan acten mentoanquidên chiaid  
(Mat 3.11-12; Mad 1.7-8; Duc 3.15-17)*

<sup>19</sup> Con shênisio Nuquin Papa tantiabênquid acten mentobenêquid niondash. Aden acten mentobenesho isash Moisesën chiampid namequido aid chuimenuec cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shênisio chuituidpondash. <sup>20</sup> —¿Tsuentsin chiac nai? ¿Mimbembida nai? “Bédamboshê icquidquio Nuquin Papan chome-ndac,” quequin nuquin tsusedpan ¿dada uapampidta ne? —catuidpondash. Adoquien: —Padenquio. Aidpenquio nebi —quepondash. <sup>21</sup> Adshobien: —¿Tsumintsi ne? ¿“Naden naindami,” quequin Nuquin Papan chiaid chuibanquidquio unêspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moiespadquidquio choëndac,” ¿capampidta ne? —caquien: —Padenquio. Aidpenquio nebi —queoapondash con shênisio.

<sup>22</sup> Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboec chiec nidnu. Baded èbi chui —caquien: <sup>23</sup> —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshê icquid chomiabi icnuc aid bëyuquec utsiba choendac. Aidên shubu nibêdacno capucuenequin chuibanendac naden.

‘Chuiquid dapambo choeque. Podqued andêdbanshunta,’  
quiacbimboen chuiquin: ‘Nuquin Icho choeque. Icsaid ênash bédamboec tabadta,’

quequin chiendac bëyuc choshon,”

quequin chuipampid nebi —quepondash con shênisio.

<sup>24</sup> Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shênisio chuituidpondash. <sup>25</sup> —Útsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: <sup>26</sup> —Nuquin Papan chiacpadomboen abi tantiabênquido acten mentobenec nebi. Èmbi aden bédamboen nanuc utsimbien bédamboenshê naindac. Aidi mibêdi tabadshobi ma mimbi tantienquio icboc. <sup>27</sup> Èmbia Nuquin Papan chiaid chuibanombi. Aidênsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bédamboshê icquid icnuc èbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shênisio padiseyobo chiec. <sup>28</sup> Acte Odan caid uguê cuêmatsiucuehsh shubu dadpen icquid Betania caid yacnuêsh adpondash.

*Abided cuidadtequid nendac, Esus caid*

<sup>29</sup> Badiadshun padpiden con shênision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquio obeca bacuêbimboecquid choeque. Aidi isadaidbon obeca bacuêded cuidquin unês uacbimboec matses icsaid bedshunec abided cuidadec unêsendac. <sup>30</sup> Èmbi chianeboedquio nec. “Èbi bëyuc tishaidi tishabi



icnubi aidi ënden icpampic,” quiaſh: “Ëbi bēdapabi icnuc bēdamboshē icquidquo choendac,” quepobi. <sup>31</sup> Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidēmbi ěmbibi badedquo tantienquo iccombi. “Nuquin Papan chomiaid nec,” quequin tantienquo iccombi — quequidash con shēnisio.

### *Esus mentoaid*

(*Mat 3.16-17; Mad 1.9-11; Duc 3.21-22*)

<sup>32</sup> Adashic abi onquec: —Nuquin Papan naden ismiac tantiabonombi. Aton Mayan aton dada nibēdquiec dēbimbimboec budec: “Matsadtoendac,” quebocpadequi Esus matsadtoſho ispombi. <sup>33</sup> Adsho isash: “Adquidshenda capoc Nuquin Papan: ‘Acten mentoanquid icta,’ ěbi caboedēn. ‘Con Mayan dēbimbimboec budec matsadtoedēn abi tantiaquidobēd con Mayan tabadmendac,’ Nuquin Papan caboedshenda nepec,” quiobi Esus caic. Ěmbembi tantienquo ictsenombi. <sup>34</sup> Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuquī caimboed Nuquin Papan chomiaidquo Esus nec,” quequin mibi chiec nebi — quepondash con shēnisio.

### *Nēid dada uaquid Uan Esusbēd yanaid*

<sup>35</sup> Adashic badiadash ambi acten mentobambocono con shēnisio nidoapondash. Aid tsibanequi nidoapondabi. <sup>36</sup> Adececidquid isquien Esus cuempec. Cuensho isashien con shēnisio: —Is. “Nuquin Papan namiaidquo obeca bacuēbimboecquid nec,” ěmbi caboed cueneque — quepondash.

<sup>37</sup> Adsho tantiatanequini con shēnisio bēd iccondaid utsibēd Esus chinunec nidpondac. <sup>38</sup> Nidquini chinunac bidiadquini istanequien: —¿Atotsi quec ne? — quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu — capondambi. —Chuiquidquo nec — quequin con onquetembi Dabi caondambi. <sup>39</sup> Adoac: —En isec cho — cac abi ushacno isec nidondabi. Ushē abucquid icnuc puduedash yuec tabadec onquetaniash inchēshtsēcnubi chondabi.

<sup>40</sup> Ěbēdtan Esus chinunondaic Andedes niondash. Shubu dadpen icquid Betsaida caid yacnuēsh caniquid niondash. Aton buchi Petedo niondash. Petedobidi Simon capondash. <sup>41</sup> Adnubien Andedes aton buchi chiec nidpondash. Adececidquid Petedo istuidash: —Nuquin tsusedpabon chuiampid Nuquin Papa yacnuēsh choquid Mesias caid istuidombique. En isec cho, buchi — capac caondash. Nuquin Papa yacnuēsh choquid Quidistu cashumbic con onqueten Mesias caic.

<sup>42</sup> Aden chiaquien aton buchi Esus isec chopondash. Chosho isash Esus: —Uanēn mado mibi nec. Mibi Simon nec. “Nidaic moco utsi uatiapimbo yacimboec mibi chieshtoenquo icquid yanendac,” quequin mibi nidaic moco cuēnendambi — quepondash Esus Petedo caic. Con onqueten nidaic moco cain Sepas capondash Esusēn. Quidieco matsesēn onqueten Petedo capondash.

### *Esusēn Uedipebēdta Natanaid istuidaid*

<sup>43</sup> Badiadash: —Con nidaic Cadidia caid yacno nidnu — quianec nidpondash Esus. Adececidquid Uedipe istuidpondash. Istuidshun: —Nuquibi icnu. Cho — caquien Uedipe chopondash. <sup>44</sup> Betsaida yacnuēsh caniquidbidi nepondash aid. <sup>45</sup> Esusbēd icquid yanashic dada utsitsen Natanaid caid chiec nidpondash Uedipe. Adececidquid istuidshumbien: —Isec cho. Moisesēn chiampicpadomboen chuiquini nuquin tsusedpabon utsibon: “Bēdamboshē icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuēsh caniquid

neque. Osen mado nec —quepac caondash. <sup>46</sup> Adsho tantiash: —¿Nasaded yacnuështa dada bédambo icquid chopatsiash? Auëshquio dada bédambo icquid chotiapiumbo iquendac —quepac caondash Natanaid. Adsho tantiash: —En isquiec cho —quepac caondash Uedipe.

<sup>47</sup> Adoac choshobien Esusën: —Is. Isadaidbombo neque. Muesambo nec —caquien <sup>48</sup> Natanaidën: —¿Mitsipaden ëbi tantie? Mabi mimbi isacmaid-quo nepayoc —capondash. Adoacquen: —Uedipen bedtanabi icnubi mibi cuête icueda caid tayun tsadsho tantiombi —capondash Esusën. <sup>49</sup> Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. <sup>50</sup> Adoacquen Esusën: —“Cuête icueda caid tayun tsadsho mibi tantiombi,” ëbi quesho ¿tantiashta: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi ëbi tantiaquiot-siandac. <sup>51</sup> Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bédabo Nuquin Papa yacno dectatonesho isash: “Aidbéd tabadte Nuquin Papan ëbi tantiametiadquio iquiec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abéd tabadte tantiamec,” quequin mimbi ëbi tantiendac —quepondash Esus abéd icquido chiech.

## 2

### *Esusën ambembi actequid uaid*

<sup>1</sup> Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobéd Esusën tita puduedpondash. <sup>2</sup> Esusën puduedpondash. <sup>3</sup> Adec pudueddash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiapadomboen nata, mado —capondash. <sup>4</sup> Adoacquen: —¿Atotsi quequin mimbi ëbi chuipe, tita? Chiata. Con Pan tantiacpadënquo naimbique —quepondash Esus. <sup>5</sup> Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

<sup>6</sup> Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. <sup>7</sup> Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. <sup>8</sup> Cushtobanacsho isun Esusën: —Ueshun buanshun mibi ancaquid acmetan —cac acmetampondash.

<sup>9</sup> Adoac acquin tanaquien actequid bédamboshë icquid icpac caondash acte icboedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantiashun yuabon: —Esusënquibien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bëpash —queshun. <sup>10</sup> —Nuquin matsesën actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmënu,” quequid yendac. Aden mimbi nambo. Bédambo icquidquio ma mimbi nëbi acmianeyoc —quepondash yuabo ancaquid chido bednuequid chiech. Adnubien yuabon actequid bédamboshë icquid abitedi acmebampondash.

<sup>11</sup> Aden comapenen tantiaquid icquin ambembi actequid uaquin Esusën tauamboen ismebempodash. —Nuquin Papa yacnuësh choquid yec

comapenen tantiaquidquo nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquo. Adosho isun: —Con matsesèn chiampid Nuquin Papan chomiadion nec —quequin tantiabenondambi.

*Esusèn chushcaquin cuemiaid*

(*Mat 21.12-13; Mad 11.15-18; Duc 19.45-46*)

<sup>12</sup> Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abèd icquido yec èbi yec quec Esusbèd nidaniondabi. Ambo daèdpactsec ushec tabadondash. <sup>13</sup> Ambo ushcuidanec nidequi shubu dadpen icquid Edusaden yacnoshon Esus nidaniondashi. —Nuquin matses tsusedpabo unès uainquo icquin Nuquin Papan matamiampid inchèsh tantiaquin obeca bacuè pec nèbi tabadeque. Isec nidnu. Nid —quianec nidanepondash. <sup>14</sup> Nidashic Nuquin Papa tabadte shubu uashunaid dapa daquènè uaidèn puduedondash nuntanquo puduedabi. Puduedshun isquien matses dadpen nèish yua chedobèd tabadpec. Baca bènè yec obeca yec dèbimbimboecquid quènèmpin sauedaid yec quec tabadpondash. Aton yua menequin piucquid bednuac utsibo tabadnubi utsibo ambi tabècaid dayun tabadpondash. Aido nidaid utsi yacnuèsh choquido aton piucquid dadpen bedshun ampshunquin daèdpactsec menequido niondashi. <sup>15</sup> Adec tabadsho istanquimbien Esusèn cueshcate badedquo nacnentanquin cuesquin niacumpondash umanuc abitedimbo. Aden umanuc niacuntanquin tabècaidtsen bidiacbanquin piucquid siabudshumbampondash. <sup>16</sup> Adotanquimbic dèbimbimboecquid yuacuidotsen chushcapondashi. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondashi.

<sup>17</sup> Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquo nendac,” quequin Esusèn nate chuiquin dada uapampic —quequin tantiondambi.

<sup>18</sup> Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin èbi isme —caquien <sup>19</sup> ismenquo icquin ompoacbimboen Esusèn chuipondashi. Abibi cadequi: —Mimbi nèid shubu icsa uabocsho padpiden nacnenoaindambi bèdambo icnuc. Daèdec ushquin nacnenquin nainendambi —quepondashi Esus. <sup>20</sup> Adsho tantias Nuquin Papa tabadte shubu uashunaid dapa ca danec: —¿Badedquioda nacnempatsia? Nèid nacnenquin seta dadpenquioshè 46tedquioibi matamiac cadenec —quepondashi con matses chuiquido.

<sup>21-22</sup> Yuecquo ictaneshun Esusèn aden chiaid tantiondambi. Unès uacsho chococac daèdec ushash Esus uincuenaccondashi. Uincuenacsho isash: —Abibi cadechenda Esus nepondashi. Abibi cadec: “Daèdec ushquin nacnenquin nainendambi,” quechenda nepondashi. Aden chuiquinshenda con tsusedpabon dada uapampic —quequin tantiondambi.

*Dadpeshun Esus tantiauidaid*

<sup>23</sup> Nuquin Papa tabadte shubu uashunaid daquènè uacnoshon cuemeshumbic Edusaden yacnoshontsen comapenen tantiaquin nabanquin Esusèn ismepondashi. Adsho isun matses dadpeshun: —Nuquin tsusedpabon chiampid Nuquin Papan chomiaiden Esus nechitec —queshun Esus bèdiactsec tantiatsèccondashi. <sup>24</sup> Aden tantiatsècsho ambembi tantias: —Ai, èbi tantiaquidquo nec —quenquo icquin: —Èbi bèdiactsec tantiatsec —quequin tantiapanèdash. <sup>25</sup> Utsin chiambobi ambembi

tantianëdash. Aden matses abitedishun otacquo tantiaid ambembi tantiaquidquo Esus niondash.

### 3

#### *Esusën Nicodemo caid chiaid*

<sup>1</sup> Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsi-bobëdtan aton matses namequid niondash. <sup>2</sup> Inchëshën Esusbëd onquenuec chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin nabansho isun: “Nuquin Papan namiaidënuidsësëquien adotsiash,” mibi caombi —quepondash.

<sup>3</sup> Adsho tantiashun: —Ai, adquid nebi —quenquo icquin Esusën ompoachimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac <sup>4</sup> —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. <sup>5</sup> Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquo iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. <sup>6</sup> Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. <sup>7</sup> “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. <sup>8</sup> Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishudsho isash: “Abi cunquec,” mibi quepec. Adquiobidi isadenquo Nuquin Papan Mayanë iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

<sup>9</sup> Adsho tantiash: —¿Midapadec? —quepondash Nicodemo. <sup>10</sup> Adoaquien: —¿Tantienquioda ique? Ma isadaidbô Nuquin Papan chiaid chuibanquid mibi neyoc. <sup>11</sup> Ënden ushë utsin mibi chedo chiombi. Ëmbi isondayquid chuiquinc ëmbi tantiondayquid chuiquinc caombi. Adsho tantiash: “Tantiadenquo iquec,” ma mibi queboc. <sup>12</sup> ¿Ëmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? <sup>13</sup> Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. <sup>14</sup> ¿Atotsi canuen nuquin tsusedpa Moisesën nisibimboecnuc shocosh nacenaid dectampampic? “Nuquin Papan chiacpadec ma aid isec nisin piaid bëdanu,” quequin cuesten dectampampic. Adomboembidi matses cuidmenquo icnuec cuesten dectamëdendabi ëbided cuidadec unësec. <sup>15</sup> Ëbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chiec.

#### *Nuquin Papan matses abitedi tantiaquin naid*

<sup>16</sup> Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided

cuidpanēdash. —Ĕmbi adoaid con Mado tantiaquid unēsacsho icsaido cuidacno nidmenquio icquin ēbēdi tabadmendambi—quequin aton Mado ded cuidpanēdash. <sup>17</sup> ¿Matses cuidnuenda Nuquin Papan Esus matses-mepanēdash? Padenquio. Matses cuidenquio icnuen napanēdash.

<sup>18</sup> Aden aton Mado Esus tantiaquido cuidenquio icquin Esus tantiesabo cuidendac: —Con Mado chieshēmpēc —qeshun. <sup>19</sup> Nuquin Papan matsesmiadēn Esusēn abi icsaid chuisho matses icsambo icquidon tantiatiapimbo iquēc. Ambi icsamboen naid ēntiapimbo icquin Esus tantiatiapimbo iquēc. <sup>20</sup> Adquidon: —Ĕbi icsaid Esusēn utsibo tantiamenushe. “Icsambo iquēc,” ēbi canushe—qeshun Esus chieshēmpēc. <sup>21</sup> Nuquin Papan chiacpadec tabadquidombien Esus chieshēnenquio iquēc. —Nuquin Papan namiacpadec tabadquid nebique. Ma Esusēn ēmbi bēdamboen naid chuibampanuna —quiash Esus tantiate bumpec.

### *Uan acten mentoanquidēn Esus chuioaid*

<sup>22</sup> Adec Nicodemobēd onqueboshien Esus nidpondash. Edusaden yacnuēsh nidec aid nidaidēmbi Udeya caidēn capucueniondash. Abēd nidshobini Nuquin Papan chiaid Esusēn chuibampondash. Adec nidshun Nuquin Papa tantiabenuido acten mentobeniondambi. <sup>23</sup> Adnubien adomboembidi con shēnisiontsen acten mentobeniac caondash. Enon caid yacnoshon Sadin caid anoentsēqui chunquen diadacnoshon matses dadpen acten mentoac caondash con shēnision. <sup>24</sup> Chieshēmēnquidon quēnēn nauedabi adoac caondash.

<sup>25</sup> Adnubien con shēnisiobēd icquido con matses utsibēd: —Mimbi icsamboen chiec—quec chushcananac caondash. Con shēnisiobēd icquido: —Uanēn Nuquin Papa tantiabenuido bēdamboen acten mentobamposh—quesho tantia: —Padenquio. Esusēmbien bēdamboen acten mentobaniosh—quepac caondash. <sup>26</sup> Adshumbien con shēnisiobēd icquidon: —Nuqui chuiquid chiec nidnu. Nid—quianec nidquin con shēnisiio chuituidpac caondash. —Acte Odan caid uquē cuēmatsiucshun ¿mitsicquid: “Nuquin Papan chomiaid nec,” mimbi cadio? Aidēn mimbi naid dēniacquin matses dadpenquio acten mentobeniac caosh. ¿Ada bēda icpec? —caquien: <sup>27</sup> —“Nuquin Papan chiacpadomboen Esusēn nash. Adomboembimbi naic,” qeshun Esus chieshēntiapimbo iquendabi. <sup>28</sup> “Nuquin Papan chomiaidpenquieni nec,” quequin mibi chiondambi. “‘Nuquin Papan chomiac bēdamboshē icquid choendac,’ quequin bēyuc choshon aid chiec nebi,” quiondabi mibi chiec. <sup>29</sup> “Ĕmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidēn: “Min bēnēbēd nidenda,” caquinda ictiosh? Padenquio. Bēnēbēd nidmiash bēdambo yachimboec Esusbēd nidanesho isash bēdambo iquebi. <sup>30</sup> Ĕmbibi Nuquin Papan chiacpadomboen Esus tantiamequin ēnquin chuibanuc ēmbi acten mentoaido daēdpactsēc yanendac. Ĕmbi chuiboedquio Esus tantiaquidoen dadpenquio yanendac. Aidquio bēdamboshē iquēc—quepac caondash con shēnisiio abēd icquido chiec.

### *Nuquin Papa yacnuēsh choquid chiaid*

<sup>31</sup> Adshumbic con shēnision naden chuipac caondash. —Esusquio bēdamboshē iquēc. Nuquin Papa yacnuēsh choquid abipadquid utsi nibēdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusēmbien <sup>32</sup> ambi isondaiddēta ambi tantiondaidquio chuipēc. Aden chiaqui matses dadpen: “Abimbo caic,” quenquio icpec. <sup>33</sup> Esus tantiaquidon: “Nuquin Papa muesambo nec. Ambi: ‘Bēdamboshē icquid choendac,’ quequin dada uamepampidquio Esus nec,”

capec. <sup>34</sup> Nuquin Papan chomiaidquo icquin Nuquin Papan chiaidquo Esusën chuibanec. Nuquin Papan aton Mayan abêd tabadmiad icquin comapenen tantiaquin ismebanquin chuibanec. <sup>35</sup> Ambi tantiaidquo icsho aton Papan abitedishun Icbombo icmiac. <sup>36</sup> Adnuc: “Abitedishun Icbombo Esus nec,” quequin aton Mado tantiaquido unêsascho Nuquin Papan abêdi tabadmendac padpidec unêsenquo icnuc. Esus chieshênquidoen Nuquin Papa yacno isenquo yec icsaido cuidquiacno nidendac —quequin con shênision chuipac caondash.

## 4

### *Acte uequid chido Esusën chiaid*

<sup>1</sup> Esusbêd icquin Nuquin Papa tantibenquido acten mentobanondambi. Adnubien con matses chuiquido padiseyo caidon: —“Uan acten mentoanquidên naid dêniacquin Esusën matses dadpenquo acten mentobanosh,” quiosh —qeshun Esus chieshêmpac caondash. <sup>2</sup> Esusën nainquo icnuc êmbimbo nasho isun chiaqui aden Esus chieshênac caondash. <sup>3</sup> —Mibi adosh —cac: —Con nidaidên nidnu —quianec nidondash Esus. Aid nidaid Udeya caid yacnuêsh nidec aton nidaid Cadidia caid yacno nidondash.

<sup>4</sup> Aid podquedên nidequi nidaid utsi yacno Samadia caid yacno nidpondash. <sup>5-6</sup> Adec nidquin ushê cuembo icnuc shubu dadpen icquid Sicad caid yacno istuidpondash. Aid anoentsêqui con tsusedpa Acobon tied uampid icpondash. Aid tied caic: —Ëbi unêsan nêid tied: “Con na nec,” cata, mado —quequin aton mado Ose chiampid tied niondash. Ambo aidên uêdêshcampid acte uete icpondash. Aid dayunquiobi: —Tiboquenu —quec Esus tsadtuidpondash. <sup>7-8</sup> Adec tsadtuidnubini: —Pete bedtanu —quianec shubuno nidanepondac. Esus abentsêqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: <sup>9</sup> —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbêd onquesambo isadaidbo nec —quequin tantiec adac caondash.

<sup>10</sup> Adshobien Esusën badedquo cuembo chienquo icquin chuipac caondash. —Nuquin Papan bédamboen isquin naidbêda êbi tantiaquin: “Acte beccho,” mimbi êbi catsiac. Adsho acte bédambo icmianquid mibi acmetsiambi —quepac caondash Esus. <sup>11</sup> Adoquien acte uequid chidon actembo ca danquin: —¿Mitsipaden acte ueshun êbi menetsia? Ma min têchu nibêdpayoc. ¿Midapaden mimbi uetiapimboen acte uquêduquo iquec? ¿Mitsimbo acte bédambo icmianquid ueshun êbi acmetsia? <sup>12</sup> Nêid acte nuquin tsusedpa Acobon uêdêshcapampid nec. Aton yuabobêdan aton bacuêbon acpampid nec. Nuquin tsusedpa bédambo icquin nampid icnuc ¿mitsipadquidquo icquin nai? ¿Bêdamboshê icquid icquinda mimbi acte bédamboshê icquid êbi acmepatsia? —capondash acte uequid chidon. <sup>13</sup> Adoquien: —Nêid acash mibi bundoac. <sup>14</sup> Êmbi acmiac mibi bundoenquo ictsiac. Acte bédambo icmianquid acmiac ênêdenquo yec tabadquid mibi yantsiac —quepac caondash Esus badedi cuembo chienquo yec. —Ëbi tantiaquidobêd con Mayan tabadmiac bédambo yanec unêsascho êbêdi tabadmendambi —quequin tantiec adac caondash.

<sup>15</sup> Adsho tantiahsun padpiden acte ca danquin: —Adquidquo êbi acme. Bundoenquo yec nêmo acte uec choenquo ictsiabique —caquien: <sup>16</sup> —Min bënë bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash. <sup>17</sup> —Min

bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. <sup>18</sup> Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquo nec. Abimbo mimbi caic —quepac caondash Esus.

<sup>19</sup> Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiadquio nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiapè? <sup>20</sup> Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. <sup>21</sup> Adsho tantiaahun Esusën: —Tantia. Mibi bëdamboen chuinu. Nëbi nëid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabededendac. <sup>22</sup> Min matsesën Nuquin Papan chiaid daëdpactsëc tantiatstëcshun Nuquin Papa bëdiactstëc tantiatset. Con matses isadaid-bombien Nuquin Papan chiaid dadpen tantiaahun: “Nuquin Papan chomiad nuquin matses bëdambo icmianquid nuquin matsesën tishendac,” quequin bëdamboen tantiec. <sup>23</sup> Nëbien utsin-utsinquien muainquo icquin: “Con Icho nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquo nec,” quetsiash Nuquin Papa. <sup>24</sup> “Nuquin Papa tantiaquid ictiadquio iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

<sup>25</sup> Adsho tantiash chido: —“Nuquin Papan matses bëdambo icmequid chuiquid dapa chomendac,” quequin chuisho tantiondami. Aid mesias caidi utsibon quidistu caposh. Aidëmbi nuqui tantienquo yaidtedi tantiametsiash. Aidbimboecquidien mibi nechitec —caquien: <sup>26</sup> —Mimbi chidaidquibini nec —quepac caondash Esus chido chiec.

### *Esus Samadia yacnocquido chiec tabadaid*

<sup>27</sup> Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquo onquec. —¿Atotsi chiec chidobëd onquo? —cainquo iccondambi Esus. <sup>28</sup> Adec ëbi chonobi tëchu nianec acte uec choquid chido nidpondash aton matses chiec shubuno nidec. <sup>29</sup> —Isec cho. Èmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac: <sup>30</sup> —En isnu. Nid. Aidien nechitashe. Isnu —quianec matses dadpen cho-chopondash.

<sup>31</sup> Aido choabi icnubi: —Në pete, Icho —ëmbi caquien: <sup>32</sup> —Padi. Mimbi tantienquo yaid con na utsi iquec —quepondash Esus petepenquo chiequi. <sup>33</sup> Adsho tantiashini pete ca danec: —¿Utsibonda pete bëshumpash? —quecuededpondac ëbitedi. <sup>34</sup> Adsho tantiash Esus: —Èbi cuishoncamete utsi iquec. Èbi chomiondaid Nuquin Papan chiacpadomboen naic bëdambo iquebi pete piacbimboec. Ambi chiaidtedi nainuec dayacquo iquebi —quepondash. <sup>35</sup> Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden çyuecshunda nëmbo icquidon ëbi tantiabempec? Padenquo. “Nëidon Esus tantiendac,” mimbi cacmaidobi cho-choeque. Is. <sup>36</sup> Acte uequid chido ëmbi chuiboedën chiac matses dadpen cho-choeque. Chuibana. Èbi tantiash Nuquin Papabëd tabadtequid yanendac. Adsho isash

nuqui cuishonquendac piucquid bedashbimboec. <sup>37</sup> Tied icbon: “Con na peta,” cac ambi nidsinacmaid matsesën bedec. <sup>38</sup> Aden ambi nitsinacmaid bedacbimboen mimi naic. Utsibomba Nuquin Papan chiaid chuibanëdaido nëmbo icquido mimbisen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

<sup>39</sup> Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashë. Isnu. Nid —quianec cho-chopac caondash. <sup>40</sup> Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibanpondash Esusën. Aid matses chiec ambo daëdec ushpondash. <sup>41</sup> Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. <sup>42</sup> Adashic acte uequid chido chiec: —Mimbi chuishouidi tantiaobëdëmbi nëmmbi aidënquo chuisho bëdamboen tantiaquioc. “Nuquin Papa matses bëdamboen ismequid nec,” quequin tantiembi —quiampondash Samadia yacnocquido dadpen.

### *Chuiquid dapan mado Esusën bëdamiaid*

<sup>43</sup> Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. <sup>44</sup> —Ëmbi chiapaden abi caniondacnoshon Nuquin Papan chiaid chuibanquidën chuisho aton matsesën tantienquo iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. <sup>45</sup> Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquo icquin matamiampid inchësh tantianuec Edusaden yacno nidshun mimi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

<sup>46</sup> Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. <sup>47</sup> Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno chëshombien: —Con mado unëstiadtsëcquio iccoshe. Bëdamec cho —caqui <sup>48</sup> nidenquo yec abi datsidadquido chiec: —Ëbimbo mimi tantienquo iquec. Ëmbi bëdameteuidtsëqui mimi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimi tantiec —quepondash Esus.

<sup>49</sup> Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. <sup>50</sup> Adoquien Esus: —Padi. Min mado unësenquo ye. Nidec nid —quesho tantiash: —Abimbo caic —quianec nidpondash. <sup>51</sup> Adec nidquimbi abi chuineuc cho-chosho aton yuabo bëquedac caondash. Aden bëquedacqui yuan: —Min mado bëdanosh —quesho tantiashun: <sup>52</sup> —¿Mitsimbo ushë icnuc con mado bëdanosh? —cac: —Ënden ushë yaquëduidtsëcnubi da una yantsëcnubi bëdanosh —quepac caondash aton yuabo. <sup>53</sup> Adsho tantiash: —Adënquioshendabi: “Min mado unësenquo ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquo yec comapenen tantiaquin nabansquidquo Esus nec —quequin aton shubun icquidobëdtambi Esus tantiapac



caondash. <sup>54</sup> Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bédamequintsen Esusën ismepondash.

## 5

### *Esusën dada icsatsaid bédamiaid*

<sup>1</sup> Yuecquio ictanec Esus: —Edusaden yacno cuëdënuec nuquin matses chochoeque. Nuquitsen nidnu. Nid —quianec nidanepondash. <sup>2</sup> Shubu dadpen icquid Edusaden caid dacuenadquin daquënë uaid puduedte shëcuë dadpen icnu abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. <sup>3</sup> Acte nënantanquio icnuc dacuenadquieq shubumpi tabadquidën matses dadpen tabadpondash daicsaidouidquio. Bëshuaido yec capuenquio icquido yec canite tsasiaido yec quec tabadpondash. <sup>4</sup> —“Nuquin Papan abi yacnoshon uaid mayan bëdan tèccuascaid acten abia mentoadquid bëdanquid,” quedeneque. Tëccuascaic ma chobono —quiash cainec tabadpondash.

<sup>5</sup> Adnubien Esusën ënden caniaidquio ambobi uesho istuidpondash. Ëndenquimboshë aton dada icsabudash seta dadpen 38tedquiobi matamec capuenquio yec icsabudtsaidquio nepondash. <sup>6</sup> Adsho istuidshun: —Ëdenquio daicsabudaïd nec —quequin tantiashun: —¿Bëdanteda bune? —catuidpondash Esusën. <sup>7</sup> Adoaquien: —Ai ¿mitsipadequini bëdampe? Èbi bëdiactscëcquio nidnuc utsiba badedquio mentoadteniosh. Èbi buanquin mentoquid nibëdec —quepondash daicsatsaid. <sup>8</sup> Adshobien Esusën: —Mìn ushte nactenatquin buanec nid —cac <sup>9</sup> badedquio aton dada bëdantanquin aton ushte buanec nidpondash. Aid ushë chonoadenquio icte ushë niøndash.

<sup>10</sup> Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. <sup>11</sup> Adoaquien: —Èbi bëdameboedën: “Buanec nid,” cac mambi naiyoc —quepac caondash Esusën bëdameboed. <sup>12</sup> Adsho tantiashun: —¿Tsuntsin naosh? —caquien: <sup>13</sup> —Tsaudi. Èmbi isacmaïd ëmbi isquiambobi badedquio nidacosh matses dadpen icnu —quepac caondash bëdameboed.

<sup>14</sup> Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsacboed Esusën istuidpondash. Istuidshumbien: —Tantia. Mibi chuinu. Èmbi bëdameboedquio mibi neque. Mimbi icsamboen naïd ënash bëdambo icta. “Nuquin Papan cuidquiac bëdanenquio yec daicsabudquiochitomane,” quiash adta —capondash Esusën.

<sup>15</sup> Adoaquien bëdameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bëdameboed Esus niosh —quequin chuituidpac caondash. <sup>16</sup> Aden chuïsho tantiatanequien: —Chonoadenquio icte ushënuïdi bëdamepac caosh. Icsambo iquec —quequin con matses chuiquidon Esus chieshëmpac caondash. <sup>17</sup> Adnubien: —Mibi adosh —quesho tantiashun abi chieshënuïdo istuidshun Esusën naden chuipondash. —Mimbi Nuquin Papa caïd con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. <sup>18</sup> Adsho tantiatanequien: —“Chonoadenquio icte ushën naquid icsambo iquec,”

nuqui caboedquo: “Nuquin Papambo con pa nec,” quiosh. Adquid ic-samboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuiquido.

*Nuquin Papan Mado nebi, quiaid*

<sup>19</sup> Adec abi chieshënquido abi cuesunete bunshobien padpiden istuid-shun chuipondash Esusën. —¿Ëmbimbo naidtambi nadio? Padenquido. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. <sup>20</sup> Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. <sup>21</sup> Con Papadquidquio yec unësaid uincuequidquo nebi. Matses ëmbi tantiaidotedi ëbëdi tabadmenuen uincuemendambi. <sup>22</sup> ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa. <sup>23</sup> Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatipimbo icquidon ëbi chomiondaid Nuquin Papatsen tantienquio iquec. <sup>24</sup> ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquio icquin ëbëdi tabadmendambi. Cuidtequid icboedi ëbi tantiasch ëbëdi tabadtequid yanendac —quepondash Esus.

<sup>25</sup> Adashic padpidec onquec: —Tantia. Mibi padpiden chuinu. Unësaidën tantienquio yachimboen ëbi tantienquio icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësascho uincuemeshun ëbëdi tabadmendambi. <sup>26</sup> Con Pan icmiacpadequi unësaid uincuequidquo nebi. Abibi unëstiapimbo icquid icquin unësaid uincuequidquo con Pa nec. Ambi icmiacpadquequi abi yacpadquidquo iquebi. <sup>27</sup> Adec unëstiapimbo iccondaidi matesash icsaisambo icsho Con Pan matses icsaido cuidquid icmiondashi. <sup>28</sup> Ëbi adsho tantiashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënquio ëmbi cuënac unësaidotedi uincuenendac. <sup>29</sup> Adec uincuenascho ëbi tantiaquido ëbëdi tabadmequin ëbi tantiesabo icsaido cuidacno nidmendambi. <sup>30</sup> Ëmbentsëqui nainquio iquemb. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquio icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chiec.

*Utsintsen ëbi chiec, quequin Esusën chiaid*

<sup>31</sup> Adshumbic Esusën abi chieshënquido chuioapondash. —Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiashun: “Abimbo mimbi caic,” mimbi ëbi catiapimbo iquec. <sup>32</sup> Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. <sup>33</sup> Aden ëbi chuiquid utsi actën mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. <sup>34-35</sup> Aden chieshtoenquio icquin bëdamboen chuipadenec. Chuisho

tantiatsash mibi bédambo icuidtsëccondac. “Èmbi Uan padon naid chuisho tantiashun: ‘Abimbo mimbi caic,’ èbi capashun. Èbi adoshò bédamboen istsiambi,” quequin mimbi tantiondaid Uan caombi. Matses icquimbi Uanèn èbi bēdiactsc tantiamequin chuipadenec. ¿Adquid matsesēnuidtsēquidabi abimbo chuipec? <sup>36</sup> Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin èmbi ismesho isash: “Ai, adquid nec,” quetiadquidi mibi nec. <sup>37</sup> Èbi chiechidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. <sup>38</sup> Adembidi ambi dada uamequin chiampidquio ma mimbi bédamboen tantienquio yoc. Aid bédamboen tantiashumbien Nuquin Papan chomiondaid èbitsen mimbi tantiatsiac. <sup>39</sup> Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabéd tabadtequid nebi,” mibi quepec. Ma èbimbo chuiquin Nuquin Papan dada uamepampid neyoc. <sup>40</sup> Aden dada uamepampid isbanquidombi mimbi èbi tantienquio iquec. Èbi tantiashoembi mibi Nuquin Papa yacno èbéd tabadmetsiandac. <sup>41</sup> “Èbi adsho tantiashun ma matsesēn èbi: ‘Bédambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. <sup>42</sup> Èbi tantienquio icsho isun: “Nuquin Papa tantiesabo nec,” quequin mibi tantiembi. <sup>43</sup> Èmbien Nuquin Papan chiacpadomboen naic. Aden nasho mimbi èbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. <sup>44</sup> Mibibi tantiadec: “Mibi bédambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bédambo iquec,” cametiapimbo iquec —quepondash Esus abi chieshēnquido chiech. <sup>45</sup> Adashic padpidec: —¿Èmbentsēquidambi: “Èbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidēnquio Moisesēnsen: “Nēido icsambo iquec,” mibi caindac. <sup>46</sup> Aidēn chiampid bédamboen tantiaquimbien mimbi èbi tantiatsiac. Aidēn chiampidi mabi neyoc. <sup>47</sup> Aden Moisesēn chiampid tantienquio icquin èmbi chuiboedtsen mimbi tantiatiapimbo iquec —quequin Esusēn abi chieshēnquido chuipondash: —Moisesēn chiampid tantiaquidquio nebi —quequido chuiquin.

## 6

*Esusēn pete uatanquin 5000tedi pemiaid  
(Mat 14.13-21; Mad 6.30-44; Duc 9.10-17)*

<sup>1</sup> Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabēdtoshon potiacpondash. Aid chiambidi matses utsibon Tibedias capondash. <sup>2-3</sup> Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin èbi chedo chuipondash. Adnubien Esusēn matses dadpen bédamesho isboedo Esus isnuec chochopondash. <sup>4</sup> Nuquin Papan isadaidbo unēs uainquio icquin matamiampid inchēsh tantianuec pec tabadte ushē nèbi yanuc niondash.

<sup>5</sup> Aido cho-choshò istanequien Esus: —Uedipe, piucquid buanshun ¿mit-simbo pete bedtane nēido pemenu? —quepondash Uedipe chiech. <sup>6</sup> —¿Atoda queque? Tantienu —quiash adpondash Esus. —Pete bedabi icnuc èmbibi pete uanu —quequin otacquo tantiequi adondash. <sup>7</sup> Adoquien Uedipe: —Ma aidtedquio pemetiapimbo yoc. Inchēshēn ushē 8tedquioibi nidmec

chonoadshun bedaidtedimbo piucquid menequin pete bedshun: “Pemenu,” cac aidtedquio pemiadenquio ictsiash —quepondash Uedipe.

<sup>8</sup> Adnubien Andedesën Petedon utsin: <sup>9</sup> —Ma në madompin panëmpi Stedtsëc icpayoc, Icho. Nuëcquidëmpi daëdquioibi ictsec. Matses dadpenquio iquec. Aidtedtsëcquid pemetiapimbo iquec —caquien <sup>10</sup> Esusën: —Padi. Aidi bëdambo iquec. Abitedi: “Nëmbö tabad,” caban —cac: —Nëmbö tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

<sup>11</sup> Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bëdamboshë iquec. Mímibi uaid nëid pete bëdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembiti Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. <sup>12</sup> Aden ambi piactembi pebededacshobien Esusën: —Napi uaid secainda. Sandoshon dayun ua —cac <sup>13</sup> tsitsan dapan napiuaid sandoshon dayun uapondambi tsitsan 12tedquioibi sandoaid icnuc.

<sup>14</sup> Aden pemiaquien pemiaido: —Comapenen tantiaquin Esusën pete dadpenquio icmiac. Moisesën chuipampidshenda nepec. “Nuquin Papan bëdamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquio yec. <sup>15</sup> Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

*Esus acte bëntse choaid*  
(Mat 14.22-27; Mad 6.45-52)

<sup>16</sup> Esus cuembon inchëshbudtsëqui chian budondabi ëbitedi. <sup>17</sup> —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. <sup>18</sup> Adnubien cunquequid dapa cunquetuidpondash. Acte comapenec tēccuasquenuc <sup>19</sup> uncadenquio yampondash. Ènapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. <sup>20</sup> Adshobini: —Èbi neque. Dacuëndenda —capondash. <sup>21</sup> Adoac: —Esus nec —quetanquin badedi antsadtomiondambi, Aid antsadtometanquin badedquio potepondambi. Nandoash ambobi ushondabi Capednaun yacno.

*Pemiaidon Esus istuidoaid*

<sup>22</sup> Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aibëd nidenquio icpaboc. ¿Mitsimbo nidpash? —quepac caondash pemiaido. <sup>23</sup> Adnubien shubu dadpen icquid Tibedias caid yacnocquidon cano dadpen bē-bëpac caondash. Pete pemebocno anoentsëqui nando-nandosho isash: <sup>24</sup> —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon <sup>25</sup> Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquio yec: <sup>26</sup> —Tantia. Mibitedi chuinu. ¿Èbimbo tantianueta chodio? Padenquio. Èmbi

pete uasho isash: “Nuquin Papan namiaidën naoshe. Istanu,” ¿quetta ictio? Peteuidtsëqui tantiaquin ma mimbi ëbi nibëneyoc. <sup>27</sup> Peteuidtsëqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bédamboen nata. Aden nash ëmbi icmiacpadquiec Nuquin Papabêd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. <sup>28</sup> Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? —caquien: <sup>29</sup> —Nuquin Papan chiacpadomboen natiadquo icquin ambi chomiondaidquo tantiata —quepondash Esus ambi pemiaido chiec.

<sup>30</sup> Adoaquien: —¿Mimbi aden chuishouididambi: “Adquid nec.” quequin tantiape? ¿Atotsi utsi comapenen tantiaquin mimbi ëbi ismepatia? <sup>31</sup> “Ëndenquimboshë pete nibëdacnoshon Moisesën con tsusedpabo nibedbëdi sequiaid pete pemianepampic,” quequin dada uapampid isombique. Adquid nacenquin ëbi isme —quepondash pemiaido peteuidtsëqui tantiec. <sup>32</sup> Adoaquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquo iquec. <sup>33</sup> Aid petebimboecquidën matses bédambo icmetsiash pete piacbimboecnuc —quepondash Esus abibi cadequi.

<sup>34</sup> Adsho tantiash petembo ca danec: —Ënenquo icquin adquid ëbi pemeta —quepondash pemiaido ambi peboeuidtsëqui tantiec. <sup>35</sup> Adshobien Esusën: —“Ëbiuidtsëqui petebimboecquid icquin matses bédambo icmequid nebi,” caimbi. Ëbi tantiaquid ënenquo icquin bédambo icmendambi petebëdi acte bundoenquo yacbimboecnuc. <sup>36</sup> Ëmbi chuibocpadomboen ma mimbi ëbi tantienquo icboc. Ëmbi comapenen tantiaquin nabansho isumbi ma mimbi ëbi tantienquo icboc. <sup>37</sup> Utsibombien ëbi tantierendac. Nuquin Papan tantiamiaidtedishun ëbi tantiasho bédamboen isquin cacumenquo iquendambi. <sup>38</sup> ¿Ëmbi tantiacpadomboen naquidtabi nedi? Padenquo. Nuquin Papan chiacpadomboen nanuec mabi abi yacnuësh chondac. <sup>39</sup> Aden aidën chiacpadomboen nanuen ëbi tantiaquido unësascho uincuemeshun cuidenquo icquin ëbëdi tabadmendambi. Unësaid abitedi uincumete ushën adoendambi. <sup>40</sup> Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemëboedo chiec.

<sup>41</sup> Adec: —Nuquin Papa yacnuësh chonaid yec petebimboecquid nebi —quesho tantiashien con matses chuiquido: <sup>42</sup> —¿Adquidida nepc? Ma icsamboen chuiPAYOC. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmëdquid neyoc. Ma Osen mado neyoc. Anisen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

<sup>43</sup> Adshobien Esusën: —Shoshquetsëcquin ëbi icsamboen chienda. Abimboembi caoc. <sup>44</sup> Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësascho unësaid uincumete ushën uincuemendambi. <sup>45</sup> Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuipampic. Aden

Nuquin Papan tantiamiaido ëbi tantiaquido yantsiash. <sup>46</sup> “Ambi tantiamiaidën matsesën Nuquin Papa isplash,” quenquo iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaids matsesondabi —quepondash Esus: —Matsesi nec —abi caquido chiec.

<sup>47</sup> Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. <sup>48</sup> Petebimboecquid icquin aden tabadmendambi. Adecbidi bëdamboec tabadmianquid nebi. <sup>49</sup> Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. <sup>50</sup> Petebimboecquid utsien Nuquin Papa yacnuësh chondaids nëmbobi iquec. Aid piash ëmbi chiacpadquiec padpidec unësenquo yec Nuquin Papabëd tabadtequid yanendac. <sup>51</sup> Adquidquo nebi. Con nami piash matses unëstiapimbo icquid yanendac. Adquidquo matses icmenuec ëbided cuidadquin con nami menendambi —quepondash Esus ompoacbimboen chiec. —Ëbi tantiaquido nëbi bëdamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquo icnuec ëbided cuidadec unësendabi —quequin tantiec: —Con nami menendambi —quepondash Esus.

<sup>52</sup> Adec: —Con nami piash matses unëstiapimbo icquid yanendac —quesho tantiasien namimbo ca danec con matses chuiquido onqueuededpondash. Utsi-utsiec: —¿Mitsipaden Esusën aton nami nuqi pemepatsiash? Aidquo tantiatiapimbo iquebi —quecuedednubi utsi-utsiec: —¿Atotsi chuitiadquo yec niosh? Chuisho tantianu —quecuededpondash. <sup>53-54</sup> Adsho tantiasun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquo nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid mibi yanendac. Adquid icsho unësaïdo uincuemete ushënquo uincuemendambi ëbëdi tabadmenuen. Ëmbi chiacpadomboen nainquo yash Nuquin Papabëd tabadtiapimbo mibi iquendac. <sup>55</sup> Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquec con nami icsabudec ëbided cuidadec unësaïd tantienquo yec mibi bëdamboec tabadtiapimbo iquendac. <sup>56</sup> Aden ëmbi namibëdta intac chuisho bëdamboen tantiasun ëmbi chiacpadomboen matsesën natiadquo yanendac. Adsho isun aïbëd tëshnanenquo icquin bëdamboec tabadquid icmendambi. <sup>57</sup> Nuquin Papa unëstiapimbo icquid yec matses uincuemequidquo nec. Aidën chomiac ambi namiacpadomboenuidi naquin ëbi tantiec tabadquid unësacsho uincuemequin unëstiapimbo icquid icmendambi. <sup>58</sup> Aden ëmbi naïd tantiamenuec: “Nuquin Papa yacnuësh chondaïd petebimboecquid utsi iquec,” quïobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampïdquidpenquo nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac <sup>59</sup> —quepondash Esus Nuquin Papan chiaïd chuïbante shubunuësh Capednaun yacnuësh.

### *Abi tantiauidquïdon Esus nianondaïd*

<sup>60</sup> Adec: —Con nami pequinc con intac acquinc cash mibi bëdambo ictsiac —Esus quesho tantiasien abëd icquido utsi-utsiec: —Aïdën chiacpadomboen natiapimbo iquebi. Icsamboen chiec —quepondash Esus tantiamen-

quio yec. <sup>61</sup> Adec onquesho ambembi tantiash Esus onqueoapondash. — ¿Ëmbi chuiboed tantiash chieshtotiadquioda ique? <sup>62</sup> Nuquin Papan matsesmiad yequi unēsash ëbi iccondacno ëbi nidacsho isash ¿atoda mibi quen-dac? Abimbo caombi. Nuquin Papa yacnuësh chondaidini nec. <sup>63</sup> Namimbo intacquiobēda ca danequien mibi nec. ¿Namimbo pequinc intacquo ac-quinc cashta mibi bēdambo icpatsia? Padenquo. Nuquin Papan Mayanën ëmbi chuiboedbēda ëbi tantiamequin matses bēdamboec tabadquid icmetsi-ash. Adoaid unēsash Nuquin Papa yacno ëbēdi tabadtsiash —quepondash Esus cuembo chiec. <sup>64</sup> Adashic padpidec: —Ëmbi aden bēdamboen chiaqui utsin-utsinquien mimi ëbi tantienuo yanendac —quepondash abi tanti-aidquido chiec. Aido tauamboec abēdi nidnuc: —Nēidēn ëbi tantienquo yanendac. Nēid utsin ëbi chieshēnquido ëbi bedmendac —quequin ambembi Esusēn tantiapanēdash.

<sup>65</sup> Adashic padpidec: —Ëbi tantiaidquido tantiaquin naden chiombi. “Nuquin Papan tantiamiabi yaidēn ëbi tantiatiapimbo iquendac. Nuquin Papan tantiamiadēnquien ëbi tantiatsiash,” quequin chiombi —quepondash Esus. <sup>66</sup> Adsho tantiashun dadpeshun Esus nianondash. <sup>67</sup> Aden ni-anaquien Esusēn abēd icquido 12ted icquid chuipondash. —¿Mimbisendabi niampe? —caquien <sup>68</sup> Petedo: —Padenquo. ¿Tsudabēd icnuendambi mibi nianuc? Mibipadquid utsi nibēdec. Mimbuidtsēquien: “Ëbi tantiaquid bēdamboen isquin unēsacsho uincuemeshun ëbēdi tabadmendambi,” que-quin chuihoc. <sup>69</sup> “Abimboen caosh,” quequin mibi tantiembi. “Nuquin Papa yacnuësh chonēdaid yec bēdamboshē icquidquien nec,” caombi mibi. Mibi niantiapimbo iquebi —quepondash Petedo Esus caic. <sup>70</sup> Adoaquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adondaid abentsēc Satanasēn namiaidquio yec icsamboshē iquendac —quepondash Esus. <sup>71</sup> —Simon Iscadioten mado Udasēn ëbi chieshēnquido ëbi bedmendac —quequin ambembi tantiash adondash Esus.

## 7

### *Aton utsibon Esus tantienquo yaid*

<sup>1</sup> Abi tantiaidquidon nianac Cadidia yacnoidi yuec Esus capucuenepon-dash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquo icpondash. <sup>2</sup> Adnubien con matses abitedi: —Edusaden yacnuësh cuēdēntanu —quiampondash. Adanec nidaid utsi Udeya caidēn nidec 7tedec ushec cuēdēnuec matses dad-pen nidacno Edusaden yacno nidanepondash. Cuēdēnuec Esus nidenquo icpondash. <sup>3</sup> Adec nidenquo icsho isumbien aton utsibon: —Edusaden yacno nidec nid. Mibēd ictiadquio icquid ano icnushe. Comapenen tanti-aquin nabanquin aido ismec nid. <sup>4</sup> ¿“Ma matses dadpeshun ëbi tantianu,” quequinda matses daēdpactsēc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. <sup>5</sup> —Nuquin Papan chomenēdaidquio nec —quequin tantienquo icquimbi adopondash aton utsibon.

<sup>6</sup> Adoaquien Esus: —Matses dadpen nidnuc nidtiadquio yec mibia nidta. Abitedishun isnuc nēbi nidtiapimbo iquebique. <sup>7</sup> Mibien anocquidon chieshēntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshēnondashibique. <sup>8</sup> “Cuesunenushē,” quiash nēbi nidtiapimbo iquebique. Mibia nidta. Nuquin Papan tantiacpadec nidendabi <sup>9</sup> —quiash anobi Cadidia yacno Esus tabadpondash.

*Esustsen Edusaden yacnuësh cuëdëneuc nidaid*

<sup>10</sup> Aden aton utsibo nidanemiasb yuec-yuecpectsëc ictanec abitsen Esus nidpondash Edusaden yacnuësh cuëdëneuc nidec. Abitedi ismenquio yec tsyuec Esus nidpondash. <sup>11</sup> Adnubien con matses cuëdëncuededacnoshon abi chieshënkuidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. <sup>12-13</sup> Adsho tantiash con matses Esus chieshënkuido dacuëdëneuc utsibo tantiamenquio yec shoshquetsëcquieuc onquepac caondash. Utsi-utsiec: —Esus bëdamoshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuedepac caondash.

<sup>14</sup> Adnubien con matses cuëdëneuc taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. <sup>15</sup> Adsho tantiash: —¿Mitsipaden tantiashun chuipeñ naic? Nuquibëdñan Nuquin Papan chiaid isbanambo aidën iquec —quepondash con matses chuiquido. <sup>16</sup> Adsho tantiash Esus: —Ëmbembi chienquio icquin ëbi chomiondaidën chiaidquio chiec nebi. <sup>17</sup> Nuquin Papan chiacpadomboen natiadquio icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. <sup>18</sup> Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquien nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac. <sup>19</sup> Mimbien adoenuo iquec. Mimbentiatsiash nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbentiatsiash —quepondash Esus abi chieshënkuido chiec.

<sup>20</sup> —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuduedash mibentiatsiash yec onquepec. ¿Tsuntsin mibentiatsiash? —capondash. <sup>21</sup> Adoquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenentiatsiash dada bëdamepondambi. Aden bëdamicsho isash: “Adopenshenda naic. Chonoadenquio icte ushën daicsatsaid bëdamequin Nuquin Papan chiaid niac-niacposh,” ma mibentiatsiash. <sup>22</sup> ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbentiatsiash Moisesën chiaid tantiaquin dada bacuë tishachsho 7tedec ushën shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquio ictaneshun adembidi Moisesëntsen adopampic. Nëbi adembidi naic chonoadenquio icte ushëmbi chonoadquimbi ma mimbentiatsiash shui dëbid dëteshuneyoc. <sup>23</sup> Aden Moisesën chiampid niacuenquio icquin shui nacnenquin mimbentiatsiash naic. Ëmbitsen daicsatsaid dada abichobi bëdamequin mimbentiatsiash naondac. ¿Atotsi quequin ëbi chushcai? <sup>24</sup> Chonoadenquio icte ushën dada bëdamequid icsho: “Icsambo mibi iquec,” mimbentiatsiash ëbi capec. Aden ëbi bëdamboen tantienquio icquin mimbentiatsiash chiec. Ëbi bëdamboen tantiaquioshon ëmbi naboed bëdamboen chui —quepondash Esus abi chieshënkuido chiec.

*Esus bedshun cuesunetiad, cauidaid*



<sup>25</sup> Adec Esus: —Chonoadenquo icte ushën naondambi —quesho tantiashien anocquido Edusaden yacnocquido nadeq onquecuededpac caondash. —Nuqui chuiquidon: “Cuesunetiad,” caboedien nëid nechitec. <sup>26</sup> En is. Abi chieshënquidobi tabadquin chieque. Chuiso ma chuiquidon chushcainquo icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien <sup>27</sup> aidobidi: —Nuquin Papa yacnuësh choquid ictiapimboen aid iquec. Abi caniacno tantiambi. Nuquin Papa yacnuësh choquid abi caniacno tantiadenquo ictsiash —quepondash ano tabadquido.

<sup>28</sup> Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbi padenquo yoc. Ëbemi chondaidpenquo nebi. Ëbi chomiondaid abi iquec. Ma mimbi aidquiobi tantienquo yoc. <sup>29</sup> Ëmbien aidquo tantiendac. Aidbéd tabadondaidquo nebi. Adsho aidën: “Nid,” cac chondaic nebi —caquien <sup>30</sup> —“Con pa Nuquin Papano nec,” quechitequien nec —queshun abi chieshënquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nëbi ma Esus unës uainquo icnu —Nuquin Papa quenec bedmenquo icquin Esusën mêtampanédash. <sup>31</sup> Esus cuesunetiadquo icnubien utsibon dadpenshun Esus tantiabempondash. —Nëidpadquid utsi nibédtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpenshun Esus tantiabempondash.

### *Ëbi istuidenquo iquendac, quequin chiaid*

<sup>32</sup> Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abédtan chuiquid utsibo chuipac caondash. —Ëmbi chuibocpaden Esuuien bedtiad. Icsamboec onquioshe —cac: —Ai, adembien ictiad —quepac caondash. Adshumbic abéd icquido sondado chuiquin: —Baded bedtan —capac caondash. <sup>33</sup> Adoac nidanequin tantiatuidaquien nadeq Esus onquepondash. —Yuec-yuecpactsec mibéd icashic ëbi chomiondaidbédtsen tabadoaic nidendabi. <sup>34</sup> Ëbi nibënquin ëbi istuidenquo mimbi iquendac. Ëbi nidacno mibi nidiapimbo iquec —quepondash Esus.

<sup>35</sup> Adsho tantiash abi chieshënquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash?

<sup>36</sup> Tantiadenquo yec onquepec. ¿Atotsi quepec? “Ëbi nibënquin mimbi ëbi istuidenquo iquendac. Ëbi nidacno mibi nidiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

### *Aton Mayan abi tantiaquidbéd tabadmete chiaid*

<sup>37</sup> Adnubien cuëdëneq enëdte ushënquibi con matses abitedimbo cuëdëneq cho-chopondash. Cho-choash tabadbudnubien nidtoash comapeneq onquequin Esusën chuipondash. —Acte natia bunacnimboec Nuquin Papa tantiate bunquin ëbi bédamboen tantiata. <sup>38</sup> Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobéd tabadmendambi. Adoac mibéd tabadquin mibi bédamboen tabadmequin utsibotsen Nuquin Papa tantiate bumetsiash —quepondash Esus. <sup>39</sup> —Nuquin Papabédta ëbi tantiamequidquo Nuquin Papan Mayan

nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuendondash.

*¿Nuquin Papan chomiaidta nepeba? Esus caid*

<sup>40</sup> —Nuquin Papa tantiate bunquin ëbi tantiaata —Esus quesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquio choendac,” quequin nuquin tsusedpa Moisesën chiampidien Esus nechitec —quenubien <sup>41</sup> utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? <sup>42</sup> Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec —quepac caondash. <sup>43</sup> Adec dadpen: —Bëdambo icquid nec —quenubi aidtedbidi: —Icsambo iquec —quepac caondash. <sup>44</sup> Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

*Isadaidbo chuiquid dapabon Esus chieshënaid*

<sup>45</sup> Adnubien: —Esus bedtan —caboedo sondado bedabi Esus chieshënuquido chiec chopac caondash. Chosho: —¿Atotsi quiash bedabi cho? —caquien: <sup>46</sup> —Ma bëdamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —quesho <sup>47</sup> tantiashien: —Aid muasho tantiashun: “Abimbo caic,” ¿cainda icco? <sup>48</sup> ¿Adambi Esus muasho tantiadio? ¿Ada tsusiobon tantiadiosh? Padenquio iccosh. <sup>49</sup> Utsibombien tantiash. Adquidon ëmbi bëdamboen tantiacpadomboen Nuquin Papan chiampid tantienguio iquec. Icsambo aido iquec. Aido cuidchitoshon. Esus icsambo iquec —quepac caondash con matsës chuiquido padiseyobo Esus chieshë nec.

<sup>50</sup> Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. <sup>51</sup> —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. <sup>52</sup> Adoquien chuiquido: —Esus yacpadec Cadidia yacnuësh caniquid mibi nepanuï. Aid tantiaguidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquio choenguio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. <sup>53</sup> —¿Chuimiabida cuidpec? —quetsëcscho aden Nicodemo chushcanec abitedi nidaniac caondash aton shubuno ushec nidec.

## 8

*Bënepenguio chudmequid cuënoten seshunetsenaïd*

<sup>1</sup> Nicodemo chushcabon Esus macuësh dapa Odibos caid yacno ushec nidondash. <sup>2</sup> Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen chochoc abi datsidadsho Esusën chuipondash.

<sup>3</sup> Aden chuinubien con matses tsusiobon aton bënëpenquio chudmesho istuidshun chido bëpondash. Moisesën dada uampid chuibanquidobëdtan

tsusedpabon chiampid namequido padiseyobon Esus yacno bëshun chido nənantanquio nitsimpondash. <sup>4</sup> Adshumbien Esus chuipondash. —Aton bënëpenquio chudmesho istuidshun nëid bëombi. <sup>5</sup> Nuquin Papan chiaid Moisesën naden dada uapampic. “Aton bënëpenquio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. <sup>6</sup> —¿Atotsi Esus quepatsiash? Nuquin Papan chiampidquio chienquio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquio icquin shuebudshun mëdanten nidaid dada uapondash. <sup>7</sup> Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuënoten se —quetanec <sup>8</sup> padpidec shuebudshun mëdanten nidaid dada uaoapondash.

<sup>9</sup> Adnubien: —Nuquin Papan chiaid niaquesambo icquin en mimbria cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotšen tsyuec nidanepondash chidouidsëqui Esusbëd icnuc. <sup>10</sup> Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: <sup>11</sup> —Ai, nibëdosh —quesho tantiashien: —Ëmbimbo mibi cuënoten senquio iguembique. Mibi icsaïd ënash bëdamboec tabadec nid, champi —capondash Esusën. Adoac chido nidondash.

### *Pabiate cuembo icnuc tantiamequid*

<sup>12</sup> Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuiopondash. —Pabiate cuembo icnuc con Pan bëdamboen iste matses tantiamequidquio nebi. Ëmbi tantiamic ëbi tantiaguïdo icsateuïdi bunenquio yanec bëdamboec tabadte buncuenendac. Adec ëbëd tabadtequid yanendac —quepondash Esus.

<sup>13</sup> Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. <sup>14</sup> Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienuïdo icboc. <sup>15</sup> Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquïo icnuna,” quequin nëbi chienquio iguembi. <sup>16</sup> Aden chuiquin abimbo chuïtsiambi. Ëmbentsëqui chienquio icquin ëbi chomiondaïd Nuquin Papabëdtambi chuiquin abimboshë chuïtsiambi. <sup>17</sup> Nuquin Papan chiaidquïdo Moisesën naden dada uapampic. “‘Icsaosh,’ quequin daëdshun chuïsho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuïsho tantiash: ‘Abimbo chiec,’ quequid yendac. Abentsëcshun chuïshoen uua caquid yendac,” quequin Nuquin Papan chiaidquïdo Moisesën dada uapampic. <sup>18</sup> Aden Moisesën dada uampid tantiashun ëmbentsëqui chienquio iguembi. Ëbi chomiondaïd con Pabëdtantsëqui chiembi —quepondash Esus.

<sup>19</sup> Adsho tantiashun abi chieshënquidon: —¿Mitsimbo papa icpec? —capondash. Adoquien: —Con Pa ëbëdta ma mimbi tantienuïdo icboc. Ëbi tantiaquimbien mimbi con Patsen tantiatsiac —quepondash Esus abi

chieshënquido chiec. <sup>20</sup> Abi chieshënquido onquecuededec quënën tabadnubi aid quënë cachotsëqui Nuquin Papa tantiaquin piucquid menequin nauedte tabëcacoshon Esusën chuipondash. Adec Esus anocentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

### *Utsibon Esus tantiauidaid*

<sup>21</sup> Adnubien Esusën abi chieshënquido padpiden chuiopondash. — Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. <sup>22</sup> Adsho tantias Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiehta: “Ëbi nidacno mibi nidtiapimbo iquec,” quepec? —quepondash abi chieshënquido. <sup>23</sup> Adsho tantias Esus: —Mibi matses nec. Ëbien con Pa yacnuësh chondaidquio nec. <sup>24</sup> “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

<sup>25</sup> Adsho tantias abi chieshënquido: —¿Mitsipadquid icquin ëbi aden chie? —quepondash Esus caic. Adoaquien: —Ëmbi chianeboedquiobi mabi neyoc —queoapondash Esus. <sup>26</sup> Adashic padpidec: —Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muanquio chiaidquio chiendambi. Aidën chiaiduidi matses abitedi chiendambi —quenubien <sup>27</sup> Esus chieshënquidon: —Abi chomiondaid Nuquin Papambo nec —quequin tantienquio icpondash. <sup>28</sup> Aden tantienquio icsho isun Esusën padpiden chuiopondash. —Matsesmiaidquio icshobi ëbi cuesten dectanshumbic mimbi ëbi tantiabenendac. “Ambi chiacpadquidshenda nepadenec. Ambembi chiaid chienquio icquin aton Papan chiaidquio chuiquin aidën chiacpadomboenshenda napadenec,” quequin ëbimbo mimbi tantiendac —quepondash Esus. <sup>29</sup> Adashic padpidec: —Nëbi ëbi chomiondaid ëbëd iquec. Aid bëdambo icmenuen ambi chiacpadomboen nasho isun ëbi nianenquio iquec —quepondash Esus.

<sup>30</sup> Adsho tantiasahun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëccondash dadpeshun.

### *Satanasën yuabo nec, quequin Esusën chiaid*

<sup>31</sup> Adsho isumbien Esusën abi bëdiactsëc tantiauidtsëcboedo chuipondash. —Ëbi tantiaquidën ëmbi chiacpadomboen natiadquio iquendac. <sup>32</sup> Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chiec. <sup>33</sup> Adec Esus: —Yua —quesho tantiasbien: —Abadauan yampidën tsyuecquido yec utsin yuacmaido nebi. Tantienuo icquin mimbi icsamboen chiec. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

<sup>34</sup> Adoaquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. <sup>35</sup> ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. <sup>36</sup> Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec

tabadte bumequin abi yacno ëbëd tabadtequido icmendac —quepondash Esus.

### *Satanasën madobimboecquido chiaid*

<sup>37</sup> Adshumbic Esusën abi chieshënquido chuioapondash. —“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquido mibi iquec. Ëmbi abimbo chuisho tantiate bunenquio icquin ëbi cuesunetiadquido mibi icpec. <sup>38</sup> “Con Pabëd tabadquin isondambi,” quequin ëmbi bëdamboen chuisho tantienquio icquin min papabimboecquidën chiacpadomboen mimbi naindac —quepondash Esus abi chieshënquido chiec. <sup>39</sup> —Min papabimboecquidën chiacpadomboen mimbi naindac —queshobien: —Con tsusedpa Abadauanën nacpadomboen mambi napaboc —capondash Esus chieshënquidon. Adoquien Esus: —Ma mimbi adoenuo yoc. Abadauanën nacpadomboen naquin mimbi bëdamboen natsiac. <sup>40</sup> Bëdamboen natiapimbo icquin mimbi ëbi cuesunetiadquido iquec. Nuquin Papan chiaidquido abimbo chuisho mimbi adotiadquido iquec. Nuquin Papan chiaid tantie ma Abadauan cuesuniantiapimbo icpampiyoc. <sup>41</sup> Min papabimboecquidën namiacpadomboen naquidien mibi nec —capondash Esusën abi chieshënquido chuiquin. Adoquien: —Mambi Nuquin Papauidsëqui tantieyoc. Utsi tantiatiapimbo icquin Nuquin Papauidsëqui con pa caimbi —quepondash Esus chieshënquido.

<sup>42</sup> Adsho tantiaishien Esus: —Nuquin Papambo tantiaquimbien mimbi ëbitsen tantiatiasiac. Ëbemi choenquio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatiasiac. <sup>43</sup> ¿Mitsipadquid yec ëmbi chiaid tantia: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdacobimboec mibi iquec. <sup>44</sup> Min papabimboecquid Satanas nec. Aid bunacpadenuidi mimbi natiadquido iquec. Ëndenquimboshë Nuquin Papan tauamboen matses uanubi min papabimboecquid cuesunianquidquido nepampic. Aton padibi nec. Nuquin Papan chiacpadomboen namenuo yec chieshë nec muaquidquido nec. Aton padibi icquid yec matses muamequidquido nec. Aidën madobimboecquin mimbi ëbi tantiatiapimbo icpec. <sup>45</sup> Ëmbi Nuquin Papan chiaidquido abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bëdambo ictsiasiac. Mabi icsambo icquidpenquio neyoc. <sup>46</sup> ¿Tsuntsimbini: “Mibi icisaoc,” capatsiasiac? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? <sup>47</sup> Nuquin Papa tantianuequidën Nuquin Papan chiaidquido chuisho tantiatiasiac. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

### *Esus chieshënquido cuënoten siantiadpambo yanaid*

<sup>48</sup> —Nuquin Papa tantiesabombo ma mibi neyoc —Esus quesho tantiaishien abi chieshënquido: —Ma mibi podobitsi icsa dapuduedash neyoc. Tantiadenquio yec mibi onquic. Samadia yacnocquidobimboec icsamboshë ma mibi iqueyoc —caquien <sup>49</sup> Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquido abimbo mimbi chiec,” catiadquidi mimbi ëbi: “Muec nec,” capec. <sup>50</sup> “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac.

51 Tantia. Mibi bēdamboen chuinu. Ēmbi chiacpadomboen naquidquo unēsenuio ictsiash —quepondash Esus ompoacbimboen chiec. —Ēbi tanti-aquido unēsacsho uincuemeshun Nuquin Papa yacno ēbēdi tabadmendambi padpidec unēstiapimbo icnuc —quequin tantiec adondash.

52 —Unēsenuio ictsiash —quesho tantias Esus chieshēnquido: —Ma mimi tantiadenquo icnuc chuiPAYOC. Adsho: “Mayan icsa dapuduedashien nec,” mibi caombi. “Ēmbi chiacpadomboen naquidquo unēsenuio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bēdamboen isaidombo abitedi unēspampic. 53 ĶAido Nuquin Papan namiampidombo icnuc Nuquin Papan namequiaidquioda ne? ĶMitsipadquid mibi nepe? Muequien mibi nechitec —quepondash.

54 Adoaquien Esus: —Ēmbemi: “Mabi: ‘Bēdambo iquec,’ canu,” quequin ēmbi nac icsambo ictsiash. Mimi: “Aiduidtsēqui tantiembi,” caboedēmbini: “Nēid con Mado Esus bēdambo iquec,” quequin ēbi comapenen tantiaquin namec. 55 “Tantiembi,” mimi caboed Nuquin Papa ma mimi tantienquo yoc. Ēmbien Nuquin Papa tantiaquie. “Aid tantienquo iquemi,” quec mibi yacpadeC muatsiabi. Mambi con Pa tantiaquin ambi chiacpadom-boen nayoc. 56 Mimi: “Con tsusedpan nacpadomboen naimbi,” caboed Abadauan: “Nuquin Papa yacnuēsh choash bēdambo icmianquidquo mat-sesbēdi tabadendac,” quequin tantiec cuishonquepadenec. Nuquin Papan tantiamiac ēbi aden tantiapadenec —quepondash Esus. 57 Adsho tanti-ashun Esus chieshēnquidon: —Ma mimi min seta 50tedi matamiambo yoc. Adash ma mibi tsusiobudabi iqueyoc. Abadauanēn mibi tantiatiapimbo icpampic —caquien 58 Esus: —Abimbo caimbique. Tantiata. Abadauan tishabi icnubi ēndenquimboshē ictenebi. Nuquin Papapadquidquo nebi —quepondash Esus. 59 Adsho tantias nēishtanequien: —ĶIcsamboenda chuipec? ĶNuquin Papada muauapebac? —quetanquin cuēnote dapa bedtanequin: —Seshunenu —cac siadenquo yec ompodanec cuempondash Esus.

## 9

### *Esusēn bēshuaid bēdamiaid*

1 Yuecquo ictaniash chonoadenquo icte ushēn capucuenequin Esusēn dada bēshuaid istuidpondash. Anin bēshuacshobi tishnēdaid niondash. 2-3 Aid istuidshumbimbi: —En chui, Icho. Tiantianu. ĶAtotsieshun Nuquin Papan bēshu uapanēdash? ĶAton papabēd ani icsasho isun Nuquin Papan cuidquin bēshu uanēdaidta nepec? —caquien: —Padenquo. Utsi icsasho isun Nuquin Papan nambo icpanēdash —quepondash Esus. Adsho tantiashun padpiden: —ĶTishabi icnubi: “Abibi icsaindac,” quequin tantiashun Nuquin Papan bēshu uanēdaidta nepec? —caondambi. Adoaquien: —Padenquo. “Abibi ic-saindac,” quequin tantiashun Nuquin Papan bēshu uambo icpanēdash. “Ma con Madon comapenen tantiaquin ismenu,” quequin ambi tantiacpaden Nuquin Papan bēshu uapanēdash. Adoacsho anin tishnēdaid nec. 4 Nēbi ambi chiacpadomboen nanuna. “Nainabi inchēshmane,” quias comapenec chonoadnuna. Inchēshēn matses chonoadesa —quepondash Esus. —“Con Pan tantiaidtedi nainabi unēsmane,” qeshun unēsabi icquin con Pan chi-aidtedi nainendambi —quequin tantiec: —“Nainabi inchēshmane,” quias comapenec chonoadnuna —quiondash Esus. 5 Adashic: —Matsesbēd icquin Nuquin Papa bēdamboen tantiaquidquo nebiq. Nēidtsen tantiamenu 6 —quetanquin nidaidēn uicchun cuishtucatanquin nidaidbēdta uicchun cabiūntsēcshun bēshuaid bēbitaccpondash.

<sup>7</sup> Adotanguimbic: —Acte tiquidimbo icquid Sidoe caidën bēpamēdec nid — cac nidash bēpamēdtanec bēdamboen isec aton shubuno nidpac caondash. Aid acate con onqueten Sidoe quequin buanaid caic. <sup>8</sup> Aton shubuno nidshobi aton shubu anoentsēcquidon bēshuacboed istuidpac caondash. Adembidi utsibon: —Bēshuaid nebique. Piucquid becco —quedonetsec tsadtsēcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. <sup>9</sup> Utsi-utsiec: —Ai, aidquiobi nec —quenubi utsibo: —Padenquio. Aid-bimboecquidien nec —quesho tantiash: —Aidi nebi —quepac caondash bēshuacboed. <sup>10</sup> Adsho tantiashun: —¿Mitsipadec bēdano? —caquien: <sup>11</sup> —Esus caidën bēdamioshi. Nidaidën uicchun cuishtucashun nidaidbēdta uicchun cabiunshun bēbitaccashun: “Acte tiquidimbo icquid Sidoe caidën bēpamēdec nid,” cac nidash bēpamēdec bēdanobi. Nēbi bēdamboen isembi —quepac caondash bēshuacboed. <sup>12</sup> Adsho tantiashun: —Mibi bēdamequid ¿mitsimbo iquec? —cac: —Tsaudi —quepac caondash bēshuacboed.

### *Bēshuaid bēdameboed chuimaid*

<sup>13</sup> —Bēdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bēshuacboed buampac caondash. <sup>14</sup> Buanacshobien padiseyobon: —Chonoadenquio icte ushën nac caosh —quequin tantiaquin: <sup>15</sup> —¿Mitsipadec bēdano? —caquien: —Esusën nidaidbēdta uicchun cabiunshun bēbitaccac bēpamēdec bēdandshun nēbi bēdamboen isembi —quepac caondash bēshuacboed.

<sup>16</sup> —Bēpamēdec bēdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icte ushën Nuquin Papan chiaid niac-niaquenquio ictsiash. Chonoadenquio icte ushën nēid bēdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bēdamepatsiash? Ma comapenen tantiaquin nac-nempaboc —quepac caondash. Adshumbic abitedishun: —Esus icsambo iquec —cainquio icquin <sup>17</sup> bēshuacboed chuipac caondash. —Mibi bēdamequid ¿tsutsi mimbi cape? —caquien: —Nuquin Papan: “Yuecshun naden naindambi,” quequin chiaidquio chuiquidien nec,” caimbi —quetanec bēshuacboed nidpac caondash.

<sup>18</sup> Aid nidnubien Esus chieshēnquido: —Bēshupenquien niash. Muequien niash. Anibēdta amē chuimenun chomenuna —quetanquin <sup>19-20</sup> chomeshun bēshuacboed cain: —¿Min madoda niosh? —capac caondash. Adoac: —Ai, con mado niosh —qeshobien: —¿Bēshuacshobida tishonda? —capac caondash. Adoquien: —Ai, bēshuacshobi tishonaid nec —ani qeshobien: —Bēshuaid ¿mitsipadec bēdanosh? —capac caondash. <sup>21</sup> Adoquien: —Tsaudi. Bēdanzo isambo iccombi. ¿Tsendambien bēdamechitash? Dada ënden caniaid neque. Aidi chuime —quepac caondash bēshuacboedën tita amēbēdi. <sup>22</sup> —“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuēdec: <sup>23</sup> —Dada ënden caniaid neque. Aidi chuime —quepac caondash.

<sup>24</sup> Adoac padpiden bēshuacboed chomeopac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshē icquid neyoc —quepac caondash. <sup>25</sup> Adsho tantiash bēshuacboed: —Icsamboshē icquidien Esus nechitec. Aden tantienquio iquemb. Mabi bēdameboc. Isenquio icboedēmbi mambi nēbi bēdamboen iseyoc. Ade-nuidtsēqui tantiembi —quepac caondash. <sup>26</sup> Adsho tantiashun: —¿Mitsipaden mibi bēdamiosh? —caquien: <sup>27</sup> —Mambi mibi chuipaboc. Ma mimbimbobi

tantienguio icboc. ¿Atotsi quequin padpiden: “Ēbi chui,” cai? ¿Esus tantiatiadquioda icti? —capac caondash bĕshuacboedĕn.

<sup>28</sup> Adsho tantiash nĕishtanquin chushcapac caondash. —Mibi Esus tantiaquidquio nec. Mibi icsambo iquec. Ēbien nuquin tsusedpa Moises tantiaquidquio nec. <sup>29</sup> “Moisesien Nuquin Papan chuiquin namepampic,” quequin tantiemi. ¿Tsuentsin chiac mibi bĕdamequidĕn napash? Ma mibi bĕdamequid ĕmbi tantiacmaidquio neyoc —quepac caondash chuiquido. <sup>30</sup> Adoquien bĕshuacboed: —¿Abida cai? “Dadpenquio tantiemi,” ma mibi quepaboc. Adboedi: “Ēmbi tantiacmaidquio nec,” ¿quecta ique? Mimi tantiacmaidĕmbini bĕdamiosh. Ma bĕdambo yoc. <sup>31</sup> Abi icsaid ĕnabi icquidĕn chianesho Nuquin Papan tantienquio ictsiash. Abi tantiaquin ambi chiacpadomben naquidĕn chianiac tantiashun Nuquin Papan nashuntsiash. <sup>32</sup> Anin bĕshuacshobi tishaid bĕdamenquio ictenec. Adquid bĕdamequid nibĕdpadenec. <sup>33</sup> Nuquin Papa tantienquio icquin Esusĕn ĕbi bĕdamenquio ictsenosh. Nuquin Papa tantiaquimbini bĕdamiosh. Ma Esus bĕdambo icquid neyoc —quepac caondash bĕshuacboed. <sup>34</sup> Adsho tantiash nĕishquioshon: —Bĕshuacsho tishaid yec mibi icsamboshĕ iquec. Icsactĕcquidĕn chuitiapimbo iquebique. Baded nidec nid. Nĕmbo padpidec puduedenda —quequin cuempac caondash. Aden Esus chieshĕnquidon bĕshuacboed Nuquin Papan chiaid chuibante shubun padpiden puduedmenquio icpac caondash.

#### *Ambi bĕdameboed istuidoashun Esusĕn chiaid*

<sup>35</sup> Adnubien: —Mimi bĕdameboed cuemiac caosh —quesho tantiashun Esusĕn ambi bĕdameboed istuidpondash. Istuidshumbic: —Nuquin Papan matsesmiadquio caic: “Nuquin Papa yacnuĕsh choquid nec,” ¿quequina mimi tantiapĕ? —capondash Esusĕn ambi bĕshuaid bĕdameboed chuiquin.

<sup>36</sup> Adoquien: —¿Tsuentsi neque? Isnu —cac: <sup>37</sup> —Ēbi nec. Mibi bĕdameboedi nebi —caquien: <sup>38</sup> —Ai, Nuquin Papa yacnuĕsh choquid Quidistu caidien mibi nec. Comapen tantiaquin nabanquidquio yec mibi bĕdamboshĕ iquec —quetanec ismenuec danĕshĕn tinquebudpondash.

<sup>39</sup> Adsho isumbic Esusĕn matses abi datsidadsho chuipondash. —Nuquin Papa matses bĕdamboen ismequid nebi —quiash matsesbĕd tabadec Nuquin Papa yacnuĕsh chondabi. Ēmbi bĕshuaid bĕdamiac tantiesa icboedĕmbi ĕbi tantiaho Nuquin Papan bĕdamboen isec. Utsibo: “Nuquin Papa tantiaquiemi,” quec muaquidon ĕbi tantiatiapimbo icquin Nuquin Papa tantienquio iquec —quepondash Esus. <sup>40</sup> Adsho tantiash nĕishtanec: —¿Nuquin Papa tantiesabodabi nedi? —quepondash Padiseyobo. <sup>41</sup> Adsho tantiashien: —Nuquin Papa tantiesambo icsho ĕmbi tantiamiac Nuquin Papabĕda ĕbi tantiaho Nuquin Papan mibi bĕdamboen istsiash. “Nuquin Papa tantiaquiemi,” quec muaquin ambi chiaid bĕdamboen tantienquio icsho Nuquin Papan mibi bĕdamboen istiapimbo iquec —quepondash Esus abi chieshĕnquido chiec.

## 10

#### *Obecabimboecquido chiaid*

<sup>1-2</sup> Adshumbic abi chieshĕnquido Esusĕn padpiden chuioapondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesĕn aton yua obeca dadpen dayun uaquin napec? Obeca daquĕnĕ uaidĕn puduedte shĕcuĕnquio obeca icbo puduedquid. Daquĕnĕ uaid mayadec puduedquidien ampequid nendac. <sup>3</sup> Obeca icbon: “Puduednu. Shĕcne,” cac ambi: “Con yua ista,” caidĕn shĕcnequid. Adshumbic puduedtanquin ambi aton yua cuĕmbanacpaden cuĕmbanquin: “Cho,” caquid icbon. Adoac icbo tsibanquid obecan. <sup>4</sup> Adshobic icbon daquĕnĕ uaidĕn tabadquid



abitedi niecumesahun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. <sup>5</sup> Utsibon cuënaquien tsibanenquio yec dacuëdec cuenquid obeca. Icbouidtsëqui tsibanquid obeca nec —Esus qesho tantiashien: <sup>6</sup> —Tantiadenquio yec mibi onquec —quepondash Esus chieshënquido.

<sup>7</sup> Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. <sup>8-10</sup> Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Èbi tantiesain Nuquin Papa yacno puduedtiapimbo iquendac. Èbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unësacsho uincumeshun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Èbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquio iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquio icquimbi ëmbi chiaiduidtsëqui tantiendac —quepondash Esus abi chieshënquido chiec.

### *Èbi tantiaquido dayun uaimbi, quequin chiaid*

<sup>11</sup> Adashic Esus padpidec onqueoapondash. —Obeca icbobimboecquid nebi. Icbo cudasacimboec ëbi tantiaquido cudasnuec ëbided cuidadec unësendabi. <sup>12-13</sup> Utsiboen adenquio ictsias. Piuquid bednuen obeca isquidimboec iquec. ¿Mitsipadopaid obeca isquidën? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid nianequid obeca. Obeca isquidën icbonpenquio nianacimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshënquido chiec.

<sup>14-15</sup> Adashic abi onquec: —Èmbien matses bédamboen tantiamequin ëbi tantiaquido dayun uaindac. Nuquin Papabëd ëbi tantianacpadquiec ëbi tantiaquidobëdtsen tantiananquiebi. Aden ëbi tantiaquido tantiec Nuquin Papa cuidmenquio icnuec ëbided cuidadec unësendabi. <sup>16</sup> ¿Nëid matses isadaidbuidtsëqui tantiectabi adec unëspadi? Padenquio. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bédamboen dayun uaindambi. <sup>17</sup> Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquiec. Unësash ëbemi uincuenendabi. <sup>18</sup> Matsesën ambembi ëbi unës uatiapimbo ictsias. Èmbi tantiacpadquiequi matsesën unës uadendabi. Adecbidi uincuentiadquio yec ëbemi uincuenendabi. Aden con Pan namiacpadomboen naindambi —quepondash Esus.

<sup>19</sup> Adsho tantiash con matses chuiquido naded onquecuededpac caondash. <sup>20</sup> Esus chieshënquido: —Podobitsi icsa dapuduedash tantiadempanbo yec onquepec. ¿Atotsi quequin aid tantie? Aidquio tantiatiapimbo iquendabi —quenubien <sup>21</sup> utsibo: —Podobitsi icsa dapuduedashta ¿adec onquepatsias? Bédamboequien onquiosh. ¿Podobitsi icsa dapuduedaidënda aden bëshuaid bédamepatsias? Bédambo icquidëmbien adotsias —quepac caondash.

### *¿Quidistu caidta ne? quequin chiaid*

<sup>22</sup> Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido

cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. <sup>23</sup> Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacnenaïd nec,” caondash. <sup>24</sup> Ambo Esus capusho isashien con matses chuiquido Esus natia datsidadshun: —En sebadënquio chui. Tantienguio yec tsadtiapimbo iquebique. Mimbi cuembo chuïsho tantiatiadquio iquebi. ¿Nuquin Papan chomiaïd Quidistu caïdta ne? —capondash con matses chuiquidon. <sup>25</sup> Adoquien Esus: —Mambi mibi chuipaboc. Ma mimbimbobi ëbi tantienguio icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. <sup>26</sup> Adosho isash mibi: “Ai, Nuquin Papa yacnuësh choquïdien nec,” quetiadquïdëmbi mimbi ëbi tantienguio iccoc. Nuquin Papan tantiamiabi yaido icquin mimbi ëbi tantiatiapimbo iquec. <sup>27</sup> Con Pan tantiaïdien ëbi tantiacquid yanendac. Adshun obecan aton icbo tsibanacimboen ëmbi chiacpadomboen natiadquio yanendac. <sup>28</sup> Aïdo unësascho uincuemeshun Nuquin Papa yacno ëbëdi tabadmendambi padpïdec unëstiapimbo icnuc. Unësabi icsho: “Con na nec,” qeshun bëdamboen dayun uaindami. Èmbi adoacsho bedshunacimboen icsambo icquïdën yuaquin Nuquin Papan cuidtequido icmeoatiapimbo iquendac. <sup>29</sup> Con Patsen ëbi tantiacquido dayun uaindaci. Abipadquid utsi nïbëdquïecnuc con Pan ëbi tantiaquido dayun uasho adembi mënchictiapimbo iquendac. <sup>30</sup> Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

### *Cuënoten seshunetiadpambo yanoaid*

<sup>31</sup> —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënuquidon Esus seshunetiadquio icoapondash. <sup>32</sup> Adsho isash: —Sianenda. Con Pan namiacpadomboen comapenen tantiaquin nabanombi. ¿Èmbi adobansho isboedëmbidabi seshunepe? —quepondash Esus. <sup>33</sup> Adoquien: —¿Bëdamboen nabanshodambi: “Mibi seshunenu,” cadi? Padenquïo. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuïsho tantiashumbimbi mibi seshunec —quepondash abi chieshënuquido.

<sup>34</sup> Adshobien Esusën: —Nuquin Papan chiaïdquio nuquin tsusedpan naden dada uapampic. “Nuquin Papa naded onquec: ‘Min matsesën ëmbi chiacpadomboen nasho: Èbipadquid nec, caombi,’ queposh Nuquin Papa,” quequin dada uapampic. <sup>35</sup> Matses caic: “Èbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chïac,” quequin chïambo iquec. “Muesambo icquin Nuquin Papan icsamboen chuïtiapimbo iquec,” qeshun mimbi chushcambo iquec. Nuquin Papa adoambobi ¿ëbïda chushcai? <sup>36</sup> Nuquin Papan namiacpadec abi yacnuësh chondaid nebi. Adquid yec: “Nuquin Papan Madombo nebi,” quïobi. Èbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. <sup>37</sup> Èmbi chiaïdquio tantiatiapimbo icquimbi ëmbi naidquio tantiata. Èmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac. <sup>38</sup> Con Pan namiacpadomboen nasho isun: “Ai, ambi chuïbocpadquïdshenda nepec,” ëbi cata. Èmbi chiaïduïdtsëqui tantiatiapimbo icquin adota. Adshun: “Ai, Nuquin Papapadquïdquïobïdien Esus nec,” quequin mimbi tantiabentsiac —quepondash Esus.

<sup>39</sup> Adsho tantiash padpidec nëishtanquin abi chieshënquidon: —Bedchitono —caqui bedadenquo icpondash. <sup>40</sup> Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. <sup>41</sup> Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismi-ambobi comapenen tantiaquin nabanquid chui padenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. <sup>42</sup> Adshumbic: —Nuquin Papa yacnuësh choquidien Esus nec —quequin Esus tantiabempondash.

## 11

### *Dasado caid unësaid*

<sup>1</sup> Udeya yacnuësh Esus cuembon Dasado Esusën utsibimboecquid unëstiadtscëquo yanac caondash. Shubu dadpen icquid Betania caid yacnocquid niondash. Aidbë icquid aton chuchu daëd icpondash. Abentsëc Madta icnuc utsi Madia icpondash. <sup>2</sup> Madian aton manëdaidën ucbanquin Esus tanoshcabi icnuc adec aton utsi unëstiadtscëquo yanac caondash. <sup>3</sup> Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquo unëstiadtscëquo yanoshe. En isec cho —catuidpondash. <sup>4</sup> Adoaquien Esus: —Chiata. ¿Unësh chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. <sup>5</sup> Adbosh Dasado aton chuchubëdta tantiaquidquo yequi <sup>6</sup> badedquo nidenquo yec anobi daëdec ushpondash Esus.

<sup>7</sup> Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. <sup>8</sup> Adoaquimbi: —Icbo, ma mibi anoshon cuënoten seshunetsempondac. ¿Anobidida nïdtiad? ¿Ada: “Seshunequionoshe,” cadec? —capondambi. <sup>9-10</sup> Adoaquien cuembo chienquo icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacimboen con Pan tantiaidtedi nainabi icsho ëbi unës uatiapimbo iquec. Inchëshën uebudacimboen ambi tantiaidtedi nainshobini ambi tantiacpadënquiobi matsesën ëbi unës uaindac —quequin tantiec adondash Esus.

<sup>11</sup> Adshumbic Esusën padpiden ompoachimboen chuiopondash. —Ëmbi con utsi caid Dasado ushtoaccoshe. Isucumec nidnu. Nid —qesho <sup>12</sup> tantiashini: —Ma ushnu. Ushash isacunquid —quepondac. <sup>13</sup> Esusën Dasado unësaid chuinubi Dasado ushe dantsëccondambi. <sup>14</sup> Adnubien Esusën sebadënquo chuipondash. —Dasado unësacosh. <sup>15</sup> “Bëdamec nïdtiadquidi niobi” ¿quepectabi ique? Padenquo. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid <sup>16</sup> —caquien: —Ai, abëdquobi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

### *Unësaid uincumequidquo nebi, quiaid*

<sup>17</sup> Adashic unësacno anoentsëqui Esus chopondash. Choshon: —Unësacsho chococash daëd-daëdquiec ushobi —quetsëcquiec onquecuededsho tantiatuidpondash. <sup>18-19</sup> Esus choabi icnuc con matses chuiquido Dasado unësacnuësh sedenquenuec Edusaden yacnuësh cho-chopac caondash.

Unësaid nēbi ictsēcñuc tedes quidometedos tiontsēcquidēn badedquio cho-chopac caondash. Cho-choash unësaidēn chuchubēd sedenquec tabadpac caondash. <sup>20</sup> Adnubien: —Esus choec —quesho tantiash Madta bēquedec chopondash aton chibi Madia shubuno sedenquec tsadnubi. <sup>21</sup> Choequien Esus bēquedec: —Mibi icnuc con utsi unësenquio ictsenosh, Icho. Con utsi unësosh. <sup>22</sup> Mimbi chiacpadomboen Nuquin Papan nēbi natsiash —quepondash Madta: —¿Ada con utsi uincuemetsia? —quequin chuitiadquio yequi. <sup>23</sup> Adoaquien Esusēn: —Min utsi uincuenendac —capondash. <sup>24</sup> Adsho tantiash: —“Ai, yuecash unësaido abitedimbo uincumete ushēn con utsi uincuenendac,” quequin tantiemi —quepondash Madta. <sup>25</sup> Adsho tantiashun Esusēn: —Ēbibi matses unësaid uincumequidquio nebi. Ēmbi tantiapadēnquio uincuenendac. Aden ēbi tantiaquido unësacsho uincuemendambi. <sup>26</sup> Ēmbi adoac Nuquin Papa yacno ēbēdi tabadendac padpidec unëstiapimbo yec. Ēmbi aden chuisho tantiash: “Ai, abimbo mimbi caindac,” ¿quequina tantie? —capondash Esusēn. <sup>27</sup> Adoaquien Madta: —Ai, adembi tantiemi. “Nuquin Papa yacnuēsh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec <sup>28</sup> nidpondash aton chibi chiec. Nidshun: —Nēmo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien <sup>29</sup> Esus bēquednuec badedi choquin istuidpondash. <sup>30</sup> Shubu dadpen yacnombo choabi icsho Madtan bēquedacnobi Esus tabadsho Madiantsen istuidpondash. <sup>31</sup> Adec Madia nidsho isun chococacnobi sedencaic nide danquin abēd sedenquenequidon tsibanampac caondash. <sup>32</sup> Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ēnēdash: —Mibi unësquio iccoc, Icho. Bēdambo icquid mibi nec. Mibi icnuc con utsi unësenquio ictsenosh —quepondash Madia Esus caic.

<sup>33</sup> Adnubien Madia tsibanec cho-choec con matses chuiquido sedenquetuidpondash. Madiabēd sedenquecuededsho istanec: —Ai, unësquio icnuc nec —quiash Esus abitsen shubiantiadtsēcquio icpondash. <sup>34</sup> Adec shubiantiadtsēcquio tsadacnuēshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien <sup>35</sup> shubinidequi nidpondash Esus. <sup>36</sup> Adec shubinidsho isumbien: —Ma Dasado unësquio icnuc shubieyoc —cabampondash con matses chuiquidon. <sup>37</sup> Adnubien utsibo: —¿Atotsieshun bēshuaid bēdamiondaidēmbi Dasado unëso bēdamenquio icpohsh? —quepondash.

### *Esusēn Dasado uincuemiaid*

<sup>38</sup> Nidquimbi chococacno istuidequi Esus shubiantiadtsēcquio yanoapondash. Nidaid cuēnoteuidpambo icquid macuēsh tsimpiduc shēcuē uaidēn unësaid nauedshun cuēnote dapan bētinacnuēsh shubiantiadtsēcquio iccondash. <sup>39</sup> Adashien Esus: —Cuēnote bidiacquin shēcuē shēcne —quepondash. Adsho tantiash unësaidēn chuchu Madta: —Padi. Ēnden pisenashe. Chococash mabi daēd-daēdquiec ushboc —quepondash. <sup>40</sup> Adoaquien Esus: —Dacuēdenda. Mambi mibi chuiboc. Mimbi: “Nuquin Papan Madombobien mibi nec,” ēbi casho: “Ēmbi comapenen tantiaquin nabansho mimbi isendac,” mambi mibi capaboc. En na. Baded bēcune —cac <sup>41</sup> cuēnote shēcuē bētinaid shēcnequin bēcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbi tantiec. Ëmbi chuibocpadomboen mimbi naindac. Mibi bëdambo iquec, Papa. <sup>42</sup> Ëmbi otacquo chianiaid mimbi tantioc. Ëbi datsidadaido tantiamenuen nëbi comapenec onquequin mibi chiemi. “Mibi chuitanquin ëmbi comapenec tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiemi, Papa. Padi, aيتدتسëqui mibi chiombi, Papa —quepondash Esus. <sup>43</sup> Adtanquimbien comapenen cuënquin: —Dasado, puduenec cho —capondash. <sup>44</sup> Adoaquien Dasado badedquo puduenanec chopondash abi dashcute dataniacchobi. Unësascho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

*Nëbien Esus unës uametiad, quiaid*  
(*Mat 26.1-5; Mad 14.1-2; Duc 22.1-2*)

<sup>45</sup> Aden Esusën ënden unësaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. <sup>46</sup> Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. <sup>47</sup> Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomias tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. <sup>48</sup> Aden Esusën nabansho isun nuqui ëmiabi icsho nuquin matsësen abitedishun abi chuiquid dapa Esus icmetsias. Adnubien nuqui yuaquido Doma yacnocquidon ambi chuiquid icmiacmaidquo chuiquid yansho isun nëishun nuqui acshun siatsias. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictias. ¿Mitsipadotiad Esus? —quepac caondash chieshëmënquido.

<sup>49</sup> Adnubien abëdtan chuiquid chuiquid dapambo aid setan icquin Caipas caidëntsen chuipac caondash. —¿Midapadotsëcquien mibi chiendac? Tantiadentsëcquo icnuc ma mimbi chuipaboc. <sup>50</sup> Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquo icnueshun Esused unës uamenuna —quepac caondash chuiquid dapambo abëdtan chuiquid chiec. <sup>51</sup> Aden chuiquin ambemi chiambo Nuquin Papan oncamiac Nuquin Papan chiaidquo aden chuipac caondash. —Nëid setan abëdtan chuiquid chuiquid dapambo nec —qeshun Nuquin Papan aden oncamiaqui Caipas onquepanëdash. —Matses cuidmenquo icnec con Madoded cuidadec unësendac —qeshun Nuquin Papan Caipas aden oncamepanëdash. <sup>52</sup> Aden Caipasën chuinëdaid tantiaquin ëmbitsen chuinu. Tantia. ¿Isadaidboudtsëqui cuidmenquo icnucta Esus abided cuidadec unëstiondash? Padenquo. —Matses utsitsen abi tantiaquid yansho isun abëdi tabadmenuec Esused cuidadec unëspondash —quequin tantiemi. Nëbi Caipasën chuisho tantiasun tsusiobon chiaid chuinu. <sup>53</sup> Aden Caipasën Esus unës uamete chuisho tantiasien Esus chieshënquido: —Nëbimbobien Esus unës uametiad —quecuededpac caondash.

<sup>54</sup> —Tsusiobon mibi adosh —quesho tantiatanequien chieshëmënquido ismenquo yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. <sup>55</sup> Epadain

caid yacno tabadnubien Nuquin Papan con tsusedpabo unĕs uainquo icquin matamiampid inchĕsh tantiec cuĕdĕnuec Edusaden yacno con matses nidanepac caondash. Cuĕdĕnec taĕabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuĕdĕntemaid,” quedenegue —quianec nidanepac caondash. <sup>56-57</sup> Adshumbien Edusaden yacnoshon Nuquin Papa tabadte shubu uashunaid daquĕnĕ uaidĕn puduedtanquin Esus iste bunquin nibĕntuidpac caondash mishtemaid mishquidon. Nibĕntuidshobien: —Nuqui chuiquido nadpac caosh. “Esus istuidshun ĕbi chuita. Bedshun unĕs uamechitono,” quepac caosh —quesho tantiashien: —ĵAda Esus chopeba? “Unĕs uamenushe,” quiaash choenquien icchitec —quecuedepac caondash.

## 12

### *Madia Dasadon chuchun Esus tanoshcaid* (*Mat 26.6-13; Mad 14.3-9*)

<sup>1</sup> Aden mishtemaid mishquidon abi nibĕnubien Edusaden anoentsĕqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchĕsh tantiec cuĕdĕnec taĕnushi niondash. <sup>2</sup> Ambo chosho isash: —Esus bĕdambo iqueque. Pemenu —qeshun: —Pec cho —cac puduedash tabadpondash nĕidtedi. Nĕidic Esus. Nĕidic Dasado. Nĕidic shubu icho. Nĕidic Esusbĕd icquid ĕbi chedobi. Nĕidic Dasadon chuchu daĕd. Aidtedi icpondash. Adec penuec tabadsho Madtan pete menebampondash. <sup>3</sup> Adnubien Madian: —Esus bĕdamboshĕ iquec. Ismenu —quetanquin bĕdamboshĕ nuadquidĕn Esus tanoshcapondash. Tanoshcatanquin aton manĕdaidĕn taucpondash. Aden tanoshcaid shubu anuestsĕcquiec comapenec nuadpondash. Piuquid dadpenquo menequin bedaid niondash. Sedunten cushtoaid bĕdambo nuadquid nado caid niondash. <sup>4</sup> Adsho isun Esus bedmequidĕn Udasĕn Madia chushcapondash. <sup>5</sup> —Padi. Mimbi uesqueque. Utsi uain nata. Nĕid danoshcate meneshun piucquid dadpenquo seta abentsĕc matamec chonoadaidtedquiobien bedtiad. Adoshombien piucquid nibĕdquido aid piucquid menetiad —capondash Udasĕn. <sup>6</sup> Adomboen chuisho tantiashun Udas bĕdambo icquidquido danondambi. Esusbĕd icquido ĕbitedishun piucquid bedshun sauedten sauedshun dayun uaquidquiambi danondac. Piuquid bĕdamboec dayun uashumĕnenquo yequi abibi ampeshumĕnashi adondash Udas. Aden ambi ampiaid tantiequi: —Piuquid nibĕdquidoen menetiad —quequin muaquin Madia chushcapondash. <sup>7</sup> Adshobien Esusĕn: —Padi. Chushcainda. Ma nanu. Ma nuquin matsesĕn unĕsaid bĕdambo nuadnuc danoshcapaid yoc. “Nĕbi con Mado unĕsendac,” quequin Nuquin Papan tantiampadomboen ĕbi unĕso chococate tantaquin Madian ĕbi tanoshcaquin naic. <sup>8</sup> Piuquid nibĕdquido dadpen iquec. Nibĕdenquo iquendac. Ēbien mibĕd icboedi nĕbi nibĕdquido yanendac. Ēbi tantiec Madia bĕdambo iquec —quepondash Esus Udas chiec aidi: —Abi chieshĕnquido Esus bedmenu —quepanuda.

### *Dasadotsen cuesunetiadquio yaid*

<sup>9</sup> Adnubien: —Betania yacno Esus choaccosh —cac Edusaden yacnuĕsh matses dadpen Esus isec cho-chopondash. Ambobidi Dasado Esusĕn uincuemiondaid icsho aidtsen isnuec cho-chopondash. <sup>10-11</sup> Cho-choshon Dasado uincuemiondaid isumbien abentsĕcshun abentsĕcshunquien: —Comapenen tantiaquin nabanquidquio yec Nuquin Papadquidquiobidien Esus nec. Nuquin Papan chomiaaidien nec —quequin Esus tantiabempondash. Esus tantiabenshumbic abi chuiquidon chiaid tantienquo

yampondash. Adsho isash nëishtanequien chuiquid dapabo: —“Uincuemaiad Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënuic.

*Chuiquid dapa ismiacimboen Esus ismiaid*  
(*Mat 21.1-11; Mad 11.1-11; Duc 19.28-40*)

<sup>12</sup> Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuec chō-choboedon: —Esus choec —quesho tantiatanquin <sup>13</sup> niste podobieccquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bēdambohē iqueque. Ēbi bēdamboen ista.

Nuquin Papan chomiaid yec mibi bēdambohē iquec.

Con matses isadaidbo chuiquid dapambo mibi nendac,”

quecuededpondash Esus caic. <sup>14</sup> Ambi podquedën choquin bedbëtsemboed cabayobitsecquidēmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuiampic. <sup>15</sup> “Edusaden yacnocquido chiec:

‘Dacuëndenda, Edusaden yacnocquido.

Is. Cabayobitsecquidēmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. <sup>16</sup> Adec Esus catsadtoanec chosho isun aden chuiampic tantienuo iccondambi. Esus abuc nidambimbi ëbitedishun tantiabonodac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bēdambo iquec,” quequin nuquin matsesën Esus ismebededpondash —quequin tantiabonodambi.

<sup>17</sup> Esus cabayobitsecquidēmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanēdash. <sup>18</sup> Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podo uic-uiccaquin ismepondash. <sup>19</sup> —Esus bēdambohē iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

*Matses utsibo: Esus isnu, quiaid*

<sup>20</sup> Edusaden yacno cuëdënec cho-choboedo matses utsibo isadaidpembotsen icpondash. <sup>21</sup> Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun <sup>22</sup> Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien <sup>23</sup> aid matses utsibo isadaidpembon tantiamenuec Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Ēmbi adoacsho Nuquin Papan: “Mibi bēdambo iquec,” ëbi caindac —quepondash Esus abi unës uate chiequi. <sup>24</sup> Adshumbien ompoacimboben chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac caniaash bacuëc bēdambo icpaid yoc. Chococabi bēdambo

ictiapimbo iquec. Adoacbimboen chococabi yac matses bĕdambo icmeti-apimbo iquendabi. Unĕsacsho chococac matses bĕdambo icmequid nendabi —quepondash Esus. <sup>25</sup> Adashic padpidec: —Ambi naiduidi naquin ĕmbi chiaid niacquido Nuquin Papan cuidtequido nendac. Ambi naiduidi nainquo icquin ĕmbi chiacpadomboen naquido ĕbĕdi tabadtequido yanendac. <sup>26</sup> Adquid ĕmbi chiacpadomboen natiadquio yec ĕbi yacpadec chieshtoenquio ictsiash. Adquidquio unĕsash uincuenash ĕbĕdi tabadsho Nuquin Papan: “Nĕid con Mado tantiaquid bĕdambo iquec,” capendac —quepondash Esus.

### *Esusĕn abi unĕs uate chiaid*

<sup>27</sup> Adashic abi unĕs uate tantiec Esus nadpondash. —Unĕsquioshĕ yanuc: “Mimbi tantiacpadomboen natiapimbo iquebi, Papa,” ĵquectabi icti? Mabi con Pan chiacpadomboen nanuec chondac. Aden nanuec nebi —quepondash Esus. <sup>28</sup> Adtanequien Nuquin Papa chiec: —Nuqui tantiacpadomboen nĕbi nainembi, Papa. Ĕmbi aden nainacsho: “Nuquin Papa bĕdambo iquec,” matses cameta, Papa —quenubien abucuĕshquio Nuquin Papa comapenec onquepondash. —Ai, ĕmbi namiaid mibi icsho: “Nuquin Papan namiaid nec. Nuquin Papa bĕdambo iquec,” matses camepombi. Nĕbi padpiden adomeoaindami —quepondash Nuquin Papa.

<sup>29</sup> Abucuĕsh onqesho bĕdamboen tantiabi yec utsibo: —Abu cuĕdtoec nec —quenubien utsibo: —Nuquin Papan abi yacnoshon uaid mayan bĕdan Ĕsus chuipash —quecuededpondash. <sup>30</sup> Adsho tantiash Esus: —ĵĔbi tantiamenuecta onquediash? Padenquio. Mibi tantiamenuequien niosh. Aden tantiashun ĕmbi bĕdamboen chuisho tantiata. <sup>31</sup> Nuquin Papa chieshĕnquid Satanasĕn yuaido matses dadpenquioshĕ iquec. Nĕbi Nuquin Papan tantiacpadomboen aido utsi-utsien Satanas bedshunendambi: “Chĕn. Con na neque,” quequin. <sup>32</sup> Ĕbi abuc dectanac aden matses ĕbi tantiaquid icmendambi —quepondash Esus. <sup>33</sup> —Ĕbi cuesten dectanquin unĕs uaindac —quequin tantiec: —Ĕbi abuc dectanendac —quepondash Esus.

<sup>34</sup> Adsho tantiash abi datsidadquido: —“Ĕbi dectanendac,” quiosh. “Unĕsebi,” quepequien iccosh —quiashien Esus chiec: —“Nuquin Papa yacnuĕsh choquid Quidistu caid unĕsesambo nendac,” quequin Nuquin Papan chiaid nuquin matsesĕn chuinubi: “Unĕsebi,” ĵquecta icco? “Unĕsebi,” quequid Nuquin Papa yacnuĕsh choquid ictiapimbo mibi iquec. “Nuquin Papan matsesmiaid nebi,” quequid ĵtsutsi mibi nepe? —quepondash Ĕsus datsidadquido. <sup>35</sup> Adoaquien Esusĕn: —Nadquid nebi —quenquio icquin ompoacbimboen naden chuipondash. —Mibi bĕdamboen tantiamequid nĕbi isadenquio iquendac. Aid nibĕdnuc bĕdamboen mimbi tantienquio iquendac. Nidabi aidĕn chuisho bĕdamboen tantiata. <sup>36</sup> Nuquin Papan bĕdamboen iste tantiamequid tantiata. Adsho bĕdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

### *Isadaidbon Esus tantienquio yaid*

<sup>37</sup> Ĕmbi dadpen chuiquin dada uabanacpadomboembi Esusĕn comapen tantiaquin dadpen nabansho isun con matses isadaidbon Esus tantiatadquidi Esus tantienquio icpondash. <sup>38</sup> Aden Esus tantienquio icte con tsusedpa Isayasĕn Nuquin Papan tantiamiacpadomboen chuiquin dada uapampic.

“Nuquin Papa yacnuĕsh choash nadec onquendac.

‘Mimbi chiaidquio chuibansho tantiashun: Muequien mibi nec, ĕbi caindac, Papa.



Mimbi namiacpadomboen comapenen tantiaquin dadpen nabansho isash: Nuquin Papa yacnuèsh choquidien nec, quetiadquidi adenquoio iquen-dac, Papa, quependac,”  
quequin Esusèn chuite Isayasèn dada uapampic.

<sup>39</sup> Nuquin Papan pamumédacimbocnuc icmiac con matsesèn Esus tantienquoio icpondash. Aden chuiquin Isayasèn padpiden dada uapampic.

<sup>40</sup> “Isadaidbon èbi tantiatipimbo icsho isun ‘Ma adembi tantienquoio icpanuna,’ caimbi.

Ma adequi pabiate shècuè nibédacimboc icchitono.

Èbi tantiansho abi icsaid bèpiscudquin bédamboen ismane,”

quequin Nuquin Papan ambi con matses caido nèishèshun chushcaid Isayasèn dada uapampic. <sup>41</sup> Nuquin Papambo Esusbéd uinsadpambo yec tabadsho isondaid icquin Isayasèn aden Esus tantienquoio icte chuiampic.

<sup>42</sup> Con matses dadpeshun Esus tantienquoio icnubi con matses chuiquidon abentsècshun abentsècshunquien Esus tantiauidpac caondash. Adoboedi: —“Nuquin Papan chiaid chuibante shubun pudedenda,” canushe —quiash dacuèdquin: —Esus tantiaquid nebi —quequin chuitiadquidi utsibo chienquoio icpac caondash. <sup>43</sup> —Ma con matsesèmbi èbi bédamboen isnu —quequinuidtsèqui tantiaquin aton matses chuitiapimbo icpac caondash. —Ma Nuquin Papan èbi bédamboen isnu. Aton Mado tantiaquid nebique —quetiadquidi adenquoio yac caondash.

### *Cuidenquoio icte chiec nebi, quiaid*

<sup>44</sup> Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —Èbi tantianuequidèn èbiuidtsèquida tantiapadic? Padenquoio. Èbi tantiaquidèn èbi chomiondaidsen tantiatiasish. <sup>45</sup> Adembidi con Papadquibidi èbi icsho isun: “Ai, adquibidien Nuquin Papa iquec,” quequin tantiatiasish. <sup>46</sup> Nuquin Papan matses bédamboen iste tantiamenuc matsesbéd tabadec chondabi. Adec matsesash: “Èbi tantiaquido ma Nuquin Papan bédamboen isquin bédamboen tabadmenu,” quiash nebi. <sup>47</sup> “Èmbi aden chuisho tantiatipimbo icquido nèbi cuidnu,” ¿quectabi icti? Padenquoio. Nèbi Nuquin Papan bédamboen isquin cuidenquoio icte chuinuequini nec. <sup>48</sup> Nuquin Papan cuidte ushèmbien èbi tantiesabon: “Nuquin Papan chiaidshenda chuipadenec. Aid tantienquoio yec icsabudquipopbi,” quequin ambibi tantierendac. Adsho Nuquin Papan cuidendac. <sup>49</sup> ¿Èmbembi chuiquindambi nadi? Padenquoio. Èbi chomiondaid con Pan chiaidquoio chiequini nec. <sup>50</sup> “Èbi tantiaquid èbèdi tabadendac padpidec unèsenquoio yec,” qeshun Nuquin Papan chiuidtsèqui chiequini nec —quepondash Esus.

## 13

### *Esusèn abèd icquido tapanaid*

<sup>1-2</sup> Esusèn comapenen tantiaquin nabanaid chuiquin aidtedi chiombi. Nèbi abi tantiaquido tantiaquiec abided cuidadec unèsaid chuiquin unèsash abi uincuenaidtsen chuinu. Tania. Nuquin Papan con tsusedpabo unès uainquoio icquin matamiampid inchèsh tantiaquin pec tabadte ushè nèbi yanuc inchèshèn Esusbéd pec bédamboec tabadondabi. Padnuen Udas Simon Iscadioten mado Satanasèn tantiamiacpadomboen Esus bedmete tantiec tsadpanèdash. Adnubien Esus: —Nèbi con Pa yacno nidebi nèdo nianec. <sup>3</sup> Con Pabéd tabadec ambi tantiacpadec abèdi abitedishun Icbombo iccondaidi nèbi anobidi nidoash adquibidi icoaindabi. Adquid icquin nèdo

bëdamboec tantianante ismenu —quequin tantiaquin <sup>4</sup> yuan nachimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. <sup>5</sup> Tsibidiquetanquin pada-padaid dapan acte cushtotanquin abëd icquido tapambampondash. Daucudten tauchbanquin tapambanondash.

<sup>6</sup> Aden tapambanquimbi: —Mibitsen tapanu —cac Petedon: —¿Icbonda yua tapampaid? Èbi tapanenda, Icho. Padi —capondash. <sup>7</sup> Adoquien Esusën: —Èmbi nasho nëbi mimbi tantienquoio iquec. Yuecshun mimbi tantiendac. En tapanu —caquien: <sup>8</sup> —Padi. Mibi bëdamboshë icquid nec. Èbien icsaquid nec. Yua namiacbimboen mibi tapametiapimbo iquebique. Padi —caoapondash Petedon. Adoquien: —Èmbi tapanabi yac con yuambo mibi ictiapimbo ictsiac —capondash Esusën. <sup>9</sup> Adsho tantiashun Petedon: —En na, Icho. Tapantanquimbi mapinobëdtabi ëbi mëpanta —caquien: <sup>10</sup> —Padi. Nesboed mibi nec. Taënouidsëqui bëchishacsho tapanembi. Èmbi bëchish ucac mibi bëdambo iquec. Abentsëc icsambo iquec —quepondash Esus. —Bëchish ucacimboen ëmbi nasho Nuquin Papan mibi bëdamboen isendac icsaid ucudacimboecnuc —quequin tantiec: —Èmbi bëchish ucac mibi bëdambo iquec —quepondash Esus. <sup>11</sup> —Udasën ëbi unës uamenuen bedmendac —quequin tantiec: —Abentsëc icsambo iquec —quepondash Esus.

<sup>12</sup> Aden tapambanash dasiuidash samëdquin pebededquin abëd icquido Esusën chuipondash. —Èmbi naboed ¿ada tantie? Tantia. Mibi chuinu. <sup>13</sup> “Èbi chuiquidquoio mibi nec,” mimbi ëbi capec. Adembidi: “Con Icho mibi nec,” mimbi ëbi capec. Bëdamboen mimbi chiec. Adquid nebique. <sup>14</sup> Èmbi nabocpadomboen mimbitsen nata. “Èbëd icquid tantiaquoioquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiash nashunanta. <sup>15</sup> Èmbi nabocpadomboen namenuen adombique. Mimbitsen nata. <sup>16</sup> En chuinu. Tantia. ¿Icbon chiacta chieshpadic? ¿“Nid,” cacta nidenquoio icpadic? Icbon chiacpadomboen yuan naquid yendac. Adomboen tantiaquin ëmbi chiacpadomboen nata. <sup>17</sup> Èmbi aden chuisho tantiashun ëmbi chiacpadomboen naic mibi bëdambo iquendac —quepondash Esus.

<sup>18</sup> Adashic padpidec: —Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaïdo con yuabotedi tantiemi. Abentsëc icsambo iquec. “Aid con yuapenquoio nec,” quequin ëmbi tantiadi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Èbëdtan planeboedëmbi ëbi unës uamenuen bedmendac,” quequin dada uapampic. <sup>19</sup> “ ‘Abi unës uametebi chioshi. Nuquin Papapadquidquiobi icquimbien naosh,’ quequin ma tantianu,” qeshun mibi chiombi. <sup>20</sup> Mibipadquidën nate mibi chuinu. Tantia. Mibipadquidën ëbi chuibansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaïd Nuquin Papatsen tantiatsiash —quepondash Esus.

### *Abi bedmequid Esusën chiaïd*

*(Mat 26.20-25; Mad 14.17-21; Duc 22.21-23)*

<sup>21</sup> Adshumbien abi bedmequid Udas tantiac unësquoio icnuc Esusën chuipondash. —Tantia. Mibitedi chuinu. Èbëd icquidëmbi ëbi chieshënquido

ëbi bedmendac —quesho <sup>22</sup> tantiash abëd icquidobëd bëisnane: —¿Tsutsi capec? Nëidien cachitec —quecuededpondabi otacquo tantiec.

<sup>23</sup> Èbi tantiaquidquo yec con cachochsëqui Esus uepondash. <sup>24</sup> Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquo icquin. <sup>25</sup> Adoaquimbi cachoc isquin: —¿Tsutsi cai, Icho? —capondac. <sup>26</sup> Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. <sup>27</sup> Adoac penubi Satanasquo Udas dapudedquiopanëdash ambi tantiaidquo namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

<sup>28</sup> Adsho tantiashini ëbitedi: —Tantiadenquo yec onquepec. ¿Atotsi quiaish: “Baded naic nid,” quepec? —quepondac. <sup>29</sup> Utsi: —Udas nuqui piucquid dayun uashunquid nec. “Piucquid buanshun pete bedtan,” quepeguen iccosh —quenubien utsi: —“Piucquid nibëdquido piucquid menetan,” quepeguen iccosh —quecuededpondash. <sup>30</sup> Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

### *Tantiananquiota, quequin chiaid*

<sup>31</sup> Abi bedmenuen chiec Udas nidbombien Esus: —Nuquin Papan matsemiaidquo icquin ambi tantiaidtedi nëbimbobimbi nainendac. Èmbi nainsho isash con Pa bëdambo iquendac. <sup>32</sup> Èbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. <sup>33</sup> Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacadomboen mibi chuiانو. Tanta, mado. Èbi nidacsho mimbi ëbi istuidenquo iquendac. Èbi nidacno mibi nidtiapimbo iquendac. <sup>34</sup> Aden tantiaquin Nuquin Papan chiaid utsi mibi chuinu. Èbi nidan ëmbi chiacpadomboen nata. Èmbi mibi tantiaquiacpadquiec tantiananquiota. <sup>35</sup> Èbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

### *Petedo: Èmbi isacmaid nec, quete chiaid (Mat 26.31-35; Mad 14.27-31; Duc 22.31-34)*

<sup>36</sup> Adec —Nidebi —quesho tantiashun Petedon: —¿Mitsimbo nide, Icho? —capondash. Adoaquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. <sup>37</sup> Adsho tantiash Petedo: —¿Atotsi quetiaquido yec: “Nëbi ëbëdi nidtiapimbo mibi iquec,” quepo mibi? Mibëd nidec dacuédenquo ictsiabi. Mibi chieshënquidon: “Unës uanu,” mibi casho tantiash: “Èbien natiad,” quetsiandabi —quepondash Petedo.

<sup>38</sup> Adsho tantiashien Esus: —“Èbien natiad,” ¿quecta icpatsia? Padenquo mibi ictsiac. Cachina bënë cuëdanabi icnuc mibi chieshtouidendac. “Èmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuédcuededpondac.

<sup>1</sup> Èbitedi dacuèdcuededsho isashien Esus: —Dacuèdenda. “Èbi dayun uaquid nec,” quequin mimbi Nuquin Papa tantiacpadomboen èbitsen tantiaquiota. <sup>2</sup> Mimbi tantiacpadquo Nuquin Papan shubu iquec. Quènè dadpenquioshè iquec. Tsucustiapimbo iquec. Adpenquo icsho mibi aden chienquo ictsiambi. Adquid tantiaquin: “Èbi tantiaquido èbèdi tabadmendambi,” quequin chiombi. <sup>3</sup> “Adquid iquec,” quiaish èbia nidshun con Pa chiendambi. “Èbi tantiaquido neque. Nuquibèdi tabadmenuna,” quequin chiendambi. Adashic èbi yacno mibi buanuec choaindabi. <sup>4</sup> Èbi nidan èbi nidacno nidte mimbi tantiec —quepondash Esus.

<sup>5</sup> Adsho tantiashun Tomasèntsen: —¿Mitsimbo nide, Icbo? Tantiambo iccombi. Podqued tantienquo iquembique. Èbi chui —caquien <sup>6</sup> Esus: —Nuquin Papa yacno nidte tantiamequidquo nebi. Nuquin Papan chi-aiduidtsèqui chiec muesambo nebi. Adquid icquin èbi tantiaquid Nuquin Papabèd tabadmendambi. Èbi tantiesan Nuquin Papa tantiatiapimbo ictsiash. Èbi tantiaquidènuidtsèqui Nuquin Papa tantiatsiash. <sup>7</sup> Èbi caic: “Nuquin Papan Mado nec,” quequin mimbi Nuquin Papatsen tantiendac. Nèbi abipadquid èbi icsho isun Nuquin Papambo isachimboen mimbi tantiendac —quepondash Esus.

<sup>8</sup> Adshobien Uedipentsen: —Nuquin Papa èbi isme, Icbo. Nuquin Papa iste bunebique. Aid isash bèdambo ictsiabi —caquien <sup>9</sup> aidtsen Esusèn: —¿Tantienquioda ique, Uedipe? Yuec mibèdi tabadobi. ¿Mimbi isacmaidtabi nedì? ¿Mibi chianenquiodambi ictio? Nuquin Papapadquidquibidini nec. Èbi adquid icsho isun: “ ‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa èbi isme,” cai? <sup>10</sup> “Nuquin Papapadquidquo nebi,” èbi qesho tantiash: “Ai, abimbo caic,” ¿quenquioda icco? Èmbembi chienquo iccombi. Con Pan chiaidquo chiequini nec. Adembidi èmbembi nabanenquo iccombi. Èbèd tèshnanenquo icquin con Pan namiaquimbi naoc. Èmbembi nainquo iccombi. <sup>11</sup> “Con Papadquidquo nebi,” èbi qesho tantiashun: “Ai, abimbo caic,” cata. Èmbi chiaid tantiatiapimbo icquin èmbi comapenen tantiaquin dadpen nabamboedquo tantiata. Aden èmbi nabamboed tantiaquin: “Nuquin Papan chomiaidènuidtsèquien adot-siash,” quequin tantiata. <sup>12</sup> Tantia. Mibi chuina. Èmbi nacpadomboen èbi tantiaquidontsen comapenen tantiaquin nabanendac. Èmbi chuibanac daèdpactsècshun èbi tantiabentsèccosh. Con Pa yacno nidshun èmbi chomiaidèn con Mayanèn namiac mibipadquidèn èbi chuibanac dadpenshun èbi tantiabendac. <sup>13</sup> Èmbi chiacpadomboen naquidèn: “Èbi nashunta, Icbo,” qesho tantiashun ambi chiacpadomboen nashunendambi. “Nuquin Papa bèdamboshè iquec,” camenuen <sup>14</sup> èbi tantiaquidèn chiacpadomboen nashunendambi —quepondash Esus abèd icquido chiec.

### *Nuquin Papan Mayan tabadte chiaid*

<sup>15</sup> Adashic abèd icquido padpiden chiec Esus: —Èbi abimbo tantiaquidèn èmbi chiacpadomboen natiadquo iquendac. <sup>16</sup> Adotiadquo icsho isun con Pabèd icquin con Pa chiendambi naden. “Nuqui tantiaquido bèdamboen tantiamenuèn nuquin Mayan aidobèd tabadmenuna, Papa,” èmbi cac Nuquin Papan con Mayan mibèdi tabadmendac. <sup>17</sup> Adoac mibi nianenquo yec mibèdi tèshnanenquo iquendac. Mibèd icquin èbi chuiquin mibi abimbo tantiamendac. Aid isadenquo icsho èbi tantiesabon aid tantiatiapimbo iquec. Mimbien aid tantiec. Con Pan èbèd icmiaidquo nec. Ambi namiaid

ëbi icsho aid tantiashumbimboen mimbi tantiec. Ëbi nidan choash mibëdi tëshnanenquoio yec tabadendac con Mayan. <sup>18</sup> ¿Shiadimpi mëyadacbitsec ic-nudambi mibi niampe? Padenquoio. Nuquin Papan Mayan con Mayambi nec. Mibëd aid icnu ëbëd yacimböequi con Mayan tantiadendac. <sup>19</sup> Nëbi ëbi nidacsho ëbi tantiesabon ëbi isenquoio icnu mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. <sup>20</sup> Ëbi uincuenaid ushëmbi mimbi naden tantiendac. “Esusën Nuquin Papa tantiaquiec aibbëd tëshnanenquoio icquin aidën chiacpadomboenuidi naindac. Adecbidi Esusbëd tantiananquiec aibbëd tëshnanenquoio icquin aidën chiacpadomboen natiadquoio yec tabadebi,” quequin mimbi tantiendac. <sup>21</sup> Ëmbi chiacpadomboen naquid ëbi tantiaquidquoio nec. Ëbi tantiaquidquoio mibi icsho con Pabëdtan mibi tantiaquioquin: “Adquoio aton Papabëd Esus iquiec,” camequin mibi bëdamboen tantiamendambi —quepondash Esus.

<sup>22</sup> Adsho tantiashun Udas utsin abi bedmequidënpenuio: —“Nuquin Papa yacnuësh choash con matses chuiquidquoio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantiamë, Icho? —caquien <sup>23</sup> Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aibbëdi con Mayan tabadmendambi. Adoac con Mayanën tantiamiac ëbëd iquiec con Pabëd iquiec quiacbimboec tantiadendac. <sup>24</sup> Ëbi tantienquoio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquoio chuiboc. Aidën chiaidquoio adquidën niac-niaquiec —quepondash Esus abëd icquido chiec.

<sup>25</sup> Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. <sup>26</sup> Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. <sup>27</sup> Con Pa yacno nidshun con Mayan mibëdi tabadmequin dacuëdenquoio icquid mibi icmendambi. Adoac dacuëdenquoio yec bëdamboec tabadta. Ëbi tantiesabo dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquoio yec bëdamboec tabadta. <sup>28</sup> “Nëbimbobini con Pa yacno nidendac. Adtanëquic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash. “Esus abi namequid aton Papabëd tabadec nidec,” quiaish ëbi tantiec cuishonquetsiash. <sup>29</sup> Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshendä capondash. Ambi chiondacadquid Nuquin Papan Madombo nec,’ quequin tantianu,” quiaish adobi. <sup>30</sup> Nëbi ënquimbi chuinu. Ëbi tantiesabon icbo Satanas ëbi unës uamenuec choec. Ambembi aidën ëbi unës uametiapimbo iquiec. <sup>31</sup> Con Pan tantiacpadequini unësëndac. Ëbi adec unëso isash: “‘Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiaish adebi. Nëbimbobimbi naique. Nidec nidnu. Nid —quepondash Esus.

1 —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapictšec icťsequi cuidi-cuidipambo yanquid. Adquidic shancuin bacuĕbimboec didiquequid. Uba dadan aton cuidi canimequin bĕdambo icmequid. Adomboembidi ĕbi tantiaquido bĕdambo icmendambi. Nuquin Papan uba icbobimboecquid nec. 2 Uba aton icbon cuidi utsiuc bacuĕesa icsho pateshunepaid yoc. Adoacbimboen ĕbi tantiauidťšĕboedon ambi icsamboen naid ĕntiapimbo icsho con Pan ambi icsaido cuidacno nĕnendac. Uba icbombidi bĕdamboen bacuĕmenuen dadpen cuidi icquid cuidi dadpen pateshun siaquid. Adomboembidi ĕbi tantiaquido bĕdamboshĕ icmenuen Nuquin Papan aidon icsamboen naid ĕmetsiash. 3 Ĕmbi chiacpadomboen naic mibi bĕdambo iquec. Aden ĕbi tantiasho Nuquin Papan mibi bĕdamboen isec. 4 Ĕbi adembidi tantiaquin ĕmbi chiacpadomboen nata. Adsho isash mibi bĕdamboen tabadmec mibĕd iquendabi. Uba cuidi padquĕdaid bacuĕtiapimbo iquendac. 5 Adecbidi ĕbĕdi tĕshnanash matses bĕdambo ictiapimbo iqueque. Ĕbĕd tĕshnanenquio yec bĕdamboec tabadta. Bĕdamboec tabadquin mimbi utsibo ĕbi tantiametsiac. 6 Uba icbon cuidi utsiuc bacuĕesa icsho pateshun tsindoshon nĕdĕncapaid yoc. Adoacbimboen ĕbi tantiesabo unĕsacsho Nuquin Papan ambi icsaido cuidacno nĕsecaindac —quepondash Esus.

7 Adshumbic Esusĕn padpiden chuipondash. —Ĕbi tantiaquin ĕmbi chiacpadomboen naquidĕn: “Ĕbi nashunta, Papa,” cac ambi chiacpadomboen Nuquin Papan nashuntsiash. 8 Nuquin Papan adoshonac: “Nuquin Papa bĕdambo iquec,” mimbi catsiac. Adembidi utsibotsen: “Nuquin Papa bĕdambo iquec,” camenuen bĕdamboec tabadquin ĕbi tantiameta. Mimbi adosho: “Āi, ĕbi tantiaquidquio nec,” caindambi. 9 Con Pan ĕbi tantiaquiapadomboembi mibi tantiaquiembi. Adoaid icquin ĕbitsen tantiaquioquin ĕmbi chiacpadomboen nata. 10 Abi tantiaquioquin ambi chiacpadomboen nashobini con Pan tantiaquiec. Adembidi ĕbi tantiaquidĕn ĕmbi chiacpadomboen nasho ĕmbitsen aid tantiaquiendambi. 11 “Ĕbi cuishonquiapadquiecbidi ma ĕbi tantiaquiec cuishonquequiono,” queshun aden mibi chiembi —quepondash Esus abĕd icquido chiec.

### *Tantiananta, quequin Esusĕn chiaid*

12 Adashic abĕd icquido padpiden chiec Esus: —Ĕmbi mibi tantiaquiapadquiec tantiananta. 13 Nadquiec caimbi. “Min utsi cuesnu,” cashunac: “Ĕbien natiad,” quiacbimboec tantiananta. Aden mibi tantiec ĕbided cuidadec unĕsendabi. 14 Ĕmbi chiacpadomboen nasho mibi con utsi caimbi. 15 Ĕmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bĕda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. 16 “Esusbĕd iquec nidnu,” ¿quequinda mimbembi tantiadionda? Ĕmbien mibi: “Nuquibi icnu. Cho,” caondac. “Utsibo tantiamequin ma nĕidon ĕbi chuibenenu. Adoac utsibotsen ĕbĕd tabadtequid yanendac,” queshun mibi cho caondambi. Aden ĕmbi chiacpadomboen naquidĕn Nuquin Papa chuiquin: “Min Mado Esus tantiaquid ĕbi icsho ĕmbi chiacpadomboen ĕbi nashunta, Papa,” mimbi cac mimbi chiacpadomboen Nuquin Papan mibi nashuntsiash. 17 Ĕbi adsho tantiash ĕmbi chiacpadquiec tantiananta —quepondash Esus.

### *Esus tantiaquido chieshĕnte chiaid*

18 Adashic padpidec Esus onquepondash. —Ëbi tantienquo icquidon chieshënac: “Aden Esusba chieshënondash,” quequin tantiata. 19 Ëbi tantiesabo icsho ëbi chieshënquidon mibi bëdamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. 20 “Yuan icbon chiacpadomboen napaid yoc,” quequin ëmbi çchuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoindac. Padnuen ëmbi chiaid tantiaquidën mimbi chiaidtsen tantiendac. 21 Ëbi chieshënquidombi ëbi chomiondaidquo tantiaquin ëbi chieshënenquo ictsiash. Ma ëbi chomiondaid Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. 22-23 ¿Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshënec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshënquido: “Mibi icsamboshë iquec,” caindac. 24 Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënec mibi icsambo iquec,” cainquo ictsenosh. Útsibon nabanacmaidquo comapenen tantiaquin mambi nabamboc. Adosho isash ëbi chieshënquido: “Icsapenquo iquebi,” que-tiapimbo iquendac. Ëmbi nabansho isun ëbi chieshënquin con Patsen chieshënec. 25 “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec —quepondash Esus.

26 Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. 27 Adoac mimbitsen ëbi chuibanendac. “Yuec aibdëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëdenda.

## 16

1 “Chieshtonoshe,” qeshun mibi aden chiombi. Mibitsen chieshënac dacuëdenda. Mibëd con Mayan tabadmembique. 2 Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh aendac. Adomboembidi mibi chieshënquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quependac. 3 Aden Nuquin Papa ëbëdta tantienquo icquidon ëbi tantiaquidotsen chieshënendac. 4 Mibi chieshënac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” qeshun nëbi mibi chiembi —quepondash Esus.

### *Nuquin Papan Mayan chote chiaid*

5 Adashic: —Nëbi ëbi chomiondaidbëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo

tabadsho isash Esus padpidec onquepondash. —“¿Mitsimbo nide?” ¿quenuioda ique? <sup>6</sup> Ai, ëmbi chuiboed tantiac unësquoio icnuen mimbi ëbi chienquoio icchitec. <sup>7</sup> Ëbi nibëdnuc mibi bëdambo iguendac. Ëbi nidenquoio icnuc con Mayan mibi bëdamboen tantiamenuc choenquoio ictsiash. Nidshumbimbi mibëdi tabadmenuen chomendac. <sup>8</sup> Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. <sup>9</sup> Aden Nuquin Papan Mayanën tantiamiac: “Esus tantienquoio yec icsambo icchitebi,” quendac matses. <sup>10</sup> Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquoio yec con Pa yacno nidan con Mayanën tantiamiac matses adendac. <sup>11</sup> Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquoio icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

<sup>12</sup> Adashic abëd icquido chiec Esus: —Mibi dadpenquoio chuitiadquoio icquimbi nëbi dadpen chienquoio iquembi. Nëbi ëmbi chuisho mimbi tantiatipimbo iquec. <sup>13</sup> Nuquin Papan Mayan choshombien mibi abimbo chuiquin ëbi tantiamendac. Ambembi chienquoio icquin Nuquin Papan chiaiduidi chiendac. “Nadquoio iguendac. Adecbidi nadquid choendac,” quequin mibi dadpen tantiamendac. <sup>14</sup> Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. <sup>15</sup> ¿Ëbiuidtsëqui tantiamenunda con Mayanën adopec? Padenquoio. Ëmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

### *Abi nidte Esusën chiaid*

<sup>16</sup> Adashic padpidec: —Nëbi isadenquoio yanebi. Adashic yuecpectsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. <sup>17</sup> Adsho tantiashini ëbitedi: —¿Atotsi quepec? Tantiadenquoio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquoio yec: “Nëbi isadenquoio ictanec yuecpectsëc yash isadcuenendabi,” queposh? <sup>18</sup> ¿Atotsi quepec nec? —quepondabi Esusbëd icquidobëd onquec. Esus tantiamenquoio yec sho-shoshquetsëcquiec onquepondabi. <sup>19</sup> Adsho ambembi tantiashe: —Ëbëd icquidon ëbi chuitiadquoio iquec —qeshun Esusën: —“¿Atotsi chuitiadquoio yec nio?” quequin ëbi chuite mibi buneque. <sup>20</sup> Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquianendac. <sup>21</sup> ¿Mitsipadquoio bacuë tishec chido icpec? Bacuë cuididiquenuc natiamboshë icboedi bacuë tishash cuishonquelpaid yoc. <sup>22</sup> Adecbidi nëbimbobi ëbi unëso isash mibi natiaquien-dac. Adboedi yuecpectsëcshun ëbi padpiden isash mibi cuishonquendac ënëdenquoio yec. <sup>23</sup> Adnubini con Pa yacno nidendac. Ëbi adnuc mibi bëdambo iguendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. <sup>24</sup> Aden mimbi Nuquin Papa chianenquoio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi



adoac mimbi chiacpadomboen mibi nashunquin Nuquin Papan mibi cuis-honcamendac —quepondash Esus abèd icquido chiec.

### *Esusën abèd icquido ënquimbi chiaid*

<sup>25</sup> Adashic abèd icquido padpiden chiec: —Ompoacbimboen dadpen chuibanombi. Yuepactsëcshun: “Con Pa nadquio iquec,” quequin mibi sebadënquio chiendambi —quepondash Esus. —Uincuenshun aden chien-dambi —quequin tantiec adondash Esus. <sup>26</sup> Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquio. <sup>27</sup> Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquio-quin mibi nashunendac. <sup>28</sup> Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

<sup>29</sup> Adsho tantiashini ëbitedi: —Adquidshenda mibi nepec. Ma nëbi mimbi sebadënquio chieyoc. <sup>30</sup> Mibi: “Nëbi isadenquio yanëbi,” quioc. Adashic: “Yuepactsëc yash isadcuenendabi,” mibi qesho tantiash mibi tantiamen-quo yec sho-shoshquetsëcquiec: “¿Atotsi quepec?” quecuededpobi. Mibi chuimetiadquio iccobi. Ëmbi chiambobi ma mimbibi tantiapaboc. Comapen-ten tantiaquidquio icquin ma mimbibi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. <sup>31</sup> Adsho tantiash Esus: —Ai, nëbi mimbi ëbi tantiaquiec. <sup>32</sup> Aden ëbi tantiaquidquibi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. <sup>33</sup> “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satansën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëndenda —quepondash Esus abèd icquido chiec.

## 17

### *Esusën Nuquin Papa chiaid*

<sup>1</sup> —Dacuëndenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bédambo icmeta. Aden mimbi bédambo icmiac mibitsen bédambo icmendambi, Papa. <sup>2</sup> Ëndenquimboshë mimbi ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbi ëbi chiondac. Mimbi adondaid icquin mimbi tantiactedi matses nuquibëd tabadtequido icmendambi, Papa. <sup>3</sup> Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaidquio Esus nec,” quequin tantia-asho nuquibëd tabadtequido icmendambi, Papa. <sup>4</sup> Mimbi chiacpadom-boen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bédamboen isec. Nuquin Papa bédamboshë iquec,” quependac, Papa. <sup>5</sup> Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi

tabadtenecpadembi. “Nuquibi abitedimbo namenuna,” ëbi cata, Papa — quepondash Esus Nuquin Papa chiec.

### *Esusën abëd icquido Nuquin Papa chiaid*

<sup>6</sup> Adshumbic Esusën abëd icquido ëbitedi chuiquin aton Papa chuioapon-dash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. <sup>7</sup> Adembidi aidon: “Nuquin Papan namiaidquio nec. Ambe-mbi nainquio iquec,” quequin ëbi tantiaposh. <sup>8</sup> Mimbi chiaid ëmbi chuisho tantiaashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa. <sup>9</sup> Ëbi tantienquio icquido mibi chienquio iquembi, Papa. Ëbi tantiaquiduidtsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. <sup>10</sup> Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Içbo mibi canu. Mimbi chiacpadec bëdamboec tabadiadquio iquebi,” quequin bëdambo icmioshi, Papa. <sup>11</sup> Mibi bëdamboeshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantianan-quiacpadquiec ma ëbi tantiaquido tantiananu. Nëido bëdamboen dayun uata, Papa. <sup>12</sup> Aidobëd icquin mimbi chiaidquido bëdamboen chuibanquin chieshtomiambo iccombi. Aden bëdamboen dayun uaqin ëbi tantiaquido cudasënquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bed-menuen Satanasën Udas yuaccosh. Adoac ëbi bedmequid yanash mimbi cuidtequid iqendac.

<sup>13</sup> Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” queshun mibi otacquo chienquio iquembi. “Ëmbi abi dayun uate chuisho tantiaash ëbi yacpadec ma cuishonquenu,” que-quin mibi otacquo chienquio iquembi, Papa. <sup>14</sup> Mimbi chiaidquido nëido chuibanombi. Adoac ëbi tantiaquido yansho ëbi chieshënquidon nëidotsen chieshëmpec. Ëbi yacpadec mimbi chiaid niac-niace bunenquio icshobidi nëido chieshënquiec, Papa. <sup>15</sup> Aden tantiaash: “Ëbi tantienquio icquidobëdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqin chieshtomenda, Papa. <sup>16</sup> Ëbi tantiesabo tabadacpadec tabadenquio icquin ëmbi nabocpadomboen natiadquio iqueque. <sup>17</sup> Mimbi chiaidquido pausunquioquin bëdamboen tabadme, Papa. <sup>18</sup> Mimbi ëbi: “Matses chiec nid,” caondacpadomboen aid: “Ëbi chuibeneta,” caindambi. Adoac nëidon ëbi chuibenendac, Papa. <sup>19</sup> Nëido tantiaquiec nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaash ëbi tantiaquido min yuabombo ic-menuc adebi, Papa — quepondash Esus aton Papa chiec.

### *Esusën abi tantiaquid utsibo Nuquin Papa chiaid*

<sup>20</sup> Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. <sup>21</sup> Nuqui tëshnanenquio

yacpadequi nuquibèd tëshnanenquio icquid icmeta, Papa. Nuqui tantiananquiapadec èbi tantiaquidotedi shubu abentsèquèn tabadac bimboec nuc tantianameta, Papa. Adsho isash nuqui tantienquio icquido nadt-siash. “Esus tantiec bèdambo iquec. Aden Nuquin Papanuidtsèqui bèdambo icmetsiash. Nuquin Papan chomiaidquien Esus nechitec,” quetsiash. <sup>22</sup> “Mibèd èbi tantiananquiapadquiec ma èbi tantiaquido tantiananquiono. Ma chieshènanenquio icnu,” quequin mimbi èbi namiacpadom-boen èbi tantiaquido namiombi, Papa. <sup>23</sup> Nuqui tëshnanenquio yacpadeac aidobèd tëshnanenquio iquendabi. “Chieshènanenquio yec tantiananquiec ma bèdamboec tabadnu,” quec aidobèd tëshnanenquio iquendabi, Papa. Adecc èbi tantiaquido bèdamboec tantianansho isun matsesèn naden tantiatsiash. “Ambi chiapadquid Nuquin Papan chomenèdaid icquin Esusèn abi tantiaquido aden bèdamboen tabadmec. Ambi chomenèdaid aton Mado tantiaquiapadomboen Nuquin Papan aid tantiaquido tantiaquiec,” quequin matsesèn tantiatsiash, Papa. <sup>24</sup> Mimbi èbi tantiaquido icmiaido nuqui tabadac nombo tabadmeta. “Nuqui matses uabi icquin mimbi: ‘Èmbi tantiaidquio mibi neque. Nuquibi nanuna, Mado,’ cac nuqui bèdamboshè yec tabadtenecpadequi nuqui tabadsho ma èbi tantiaquidon isnu,” qeshun mibi: “Nuqui yacno tabadmeta, Papa,” caimbi. <sup>25</sup> Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuèsh choquid icshobini èbèd icquidon: “Ai, Nuquin Papa yacnuèsh choquidien nec,” quequin tantiaposh, Papa. <sup>26</sup> Aden tantiamenuen yuec èbèd icquidobèd tabadquin mimbi naid chuibanombi. Èbi nidan èmbi chomiaidèn con Mayanèn adembidi èbèd icquido tantiamendac. “Mimbi èbi tantiaquiapadomboen ma nuqui daèdi tantiaquiash ma tantiananquiono,” qeshun con Mayan aidobèd tabadmendambi. Adoac èbèd icac bimboec con Mayan tantiadendac, Papa —quepondash Esus Nuquin Papa chiec.

## 18

### *Esus bedmiaid*

(*Mat 26.47-56; Mad 14.43-50; Duc 22.47-53*)

<sup>1</sup> Aden Nuquin Papa yuen chianec Esus nidpondash. Èbi chedobèd nidquin acte Sededon caid potiash tiedno cuète odibos caid nitsinacno èbitedi chiec tabadtenebocnombo chopondash. <sup>2</sup> Ambo tabadnubien Udas: —Èbi abèd tabadtenebocno tiednoen nidchitash —quianec Esus bedmenuc <sup>3</sup> chopondash. Aden chieshèmènquido chuiquid dapabo chuitanshun matses dadpen bèpondash nèidtedi. Nèidic con matses chuiquid dapabobèd tan padiseyobon namiaido sondado chedo. Nèidic con matses yuquido Doma yacnocquido sondado dadpen. Nèidic aid sondado chuiquid. Aidtedi Udasèn bèpondash. Tabotebèdta cueste sanambededsècquiec cho-chopondash. Utsibombic chèshte.

<sup>4</sup> Adecc cho-chosho isash bèquedbanec nidquin: —Èbi unès uamec —quequin tantiaquin Esusèn: —¿Atotsi quec ne? ¿Tsutsi nibène? —cac <sup>5</sup> —Nasaded yacnuèsh caniquid Esus bednuec nebi —quepondash sondado chuiquid. Adshun isac aidbèd Esus bedmequid Udas icpondash.

<sup>6</sup> Adshobien Esusèn: —Nè iquebi —capondash. Nuquin Papapadquidquibi icquin adoac dacuèdec: —Aucbidi cuenu —quec uebudcededpondash bednuequidotedi. <sup>7</sup> Adshobien padpiden Esusèn: —¿Tsutsi nibène? —cac: —Nasaded yacnuèsh caniquid Esus bednuec nebi —queoasho tantiashun: <sup>8</sup> —“Nè iquebi,” caombi. Èbiuidtsèqui bedta. Èbèd icquido bedenda —capondash Esusèn. <sup>9</sup> —“Mimbi èbi tantiaquid icmiaido

Satanas chieshtomiambo iccombi, Papa,” quequin ëmbi Nuquin Papa chuibocpadomboen nêido chieshtometiapimbo iquebi —quequin tantiec: —Nêid bedenda —quepondash Esus.

<sup>10</sup> Adnubien Petedon abi tsiadaid chështe chictanquin chuiquid dapan yua abiucquio pateshunepondash. Aid yua Madco niondash. <sup>11</sup> Adosho isashien Esus: —Padi. Chên. Min chështe naued. Nuquin Papan chiacpadeç paëmbo icnuc unësendabi —quepondash Esus.

*Anasën shubuno Esus buanaid*

(*Mat 26.57-58; Mad 14.53-54; Duc 22.54*)

<sup>12</sup> Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buan —catanquin catanepondash. <sup>13-14</sup> Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshê nec: —Nuquin matsestedi unës uamenquo icnuen Esused unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquo Caipas ismenuen buampondash.

*Petedon: Ëmbi isacmaid Esus nec, quequin chiaid*

(*Mat 26.69-70; Mad 14.66-68; Duc 22.55-57*)

<sup>15</sup> Esus buansho isun Petedobêdtan chinunondambi. Chinuntuidash nidëqui Caipasën shubuno choash daquënë uaidën puduednuesho tantiashun shêcuê isquid chidon puduedmiondashi. Ambi isondaïd icsho aden puduedmiondashi. <sup>16</sup> Ëbi puduedmequin Petedo ambi isacmaid icsho puduedmenquo icpondash. Adsho istanquin: —Ëbêd icquid neque. Shêcneshun. Ma puduednu —capondambi. <sup>17</sup> Adoac puduedmeshun shêcuê isquid chidon: —¿Nê bedboed Esusbêd icquidta mibi ne? —capondash Petedo chuiquin. Adoaguen Petedo dacuêdec: —Padenquo —quepondash muequi. <sup>18</sup> Adnubien iquendoshon daquënë uacnoshon cuête dêtsiadoshon sondado chedobêd anocquido yuabo cuête cuêec tabadpondash. Adsho isashien Petedotsen cuête cuê nec nidpondash ëbi shubunquo puduednuc.

*Caipasën Esus chuimiai*

(*Mat 26.59-66; Mad 14.55-64; Duc 22.66-71*)

<sup>19</sup> Adec ëbi puduednubien Caipasën Esus chuimepondash. —Mibêd icquid ¿tedsi iquec? ¿Ëbêd icquido dêniaquecta icpec? Mibêd icquido ¿mitsipaden chuibano? —capondash. <sup>20</sup> Adoaguen Esusën chuipondash. —¿Ompoquindambi chuibandio? Nuquin Papâ tabadte shubu uashunaid daquënë uaidën puduedshun mambi chuibandeneboc. Nuquin Papan chiaïd chuibante shubun-shubunquiec puduedcuenequin mambi chuibeneboc. Ompoquin chiamo iccombi. <sup>21</sup> Mimbî: “Icsamboen naosh,” caïd ëbiuidtsëqui chuimenda. Ëbêd icboedotsen chuime. Ëmbi chiaïd abitedi tantiashun aidombi mibi chuïtsiashe. Aidotsen chuime —quepondash Esus.

<sup>22</sup> Adsho tantiashun: —¿Chuiquid dapada adopaid? —quetanquin sondado chuiquidën mëdanten bêcuespondash Esus. <sup>23</sup> Adoaguen: —¿Icsamboendambi chuidio? ¿Atotsimbi icsa uaoque? En chui. Mambi abimbo chuïboc. ¿Abimbo chuiquidta cuespaid? —quepondash Esus. <sup>24</sup> Adondash Esus Anasën abi cataniacchobi Caipasën shubuno bêac.

*Petedon: Ëmbi isacmaid Esus nec, quequin chuioid*

(*Mat 26.71-75; Mad 14.69-72; Duc 22.58-62*)

<sup>25</sup> Adnubien Petedo abi cuête cuêec tsadsho abêdtan cuête cuêec tabadquidon: —Esusbêd icquidien mibi nechitec —capondash. Adoaguen

Petedo: —Padenquio. Mabi aidbéd icambo yoc —quepac caondash. <sup>26</sup> Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien <sup>27</sup> padpidec: —Padenquio. Mabi ano nidambo yoc. Ëmbi isacmaidquio ma Esus neyoc —quenubien Esusën chuihoedquio cachina bënë cuëdampac caondash.

*Pidato caidën shubuno Esus buanaid  
(Mat 27.1-2; Mad 15.1-5; Duc 23.1-5)*

<sup>28</sup> Adnubien Caipas aton chuiquid utsibobéd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbéd pec tabadiapiombo icchitomane —quiash Pidaton shubun pudueddenquio icpondash. <sup>29</sup> Adnubien Pidaton aton shubunuësh puduantanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien <sup>30</sup> —¿Bëdambo icquidtamibi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënquido. <sup>31</sup> Adoaquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uascho isash min matses chieshtonoshe. Min matsesën: “Con matsesënuidsëqui unës uaquin cuidaquien bëdambo ictsiash,” queshun ëbitedi chieshënushe —quepondash Esus chieshënquido Pidatombo Esus unës uametiadquio yec. <sup>32</sup> Ënden abi chieshënquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuc adpondash.

<sup>33</sup> Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien <sup>34</sup> Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. <sup>35</sup> Adoaquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien <sup>36</sup> Esusën Pidaton bëyuc chuihoed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

<sup>37</sup> Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

<sup>38</sup> Adsho tantiashun Pidato: —¿Tsuntsin matses uaquid quequin abimbo chuipatsiash? —quetanec puduëshun Esus chieshënquido chuioapondash. —¿Icsambo icquidta Esus nedic? Ma icsapenquio icquid neyoc. <sup>39</sup> Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniøndambi. Adem-bidi abentsëc cuemembí. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: <sup>40</sup> —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënquido Esus unës uamete bunquiec.

## 19

*Esus cueshcaid**(Mat 27.27-31; Mad 15.16-20)*

1 —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuêshê dëctanquin nacnenaid Cueshcanten Esus comapenen cueshcapac caondash. 2 Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcute-bimboecquid umucquid dasiuintanquin: 3 —Adec dasiuidquid chuiquid dapambo nec —quequin sondadon Esus mamënschumpac caondash. Aden mamënschunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

*Esus unës ua, quiaid**(Mat 27.15-26; Mad 15.6-15; Duc 23.13-25)*

4 Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien 5 Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduëshobien Pidaton: —Is. Mimbi bëboed choeque —cac 6 chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënkuido comapenec cuêdec. Adoquien Pidaton: —Mimbi cuesten dectanquin unës uatan. Èmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

7 Adoquien Esus chieshënkuidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Èsusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. 8 —“Nuquin Papan Madombo nebi,” quiosh —quesho tantiashien Pidato dacuêdquiec yampac caondash. 9 Adash aton shubun Esusbëdi puduedoashun Pidaton Esus chuiuoapondash. —¿Tsutsimbo ne? ¿Mitsiuëshquio chonda? —caqui Esusën ëcbedenquio icpondash.

10 Aden ëcbedenquio yac nëishashien Pidato: —¿Chuitiapimboda ique? ¿Tantienquioda ique? Èmbi: “Cueme,” cac mibi cuemetsiash. Èmbi: “Cuesten dectanquin unës ua,” cac mibi adotsiashe. En chui —caquien Esus: 11 —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ëbi cuesten dectanquin unës uametiapimbo ictsiac. Èbi cuesten dectanquin unës uamenuc mibi icsambo icnuc ëbi bëboedo chuiquid dapabo icsamboshë iquec —quepondash Esus.

12 Adsho tantiashien Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënkuido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Èbentsëqui chuiquid dapambo nebi,” quiac caosh. Aid dëniaguec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. 13 Adsho tantiashun Esus puduemeoatanec cuënote nacnenaid abuc tsadunaidën cuidte chuinuac tsadten tsadtopondash Pidato. Aid cuënote nacnenaid con onqueten Cabata capondash. 14 Nuquin Papan matamiampid inchësh tantiatie ushë badiadash

icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. <sup>15</sup> Adoquien: —Cuesten dectanquin unès ua. Nëbimbobi buanshun cuesten dectanquin unès ua —quecuededpondash Esus chieshënkuido. Adoquien: —¿Mibi chuiquid dapadambi cuesten dectanquin unès uape? —Pidaton caquien Esus chieshënkuido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unès ua —quecuededpondash Esus chieshënkuido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

<sup>16</sup> Adoquien Esus chieshënkuidon chiacpadomboen: —Esus cuesten dectanquin unès uatan —capondash Pidaton aton sondado chuiquin.

*Cuesten dectanquin Esus unès uaid*  
(*Mat 27.32-56; Mad 15.21-41; Duc 23.26-49*)

<sup>17</sup> Adoac buanquin: —Nëidën dectanu —qeshun sondadon cueste daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. <sup>18</sup> Ambo nidshun aton dashcute dachictanquin bëchun shuin mëtoccaquinc tatoccaquinc catanquin cueste daëd napotiaid ambi bëboedëmbi Esus dectampondash. Icsambo icquid daëdpambo cuesten dectanuid uquë diadbudcueneç diadnuc Esusquio nënantanquio dectampondash.

<sup>19-20</sup> Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cueste pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanuid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanuid isashien Esus chieshënkuido nëishquiopac caondash. —Shubu dadpen icquid Edusaden caid anoentsëqui Esus dectanuid icnuc matses utsin onqueten onquetenquien dada uaid matses dadpeshun isnushe —quiash <sup>21</sup> Pidato chieç nidpac caondash. —Icsamboen chuiquin ma mimi dada uapaboc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cueste cuëshë utsin dada uata —caquien <sup>22</sup> —Padi. Mambi ëmbi tantiaaboedquio dada uaboc. Utsi uain dada uaoatiapimbo iquebi —quepac caondash Pidato.

<sup>23</sup> Adnubien Esus dectanquido sondado daëd-daëdquieç icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash. <sup>24</sup> Adquid icsho isun: —Canchenquio icquin ¿tsundanquio bedequè? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemaiid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemaiid isnuen naosh,’ quependac,” quequin dada uapampic.

<sup>25</sup> Adnubien Esus dectanuid cueste tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. <sup>26</sup> Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen

dayun uanu —capondash Esusën. <sup>27</sup> Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

<sup>28</sup> Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaqin chuipampicpader: —Acte bundobi —quepondash Esus. <sup>29</sup> Adsho tantiashun matsun acte mucambo icquid anidquid shapushapupactsëcquidën punshun cueste dëdectanshun abuc sananquin ëccuëscadonetsëcquin chishmepondash. <sup>30</sup> Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tédquëdbudpondash Esus unësequi.

### *Esus uinte masiaid*

<sup>31</sup> Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococame —qeshun Pidato chuitampac caondash. —Baded nitde podquënquin unës uame. Inchësheque —cac <sup>32</sup> Pidaton aden chiac sondadon nitde podquëntanondash. Esusbëdta dectanaid ëquë diadquidba nitde podquënshumbic utsiuc diadquidtsen. <sup>33</sup> Adotanquin isquien Esus ënden unësac. Adshobien nitde podquënenquio icpondash.

<sup>34</sup> Adotanquimbic: —Unësabi icnushe —qeshun: —Unës uaquiobono —quetanquin sondadon cudan podosequin Esus uinte masepondash. Adoac nua intac chididiquiondash actebëdi. <sup>35</sup> —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin. <sup>36</sup> Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. <sup>37</sup> Adembidi podosequin dada uapampic. “Ambi podosequin anseboed isec tabadendac,” quequin dada uapampic.

### *Esus unësacsho chococaid*

(*Mat 27.57-61; Mad 15.42-47; Duc 23.50-56*)

<sup>38</sup> Adnubien shubu dadpen icquid Adimateya yacnocquid Ose chopondash. Esus tantiaquid aid niøndash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. <sup>39</sup> Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adobëdta cabiunaid unësaid dabiunte bëac caondash. Nuamboshë. Yuëmbo icnuc <sup>35</sup> quidostembi icnuc bëac caondash. <sup>40</sup> Adshumbien Osebëdtambi Esus nua dabiunquin uesquin dataniac caondash dashcutën. Adshumbic padpiden dabiunoaqin. Adshumbic padpiden dataneoquin. Adshumbic padpiden dabiunoaqin. Adshumbic dataneoquin. Chococanun con matsesën adoquid. <sup>41-42</sup> Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

## 20

### *Esus uincuenaid*

(*Mat 28.1-10; Mad 16.1-8; Duc 24.1-12*)



<sup>1</sup> Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. <sup>2</sup> Cuënote dapa bëcunepamboen shëcniacsho istanec titinquietanec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

<sup>3</sup> Adoquini: —Istanu —quianec <sup>4</sup> titinquietanec chococacno Petedobëdi nidpondac. Petedo nianec ëbia nidpondabi. <sup>5</sup> Adshumbimbi puduedenquo icquin shëcuë anshuebudshun anispondac. Adshun isquien dashcute dataniaiduidtsëqui uec. <sup>6</sup> Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. <sup>7</sup> Në dataniaid uenubi udictsëc dashcutempi bëpucaid bëdamboen shëbunaid uiondash. <sup>8</sup> Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombi nec —quepondabi Petedobëdtsëqui onquec. <sup>9</sup> —Nuquin Papan tantiamiac con tsusedpabon aden Esus uinciente chuiquin dada uapampic —quequin tantienguo icboedi adondabi. <sup>10</sup> Aden istanec ëbi ushbcnobidi chiec choapondabi.

*Esusën Madia Mactada yacnocquid ismiaid  
(Mad 16.9-11)*

<sup>11</sup> Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien <sup>12</sup> Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. <sup>13</sup> Adshumbic aidën: —¿Atotsi quiash sedenque, champi? —caquien: —Con Icho pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec <sup>14</sup> auchbidi nidnuec bidiadshun isquien Esusquio icpec. Utsi dansho <sup>15</sup> Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icho padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquibi chuiquimbi.

<sup>16</sup> Abi adoshobien Esusën: —Èbi nebi, Madia —cac bëisquiotanequien: —Esus nec. Èbi chuiquidquio nec —quetanquin con onqueten cuëntsin: —Dabi —capac caondash. Adotanquimbien Esus dayumbudpac caondash unësquio icsho. <sup>17</sup> Aden abi dayumbudshobien Esusën: —Èbi dayunenda. Padpidec nidenquio icte danquin ëbi dayunenda. Èmbi chuibocpadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuiboequidquio chuitan. “Nuquin Papa yacno nidandabi, quiosh,” catan —quepac caondash Esus. <sup>18</sup> Adoquien ëbi chiec Madia chopondash. —Nuquin Icho Esus isombi. Uincuenacosh. Ambi chui-boed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

*Uincuenshun Esusën abëd icquido ismiaid  
(Mat 28.16-20; Mad 16.14-18; Duc 24.36-49)*

<sup>19</sup> Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënkido dacuëdënkquin umanucueësh utsi puduedtiapimbo icnuc bëdamboen bëtashash tabadnubien shëcuënuësh puduedenquio icboedi nuntanquibi Esus isadcuempondash. Adtanequien:

—Dacuëndenda —quepondash. <sup>20</sup> Adtanquin abi bëchun shuin mëtoçcaid abi podo ansiaidbëdta ismiaquini cuishonquiampondac: —Nuquin Icho uincuenac —quiash. <sup>21</sup> Adec cuishonquesho isashien ambi chuibocpadechbidi: —Dacuëndenda —quetanec: —Tantia. Mibi chuinu. Con Pan: “Matses chiec nid,” ëbi caondacpadomboembidi: “Ëbi chuibeneta,” mibi caimbi —quepondash Esus. <sup>22</sup> Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. <sup>23</sup> Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboembidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanec isadenquio yanoaondash.

### *Esusën Tomas ismiaid*

<sup>24</sup> Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash. <sup>25</sup> Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoçcaid shëcûë isun aid shëcûë mëdanten bëmishquinc podo ansiaid bëmishquinc caquioshom-bimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. <sup>26</sup> Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Pducedtiapimbo icnuc padpiden bëtashoash tabadnubien shëcûë shëcniabi Esus isadcuenoapondash. Adashic: —Dacuëndenda —queoapondash. <sup>27</sup> Adtanec: —Is con mëdante, Tomas. Shëcûë bëmishec cho. Nè podo ansiaid iqueque. Aidtsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantia-ata —caquien <sup>28</sup> mishenquio yec badedi: —Tso. Con Icbombo ma mibi neyoc. Nuquin Papapadquidquiobidi ma mibi neyoc —quepondash Tomas. <sup>29</sup> Adsho tantiashien Esus: —Ëbi isun: “Nuquin Papapadquidquiobidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquiobiden nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

<sup>30</sup> Comapenen tantiaquidquio yec abembi uincuenash Esus adpondash. Ènden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. <sup>31</sup> Padi, aitedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aitedi dada uaombi.

## 21

### *Chian cuëmanuësh Esus isadoaid*

1 Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. <sup>2</sup> Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nèdic Petedo. Nèdic Tomas anin abi ushëmbi daëd tishaid ëmbi caboed. Nèdic Cana yacnoquid Natanaid. Nèdic ëbëdta tishaidquio. Nèdic ëbi. Nèdic Esusbëd icboed utsi daëd. Aitedi

icpondabi. <sup>3</sup> Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

<sup>4</sup> Badiadquionobi acte cuëman masi dapan Esus nidsho istuidpondambi. Utsiemi dampondac. <sup>5</sup> Adshobini Esusën cuëmpondash. —Con utsibo çtedtsi bedo? —cac: —Padambo. Nibëdosh —capondambi. <sup>6</sup> Adsho tantiaashun: —Mimbi nëniauc nënenquo icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

<sup>7</sup> Adsho isumbimbi: —Ma Esus neyoc, Petedo. Nuquin Icho nec —capondac. Adoacuien aton tsitsumi icquiduidtsëqui icnuc abi dachiquidboed aton dashcute utsi dasuiidtanec acte nëpudunash Petedo tan-tanidëc nidpondash Esus isnuec. <sup>8</sup> Èbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi. <sup>9</sup> Tsyuec choash pudundoshon isquien pambëdi nuëcquid cuëten shëadtsec. <sup>10</sup> Adnubien Esusën: —Mimbi bedboed daëdpactsëc beccho. Penu cac <sup>11</sup> Petedo: —Ai, bedtanu —quianec nidash cano anidtoshon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquio icnuc indondambi.

<sup>12-13</sup> Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —çTsutsi ne? —nenquio icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. <sup>14</sup> Adec uincuenash shubu nuntan tabadnuc daëdec isadondashic chian cuëmanuëshitsen isadoapondash Esus.

### *Esusën Petedo chiaid*

<sup>15</sup> Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc çada ëbi tantiaque? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiaash: —Èbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbiboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. <sup>16</sup> Adshumbic padpiden: —çAda ëbi tantiaque, Petedo? —cac: —Ai, mambi mibi tantieyoc —quesho tantiaashien padpidec: —Èbi tantiaquin con obecabimboecquido ëbi dayun uashunta —queopondash Esus. <sup>17</sup> Aden daëden chuishumbic padpiden Esusën: —çAda ëbi tantiaque, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quias shubiantiadtsëcquio yanondash. Adashic: —Mibi con Icho nec. Ma mimbi abitedimbo tantieyoc. “Petedon ëbi tantiaquiec,” quequin ma mimbi tantieyoc —quepondash Petedo. Adsho tantiaash Esus padpidec: —Èbi tantiaquin con obecabimboecquido ëbi dayun uashunta —queopondash Esus.

<sup>18</sup> Adashic Petedobidi chuoiaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsuiobudtsacshoen tsiumeshun utsibon ëquë mëdimbudcuentsëcshun mibi nidte

bunacmanombo mibi buanendac —quepondash Esus. <sup>19</sup>—Aden mimbitsen Nuquin Papan chiacpadomboenuidi nabansho ëbi chieshënquidon mibi unës uaindac —quequin tantiec adpondash Esus. Adashic: —Ënenquio icquin ëbi tantiata —quetanquimbic: —Cho. Nidnu —cac ëbitedi puduanec nidondabi.

<sup>20</sup> Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachochtsëqui uesho aidën: “¿Tsutsi cao, Icho?” capondash. <sup>21</sup> ¿Mitsipadec aid unëspatsiash? —qeshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. <sup>22</sup> Adoaquien Esus: —Ëbi bunacpadequi aidi unësendac.

“Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquio iquembique. Ënenquio icquin ëbi tantiata —quepondash Esus.

<sup>23</sup> Adec: —Unësenquio ictsiash —Esus qesho tantiash ëbi caic: —Esusën tantiaidquio yec Uan unësenquio iquendac —quecuededpondash Esus tantiaquido. ¿Adenda Esusën chuidiondash? Ma padenquio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

<sup>24</sup> Aden Esusën nabanondaid ënquin chiombi. Ëmbi isondaidquio chuiquin abimbo chuiquin aidtedi dada uaombi. <sup>25</sup> Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaquin dada uate dadpenquioshë naimbudnetsiambi. Padi. Aidtedi dada uaombi.

## ESUS CHUIBENEQUIDON NAID

### *Esus aton Papan abuc indote*

1-2 Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanushun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpöndash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantienu. Chui —capanëdash Esus chuiquin.

<sup>7</sup> Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. <sup>8</sup> Aden chuishumbic: —Aton Mayan Nuquin Papan meniäc aidënquo tantiamequin pausunac ëbi chuibenequidquo mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choachon aton Papan Esus abuc indopanëdash abëd icquidobëdtan abi tantiaquid utsibon isbedednubi. Abuc isec tabadnubi abu ushun Esus bëtimpanëdash.

<sup>10</sup> Adec Esusbëd choboedo isec tabadnubien dashcute ushumbocquid dasiuidquid daëd choash tabadec: <sup>11</sup>—Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

### *Matias Esus chuibeneta quequin iccuededquidon chiaid*

<sup>12</sup> Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbocno dectatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëdted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidedi Esusën ëbi chuibeneta caido aid quënë nuntan tabadnubi <sup>14</sup>utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacimboec onquecuededpanëdash.

<sup>15</sup> Adashic Esus tantiaquid 120ted iccuedednubi nēnantanquio nidtoshon Esusēn ēbi chuibeneta caid abentsēcshun Petedon naden chuipanēdash: <sup>16-17</sup> —Udas pado chuibanu. Tantiata. Esusbēd icquin piucquid dayun uaquid icquimbi Esus chieshēnquido Udasēn Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedēmpi bedashic aid tied nantanuēsh tētaniadash pobidisquiash paēdec aton pucu tishidpac caondash. <sup>19</sup> Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuēmbededpondash. <sup>20</sup> Adembidi ēndenquimboshē Udas pado tishabicnuc chuiquin Nuquin Papan Mayanēn tantiamiapadomboen tsusedpa Dabid caidēn Udas cuidte tantiec cuēdēnte Sadmo caid naden dada uapampic:

“Ma adequi aton shubu mosadpanuna ma aibidi aton matses nibēdquid shubu icpanuna.”

Aden Udas pado cuidte chuiquin cuēdēnte Sadmo caid utsitsen naden Dabid Padon dada uoapampic:

“Aidēn icsain nacpaden tanenquiocquin ma utsin bēdamboen napanuna,” quequin Dabid padon dada uapampic —quepanēdash Petedo. <sup>21</sup> Aden chiashic abi onquec: —Udas pado nibēdnuc Esus chuibeneta quequin abentsēc nuquitedishun chuinuna. Nēid quēnē nuntan nuquibēd capuquido dada dadpen iquec. Nuqui Esus chuibeneta caid nadquid ictiad. Chuinu. Tantiata. <sup>22</sup> Esus Uan padon acten mentosho isash niamēdenquio yec Esusbēd capucueneshun Esus indosho isquidquido icsho, Esus chuibeneta, quequin nuqui chuitiad. Adoac Esusēn ēbi chuibeneta caidobēdhan Esus uincuemiad chuibantia —quepanēdash Petedo iccuededquido chiech.

<sup>23</sup> Aden Petedon chuibanac daēd istuidash Petedobēd iccuededquido, Petedon chuibocpadquid nēid daēd iquec, quequin chuipanēdash aidon. Ambi istuidaid abentsēc Ose cashun Badsabas cashumbic Ūstus, quequin cuēnaid nepanēdash. Utsibic, Matias cuēmēdquid icpanēdash. Nēid daēd Petedon chuibocpadquid nec, qesho tantiashun: —Nēnantanquio tabadec cho —cac abi daēdi choash tabadsho isash <sup>24</sup> Nuquin Papa chiech nadec iccuededquido onquepanēdash: —Nēnantanquio chomeboed nēid daēd iqueque. Is, Papa. ¿Mitsicquidimbi Esus chuibeneta, cape? Ēbitedi tantiame, Papa. <sup>25</sup> Udas pado tautiadpambo chian anēdēnquiacno nidboedēn nauidaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna —quepanēdash Nuquin Papa chiech. <sup>26</sup> Aden chuitanquimbic aid daēd abi cuēmēdquid abentse-abentsen dada uatempin dada uashumbic tēchun sandoshon cadotaniac dada uatempia abia puduenaid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted ichoedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

## 2

### *Aton Mayan Esus tantiaquidtedi menebanaid*

<sup>1</sup> Adashic isadaidbon ambi aton tiedēn caniquid abia ēshēaid bedaid tanti-aid ushē chotsēcnubi Esus tantiaquidtedi shubunuēshi iccuededoapanēdash.

<sup>2</sup> Ambo iccuededquimbi badedquido shubu nuntan cunquequid dapa choec natiambo cunquiacimboecsho abitedishun isbededpanēdash. <sup>3</sup> Aden aid isbedednubi cuēte dētsisidacimboecquid budec mais-maisc Nuquin Papan Mayan matsadtocuededpanēdash abi isquidtedi. <sup>4</sup> Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsec onquetenquio onquecuededpanēdash ambi matsadtomiaidotedi.

5 Aden Nuquin Papan aton Mayan menenubien isadaidbo utsibo Edu-saden yacno cho-choash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-chopanēdash. 6 Ambo cho-choash tabadnubi Nuquin Papan aton Mayan meniaid-meniaidquiec nēmbobi choquidon onqueten-onquetenquiec onquesho tantiash nēbi cho-choboedo utsi-utsiec: 7 —jPadtec! Dacuēdanquiopaic. Ēbipadquiecshenda onquepec. ¿Onquequidotedi nidaid Cadidia yacnoquidoda nepec? 8 ¿Mitsipaden con onquete bedash onquecued-edpec nec? 9 Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; 10-11 utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictsēcuēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacnēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibanasho tantiambi. 12 ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

13 Adnubien: —¿Bēdamboec onquepequida onquec? Paēmbocquid cubudquin acshun tantienquiocquido neapanui —queoapanēdash utsibo.

### *Iccuededquido Petedon chuibanaid*

14 Adec onquesho tantiashun Esusēn ēbi chuibeneta caido cho-choquin Petedon nidtoshun tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata. 15 Ushē abuctotsēcnubi ēbitedishun paēmbocquid acamboccombi. 16 Utsin-utsinquiec onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

17 Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushquin ēmbi chiacpaden isendac.

Adembidi tsusiobontsen ushquin ēmbi chiacpaden isendac.

18 Aden con Mayan meniac ambi tantiacpadomboembidi ēmbi chuiquin namiaidon dadan chidobēdtan

ēmbi yuecquio icshun nanun chiaidquibidi chuibanoindac.

19 Adembidi, con Mayanēn tantiamiac ēmbi yuecquio icshun nanun chiaid matsesēn chuibanubien abucuēsh uinsadpamboctequid icnubi nidaidēnshun ismete intacimboctequidbēdtabi nēdēnquetequid cuēte pushudquidbimboctequid abembi pushudquidbēdta adquidtedi mibi ismendambi.

20 Adquid icnuc badiadēn ushē chēnquenuicocnoc

inchēshacimboctequid inchēshēn ushē piu-piupambo yec intacimboecsho mimbi isbedendac.

Ēmbi ismiaidtedi icambi matses cuidte ushē choendac.

21 Ismequimbi con Icbombo nec ēbi caquidquio mēnchiquendambi,ʹ

quequin Nuquin Papan chuimiapaden Oedën dada uapampic.

<sup>22</sup> “Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. <sup>23</sup> Aidi Nuquin Papan tantiampicpaden Esus bedshun mimbi isadaidpemo chuiquid menequin, Unës uata, cac cuesten dectanquin Esus unës uapanëdash. <sup>24</sup> Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemepanëdash. <sup>25</sup> Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icho abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquo iquendambi.

<sup>26-27</sup> Aid unësash uincuenta tantiec ëbitsen uincuenendabi, Papa, quec cuëdë nec bëdambo iquebi.

<sup>28</sup> Nuquin Papa yacno tabadacpadec nidaidën tabadquin ismiac mibi yacno nidash mibëdi tabadec bëdamboshë iquebi mimbi camiaid iquendabi.’

quequin Esus tantiaquin Dabid padon dada uapampic.

<sup>29</sup> “Adomboen tantiaquin dada uash Dabid unësacsho chococapampid nëbi shëcuë iquec. <sup>30</sup> Dabid Nuquin Papan ambi yuecquo icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. <sup>31</sup> Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unësacsho chococaqui aton nami chodquenquo yec uincuenendac, quequin chuiampic Dabid padon. <sup>32</sup> Ai, Dabid padon chiampicpadembi Nuquin Papan Esus uincuemepanëdash. Aid uincuemiacsho isondaic icquin mibitedi chuibanec nebi.

<sup>33</sup> Aid uincuenash Nuquin Papan dayunquo tabadendac nëbi. Ambo choacsho matses tantiaquin Nuquin Mayan ma aibëd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquec onquesho nëbi mibitedishun tantiec. <sup>34</sup> Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquo icshun nanun chiaid naden Dabid padon chuibampic:

‘Nuquin Papa Icho Dapa icquin abipadquid icbo cain: Nëbi ëbëdi tsadec cho.

<sup>35</sup> Mibi chiehënenquido dëniacquidquo mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

<sup>36</sup> “Aden tantiaquin Dabid padon chuiampic Esus mimbi cuesten dectanquin unës uaid uincuemequin matses icsaid bedshunash abided cuidadquid Nuquin Papan icmepondash. Adoac ëmbi chiaid abimbo iqueque. Esus tantiaquidquo icta, isadaidbo —quepanëdash Petedo.

<sup>37</sup> Aden Petedon chuisho tantiaish iccuëdedquido abi icsaid tantiec unësquo yec: —Esus tantianuequin ¿atotsi nuqui nape? —quepanëdash utsi-utiec Petedobëdta Esusën ëbi chuibeneta caid utsibo chiec.

<sup>38</sup> Adoaquien Petedo: —Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bëpiscudnu qeshun. Adoacsho aton Mayan mibi menendac. <sup>39</sup> Adembidi tantiaisho isun min tsyuecquidtsen menendac. Adembidi nidaidtedi yacnocquidën tantiaisho isun aton Mayan meneoaindac ambi chiampicpaden —quepanëdash Petedo Esus isquidquo.



<sup>40</sup> Aden chuibanequi: —Mimbi icsamboen tantiaid ënta. Aden ënash Esus tantiaquidquo icta —quequin chuibudquin Petedon ëmpanëdash.

<sup>41</sup> Aden chuisho tantiaash, Tantiaguiembi, quepanëdash utsi-utiec. Aid ushëmbi dadpenquioshë tedes midted Esus tantiaquid yampanëdash. Adquid icsho isun acten mentobampanëdash.

### *Esus tantiaquido iccuededaid*

<sup>42</sup> Adashic, Esus tantiembi, queboedo tantiabeni iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepanëdash. <sup>43</sup> Adec tabadcuededsho isash: —¡Padtembol Dacuëdampambo iquec —quec utsibo tabadpanëdash. Adnubien Esusën ëbi chuibeneta caidon nadatiambocquin nabampanëdash. <sup>44</sup> Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanëdash. <sup>45</sup> Aton na menequin piucquid bedshun utsin na nibëdsho isun menepanëdash. <sup>46</sup> Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuededpanëdash. Adecbidi shubu utsi-utsiec yacno nidash iccuededquin Esus unësaid tantiaquin panëmpi cuësh-cuëshun peded-pededpanëdash. Adembidi bundoshon pebededoapanëdash. Adobanequi ëbi icsaid bedshunash Esus cuidadaid tantiec bëdambo iquebi, quec <sup>47</sup> Nuquin Papan naid chiec cuëdëncuededpanëdash. Adec tabadsho isash, Bëdamboquido nec, quec utsibotsen Esus tantiaquid yanash abi tantiaquid utsitedibëd iccuededpanëdash.

## 3

### *Caputiapimbo icquid bëdamiaid*

<sup>1</sup> Adnubien abi nidteniäpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpanëdash. <sup>2</sup> Ambo nidnubien caputiapimboquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimboquid icpanëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi chochoso isun: —¿Adabi piucquid menetsia? —cabampanëdash. <sup>3</sup> Ambo Petedobëd Uan chosho isquin: —¿Adabi piucquid menetsia? —capanëdash caputiapimboquidën uequin.

<sup>4</sup> Adoäquien Uambëd nidtuidash nidquin Petedon: —Ëbi daëdi is —capanëdash caputiapimboquid bëisquin. <sup>5</sup> Adoäquien, Ëbi menepashun, quequin abi daëdi isobien, <sup>6</sup> Petedon: —Piucquid con na nibëdec. Ëmbi tantiaidën ëbi tantiamebocpaden naimbique. Nasaded yacno iccondaidën Esusën bëdämiäpadeç bëdanash nidtoash nidec nid —capanëdash. <sup>7</sup> Aden chuishu caputiapimboquidën mëdante abiucquo bedtanquin Petedon nidtomiaç badedquio nidtopanëdash caputiapimboçboedi. <sup>8</sup> Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdämioshi, quec pudundotan-pudundotanec: —Cuishon —quepanëdash. <sup>9</sup> Adec capusho isquidon nadobededpanëdash: <sup>10</sup> —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. ¡Adpäidie. Is! Tantiädempamboçtequid nec —quequin isbededpanëdash.

<sup>11</sup> Adec capuequi Petedobëda Uan mëdineç Sadomonën tacpan quëñë uabicquid yacno puduednubien iccuededquid tsibanash anotsen tantiädempambo yec tabadoapanëdash. <sup>12</sup> Adec tabadsho isun Petedon naden

chuibampanēdash: —¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bēdambocquid icquindambi nadio? Padenquoio. Nuquin tsusedpabon Papa caidēn bēdamiaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nëbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentaquid mibi chuiquid dapa mimbi unēs uacshobien Nuquin Papan aidi uincuemepondash. Aid uincuenacsho ëbitedishun isondambi. <sup>16</sup> Esusēn ëbi bēdamepec, quequin tantiash nëid taë icsacboedēn Esus tantiash capusho mibitedishun isec.

<sup>17</sup> “Utsibo, Nuquin Papan chomiaid nec, quequin tantienquiocquin mibi chuiquidobēdan mimbi Esus unēs uamiondac. <sup>18</sup> Ĕmbi matses chuiquid dapa icmenu caid matsesēn mëyanaid iquendac, quequin ambi chuimi-aidtedi Nuquin Papan dada uamiampicpaden mimbi naondac. <sup>19</sup> Nëbi mimbi icsamboen tantiaid ënquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmenuen chomepanuna. <sup>21</sup> Nuquin Papan abitedi icsaisa icmete ushē choabincuc ambi chiampicpadequi nëbi Esus abuc aton Papabēd tabadec. <sup>22</sup> Adembidi chuiquin Moisesēn dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

<sup>23</sup> Ambi chiaid tantiesa Nuquin Papan nësecaindac,’ quequin Moisesēn dada uampic.

<sup>24</sup> “Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. <sup>25</sup> Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ëndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ <sup>26</sup> Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ënsho ma ambi bēdambo icmiaid icpanuna —quepanēdash Petedobēd Uan.

## 4

### *Ambi naid Petedobēdta Uan isadaidbo tsusiobon chuibamiaid*

<sup>1</sup> Aden Petedobēdтан Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. <sup>2</sup> Esus unēs uacsho Nuquin Papan uincuemiacpadembi matsesēn unēsacsho uincuemioaindac, quequin Esus chuibenequidon chuibanubi chopanēdash aido. <sup>3</sup> Choshon Petedo Uambēdta bedash: —Inchēsheque. Badiadshun nëidēn chiaid tantianush nidnu. Nid —quianec puduanquimbi Petedobēdta Uan quēnēn nauedmepanēdash isadaidbo

tsusiobon. <sup>4</sup> Aid daëdi bedabicnuc Petedobëdtan Uanën chuibansho tantiaquido Esus tantiaquid dada dadpen sinco midted yampanëdash.

<sup>5</sup> Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash. <sup>6</sup> Nëidtedi icpanëdash: ancanquid dapa daëd Anashëdi Caipas icpanëdash. Nëidic aton shubun icquido abipadquido: nëidic Uan, utsibic Adecandedo, aidtedi chochoash iccuededpanëdash. <sup>7</sup> Iccuededshumbic Petedobëdta Uan bëmeshun nënantanquio nidfomeshun: —¿Tsutsi chuiquin caputiapimbocquid bëdamio? —capanëdash tsusiobon.

<sup>8</sup> Adoaquien Petedo Nuquin Papan Mayanën comapenen tantiamiac nadpanëdash: <sup>9</sup>—Caputiapimbocquid tantiaquin bëdamaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata. <sup>10</sup> Caputiapimbocquid Esuquidistu Nasaded yacno iccondaidën bëdamaid niosh. Mimbi unës uacsho Nuquin Papan uincuemiadën nac nëid caputiapimbochoedi nëbi nidtoash capusho mimbi isec. <sup>11</sup> Aid bëdamequid mimbi tantienquio yaid Nuquin Papa yacno yuedanquidquo nec. <sup>12</sup> Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta —quepanëdash Petedobëd Uan.

<sup>13</sup> Adec Petedobëd Uan dacuëdenquio yec comapenec onquesho tantias tsusiobo: —Aid daëdi tsusiopenquio iquequi adecbidi Nuquin Papan chïampid tantiabenabicquid iquequi Esusbëd icquid aid daëd icquin ¿mitsipadomboen caputiapimbocquid bëdamepashba? —quec tantiadempambo yec tsusiobo tabadpanëdash. <sup>14</sup> Aden ambi bëdameboed aibëdi icsho isash, Icsamboen mimbi naoc, quetiapimbo tsusiobo tabadpanëdash. <sup>15</sup> Adshun Petedo Uambëdta nidmiash, Tantiyanu, quec onquecuededec tsusiobo: <sup>16</sup> —¿Mitsipadomboen aid daëd nuqui napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bëdanambo iquec, ëbitedi quetiapimbo iguebi. <sup>17</sup> Dadpenshun tantianushe queshun, Esus padpiden chuibanoainda, quequin aid daëdi chuinuna —quecuededpanëdash tsusiobo. <sup>18</sup> Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

<sup>19</sup> Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? <sup>20</sup> Nuqui isboed nuqui tantiaboedbidi chuitequidquo iquendac —quepanëdash Petedo.

<sup>21-22</sup> Adoaquien: —Ëmbi chiacpaden nainquiocsho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimbocsho bëdamepanëdash. Aid Nuquin Papan bëdamicsho isash utsibo cuëdëncuededpanëdash. Adsho tantias Petedobëdta Uan mëyantiadquicochoedi adotiapimbo yec tabadpanëdash tsusiobo.

### *Isadaidbo tsusiobon chiaid Esus tantiaquidon chuioid Nuquin Papa chiaid*

<sup>23</sup> Tsusiobon nidmiac nidash iccuededbocnombo choash puduedshun tsusiobon chuiboe Petedobëdtan Uanën chuiopanëdash. <sup>24</sup> Adoac abentsëc onquiacbimboen naden Nuquin Papa chuipanëdash: —Con Icbombo mibi nec. Ábubëdta nidaid acte chedo uashun aidëñquio icquidtedimbo mimbi uabampampic. <sup>25</sup> Adembidi ëndenquimboshë mimbi tantiacpaden min Mayanën tantiamiac mimbi chuimaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembo comapenec nëishash ëbi dëniacte buncuededpec? Adquiecbidi ¿Atotsi quiash ëmbi chomiaid icsamboen nanushbimboec isadaidbo onqueuidoapec?

<sup>26</sup> Ancanquidobëd chuiquid utsibo ëmbi chomiaid aton Icbobi mëyanuec iccuededec.”

<sup>27</sup> Ai, mimbì Dabid pado dada uamiampicpadembi ënabi Edusaden yacno isadaidpembo ancaquid daëd Edodesbëd Ponsio Pidato icnubi isadaidbo chedo iccuededquin mimbì Chomiaid icsaisa Esus icsa uanuec onqueuededpondash.

<sup>28</sup> Mimbì tantiampicpadembi unës uapondash, Papa. <sup>29</sup> Adquidën Petedobëdta Uan chushcasha mimbì tantioc. Cuesambocquid ëbitedi icmequin mimbì chiaid ëbi chuibame, Papa. <sup>30</sup> Icsaisan Esusën bëdamiacpaden nadatiambocquin naban, Icbo —quepanëdash Esus tantiakuído Nuquin Papa caic.

<sup>31</sup> Adoac abi iccuededacno ishcuđpanëdash. Adec ishcuđnuc ambocquid Nuquin Papan Mayanën comapenen pausunac dacuëdenquiocquin Nuquin Papan chiaid chuibampanëdash.

### *Abentsëc yachimboec tabadaid*

<sup>32</sup> Aden chuibanequi abentsëc onquiacbimboec tabadec Esus tantiaquido, Con na nec, quenquë yec, Nuquin Papan na nec, quec tabadcueneapanëdash.

<sup>33</sup> Adequì tabadcuenequimbi dacuëdenquiocquin, Esuquidistu uincuenacsho isombi, quequin chuibenepanëdash. Adec Esus tantiaquido tabadsho utsibon bëdamboen isbededquin aidën chuibansho bëdamboen tantiaapanëdash. <sup>34-35</sup> Adembidi nidaid icbo utsin-utsinquien aton nidaid menequin piucquid bedshun Esus chuibenequido menepanëdash. Adembidi, shubu icbo utsin-utsinquien aton shubu menequin piucquid bedshun meneoapanëdash. Aden meniac aton na nibëdquid icsho isun Esus chuibenequidon menebanac bunenquio tabadpanëdash. <sup>36</sup> Adecbidi ambo acte nënantanquio nidaid nacrëdquid shubu uaidënsun Chipide caid yacnoshon tishaid Edusaden yacno chosh Ose tabadpanëdash. Aidi, Bëdamboen mimbì naoque. Adobanta, quedenesho Bednabe cuëmpanëdash. <sup>37</sup> Aidëmbi aton nidaid menequin piucquid ambi bedaidtedimbo Esus chuibenequido meneoapanëdash.

## 5

### *Ananiasbëd aton chido Sapida muaid*

<sup>1</sup> Adnubien dada utsi Ananias cuëmëdquid aton chido Sapidabëđtan aton nidaid menequin piucquid bedpanëdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniachimboen menepanëdash Ananiasën. <sup>3</sup> Adnubien, Piucquid abitedi meniachimboen Ananiasën mua uaposh, quequin Nuquin Papan Mayanën tantiamiac naden Petedon Ananias chuipanëdash: —Satanasën tantiamiaid icquin ¿mitsipaden tantiaquin Nuquin Papan Mayanën isnubi mua uaquin ëbi menio? <sup>4</sup> ¿Min nidaid meniabi icnu mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidtedi mitsana niosh. ¿Mitsipaden tantiaquin piucquid abitedi meniachimboen meniano? Aden bëquin abimbo chienquiocquin Nuquin Papambobi mimbì mua uaboc <sup>5</sup> —Petedo qüesho tantianec Ananias unësequi uebudpanëdash. Adsho isash Esus tantiaquidtedi dacuëdpanëdash. <sup>6</sup> Unësacsho isun dashcute cuëshën dataneshun buanshun caniabon chococatampanëdash.

7 Bënë chococambic ushë abuctoan unësboedën chido aton bënë unësaid mantienquio yec choapanëdash. 8 Choasho isumbien: —¿Ada min nidaid mantienquio nêdtedi piucquid bedo? —Petedo qesho tantiashien:

—Aí, aitedi bedombi —quepanëdash Sapida.

9 Adoaquien Petedo: —¿Nuquin Papan Mayanën ëbi muasho tantiapec, quequin tantienquiocquinda min bënëbëdtambi min piucquid abitedi meni- acbimboen meniano? Nëbi min bënë chococaboedon mibitsen buanendac — Petedo quenubic 10 Petedon tayumbi uebudec Sapida unësapanëdash. Aidsen unësacsho buanshun aton bënëbëdtabi chococatampanëdash. 11 Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

### *Bë-bëaidtedi bëdanaid*

12 Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash.

13 Adomboen nabansho isash Esus tantiesabo dacuëdec tacpan yacno chotiapimbo yequi: —Esus tantiaquido bëdamboshë iquéc — quecuededpanëdash. 14 Adec tabadequi utsi-utsiec dadpen dadabëdi chido Esus tantiaquido yampanëdash. 15 Adec Esus tantiaquid yanshun, Daicsaido Petedon bédamepec, quequin tantiaquin daicsaido bë-bëshun Petedo capuacno nambededpanëdash. 16 Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëdampanëdash.

### *Esus chuibenequido tsusiobon quënëñ nauedmiaid*

17 Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nëishcuededpanëdash. 18 Adec nëishcuededshun Esus chuibenequido bedmeshun quënëñ nauedmepanëdash. 19 Aid inchëshëmbi Nuquin Papan uaid mayan bëda choshon quënë shëcuë bëtashaid bécadoquin abitedi puduemec: 20 —Mibi puduemiombique. Nuquin Papa tabadte shubu uashunaid yacno nïdñan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

21 Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aitedi. Chuibanubien isadaidbo tsusio dapan abëd icquidobëdtambi tsusio utsi- botedi cho-chomeshun: —Esus chuibanquido bedtan —cac 22 quënëñ nauedaid puduenushe quequin isquido chuiquid nidshun isquien Esus chuibenequido nibëdec. 23 Adsho isash choaquin: —Quënë shëcuë bëdamboen bëtashuquien quënëñ nauedaid puduenushe quequin isquido shëcuë cuëmano capusho isombi. Shëcuë bécadoash puduedshun isaquien ënden puduen- puduenac —quepanëdash quënëñ nauedaid puduenushe quequin isquido chuiquid. 24 Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. 25 Adnubien dada utsi choshon: —Mimbi quënëñ nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. 26 Adoaquien quënëñ nauedaid puduenushe quequin isquido chuiquid capitan caidën ambi namiaidobëdtan tantiec nid- shun bedtanquin bëoapanëdash. Matsesën cuënoten ëbi se-senushe queshun mëyanenquiocquin Esus chuibenequido bëoapanëdash.

27 Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: 28 —Esus

chuiবেনেদা, quequin chiambocquidēmbimboen Esus chuibanquin Edu-saden yacnocquidtedi mimbi tantiamēbanoc. Adoquimbic, Esus unēs uaid tsusiobon naid nec, quequin mimbi chuibanoc —quepanēdash tsusiobo. <sup>29</sup> Adsho Esus chuibenequido utsibon tantianubi Petedonuidi: —¿Matesēn nata caidodabi nedi? Nuquin Papan nata caid icquin nabanembi. <sup>30</sup> Mimbi cuesten dectanquin unēs uaondaid Esuquidistu Nuquin Papan padpiden uincuemepanēdash. Nuquin Papa caid tsusedpabon Papa caidquio nec. <sup>31</sup> Esus uincuemeshun aton dayunquio tsadmequin mates bēyucanquin Chuiquid abi yacno mates Pudedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bēpiscudpanuna. <sup>32</sup> Esuquidistun nabansho isbempondambi. Adembidi abi unēsash uincuenacsho ispondambi. Nuquin Papan Mayan icsaisan Esuquidistu tantiaquidobēd icquidēmbi adomboen ēbitedi tantiamēoaic —quepanēdash Petedo.

<sup>33</sup> Aden Petedon chuisho tantiaash tsusiobo: —Icsambo iquec —quiash Esus chuibenequido cuesunete bumpanēdash. <sup>34</sup> Adnubien isadaidbo utsi padiseyobo, Nuquin Papan Moises dada uamiampid chuibanquin tantiamēquid utsibon bēdamboen isaid, Camadied cuēmēdquidēn: —Chiata. Bēboedtedi buantan —cac <sup>35</sup> buanambic: —Icsamboen nanushe qeshun bēdamboen tantiaquiota. Aido cuesunete mibi buneque. Cuesunenushe chiata. <sup>36</sup> Ēdenquio utsi Teyudas cuēmēdquid icpondash. Aidi tsusio dapa icnuequin chuisho tantiaash dada dadpen 400ted abēdi capupanēdash. Teyudas cuesuniacsho isash abēd icboedtedi udi nidaniacsho padpiden isenquio icpanēdash. <sup>37</sup> Adashien mates tambanta caid ushēmbi utsi Udas cuēmēdquid Cadidia yacno icnēdaidbēd mates dadpen capupanēdash. Udsten cuesuniac abēd icnēdaidtedi padpidec choenquio yec adecbidi udimbo nidanepanēdash. <sup>38</sup> Adec umanuc buamboedo chuiquid nibēdanaque. Aidbēd icboedō mishenda. Cuesunemenda. Aidēn chuibanaidbēdtabi ambi naid matesēn naiduidtsēqui icnu badedquio ēnēdendac. <sup>39</sup> Aido Nuquin Papan namic chuisho mimbi ēmetiapimbo iquendac. Nuquin Papa chīshēnushe qeshun aido nidmeta.

<sup>40</sup> Aden Camadiedēn chiac: —Adonona —qeshun: —Buamboedo bēoata —cac bēacsho cueshcanten cuesmepanēdash. Aden cuestanquin: —Esus chuibanoainquio yec nidtan —qeshun puduemepanēdash. <sup>41</sup> Puduemiatic Esus mēyanaid tantiec nidequi abi chuibansho mēyanaid yec bēdambo iquebi, quec tabadpanēdash. <sup>42</sup> Adshumbic badiadquidēn-badiadquidēnquien Nuquin Papa tabadte shubu uashunaid yacnoshon mates bēyucanquin chuiquid, Nuquin Papan bēdamboen isaidquio Esus nec, quequin chuibampanēdash aidon. Shubu utsi-utsiec yacno nidshun adomboembidi chuibenepanēdash.

## 6

### *Niante chidobo pete menebanquid icta caid*

<sup>1</sup> Adashic badiadquidēn-badiadquidēnquiec Esuquidistu tantiaquid dadpen-dadpenquiec yanubi isadaidbo quidiēcon onqueten onquequido comapenec onquec: —Niantebo menenquiocquin pete mimbi uesquin pepaboc —quepanēdash. <sup>2</sup> Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ēntiapimbo iquebique. <sup>3</sup> Niantebo meneta canuen nadquidquio istuidshun chuita. Nuquin Papan aton Mayan meniatic tantiamiac bēdamboec tabadsho mimbi bēdamboen isaidquio istuidta. Adquid 7ted istuidshun, Niante chidobo pete menebanquid icta, cata. <sup>4</sup> Aidtedshun

niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

<sup>5</sup> Adoaquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquo Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. <sup>6</sup> Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantias utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantias Esuquidistu tantiaquido yampanēdash.

### *Esteban bedaid*

<sup>8</sup> Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismepampanēdash. <sup>9</sup> Aden nadatiambocquin ismenuc bēdamboen tantienquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Ade-candedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno choash tabadec Estebambēd comapenec onquepanēdash. <sup>10</sup> Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onquetiapimbo icpanēdash.

<sup>11</sup> Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēda Nuquin Papan chiampid chuca uain chuisho tantiombi, quequin muaquin chuīta. Aden chiacsho mibi piucquid membi —cac chiec nidpanēdash. <sup>12</sup> Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash.

<sup>13</sup> Ambo abi dēniactiapimbocquidon Esteban muaquin chuīta caboedon naden chuibededpanēdash: —Nēid dada Nuquin Papa tabadte shubu uashunaidbēda Nuquin Papan Moises dada uamepampid ēnenquiocquin muaquin chuibanec. <sup>14</sup> Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. <sup>15</sup> Aden Estebanēn chiaid muaquin chuīquin naimbudquimbi tsusiobobēdtambi comapenen Esteban bēisquin Estebanēn bētantiante ushēbimboec ushumbo yec chēnquesho isbededpanēdash.

## 7

### *Estebanēn chuibanaid*

<sup>1</sup> Adec Estebanēn bētantiante ushēbimboec chēnquesho isec tsusio dapambo Esteban chuīquin: —¿Abimboda mimbi naid chuiposh? <sup>2</sup>—caquien yuecquio onquequin Estebanēn naden chuipanēdash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia

caid yacno tabadsho Nuquin Papan abi uëshëmbo yec dasiuidteniaid mat-sesën istemaïd bëchomaoanquiec icquid Abadauan ismepampic. <sup>3</sup> Aden ismec nadec onquepampic: “Min utsitedi nianec nidaïd utsi yacno mibi ëmbi ismenu caid yacno nidta.” <sup>4</sup> Adsho tantiash Candeyabon nidaïd yacnoësh nidashic nidaïd Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden Abadauan chuipampic: “Nëïd nidaïdën mibi capuacno mitsanapenquio nec. Yuecshun mibi menenun nanuna. Mimbi tishmi-ambochoedi min chidon tishaid abentsëc min madombo nëïd nidaïd menendambi. <sup>6</sup> Nëïd nidaïd bedabi yec mimbi tishmiaïdën tishmiaïd caidaïdo matses utsibon nidaïdën tabadendac. Ambo tabadshobi anocquidën aïdo yuashun seta dadpen 400ted matamequin mëyanendac. <sup>7</sup> Adoacsho aïdosen cuidquin mëyoaindambi,” quepampic Nuquin Papa. Adashic abi Nuquin Papa onquec: “Min madon tishmiaïd caidaïdo abi mëyanacnoësh nidashic nëïd macuësh yacno choshon ëmbi chiacpadomboen nabanendac.” <sup>8</sup> Aden chuishumbic, Nidaïd menenun nanuna, quequin Nuquin Papan naden Abadauan chuoapampic: “Dada bacuëbëdta dada caniaïdtedi shui dëbid dëtemeta. Adobansho isun, Èmbi chiaïd bëdamboen naquidquïo aïdtedi nec, quequin ismendambi,” quepampic Nuquin Papa. Nuquin Papan chiaïd tantiashun Abadauanën ambia dëtemeshun dadatedi aïdëmbidi shui dëbid dëtemeoapampic. Adoshombic yuecquïo icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic ademmbidi Isaquën aton mado tishacsho Acobo cuënquin aïdtedecbidi ushun Isaquënsen Acobon shui dëbid dëtemeoapampic. Adoshombic, canishun Acobon tishmiaïdo 12ted icpampic. Abentse-abentsen tishmeshun aïdtedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic —quepanëdash Esteban isadaïdbo tantiamenu quequin chiec.

<sup>9</sup> Aden chiec abi onquec: —Aïd 12ted nuquin tsusedpabo icampic. Acobon mado, chido utsin tishaid, Ose icpampic. Aïdi aton papa cudasaidquïo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic. <sup>10</sup> Adoac, Yuanu, queshun natiamiaïd Ose icsho isun Nuquin Papan aïd dayun uaqun dacuëdenquïo icmequin comapenen tantiaïdquïo bëdamboen chuïquidquïo Ose Nuquin Papan icmepampic. Adquidquïo icsho isun Equipito yacnocquïdo ancaquïdën Padaon caidën Equipito yacnocquïdo chuïquidquïo Ose icmepampic.

<sup>11</sup> “Yuecash Equipito yacnocquïdo chuïquid, Ose, icnubi nidaïd Equipito caid yacnocquïdëd nidaïd Canan caid yacnocquïdo natiambo buncuedepampic. Adnubi nidaïd Canan yacno nuquin tsusedpabo Isadaïdbon pete nibëdquiec yampampic. <sup>12</sup> Adshumbic, Equipito yacno quënë uashun dayun uaid pete iquëc, quesho tantiashun Osen papan Acobon ambi tishmiaïdo nuquin tsusedpabo chuïquin: ‘Equipito yacno pete iquëc, quesho tantiaïmbique. Bedtan,’ cac Osen utsibo aton papan chiacpadec pete bedc nidanepampic. <sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquïdo ancaquïd Padaon yacno buanshun: ‘Con matses isadaïdbo nec,’ Ose quesho tantienquïochoedëmbi Padaonën tantiabempampic. <sup>14</sup> Aton utsibo Padaon chuiban-



shumbic Osen aton utsibo chuiquin: ‘Nuquin pabēda nuquin matses bedtan,’ capampic. Adoac bedoanec Equipito yacno choapampic. Abēd icquido 75ted icpampic. <sup>15</sup> Adashic, Equipito yacno yuec tabadashi tsusio budashi Acobo unēspampic. Auēshquiobidi nuquin tsusedpabo Acobon madotedi adechidi unēsoapampic. Unēsacsho Equipito yacno chococapampic. <sup>16</sup> Adashic, yuecquo yash Equipito yacnoēsh nidquin unēsaidon tishmiaid caidaidon aton mēdimbon canite buampampic. Canite buanshumbic Siquen caid yacno nidshun ēndenquimbo matses utsi, Amod caid, piucquid menequin tsusedpa Abadauanēn tied bedshunēdacno chococapampic.

<sup>17</sup> Aden chuishumbic Estebanēn nadopanēdash: —Equipito yacnoēsh tsusedpabo nidabi icnuc Nuquin Papan, Nidaid menenun nanuna, quequin chuiampid ushē chote anoentsēc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquo icpampic. <sup>19</sup> Aidēmbi mua uaquin chuiquin natiamequin nuquin tsusedpabon dada bacuē tishacsho bedtemaid nec, quequin nemepampic. <sup>20</sup> Adnubien dada bacuē Moises tishacsho Nuquin Papan, Aid bēdaidquio iquec, quequin ispampic. Aidi icucshun ushē abentsēc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoquai Moises shubisho tantiashun tsitsan ambi danoshcaidēn aton mado acte nantan anin nuntampampic. Aden nuntanambien Equipito yacnocquido ancaquidēn champi nesec budquin tsitsanēn Moises noadtsēcsho istuidshun bedash, Con mado caimbi, quepampic ancanquidēn champi. <sup>22</sup> Bedsac canitsequi aidēn shubu nuntan tabadec Equipito yacnocquid matsesēn naid mēquiadēn aidēn chiaid Moises paquiadpampic. Aden Equipito yacnocquidon naidtedi naquin aidēn chiaidtedi Moisesēn tantiabenquiopampic.

<sup>23</sup> “Adashic, Equipito yacnocquidobēd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesēn istuidpampic. <sup>24</sup> Istuidnubi Equipito yacnocquid dada abentsēcshun isadaidbo dada abentsēc mēyanquin cuesunesho isun Equipito yacnocquid cuidnuequin Moisesēn cuesuneoapampic. <sup>25</sup> Ēmbi adoshō isun, Equipito yacnoēsh nuqui bēyucanquin buanquid Moises nendac, quequin con matsesēn tantiapatsiash, abibi quetsēcquiec nidnubi aton matsesēn tantienquo icpampic. <sup>26</sup> Badiadash aton matses yacno padpidec nidquin aton matses daēd cuesnansho istuidshun, Ēmenu, abibi quec choquimbi: ‘¿Atotsi quec min matsesbēd cuesnane?’ Moisesēn catuidpampic. <sup>27</sup> Adoquien Moises cuēscatanec: ‘¿Ēmbi nasho cuidquin ēbi chuiquid tsuntsin mibi icmioshe? Chui. Tantianu,’ quetanequi: <sup>28</sup> ‘¿Equipito yacnocquid mimbi cuesunebocpadenda ēbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidēn tantianushe quianec dacuēdec Equipito yacnoēsh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuē daēd tishmepampic Moisesēn.

<sup>30</sup> “Adashic, seta dadpen 40tedbidi matamec nidaid Madian caidēn tabadec cuētempiuidquio yacno matses nibēdquiec yacno macuēsh dapa Sinai caid anoentsēqui Moises chopampic. Ambobi tabadquimbi cuētempi nēdēnquiachimboecquid nēnantanquo Nuquin Icbon Chomiaid tabadsho Moisesēn ispampic. <sup>31</sup> Aid istanequin tantiadempamboctequid nepanushe. Isbono, quianec anoentsēqui Moises choshō Nuquin Icbon naden chuiampic: <sup>32</sup> ‘Min tsusedpa Abadauanēn Papa cain cuēnaid nebi; min tsusedpa utsin Isaquēn Papa cain cuēnaidbidi nebi; min tsusedpa utsin Acobon Papa cain

cuēnaidbidi nebi,' quesho tantiash dacuēdec uēdēquec istiapimbo yec Moises nidtuidpampic. <sup>33</sup> Nidtuidsho isec Nuquin Icho Moises chiec nadpampic: 'Nēmbō ēbi icspenquio icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ēbi cudasaido Equipito yacnocquidon mēyanac uēshquec shubiquosho tantiashun aido Equipito yacnoshon buanta mibi canuec chobi. Nēbi Equipito yacno mibi nidmeoaimbi,' quepampic Nuquin Icho Moises chiec.

<sup>35</sup> "Aden cuētempi nēdēnquiacbimboecquid nēnantanquio icboedēn Nuquin Papan Chomiaidēn isadaidbo bēyucanquin buanquid icta cac: 'ĶĒmbi naid icsho cuidquid ēbi chuiquid tsuntsin mibi icmioshe? Chui. Tiantianu,' abi caondaido bēyucanquin buanquid Moises icpampic. <sup>36</sup> Adquid Nuquin Papan icmiac Equipito yacnoshon aton matses bēyucanquin buanun Moisesēn nadatiambocquoin ismepampic. Adoshombic, isadaidbo buanquin Acte Piu yacnoshontsen nadatiambocquoin ismeopampic. Adoshombic, matses nibēdquec yacno seta dadpen 40tedbidi matamec abi tabadcue-niacnoshontsen nadatiambocquoin nabanquin isadaidbo Moisesēn ismeo-pampic. <sup>37</sup> Aidēmbi naden chuiampic: 'Yuecquio icshun ēbipadquid mimbi tishmiaidēn tishmiaidon caidaid Nuquin Papan chuiquidquio icmendac,' quequin Moisesēn chuiampic. <sup>38</sup> Isadaidbo bēyucanquin chuiquid Moises matses nibēdacno isadaidbobēd macuēsh dapa Sinai caid yacno choash Nuquin Papan chomiaidobēd Moises tabadpampic. Ashunquio Nuquin Papan abēdi tabadte tantiamenuequin cuēnote pada-padamboquidēn ambi naden nata quequin dada uaid Moises menepampic. <sup>39</sup> Aden aid dada uaid bedshun bēyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuēsh yacno yuecquio tabadnubi Moisesēn utsimbo Adon cuēmēdquid aton matses utsibon naden chuibededpampic: 'ĶMoises nuqui Equipito yacnoshon bēyucanquin bēboed mitsi nidpash nec? Nibēdpequien iquec. ĶAtotsi quec nidpash? Nuquin Papan uacpadquiocnoc nacentā. Nac-nenash bēyucanquin chuiquid aid iquendac,' tsusedpabon cac <sup>41</sup> bacan bacuēbimboecnuc Adonēn nacnempampic. Ambi nacnenaid tantiaquin isadaidbon nidaidēn capuquid yua cuesuneshun cuēdēnēmbodedpampic. <sup>42</sup> Adquid cuēdēnēnsho tantiash isadaidbobēd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ēndenquimbo tantiaquin naden chuiampic: 'Adomboen mimbi nacnenaid tantiec tabad.' Adembidi Nuquin Papan yuecquio icshun nanun chiaid isadaidbo chuiquin naden dada uamepampic: 'ĶMatses utsi nibēdquio yacnoshon seta dadpen 40ted matamequin ēbi tantiaquinda nidaidēn capuquid yua cuesuneshun pambid taudenio? Padenquio.

<sup>43</sup> Ēmbi uaid badiadēn ushē, ēbitedishun bēyucamembi, queshun aidpadquid nacnenshun Modoc cuēnquin aton shubumpi nuntan namposh. Aidbēdtabi uispa dapatsen ēbitedishun bēyucamembi, queshun aidpadquidbidi nacnenshun Dempan cuēnec danēshēn sebudec shuebudshun, Mibi tantiaquid nebi, quequin adquid mimbi chuiopoc. Aden nasho isun ēmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.'

Aden ambi chiaid niacquido isadaidbo tantienquio icquidobi Nuquin Papan chuiampic —quepanēdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibēdacnombō nidanequin tsusedpabon Nuquin Papa tabadte chicbanshun buampampic. Aidēmbi Moises ismiacpadembi isadaidbon Nuquin Papa tabadte shubu uashumpampic.

<sup>45</sup> Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bëbëmepampic. <sup>47</sup> Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic.

<sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic:

<sup>49</sup> “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic?  
¿Nidaidënuidi tsadpectabi tiboquendac?”

<sup>50</sup> ¿Tauaquioquimbi abitedi uambodambi ictionda?”

quequin Nuquin Papan chuimiaidën dada uapampic —quequin chiasic Esteban abi onquec: <sup>51</sup> —Pacuënëdacimboen Nuquin Papan chiaid tantiaish icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. <sup>52</sup> ¿Nuquin Papan ambi yuecquio icshun naden nanuna quequin chiaid ambi chuimi-aidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac.

<sup>53</sup> Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec —quepanëdash Esteban isadaidbo chuiquin ënec.

### *Esteban se-siaid*

<sup>54</sup> Adec Esteban onquesho tantiaishun nëishënsun Esteban iccuedquidon chushcapanëdash. <sup>55</sup> Adoaguen Nuquin Papan Mayan meniaidquio icquin Estebanën abuc isquin Nuquin Papa uëshëmbi yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nidtuidsho ispanëdash. <sup>56</sup> Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabëd tancandaëdquiec tsadsho isembi —quepanëdash Esteban.

<sup>57</sup> Adsho tantiaish tsusiobo comapenec sidquianec pamumëdanec titinquequin Esteban bedshun <sup>58</sup> cuënoten se-senuen shubu nibëdacno udi buampänëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon. <sup>59</sup> Sanshun se-siaquic Estebanën Esuquidistu cuënquin naden chuipanëdash: —Ëbi yued, Icbo —quiashic, <sup>60</sup> danëshën sebudash comapenec naded onquec: —Ëbi se-sequido icsaid cuidenquio yec bëpiscudta, Icbo —quepanëdash. Adec onquetanec Esteban unësapanëdash.

## 8

### *Saudon Esus tantiaquido mëyanaid*

<sup>1</sup> Esteban se-senu caquien, Ai, adota, quiaish isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopänëdash. Adosho isash Esus chuibenequido ambobi tabadnubien Esus tantiaquid utsibo nidanec

uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanēdash. <sup>2</sup> Adnubien Nuquin Papan chiacpadomboen naquin Esteban chococaic comapenec sedenquec shubipanēdash. <sup>3</sup> Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabēdtabi chido chedo bedmeshun quēnēn nauedmepanēdash.

### *Samadia yacnoshon Esus chuibanaid*

<sup>4</sup> Adashic Edusaden yacnoēsh nidaneç shubu dadpen icquid utsi-utsiec yacno choshon abi tantiaquidon Esus chuibenepanēdash. <sup>5</sup> Adembidi niante chidobo aton na nibēdsho menequid, Uedipe cuēmēdquid nidaid Samadia caid yacno choshon adembidi Esus chuibanoapanēdash. <sup>6</sup> Aidēn nadatiambocquin nabanquin Esus chuibansho ambocquido iccuededquin bēdamboen tantiapanēdash. <sup>7</sup> Aidēmbi nadatiambocquin nabanac mayan icsa dapuduedaid icboedi mayan icsa sidquianec cuempanēdash. Adeçbidi canite icsaidbēda caputiapimboquid dadpen bēdampanēdash. <sup>8</sup> Adsho isash Samadia yacnocquido, Bēdambo iquebi, quec tabadpanēdash.

<sup>9</sup> Adnubien Samadia yacno ēnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. <sup>10</sup> Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapenen tantiapanēdash. <sup>11</sup> Aden yuen Simonēn ismiac, Isnuequid dadpen badiadquidēn-badiadquidēnqueic abi yacno choash iccuededpanēdash. <sup>12</sup> Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanēdash dadabēdi chido chedo. Adsho aitedi acten mentomepanēdash. <sup>13</sup> Simontsen: —Esus tantiaquid nebi —quesho acten mentoaqui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

<sup>14</sup> Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiaishun Uambēda Petedo Edusaden caid yacnoēsh nidaid Samadia caid yacnoshon nidmepanēdash. <sup>15-16</sup> Adeç aid daēd nidaneshun: —Esus tantiaquid acten mentoaidouidi nēidtedi nec —anocquido quesho tantiaishun: —Nēidtedi min Mayan mene, Papa —quec onquequin <sup>17</sup> Petedobēdtan Uanēn mēdanten Esus tantiaquido mamishbampānēdash. Aden mamishbanubi aitedi Nuquin Papan aton Mayan menepanēdash.

<sup>18</sup> Aden Petedon nasho isash Simon: —Ma adqueic mēquiadnueshun mibi piucquid menenu. <sup>19</sup> Mimi matses mamishacpadembi ēmbi mamishaidtedi ma Nuquin Papan Mayan meniaid icpanuna —quepanēdash.

<sup>20</sup> Adoaquien Petedo: —¿Piucquid menecta mibi mēquiadpe? Adoquin mimi tantianuc tauiantiadpambo chian anēdēnquiacno ma mibēdi min piucquid icpanu. <sup>21</sup> Mimi Nuquin Papan chiaid icsamboen tantiaquin ēmbi nacpadomboen natiapimbo mibi iquendac. <sup>22</sup> Mimi icsamboen tantiaid ēnta. Aden icsaid ēnsho isash Nuquin Papa mibi icsaid bēpiscudendac. <sup>23</sup> Mayan icsan yua icquin tactau tishidaid mishaid mucambo yacpadec icsamboen mimi muaquin chuibanaid icsaindac.

<sup>24</sup> Adoaquien: —Ēbi tauiantiadpambo chian anēdēnquequid nēnenushe quiash mibi Uambēd Nuquin Papa chieç bēdamboec onquebudneta —quepanēdash Simon.

<sup>25</sup> Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanëdash aidëmbidi.

### *Uedipe Etiopia caid yacnocquidbëd icaid*

<sup>26</sup> Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datam-bidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

<sup>27</sup> Adoac nidtoanec nidquimbi Nuquin Papan uaidën mayan bëdan chui-bocno choquin Etiopia caid yacnoësh choquid Uedipen bëquedtuidpanëdash. Ancanquid chido Candase cuëmëdquid aton na dayun uashunquid aid dada nepanëdash. Aidi Edusaden yacno nidash tabadquin Nuquin Papa chianec <sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. <sup>29</sup> Adnubien Nuquin Papan Mayanën: —Nidaid cano chinunta —cac <sup>30</sup> Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequinda tantiaque? —quepanëdash Uedipe.

<sup>31</sup> Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtapanëdash.

<sup>32</sup> Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash: “Obeca cunesunenuen nimbambocpadomboembidi mëtaneshun nimbanoa-posh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

<sup>33</sup> Aidi Icsaisa icsho mëyansho isec, Icsambocquidta neque. Isnu, quenquioc-posh aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

<sup>34</sup> Aidtedtsëqui abi isec onqueboed Uedipe ismeshun Etiopia yacnoësh choquidën: —Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneeque? Èbi chui. Tantianu —capanëdash Etiopia yacnoësh choquidën Uedipe chuiquin.

<sup>35</sup> Adoaquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibanpanëdash Uedipen.

<sup>36</sup> Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

<sup>37</sup> Adoaquien Uedipe: —Esus tantiaquidquio nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: <sup>38</sup> —Nidtuid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash. <sup>39</sup> Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

<sup>40</sup> Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

## 9

### *Saudon tantiate paucaid*

<sup>1</sup> Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash<sup>2</sup> shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

<sup>3</sup> Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash.

<sup>4</sup> Aden dëcatiac Saudo paëdash uesho isun nadec abucuësh onquec: —Saudo, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

<sup>5</sup> Adoaquien: —Icho, ¿Tsutsi mibi ne?

<sup>6</sup> Adoaquien: —Mimbi mëyanaid Esus nebi. Èmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata capadomboen anocquid mibi chuimembique. Nidtan.

<sup>7</sup> Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash. <sup>8</sup> Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. <sup>9</sup> Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

<sup>10</sup> Adashic, Saudo puduedash tabadacno ëdibitsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia—caquien:

—¿Atoda? Nëbi uebi, Icho —quepanëdash Ananias.

<sup>11</sup> Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tado caid yacnoshon tishaid Saudo cuëmëdquid Nuquin Papa chiec onquec tsadsho mimbi istuidendac. <sup>12</sup> Adec aid ushacimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

<sup>13</sup> Adoaquien: —Con matses dadpeshun Saudon naid icsa chuibansho tantiombi, Icho. Aidëmbi Edusaden yacnoshon mibi tantiaquido mëyamepac caoshe. <sup>14</sup> Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenuc aidi chopac caosh —quepanëdash Ananias Esus chiec.

<sup>15</sup> Adoaquien: —Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac. <sup>16</sup> Èbi chuibenesho mibi mëyantequid iquendac, quequin Saudo tantiamembi —quepanëdash Esus.

17 Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Ibonquo, Esusën mibi padpiden ismenuen Nuquin Papan Mayan mibi menenuembidi chomiaid nebi —quepanëdash Ananias Saudo chiec.

18 Aden Ananiasën chuinubi nuëcquid bitsibimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. 19 Adecbidi Saudo penquo yec padishacboedi piash padpidec uidëncuenoapanëdash.

### *Damasco yacnoshon Saudon Esus chiaid*

20 Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuiapanëdash Saudon.

21 Aden chuisho tantiashtantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuc choabida ictic? —quepanëdash Damasco yacnocquido.

22 Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquo Esuquidistu nec, quequin isadaidbo tantiamenuen Nuquin Papan chiampid Saudon comapënen chuidedchuidedpanëdash.

### *Isadaidbo Esus tantiesa abi cuesunete bunsho isash Saudo cuenaid*

23 Adembidi yuec ushqin Saudon ënenquiocquin chuibansho tantiasht, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiapanëdash. 24 Adnubien Saudo cuesunenuen shubu dadpen icquid abichobi tsicateguin daquënë uaidën shëcuë cuëmanoshon abi chieshënquidon caimpanëdash Saudo puduësho bednu quequin. 25 Aden cainsho isun Saudo cuesunenushë queshun chiac inchëshëmbi onquenquiocquin tsitsan dapan Saudo antsaduntanquin tsiciaid quënë cachoc Saudo budmepanëdash.

26 Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaqin ëbi bednushe quiash dacuëdcuededpanëdash aido. 27 Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibampanëdash.

28 Aden Bednaben chuibanac Esus tantiaquido Saudo dacuëdenquiocnobi aidoëbi capuquin Saudon anoshombidi Esus chuibanoapanëdash.

29 Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashtun aid cuesunenuequin aidontsen cainoapanëdash. 30 Aden Saudo cuesunenuen, cainec qesho tantiashtun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidsëqui nidmepanëdash.

31 Adashic Saudo nidmian cuesunenushë quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquo yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquo yampanëdash.

### *Petodon Ananias Dodcastsen bëdamiaid*

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. <sup>33</sup> Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: <sup>34</sup> —Esusēn mibi bēdamiaque. Nidtoшон min uete buanun nacnenta, Eneyas —Petedon cac Eneyas badedquio nidtoash capupanēdash. <sup>35</sup> Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

<sup>36</sup> Adnubien Dida uditšec shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdamocquid icquin badiadquidēnbadiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. <sup>37</sup> Aidi Petedo Dida yacno icnubi icsabudec unēso isun abēd icquidon dapanshun shubu abuc quēnē icquidēn nampanēdash. <sup>38</sup> Aden nanshun, Petedo Dida yacno tabadec, qesho tantiaashun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidenquio yec badedquio ēbēdi cho —cac <sup>39</sup> abēdi badedquio Ope yacno Petedo nidpanēdash. Adec nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

<sup>40</sup> Adosho isun abitedi puduemiash danēshēn sebudash Nuquin Papa chiec onquetanec nidtoшон unēsboed isquin: —Nidto, Dodcas —Petedon cac uincuenequi Petedo isec Dodcas badedi uētšēdtopanēdash. <sup>41</sup> Uētšēdtoшо isun mēdinquin nidtomeshun niantebōbēdta Esus tantiaquid utsibo cuēnquin chomeshun uincuenboed ismepanēdash. <sup>42</sup> Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. <sup>43</sup> Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo tabadpanēdash.

## 10

### *Petedo Codnedion chomiaid*

<sup>1</sup> Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēsh Sesadeya caid yacno choash tabadpanēdash. Aidi sondado dadpen 100tedi chuiquid icpanēdash.

<sup>2</sup> Aidi aton shubun icquidobēdi Nuquin Papa tantiaquid icquin isadaidbo aton na nibēdquid icsho isun menebanquid icpanēdash. Adecbidi Nuquin Papa chiec onquianedenepanēdash. <sup>3</sup> Adquid yec ushē budtsambi tedes yanuc Nuquin Papa chiec onquequimbi ushachimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

<sup>4</sup> Adsho tantiaш dacuēdquin comapenen isec: —¿Atotsibi name, Icbo? —quepanēdash Codnedio.

Adoaquien: —Abi chiec mibi onquedenesho Nuquin Papan tantiec. Adem-bidi aton na nibēdquid tantiaquin menedenequid mibi icsho Nuquin Papan bēdamboen isaid mibi neque. Chuinu. Tantiata. <sup>5</sup> Nēbi Simon cuēnshumbic Petedo cuēnoaid ma bednu mimbi namiaido Ope yacno nidmetan. <sup>6</sup> Simon utsi nidaidēn capuquid bitsi uashun chodcashun nacnenquidbēd tabadec. Aidēn shubu actē cuēmambi iquēc —quepanēdash Nuquin Papan uaid mayan bēda Codnedio chiec.

<sup>7</sup> Aden chianec Nuquin Papan uaid mayan bēda nidambi Codnedion aton yua daēdbēdta sondado abentsēc chomeshun <sup>8</sup> Nuquin Papan uaid mayan



bëdan chuibocpaden Petedo bedmuenen ambi namiaido Codnedion nidmepanëdash.

*Petedon ushacimboec tsadquin isaid*

<sup>9</sup> Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno decatopanëdash. <sup>10</sup> Adec decatatoash shubu icbon codocanubi Petedo bundoec ushacimboec tsadquimbic <sup>11</sup> abu posonianec abi yacmi dabiديه dapabiecquid bucn dënëshbudcuenaïd budsho Petedon ispanëdash. <sup>12</sup> Aidënquïo ambi petequid ambi petemaïd chedo nidaidën capuquid tacbidën capuquidbëd podochoquid chedo antabëdpanëdash. <sup>13</sup> Adnubien: —Nidtochon cuesuneshun pe, Petedo —capanëdash abucuësh onquequin.

<sup>14</sup> Adoaquien: —¿Abida cai? Ëmbi petemaïd tauishun mibi shëdmetemaïdquïo antabëdquid nec. Adquid piamboccombi, Icbo —quepanëdash Petedo.

<sup>15</sup> Adoaquien padpidec abucuësh onquec: —Nuquin Papan bëdambo icmi-aid icsambo iquec cainda —quepanëdash. <sup>16</sup> Adotanquimbic antabëdquid abuc buanshun adomboembidi abentsëc chotsëcnuc büdmequin adembiدي Petedo chuishun abuc shëcuë uaid yacno badedquïo buanshun puduedmeopanëdash.

<sup>17</sup> Adosho isash Petedo ambi isboed tantiec tsadnubi Codnedion chomiaïdo Simonën shubu istuidash shëcuë cuëmano choec nidtuidpanëdash. <sup>18</sup> Choec nidtuidash: —¿Nëmboda Simon Petedo tabadec? —quetuidpanëdash.

<sup>19</sup> Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibënc. <sup>20</sup> Ëmbi chomiaïdo neque. Budash cacuidenquïo yec aidobëdi nïdan —capanëdash.

<sup>21</sup> Aden chiac budshun Codnedion chomiaïdo isash: —Mimbi nibënaïd nebi. ¿Atotsi quec cho? —quepanëdash Petedo.

<sup>22</sup> Adoaquien: —Codnedio cuëmëdquidën chomiaïd nebi. Aidi sondado dadpen chuiquid bëdamboquidquïo nec. Adquid icquin Nuquin Papan chiacpaden nabansho isun isadaïdbon bëdamboen isaidquïo nec. Aidi Nuquin Papan chomiaïd mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuiuoaposh —quepanëdash Codnedion chomiaïdo Petedo chiec.

<sup>23</sup> Adoaquien: —Pudued —quepanëdash Petedo.

Adashic badiadanec Codnedion chomiaïd bëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash.

<sup>24</sup> Adec nidanec Sesadeya caïd yacno chopanëdash. Adnubien, Nëïd ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. <sup>25</sup> Aden iccuededmiac tabadnubi utsibobëd choec Petedo chedo puduedsho isash, Mibi bëdamboquid icnubi adesa nebi, quequin Petedo ismëc danëshën sebudec shuebudash Petedo bëisenquïo yec Codnedio uepanëdash.

<sup>26</sup> Adec uesho isash Petedo: —Mibipadquid nebique. Nidtotä —quepanëdash Codnedio caic.

<sup>27</sup> Adtanec Codnedio bëd onquetanec quënë utsin puduedshun isadaïd-pembo dadpen Petedon istuidpanëdash. <sup>28</sup> Aden aïdo isec: —Isadaïdbo nebi. Adquid yec isadaïdpembobëd capuesa neyobi. Adecbidi min shubun

puuedesa neyobi. Adesa ichoedi Nuquin Papan, Matses utsibo ëmbi bēdamboen isaid icsambo iquec cainda, quequin ismequin ëbi tantiamiac <sup>29</sup> mimi ëbi bedmiado choacsho isash, Mibēd capuesa nebi, quenquo yec chobi. Adecbidi nēmo choash isadaidpembon shubu nec. Nēmo puuedtiapimbo iquebi, quenquo yec puuedobi. Nēbi Tantanu. Chui. ¿Atotsieshun ëbi chomio? —quepanēdash Petedo Codnedio chiec.

<sup>30</sup> Adoquien Codnedio: —Abentsēc choec ushanec ushē budec tedes yanubi Nuquin Papa tantiec buna mēmunc con shubu nuntanūesh Nuquin Papa chiec onquec tsadobi. Adnubien dashcute shocosh bedbedquiachimboec dasiuidquid ëbi yacmi Nuquin Papan budmiac onquec: <sup>31</sup> “Codnedio, mibi Nuquin Papa chiec onquesho Nuquin Papan tantiec. Adembidi aton na nibēdquido mimi menebansho aidēmbi bēpiscudenquo icquin tantiec. <sup>32</sup> Nuquin Papa bēdamboen tantianuen Simon cashumbic Petedo caid Ope yacnocquidbēd tabadquid ma chono qeshun mimi namiaido nidmeta. Aidi Simon cuēmēdquid utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec,” quec Nuquin Papan uaid mayan bēda onqueposh. <sup>33</sup> Aden chiac: “Petedo bedtan,” quequin ëmbi namiaido nidmiombi. Adoac bēdamboquid yec cacuidanquo yec badedquo mibi choc. Adec mibi choacsho isash bēdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanēdash Codnedio Petedo chiec.

#### *Codnedion shubu nuntanshun Petedon chuibanaid*

<sup>34</sup> Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiemi. <sup>35</sup> Nuquin Papan chiaid tantishun matses utsin-utsinquin chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiemi. <sup>36</sup> Ëndenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoquien Esuquidistun ambi naid tauapondash. Mibitedishun aid tantiondac. <sup>38</sup> Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unēs uaqui <sup>40</sup> uincuenash, Uincuenobi, quequin Esuquidistun ismebpondashi. <sup>41</sup> Aidi uincuenshun matsestedi ismenquiocquin aidbēdtan peshun acquidotedictēsqui Esuquidistun ismepondashi. <sup>42</sup> Abēdi icshobi, Ëbi chuibanquin matses icsaid cuidte chuibante ushē choec quequin chui, cac nebi. <sup>43</sup> Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiamequin chiec.

#### *Isadaidpembo Nuquin Papan aton Mayan meniaid*

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abēd tabadnueshun aton Mayan menepanēdash. <sup>45-46</sup> Aden

meniac isadaidpembo nēbi Esuquidistu tantiaquido yanshun abi onquiacmaidēnquio utsin onqueten onquequin Nuquin Papa chiec cuēdēmpañēdash. Adsho tantiaash Petedobēd cho-choboedo isadaidbo aton tsusedpabon nacaden shui dēbid dētemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepañēdash isadaidbo Petedobēd cho-choboedo.

<sup>47</sup> Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? <sup>48</sup> Aid, acten mentometa —capanēdash Petedon.

Aden acten mentoauqi: —Nuquibi tabadnuna —cac Petedobēd cho-choboedo acten mentoaidobēd daēdpactsēc ushec tabadpañēdash.

## 11

### *Isadaidbo Petedon ambi naid chiaid*

<sup>1</sup> Adnubien utsibo Sesadeya caid yacnoēsh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bēdamboen tantiaash Esuquidistu tantiaquido yanosh, quequin chuipanēdash. Anoshon chuibētsenec Edusaden yacnotsen choshon adomboembidi chuiopanēdash. <sup>2</sup> Aden chuisho anocquidon Esuquidistu tantiaquid utsibon tantiaash tsusedpabon chiacpadomboen shui dēbid dētemequido yec Petedo nēmbo choacsho isun, Aidí ambi nabanaid chuimenu, quequin cainpañēdash. Aden cainubic Petedo choacsho isash <sup>3</sup> comapenec onquecuededec: —Isadaidpembo shui dēbid dētemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu —quepañēdash Edusaden yacno tabadquido.

<sup>4</sup> Adoaquien Petedon nadopanēdash: —Aidobēd ēbi tabadboed chuibanu. Tantiata. <sup>5</sup> Ope yacnoēsh Nuquin Papa chiec onquequin ushacimboen naden ispombi. Abuc posonianec ēbi yacmi dabidiete dapabiecquid dēnēshbudcuenaid budposh. <sup>6</sup> Aidēnquio nidaidēn capuquid tacbidēn capuquidbēd podochoquid chedo antabēdsho ispombi. Aidēn antabēdquid nuqui petequidbēd nuqui petemaid icposh. <sup>7</sup> Adquid icsho isnubi: ‘Nidtoshon cuesuneshun pe,’ caposhi. <sup>8</sup> Adsho tantiaashun: ‘Aidtedi ēmbi petemaid tauiquin mibi shēdmetemaidquio nec. Adquid pesambo nebi, Icho,’ capombi. <sup>9</sup> Adoaquien abucuēsh padpidec onquequin: ‘Nuquin Papan bēdambo icmiaid icsambo iquec cainda,’ caposhi. <sup>10</sup> Adomboembidi abentsēc chotsēcnic tabēcaido abuc buanshun padpiden budmeshun adembidi chuishun buanshun abitedi abuc puduedmeoaposh. <sup>11</sup> Abuc buanoabombic dada abentsēc chotsec Sesadeya caid yacnoēsh choquido shubu shēcūē cuēmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobēdi cacuidenquio yec nidtan,’ guesho tantiaash aidobēdi nidpobi. Aidobēd Ope yacnocquido dada 6ted Esuquidistu tantiaquido puduanec nidec Codnedion shubun ebēdi puduedposh. <sup>13</sup> Puduedacsho isash Codnedio: ‘Nuquin Papan chomiaidēn ambi uaid mayan bēdan naden chuiposhi: Simon cuēnshumbic Petedo caid Ope yacno tabadeque. Aid bedmuenen mimbi namiaid nidmeta. <sup>14</sup> Aidēmbi mibēd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bēdan chuiposhi,’ quequin Codnedion chuioposhi.

<sup>15</sup> “Adoac Esuquidistu chiombi. Aden chuinubi aton Mayan ebitedi Nuquin Papan meniaccpadembi aidotsen meneoaposh. <sup>16</sup> Aden meniacsho isun Nuquin Icho Esuquidistun chiondaid ēmbembi tantiatsēcquiec tsadpobi. Nad

icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icbo Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanédash Petedo shui dëbid dëtemequid utsibo chiech.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ênsho isun Nuquin Papan aidotsen abêd icquid icmeoapac —quepanédash Nuquin Papan naid chiech.

### *Antioquiya yacnoshomba Esus tantiaquido iccuededaid*

<sup>19</sup> Esteban cuënoten seshuniash: “Esuquidistu tantiaquido cuesunenu,” qesho tantiash êbitsen cuesunenushe quianec Edusaden caid yacnoêsh Esuquidistu tantiaquid utsi-utsiec nidanepanédash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnédquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanédash. <sup>20</sup> Adshumbic, utsibo Chipide caid yacnoêsh Antioquiya yacno cho-choquidobêdan nidaid Sidene yacnoêsh Antioquiya yacno cho-choquidon isadaidpambo Esuquidistu tantiamenuen chuibanpanédash. <sup>21</sup> Aden chuibanu, qesho Nuquin Papan bédamboen tantiamiac aidon chuibanaid tantiashun isadaidpembon: Êbi icsaid ênu, quequin ênash Esuquidistu tantiaquid dadpen yampanédash.

<sup>22</sup> Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanédash. <sup>23</sup> Aidi Edusaden yacnoêsh puduanec nidequi Antioquiya yacno choshon anocquido Esuquidistu tantiaquido Nuquin Papan bédambo icmiaid icsho isash: —Cuishon. Bédambo iquec. Ademi tantiaquin chieshenquiocquin Esuquidistu tantiata —quepanédash Bednabe. <sup>24</sup> Bednabe bédambocquid icsho Nuquin Papan aton Mayan meniac Esuquidistu bédamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanédash.

<sup>25</sup> Adashic Antioquiya yacnoêsh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aibdëdi Bednabe choapanédash. Ambo choash seta abentsêc matamec anocquid Esuquidistu tantiaquidobêd iccuededquin Esuquidistu chuibanquin aid daêdshun tantiamepanédash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanédash.

<sup>27</sup> Bednabebêd Saudo Antioquiya yacno tabadnubien Edusaden yacnoêsh Antioquiya yacno Nuquin Papan yuecquio icshun nanun chiaid chuiquido cho-chopanédash. <sup>28</sup> Cho-choshon abentsêqui Accabo cuëmédquid Nuquin Papan Mayanên oncamiac: —Yuec-yuecpactsêc yash nidaidtedi yacnocquidon pete nibêdendac —quepanédash. Aden chiambic shubu dadpenquioshê icquid Doma yacnocquido ancaquid Quëdaudio cuëmédquid icnubi pete nibêdquic yampanédash. <sup>29</sup> Adnubic, Udeya yacnocquidon pete nibêdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanédash. <sup>30</sup> Esuquidistu tantiaquido Edusaden yacnocquido chuiquido nêid piucquid menefanta ma pete bunquido menenueshun, quequin ambi dayun uaidtedi Bednabebêdta Saudo menequin Edusaden yacno buamepanédash Antioquiya yacno tabadquin Esus tantiaquidon.

## 12

*Acobo cuesuniaidbēda Petedo quēnēn nauedaid Nuquin Papan puduemaiid*

<sup>1</sup> Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash. <sup>2</sup> Aido quēnēn nauedmeshun Esuquidistun ēbi chuibeneta caid abēd capucueboed Acobo cuēmēdquid chēshten cuesunemepanēdash. Acobon utsimbo Esuquidistun ēbi chuibeneta caid abēd capucueboed utsi Uan nepanēdash. <sup>3</sup> Adoac, Acobo cuesuniosh, quesho tantiash isadaidbo utsibo, Esuquidistu tantiesabo: —Bēdamboen Edodesēn naosh —quepanēdash aido. Adec onquesho tantiash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. <sup>4</sup> Aden quēnēn nauedmeshun Petedo cuenushe queshun sondado 4ted quēnēn nuntan tabadmehun pan nami uambocquid petequid tantiaid ushēdēi naimēdambi ambi naid icsa Petedo chuimenuquin Edodesēn caimpanēdash. Adnubien quēnēn nuntanshun Petedobēda mētaniaid sondado daēd uenubi utsi daēdshun shēcuē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctosan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtēcnubi badiadnuc isboedo choapanēdash. Adecbidi isboed utsibo inchēshtēmbi padpiden isec choapanēdash. <sup>5</sup> Adnubien Esuquidistu tantiaquid iccuededash Nuquin Papan Petedo quēnēn nauedaid chiec yuec onquepanēdash.

<sup>6</sup> Adshumbic, Badiadshun Petedo bēmēmbi, quequin Edodesēn tantianubi aid inchēshtēmbi Petedo bucun mētaniacchobi ushnubi <sup>7</sup> Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnēn nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi secduquēc shocosh bucu mētaniaid mēchiqidpanēdash. <sup>8</sup> Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho <sup>9</sup> Nuquin Papan uaid mayan bēda nidsho isacimbocquin abimbo tantienquioquin Petedon tsibanampanēdash. <sup>10</sup> Adec nidquimbi sondado abēda mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abēmbi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash. <sup>11</sup> Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. <sup>12</sup> Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo choapanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash. <sup>13</sup> Adnubien choshon Petedon shēcuē tosh-toshcasha tantiash chido yua Doda cuēmēdquid isnuec nidtopanēdash. <sup>14</sup> Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec auchbidi titinquec: —Petedo shēcuē yacno choash nidec —quequin iccuededquido chuituidpanēdash.

<sup>15</sup> Adsho Nuquin Papa chiec iccuededquidon abimbo tantienquiocquin: — Muequi mibi nec. Aidida isplash neba —quepanēdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesa.

<sup>16</sup> Adnubi padpiden Petedon tosh-toshcacho shēcnequin isash: —¡Tso! Abimbo caic —quecuededpanēdash.

<sup>17</sup> Adnubien mēdante uic-uiccaic Petedo: —Onquenquo yec tabadquin tantia. Ēbi nashunquin Nuquin Icbon naboe chuibanu —quepanēdash Petedo abi quēnēn nauedacnoshon Nuquin Papan puduemaiid chuibanec. Aden chiash: —Ēbi puduemaiid Esuquidistun utsi, Acobobēda Esus tantiaquid utsibo chuitanta —quianec puduenanec utsi yacno Petedo nidpanēdash.

<sup>18</sup> Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēda mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac <sup>19</sup> Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

### *Edodes unēsaid*

Adashic, Edodes nidaid Udeya caid yacno abi tabadacnoēsh puduanc shubu dadpen icquid Sesadeya caid yacno choash tabadpanēdash.

<sup>20</sup> Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnoquidbēd Sidon caid yacnoquido Edodesbēd chushcananquido icboedi padenquo yanec tabadpanēdash. Adec chushcananquio yec tabadquin, Sesadeya yacno Edodes choash tabadosh, qesho tantiaash Edodesēn yua Bēdasto cuēmēdquidbēd onquenuc cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquo iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuioapanēdash. <sup>21</sup> Aden adomboembidi Bēdaston chuioasho tantiaashun Edodesēn: —Ēmbi chiacpadēn chochoata, quiosh Edodes, quequin chuita —cac cho-choquido Bēdaston chuioapanēdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuc tsadten abuc tsadtoash onquec taēpanēdash. <sup>22</sup> Aid onquesho tantiaash: —Nidaidēnshun tishaid onquaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash. <sup>23</sup> Aden chuisho tantiaash, Mimbi Nuquin Papa caidpenquo nebique. Aidi abia yampid abentsēcquiobi iqueque. Aiduidi tantiaata, quequin chuitiadquidēmbi chienquo icsho tantiaashun Nuquin Papan chomiaidēn ambi uaid mayan bēdan daicsa uac chichan dadpen yanec Edodes badedi unēsapanēdash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanēdash.

<sup>25</sup> Adnubic Antioquiya yacnoquidon Esuquidistu tantiaquidon aton picquid ambi menunen dayun uaid Bednabebēda Saudo meniac buanec Edusaden yacno choshon anocquido Esuquidistu tantiaquido menetanashic auēshquo puduanec Antioquiya yacno nidoapanēdash. Aidobēdi Uan cashumbic Madcos caid nidpanēdash.

## 13

*Saudobëtabi Bednabe nidmiaid*

<sup>1</sup> Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsusio dapa, Edodesën shubun icquid ichoedi, Manain cuëmëdquid; utsibic, Saudo cuëmëdquid. <sup>2</sup> Aidtedishun Esuquidistuidi tantianuen buna mëmunsho Nuquin Papan Mayanën: —Saudobëdta Bednaben aid daëdshun ëmbi chuibocpaden ma napanuna —capanëdash. <sup>3</sup> Adoaquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd iquidon.

*Chipide yacnoshon Esuquidistu chuibanaid*

<sup>4-5</sup> Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidtedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nactnëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuedadacno choash puduedshun Nuquin Papan chiaid dada uamiampid Saudon Bednabebëdta chuibanpanëdash. <sup>6</sup> Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd iquidon. Satanasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuipanëdash Badesusën. <sup>7</sup> Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudo cuëmëdquid icpanëdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. <sup>8</sup> Yuedac Pabadon Esuquidistu chuibanpanëdash. Saudo quequin isadaidbon cuënubi Pabado quequin isadaidpembon cuëmpanëdash. Aden Pabadon Esuquidistu chuibancho tantiec tsusio tsadsho isun Badesusën tantiamenquiocnuen utsi uain chuiopanëdash. Ambi ompoaid ismianesa Badesus icsho Edimus cuëmpanëdash. <sup>9</sup> Aden utsi uain chuisho tantiasshun Nuquin Papan Mayanën tantiamiac Edimus bëisequi Pabado: <sup>10</sup> —Satanasën bacuë yec bëdamboen naidbëdta bëdamboen chiaid tanties a mibi nec. Nuquin Papan namiaid nebi, quequin ompoaid ismenquicquimbi Nuquin Papan chiaid utsi uaqin muaquin mimbi adenuidi chuibanee. Tanta. <sup>11</sup> Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudac bimboec yanash: —¿Tsuntsimbini mëdinhshun buampeba? —quequin nibëdacno mishquin uëmbampanëdash. <sup>12</sup> Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudo cuëmëdquid Esuquidistu tantiaquid yampanëdash.

*Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid*

<sup>13</sup> Adashic, Chipide yacnoësh puuanec nidaid Pampidia caid yacno Pabadobëd icquido canon potepanëdash. Aden potiaşh nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid

<sup>14</sup> isbidanec nidaid Pisidia caid yacno shubu dadpen icquid Antioquiya yacno chopanëdash. <sup>15</sup> Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

<sup>16</sup> Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi <sup>18</sup> tsusedpabon Nuquin Papan chiaid chieshëmpampic. Adoquien matses nihëdacno seta dadpen 40ted matamec tabadquin, Nuquin Papan tsusedpabon ëbi chieshënaid cidnu, quenquiocquin buampampic. <sup>19</sup> Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. <sup>21</sup> Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. <sup>22</sup> Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiech.

<sup>23</sup> Aden chiech abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. <sup>24</sup> Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. <sup>25</sup> Adec onquetanequic matses acten mentobudquin nainec: ‘¿Mitsipaden ëbi isquin cuëmepsatia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanëdash Uan acten mentoanquid —quepanëdash Pabado.



26 Aden Uan padon chiacpaden chuibanashic: —Abadauanën tishmi-aidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puuedmequid icmequin ambi chiampicpaden napanëdash. 27 Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënkien abi isec onquiaid Nuquin Papan dada uamiampicpadembi aidon napanëdash. 28 Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. 29 Adoquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Èbi unësacsho nëidën ëbi nauedec, quequin ambi shëcuë uain nacnenaid chucanquio Osen Esus nauedpanëdash. 30 Adoacsho Nuquin Papan Esuquidistu uincuemiac 31 capusho Cadidia yacnoësh Edusaden yacno abëd capucuenoëdon aidi isbemanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

32 Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi 33 Nuquin Papan uincuemiacsho nuqui isonaid aidi nec. Aidi chuiquin Nuquin Papan dada uamiampid nad iqueque. Tantia. Chuinu. ‘Con madombo mibi nec.

Nëbi ëmbi uincuemiaqui ëmbi chiacdedi mimbi naimbudoc.

Adsho isun ëbipadquiocnoc chuiquid dapa mibi icmemb.’

Aden ëndenquimboshë aton mado tantiaquin Nuquin Papan chiampic.

34 Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu. ‘Dabid chiampicpadembi mibi icsaisa icsho ëmbi bëdamboen isaid mibi nec, mado,’

quequin Nuquin Papan dada uamepampic. 35 Ambi dada uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

36 “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën namitsen chodquepampic. 37 Nuquin Papan uincuemetequidën namien chodquesa icpanëdash. 38 Aidi icsainquiocquid yec ëbitedi icsaid bedshunash abided cuidadpanëdash. 39 Adoac abi tantiaquidquioten icsaisabidi Nuquin Papan isec. Nuquin Papan naden nata quequin dada uamiampidtedi mat-sesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icsho cuidnushe quiaish abided cuidadec Esus unëspanëdash, quequin tantiasho, Esuspadquid icsaisa Nuquin Papan nuqui isec. 40 Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

41 ‘Èmbi ëndenquimboshë dada uamiampicpadembi adquid chomembi.

Èmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamënsnumënkuid ëbëdi tabadtiapimbo iquendac.

Adquid icmane queshun tantiaquiota’

—quepanëdash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoësh abëd choboedobëd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. <sup>43</sup> Aden chianec Pabadoëd Bednabe nidsho isun isadaidbo utsin-utsinquiembëd tan isadaidpembo isadaidbopadquid icnuequid utsin-utsinquien tsibanampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

<sup>44</sup> Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. <sup>45</sup> Dadpen iccuededsho isash isadaidbo tsusiobo: Ëmbi chuibansho tantianuec aitedi choenquino iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

<sup>46</sup> Adoquien, dacuëdenquio yec Pabadoëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papabëd tabadte bunesabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembim ma nidaidtedi yacno ëbi tantiaquido ëbi yacno puduedquid ma icpanuna,” quequin chioshi —quepanëdash Pabado abi chieshëncquido isadaidbo Nuquin Papan dada uamiampicpaden chiec.

<sup>48</sup> Adsho tantiahi isadaidpembo: —¡Padtec! Nuquin Papan chiaid bëdamboshë iquec —quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

<sup>49</sup> Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanopanëdash. <sup>50</sup> Adosho tantiahi, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadoëdta Bednabe mëyantankuin ashunquio nidmepanëdash. <sup>51</sup> Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. <sup>52</sup> Pabadoëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aitedi aton Mayan Nuquin Papan menepanëdash.

## 14

### *Iconio yacno*

<sup>1</sup> Adashic, Pabadoëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. <sup>2</sup> Aido Esuquidistu tantiaquid yanubi isadaidbo utsibo Pabado chuibanac tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. <sup>3</sup> Aido nëishmiambi Iconio yacno yuec tabadquin Pabado Bednabebëd tan dacuëdenquiocquin Esuquidistu chuibanampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadoëdta Bednabe icmepanëdash. <sup>4</sup> Aden icmiac aid dæëdshun nadatiambocquin nasho isash, Isadaidbo tsusiobon chuibocpadec Pabadoëd Bednabe icsambocquid nec, utsi-utsiec quenubien,

Ambi chiaid abimbo iquec, utsibo quepanēdash. <sup>5</sup> Aden chuishumbic, Pabadobēda Bednabe cuestanquin cuēnoten se-senuequin Esus tantiesabo isadaidpembon aton tsusio dapabobēdtan cainubi ademibidi isadaidbon aton tsusio dapabobēdtan cainoapanēdash. <sup>6-7</sup> Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabadobēd Bednabe choash shubu dadpen icquid Disteda caid yacno choash tabadquin Pabadobēdtan Bednaben Esuquidistu chuibampanēdash. Adtanec auēshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanēdash. Adtanec auēshquio puduanec nidshun dēuequieq shubu dadpen icquid utsi-utsiec yacnocquidotsen chuibampanēdash.

### *Disteda yacno*

<sup>8</sup> Disteda yacno tabadnubien anocquid taicsaidi anin tishaid caputi-apimbo icpanēdash. <sup>9</sup> Aidi Pabadon Esuquidistu chuibansho tantiec, Esuquidistun ēbi bēdamepatsiash, quec otacquio tsadpanēdash. Aden caputi-apimbocquidēn tantiacpadomboen Nuquin Papan Pabadotsen tantiamiac <sup>10</sup> caputiapimbocquid comapenen bēisquin: —Nidto —Pabadon cac badedi nidtoash taicsaid bēdanash capupanēdash.

<sup>11</sup> Aden taicsaid bēdamiac capusho isash anocquido aton onqueten cuēdcuededquin: —Disteda yacnocquidon tantiaid mattsesbimboec yanash abucuēsh budoshe. Nēid daēdi isec cho —capanēdash. <sup>12</sup> Adtanequi Bednabe otacquio tsadquid icsho isash ambi tantiaid abentsēc Upited icnuc Upited cain Bednabe cuēnquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuēmpañēdash Disteda yacnocquidon. <sup>13</sup> Aden cuēnsho tantiasun baca bēnē daēd bēc: Mibi daēdi tantiaquido Disteda yacnocquido nec, quequin, Ismenu, quequin ambi tantiacbimboecnuc nacnenaid Upited caid dayun uaquido baca cuesunenu, quepanēdash.

<sup>14</sup> Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquio nidash Pabadobēd Bednabe comapenec nadpanēdash: <sup>15</sup> —Ēbi daēdi mibipadquid mattsesquio nebi. Mimbī tantiacmaid nebique. Baca cuesunenda. Chiaid bēda mibitedi naden chuinec chobi. Nuquin Papa caid abentsēcquobi iquec. Aidēmbi abubēda nidaid uashumbic aidēnquicquidtedi uabanampidquio neque. Aiduidtsēqui tantiaquin ambi uaidbimboecnuc mattsēsēn nacnenaid tantiesā icta. <sup>16</sup> Ēdenquimbo Nuquin Papan, Adoenda, cainquiocnoc mattsēsēn ambi tantiacpaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bēdamboquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnocquido chiec. <sup>18</sup> Aden chuido-chuidoquai baca cuesunenquio icpanēdash Disteda yacnocquidon.

<sup>19</sup> Adnubien Antioquia caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nēishcuededpanēdash. Adec nēishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash. <sup>20</sup> Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

*Nidaid Sidia caid shubu dadpen icquid Antioquiya yacno choaid*

<sup>21</sup> Adec Dedbe yacno choash tabadquimbi Pabadobēdtan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanēdash. <sup>22-24</sup> Aden chuibanshumbic: —Natiamianguid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabado. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmūquin chiec onquepanēdash. Aden Nuquin Papa chuiquin naimbudquin, Nēmboquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanapanēdash. Adecbidi Antioquiya yacno choashun adomboembidi chuibanapanēdash. Antioquiya yacnoēsh puduanec nidec nidaid Pisidia caid datambētsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. <sup>26</sup> Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. <sup>27</sup> Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaitedi Pabadobēdtan Bednaben chuibanpanēdash. Isadaidpembo dadpen Esuquidistu tantiaquid yamposh, quequin chuipanēdash. <sup>28</sup> Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

## 15

*Edusaden yacnoquido iccuededec tantianu quiaid*

<sup>1</sup> Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash. <sup>2</sup> Adnubic Pabadobēd Bednabe Antioquiya yacno choash tabadquin aidon chiaid tantias: —Nuquin Papan aden chiambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiasun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo chuioaquin aido nidmepanēdash. <sup>3</sup> Adoac Antioquiya yacnoēsh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanēdash. Adsho tantias: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. <sup>4</sup> Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaitedi Pabadobēdtan Bednaben chuibanapanēdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui

dëbid dëtemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

<sup>6</sup> Adoaquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. <sup>7</sup> Adec yuec onquecuededash nidtoash Petedo naded onquepanëdash: —Chuinu. Tantiata. Ënden Nuquin Papan naden chuipondashi: “Isadaidpemo Esuquidistu tantiaquid icmetë bunebique. Aidotsen chuibanta,” quequin chuipondashi. Aden ëmbi chuiasho mibitedishun tantiondac. <sup>8</sup> Ëmbi isadaidpemo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniäcpademi isadaidpemo meneoapondash. <sup>9</sup> Utsibo nec, quenquiocquin aidotsen tantiaamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiäcpaden tsusedpabon natiapimboctequid nuquitsen natiapimboctequid isadaidpemon nabanta cate nuqui bumpe? <sup>11</sup> Padenquio icnuna. Matsestedi icsaquid icsho cuidnushe quiash abided cuidadac, quequin tantiaquieci unëdash abëdi tabadendac, quequin nuqui tantiacpaden isadaidpemo Esuquidistu tantiaquido yanshun tantiec —quepanëdash Petedo.

<sup>12</sup> Aden Petedon chuiquin ënambic Pabadotsen Nuquin Papan tantiamiac ambi nadatiambocquin naquin isadaidpemo ismebanaid chuipanëdash. Adembidi Bednaben chuiopanëdash. <sup>13</sup> Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Ëmbitsen chuinu. Tantiata. <sup>14</sup> Isadaidpemo tantiaquin aido Esus chuibanta, quequin Nuquin Papan chiäcpaden Simon Petedon chiac isadaidpemo Esus tantiaquid yansho Nuquin Papan aidtedi nuquibëda aton matses icmiac. <sup>15</sup> Adomboembidi Nuquin Papan chuimiäidën dada uampid nad iqueque. Tantia. Chuinu:

<sup>16</sup> “Isadaidbobëd yuec tabadenquiochoedi padpidec choash aidobëd icoaindabi.

Dabid padon tsyuecquido isadenquiochoedi isadcuenendac

<sup>17</sup> ma aton Icho matsestedishun istuidpanuna;

ma adembidi isadaidpemon ëmbi cuënaidon aidbidi istuidpanuna,

<sup>18</sup> quec Nuquin Icho ambi ënden tantiampicpadomben chiaid nec”

—quiashic abi Acobo onquec: <sup>19</sup> —Nuquin Papan chiampid tantiaquin nuquin tsusedpabon naden nata quequin chiäcpaden nata isadaidpemo cainquio ictiad. <sup>20</sup> Nëiduidtsëqui dada uaqin isadaidpemo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouditsëqui chudta; adembidi, min bënëuidtsëqui chudmeta; adembidi, Nëish tëtaniaid intacchobi codocaid penda, quequin isadaidpemo chuibanuna. <sup>21</sup> Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpemo chuinuna —quepanëdash Acobo iccuededquido chiec.

<sup>22</sup> Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëda Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëdquid. Aid daëdi Nuquin Papan chiaid comapenen tantiaquidquio icpanëdash. <sup>23</sup> Isadaidpemo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpemo Esuquidistu tantiaquido Antioquiya yacno tabadquidobëdta nidaid Sidia

yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. <sup>24</sup> Ēbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chiosh. <sup>25</sup> Aden chuisho tantiashun nēmbocquidobēd iccuededec onquequin abentsēcshun tantiacimboen dada uaombi. Aidi nēmbocquid daēdi Pabado Bednabebēdta buantan, quequin chiemi. <sup>26</sup> Unēsmane, quenquio yec capucuenequin Esuquidistu chuibanquido Pabadobēd Bednabe nec. <sup>27</sup> Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuiopanuna abimbo iquec camenuen. <sup>28</sup> Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chiduidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiacpaden nabanec mibi bēdambo icpec. Padi aidentedsēqui chiemi.”

<sup>30</sup> Aden dada uaqin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash. <sup>31</sup> Aden meniac isbanash: —Mimbi bēboed dada uaid isash bēdambo iquebi — quepanēdash isadaidpembo Antioquiya yacnocquido.

<sup>32</sup> Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamepanēdash. Adombombidi chuibanquin Sidasēn tantiameoapanēdash. <sup>33</sup> Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibampanēdash.

### *Pabadobēd Bednabe cuēshēdaid*

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

<sup>37</sup> Adoquien: —Ma Madcosbidi nidoanu. Chuita —quepanēdash Bednabe.

<sup>38</sup> Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

<sup>39</sup> Adoquien Bednabe aden tantienquio yec Pabadobēd comapenec onquiash Madcosbēd cano antabēdtoanec Chipide yacno nidoapanēdash. <sup>40</sup> Adnubien Pabado Sidas abēd Edusaden yacnoēsh choaed caic: —Nuquibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabadobēd Sidas nidpanēdash. <sup>41</sup> Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibampanēdash. Aden chuibeshumbic nidaid Sidisia yacno choshon Esuquidistu tantiaquido shubu utsin-shubu utsinquiec iccuededacnomboec puduedcuenequin Pabadon chuibanoapanēdash.

## 16

*Pabadobēd Timoteyo nidaid*

<sup>1</sup> Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. <sup>2</sup> Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuioapanēdash. <sup>3</sup> Aden dadpenshun chuisho tantiash Timoteyo buante bupanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabodon Timoteyon shui dēbid dētemepanēdash. <sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabodon chuioapanēdash. <sup>5</sup> Adembidi Nuquin Papan chiaid chiac ēnden Esuquidistu tantiaquidon tantiabenquiocnōbi utsi dadpen Esus tantiaquid yanoapanēdash.

*Ushquin Masedonia yacnocquid Pabodon isaid*

<sup>6</sup> Adanec nidaid Sidisia caid yacnoēsh nidsho Nuquin Papan Mayanēn: — Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec <sup>7</sup> nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. <sup>8</sup> Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. <sup>9</sup> Ambo choash tabadec inchēshnuc ushquin nidaid Masedonia caid yacnocquido Pabodon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabodon tantiapondash. <sup>10</sup> Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nēbique. Nacnenuna — Pabodon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

*Didia cuēmēdquid Esuquidistu tantiaquid yanaid*

<sup>11</sup> Adanec Todoas yacnoēsh puduanec cano antabēdtoanec cuebi nidequi acte nēnantanquio nidaid nacrēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec <sup>12</sup> nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadēn Nuquin Papa chiec utsibo onquedeniacno istuidnuec puduanec shubu nibēdacno nidequi acte utsi cuēmambi choapondash. Ambo choshon iccuededquido chidobo istuidshun Esuquidistu Pabodon chuibanpondash. <sup>14</sup> Pabodon chuibanacno chido Didia cuēmēdquid shubu dadpen icquid Tiatida caid yacnoēsh choquid icpondash. Aidēn piucquid bednuen dashcute cuēshaid umu-umumbocquid menebenepondash. Aidi Nuquin Papa tantiaquid icquid Pabodon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aidbēd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian:

—Esuquidistu tantiaquid mibipadquid nebique. Con shubuno ushec cho — cac nidash Didian shubun puduedash Pabadobëd icquido tabadpondash.

*Pabadobëdta Sidas quënën nauedaid*

<sup>16</sup> Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuiddpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash. <sup>17</sup> Pabadobëd icquido bëquedtuiddshun tsibambëec choec aid chido: —Nëid dadatedi Nuquin Papan namiaidquido nec. Abi yacno puduedmianquid iquec, quequin chuibanquid nëid dadatedi nec —quec <sup>18</sup> badiadquidën-badiadquidënqueic comapenec cuëdpondash.

Adec cuëdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidënquio dapudenta —cac badedquio mayan icsa dapuduempondash. <sup>19</sup> Aden dapuduemiatic chido bëdanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquocquin piucquid bedtiapimbocquin nuqui meneoatiapimbo iquec, quequin tantiash nëishun Pabadobëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsho isun chido yuaquidon Pabadobëdta Sidas ambo buampondash. <sup>20-21</sup> Aden abi chuiquid tsadacno bëash: —Nëid dada daëd isadaidbo nec. Nëmbo choshon abi chuiquidon naden nata quequin chiaid

chuibanec. Èbitedi domanobo icquin ambi chiaid èbitedishun natemaic icnuc matstedidi chushqueuededosh —quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bëquidon chiacpadomboen aidontsen chuoac abi chuiquido: —Bëboedon dashcute chicshun cueshcaten cuesta —cac sondadon cuespondash. <sup>23</sup> Aden comapenen cuesmeshun buameshun quënën nauedmeshun ambi quënën nauedaid ista caid chuiquin Pidipos yacnocquido chuiquidon: —Puduenanec cuenushe qeshun nëid daëdi bëdamboen isquiota —capondash. <sup>24</sup> Adsho tantiashun ambi ista caidën Pabadobëdta Sidas nënantanquio quënën nauedquin tsadunshun cuate shëcuë uaidën tausunash puduentanquin quënë bëdamboen bëtashpanëdash.

<sup>25</sup> Aden bëtashash aton shubu dayunquiocquidën puduedambic inchëshpotsembo Pabadobëd Sidas Nuquin Papa chiec onquepanëdash. Adecbidi Nuquin Papan naid chiec cuëdëmpanëdash. Adec cuëdënsho utsibon tantianubi <sup>26</sup> comapenec nidaid ishcutnubi mëtaniaidtedi mëchiquidpanëdash. <sup>27</sup> Adnubien ista caid isec tsadboedi ushtanec isucunquin isac shëcuë bëtashaid ënden shëcniac. Adsho isash ista caid: —Quënën nauedaido puduenpuduempacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaid chicsho <sup>28</sup> istanquin Pabadon: —Quënën nauedaidtedi nëmbo iquebique. Seshuniadenda —quequin comapenen cuëmpanëdash.

<sup>29</sup> Adoauquin, seshuniadtsemboedën: —Tabote bec cho —cac ambi nami-aidën tabote bedtanquin meniac tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpanëdash. Mibi daëdi bëdambocquid icnubi adquidpenquio nebi, quequin tantiaquin ismepanëdash. <sup>30</sup> Adsho isun Pabadon nidto-miaquid seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icho yacno puduednush mitsipadequibi ëbi icsaid cuidapeque? Chui. Tiantianu —quepanëdash seshuniadtsemboed.



<sup>31</sup> Adoaquien Pabado: —Mibibi cuidadtiapimbo iquec. Mibēda min shubun icquido icsaquid icsho cuidnushe quiash abided cuidadec unēsash Esuquidistu aton Papa yacno puduedash abi tantiaquido yuedquid neque. Mibi icsaid ēnash, Esuquidistu con Icho nec, quequin abimbo tantiaata <sup>32</sup> —qeshumbic seshuniadtsemboedbēd icquido Esus tantiamenuen Nuquin Icbon chiaid Pabadon chuipanēdash.

<sup>33</sup> Adoaqui Pabadobēda Sidas cuesaid chiūē acten bēpanshunquin nainacsho aton shubun icquido Esuquidistu tantiaquido yansho isun aitedi Pabadobēdtan Sidasēn acten mentobampanēdash. <sup>34</sup> Aden mentobanaqui aton shubun yuedshun pemepanēdash. Adashic, Nuquin Papan chiaid abimbo tantiaquid yec ambi bēdambo icmiaido seshuniadtsemboedbēd icquido icpanēdash.

<sup>35</sup> Adashic, badiadash Pidipos yacnocquido chuiquidon: —Nauedaid shubu yacno nidshun quēnēn nauedboed daēd pudueme, quequin chuitanta —cac quēnē yacno nidshun ista caid adomboembidi chuioapanēdash.

<sup>36</sup> Aden chiac ista caidēn: —Quēnēn nauedboed daēd pudueme, quequin chuiquid dapabon chiosh, quequin aidon chomiaidēn chioshibique. Dacuēdenquo yec nid —capanēdash Pabadobēda Sidas chuiquin.

<sup>37</sup> Adoaquien Pabado: —Ēmbi naid chuimenquiocquin ēbi daēdi domanobo icsho utsibon isnubi cuesmeposhi. ¿Nēbi puduemenuen utsibo isenquiocnobida ēbi daēdi nidmepec? Padenquo caimbi. Ēbi daēdi puduemenuec ma chuiquid dapabo abibi chopanuna —quepanēdash.

<sup>38</sup> Aden chiac puduenanec nidequi abi chuiquido yacno choshon, Mimi quēnēn nauedmeboed daēd domanobo nec, quequin chuisho tantiaquid chuiquid dapabo compenec dacuēdcuededpanēdash. <sup>39</sup> Adec dacuēdec nidequi nauedaid shubuno choash: —Domanobo nec, quequin tantienquiocquin mibi quēnēn nauedmiombi —qeshun puduemetanec: —Pidipos yacnoēsh nidan —capanēdash Pabadobēda Sidas chuiquin. <sup>40</sup> Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bēdamboen tabadmenuequin Pabadon chuibanpanēdash. Aido chuibidanec Pabadobēd icquido nidoapanēdash.

## 17

### *Tesadonica caid yacnocquido isadaidbo nēishcuededaid*

<sup>1</sup> Pidipos yacnoēsh puduanec nidequi Pabadobēd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiaquid Tesadonica caid yacno Pabadobēd icquido tabadpanēdash. <sup>2-3</sup> Ambo tabadec isadaidbo iccuededte badiadēn abi nidteniacpadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ēnden chiampid chuibanpanēdash. Nuqui icsaid bedshunash abided cuidadec Esuquidistu unēsaid ambi uincuemetequid Nuquin Papan Chomiaidquo nec. Aidi nuqui Quidistu caid neoaic, quequin chuipanēdash Pabadon. Sabado 3ted matamequin adomboen chuibanpanēdash. <sup>4</sup> Aden chuibanauqui Esus tantiaquid utsi-utiec yampanēdash. Nēdic, isadaidbo utsi-utsiec; utsibic, Nuquin Papa tantiaquid quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanēdash.

<sup>5</sup> Aden Pabadon chuibanac Esus tantiaquid dadpen yansho isash isadaidbo utsibo nēishun utsibon piucquid bednuequin aton na sambanshun ismacno nidshun tantiesabo, icsambocquid dadpen, iccuededmeshun aidotsen nēishmiac natia chushquecuededpanēdash. Adec chushquec

nidequi Pabadobēda Sidas bednuec Ason cuēmēdquidēn shubuno puduedec nidpanēdash. <sup>6</sup> Ambo choshon Pabadobēd Sidas nibēdsho isun Esuquidistu tantiaquido Asombēd icquido bedshun abi chuiquid dapabo yacno Pabado chieshēnquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nēmo <sup>7</sup> choacsho Asonēn aid daēd yuedaccosh. Nuqui ancaquid Sesadēn chiaid niacquin ancanquid utsi Esus cuēmēdquid iquec, quequin chuibanec —quepanēdash Pabado chieshēnquido abi chuiquido chiec.

<sup>8</sup> Aden, Ancanquid utsi iquec, quequin Pabadobēdtan Sidasēn chiec, qesho tantiaash chuiquid dapabo iccuedēdquidobēd comapenec chushquecuededpanēdash. <sup>9</sup> Adtanec abi chuiquid Asombēd icquido caic: —Nēbi, ¿Atotsi tantiaquin Pabadobēda Sidas yuedo? quequin mibi chuimetiapimbo iquembī. Yueshun mibi chomeshun chuimembī. Ēmbi chuimiabi Tesadonica yacnoēsh nidenda. Ēmbi chiacpaden nanuequin piucquid ēbi mene —capanēdash Tesadonica yacnocquido chuiquid dapabon Asombēd icquido chuiquin. Adoaquien piucquid meniac bedshun: —Min shubuno nidtan —cac nidanepanēdash Asombēd icquido.

### *Bedeya yacnotsen tabadaid*

<sup>10</sup> Adshumbic bednushe qeshun aid inchēshēmbi Tesadonica yacnocquido Esuquidistu tantiaquidon Pabadobēda Sidas shubu dadpen icquid Bedeya caid yacno nidmepanēdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanēdash. <sup>11</sup> Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ēnden dada uamiampid Pabado chuibanoshon tantiaashun bēdamocquid icquin, Abimbobida chuibanosh. Isbono, quequin Nuquin Papan chiampid isban-isbampanēdash Bedeya yacnocquidon. <sup>12</sup> Aden isbanec, Abimbo caic, quiaš Esuquidistu tantiaquid dadpen isadaidbobēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

<sup>13</sup> Adnubien, Bedeya yacnoshontsen Pabado chuibanec, qesho tantiaash Tesadonica caid yacnocquido, isadaidbo, Asombēd icquido bedmeboedo, Bedeya yacno choshon anocquidotsen nēishmiac comapenec chushquecuededpanēdash. <sup>14</sup> Adsho tantiaashun Esuquidistu tantiaquidon Bedeya yacnocquidon acte dapa cuēmāno Pabado nidmepanēdash. Adnubi Sidasbēd Timoteyo nidenuquo yec Bedeya yacno tabadnubien <sup>15</sup> Bedeya caid yacnoshon utsibon bēyucanquin Pabado buampanēdash. Aden buanec nidequi shubu dadpen icquid Atenas caid yacno chopanēdash. Ambo choash abia bēyucanquido: —Ēbi chobocnobidi Bedeya yacno nidoaibi —qesho tantiaashun Pabado:

—Mibi yacno choash, Badedquio Atenas yacno chota, quiosh Pabado, quequin Sidasbēda Timoteyo chuita —capanēdash. Aden Pabado chiaquien Bedeya yacnocquido abi yacno nidoapanēdash.

### *Atenas yacnotsen Pabado tabadaid*

<sup>16</sup> Abia bēyucanquido Bedeya yacno nidambi Atenas yacno Pabado tabadquin, Sidasbēd Timoteyo choec, qeshun cainec capuquimbi Atenas yacnocquidon nacnenaid isbampanēdash. Aidon Nuquin Papan uaidbimboecnuc nacnenaid dadpen tabēcaid papa cain cuēnaid ambi tantiaido icsho isash, Nuquin Papa Abentšecquiobi iquec, quequin tantiesa Atenas yacnocquido nec, quequin tantiec Pabado unēsquio yampanēdash. <sup>17</sup> Adec unēsquio yec Nuquin Papan chiaid chuibante

shubu yacno nidshun Esuquidistu tantiamenuen Nuquin Papan chiampid Pabadon chuibampanēdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanēdash. Isadaidbobēd onquequin Esuquidistu Pabadon chuipanēdash. Adembidi isadaidpembobēd onquequin Esuquidistu chuoapanēdash. <sup>18</sup> Anoshon chuibansho tantiash epicudeyo cuēmēdquidēn chuinēdacpaden tantiaquido Pabadobēd onquepanēdash. Adembidi tantiash estoico cuēmēdquidēn chuinēdacpaden tantiaquido Pabadobēd onquepanēdash. Aido Pabadobēd onquequin Pabadon Esus chuisho tantienquo yec: —¿Atodain comapenec onquequin nēid dadan chuipash? — quepanēdash. Adnubien utsi: —Matses utsibon papa cain cuēnaid chuibanec nepanui —quepanēdash. Pabadon Esuquidistu unēsash uincuenaid chuisho tantiash adpanēdash. <sup>19-20</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bēyucanquin bēash Pabado: — Mimbi chiaid ěmbi tantiacmaid nec. ¿Midapadquidquio mimbi chuibanecque? Tantianu. Chuiban —quepanēdash abi bēquido caic. <sup>21</sup> Abi bēquido Adeyopaco caid yacno nidash Atenas yacnoquido dadpen utsi-utsiec yacnoēsh cho-choquido badiadquidēn-badiadquidēnquiec utsin-utsinquin ambi tantiacpaden chuibansho tantianuec iccuededpanēdash.

<sup>22</sup> Aden mimbi tantiacpaden chuibanta caquien nēnantanquo nidtoshon naden Pabadon chuibampanēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiemi. <sup>23</sup> Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

<sup>24</sup> “Ěmbi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. <sup>25</sup> Aidi abitedishun Icho icnuc abitedi aton na nec. Adquid icho, Con na mibi menenu, matsesēn aid catiapimbo iquec. Aidēn tantiacpadec ěbitedi nēmbobi tabadebi. Aidēn tantiacpadec ěbitedi tiboquebi. Aidēn tantiacpaden ěbitedishun bedbanoaimbi. <sup>26</sup> Aidēmbi bēyuc dada uampidēn tsyuecquido ěbitedi nec. Aid bēyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac. Adecbidi, inchēshtanec badiadoaic. Adecbidi, ushē nidash choaic. <sup>27</sup> Aidēmbi naden tantiec: Matses tantiaquin abitedi uaquin nashundenmbi. Aden ambi matses abi tantiaquin nabanaid isash matses, ¿Tsuntsin nabanaid nepec? qeshun ěbi tantiaquin Icho ěbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. <sup>28</sup> Aidēn nac tiboquequid ěbitedi nēbi. Aidēn nac capuquidbidi ěbitedi nēbi. Adembidi min matsesēn dada uampid adomboen chiaid nad iqueque. Tanti. Chuinu: Nuquin Papan bacuēbo ěbitedi nēbi, quequin min mēdimbon chuipanēdash.

<sup>29</sup> “Nuquin Papan bacuēbo ěbitedi iquec tiboquequid icquin matsesēn nacnenaid tiboquesa papa cain cuēnenquioctiadquidi matses nec. <sup>30</sup> Ěnden matsesēn ambi nacnenaid aden cuēnsho tantiash Nuquin Papa, Chēn. Adoenda, quenquiochoedi nēbi, Mimbi icsamboen tantiaid ěnta, quequin chiec. <sup>31</sup> Matsesēn naid chuibante ushē chonoc matses icsaidbēdta ambi bēdamboen naid chuibanquin Nuquin Papan chomeshun matses icmiaidēn cuidbanendac. Ambi abipadquid matses icmiaid, Nuquin Papan matsesēn

naid chuibanquid icmenu caid unēsacsho isun ambi chiampicpaden nanuequin Nuquin Papan uincumepondash —quepanēdash Pabado Adeyopaco yacno iccuededquido Esus tantiamenuc.

<sup>32</sup> Adec aidi unēsacsho Nuquin Papan uincumepondash, quequin Pabodon chuisho tantiash utsi-utsiec mamēnshumēnubi utsi-utsiec: —Aidēn chuiboed padpiden tantianuna —quepanēdash. <sup>33</sup> Adoquien, Pabado Adeyopaco caid yacnoēsh nidpanēdash. <sup>34</sup> Adec nidshun yuec ushqin chuisho tantianu quec Pabadobēd iccuededquin utsin-utsinguien padpiden-padpidemboen tantiabededpanēdash. Aden Pabodon chuibanac utsi-utsiec Esuquidistu tantiaquid yampanēdash: Nēdic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

## 18

### *Codinto yacno Pabado tabadaid*

<sup>1</sup> Adec Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash. <sup>2</sup> Ambo isadaidbo Aquida cuēmēdquid nidaid Ponto caid yacnoshon tishaid Pabodon istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquidbēd Codinto yacno choash Aquida icpanēdash. <sup>3</sup> Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabodon shubumpi nacnapanēdash. <sup>4</sup> Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabodon chuibampanēdash.

<sup>5</sup> Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabodon chuibampanēdash. <sup>6</sup> Adsho, Aid tantiatapi, quequin isadaidbon Esuquidistu icsamboen chuisho tantiash abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquemi. Isadaidpembon tantiatsiash, quequin aido chuibanemi —quepanēdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoēsh pudueanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. <sup>8</sup> Uston shubunoshon Esuquidistu Pabodon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnoquid dadpen Esuquidistu tantiaquid yampanēdash. Adsho adquidtedi acten mentobampanēdash.

<sup>9-10</sup> Adashic, yuecash inchēshēn Pabado usho Nuquin Papa: —Codinto yacnoquid dadpen Esuquidistu tantiaquid yanendac. Aden ěmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic. <sup>11</sup> Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabodon chuidonepanēdash.

12 Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmédquid icnubi isadaidbon Pabado bedshun abi chushcaid Cadion chuinuen buampanédash. 13 Ambo bëquin puduedmiash: —Ancanquidën chiaid niacquin matsesën tantiatemalaid nëid dadan chiosh —quepanédash Pabado chieshëquido Cadion caic.

14 Adoaquien Pabado onquetsenubi Cadiomba onquedopanédash: —Tantiata, isadaidbo. Mibi chuïnu. Nèidën icsamboen nabanaid mibitedishun ëbi chuisho tantiatsiambi. 15 Aden chienquio yec, Nèidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaïd chuiquidquio nëid dada nec, mibi queoapec. Aden mimbi chuisho tantiashun, Èbi chienda caimbi. Domanocho chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. 16 Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaïdon puduemapanédash. 17 Adoac puduëshumbic Nuquin Papan chiaïd chuibante shubun iccuedquido chuiquid utsi Sostenes cuëmédquid bedshun isadaidbon comapenen cespapanédash. Adosho isun chiac Cadion, Icsamboen naic, quenquio yec otacquo tsadpanédash.

18 Adnubien Codinto caid yacno yuec tabadashic Esuquidistu tantiaquido nianec nidaïd Sidia yacno nidoaic Pabado puduampanédash. Abëdi Aquida aton chido chedobéd Codinto yacnoësh nidec shubu dadpen icquid Senquedeya caid yacno chopanédash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manédaid Pabado matasmeapanédash. 19 Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobéd, Nëmboï tabadnu, quepanédash. Adsho tantiashun aid daëdi nianec Nuquin Papan chiaïd chuibante shubu yacno nidshun isadaidbo Esuquidistu tantiamenuen Nuquin Papan chiaïd chuibampanédash Pabado. 20 Aden chuïbansho tantiashun: —Adomboembidi chuïbanuec çada ëbéd yuec tabadtsia? —iccuededquidon caquien: —Nëbi padenquio iquebi. 21 Nuquin Papan shubu dadpen icquid Epeso caid yacno Esuquidistu chuïbanuec nidoata cac choatsiabi —quianec auëshquio puduanec nidequi cano antabëdtopanédash Pabado.

22 Canon nidequi shubu dadpen icquid Sesadeya caid yacno choash Edu-saden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanédash. 23 Ambo choash yuec tabadashic padpidec puduanec, Esuquidistu tantiec iccuedquido tantiamequiono, que nidequi nidaïd Cadasia caid yacno choash tabadquin chuïbanashic auëshquio nidequi nidaïd Pidiquia caid yacno choash tabadquin Esuquidistu tantiec iccuededquid dadpen bédamboen tantiamenuen chuïbanoapanédash Pabado.

24 Adnubien isadaïdbo Apodos cuëmédquid shubu dadpen icquid Adecan-dedia caid yacnoësh Epeso yacno chopanédash. Aidi dadpen tantiaquid yec Nuquin Papan chiampid tantiaquid nepanédash. 25 Uan pado acten mentoanquid Esuquidistu chiec onquiaïduidi tantiaquin chuïbanquid Apodos icpanédash. 26 Aidi Nuquin Papan chiaïd chuïbante shubu yacno nidshun dacuëdenquicoquin ambi tantiaïd chuïbampanédash. Aden chuïsho tantiash, Èbi yacno isec cho, queshun Aquidan aton shubu yacno buanshun Esuquidistu choaid ambi nadatiambocquin naidbëdtabi abi unësash uincue-naïd chuïbampanédash Aquidabëdta aton chidon Apodos tantiamequin.

<sup>27</sup> Aden Esuquidistu bēdamboen tantiaſh Epeso yacno yuec tabadquin Esuquidistu Apodosēn chuibanpanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiaſhun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēquid Esuquidistu tantiaquid nec. Ēmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibanpanēdash. <sup>28</sup> Aden chuibanquimbic isadaidbo Esuquidistu tantiesabo icſho iſun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibanpanēdash.

## 19

### *Epeso yacno Pabado abēd icquido tabadaid*

<sup>1</sup> Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa decatocueſenec shubu dadpen icquid Epeso caid yacno choapanēdash. Ambo choshon Esuquidistu tantiaquido iſtuidshun: <sup>2</sup> —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabado.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icſho acten mentondashi —quepanēdash Epeso yacnocquido Pabado chiec.

<sup>4</sup> Adoaquien: —Mibi icſaid ēnta, qeshun abimbo tantiaquidtedi acten mentobanquin, Ēbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquid chiec. <sup>5</sup> Aden chiac, Esuquidistu tantiaquid nebi, quequin Epeso yacnocquidon chuisho tantiaſhun padpiden acten mentomepanēdash. <sup>6-7</sup> Aden aidtedi acten mentoacſho mēdanten Pabado mamishbanac aid doſeted Nuquin Papan aton Mayan menepanēdash. Aden meniac abi onquiacmaidēnquico onquec Nuquin Papa chiec cuēdēmpañēdash Epeso yacnocquido.

<sup>8</sup> Adashic Nuquin Papan chiaid chuibante shubun puduedshun Pabado Nuquin Papabēd tabadaid chuibanpanēdash. Cuembo tantiamenuequin uſhē choaid 3ted nidmequin badiadquidēn-badiadquidēnquien dacuēdenquicoquin Nuquin Papan chiaid Pabado chuibanpanēdash. <sup>9</sup> Aden chuisho tantiaſh pamumēdacimboec tabadquin, Tantiatiapi, quequin utsin-utsinquien chieſhēmēnquicoquin Esuquidistu icſamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh puduanec nidec Tidano cuēmēquidēn chuibante shubu yacno choshon adamboembidi tantiamenuen matsēbēd onquequin Nuquin Papan chiaid chuibanpanēdash. <sup>10</sup> Seta daēd matamequin adomboembi chuibanpanēdash Pabado. Aden chuibanſho tantiaſh nidaneshun chiac nidaid Asia caid yacnocquidon tantiaapanēdash. Adoac isadaidbobēd isadaidpembro Esus tantiaquido yampanēdash. <sup>11</sup> Epeso yacno Pabado tabadsho Nuquin Papan nadatiambocquid icmiacſho <sup>12</sup> Pabado dada cuēſcaſhun dashcute cuēſhē buanſhun daicſaid miſhbanac bēdampanēdash. Adembidi Pabado dada cuēſcabanaidēn nēnquid miſhac bēdampanēdash.

Adembidi pashuaidtsen pamishac bēdanoapanēdash. Adembidi mishac mayan icsa dapuduepanēdash.

<sup>13</sup> Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedēnquo dapuduen —capanēdash. <sup>14</sup> Pabado tanuequido isadaidbo chuiquid Esqueba cuēmēdquidēn mado 7ted icpanēdash. <sup>15</sup> Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tantaranu. Chui <sup>16</sup> —qeshun nebudquin dashcute ched-chedcapamboen mayan icsan cuesactaniaqui shubu nuntanuēsh puduanenec cuempanēdash Esqueban mado. <sup>17</sup> Adec cuesho isquidon chiac Epeso yacnocquid isadaidbobēd isadaidpembo dacuēdcuededpanēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabededpanēdash. <sup>18</sup> Esuquidistu tantiesā icboedi Esuquidistu tantiaquid yanec dacuēdenquo yec Esuquidistu tantiaquido iccuededacno nidshun abi icsaid chuibampanēdash. <sup>19</sup> Adquid dadpeshun icsamenuen ambi ompoquin naid ismenquiochoedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetēdi tantianuen bedash utsitsen icsabudnushe qeshun abitedi tauipanēdash. Aden tauiboed menequin piucquid dadpen bedtsiandac, quepanēdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

<sup>21</sup> Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidiadquio iquebi —quepanēdash Pabado. <sup>22</sup> Aden chiash Asia caid yacno abi tabadquin Masedonia caid yacno abia Timoteyobēda Edasto nidmepanēdash Pabadon.

<sup>23</sup> Aid daēdi nidan Epeso yacno tabadquin Esuquidistu Pabadon chuibanaguēn tantiesabo nēishpanēdash. <sup>24</sup> Adquid Demetedio cuēmēdquid Diana caid bimboecnuc nacnemequid icpanēdash. Aidēmbi ambi nacnemiaid menequin piucquid dadpen bedbampanēdash. <sup>25</sup> Aden Esuquidistu tantianu quesā icquin ambi Dianabimboecnuc nacnenta caidobēda abipadquid Diana nacnemequid utsibo iccuededmeshun Demetediōn nadopanēdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. <sup>26</sup> Aden nanubi nidaid utsi yacnoēsh Pabado cuēmēdquid nēmo choshon utsi comapenen chuibanac Epeso yacnocquid dadpembēdtan nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo iquec, quequin Pabadon chiec. <sup>27</sup> Aden chiac matses dadpeshun tantiaish Dianabimboecnuc nacnenuido icsambo iquec, quetsiash ēbitedi caic. Adecbidi, Dianabimboecnuc nacnenaidbēd abi tabadte shubu uashunaid icsambo iquec, queoapēc. Adecbidi Dianabimboecnuc nacnenaid tiboquesa icsho matsesēn tantienquo ictiadquidi nec, queoapēc Pabado. Aden chiac nidaid Asia yacnocquidon dadpeshun Diana tantiaobedombi padenquo yampec. Aidēmbi tantienquo yanshun aidbimboecnuc nuqui nacnenaid bedenquo iquendac —quepanēdash Demetedio.

<sup>28</sup> Aden chiac ambi chomeboedtedi, Piucquid ěbi menequin ěmbi nacnenaid matsesēn padpiden bedenquo ictsiash, quec nēishash: —Epeso yacnocquidon tantiaid Diana bēdambo iquec —quec comapenec cuēdcuededpanēdash. <sup>29</sup> Adec comapenec cuēdcuededsho tantiaish Epeso yacnocquid utsibo aidobēd cuēdcuededpanēdash. Adec cuēdcuededquin

nidaid Masedonia caid yacnoësh Pabadoëd choboed Cayobëdta Adistadico bedshun iccuededte shubu yacno cuëdcuededquidon buampanëdash. <sup>30</sup> Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidaida —capanëdash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuiapanëdash.

<sup>32</sup> Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquo yec tabadpanëdash. <sup>33</sup> Adnubien, Nuqui tantiacpadomboen chuitan, quequin isadaidbon Adecandedo cuëmëdquid nënantanquo tsicunepanëdash. Aden tsicunquien nidtoash: —Tantia. Chuiun —quequin <sup>34</sup> daëdpactsëc chiec onquesho tantiash onqueboedi ënëdash tabadnubi: —Isadaidbo aid nec —qesho tantiash: —Epeso yacnocquidon Diana cain ambi tantiaidbimboecnuc nacnenaid bëdambo iquec —quec baded-badedquiec cuëdcuededpanëdash.

<sup>35</sup> Adec cuëdcuededshobien Epeso yacnocquidon naden nata quequin chaid dada uaquidën ënëdmenuequin nadopanëdash: —Epeso yacnocquidon tantia. Chuiun. Diana caidbimboecquid abucuësh paëdaidbimboecnuc nacnenaid nuqui comapenen tantiaidbëdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda. <sup>37</sup> Dada daëd mimbi nëmbo bëboed Diana caidën shubun puduedambocosh. Adembidi ampiambo iccosh. Adecbidi, Diana caid chiec icsamboec onquenguiocosh. <sup>38</sup> Adenquo icnuc Demetediobëd icquido abi chushquiaid chuiunec Epeso yacnocquidon naden nata quequin chiaid tantiaquid yacno nidshun <sup>39</sup> mimbi tantiacpaden chuita cuëdcuededenquiocquin. <sup>40</sup> Comapenec cuëdcuededec qesho tantiash ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquo iqueque. Cuëdcuededquido chome, nuqui catsiash. Aden chomiac ¿atotsi nuqui chuipe? <sup>41</sup> Aidën nuqui chomenushe quiash min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac Demetediobëd iccuededquido nidanepanëdash.

## 20

*Masedonia yacnocquido isbidanec nidequi Quedesia yacnocquido isbidanec nidaid*

<sup>1</sup> Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. <sup>2</sup> Auëshquo puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. <sup>3</sup> Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiashun: —Ambo nidacsho mibi cuesunenuequin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëditd icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic,



Timoteyo cuëmédquid, utsibic Tiquico cuëmédquid, utsibic Tedopimo cuëmédquid. Aidedi icpondash. <sup>5</sup> Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidedi nidan pan nami uainquioctequid pete ushëtedi tantiëc tabadanec Pababòdè cano antabédtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pababòdè icquido tabadoapondash.

### *Eyutico unësascho uincuemiaid*

<sup>7</sup> Todoas caid yacno tabadequi dominco ushën Esuquidistu tantiaquidobèd iccuededquin Pababòdè icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquiec. <sup>8</sup> Aid onquiacono shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nëbi caniaid, Eyutico cuëmédquid, iste shëcuë yacno tsadec ushcasmash ushtotanec abucuësh paèdpondash. Adec paèdsho isash budbudshun unësascho isbedednubien <sup>10</sup> Pabadotsen budquin dayumbudec: — Unësboedi abi tiboquianeque. Shubicuededenda —quepondash. <sup>11</sup> Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibèd onquecuededpondash badiadbudtsëcquiec. Adec badiadbudbon Pababòdè icquido shubu nuntanuësh puduem-puduenubien <sup>12</sup> paèdboed aton shubuno utsibobèd nidpondash bédambo yec.

### *Todoas yacnoësh puduanec Mideto yacno chote*

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abèd capuquid utsibobèd puduanec nidequi cano antabédtoanec Ason yacno nidoapondabi. <sup>14</sup> Adec nidequi Ason yacno choshon istuidac Pabado ëbèdi cano antabédtoanquin potiash shubu dadpen icquid Mitidene caid yacno choapondash. <sup>15</sup> Auëshquio puduanec nidec badiadash acte nënantan nidaid nacdèdquid Quio caid datambidanec nidash badiadash acte nënantan nidaid nacdèdquid utsi Samos caid datambidanec shubu dadpen icquid Mideto caid yacno choapondash. <sup>16</sup> Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmequiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

### *Epeso yacnocquido tsusiobo Pabaton chuibanaid*

<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabaton chomepondash. <sup>18</sup> Aden chomeshun naden aido chuipondash: —Chiembique. Tantiata. Èbi ènden nidaid Asia caid yacno choash mibèd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta capaden ëbi bunaid tantienquiocquin ambi chiaid mibitedi chuibanondambi. Tantiessa icsho isash shubiquiondabi. <sup>20</sup> Esuquidistu mibitedi bédamboen tantiamenuen matses dadpen iccuededacnoshon chuibanondambi. Adem-bidi shubu utsin-utsinquec puduedcuenequin chuibanondambi. <sup>21</sup> Nuquin

Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanën ëbi naden chuided-quequiddec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. <sup>24</sup> Aden Nuquin Papan Mayanën chuisho tantiasihi, Èbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papanëd tabadte iquec, quequin chuibanembi.

<sup>25</sup> “Nëshunquio Nuquin Papan chiaid ëmbi chuibansho mibitedishun tantibenondaidon nëuëshquio ëbi nidacsho mimbi isoainquio iquendac. <sup>26</sup> Èmbi nëshunquio Esuquidistu mibitedi chuibanac, Esuquidistu chiamo iccoshi, quetiapimbo mibitedi iquendac. <sup>27</sup> Tantienuioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabad-nüshe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unëspanëdash. <sup>29</sup> Èbi nidan abimbo chiacbimboen chuiquid Esuquidistu tantiaquido chuiquid icnuec choendac. <sup>30</sup> Adembidi mibëdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. <sup>31</sup> Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chiec shubiondabi.

<sup>32</sup> “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. <sup>33</sup> Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. <sup>34</sup> Èmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ëbëd capuquido menebanondambi. <sup>35</sup> Adembidi chonoadshun aton na bedshun natiapimboçquid meneta, quequin mibitedi ismebanondambi. Nuquin Icho Esuquidistu nidaidën tabadec nadpanëdash: ‘Utsin natiapimboçsho menequid Nuquin Papan bëdambo iquebi camiaid nendac. Nabanenquio yec bedshumënuquidquio icsho Nuquin Papan bëdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

<sup>36</sup> Aden chiashic Pabado Nuquin Papa chuinuec utsibobëd danëshën seabducuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. <sup>38</sup> Èbi padpiden mimbi isoainquio iquendac, Pabado quesho tantias shubicuededpondash. Adec shubiquin dayumbudash unësquio yec Epeso yacnocquido tsusiobo Pabodobëd cano yacno nidanepondash.

## 21

*Edusaden yacno Pabado nidoaid*

<sup>1</sup> Epeso yacnoçquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiaş acte nënantan nidaid nacnëdquid Cos caid yacno choapondash. Badiadnuc auëşquio puduanec nidec acte nënantan nidaid nacnëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash.

<sup>2</sup> Ambo choashic nidaid Penisia caid yacno cano dapa utsin nidnuequid istu-idash antabëdtoanec Pabadobëd capuquido nidoapondash. <sup>3</sup> Adec nidquimbi acte nënantan nidaid nacnëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. <sup>4</sup> Aden buan-buanubi Esuquidistu tantiaquido yacno nidanec puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cuesunenuequiv iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash.

<sup>5</sup> Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. <sup>6</sup> Adec Nuquin Papa chiec onqeshun, Nidec nid, cac Pabadobëd icquido cano antabëdtoanubien Tido yacnoëş acte cuëmano choboedo aton shubuno nidaneoapondash.

<sup>7</sup> Adec cano antabëdtoanec auëşquio nidec shubu dadpen icquid Tode-maida yacno choash Pabadobëd capuquido tabadtuidpondash. <sup>8</sup> Adec anocquidobëd tabadec badiadash caño antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. <sup>9</sup> Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebëd yuec tabadnubi Nuquin Papan naden nanun chi-aid chuiquid utsi Accabo cuëmëdquid nidaid Udeya yacnoëş chopondash.

<sup>11</sup> Adec choshon Pabaton tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

<sup>12</sup> Aden Accabon chuisho tantiaş shubiquin Pabadobëd choboedon Uedipen shubun icquidobëdan, Edusaden yacno nidenda, quequin Pabado chuiopondash. <sup>13</sup> Adoaquien: —¿Atotsi canuen shubiquin ëbi icambo icme? Edusaden yacno nidshun Nuquin Icho Esuquidistu chuibanşo ëbi taneshun unës uatsiaş, quequin tantiaquin abi Esuquidistu chuibanuna —quepondash Pabado. <sup>14</sup> Adoaquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiaşhun: —Ma Nuquin Icho bunacpadec nidpau-na —capondash.

<sup>15</sup> Aden chiashic Sesadeya yacnoëş puduanec Edusaden yacno Pabadobëd capuquido nidoapondash. <sup>16</sup> Adec nidşo isash Sesadeya yacnoçquid Esuquidistu tantiaquid utsi-utsiec Pabadobëd nidquin Menason cuëmëdquidënen shubu yacno buanac puduedpondash. Aid shubu icbo Chipide yacnoëş choash Edusaden yacno tabadquid Esuquidistu tantiaquenquidbidi nepondash.

*Pabadon Acobo isaid*

<sup>17</sup> Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. <sup>18</sup> Aden yuedac tabadash badiadash Acobo isec nidoapondash. Acobobëd Esuquidistu tantiaquido tsu-siobotedi icpondash. <sup>19</sup> Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. <sup>22</sup> Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquo icmenuequid ?Atotsi nuqui napeba? <sup>23</sup> Naden nac bëdambo ictsiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquiec iquec. <sup>24</sup> Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacenuequid piucquid menembi,” quepondac. Nëmbobobi Edusaden yacno mibi choaac. Nëid dadatedibëd Nuquin Papa tabadte shubu uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquo Pabado nec, quequin tantiatsiash. <sup>25</sup> Ëmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nëidtedictsëqui mimbi natequid nendac. Nëidic, Nuquin Papan uaidbimboecnuc nacenaid tantiaquidon pete sanaid penda; adembidi, min chiduidtsëqui chudta; adembidi chidon min bënëuidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiaccted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

*Pabado bedaid*

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: <sup>28</sup> —Isadaidbotedishun tantiata. Nëidëmbi Nuquin Papa tabadte shubu uashunaidën puduedtemaid isadaidpembo yuedquin nëid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash. <sup>29</sup> Epeso yacnoësh choquid isadaidpembo Tëdopimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinqec cho-choshon Pabado bedshun nimanuc buanuc buanac Nuquin Papa tabadte shubu uashunaid isquidon shëcuë bëtashpondash. <sup>31</sup> Aden Pabado buanec, Cuesunenu, quec cuëdcuededsho tantiashun chuitanac <sup>32</sup> abi chuiquidbëd sondado cho-chosho isun Pabado cuesbededquin isadaidbon ëmpondash.

<sup>33</sup> Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemiash: —¿Tsutsi nëid nepec? ¿Atotsi icamboen naosh? —quepondash sondado chuiquid. <sup>34</sup> Adoaquien icuededquid utsi-utsitsëcquien chiec onquecuedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid<sup>1</sup> —quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi cuëdcuededquidon tsuscuededtsëcquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

### *Ambi nabanaid icuededquido Pabadon chiaid*

<sup>37</sup> Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne?

<sup>38</sup> Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi.

<sup>39</sup> Adoaquien: —Isadaidbo nebi. Nidaid Sidisia caid shubu dadpen icquid Tado caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquio tabad, quequin ismequin Pabadon mëdante uic-uiccapondash. Aden nasho isash isadaidbo otacquio tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

## 22

<sup>1</sup> —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquio tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tado caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chidë chedo bedmeshun mëyamequin quënën nauedmeshun unës uamepondambi. <sup>5</sup> Ëmbi adobanquin naondaïd tsusio dapatedishun tantiec. Adondash, quequin chuitiadquio icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmënu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushë abuctoan Damasco caid aoentsëqui choshobi abucuësh shocosh tabote dapa bed-bedquiacbimboec chënquequin dëcatepondashi.

<sup>7</sup> Adec chënquequin dëcatiatic nidaïdën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudö? Ëbi chui. Tantanu,’ capondashi.

<sup>8</sup> “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaid mimbi mëyanaid Esus nebi,’ capondashi.

<sup>9</sup> “Adnubic ëbëd icquidon shocosh bed-bedquiacbimboec chënquesho isequi con Icbon chuisho tantienquio yec tabadpondash.

<sup>10</sup> “Aden dëcatiac uequin ëmbentsëqui tantiec: ‘¿Atotsimbi nape, Icbó?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoaquini nidtoquin shocosh bed-bedquiacbimboec chënquequidën bëshuacsho isun ëbëd icquidon mëdinanquin Damasco yacno buampondashi.

<sup>12</sup> “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash.

<sup>13</sup> “Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

<sup>14</sup> “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismëndac. Aidën chuisho mimbi tantiendac. <sup>15</sup> Aden aid isquin tantiaishun utsi-utsien dadpen mimbi isaidbëdta mimbi tantiaid mimbi chuibenendac,’ quequin <sup>16</sup> chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacbimboen utsibo ismenuen acten mentometa,’ capondashi Ananiasën.

<sup>17</sup> “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacbimboec tsadpondabi. <sup>18</sup> Adec tsadquimbi Nuquin Icbó ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuipondashi.

<sup>19</sup> “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsiutsien comapenen mëyamiondambi. <sup>20</sup> Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icbó chiec.

<sup>21</sup> “Adoaquini Nuquin Icbon: ‘Isadaidpemo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

### *Pabado cuestsenaid*

<sup>22</sup> Pabado ambi nabanaid chuibansho tantiec iccuededquido otacquo tabadboed, Isadaidpemo, quec Pabado onquesho tantiaish: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

<sup>23</sup> Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabado chuiboed tantiatemaid nec, quequin ismequin. <sup>24</sup> Adnubien, Cuesunenushë shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmboenoc cuesta, quequin sondado chuiquidën chuipondash. <sup>25</sup> Adoaquien cuate nidtsinacno Pabado

buanshun cuestebēdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidēnshun tishaid icsho ěmbi naid chuimiabida ěbi cuese? —quepondash Pabado sondado chuiquid chiec.

<sup>26</sup> Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bēboed: “Domanobon nidaidēnshun tishaid nebi,” quiosh —quepondash sondado chuiquid comandante chiec.

<sup>27</sup> Adoaquien Pabado yacno nidshun comandanten: —¿Domanobon nidaidēnshun tishaidta mibi nepe? —capondash Pabado chuiquin.

Adoaquien: —Ai, domanobon nidaidēnshun tishaidquio nebi —quepondash Pabado.

<sup>28</sup> Adoaquien: —Domanobon nidaidēnshun tishaidpenquio ěbi icsho, ¿ada adquid ěbi icmetsia? quequin piucquid meniendambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

<sup>29</sup> Aden Pabaton chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucn mētanemechitombi, quequin tantiec comandante dacuēdpondash.

### *Isadaidbo tsusiobo iccuededacno Pabado buanaid*

<sup>30</sup> Adshumbic, badiadshun ambi mētanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nēid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno pūduedmeshun nēnantanquio Pabado niddomepondash.

## 23

<sup>1</sup> Aden niddomiaquien isadaidbo tsusiouidi comapenen isec: —Utsibo, ěmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniōbi —quepondash Pabado.

<sup>2</sup> Aden chuisho tantiashun: —Muaquin chieque. Ęccues —Isadaidbo tsusio dapan Ananiasēn cac Pabaton dayunquio icquidēn Pabado ěccuespondash.

<sup>3</sup> Aden ěccuesaquien Pabado: —Mibi icsaid nibēdacbimboec mibibi tsadsho Nuquin Papan mibi ěccuesmendac. Nuquin Papan naden nata quequin chiaid tantiemi, quequimbi ěbi ěccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

<sup>4</sup> Aden Pabaton chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiash dacuēdenquioda ique? —quepondash.

<sup>5</sup> Adoaquien: —Ěmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquio icsho ěmbi chuibocpaden chienquio ictsenombi. Mimbi abimbo chioc. Ěmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ěbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ěbi mimbi chiec —quepondash Pabado iccuededquido caic.

<sup>7</sup> Aden Pabaton chiaquien saduseyobo, Uincuenta nibēdendac, quequin ěmbi

tantiacpaden Pabadon tantienquoiquec, quec comapenec onquecuedednubi padiseyobo, Uincuenta iquendac, quequin èmbi tantiacpaden Pabadon tantiec, quec comapenec onquecuededpondash. <sup>8</sup> Unèsash uincuentaquid nibèdec, quec saduseyobo. Adecbidi, Nuquin Papan uaid mayan bédabèd ambi uaid utsi mayan nibèdec, queoaic saduseyobo. Padiseyobo, Uincuentaquid quec, quec. Adecbidi Nuquin Papan uaid mayan bèda, ambi uaid utsi mayambidi iquec, queoaic.

<sup>9</sup> Aden ambi tantiacpaden chuibanec comapenec onquec saduseyobobèd padiseyobo natiambo cuèdcuededpondash. Adec onquec cuèdcuedednubi padiseyobo, Nèid dada bédambocquid nec. ¿Mayanèn chioshi, queshodambi muc nec capadi? Adecbidi, ¿Nuquin Papan uaid mayan bédan chioshi, queshodambi muc nec caopadi? Padenquoiquec. Pabadon chuiboed abimbo iquec, quepondash padiseyobo saduseyobo caic. <sup>10</sup> Adec comapenec onquec natiambo chushcanasho tantiashun comandanten: —Podon shoyonquin canite dèchicnushe queshun mènchicshun shubu nuntan bēoata —cac sondadon Pabado mènchicpondash.

<sup>11</sup> Aden mènchicshun shubu nuntan sondadon yuedaquien Pabado ushash badiadash padpidec inchèshèn Pabado ushnubi Nuquin Icho chopondash: —Mimbi Edusaden yacnoshon èbi chuibanacpaden shubu dadpen icquid Doma caid yacnoshontsen mibi chuibamembique. Dacuèdenquoiquec dayacquoiquec icta —capondash Nuquin Icbon Pabado chuiquin.

### *Pabado cuesunenu quequin ompoquin cainaid*

<sup>12-13</sup> Adec Pabadobèd Nuquin Icho onquebombien badiadash isadaidbo 40ted Pabado cuesuniabi icquid buna mèmunembi, quequin abimbo chiembi, quepondash. <sup>14</sup> Aden nanu quish isadaidbo tsusiobo yacno nidash: —Pabado cuesuniabi icquid buna mèmunembi, quequin muenquiocquin chuibanombi.

<sup>15</sup> Èbitedishun ompoquin Pabado cuesunenuquequin cainubien mimbi comandante chuitanta caid naden chuimeta: Pabadon naid bédamboen tantianuna. ¿Ada padpiden isadaidbo tsusiobo iccuedede shubuno bēmeoatsia? quequin chuitan Pabado bēmeoatsiashe. Aden Pabado sondadon bēsho Pabado cuesunenu —quepondash Pabado cuesunenuquido isadaidbo tsusiobo caic.

<sup>16</sup> Aden aidon chuishobien Pabadon piaquèn tantiashun Pabado yacno nidshun chuiopondash aton piaquèn.

<sup>17</sup> Adoquien Pabadon sondado 100ted chuiquid cho, cata cac nidshun aton piaquèn chiac Pabado yacno sondado chuiquid chopondash. Adec chosho isun: —Nèid con piac nec. Aidi comandante chuite buneque. Aid yacno buanta —Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quènèn nauedboed Pabado cuèmdquidèn èbi chomeshun: “Con piac comandante chuite buneque. Aid yacno buanta,” cac bēombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mēdinanquin udictsèc buanash comandante: —¿Atotsi èbi chuinuec chō? —quepondash comandante.

<sup>20</sup> Adoquien Pabadon piac: —Badiadshun isadaidbon ambi namiaid mibi yacno chomec. Aden chomiac nēmbo choshon naden chiec: “¿Ada isadaidbo tsusiobo iccuedede shubuno Pabado mimbi bēoapatsia? Aidèn naid chuibanasho bédamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. <sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiashe, quequin tantiashun Pabado con cu cuesunenuquequin caineque. Nidmenda. Con cu cuesunenuquid: “Pabado cuesuniabi icquid buna



mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadoñ piac comandante chiec.

<sup>22</sup> Adoquien comandanten: —Isadaidbon chiaid mimbi chuiboed utsi chienquio yec nidec nid —capondash Pabadoñ piac chuiquin. <sup>23</sup> Aden Pabadoñ piac nidmeshun sondado 100ted icquido chuiquid daëd chomiash comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiyoata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiyoata. <sup>24</sup> Adembidi Pabadoñ icquido cobednadod Pediques yacno buanuc cabayo nacnenta —capondash comandanten sondado 100ted chuiquid daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin: <sup>26</sup> “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. <sup>27</sup> Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiaishun sondado dadpembëd choquin mënichiccombi. <sup>28</sup> Aden mënichicshumbic, ¿Atotsieshun Pabado cuesunëte bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambí nabanaid Pabadoñ chuisho tantiaishun quënën nauedenquioctiadquidi nauedmepondash, quequin tantiaishumbi quënën nauedmeoapombi. <sup>30</sup> Aden Pabado quënën nauedmeoashumbic, Podqued cuëmanshun Pabado cuesunenuquin isadaidbon cainec, quesho tantiaishun badedquio mibi yacno buamiombi. Adembidi, Pabado icsambocquid nec, quequin aid cuesunenuquido mibi yacno nidmembali. Adoac ma ambibi Pabadoñ naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadoñëdta nëid cobednadod Pediques menenuen buanta —capondash comandanten.

<sup>31</sup> Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuidquio Pabado buanec nidnubi sondado utsitedi aubidi nida-neoapondash. <sup>33</sup> Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

<sup>35</sup> Adoquien: —Mibi icsambocquid nec, quequin chuiquido isadaidbo choacsho mimbi nabanaid chuimembali —quepondash Pediques Pabado chiec. Aden chiec onqueshumbic ënden chuquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuesushe ista —capondash sondado chuiquin.

## 24

*Pediquesën tantianubi Pabado ambi naid chiaid*

<sup>1</sup> Adashic, 5tedec ushash isadaidbo tsusio dapa Ananiasbëd tsusio ut-sibo Pabado icsaid Pediques chuineuc Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. <sup>2</sup> Aido chosho isun Pediquesën Pabado chorniacsho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tantia. Chuiquid bëdamboquid icquin mimbi bëdamboen nabanac isadaidbo bëdamboec tabadec. <sup>3</sup> Mimbi aden nabansho isun, Bëdamboquid mibi nec, quequin mibi chiemi. <sup>4</sup> Aden chuishun mibi chieshmenquiocnequid isadaidbon chushcaboed badedquio chuinu. Tantiata.

<sup>5</sup> “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcedemiac cuëshëd-cuëshëdposh. <sup>6</sup> Aidëmbi Nuquin Papa tabadete shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuëmëdquid choshon Pabado mënchicanquin buamposh. <sup>8</sup> Pabado ambi naid chuisho mimbibi tantiasun, Isadaidbo tsusiobon abimbo chiosh. Icsamboquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsamboquid nec, Pediques camenuc.

<sup>9</sup> Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

<sup>10</sup> Adsho tantiasun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantia. Èmbitsen chuinu. Dadpen seta matamequin con matses isadaidbo abi chushquiaid tantiasun mimbi bëdamboen tantiacpaden namedenioc. Adquid mibi nec, quequin tantiaquin, Èmbi naid chuibanec bëdambo iquebi, quec dacuëdenquio yec onquebique. Tantiata. <sup>11</sup> Edusaden yacno choash ambobi 12tedec ushobi. Èbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. <sup>12</sup> Ambo puduedash utsibëd chushcananenuio yec tabadsho istuidash, Icsamboquid nec, queposh. Adembidi chuibanquin utsibo nëishmequin chushcamenquio iccombi. Pabado icsamboquid nec, quequido Pabado chiaid abimbo iquec, quetiadquidi nec. <sup>13</sup> Èmbi naid Tedtudon chuibanboed, Abimbo iquec, quetiapimbo iquec tsusiobo. <sup>14</sup> Nëiduidtsëqui abimbo iquec. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi. <sup>15</sup> Adembidi, matses unësascho Nuquin Papan uincueniac abi tantiaquid abëdi tabadnubi abi tantiesa chian anëdënnequid nësecaindac, quequin tantiemi isadaidbo tsusiobon tantiacpadembi. <sup>16</sup> Aden tantiaquin Nuquin Papan, Bëdamboen mimbi naoc, capashuni, quequin bëdamboen nabanec tabadec nebi. Adembidi, matstedishun, Bëdamboen mimbi naoc, capashuni, quequin adomboembidi bëdamboen nabanec tabadec nebi.

<sup>17</sup> “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiasun piucquid

menenuec choapobi. Adembidi, Nuquin Papan bēdamboen dayun uabeniōshi, quequin piucquid menenuec choapobi. <sup>18</sup> Aden menenuec abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. <sup>19</sup> Ēbi capusho istuidquido isadaidbo nidaid Asia caid yacnoēsh choquido nioš. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. <sup>20</sup> Adembidi isadaidbo tsusiobon: ‘Padiseyobo yec bēdamboecquid nec,’ quequin ēbi anoshon chiacpadembidi nēshuntsen adomboembidi chuiotiadquidi nechitec. <sup>21</sup> Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsamboecquid nec, quequin isadaidbo tsusiobon ēbi mibi chiec caimbi —quepondash Pabado Pediques chiec.

<sup>22</sup> Aden Pabadon chuisho tantiash Pediques tantiauidquid iquec: —Nēbi mimbi aitedquio chuibansho tantiembi. Comandante Disias nēmo choan mibi padpiden chuimembi —quepondash Pediques Pabado chiec. <sup>23</sup> Aden chuishumbic naden Pediquesēn sondado chuipondash: —Shubuno Pabado buanshun puduednushe queshun ista. Abi menenuequid abi isnuequid chedo choso isun yuedta —quepondash Pediques ambi Pabado ista caid chiec.

<sup>24</sup> Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabadon chuibanac Pediquesēn tantiauidpondash. <sup>25</sup> Aden chuibanquin Pediques Pabadon nadopondash: Ūtsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuiopondash Pabadon. Adembidi, Esuquidistu tantienquo icsho chian anēdnequid Nuquin Papan nēsecanushe quequin Esuquidistu tantiata, quequin Pabadon chuiopondash. Aden Pabadon chuisho tantiash: —Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid —cac Pabado nidpondash. <sup>26</sup> Adshumbic, adembidi abi yacno Pabado Pediquesēn bēmeded-bēmededpondash. Nidtiadquio icquin piucquid Pabadon ēbi menetsiash, quequin tantiaquin Pabado bēmiash aibdēd Pediques onquepondash.

<sup>27</sup> Adashic, seta daēd matamiash Podsio Pesto cuēmēdquid cobednadod yampondash. Aidi cobednadod yanac nidnuequin, Nidta, cainquiocquin Pediquesēn Pabado shubu nuntan niampondash naden tantiaquin: Pabado shubun nauedshun ēmbi niansho isash, Bēdamboecquid nec, quequin isadaidbon ēbi cain chuibededpec, quequin Pediquesēn Pabado shubun nauedshun niampondash.

## 25

### *Pabadon ambi naid Peston chuimaid*

<sup>1</sup> Pesto cobednadod yanash Sesadeya yacno choash 3tedec ushanec Edu-saden yacno nidpondash. <sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido: <sup>3</sup> —¿Ēbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenuquidon cainshun cuesunepec, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. <sup>5</sup> Pabadon icsamboen naosh, quec utsi-utsiec ēbēdi

nidshun anoshon Pabado naid icsa ëbi chuita —quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapen tsadtoshon Peston Pabado bëmepondash isadaidbo tabadnubi. <sup>7</sup> Aden bëmiacsho isash Pabado dëcatec isadaidbo Edusaden yacnoësh choboedo Pabado naid chiec abimbo chiacbimboec onquecuedepondash.

<sup>8</sup> Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

<sup>9</sup> Adoaquien: —¿Edusaden yacno buanec anoshon adomboembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. <sup>10</sup> Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnoquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabado chiec, quequin mimbi tantiec. <sup>11</sup> Icsambocquidquio iquec Pabado unës uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenec, Empedadod ëmbi naid chuite bunebi, quequin dada uaindambi —quepondash Pabado Pesto chiec.

<sup>12</sup> Aden Pabado chuisho tantiash Pesto udictsëc nidash abipadquidbëd onquish choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

### *¿Atotsimbi Pabado napatsia? quequin Peston Aquidipa caid*

<sup>13</sup> Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnoquido cobednadod Pesto yanosh, quequin chiac aid isec chopondash.

<sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. <sup>15</sup> Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

<sup>16</sup> “Adoaquien, Mibi abëdi chushquiaid Pabadontsen chiamoocnoc unës uata quetiapimbo iquebi. Domanobon naden nata quequin chiacpadenquioocquin adotiapimbo iquebi, quequin isadaidbo tsusiobo chiombi.

<sup>17</sup> Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. <sup>18</sup> Aden Pabado bëmiacsho ëmbi tantiacpaden abi chushcaquidon Pabado naid chienquiocpash.

<sup>19</sup> Ëmbi tantiaidpenquio Esuquidistu unësash uincuenaid Pabado tantiaid icsambo iquec, quequin chuiposhi isadaidbo tsusiobon. <sup>20</sup> Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. <sup>21</sup> Adoaquien:

‘Empedadod, Sesad yacno nidshun ëmbi naid chuitiadquio iquebi,’ quepesh Pabado. Aden chiac quënë yacnoshon aid puduedmetiapimbo icobi. Nëmbobi Pabado quënën tabadec —quepondash Pesto Pabado chiec Aquidipa tantiamenuquin.

<sup>22</sup> Adoaquien Aquidipa: —Ëbi aidën chuibansho tantiate bunebi — quepondash.

Adoaquien Pesto: —Badiadshun aidëmbi chuisho mimbi tantiendac — quepondash.

### *Aquidipa ambi naid Pabodon chiaid*

<sup>23</sup> Aden Peston chiaquien badiadash bëdaidquio dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. <sup>24</sup> Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioishi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi. <sup>25</sup> Aden chuisho tantiashun nëid ambi naid chuimeoapombi. Aden Pabodon chiaidtsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabodon chuiposhi. Adoac Doma yacno aidi buamenuna. <sup>26</sup> Aden buamenuen zatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. <sup>27</sup> Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

## 26

<sup>1</sup> Aden Peston chiaquien: —Mibibi onquequin mimbi naid chui. Tantianu —quepondash Aquidipa Pabado caic.

<sup>2</sup> Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi.

<sup>3</sup> Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

<sup>4</sup> “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. <sup>5</sup> Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitadquidi nec. <sup>6</sup> Unësash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo.

<sup>7</sup> Nuquin tsusedpa Acobo isadaid caidën madobon tsyuecquidon, Unësacsho Nuquin Papan uincuemetete iquendac, quequin chiaid tantiaquin caimbudec. Aidon cainacpaden cainembi, quesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquid uincuemetete chiaid mimbi tantienquio icpe.

<sup>9</sup> “Ënden ëmbitsen tantiauidquid shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, queshun adobampondambi. <sup>10</sup> Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdambocquid icsho bedshun quënën nauedmepondambi. Unës uanu, quesho tantiaid, Ai, unës uatiadquio iqueque. Adota, quepondabi. <sup>11</sup> Nuquin Papan chiaid chuibante shubu utsi-utsiec yacno nidtednidtedondabi aido mëyamenuc. Esus, Nuquin Papan madopenquio nec, aido

camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

12 “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. 13 Adec nidquimbi ushë cuembo yanec ushë comapanec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuiu. Ancanquid dapan tantiata. 14 Aidën dëcatiac ëbitedi nidaidën uebudcuedondabi. Adec uequimbi con matsesën onqueten ebedeyon onqueten abucüesh onquesho naden tantiondambi: Saudo, çatotsieshun ëbi tantiaquido mimi mëyampe? Èbitsen mëyantiadpambocquin mimi aido mëyanec, quec onquequin chiondashi.

15 “Adoaquimbi: ‘çTtsutsi mibi ne, Icho?’ caondac.

“Adoaquien, Mimi mëyanaid Esus nebi. 16 Èmbi namiaid mibi icmenuec chobi. Esus isombi, quequin çëbi chuibeneta caid nëbi mibi yanec? Èbi chuibenequin mimi isaidbëdta ëmbi yuecshun ismetequid chuibeneta. 17 Aden ëbi chuisho mibi cuesunete bunquid isadaidbobëd Isadaidpembo icsho mibi mënchiquendambi. Adquid chuibanta, quequin mibi nidmimbi. 18 Aden chuibanac utsin-utsinquien pashuacimboeboedëmbi tantiendac. Icsambocquid nebi, quequin tantienquicoeodi, Icsaobique. Èbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ëbi tantiaquid utsibëd iquendac, quequin Esusën chuipondashi.

19 “Aid abucüesh onquesho tantiashun chieshenquiocquin chuibenimbi caimbi, mibi chuiquin Aquidipa. 20 Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanooandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiapaden nabanta, quequin chiombi. 21 Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bëdshun cuesunetsenoshi. 22 Padnuen ëbi dayun uaquid Nuquin Papa icquin isadaidbon cuesunenushe queshun cudasëmposhi. Adoac nëid ushënquio mibëdtabi mimi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. 23 Nuquin Papan Chomiaid, Quidistu, mëyanec unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadeç chopanëdash —quepondash Pabado iccuedquido chieç.

24 Adec Pabado onquesho tantiash: —Min tantiata icsabudash mibi onquec. Mimi tantiaid dadpen iquec tantienquio yec onquechitequien mibi nec —quepondash Pesto Pabado caic.

25 Adoaquien Pabado: —Bëdamboen tantiec onquebi. Èmbi chiaid abimbo iquec, caimbi mibi ancaquid Pesto. 26 Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiembi. Èmbi chuibamboed ompoenquiocquin isquidon chuisho aidëmbi tantiapondash. 27 Nuquin Papan ambi naden nanun chiaid dada uamiampidon chiaid chuisho mimi tantiec —capondash Pabado Aquidipa chuiquin.

<sup>28</sup> Adoquien Aquidipa: —¿Mimbi chuiboedtedtsëqui tantiashtabi Esquidistu tantiaquid yampe? —quepondash Aquidipa Pabado chiec.

<sup>29</sup> Adoquien Pabado: —Esuquidistu tantiaquid ëbipadquid mibëd icuededquidtedibi Nuquin Papan icmepashun. Nëid ushënquo daëdpactsëc chiombi. Aidtedtsëqui chiac tantiatipimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

<sup>30</sup> Aden Pabado chuibanaquien ancanquid Aquidipa nidtopondash. Nid-tosho isash Pestobëd Bedenise iccuededquid utsibo chedo nidtocuededpondash. <sup>31</sup> Adec nidtocuededash puduenash onquecuededec: —Chuibaamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

<sup>32</sup> Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

## 27

### *Doma yacno Pabado buanaid*

<sup>1</sup> Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash.

<sup>2</sup> Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

<sup>3</sup> Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash. <sup>4</sup> Adshumbic Sidon caid yacnoësh puduanec nidquin potesho cunquequidën bëquedtuidac ushë choacmi cuenadtanquin acte nënantan nidaid nactnëdquid Chipide caid datampondash.

<sup>5</sup> Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. <sup>7</sup> Adec Mida yacnoësh puduanash nidquin potec dadpen ushacsho cunquequidën cano bëquedtuidpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactnëdquid Quideta caid yacno buanoapondash. Uquë cuëma utsiuc Sadmon caid icpondash.

<sup>8</sup> Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

<sup>9</sup> Cunquequidën bëquedac yuenquo potiactanetsëcquien buampondash. Comapenec cunquequidën nuqui bëquedendac, quequin tantiaquin Pabado nadopondash: <sup>10</sup> —Chuinu. Tantiata. Nëuëshquo puduanquin potesho

cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. <sup>11</sup> Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. <sup>12</sup> Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

*Acte dapa potesho cunquequid dapanquio cano bëquedte*

<sup>13</sup> Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. <sup>14</sup> Adec nidequi uidictsëc yanshobi ushë cho-choaid ëquëctscshun Quideta caid nidaid mananucüesh cunquequid dapa choquin bëquedtuiddquin <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidën buanaqui acte nënantan nidaid nacrëdquid utsimpi Quëdauda caid ëquëbictscëc cuenadquimbi canompi cano dapan nëshun buanaid buanashe qeshun anandopondash. <sup>17</sup> Aden canompi anandoshon cano dapa canchednushe qeshun uidën uaquin datanebanshumbic cano buante dashcute abi decante cuestebëdtabi imbudshun dashcute chicacsho cunquequidën cano comapenen buampondash. <sup>18</sup> Aden cano cunquequid dapan buanui badiadnuc acte natiambo tëccoasqesho isun ambi ansandoshon bëboed acte nësiapondash. <sup>19</sup> Adshumbic 3tedec ushun bucu dëneshun cano dashcute indotetedi nësiaoapondash. <sup>20</sup> Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adembidi badiadën ushë isenquio iccondambi. Dadpen ushqin aidtedi isenquiocondambi. Aished isenquiocnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quecuededpondash.

<sup>21</sup> Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienuio yec mibi puduampoc. Èmbi chiacpaden nabanuc mimi ansandaiddedi abi ictsiandac. Adecbidi, Unësebi, quenquio nuqui ictsiandac. <sup>22</sup> Padnuen acte tëccoasquenubi nuquitedi unësenquio iqueque. Dacuëdenquio yec dayacquio icta. Canouidi canched-canchedendac. <sup>23</sup> Nuquin Papan namiaidquio nebi. Adquid icsho inchëshën ambi uaidën mayan bëdan ambi chomiaidën naden chiohi: <sup>24</sup> “Ancanquid dapa, empedadod caid mates chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquio yec tabad,” caposhi Nuquin Papan uaid mayan bëdan. <sup>25</sup> Aden aidën chiac dayacquio icta. Nuquin Papa ambi chiacpaden nabanquid nec, quequin tantiembi. <sup>26</sup> Adembidi, acte tëccoasquequidën nuqui acte nënantan nidaid nacrëdquid cuëmamo buanshun cano cancheshunendac, quequin tantiombi —quepondash Pabado canon antabëdtoaido chiech.

*Cano canched-canchedaid*

<sup>27</sup> Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tëccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. <sup>28</sup> Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun



pumbudquin tampondash. Aden tanshun, Aidtiompenquo iquec, quequin chuipondash. <sup>29</sup> Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiash tabadpondash. <sup>30</sup> Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenequin adopondash. <sup>31</sup> Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. <sup>32</sup> Aden Pabado chiaquien abidectante bucutedi sēnac canompi nēpaēdpondash cuenequido nidtiapimbo yec.

<sup>33</sup> Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiadedt-tantiadedtsēcquin mimbi piambococ. <sup>34</sup> Mibi mentoadenquo iqueque. Min manēdaid abentsēc paēdenquo iqueque. Penquicohoedi unēschitomane quenuiocquin peta —quepondash Pabado. <sup>35</sup> Aden chuishumbic utsitedi ismequin pan bedshun Nuquin Papa chuishun pan cuēshun Pabado pepondash. <sup>36</sup> Aden Pabado pesho isun, Nuquitsen penuna, qeshun abitedishun pebededpondash. <sup>37</sup> Cano antabēdtoquido 276ted icpondash. <sup>38</sup> Aidtedshun peshumbic, Cuēmano nidec, quequin ambi sandoid utsitedi tiedēn caniquid ēshē acte nēsiapondash, Cano yuēmbo iquec, qeshun.

<sup>39</sup> Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun <sup>40</sup> uidēn uaid tebanac acte nēpaēdpondash. Adembidi, cano dēbidiadmete bucutedi secudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. <sup>41</sup> Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

<sup>42</sup> Adsho isash sondado, Mētaniaidtedi cuentsiashe. Cuesunenu, qesho <sup>43</sup> tantiash Pabado cuesunenushē qeshun: —jChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi <sup>44</sup> tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquiec nidanec mentoadenquo yec abitedi nidaid yacno choash dectatocuededpondash abitedi.

## 28

### *Madta caid yacno Pabado bēd icquido choaid*

<sup>1</sup> Adec nidaid yacno choash dectatoneshun, Nēid acte nēnantan nidaid nacnēdquid Madta caid nec, qesho tantiabededpondash. <sup>2</sup> Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēc cho, quequin chuipondash. <sup>3</sup> Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. <sup>4</sup> Aden mēpiash ēchiquidenquo yec mēdiadsho isashien anocquido: —Nisin piaid cuesunianquid nepanui. Mentoadenquo yec actenuēsh dectatoacsho nisin piac unēschitequien iquec. Abi icsaid cuidtequidien nechitec.

<sup>5</sup> Adec onquecuedednubien Pabadon comapenen uicac nisi cuète dëtsiadaoidën nëpaëdpondash. Adnubien Pabado abi bëdambo icpondash.

<sup>6</sup> Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquicsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. <sup>8</sup> Adnubien Pudion papa chumbo yec pienc aton madon shubu nuntan uepondash. Adec Pudion papa uec qesho tantiashe Pabado aid isec nidshun ashunquiobi Nuquin Papa chuishumbic Pudion papa damishquin bëdamepondash Pabadon. <sup>9</sup> Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Ëbitsen bëdametsiashe, quiashe cho-chosho aidotsen bëdamepondash Pabadon. <sup>10</sup> Adosho isun canon choquido bëdamboen tabadmepondash anocquidon. Nidnuesho tantiashe menebampondash mitsana nibëdec quequin.

### *Doma yacno Pabado choash tabadaid*

<sup>11</sup> Adashic ushë 3ted nidmiashe Madta caid yacnoësh puduampondash. Madta caid yacno choash cano icbo, Iguenoampamboec icnuc nëmbo tabadnuna, quiashe tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. <sup>12</sup> Aidën puduanec nidequi acte nënantan nidaid nacnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. <sup>13</sup> Ambo tabadash puduanquin aid acte nënantan nidaid nacnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. <sup>14</sup> Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. <sup>15</sup> Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneoapondash. Aido cho-chosho isashien, Ëbi dayacquo icmenuen nëitdedi mimbi chomioc, Papa, quec dayacquo iquebi, quiampondash Pabado. <sup>16</sup> Adec aido bëquedec choash aucbidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

### *Doma yacnoshon Pabadon Esuquidistu chuibante*

<sup>17</sup> Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacscho isun Pabadon nadopondash: Chuinu. Tantiata. Nuquin matses icsamboen nainquioccombi.

Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. <sup>18</sup> Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. <sup>19</sup> Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. <sup>20</sup> Ëmbi chuiboed mibi chuinuequin mibitedi chomiombi. Unësash uincuenta nec, quequin tantiaquin nuquin matsesën cainacpaden cainquid icsho mëtaniaid nebi—quepondash Pabado isadaidbo tsusiobo chieci.

<sup>21</sup> Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. <sup>22</sup> Padnueni mimbi tantiaid chuisho tantiatae bunec. Utsi dadpen Quidistubo icsambocquid nec, quec—quepondash isadaidbo Doma yacnocquido tsusiobo Pabado caic.

<sup>23</sup> Aden Pabado tantiaid tantianuec, Nëidted ushash padpidec choaindabi, quiانع nidanepondash tsusiobo. Adec nidaniash ambi chiatedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unëspaniedash. Aid tantiaquid yec Nuquin Papabëd tabadendac, quequin Pabado chuibanpondash. Aico Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibanpondash Pabado. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabado. <sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. <sup>25</sup> Aden abentsëc tantiacimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita. Mibitedishun tantiaded-tantiadedquimbi abimbo tantienquo iquendac; Adembidi Ëmbi nadatiambocquin nabanaid isted-istedquimbi abimbo isenquo iquendac.

<sup>27</sup> Bëdamboen tantiaboedobi nëbi min matses pamumëdacimboec tabadec; pashuacimboen tantiec tabadoaic; ushacimboebidi tabadoaic. Adec tabadenquiocquin ëmbi nabansho mimbi istsiac. Adembidi ëmbi chiaid mimbi tantiatsiac. Aden tantiashun mibi icsaid mimbi ëntsiac. Adquiduidi ëmbi bëdambo icniaid nendac.”

<sup>28</sup> Adesa mibi icnu isadaidpemo Esuquidistu chuimembi. Aden aidi chuisho aidon tantiendac—quepondash Pabado <sup>29</sup> Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

<sup>30</sup> Adembidi seta daëd matamec tabadquin Pabado Esuquidistu chuibanpondash. Aton shubun tabadquin abi isedec choquidtedi Pabado yuedpondash. <sup>31</sup> Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibanpondash. Adembidi Esuquidistu tantiamenuec chuibanpondash Pabado.

Padi. Esuquidistun, Ëbi chuibeneta, caidon naid chuibanquin aitedi dada uaombi, Teyopido.

## DOMA YACNOCQUIDON ISTE

### *Tauamboen chiaid*

<sup>1</sup> Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. <sup>2</sup> Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. <sup>3</sup> Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. <sup>4</sup> Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. <sup>5</sup> Aidën: —Pabaton chuibeniac isadaidpembon matses utsibontsen ma ëbi tantiaquin ëmbi chiapadomboen nanu —quequin ambi naid chuibenequidquio Esusën icmepondashi. <sup>6</sup> Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. <sup>7</sup> Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

### *Doma yacnocquido iste Pabado bunaid*

<sup>8</sup> Tantia. Mibi chuinu. Esuquidistun tiantiapden Nuquin Papa mibi chianembi. —Mibi bëdamboshë iquec, Papa. “‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. <sup>9</sup> Aden mibi bëshunenquio icquin Nuquin Papa chianembi. ¿Muetabi nepe? Padenquio. —Pabaton abimbo chiösh —quetsiash Nuquin Papa abi tantiaquidquio icquin ëmbi aton Madon naid chuibenenuc. <sup>10</sup> Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi. <sup>11</sup> Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. <sup>12</sup> —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi. <sup>13</sup> Tantia, con utsibo. Mibi yacno ëbi nidtsemboed mimbi tiantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpenshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. <sup>14</sup> Esuquidistun chiapadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. <sup>15</sup> Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi. <sup>16</sup> Esusën naid chuibeneç bëdambo iquebi naden tiantia. —Nuquin Papan tiantiapdec matses cuidmenquio icnuec Esus abided cuidadec unësac caondash. Aid tiantiaho Nuquin Papan matses cuidenquio iquec.

Abia chiaidon isadaidbon Esus tantiasho cuidenquo icquin isadaidpembo matses utsibontsen Esus tantiasho Nuquin Papan cuidenquo iquendac — quiash Esusēn naid chuibenec bēdambo iquebi. <sup>17</sup> Esusēn naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquo nec,” quequin abi tantiec tabadquid Nuquin Papan bēdamboen isec,” quequin dada uamepampic.

### *Matses utsibo icsamboec tabadaid*

<sup>18</sup> —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecquid tabadte bunquin matses dadpen-shun Nuquin Papan cuidte tantiatiapimbo iquec. <sup>19</sup> Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic. <sup>20</sup> Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nadquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiakin nabanquidquo yec abitedishun Ichoen nechitec —quetiadquidi antenquo matses iquec. Adquid Nuquin Papan cuidendac.

<sup>21</sup> Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumēdabimboecquid Nuquin Papa tantiatiapimbo matses iquec. <sup>22</sup> —Dadpen bēdamboen tantiembi —quequimbi tantienquo matsesēn iquec. <sup>23</sup> Aden unēstiapimbo icquid Nuquin Papambo tantiatiapimbo icquimbi unēsquid-uidquo tantaquin aidbimboecnuc nacnenshun papa quequin chianec. Utsibon matsesbimboecnuc nacnenshun: —Ēbi bēdamboen ista, papa —quequin ambi nacnenaid chiec. Utsibombic aben icquid nidaidēn capuquidbimboecnuc nacnenshun adembidi chiec. Utsibombic uicchun podochoquidbimboecnuc nacnenshun adembidi chiec. Utsibombic aben icquid tachidēn siuidquidbimboecnuc nacnenshun adembidi ambi nacnenaid chiec. Ēnden adquo matses yampicpadomboembidi nēbi adomboembidi matsesēn naic.

<sup>24</sup> Adsho isash Nuquin Papa: —Ma bēdamboec tabadnu —queuidboedi icsamboecquidi matses tabadsho isash: —Ma ambi tantiacpadēqui icsamboec tabadpanu —quiampampic. Adnēdambic nēbi abi bunacpadec icsamboec tabadec utsin chido chudteuidi bunquiec dada. Adecbidi aton bēnēpenquo chudmeteuidi bunquiec chido. <sup>25</sup> —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bēdamboshē iquec —quequin ēnenquo icquin chuitiadquidi aidōn padenquo icpec.

<sup>26</sup> Adsho isash: —Ma abi bunacpadec icsamboec tabadpanu —quiampampic Nuquin Papa. Adnēdambic nēbi icsabudquiec dada bunenquo yequi chido daēdi dachudnanec. <sup>27</sup> Adecbidi chido bunenquo yequi dada daēdi chichudnante natia bunquopec. Aden ambi chiaid niac-niaquec icsamboec tabadsho Nuquin Papan cuidendac.

<sup>28</sup> Adec abi tantiate bunenquo icsho isash: —Ma bēdamboec tabadnu —queuidboedi Nuquin Papa: —Ma abi icsate bunacpadēqui tabadpanu —quiampampic. Adnēdambic nēbi pabiate shēcuē nibēdabimboecquid

Nuquin Papan chiaid niac-niaquec icsamboec tabadpec bēdambo icti-adquidobi. <sup>29</sup> Nadquido icsamboec tabadquido nec. Nēdic aton chidopenquio chudquido. Nēdic aton bēnēpenquio chudmequido. Nēdic icsamboshē icquido. Nēdic aton na dadpen bedteuidi bunquido. Nēdic chieshquido. Nēdic matses utsibobimboec icte bunec chieshēmēnquido. Nēdic cuesunianquido. Nēdic chieshēmēnquido. Nēdic muaquido. Nēdic icsa uate bunquido. Nēdic utsibo icsaiduidi chuiquido. <sup>30</sup> Nēdic ambenquioibi chuishunquin chieshēnquin muauaquido. Nēdic Nuquin Papa chieshēnquido. Nēdic mamēnshumēnquido. Nēdic utsibo nashunenquio icquin aton nauidi nauquido. Nēdic: —Ēbiuidtsēqui bēdambo iquebi —quequido. Nēdic: —¿Icsaquin atotsimbi utsi nape? —quec icsate bunquido. Nēdic anibēdtan amēn chiaid niac-niacquido. <sup>31</sup> Nēdic piushbimboecquin Nuquin Papan chiaid tantienquio icquido. Nēdic aton matses tantienquio icquido. Nēdic nēishash baded nēish bēdanenquio icquido. Nēdic utsibo bēdamboen istiapimbo icquido. Adquidtedi Nuquin Papan chiaid niac-niacquec icsamboec tabadquid nendac. <sup>32</sup> —Abi icsaid ēntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ēnēdenquio yec icsaded-icsadedquec. Utsibotsen icsasho isash cuishonquec. —Bēdambo iquec. Ēbipadquidquido nec —quepec.

## 2

### *Matsesēn naid Nuquin Papan abimbo chuite*

<sup>1</sup> Aden icsamboec tabadaid ēmbi chuisho tantias: —Adquid icsamboshē iquec —¿quecta ique? —Aden naic aid icsaic —queboedi mibitsen adcebidi icsapec. —Icsaquidpenquio nebi —quec mibi muaic. <sup>2</sup> Nuquin Papamben matsesēn naidtedi tantiaquid icquin: —Nēdo icsambo iqueque. Icsano nidmenu —quequin abimbo chiendac. <sup>3</sup> —Matses utsibo icsambo iquec —queboedombi mimbisen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac. <sup>4</sup> Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiacpadec bēdamboec tabadtiadquio iquebi,” quequin ma matsesēn ēbi tantianu —queshun Nuquin Papan matses baded cuidenquio iquec. Abi icsaid ēnenquio icsho isun cuidendac. ¿Adsho tantiashta mibi nadpe? —Mua. Nuquin Papan ēbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

<sup>5</sup> —Nuquin Papan chiaid niacboedēmbi ēnta —caqui: —Padi. Ēmbi naiduidi naic bēdambo iquebi —quequin ēnenquio icquin Nuquin Papan chiaid niac-niacbudec icsamboecuidi mibi tabadec. Aden mimbī Nuquin Papa cuidmendac. Nuquin Papan matsesēn naidtedi chuite ushēmbi mimbī icsamboen naidtedi chuishun Nuquin Papan mibi cuidendac. <sup>6</sup> Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan. <sup>7</sup> Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. <sup>8</sup> Icsaquidoen Nuquin Papan chiaid chiaqui tantiate bunenquio icquin aton nauidi naic icsamboecuidi tabadsho Nuquin Papan comapenen cuidendac. <sup>9</sup> Adoac icsamboec tabadquido abitedi natiacuededec tabadendac. Shubiquendac. Con matses isadaidbo Nuquin Papan chiaid ambia tantiampidi icsasho cuidquin matses

utsibotsen icsasho Nuquin Papan cuidendac. <sup>10</sup> Abi tantiec bēdamboec tabadquido unēsacsho abi yacno tabadmehun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. <sup>11</sup> Icsamboec tabadquido icsano nidmequin bēdamboec tabadquido abēdi tabadmendac. —Isadaidboudtsēqui bēdamboen isembi —quenquo icquin adoendac.

<sup>12</sup> Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adembidi cuidendac. <sup>13</sup> Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istias. <sup>14</sup> ¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. <sup>15</sup> Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. <sup>16</sup> —Adec matses abitedi bēdamboec tabadte tantiequi adquiec tabadenquo iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēda matsesēn ompoquin naidtedi ambembi tantiasun Esusēn matses cuidendac. Esus chuibanquin aden aidēn cuidte chiombi.

### *Isadaidbon Nuquin Papan chiaid niac-niacaid*

<sup>17</sup> Tantia, con matses isadaidbo. Mibi chuino. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquo icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic. <sup>18</sup> Nuquin matses tsusiobon chuibanac Nuquin Papan ambi chiaid Moises dada uamepampic mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec. <sup>19</sup> Adecbidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiacbimboecnuc tantiamequidquo nebi —mibi quepec. Adboedi aidēn chiaid niaquec mibi icsaic. <sup>20</sup> —Chuisho tantiabi icquido nēbi tantiabentsēcquidobēda Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. <sup>21</sup> Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbitsen ampepec. <sup>22</sup> —Utsin chido chudenda —queboedēmbi utsin chido mimbitsen chudpec. Papa quequin matsesbimboecnuc matses utsibon nacenaid isash: —Nuquin Papa tantienquo yec nēid nacenquid icsambo iquec —queboedēmbi aidēn nacenaid tantiate shubun puduedshun mimbi ampepec. <sup>23</sup> —Nuquin Papan ambi chiaid con tsusedpa Moises dada uamepampic bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. <sup>24</sup> Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsēmbien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bēdamboen tantienquo iquec.

### *Nuquin Papa tantiaquidquio icte chiaid*

<sup>25</sup> —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaid ambi chiaid niac-niaquenquio yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cacmaido-bimboecnuc. <sup>26</sup> Nuquin Papan con matses cainquio icpampido matses utsiboen ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caidobimboecnuc. <sup>27</sup> Adec matses ut-sibo Nuquin Papan chiacpadec bëdamboec tabadsho isash isadaidbo naded chiacpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. <sup>28</sup> ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. <sup>29</sup> ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuio icnubi.

## 3

### *Nuquin Papan isadaidbo tantiec, quequin chiaid*

<sup>1</sup> Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantias: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? <sup>2</sup> Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. <sup>3</sup> Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpat-siash? <sup>4</sup> Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papan abimbo chuiquidquio nendac. Aden chuiquin Nuquin Papan con tsusedpa dada uamepampic. “Nuquin Papa abimbo chuiquidquio nec. ‘Nëid bëdambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin Nuquin Papan: ‘Mibi icsaoc,’ quequin ëbi chuiboed chiombi,” quequin dada uapampic.

<sup>5</sup> Ëbi adsho bëdamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bëdambo icte tantiameshobi Nuquin Papan ëbi cuidac icsambo ictsiash —quequin icsamboen tantienda. <sup>6</sup> Matsesën naid chiec Nuquin Papa muaqipimbo iquec. Abimbo chuibanendac. Icsaido chiec: —Mibi bëdambo iquec. Mibi cuidenquio iquembi —quetiapimbo Nuquin Papa iquec. Muesambo nec. <sup>7</sup> Nadembidi icsamboen tantienda. —Ëbi muaquidquio icnubi: “Adquidpenquio Nuquin Papa nec. Bëdambohë iquec. Muesambo nec,”



quetsiash con matses. Adec muaquimbi Nuquin Papa muainquo icte con matses tantiametsiambi. Aden ěmbi abi tantiameshobi Nuquin Papan ěbi cuidac icsambo icdtsiash — quequin icsamboen tantienda. <sup>8</sup> Aden icsamboen chiec nuqui nadtsiac. —Nuquin Papa tantiamenuequi icsaquionona — nuqui quetsiac. ¿Adendambi chuidio? Padenquo. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh — quequin chuituidoshi. ěbi muauaquido Nuquin Papan cuidchitoshon.

*Matses abitedi icsaquido nec, quiaid*

<sup>9</sup> Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquo. Nuquin Papan chiaid niaquesamboen nibědec. Matses utsibo con matses isadaidboběd abembi bědamboec tabadtiapimbo iquec. Abitedimbo icsamboec tabadquido nec. Aden mibi chiombi. <sup>10</sup> Aden chuiquin Nuquin Papan dada uamepampic naden. “Nuquin Papan chiaid niaquesambo nibědec. Abitedimbo icsaquido nec.

<sup>11</sup> Nuquin Papa tantiaquin ambi chiacpadomboenuidi naquidquido nibědec. Nuquin Papa tantiate bunquidquido nibědec.

<sup>12</sup> Běnudshun podqued tantienquo yacimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibědec.

Abitedimbo icsapec.

<sup>13</sup> Nadquo iquec. Něid icsamboec chuishuměnquido. Uněsaid ěnden chococacno shědec: ‘Pisenac,’ quequin tantiacimboen adquido onquesho tantiash: ‘Icsambo icquido něc,’ quequin matsesěn tantiec.

Něidic muaquido.

Něidic nisin pequin icsa uacimboen icsa uate bunec icsamboec onquidquido.

<sup>14</sup> Něidic něishash chieshěměnec: ‘Uněschitoshon,’ quequin icsamboenuidi chuiquido.

<sup>15</sup> Něidic intac měyamec badedquido cuesunianquido.

<sup>16</sup> Něidic aběd icquido natiamec chieshěměnquido.

<sup>17</sup> Adquidtedi cuesnante bunec bědamboec tabadtiapimbo iquec.

<sup>18</sup> ‘Nuquin Papan cuidnushe,’ quenquo icquid Nuquin Papa tantiesabo nec,” quequin dada uamepampic.

<sup>19</sup> Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquo nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibědtabi isadaidbotsen chiac: —Ābimbo chiec —quiash dacuědec ěcbedanenquo tabadendac matses abitedi.

<sup>20</sup> Aden ambi chiaid niaquesambo nibědnuc: —Ambi chiaid niaquesa icsho Nuquin Papan nuqui bědamboen isec —quequin nuqui abimbo chuitiapimbo iquec. Nuquin Papan chiaid isash: —Āmbi chiaid niac-niaquec icsamboequien nuqui tabadchitec —quequin nuqui tantiapec.

*Nuquin Papa matses bědamboen ismete chiaid*

<sup>21</sup> Aden ambi chiactedi natiapimbo yec matses icsasho isun Nuquin Papan abi matses bědamboen ismete chuiquin isadaidbo tsusedpa Moisesbědta tsusedpabo utsibo dada uamepampic ěndenquimbo. Aden ambi dada uamepampicpadomboen něbi Nuquin Papan abi matses bědamboen

ismequid matsesmpac caondash. <sup>22</sup> Adoac Nuquin Papa abi tantiaquido bēdamboen ismenuec Esuquidistu abided cuidadec unēspac caondash. Nēbi aidquio tantiaشو Nuquin Papan matses bēdamboen isec. Isadaidbobēdtambi matses utsibontsen Esus tantiaشو adoendac. <sup>23</sup> Adec matses abided Nuquin Papan chiaid niac-niaquec icsaquido yec Nuquin Papapadquid icsaisambo nibēdec. <sup>24</sup> Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiaشو nuqui bēdamboen isec icsaisabimboecnuc. <sup>25</sup> —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. <sup>26</sup> Nēbi adecbidi: —Icsaido cuidquid nebi —quequimbi Nuquin Papan ambi chiapadec nuqui icsaid bedshunec abided cuidadaid Esus tantiaشو adembidi nuqui bēdamboen isquin cuidenquio iquendac.

<sup>27</sup> Ēmbi aden chuisho tantiaشو: —Ambi chiapadomboenuidi nasho Nuquin Papan bēdamboen isebi —quequin mimbi abimbo chuitiapimbo iquec. Matsesēn Nuquin Papan chiapadomboenuidi natiapimbo icsho bēdamboen istiapimbo ichoedi nēbi Esus tantiaشو Nuquin Papan nuqui bēdamboen isec. <sup>28</sup> Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiaشو Nuquin Papan ēbi bēdamboen isec —quequin Esus tantiaشو Nuquin Papan bēdamboen isec. <sup>29</sup> ¿Isadaidboudida Nuquin Papan bēdamboen ispatsiaشو? Padenquio. Matses utsibo isadaidpembobi Nuquin Papan bēdamboen istsiaشو. <sup>30</sup> Matses abitedi uaquid icquin ambi chiapadomboen isadaidbon Esus tantiaشو Nuquin Papan bēdamboen isec. Adembidi matses utsibon Esus tantiaشو Nuquin Papan bēdamboen isec. <sup>31</sup> Adoaido: —Nuquin Papan chiaid niac-niaquec icsamboec tabadnuna —¿quec icpec? Padenquio. Esus tantiaquido icquin Nuquin Papan chiapadomboen natiadquio nuqui yanec.

## 4

### *Nuquin Papan Abadauan bēdamboen isaid*

<sup>1</sup> Tandia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic? <sup>2</sup> Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquio icpampic Nuquin Papa. <sup>3</sup> Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuiampic. <sup>4</sup> Matsesien adenquio iquec. —Ambi chiapadomboen nasho icbon yua bēdamboen isquid —nuqui quepec. <sup>5</sup> Nuquin Papambien nadotsiaشو. Matses icsaboedi: —Bēdambo icquid icquin ambi chiapadomboen Nuquin Papan naindac —quequin abi tantiaشو Nuquin Papan bēdamboen isbentsiaشو icsaisabimboecnuc. <sup>6</sup> Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

7 “ ‘Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ēbi bēdamboen isec ēbi icsaid bēpiscudacimboen.

Icsaisabimboecnuc ēbi bēdamboen isquin ēbi cuidenquo iquendac,’ quiash matses bēdambo yec cuishonquec.

8 ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquo iquendac,’ quiash matses bēdambo iquec,” quequin Dabidēn chuipampic ēndenquimbo.

9 ¿Shui dēbid dēteshun secaido isadaidbouldida Nuquin Papan bēdamboen isec? Padenquo. Matses utsibotsen bēdamboen istsiash. Tantia. Ēmbi chuiboedbidi chuoanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacacmaidbimboecnuc.

10 ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic? Padenquo. Shui dēbid dēteshun secabi icsho Nuquin Papan Abadauan bēdamboen isbempampic.

11 Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen isaïdo nebi. Aid bēshunchitomane,” queshun min matsestedi shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon Esus tantiasho Nuquin Papan bēdamboen isendac ambi chiaid niac-niacacmaidbimboecnuc.

12 Abadauanēn tsyuecquido isadaidbo Abadauambimboecquido Nuquin Papa tantiaquido abi iquec. —Shui dēbid dētemenēdaïd icsho Nuquin Papan bēdamboen iseibi —quenquo icquin Nuquin Papabēdta Esus tantiasho isadaidbo Nuquin Papan bēdamboen isaïdo abi iquec.

### *Nuquin Papan Abadauan chiaïd*

13 Ēndenquimboshē Nuquin Papan Abadauan naden chuipampic. —Abadauan, mibi nibēdanan yuecshun min tsyuecquid abentsēcshun utsibo bēdambo icmendac. Nidaïd utsi-utsiec yacno tabadquido adoendac —quepampic Nuquin Papa. —Min tsyuecquid abentsēqui tantiasho matses bēdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanēn nashoda Nuquin Papan aden chuipampic? Padenquo. Nuquin Papan chiac: —Ai, abimbo caic —queshoen Abadauan bēdamboen isbenshun Nuquin Papan adopampic.

14 ¿Nēbi: —Moisesēn chiaïd niaquesa icsho Nuquin Papan bēdamboen iseibi —quec muaquidoda Nuquin Papan bēdamboen ispadic? Padenquo. Adec muaquidobi bēdamboen isquin ambi Abadauan chiaïd niactsiash. Adotiapimbo icquin ambi chiacpadomboen Abadauanēn tsyuecquid tantiaquidoen bēdamboen isec. 15 —Moisesēn chiaïd niaquesambo nebi —queboedombi aidēn chiaïd niac-niacsho isun Nuquin Papan cuidendac. Āmbi chiaïd niaquesambo nibēdec. Nuquin Papan: —Bēdamboec tabadta —quequin chiaïd nibēdnuc ambi aden chiaïd matsesēn niactiapimbo ictsiash. Āmbi: —Bēdamboec tabadta —quequin chiaïd abi iquec. Aid niaquesambo nibēdec.

16 Nuquin Papan naden Abadauan chuipampic. —Abadauan, ēmbi chuïsho tantiash: “Mimbi abimbo caic,” quesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaïd dada uamepampidēn Moisesēn tsyuecquido

isadaidbon Esus tantiasho Nuquin Papan bēdamboen isec. Abadauanēn Nuquin Papa tantiacpadomboen matses utsibontsen Esus tantiasho adem-bidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. <sup>17</sup> Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsān yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanēn tantiapampic. —Comapenen tantiaquin unēsaid uincuemeguidquio icquin ambi chiacpadomboen ēbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

<sup>18</sup> Nuquin Papan: —Min tsyuecquido dadpenquio iquendac —cac: —¿Mitsipadoac aidfedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctscquo icquimbi aton mado tishmepampic. Nēbi aton tsyuecquido dadpenquio iquec Nuquin Papan chiampicpadequi. <sup>19</sup> —Con seta dadpenquio 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquio machobudtsēccondaid icquin bacuē usundotiapictscquo iquec —quequin tantiequi: —Nuquin Papan abimboen caosh —quepampic. <sup>20-21</sup> —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —qeshun Nuquin Papa tantiatsēcboedēmbi aid tantiaquiopampic. Adshun: —Mibi bēdamboshē iquec, Papa —quequin Nuquin Papa chuipampic. <sup>22</sup> Adsho tantiashun Nuquin Papan bēdamboen isbempampic icsaisabimboecnuc.

<sup>23</sup> Aden Nuquin Papan ambi Abadauan bēdamboen isaid isadaidbo tsusedpa dada uamepampic. ¿Abadauanēn naiduidi tantiamenuenda aden dada uamepampic? <sup>24</sup> Padenquio. Nuquitsen Nuquin Papan ambi bēdamboen iste tantiamenuen aden dada uamepampic. Nuquin Icho Esus bēda abi uincuemeguid Nuquin Papa tantiasho nuquitsen bēdamboen isec. <sup>25</sup> Nuquin Papan tantiacpadeq nuqui cuidmenquio icnuec nuqui icsaid bedshunec abided ciudadec Esus unēsānēdash. Aden Nuquin Papa abi tantiaquido bēdamboen ismenuec unēsash uincuepanēdash Esus.

## 5

### *Esus tantiaquido Nuquin Papan bēdamboen isaid*

<sup>1</sup> Aden Esus tantiasho Nuquin Papan bēdamboen isaído yec abi cuidte dacuēdēnenquio yec abēdi nuqui bēdamboec tantiananec. <sup>2</sup> Ěmbi chuiboc-paden abi tantiaquido nuqui cuidmenquio icnuec abided unēsquin Esusēn Nuquin Papa nuqui bēdamboen ismepec. Adoac nuqui nadpec. —Nuqui bēdamboen isquin unēsacsho nuqui abipadquid icsaisa icmēquin Nuquin Papan abēdi nuqui tabadmendac —quec nuqui cuishonquec. <sup>3</sup> Nadectsen nuqui cuishonquec. —Esus tantiaquid icsho ũtsibon chieshēnaqui Esus tantiatsēcboedi chieshtoenquio icquin Esus tantiaquidquio yanebi —quectsen nuqui cuishonquec. <sup>4</sup> Aden chieshtoenquio icquin Esus tantiasho Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadomboen —quepec nuqui. <sup>5</sup> Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquio. Aton Mayan nuquibēd icmiac paposhquiacbimboen nuqui naden tantiec. —Nuquin

Papan ëbi bédamboen tantiaquin abi yacno ëbi puduedmendac —quequin nuqui tantiec.

<sup>6</sup> Aden matses tantiaquiec Nuquin Papan tantiacpadec Esus nadpanédash. Matses abitedi abembi bédamboec tabadtiapimbo ícscho isun Nuquin Papan uesquin cuidtsenubi abi tantiaquido cuidmenquo icnuec abided cuidadec Esus unëspanédash. <sup>7</sup> ¿Ada adquid matses icpadic? Padenquo. ¿Cuesanquidën matses bédambo icquid caic: —Cuesnu —quesho tantiaashunda dadpenshun: —Aid cuesenda. Èbiquien cuesta —capatsiash? Padenquo. Bédamboshë icquid cuesmenquo icnuen: —Nëid cuesenda. Èbiquien cuesta —cachitembien íctsiash abentsëcshun. Icsambo icquid ícschoen aden chienquo íctsiash. <sup>8</sup> Padnuen matses abitedi ícsamboecuidi tabadnuc nuqui cuidmenquo icnuec Esuquidistu abided cuidadec unëspanédash. —Nuquin Papan ëbi tantiaquiec —matses camenuen Nuquin Papan aden Esus namepanédash.

<sup>9</sup> Nëbi abided cuidadaidquo Esus tantiaasho Nuquin Papan nuqui bédamboen isec ícsaisabimboecnuc. Aden bédamboen isquin Nuquin Papan nuqui cuidtiapimbo iquendac. <sup>10</sup> Matsesën abi chieshënsho isun aido cuidte bunenquo icquin Nuquin Papan aton Madoded cuidpanédash. Aden aton Madoded cuidash nëish bédanshun Nuquin Papan aton Mado tantiaquid bédamboen isec. Nëbi Nuquin Papan uíncuemenëdaid icquin Esusën nuqui bédamboen tabadmec. <sup>11</sup> Adembidi aidën tantiamiacpadomboen nuqui: —Èbi cuidenquo icnuen aton Madoded cuidquid bédamboshë íquec —quequin Nuquin Papa tantiec nuqui cuishonquec.

#### *Adanën naidbëdta Esusën naid chiaid*

<sup>12</sup> Nuqui bédamboen ismequid Esus tishabi icnuc abia matses uaidën Adanëmba Nuquin Papan chiaid niac-niaquec ícsasho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan ícsacpadecebidi ícsate tantiaquimbi Nuquin Papan unësquidoidquo matses icmepampic. <sup>13</sup> Nuquin Papan: —Adec ícsainda —quequin ambi chiaid Moises dada uamiabi icnubi matses abitedi ícsapampic. —Èmbi Moises chuimiaid mimbi niac-niaquec —Nuquin Papa quetiapimbo icnubi matses ícsapampic. <sup>14</sup> Nuquin Papan chuiboedquioi niaquec Adamba ícsasho Nuquin Papan cuidac unësec taëpampic. Adan unësbambic aidën nacpadomboen nabi ícsa utsi naiqui matses abitedi ícsasho adembidi unësquidoidquo Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidën chiaid niactiapimbo yec utsi naic ícsashobi adopampic. Ambia Nuquin Papan chiaid niacampid Adampadquidpenquo Esuquidistu nec.

<sup>15</sup> Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidoidquo Nuquin Papan icmepampic. Adecbidi Nuquin Papa matses bédamboen ismequid abentsëc íquec. Esusuidtsëqui abi tantiaquidotedi cuidmenquo icnuec abided cuidadec unëspac caondash. Nëbi aid tantiaasho Nuquin Papan nuqui bédamboen isec. <sup>16</sup> Adanën nachimboen Nuquin Papa matses bédamboen ismequidën nambo. Adan abentsëqui ícsaquin Nuquin Papa cuidmiac abi unëscapadquiec matses abitedi unësquidombo yanac. Nuquin Papa bédamboen ismequidëmbien matses ícsaid bedshunec abided cuidadquin Nuquin Papa abi tantiaquidotedi bédamboen ismec ícsaisabimboecnuc. <sup>17</sup> Ambi chuiboedi niacquin Adanën Nuquin Papa cuidmiash unësquid yanacpadec matses unësquidoidquo íquec. Esuquidistunuidtsëqui nac Nuquin Papan matses bédamboen isendac. Nëbi aid tantiaasho Nuquin Papan nuqui bédamboen isquin bédamboec tabadquid icmendac. Adec bédamboec tabadec unëssh

Esusbēdtan Nuquin Papan namiacno bēdambošhē yacnombo nuqui tabaden-dac.

<sup>18</sup> Adec matses abentsēqui icsasho aibdēda aton tsyuecquido matses abite-dimbo cuidquin Nuquin Papan unēsquidoidquio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. <sup>19</sup> Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoidquio yanac. Padnuen Nuquin Papan chiaid ni-aquesambo icquin Esusēn Nuquin Papa nuqui bēdamboen ismec. <sup>20</sup> ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquio. Matses abi icsaid tantia-menuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bēdamboen isec. <sup>21</sup> Taēec matses icsasho cuidac unēsquidoidquio yanac. Adsho isun matses bēdamboen isnuen Nuquin Papan ambi chiaid niaquesambo Esusded cuidac. Nēbi Nuquin Icho Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

## 6

### *Esus tantiaquid bēdamboec tabadquid, quiaid*

<sup>1</sup> Nuquin Papan bēdamboen iste ěmbi chuisho tantiashun naden tantienda. —Icsaido cuidmenquio icnuec abided Esus ciudadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. <sup>2</sup> Esus tantiaquido adesambo nec. Esus tantiec icsateuidi nuqui bunenquio yanec. <sup>3</sup> ¿Tantienquioda ique? Naden chuiquin mimbi acten mentomiac. —Ěbi cuidmenquio icnuec abided ciudadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. <sup>4</sup> Aden Esus abided ciudadec unēsaid tantiasho Nuquin Papan utsiacimbocnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacimbocnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuenece.

<sup>5</sup> Adec abided ciudadec unēsaid tantiec icsate bunenquio yanquid yec Esus uincuemiacimboen comapenen tantiaquin Nuquin Papan utsiacimbocnuc icmiaidtsen nuqui nec. <sup>6-7</sup> Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yacimboc matses abembi icsaic enēdtiapimbo iquec. Adboedi Esus tantiec nuqui icsate bunenquio yanec.

<sup>8</sup> Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. <sup>9</sup> Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac. <sup>10</sup> Matses icsaido cuidmenquio icnuec abided abentsequi ciudadec Esus unēsac caondash padpidec unēsenuio yec. Adsho uincuemiac Nuquin Papan chiacpadomboen nabanec aibdēd tēshnanenquio yec tabadec.

<sup>11</sup> Ěbi adsho tantiash nadta. —Ěbi cuidmenquio icnuec abided ciudadec unēsacsho uincuemiaid Esus ěbēdi iquec. Aid tantiec icsainquio yanebi.

Ambi nacpadec tabadtiadquio iquebi —queta. <sup>12</sup> Icsamboec tabadenquio icnuna. Nuqui icsate bunaid nainquio icnuna. <sup>13</sup> —Icsaquionona —quesho tantiash: —Padi —quenuna. Unēsacbibmoen Nuquin Papa tantienquio ictenedēmbi uincuenacbibmoen Nuquin Papa nuqui tantiabenonadaque. Ambi chiapadec bēdamboequien tabadtiad. <sup>14</sup> —Nuquin Papa ambi: “Bēdamboec tabadta,” quequin chiaid Moises dada uamiactedi naquin ēmbimbo Nuquin Papa bēdamboen ismembī —quenquio icquin Esus tantiasho Nuquin Papan nuqui bēdamboen isec. Ambi bēdamboen isaído yec nuqui icsate bunenquio nuqui yaneque. Bēdamboec tabadnuna.

### *¿Tsuntsin yuabo Esus tantiaquido icpec? quequin chiaid*

<sup>15</sup> —Aden Nuquin Papan nuqui bēdamboen isec —quequin ēmbi chuisho tantiashun naden icsamboen tantienda. —Nēbi abided cuidadaid Esus tantiasho ēbi bēdamboen isec. Ēbi cuidtiapimbo iqueque. Ambi chiaid niacniaquec icsabudquionona —quequin tantienda. Esus tantiaquid adesambo nec. <sup>16</sup> ¿Tantienquioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ēntiapimbo yec unēsash icsano nidendac. Nuquin Papan yuain ambi chiapadec bēdamboec tabadcuendac. <sup>17</sup> Mibi adec tabadsho isun: —Esus chuibanac icsaid ēntiapimbo icboedi Esus tantiabenash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. <sup>18</sup> Satanasēn yua icquin mimbimbo mibi icsaid ēntiapimbo icsho Nuquin Papan nac ambi chiacpadquiec mibi bēdamboec tabadcuenac.

<sup>19</sup> —Matses icquin: “Nuquin Papan chiaid tantiadenquio iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaiddi nēbi Nuquin Papan chiacpadequien bēdamboec tabadtiad. <sup>20</sup> Satanasēn yua yec icsaquiec Nuquin Papan chiapadec bēdamboec tabadtiapimbo mibi iccondac. <sup>21</sup> ¿Ada bēdamboec tabadonda? Ma mibi chieshēmēnquiec tabadteneyoc. —Ēbi chieshēmēnquiec tabadondaiddi tantiashun: “Mibi icsambo iquec,” ēbi canushe —queshun mimbi naondaiddi ma mimbi chienquio iccondac. Icsaid ēnabi yec unēsash icsano mibi nidtsenac. Adecbidi icsaid ēnenquio icquido unēsash icsano nidendac. <sup>22</sup> Nēbi nuqui Esus tantiasho Nuquin Papan aton yuabo nuqui icmiac. Adoac icsaid ēntiapimbo icboedi nēbi nuqui bēdamboec tabadcuenec. Adquid unēsacsho Nuquin Papan abēdi tabadmendac. <sup>23</sup> Icsaído cuidquin Nuquin Papan icsano nidmendac. Abided cuidadec unēsaid Esuquidistu Nuquin Icho tantiasho Nuquin Papan nuqui bēdamboen isquin unēsacsho abēdi tabadmendac.

## 7

### *Bēdamboec tabadte chiuinen chido bēnēchoquid Pabadon chiaid*

<sup>1</sup> Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen matsesēn naquid. Unēsun aidēn chiaid natiapimbo iquec —quequin mimbi tantianēdac. <sup>2</sup> Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. <sup>3</sup> Bēnē unēsabi icnubi aton bēnē nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsiash.

<sup>4</sup> Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidi abided ciudadec unēsaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincuemenēdaidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash. <sup>5</sup> Esus tantiabi yec nuqui bunacpadecuidi nuqui icsapadene. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodene. Adquid yec unēsacsho icsano nidmequin Nuquin Papan nuqui cuidtsenēdash. <sup>6</sup> Esus tantiabi yec nuqui nadondac. —Moisesēn chiacpadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaidi nēbi Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

### *Icsaquid nebi, quequin Pabadon chiaid*

<sup>7</sup> —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienguiembi ictsenchitondac. <sup>8</sup> Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapene bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi. <sup>9</sup> Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. <sup>10</sup> Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac. <sup>11</sup> —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. <sup>12</sup> Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

<sup>13</sup> ¿Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac. <sup>14</sup> Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yachimboen icsaquido icquin Nuquin Papan chiacpadomboen natiapimbo nuqui iquec. <sup>15</sup> —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquo iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. <sup>16</sup> —Nuquin Papan chiaid



bëdamboen icchitec. Aidën chiaid niacte bunenquio iquebi —queboedëmbi aidën chiaid niac-niaquec: —Bëdamboen chiaidimbi niac-niacchitec —quebi. <sup>17</sup> Bëdamboecuidi tabadtiadquidini icsaquid yec ëbëmbi icsadenechitec. <sup>18</sup> —Bëdamboec tabadnu —queboedi icsaquid yec ëbëmbi bëdamboec tabadtiapimbo iquebi. Icsaquidini nec. <sup>19</sup> —Bëdambo icte bunebi —queboedi ëbëmbi bëdamboec tabadtiapimbo iquebi. —Icsate bunenquio iquebi —queboedi ëbenquiobi icsaded-icsadedebi. <sup>20</sup> Icsate bunenquio ichoedi icsaquid yec ëbëmbi bëdamboec tabadtiapimbo iquebi.

<sup>21</sup> —Adquid nebi. Nuquin Papan chiacpadec bëdamboec tabadtiadquidi badedquio icsaded-icsadedebi —quequin tantiëmbi. <sup>22</sup> —Nuquin Papan chiaid bëdambo iqueque. Ambi chiacpadec ëbëmbi bëdamboec tabadnu —queboedi <sup>23</sup> icsaquid yec ëbëmbi bëdamboec tabadtiapimbo iquebi. Mëtaniaid abëmbi mënchiquidtiapimbo yacimboen ëmbi naid ëntiapimbo iquebi. —Nuquin Papan chiacpadec bëdamboec tabadnu —queboedi bëdamboec tabadtiapimboeni icchitec. <sup>24-25</sup> Adquid yec shubitiadquio icchitebi. Icsaquid yec: —¿Mitsipadequini bëdamboec tabadpeba? —queboedi: —Abi tantiasho Esuquidistumbini bëdamboen tabadmec —quianondabi. Adshun Nuquin Papan naden chiëmbi. —Ëbi bëdamboen tabadmequid Esus mimbi ëbi tantiamiac. Mibi bëdambo iquec, Papa —quequin Nuquin Papa chiëmbi.

## 8

### *Nuquin Papan Mayanën namiaid*

<sup>1</sup> Aden matses bëdamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. <sup>2</sup> Icsaquido yec bëdamboec tabadtiapimbo icsho Nuquin Papan cuidtequido ichoedëmbi Esus tantiasho Nuquin Papan aton Mayan meniac aidën tantiamiacpadec nuqui bëdamboec tabadanendac. <sup>3</sup> —Moisesën chiacpadec bëdamboec tabadec unësash Nuquin Papa yacno tabadebi —queboedi icsaquido yec abëmbi bëdamboec tabadtiapimbo matses iquec. Adsho isun matses bëdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unësapanëdash. <sup>4</sup> —Abided cuidadaid con Mado Esus tantiasho bëdamboen isquin con Mayan matses menendambi. Adoac aidën tantiamiac ëmbi Moises chuimiampicpadec bëdamboec tabadendac. Matses abi icsate bunacpadec icsainquio yec bëdamboec tabadendac —qeshun Nuquin Papan Esusded cuidpac caondash.

<sup>5</sup> Adec Nuquin Papan Mayanën tantiamiaid Esus tantiaquid Nuquin Papan tantiacpadec bëdamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic. <sup>6</sup> Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquio yec bëdambo yec unësash Nuquin Papa yacno tabadendac. <sup>7</sup> —Icsate bunquidën ëbi chieshë nec. Ambi nauiduitsëqui naquin ëmbi chiacpadomboen natiapimbo iquec —qeshun Nuquin Papan cuidendac. <sup>8</sup> Adquido chuiquin: —Mibi bëdambo iquec —catiapimbo Nuquin Papa iquec.

<sup>9</sup> Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bëdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec. <sup>10</sup> Abided cuidadaid Esus tantiasho bëdamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho

Nuquin Papan abēdi tabadmendac. <sup>11</sup> Esus uincuemequidēn Nuquin Papan ambi aton Mayan meniaindo unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui adoendac.

<sup>12</sup> ¿Ēbi adsho tantiashta Esus tantiaquid abi bunacpadequi icsapēc? Padenquoio. Bēdamboec tabadte bunec. <sup>13</sup> Utsiboen abi bunacpadec ic-samboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpadecc tabadquin nuqui icsaid nuqui ēnec. Adash unēsash Nuquin Papa yacno nuqui tabadendac.

<sup>14</sup> Aden aton Mayanēn bēdamboec tabadmiaido Nuquin Papan: —Con mado nec. Con champi nec —capendac. <sup>15</sup> ¿Icbo icsambo icquidēn yua dacuēdmiaimbomboenda Nuquin Papan Mayanēn nuqui dacuēdmec? Padenquoio. Nuqui bēdambo icmec. Aidēn tantiamiacpadomboen Nuquin Papanuidtsēqui papa nuqui capec. <sup>16</sup> Aden Nuquin Papan Mayanēn: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. <sup>17</sup> —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenquoio yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquoio icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

### *Nuquin Papan bēdamboshē icmete chiaid*

<sup>18</sup> Adec Nuquin Papa yacno nuqui bēdamboshē icte tantiaquin nuqui nidaidēn natiaic tabadaiduidi ma nuqui tantiatiapimbo iqueyoc. <sup>19</sup> Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. <sup>20</sup> Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquoio icmepampic aidon: —Padi —catiapimbo icnuc. <sup>21</sup> —Yuecshun ěmbi Esus tantiaquido uincuemequin aton dada utsi uacpadēn ěmbi uaido utsi nidaidēn icquidtedi chod-quetete icboedi utsi uain bēdamboshē icmendambi —quequin tantiaquimbi unēsquiduidquoio icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. <sup>22</sup> Unēstiapimbo icte bunec unēsquid yec: —¿Tedectsicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquoio tishmepashuni —quiacbimboec adpec. <sup>23</sup> Nuquin Papan meniaindo aton Mayanēn tantiamiacpaden nuquitsen naden chiec. —Con dada utsi uquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. <sup>24-25</sup> —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabonondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquoio iquendac.

<sup>26</sup> —Aden aton dada utsi uate tantiaquin yuen cainec chieshtonoshe —queshun Nuquin Papan Mayanēn nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquoio icsho isun Nuquin Papan Mayanēn abi chiec. Unēsquoio icnuc onquengquoio icquin chiec: —Mimbí tantiacpadomboen aid matses bēdambo icmeta, Papa

—quequin Nuquin Papan Mayanën nuqui comapenen chuided-chuidedec.  
<sup>27</sup> Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanën onquenguo icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

*Nuquin Papan nuqui bēdambo icmiaid*

<sup>28</sup> Aden tantiaishun nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec. Unēsquo yec tabadsho aden naic. Natiambo icsho adembidi naic. Cuis-honqesho adembidi naic. <sup>29</sup> Ēndenquimboshē nidaid uabi yequi Nuquin Papa nadpampic. —Ēmbi tantiactedi ēbēda con Mado tantiaquid icmequin Esuspadquo icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bēdambo icmenuen Nuquin Papan naic. <sup>30</sup> Ēndenquimboshē nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuc abided cuidadaid Esus tantiaisho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

<sup>31</sup> ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquo ictsiash —quec nuqui dacuēdenquo iquec. <sup>32</sup> Nuquin Papan nuqui tantiaquieic. Aton Madombo cudasenquo icquimbi nuqui cuidenquo icnuen aton Madoded cuidquin unēs uamepanēdash. Adshumbic Esus tantiaisho ēnenquo icquin bēdamboen isquin nēbi bēdambo icmequin unēsacsho abēdi tabadmequin nuqui bēdamboeshē icmendac. <sup>33</sup> ¿Nuquin Papan nuqui bēdamboen isquidēmbida nuqui cuidpec? Padenquo. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquo. <sup>34</sup> ¿Esusēmbida nuqui cuidpec? Abi tantiaquido cuidmenquo icnuc abided cuidadec Esus unēsac caondash. Unēsacsho Nuquin Papan uincemiac Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ¿Adquidēnquiobida nuqui icsano nidmequin cuidpec? Padenquo. <sup>35</sup> Nuqui bēdamboen isquin ēnenquo icquin Esusēn nuqui tantiaquieic. ¿Shubisho isunda Esusēn nuqui tantienquo icpec? Padenquo. ¿Dacuēdshoda Esusēn nuqui tantienquo icpec? Padenquo. Adembidi nuqui tantiaquieic. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —quesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquo icquin. <sup>36</sup> Aden utsibon Esus tantiaquido chieshēnte chuiquin Nuquin Papan dada uamepampic naden.

“Mibi tantiaisho ēbi: ‘Cuesunenu,’ caded-cadedec uimanēmēnquidon.

Aben icquidbimboecnuc: ‘Cuesunenu,’ caded-cadedebi, Papa,”  
 quequin Nuquin Papan chiaid dada uapampic Esus tishabi icnuc.

<sup>37</sup> Aden utsibon nuqui chieshēnsho Esuquidistun nuqui bēdamboen tantiaquieic. Shubisho abi nuqui tantiamec. Adoac Esus tantiatsec shubiquimbi chieshtoenquo icquin nuqui Esus tantiaquieic yanendac. <sup>38-39</sup> Nuquin Papan Esus tantiaisho icquin nuqui tantiaquieic. Nuquin Icho Esus tantiaisho

Nuquin Papan nuqui bēdamboen isec. Unēsacsho nuqui bēdamboen tantiatsiash. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquiotsiash. ¿Podobitsi icsabon icho Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquiotsiash. Nēbi nuqui bēdamboen tantiec. Yuceshun adembidi nuqui bēdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatsiash. Nidaid uquēducquo nidacsho adembidi nuqui bēdamboen tantiatsiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsiash ēnenquo icquin.

## 9

### *Pabadon aton matses isadaidbo chiaid*

1-2 Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquo iquec —quiash shubitiadquo iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. <sup>3</sup> Con matses isadaidbo tantiec unēsquo yec tsadebi. Nuquin Papan: —Min matses abitedi cuidenquo icnuen mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnuen ēbided cuid —quetsenondabi. <sup>4</sup> Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu —quequin con matses tabadacno abu ushu bēchamauanqueicquid chomequin ismepampic. Adashic nadpampic. —Ēmbi chiacpadec bēdamboec tabadsho mibi bēdamboen isquin bēdambo icmen-dambi. Mibi nianenquo iquendambi —qeshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo itegequid chuiquin: —Mibi bēdambo icmendambi —quequin Nuquin Papan con matses chuiampic ēndenquimboshē. <sup>5</sup> Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Ichbo yec matsesac caondashe. Esus chuiquin: —Nuquin Papa padquibi yec mibi bēdamboeshē iquec —canuna ēnenquo icquin.

<sup>6</sup> Ēmbi chiacpaden Esus tantienquo icsho Nuquin Papan con matses dadpen bēdamboen istiapimbo iquec. ¿Aden tantiastabi nadpe? —Nuquin Papa muapampic. Ambi chiacpadomboen nainquo icquin con matses bēdamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpeshun Nuquin Papa bēdamboen tantienquo iquec. Ambi tantiatedishun abi tantiasho ambi chiacpadomboen Nuquin Papan bēdamboen isec. <sup>7</sup> Ēndenquimboshē con tsusedpa Abadauanēn mēdaidtedi adembidi Nuquin Papan bēdamboen isambo. Abadauanēn mado abentsēqui Isac caic: —Aidēn tsyuecquido ēmbi mibi cuēnacpadomboen con matses caindami —quequin Nuquin Papan chuiampic. <sup>8</sup> ¿Abadauanēn bacuēbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquēn tsyuecquido Nuquin Papan con matses caido nec. <sup>9</sup> Naden Nuquin Papan Isac tishte chuiampic.

“Ēmbi tantiacpadĕn choashun ĕmbi namiac Sadan min chidon dada bacuĕ tishendac,” quepampic Nuquin Papa Abadauan chiec.

<sup>10</sup> Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquĕn bacuĕ abi ushĕmbi daĕd tishĕ chuiampic. Adnubien con tsusedpa Isaquĕn aton chido Debeca caid bedshun chudquin dada bacuĕ daĕd usundomepampic Nuquin Papan chiacpadomboen. <sup>11-12</sup> Aid dada bacuĕ daĕd tishabi icshobi Nuquin Papan ani naden chuiampic. “Ēmbi tantiacpadquid min madon utsimpi bĕyucquidbimboecquid nendac,” quepampic. Aid daĕd tishabi bĕdamboec tabadtiaimbo icnubi: —Tishacsho ĕmbi tantiacpadembi tsyuec tishĕtsaidĕmpi abentsĕqui bĕdamboen isendambi —quequin tantiec adpampic Nuquin Papa. <sup>13</sup> Adembidi Isaquĕn mado chuiquin Nuquin Papan ambi chiaid dada uamepampic. “‘Acobouidsĕqui tantiaquioquin aton buchimpi Esau bĕdiactĕsĕc tantiatsendambi,’ quepampic Nuquin Papa,” quequin dada uamepampic.

<sup>14</sup> Ĕmbi aden chuisho tantiash: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidfequido icsho Nuquin Papan ambi tantiactedi bĕdamboen isec. <sup>15</sup> Aden Nuquin Papan con tsusedpa Moises chuiampic. “Embi tantiactedi matses bĕdamboen isendambi. Aidedi cuidenquo iquendambi,”

quequin chuiampic. <sup>16</sup> Ĕ—Ēmbemi nasho Nuquin Papan bĕdamboen istsiash —quec matses bunacpadenda Nuquin Papan matses bĕdamboen ispec? Padenquo. Ambi tantiactedishun abi tantiasho Nuquin Papan bĕdamboen isendac. <sup>17</sup> Aden ambi tantiacpadomboen ambi naid Nuquin Papan Equipito yacnocquido chuiquid dada padaon caid chuiampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma ĕbi canu,’ quequin mibi chuiquid dada icmiondambi. Mibi icsasho pacuĕnĕdacbimboecnuc mibi icmemi,” quequin Nuquin Papan padaon chiaid Moisesĕn dada uapampic. <sup>18</sup> Aden ambi tantiacpadomboen utsi-utsien icsaido pacuĕnĕdacbimboecnuc icmequin abi tantiamenquo iquec. Adembidi utsi-utsien bĕdamboen isquin abi tantiamec.

<sup>19</sup> ĔĒbi adsho tantiashta mibi nadpe? —ĔAtotsieshun Nuquin Papan matses cuidpec? ĔAbitedishun Icho icquin Nuquin Papan namiacta matsesĕn nainquo icpadic? —Ĕquecta ique? <sup>20</sup> ĔMatses icquinda mimi Nuquin Papa chushcapatsia? ĔAmbi uaido icquimbida nuqui nadope? —ĔAtotsieshun ĕbipadquid matses uao, Papa? —Ĕcapenda nuqui ique? <sup>21</sup> ĔAda abi nacnenquid matsun chushcapadic? Padenquo. Matsun nacnenquidĕn ambi tantiacpadomboen nacnenendac. —Nĕid nidaid tĕshĕ tĕchu bĕdambo icquid acte uetequid nacnenu. Nĕid nidaid tĕshĕ matsumpi icsactĕsĕcquid opa acmete nacnenu —quequin matsu nacnenquid. Aden ambi tantiacpadomboen nidaid tĕshun nacnenquid.

<sup>22</sup> Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapen tantiaquidquo nebi. Adquid icquin icsaido cuidquid nebique. Ismenu —queboedĕmbi ambi cuidtequido baded cuidenquo iquec. Ambi ĕndenquimboshĕ tantiacpadomboen aido icsano nidmendac. <sup>23</sup> —Ma ĕmbi bĕdamboen isaidon naden tantianu. “Icsaisambo icquin matses bĕdamboen iste bunquin Nuquin Papan icsaido badedi cuidenquo iquec,” quequin ma tantianu —queshun icsaido badedi cuidenquo iquec. Ambi ĕndenquimboshĕ tantiacpadomboen ambi bĕdamboen isaido abĕdi tabadmendac.

<sup>24</sup> Aden ambi tantiacpadomboen Esus tantiasho Nuquin Papan nuqui bēdamboen isec. Isadaidbon abi tantiasho bēdamboen isquinc isadaidpembro matses utsibon abi tantiasho bēdamboen isquinc nuqui caindac. <sup>25</sup> Ambi matses utsibotsen aden bēdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ěmbi con matses cacmaidobi con matses cabenendambi. Adembidi ěmbi bēdamboen tantiacmaidobi matses utsibo bēdamboen isbenendambi,”

quequin Nuquin Papan chiaid dada uashun <sup>26</sup> nadentsen dada uapampic. “Matses utsibo ambi con matses cacmaidobi ambi tantiacpadĕn aido abentse-abentsen Nuquin Papan bēdamboen isendac.

Bēdamboen isquin: ‘Con mado nec. Con champi nec,’ caindac,” quequin Nuquin Papan matses utsibo bēdamboen iste chuiquin dada uapampic.

<sup>27</sup> Ambi con matses caidombi abi tantiatiapimbo icsho isash Nuquin Papa chushquiaid con tsusedpa Isayasĕn naden dada uapampic. “Masitedi dadpenquo caidnĕdaido isadaidbo daĕdpacktsĕcshun abi tantiasho bēdamboen isquin aidtedtsĕqui Nuquin Papan cuidenquo iquendac. <sup>28</sup> Ambi chiacpadomboen ambi tantiacpadĕn matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasĕn dada uapampic. <sup>29</sup> Nuquin Papan chiaid padpiden dada uaquin isadaidbo cuidte Isayasĕn chuipampic naden.

“Shubu dadpen icquid Sodoma caid yacnoquidobĕdta shubu dadpen icquid utsi Comoda caid yacnoquido Nuquin Papan uesquin cuidac aton tsyuecquido nibĕdquieic iquendac.

Adembidi con matses Nuquin Papan uesquin cuidtsempanĕdash. Abitedishun Icho icquin con matses nibĕdquieicnuc cuidtsempanĕdash. Dadpen cuidquin daĕdpacktsĕc cuidabi icpanĕdash,” quequin dada uapampic Isayasĕn.

### *Isadaidbo bēdamboen istiapimbo icte chiaid*

<sup>30</sup> Aden Isadaidbo dadpenshun abi tantienquo icsho Nuquin Papan bēdamboen istiapimbo iquec. Padnuen matses utsibo: —Mabi Nuquin Papan bēdamboen isnu. Ambi chiacpadec bēdamboec tabadnu —quesabobi: — Ēbi cuidmenquo icnuec abided ciudadec unĕsaid Esus bēdamboshĕ iquec —quesho Nuquin Papan bēdamboen isec icsaisabimboecnuc. <sup>31</sup> Isadaidboen: —Moisesĕn chiampiduidi ěmbembi nasho Nuquin Papan bēdamboen isebe —queboedombi nainquo icsho Nuquin Papan bēdamboen istiapimbo iquec.

<sup>32</sup> ĆAtotsieshun Nuquin Papan isadaidbo bēdamboen istiapimbo icpec? —Ambi chiacpadomboenuidi ěmbembi naquin Nuquin Papa bēdamboen ismembĭ —queboedombi adotiapimbo icquin Nuquin Papa bēdamboen ismequidquo Esus chieshĕnec. Adsho Nuquin Papan bēdamboen istiapimbo iquec. <sup>33</sup> Esus tishabi icnuc isadaidbon Esus chieshĕnte chuiquin Nuquin Papan con tsusedpa naden dada uamepampic.

“Buintad bēdambo icquid istuidash: ‘Nĕidquo shubu uanun nitsinembi,’ quiacbimboen

Edusaden yacno ěbi bēdamboen ismequidquo isadaidbobĕd tabadmendambi.

Adec tabadsho anocquidon chieshĕnendac.

Aid chieshĕnquid nadquo iquendac. ‘Cuĕte mabud iquec,’ quequin tantienquo yec nidec tocoshqetanec uebudacimboc

ěbi bēdamboen ismequid tantienquo yec unĕsash icsano nidendac.

Aid tantiaquido: ‘Nĕid tantiasho Nuquin Papan abi yacno nuqui tabadmendac,’ quequid unĕsacsho ěbi yacno tabadmendambi,”

quequin Nuquin Papan ambi chiaid dada uamepampic.

## 10

<sup>1</sup> Con matses isadaidbo tantiac unèsquio icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi. <sup>2</sup> Esus tantiabi ěmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembĩ —quetsěboedombi con matsesěn Nuquin Papa bédamboen ismete tantienquo iquec. <sup>3</sup> —Abided cuidadaid Esus tantiasho Nuquin Papan bédamboen ieseĩ —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesěn dada uactedi naquin Nuquin Papa bédamboen ismembĩ —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec. <sup>4</sup> Esusuidtsěqui Nuquin Papan: —Bédamboec tabadta —quequin chiaid Moisesěn dada uactedi naquidquo nec. Adec icsaisa yec matses icsaid bedshunec abided ciudadec uněsac caondash. Něbi Esus tantiasho Nuquin Papan matses bédamboen isec icsaisabimboecnuc.

<sup>5</sup> Nuquin Papan chiaid dada uaqun Moisesěn chuipampic naden. “Ambi chiacpadomboenuidi naquid Nuquin Papan bédamboen isquin abědi tabadmětash,” quequin Nuquin Papan chiaid Moisesěn dada uapampic. <sup>6</sup> Aden ambi chiacpadomboenuidi natiadquidombi natiapimbo icsho Nuquin Papan matses bédamboen istiapimbo icpanědash. Něbi abided cuidadaid Esus tantiasho nuqui bédamboen isec. Adoac Esus tantiaquido nadenquo iquec. —Nuquin Papa yacno nidshun ĵtsuntsin Nuquin Papa nuqui bédamboen ismepatsiashba? —quenquo nuqui iquec. —Esusquio Nuquin Papa bédamboen ismequidquo nec —quequin nuqui tantiec. <sup>7</sup> Aden tantiec: —ĵTsuntsin Nuquin Papa bédamboen ismequidquo uincuemepatsiashba? —quenquo nuqui iquec. —Abided ciudadec uněsacsho Esus uincuemiac caondash —quequintsen nuqui tantiec. <sup>8</sup> Aid tantiasho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiambi,’ qesho Nuquin Papan matses bédamboen isendac,” quequin dada uamepampic. Něbi Nuquin Papan chomiaid abided cuidadaid Esus tantiasho Nuquin Papan nuqui bédamboen isec. Aden nuqui bédamboen ismequid Esus chuibeneguid nebi. <sup>9</sup> —Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bédamboen isquin cuidenquo iquendac. <sup>10</sup> —Ĕbi cuidmenquo icnuec abided cuidadaid Esus tantiambi —quequin otacquo tantiaquiděn: —Esus tantiaquid nebi —quequin utsibo abimbo chuisho bédamboen isquin Nuquin Papan cuidenquo iquendac.

<sup>11</sup> Ambi chiaid Nuquin Papan dada uamiacpaden: “Aid tantiec: ‘Něid tantiasho Nuquin Papan abi yacno nuqui tabadmědac,’ quequid uněsacsho ěbi yacno tabadmědambi.”

<sup>12</sup> Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusěn bédambo icměndac. <sup>13</sup> Aden Esusěn nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique. Ĕbi bédamboen ista, Icho,’ qesho bédamboen isquin cuidenquo iquendac,” quequin dada uapampic.

<sup>14</sup> ĵMitsipaden matsesěn Esus tantiabempec? ĵEsusěn naid chiabi yacta matsesěn tantiapec? Padenquo. Esusěn naidquo chuibanaquien tantiendac. ĵEsusěn naid chuisho tantiash: —Mua —quequidta Esus tantiaquid nepadic?

Padenquio. —Abimbo caic —qeshun: —Min Mado Esus tantiembique. Èbi bédamboen ista, Papa —quequidien Esus tantiaquid nec. <sup>15</sup> ¿Mitsipadoaidèn Esusèn naid chuibampec? ¿—Chuita —cacmaidènda chuibampec? Padenquio. Nuquin Papan: —Con Mado chuibeneta —caidien Esusèn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

### *Isadaidbo dadpeshun Esus tantienquio yaid*

<sup>16</sup> Adquidèn Esusèn naid chuibanac isadaidbo dadpeshun Esus tantienquio iquec. Daèdpactsècshun tantiec. Abi tishabi icnuc aden abi tantiesabo Esusèn chuite Nuquin Papan con tsusedpa Isayas caid dada uamepampic naden. “Mimbi chiaidquio èmbi chuibansho ¿tsuntsin tantiapec, Papa? Daèdpactsècshun: ‘Abimbo mimbi chiec. Mibi tantiaquin mimbi chiapadomboen naimbi,’ èbi caindac, Papa,” quequin Esusèn aton Papa chuite Isayasèn dada uapampic. <sup>17</sup> Aden Esusèn naid chuibansho tantiashun: —Abimbo caic —qeshun utsibon Esus tantiec.

<sup>18</sup> ¿Esusèn naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiadèn naid chuibanquidèn chuibanendac.” Aden chuibansho ma con matsesèn tantiaboc. <sup>19</sup> Aden Nuquin Papan chiaid chuisho tantiash: —Tantiadenquio yec onquec —¿quepecta icnèdash con matses? Padenquio. Tantiashi abi bédamboen tantiate bunenquio icsho isun matses utsibo bédamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi èmbi bédamboen iste mimbi danubi èmbi con matses cacmaidobi matses utsibo bédamboen isbenendambi.

Èmbi matses utsibo bédamboen iso isash: ‘¿Atotsieshun Nuquin Papan matses utsibo bédamboen ispec?

Icsambo iquec,’ quec mibi chushquendac.

Matses utsibobi èbi tantiabi icquido èbi tantiamendambi.

Aido bédamboen isquin mibi nèishèmendambi,”

quequin Nuquin Papan Moises dada uamepampic. <sup>20</sup> Adembidi dacuèdenquio icquin Isayasèn Nuquin Papan matses utsibo bédamboen iste dada uapampic.

“ ‘Nuquin Papa tantiatiadquio iquebi,’ quenquio icquidombi èbi tantiabenosh.

‘¿Mitsipadembimbi Nuquin Papa bédamboen ismepeba?’ quesabobi èmbi bédamboen iste tantiamiombi,”

quequin Isayasèn Nuquin Papan chiaid dada uapampic. <sup>21</sup> Isadaidbotsen chuiquin Nuquin Papan chiaidquiobidi Isayasèn naden dada uapampic. “

‘Mibi tantiac unèsquio iqueque. Èbi bédamboen tantiata,’ cadeniaqui: ‘Padi, mibi tantiatiapimbo iquebi,’ quequin ènenquio icquin èmbi chiaid mimbi niac-niacpec,” quequin Nuquin Papan chiaid Isayasèn dada uapampic.

## 11

### *Ambi chiactedi isadaidbo Nuquin Papan bédamboen isaid*

<sup>1</sup> ¿Ambi chiaid niac-niacsho isadaidbotedida Nuquin Papan chieshèmpec? —Con matses catiapimbo iquebi —¿quecta iquec? Padenquio. Isadaidbombo nebi. Èndenquimboshè con tsusedpa Abadaun campidèn baban tishimaid Benaminèn tsyuecquidon tsyuecquid yec isadaidbombo nebi. Adquid icsho Nuquin Papan chieshènenquio iquebi. <sup>2</sup> Èndenquimboshè nidaid uabi icquimbi Nuquin Papan: —Con matses caindambi —quequin con matses isadaidbo



tantiapampic. Adshun abitedi chieshēnenquo iquec. ¿Ediasēn chiampid tantienquioda ique? Aton matses isadaidbo nēishēnshun Nuquin Papa naden chuiapampic. <sup>3</sup> “Mimbi con matses caidotedi icsamboshē icquec, Papa. Mimbi chiaid chuibanquidobi cuesun secac. Papa quequin mibi menequin ismete cuēnote nacnenaïd uesquin chic-chicpac, Papa. Icsamboshē iquec. Ēbiuidtsēqui bēdambo iquec. Mimbi chiaid chuibansho tantiashun ēbi cuesunetiadquo iquec, Papa,” quequin Ediasēn Nuquin Papa chuiapampic. <sup>4</sup> Adoac ¿mitsipadomboen Nuquin Papan chuiapampic? “Ēbi tantiaquido abi iquec. Ēmbi namiacpadomboen isadaidbo dadpēnshun 7000tedishun ēbi tantiec. Ēbi tantiesabon papa quequin nacnenaïd Bad caïd tantienquo icquin ēbi tantiec,” quequin Nuquin Papan Ediasēn chuiapampic. <sup>5</sup> Adembidi nēbi con matses isadaïdbon ambi tantiactedishun Esus tantiasho Nuquin Papan bēdamboen isec. <sup>6</sup> ¿Ambembida con matsesēn Nuquin Papa bēdamboen ismepec? Padenquo. —Ēmbi chiacpadomboenuïdi nasho matses bēdamboen isembi —¿quecta icpec Nuquin Papa? Padenquo. Aden naquid nibēdsho bēdamboen istiapimbo icboedēmbi ambi tantiactedishun icsaboedon Esus tantiasho Nuquin Papan bēdamboen isendac.

<sup>7</sup> Isadaïdbon ambi tantiactedishun Esus tantiasho Nuquin Papan bēdamboen isec. Isadaïdbo utsiboen bēdamboen istiapimbo iquec. Aïdo: —Nuquin Papa bēdamboen ismete bunquin ambi chiacpadomboenuïdi ěmbimbo nanu —queboedombi nainquo icsho Nuquin Papan bēdamboen istiapimbo iquec. Abi bēdamboen ismequidquo Esus chieshēnsho Nuquin Papan pacuēnēdacbimboecnuc isadaïdbo icmepanēdash. <sup>8</sup> Aden ambi isadaïdbo pacuēnēdacbimboecnuc icmete chuiquin Nuquin Papan dada uamepampic naden.

“Nuquin Papan pacuēnēdacbimboecnuc icmiac Nuquin Papan chiaïd chiaqui tantiatiapimbo iquec,”

quequin dada uamepampic. <sup>9</sup> Adembidi ambi isadaïdbo pacuēnēdacbimboecnuc icmete chuiquin Nuquin Papan con tsusedpa Dabïd naden dada uamepampic ěndenquimboshē.

“ ‘Ēbi bunaiduidi naic ěbibi bēdambo iquebi,’ quequidēmbi Nuquin Papa bēdamboen tantienquo iquec.

Adsho Nuquin Papan cuidpashun.

Cuidadnushi abimbo chiaïd danec: ‘Ēmbembi naic bēdambo iquebi,’ quendac. Adec abi tantienquo yec icsasho Nuquin Papan cuidpashun.

<sup>10</sup> Pacuēnēdacbimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaïd Dabïdēn dada uapampic.

### *Nuquin Papan matses utsibo bēdamboen isbenaid*

<sup>11</sup> ¿Aden pacuēnēdacbimboecnuc icmiac Esus tantiatiapimbo icsho isadaïdbo padpiden bēdamboen tantiametiapimboda Nuquin Papa icpec? Ambï tantiacpadomboen bēdamboen tantiamendac. Nēbi isadaïdbo dadpen bēdamboen istiapimbo icquimbi matses bēdamboen iste bunquin Nuquin Papan matses utsibo Esus tantiamequin bēdamboen isbenec. —Ēmbi adosho isash isadaïdbotsen ma nadnu. “Nuquin Papa bēdamboen ismete bunquiebique. Ēmbitsen Esus tantianu,” ma quenu —queshun Nuquin Papan aden matses utsibo ambi bēdamboen iste tantiamiac. <sup>12</sup> Ambï chomiaïd Esus tantienquo icsho isadaïdbo dadpen bēdamboen istiapimbo icquimbi matses utsibon Esus tantiasho ambi con matses caïdo isadaïdbobimboecnuc

Nuquin Papan bēdamboen isbenec. Ambi tantiacpadēn ambi tantiami-acpadomboen isadaidbo dadpeshun Esus tantiabensho Nuquin Papan bēdamboen isendac. Adshumbic matses utsibobēdta isadaidbo Nuquin Papan bēdamboshē icmendac.

<sup>13</sup> Tantia, matses utsibo. Mibitsen chuinu. Nuquin Papan icmiac-padomboen matses utsibo Esusēn naid chuibenequidquo nebi. Ēmbi chuibeneboed con matses isadaidbo chuibanombi naden. —Esusēn naid ēmbi chuibeniac matses utsibon Esus tantiabenosh. Adsho Nuquin Papan aido bēdamboen isbenosh —quequin con matses chiombi. <sup>14</sup> —Aden Nuquin Papan matses utsibo bēdamboen isaid ēmbi chuisho tantiasht Nuquin Papa bēdamboen ismete bunquin Esus tantiatsiash. Adsho Nuquin Papan bēdamboen istsiash —qeshun con matses aden chiombi. <sup>15</sup> Aden isadaidbon Esus chieshēnsho isun Nuquin Papan matses utsibo Esus tantiamequin bēdamboen isbenac. Ambi tantiacpadēmbi isadaidbontsen Esus tantiasht Nuquin Papan bēdamboen isbenendac. Isadaidbontsen Esus tantiatededsho isumbic Nuquin Papan matses unēsaidotedi uincuemendac. <sup>16</sup> Con tsusedpa Abadauan abi tantiaquidquo icsho Nuquin Papan bēdamboen isquin: — Con matses mibi caimbi. Adembidi min tsyuecquidotsen ēmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuēte caniachso: — Tapunuidtsēqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaidbotedi con matses caic. Caniec taēquid cuēte tapumbimboecquid abia con matses caid Abadauan nec. Cuēte cuidibimboecquido Nuquin Papan con matses caidobidi Abadauanēn tsyuecquido isadaidbo nec.

<sup>17</sup> Aden ambi con matses caidombi ambi chomiaid chieshēnsho cuēte cuidi utsi pobinun pateshuniacimboben Nuquin Papan isadaidbo dadpen bēdamboen istiapimbo iquec. Matses utsibo Esus tantiamequin cuēte dada utsi pobiacimboben aton matses icmequin ēbipadquid isadaidbo ambia Esus tantiaquidobēdta Nuquin Papan mibi bēdamboen isec. <sup>18</sup> Adoac icsamboec onquenda. —Isadaidbo dadpen bēdamboen isenquo icquin Nuquin Papan ēbien bēdamboen isec. Isadaidbo icsambo iquec. Ēbien bēdambo iquec —quequin icsamboen chienda. Aden icsamboen chuitiadquo icquimbi nēid chiaidtsen tantia. Cuēte tapunabi icnuc dada yec podo yec quec cuēte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibēdtsempampic. Isadaidbo nibēdnuc isadaidbon chidon Esus tishenquo ictsempañēdash. Ēmbi aden chiac isadaidbo chiec icsamboec onquenda.

<sup>19</sup> ¿Ēbi adsho tantiashta mibi nadpe? —Ambi con matses caido chieshēmēnsho isun cuēte cuidi pateshuniacimboben nēbi isadaidbo dadpen Nuquin Papan bēdamboen isenquo iquec. Ēbipadquid matses utsiboen bēdamboen isbenac —¿quecta ique? <sup>20</sup> Abimbo mimbi caic. ¿Atotsieshun Nuquin Papan isadaidbo bēdamboen istiapimbo icpec? Ambi chomiaid Esus tantienquo icsho Nuquin Papan aido bēdamboen istiapimbo iquec. Padnuen Esus tantiasht mibi bēdamboen isec. Adoac: —Ēbi bēdambo icnubi isadaidbo icsambo iquec —quenda. —Esus tantienquo icsho isadaidbo cuidacpadomboen ēbitsen Nuquin Papan cuidpanundac —quequin Nuquin Papa Esusbēdta tantiaquiota. <sup>21</sup> Ambi con matses caidon Esus tantienquo icsho Nuquin Papan bēdamboen istiapimbo iquec. Adembidi matses utsibon Esus tantienquo icsho Nuquin Papan mibi bēdamboen istiapimbo iquec. Esus tantiaquiota.

<sup>22</sup> Aden Esus tantiash nadec onqueta. —Esus tantiasho bēdamboen isquid yec Esus tantiengquo icsho isun cuidquid Nuquin Papa nec —cata. Esus tantiengquo icsho cuēte cuidi pateshuniacimboen cuidquin isadaidbo bēdamboen isenquo iqueque. —Esus tantiengquo yansho adem-bidi ēbitsen cuidpanundac —qeshun chieshtoenquo icquin Esus tantiana. <sup>23</sup> —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. <sup>24</sup> Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaid pobiacimboen Esus tantiamequin Nuquin Papan mibi bēdamboen isec. Adoac Esusbēda Nuquin Papa mimi bēdiactsēc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ēden dada uapampic. Ambi tantiacpadēn ambi cuēte bēda cuidi peteshuniaid abibidi pobioacimboembī Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēda Esus bēdamboen tantiaquidac.

*Ambi chiacpadēn Nuquin Papan isadaidbotsen bēdamboen isoaid*

<sup>25</sup> Tantia. —“Isadaidbo icsambo iquec,” quequin chuinushe —qeshun mimi tantiacmaid Nuquin Papan chiaid mibi chuinu. Nuquin Papan pacuēnēdacimboecnuc icmiac con matses dadpen Esus tantiate bunengquo iquec. Daēdpactsēcshun Esus tantiec. Nuquin Papan tantiactedishun matses utsibo dadpenshumba Esus tantiambic <sup>26</sup> paposhquiacimboen con matses isadaidbo dadpenshun Esus tantiendac. Aden tantiasho Nuquin Papan con matses bēdamboen isendac. Aden ambi isadaidbo bēdamboen iste chuiquin Nuquin Papan naden dada uamepampic. “Icsambo icquidobi cuidmenquo icnuec Nuquin Papa yacnuēsh choquid isadaidbon chidon tishaid iquendac.

Aidēmbi isadaidbo Nuquin Papa tantiaquid padpiden icmendac.

<sup>27</sup> ‘Aden ēmbi chiacpadomboen ēmbi chomiaid tantiasho abi icsaid bēpiscudquin isadaidbo bēdamboen isendambi,’ quependac Nuquin Papa,” quequin ambi chiaid Nuquin Papan dada uamepampic.

<sup>28</sup> Nēbi Esus chieshēnscho isadaidbo bēdamboen istiapiambo icquin Nuquin Papan matses utsibo mibi Esus tantiamiac. Ambi nēbi bēdamboen istiapiambo yaido isadaidbo unēsquo icnuc Nuquin Papan tantiaquiec. —Ēmbi aton tsusedpabo chiampicpaden aido con matses caimbi —qeshun adoec.

<sup>29</sup> Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. <sup>30</sup> Min matsesēn isadaidpembon Nuquin Papa tantiengquo yacimboen nēbi isadaidbon Nuquin Papa tantiamequid Esus tantiengquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bēdamboen isbenac. <sup>31</sup> Con matsesēmbien abided cuidadaid Esus chieshēnquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac. <sup>32</sup> Aden matses abitedishun ambi chiaid niac-niacsho isun: —Abitedimbo icsaquiec —quequin matses bēdamboen istiapiambo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenec.

<sup>33</sup> Aden Nuquin Papan bēdamboen iste chuisho tantiash nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquid nec. Abitedimbo tantiaquid icquin ambi natiapimbo ictequid

nibëdnuc bëdamboen naquidquio nec. ¿Ada adquid icsho Nuquin Papan naidtedi matsesën tantiapadic? Padenquio. Ambi naidtedi matsesën tantienquio iquec. <sup>34</sup> “¿Nuquin Papan otacquo tantiaidtedida matsesën tantiapadic? Padenquio. ‘¿Mimbi tantienquio iquec. Ëmbi chiacpadomboen nata,’ quequinda matsesën Nuquin Papa chuipadic? Padenquio. Ambi tantiapadomboen Nuquin Papan naindac.” <sup>35</sup> “¿Ada matsesën Nuquin Papa menepadic? Padenquio. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquio. Matsesën: ‘Con na nec,’ caidtedi Nuquin Papan na nendac.” <sup>36</sup> Abitedimbo uaquidquio yec abitedishun Icbombo Nuquin Papa nec. —Uesadec nibëdanushë —quequin abitedimbo isquidquio nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquio icquin.

## 12

### *Esus con Icho cain ambi chiacpadomboen naid*

<sup>1</sup> Con utsibobimboecquido mibi neque. Tantia. Mibi chuinu. Nuqui cuidmenquio icnuec abidedi cuidadaid Esus tantiasho Nuquin Papan nuqui bëdamboen isequ. Nuquin Papa bëdamboen tantiatadquio icquin nadonona. —Ëbi bunaid nainquio yec mibi bëdambo icmenuec mimbi chiacpadec bëdamboec tabadtiadquio iquebique. Min yuambo ëbi icme, Papa —quequin Nuquin Papa chuinuna. <sup>2</sup> Esus tantiesabon nacpadomboen nainquio icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bëdamboec tabadquin nuqui tantierendac. Aden naic nuqui bëdambo iquendac. <sup>3</sup> Tantia. Nuquin Papan tantiamiacpadomboen mibi chuinu. Nadenda. —Ëbiuidtsëqui bëdambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datantiadec: —Adquid nebi —quequin abimbo chuita. <sup>4</sup> Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsiash? Padenquio. ¿Mitsipadquio min dada icpec? ¿Abichobida bedantequid icpec? Padenquio. Mëdanteuidtsëquien bedantequid iquec. ¿Abichobida istequid icpec? Padenquio. Èshëuidtsëquien istequid iquec. ¿Abichobida shëdtequid icpec? Padenquio. Dëbiatuidtsëquien shëdtequid iquec. <sup>5</sup> Min dada yacimbboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanquid yanec. Esus tantiaquidotedi yec bëdamboec tantiananquin nashunanquido yanec. <sup>6</sup> —Ma utsibo nashunu —queshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi tantiaquido oncamiaid iquendac. Adquid icquin Nuquin Papan Mayanën tantiamiaiduidi chuibanta. <sup>7</sup> Utsibic: —Utsibo nashunquid icta —caid iquendac. Adquid icquin bëdamboen nashumbanta. Utsibic Nuquin Papan: —Ëmbi chiaid bëdamboen tantiashun chuibanta —caid iquendac. Adquid icquin Nuquin Papan chiaid tantiatsëcquido bëdamboen tantiameta. <sup>8</sup> Utsibic: —Chieshtoenquio icquin Esus tantiec bëdamboec tabadnuna —quequin bëdamboec tabadquin ismequid iquendac. Adquid Nuquin Papan icmiaid icquin Esus tantiaquido bëdamboec tabadte tantiameta. Utsibic aton na nibëdquido aton na menequid Nuquin Papan icmiaid iquendac. Adquid icquin cudasenquio icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusën namiacpadomboen Esus tantiaquido bëdamboen nameta chieshenquio icquin. Utsibic dada icsaido yec isedanquido yec aton shubu nibëdquido yec aton pete nibëdquido yec

macho yec tsusioctšec yec quesho bēdamboen nashunquid iquendac. Adquid icquin Esusēn chiacpadomboen chieshtoenuio icquīn nashumbanta.

*Esus tantiaquidon nadoquid, quiaid*

<sup>9</sup>—Mibi tantiac unēsquo iquec —quequin utsibo chuiquin abimbo chuinuna. Muainquio icquīn utsibo tantiaquionona. Chieshēmēnenquio yec bēdamboec tabadnuna. Utsibon: —Icsanuna —caqui: —Padi —quiash icsainquio yec bēdamboec tabadnuna. <sup>10</sup>—Ēbēdtan Esus tantiaquido con utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin. <sup>11</sup>Nuquin Papan chiacpadomboen naic chieshtoenda. Nuquin Papan Mayanēn tantiamiacpadecec Esus tantiec chieshtoenuio yec bēdamboec tabadnuna. <sup>12</sup>—Unēsacsho abi yacno Nuquin Papan ēbi tabadmendac —quec cuishonquenuna. Esus tantiaquido icsho utsibon chieshēnaqui chieshtoenuio icquīn Esus tantianuna. ¿Atotsi natiamiantē utsi icpec? Adquid tantiec shubiquimbi chieshtoenuio icquīn Esus tantianuna. Baded-badedquien Nuquin Papa chian-chianuna. <sup>13</sup>Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquīn shubun ushmequinc canuna. <sup>14</sup>Esus tantiaquido yec nuqui chieshēnquidobēdi chieshēnanenquio icnuna. Chieshēnanenquio icquīn Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa —quequin Nuquin Papa chuinuna. <sup>15</sup>Utsi bēdambo yec cuishonquesho isash aidbēdi cuishonquenuna. Utsi unēsquo icnuc shubisho isash aidbēdi shubinuna. <sup>16</sup>Cuesnanenquio yec chieshēmēnenquio yec bēdamboec tabadnuna. —Con nauidtsēqui naimbi —quenquio icquīn utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquio yec bēdamboec tabadnuna. —Chuiquid dapabēduidtsēqui onquequid nebi —quenquio yec matses abitedibēd onquec bēdamboec tabadnuna.

<sup>17</sup>Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna. <sup>18</sup>Uimanēmēnquido icsasho isun aid chuiquin: —Bēdamboequien tabadtiad —canuna. Adquidobēd chieshēnanenda. <sup>19</sup>Ēmbi tantiaido mibi neque. Tanta. Chuinu. Nuqui chieshēnquidobēdi cuidnanenquio icnuna Nuquin Papan naden chiaid tantia. “Matses cuidnanac icsambo iquec. Ēbentsēquibini icsaido cuidquid nec,” quequin Nuquin Papan chiaid dada uapampic. <sup>20</sup>Nuqui chieshēnquidobēdi cuidnanenquio icquīn bēdamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bēdambo icquīdi chieshēnec icsachitobi,’ quiash ma nēish bēdanu,” quiash <sup>21</sup>adec cuidnanenquio icquīn nuqui chieshēnquido bēdamboen isnuna.

## 13

*Chuiquid dapan chiacpadomboen Esus tantiaquidēn naquid*

<sup>1</sup>Aton matses chuiquid dapan chiacpadomboen Esus tantiaquidēn naquid. Adembidi aton nidaid pais caidēn tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibēdtsiash. Nuquin Papan chuiquid dapa icmiaidien aido nec —queshun aidon chiacpadomboen naquid Esus tantiaquidēn. <sup>2</sup>Nuquin Papan chuiquid dapa icmiaidēn chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid.

<sup>3</sup> Bēdamboec tabadquidon chuiquid dapan cuidte dacuēdēntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bēdamboec tabadta. Adsho isun: —Mibi bēdamboec tabadec —catsiash chuiquid dapabon. <sup>4</sup> —Ma matses bēdamboec tabadnu —quequin Nuquin Papan chuiquid dapa icmiaidēn mibi bēdamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ēbi cuidpanundac —quiash icsaquid dacuēdendac. <sup>5</sup> Ēbi adsho tantiaishun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

<sup>6</sup> Bēdamboen tabadmenuen Nuquin Papan chuiquid dapa icmiaidon: —Ēmbi chiacpadomboen nata —cac naquid Esus tantiaquidēn. <sup>7</sup> Aden chuiquid dapan chiacpadomboen nanuna. Aid bēdamboen isnuna. Aidēn: —Nata —cac nanuna chieshenquio icquin.

### *Utsibo tantiaquionona, quiaid*

<sup>8</sup> —Ēmbi nashumbocpadomboen ēbi cuidquin nashunenquio iquec —camenda. Abi nashunquidobēd cuidnanquid Esus tantiaquid. Esus tantiaquidbidi bēdamboec tantiananquid. Adec bēdamboec tantiananquin Nuquin Papan Moises chiampicpadomboen nuqui bēdamboen natsiac. <sup>9</sup> “Ambi naiduidtsēqui nainquio yec abibi datantiadacimboec ma matses bēdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bēnēpenquio chudmenda chidon. Cuesunenda. Ampenda. Utsin na isash: ‘Adquid con na nibēdosh,’ quec chieshēmēnec tabadenda,” quequin Nuquin Papan con tsusedpa Moises dada uamepampic. Aidēn chiacpadomboen natiadquio icquin nuquibi datantiadacimboen utsibotsen tantiaquionona. <sup>10</sup> Utsibo bēdamboen isquin aido icsa uatiapimbo nuqui ictsiac. Aden utsibo bēdamboen tantiaisho Nuquin Papan: —Aden naic ēmbi Moises chiacpadec bēdamboec tabadec —caindac.

<sup>11</sup> —Nēbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacimboen nainquio icboedi nēbi ushash isucunacimboec dayacquio yec chieshtoenquio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: <sup>12</sup> —Nēbien Esus chochitec —quedonetsēcquiec bēdamboec tabadnuna. —Satanasēn yuanushe —qeshun Esus tantiaquin nuqui icsaid ēnshun bēdamboen nanuna. <sup>13</sup> Icsainquio yec: —Bēdambo iquebique. Ma isnu —quiash bēdamboec tabadnuna. Tantiadenuen actequid paēmbo icquid aquenquio icquinc utsin chido chudenquio icquinc utsin bēnē chudmenquio icquinc chido utsi mēismenquio icquinc canuna. Adecbidi utsin na isash: —Con na adquid nibēdec —quiash chieshēmēnec tabadenquio icnuna. Adembidi utsin mibi bunaid nasho isash: —Aden ēbi namenquio icpec —quec chieshēmēnenquio icnuna. Icsainquio yec bēdamboec tabadnuna. <sup>14</sup> —Icsate bunchitebi. ¿Mitsipaden naiquini icsape? —quenquio yec Esus tantiaquiec abi tabadacpadquiec bēdamboec tabadnuna. Nuqui icsate bunaid ēnquionona.

## 14

### *Esus tantiaquido utsibo bēdamboen isaid*

<sup>1</sup> Nuquibēdtan Esus tantiaatsēcquidon nuqui nacpadomboen nainquio icsho bēdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bēdambo iquec. Naden nac icsambo iquec —quequin uesquin chiabi iquec. Aden Nuquin Papan

chiacmaid chiec nuquibëdta Esus tantiatsëcquido: —Ëmbi natemaid nec —queshobi: —Icsamboen chiec —cainquio icnuna. <sup>2</sup> Esus tantiaquidquido: —Pete abitedi pambidbëdta pesho Nuquin Papan nëishënenquio iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. <sup>3</sup> Pambid pequidobëdta pambid isuidquidombi Esus tantiasho Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamënshunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash. <sup>4</sup> ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bëdambo iquec —caquid icbon. Nuquibëdta Esus tantiaquid Nuquin Icbon yua icsho: —Ëmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bëdambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

<sup>5</sup> Esus tantiaquido utsi-utsiec: —Aid badiadquidënuidtsëqui Esus tantiec cuëdënac bëdambo ictsiash —quenubien utsibo: —Badiadquidën badiadquidënqueic Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquio iquec. Esus tantiaquid ambi tantiacpadënquiobi cuëdënac bëdambo ictsiash. <sup>6</sup> Aden Esus tantiaquin nac bëdambo ictsiash. Adembidi Esus tantiaquin: —Mimbi pete uaid bëdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bëdambo iqueque. Aid penu —queshun utsi pequimbi pambid isuidquid iquendac.

<sup>7</sup> ¿Esus tantiaquid ambi naid-uidi naquidta nedic? Padenquio. ¿Ambi tantiacpadën unësquidta nedic? Padenquio. <sup>8</sup> Nuquin Icho Esusën chiacpadomboen natiadquio yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. <sup>9</sup> Adec Nuquin Icho icnuec abided cuidadec unësash Esus uincuempañdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

<sup>10</sup> —Adquid Nuquin Icho iquec —quesho ¿tantiashunda nuquibëdta Esus tantiaquid mamënshuntiad? Padenquio. ¿Nuquin Papan chiacmaid chiec: —Ëmbi nacpadomboenuidi nainquio yec icsambo iquec —quequina chushcaciad? Padenquio. Nuquin Icho Esusbëdta Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. <sup>11</sup> Adote chuiquin Nuquin Papan ambi chiaid naden dada uamepampic.

“Tantia. Abimbo caimbique. Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac.”

quequin Nuquin Papan dada uamepampic. <sup>12</sup> Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

### *Utsibo icsamenquio icnuna, quiaid*

<sup>13</sup> Èbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ëmbimbo natemaid naic aido icsambo iquec —nuquibëdta Esus tantiaquido cainquio icnuna. Adenquio icquin

nadonona. —Ĕmbi ambi natemaid nasho isash chieshtoshon Esus tantienquoio yanushe. Ambi natemaid naquin ismenquoio iquembi —queshun Esus tantiaquidtedi bēdamboen isnuna. <sup>14</sup> Nuquin Icho Esuquidistu tantiaquidquo icquin ĕmbien naden tantiec. —Nēbi Nuquin Papan: “Petemaid nec,” caid nibēdec —quequin tantiemi. Ĕbi adnubi utsibo: —Petemaidquoio nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. <sup>15</sup> Adsho tantiashun aido bēdamboen tantiaquin ambi petemaid nuqui pemenquoio ictsiac. Ambi petemaid pemequin mimbi aido tantienquoio iquec. —Ĕmbi petemaid piash icsachitobi —quequin Esus tantienquoio yanushe. Ambi petemaid pemenda. —Nēid petemaid nec —quequido aidotsen tantiaquin cuidmenquoio icnuec abided cuidadec Esus unēsaque. Aido tantiata. <sup>16</sup> —Nuquin Papan chiaid niaquenquoio icquin Esus tantiaquido utsibon: “Aden naic icsatsiash,” caid naimbi. Ĕmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ĕmbi natemaid naique —camenda. <sup>17</sup> ĸ—Nadquid petemaid nec. Nadquid actemaid nec —quequin petebēda acteuidi tantiecta Nuquin Papan chiacpadec Esus tantiaquido bēdamboec tabadpatsiash? Padenquoio. Aton Mayan nuquibēdi tabadmiac chieshēmēnenquoio yec cuishonquec Esus tantiaquido bēdamboec tabadendac. <sup>18</sup> Adec Esuquidistun chiacpadec tabadsho isun Nuquin Papan: —Bēdambo iquec —caīndac. Matsēsēnsen: —Aido bēdambo iquec —caīndac.

<sup>19</sup> Ĕmbi chiacpadec chieshēmēnenquoio yec bēdamboec isananuna. —Esus tantiec chieshtonenquoio yec bēdamboec tabadnuna —quec chuinanuna. <sup>20</sup> —Nuquin Papan bēdamboen isaidon Nuquin Papa Ĕsusbēda tantienquoio yanushe —queshun utsibon petemaid pequin aido chieshtomenda. Nuquin Papan: —Matsēsēn petemaid nec —caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiac. <sup>21</sup> —Ĕbēdan Esus tantiaquido icsamemane —queshun ambi petemaid pambid penquoio icquinc ambi actemaid acte paēmbo icquid aquenquoio icquinc ambi natemaid utsi nainquoio icquinc cac bēdambo ictsiash. <sup>22</sup> Nuquin Papan: —Matsēsēn natemaid nec —cacmaid tantiaquin: —Ĕmbimbo petequid nec. Ĕmbimbo actequad nec. Ĕmbimbo natequad nec. Aden nasho Nuquin Papan ĕbi cuidenquoio iquec —quequin mimbi tantiaid caic: —Natemaid nec —quequido naden chienda. —Ĕmbi nacpadomboen nainquoio yec mibi icsambo iquec —cainda. Adembidi aidon: —Ĕmbi natemaid nec —caboed naquin ismenda. Chieshtonoshe. <sup>23</sup> Adquid ambi: —Aid pesho Nuquin Papan nēishēnchitembini ictsiash —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsiash. —Aden naic icsachitequini ictsiac —nuqui caidtedi naic nuqui icsatsiac.

## 15

### *Nuqui bunaiduidi nainquoio icnuna, quiaid*

<sup>1</sup> Esus tantiaquidēnquoio Esus tantiatsēcquid chieshēnenquoio icquid. —Natemaid nec —quequin Nuquin Papan chiabi icnubi Esus tantiatsēcquid: —Esus tantiaquin ĕmbimbo natemaid nec —quesho tantiashun ambi natemaid naquin ismequin chieshtomenda. Aid tantiaquin ambi natemaid nainquoio icquin nuqui bunaiduidi nainquoio icnuna. <sup>2</sup> —Esus tantiatsēcboedēmbi



ma Esus bēdamboen tantiabenquiono —quequin nuquibēdtan Esus tantiatsēcquidēn natemaid nainquio icnuna. —Aden naic mibi bēdambo iquec —camenuen ambi natemaid nainquio icnuna. <sup>3</sup> Esuquidistun ambi naiduidi nainquio icquin Nuquin Papan chiacpadomboenuidi naic abi chieshēnquido yacnōbi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ēbi icsamboen chuishunec, Papa,” quequin Esusēn abi chuite Nuquin Papan dada uamepampic. <sup>4</sup> Aden con matses isadaidbobēda matses utsibo abifedi bēdamboen tantiamenuen Nuquin Papan ambi chiaid dada uamedenepampic. —Nēid isban-isbanquin ēbēda Esus ēnenquio icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadendabi,” ma matses quenu—qeshun ambi chiaid dada uamepampic. <sup>5</sup> Aden matses chieshtoenuio icnuc bēdamboen tabadmequid Nuquin Papa mibi chianembi. —Chieshtoenuio icquin Esus tantiaquid icmequin dayacquio yacbimboecnuc matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isanquid icmeta, Papa. <sup>6</sup> Mimbi adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Icbo Esuquidistun Papa mibi nec. Mibi bēdamboshē iquec,” quequin mibi chuitsiash, Papa —quequin Nuquin Papa mibi chianembi.

### *Nuquin Papan matses utsibo Esus tantiamiaid*

<sup>7</sup> Tantia. Padpiden mibi chuinu. —Nuquin Papa bēdambo iquec —nuqui camenuen Esuquidistun nuqui bēdamboen isequē. Bēdamboec isanuna. Isadaidbo yec isadaidpembo yec quec bēdamboec isanuna. <sup>8</sup> Esuquidistu matses abitedi bēdambo icmenuec matsesbēd tabadpanēdash. Esus chote chuiquin Nuquin Papan dada uamepampicadec isadaidbobēdi tabadquin Esusēn aido nashumpanēdash. —Nuquin Papan abimbo chuiampic —quequin tantiamenuen adopanēdash. <sup>9</sup> —“Icsaboedombi Esus tantiasho Nuquin Papan bēdamboen isquin cuidenuio iquec. Nuquin Papa bēdambo iquec,” ma isadaidpembo matses utsibo quenu —quecbidi Esus matsespanēdash. Aidēn abi chuite chuiquin Nuquin Papan naden dada uamepampic.

“Isadaidpembo matses utsibobēdtan mibi naden chiendambi.

“Nuquin Papa bēdambo iquec,” caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic. <sup>10</sup> Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobēdi cuishonqueta.

“Nuquin Papa bēdambo iquec,” quec cuishonqueta,”

quequin Nuquin Papan chiaid dada uapampic. <sup>11</sup> Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

“Nuquin Papa bēdambo iquec,” cata.

“Nuquin Papa bēdambo iquec,” quec cuēdēncuededec tabadta,”

quequin dada uapampic. <sup>12</sup> Adembidi isadaidpembon matses utsibon Nuquin Papabēda Esus tantiabente chuiquin Nuquin Papan con tsusedpa Isayas naden dada uamepampic.

“Dabidēn papa Isai caid ēnden unēsapidēn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nëidën nuqui cuidmenquio iquendac,’ quependac isadaidpembo matses utsibo,<sup>13</sup> quequin dada uapampic.

<sup>13</sup> Aden chiampid mibi nec. Nuquin Papa Esusbëdta tantiaquido icsho mibi Nuquin Papa chianembi. —Mibëdi matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuëdenquo icnuc bëdambo icmeta. Aden min Mayan aidobëdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

### *Matses utsibo Esus chuibanquid nebi, quiaid*

<sup>14</sup> Con utsibo mibi caimbique. Tantia. Mibi chuinu. —Nuquin Papan Mayanën tantiamiacpadec bëdamboec isanec bëdamboec tabadtiadquo icquidien nec. Aidën tantiamiacpadomboen Nuquin Papan chiaid bëdamboen tantiec: “Nuquin Papan chiacpadec bëdamboec tabadnuna,” quec chuinanquidien nec —quequin mibi tantiombi. <sup>15</sup> Aden tantias: —Nëishënushe —quenquo icquin: —Bëdamboec tabadta —quequin chuiquin nëid dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquo bëdamboen mibi tantiamenuen dada uaimbi. <sup>16</sup> Nuquin Papan icmiacpadquid Esusën naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bëdamboen iste chuibeniombi. Adoac matses utsibon Esus tantiabensho isun aton Mayanën bëdamboen tabadmesho: —Bëdambo iquec —caindac Nuquin Papan.

<sup>17</sup> Aden: —Esuquidistu bëdamboshë iquec —quequin matses utsibo dadpen Esusën naid chuibeniombi. <sup>18-19</sup> Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibeneguimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choabi Edusaden yacnobidi. <sup>20</sup> Esusën naid chiacmanouidquo Esusën naid chuibenetiadquo iquebi. Utsibon Esusën naid chuibanacno nidiapimbo iquebi. Esusën naid chuisho tantiacmaido Esus chuite bunquiebi. <sup>21</sup> Aden nate chuiquin Nuquin Papan con tsusedpa naden dada uamepampic. “Nuquin Papan chomiaidën naid chuisho tantiacmaidon tantiabenenadac. Adshun paposhquiacbimboen bëdamboen tantiendac,” quequin dada uamepampic. <sup>22</sup> —Aden Esusën naid chambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantias —quiash mibi yacno nidabi iccobi. Nëbi mibi yacno nidiadquo iquebi.

### *Mibi yacno nidiadquo iquebi, quiaid*

<sup>23</sup> —Nëbi Ididico yacno Esusën naid uesquin chuibeniac —quiash mibi yacnotsen nidiadquo iquebi. Ëdenquimbo taëec mibi yacno nidte bunondaiddi seta dadpen matamiashic adi nëbi mibi iste bunquiebi. <sup>24</sup> Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquo iquebi. <sup>25</sup> Nëbini Edusaden yacnoba nidendac. Anocquido Esus tantiaquido utsibon meniaid menenuc

nidendabi. <sup>26</sup>—Edusaden yacnocquido Esus tantiaquido utsi-utsiec aton piucquia nibèdeque. Nuquin nabi mā buanshunu. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caposhi. <sup>27</sup>Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapanēdash. Adshumbic aidon chuibeniac matses utsibontsen Esus tantiapanēdash. Aden abi nashunquin chuiquido Edusaden yacnocquido caic: —“Piucquid nibēdec,” quiac caoshe. Menenuna —quesho: —Bēdambo iquec —caombi. <sup>28</sup>Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaid utsi Espania yacno nidquin mibi isbidanendambi. <sup>29</sup>Mibēdi tabadquin ěmbi Esus tantiamequin chuisho Esusēn nuqui bēdambo icmendac.

<sup>30</sup>Ěmbi tantiaidombo mibi neque. Tantia. Chuinu. Nuquin Icbo Esuquidistun aton Mayambēdtan tantiamiacpadec nuqui bēdamboec tantiananec. Ěbi tantiaquin Nuquin Papa chianeta. —Ěnenquio icquin Esus tantiamequin mimbi chiacpadomboen Pabado name, Papa. <sup>31</sup>Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquo icnushe. Bēdamboen bedmeta, Papa —quequin Nuquin Papa chianeta. <sup>32</sup>Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bēdamboec tabadendac Esus tantiamenanec. <sup>33</sup>Aden mibi tantiaquin: —Nuqui dacuēdenquio icnuc bēdambo icmequid Nuquin Papa mibēd icpashun —caimbi.

## 16

### *Mibi unēsquio iquec, quequin chiaid*

<sup>1</sup>Nuquibēdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bēdamboen ista. Shubu dadpen icquid Senquedeya caid yacnoshon utsibo bēdamboen nashunquidquo nioshe. <sup>2</sup>Pebe bēdamboen ista. Utsibobēda ēbitsen bēdamboen nashunoshe. —Nuquibēdtan Esus tantiaquid nec —queshun bēdamboen isquin aidēn: —Ěbi nashunta —cacpadomboen aid nashunta.

<sup>3</sup>Aquida caidbēda aton chido Pidisida caid chuiquin: —Mibi caic: “Unēsquio iquec,” quiosh Pabado —cata. Aidon ēbēdtan Esusēn naid chuibeniondashe. <sup>4</sup>Aden Esusēn naid chuibenesho: —Cueschitomane. Aden chienda —Esus chieshēnquidon caqui aidon adembidi ēbēdtan Esusēn naid chuibeniondash. Adsho isun: —Mimbi bēdamboen naoc —caondambi. Adembidi aidon chiondaidon isadaidpembon chiondash. <sup>5</sup>Aquidan shubuno Esus tantiec cuēdēnec cho-choquidotsen chuita. —Mibi caic: “Unēsquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondaid ěmbi tantiaidquo Epeneto caidtsen adembidi chuita. <sup>6</sup>Nēidtedi chuiquin: —“Mibi unēsquio iquec,” quiosh Pabado —cabanta. Nēidic Madia caid mibi nashunquidquo. <sup>7</sup>Nēidic con matses isadaidbo Andedonico caid. Nēidic con matses Unias caid. Aidon ēbēdtambi Esusēn naid chuibenesho chieshēmēnquidon bedshun quēnēn nauedondash. Aidombien ambia Esus tantiabempac caondash ěmbi padabi icnubi. Adsho aidoba Esusēn: —Ěbi chuibeneta —cac chieshtoenquio icquin Esus chuibenequido nec.

<sup>8</sup> Nēidteditsen chuiquin: —“Mibi unēsquo iquec,” quiosh —cata. Nēidic Esus tantiaquid utsi Ampidias caid ěmbi tantiaidquio. <sup>9</sup> Nēidic Esusēn naid chuiquid utsi Udbano caid. Nēidic ěmbi tantiaidquio utsi Estaquis caid. <sup>10</sup> Nēidic Apedes caidtsen. Utsibon chieshēnaqui chieshtoenguido icquin Esus tantiaquidquio nec. Nēidic Adistobudo caidēn shubun icquidotedi. Aidedi: —Mibi caic: “Unēsquo iquec,” quiosh Pabado —cabanta. <sup>11</sup> Nēidotsen adembi chuita. Nēidic con matsēs utsi Edodion caid. Nēidic Nadsiso caidēn shubun icquido Esus tantiaquidtedi. <sup>12</sup> Nēidic chido Tidipena chedo Tidiposa caidbēdi. Aido Esus tantiec dayacquio icquin ambi chiacpadomboen nabanquido nec. Nēidic chido utsi Pedsida caid con chu icbobimboecquidquio. Aidsen Esus tantiec dayacquio icquin ambi chiacpadomboen naquidquio nec. <sup>13</sup> Nēidic Dupo caid Nuquin Papan Esus tantiamiaidquio. Nēidic aton tita con tabimboecquidquio. <sup>14</sup> Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. <sup>15</sup> Nēidic Pidodoco caid aton chido Udiabēdi. Nēidic Nedeyo caid aton chuchubēdi. Nēidic Odimpas caid. Nēidic abēd icquido Esus tantiaquido. Aidedi chuiquin: —Mibi caic: “Unēsquo iquec,” quiosh Pabado —cabanta.

<sup>16</sup> Esus tantiaquido yec bēdamboec isnanta. —Mibi tantiembi —cananta. Nēmbo icquido Esus tantiaquidtedi mibi caic: —Unēsquo iquec —quiosh. <sup>17</sup> Ěmbi tantiaido mibi neque. Tantia. Mibi chuinu. ¿Ada mibēdtan Esus tantiaquido chieshēmequin cuēshēdmequido icpec? ¿Ada Nuquin Papan chiaid mimi tantiaid chienquio yec mibi icsamenuec muaquido icpec? Adquidobēd onquec tabadenda. <sup>18</sup> Nuquin Icho Esuquidistun chiacpadomboen nainquio icquin ambi petequid-uidtsēqui aidon chieque. Aidon: —Mibi bēdambo iqueque. Ěmbi chiaid tantiata —quequin ambi chiacpadomboen namequin Esus tantiatsēcquid icsamec. <sup>19</sup> —Doma yacnocquido abi tantiec Esusēn chiacpadec bēdamboec tabadosh —quequin mimi naid chuibenesho dadpeshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icaic chō —caqui: —Padi. Nuquin Papan chiaid niacmane —quiash aidbēdi icsainquio icta. <sup>20</sup> Nuqui bēdamboen tabadmequid Nuquin Papa nec. Aidēmbi matsēs icsamequidquio Satanas chedo comapenen cuidendac. Nēbi Satanasēn mibi icsamefiadquio icsho tantiashun: —Satanas yuamenquio icnuen Nuquin Icho Esusēn abibi tantiamequiopashun —mibi caimbi.

<sup>21</sup> Nēmbo icquidtedishun mibi tantiec. Mibi caic: —Unēsquo iquec —quiosh Timoteyo ēbēdtan Esusēn naid chuibenequidquio. Adembi con matsesēn chiosh. Dusio caid yec Ason caid yec Sosipated caid yec quec adosh.

<sup>22</sup> Pabodon —Naden na —cac nēid dada uaquidquio Tesio caid nebi. Esus tantiaquid icquin ěmbitsen mibi tantiembi. Padi. Aidedtsēqui ěmbimbo tantiaquin chuishun Pabodon chiaidbidi dada uaoaimbi.

<sup>23</sup> Nēidteditsen mibi caic: —Unēsquo iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedneuc aton shubun puued-puuedosh. Nēidic Edasto caid. Aid nēmboecquidon bedtequid bedbeneshun dayun uaquid nec. Nēidic nuquin utsibimboecquid Cuadto caid. Aidedishun mibi aden tantiosh. <sup>24</sup> Doma yacnocquido mibi tantiaquin: —Nuquin Icho Esuquidistun bēdamboen isquin mibi bēdamboen tabadmepashun —caimbi.

<sup>25</sup> —Nuquin Papa bēdambo iquec —canuna. Esuquidistu chuibanquin ěmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquio iquec. Ěndenquimboshē Esus tishabi icnuc matsesēn Esus chote

bëdamboen tantiambo icpampic. <sup>26</sup> Adnubien Nuquin Papan unësesambo icquin con tsusedpabo utsi-utsien Esus chote chuiquin dada uamepampic. Nëbi: —Esusën naid chuisho tantiaquin ma nidaid utsi-utsiec yacno tabadquidon Esusën chiacpadomboen nanu —qeshun Nuquin Papan Esusën naid chuibenequido icmiac. <sup>27</sup> Aden namec Nuquin Papa bëdambo iquec. Abipadquid utsi nibëdec. Ambi natiapimbo ictequid nibëdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantuasho Nuquin Papan nuqui bëdamboen isequc. —Nuquin Papa bëdambo iquec —canuna ënenquio icquin. Padi. Aidedi chuiquin dada uaombi.

## CODINTO YACNOCQUIDON ISTE 1

### *Pabadon Codinto yacnocquidon iste dada uaid*

<sup>1</sup> Pabado nebi. Nuquin Papa bunacpadamboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec.

<sup>2</sup> Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

<sup>3</sup> Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquo nuqui nec. Adquido yec utsibobëd bëdamboec ma tabadpanuna.

### *Mibi tantiaquin Nuquin Papa chuided-chuidedaid*

<sup>4</sup> Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboquidbimboecnu mimbi isec, quec bëdambo iquebi, Papa, quequin chuided-chuidedembi. <sup>5</sup> Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nebi mibitedi bëdamboec tabadquin Esuquidistu chuibanac.

<sup>6</sup> Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. <sup>7</sup> Adquido yec Esuquidistu choate caimbudec Nuquin Papan abi bëdamboec tabadaid tantiamiac iccoshi quetiapimbo mibitedi iquec. <sup>8</sup> Aden abi bëdamboec tabadaid tantiamiac Nuquin Papan mibitedi chieshenquo icmec ma Esuquidistupadquid icnu quequin mimbi caimbudacpadquo icpanuna aid padpidec choanuc. <sup>9</sup> Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquo Esuquidistupadquid yanenquicsho isun chieshebi, quesa Nuquin Papa icquin abi mibitedi bëdamboquid icmebanec.

### *Esuquidistu tantiaquid cuëshëdabimboec chushcananquido*

<sup>10</sup> Adembidi chinu. Tantiata. Esuquidistu tantiaquid nebi quec Nuquin Papan bëdambo icmiaid ënacbimboec tabadenda. Adec tabadec Esuquidistu tantiaquid utsitedi tantiananec ma cuëshëdabimboec chushcananesa yampanuna. <sup>11</sup> Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. <sup>12</sup> Mibi onquaiid chinu. Tantia. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadec.

<sup>13</sup> ¿Esuquidistu tantiaquid cuëshëdmenuenda ëbipadquidon chuibandiondash? Padenquo. Naden chinu. Tantia. ¿Matses icsaquid icsho cuidnushe quiash ëbida cuidadec unëspanëda? Padenquo. Adembidi ¿Esuquidistu

tantiaquid nebi quequin ëbi mimbi chuishodambi mibitedi acten mento-  
bandionda? Padenquo. <sup>14</sup> Esuquidistu tantiaquid icsho Quidispobëdta  
Cayo aid daëdtsëqui naondambi quec tantiec tsadebi. <sup>15</sup> Utsi padenquo  
iccondambi ma Pabador ëbi acten mentondacsho aid tantiaquid nebi,  
quetiapimbo ma mibitedi icpanuna. <sup>16</sup> Ai, Estepanasën shubun icquido-  
bidi acten mentondambi. ¿Utsidambi acten mentoponda? Padenquo ic-  
condambi. <sup>17</sup> Ëbi tantiaquido acten mentoban, Esuquidistun cainquo yaqui  
Mates icsaid bedshunec abided cuidadec Esuquidistu cuesten dectanac  
unëspanëdash quequin chuibeneta, Nuquin Papan cac aden chuibenec nebi.  
Ëmbibi tantiaid chienquiocquin ma mates icsaquid icsho cuidnushe quiash  
abided cuidadec Esuquidistu cuesten dectanac unëspanëdash quequin ma  
utsibontsen tantiapanu qeshun chuibenec nebi.

*Esuquidistu abitedi tantiaquidquo nadatiambocquin nabanquidquibidi*

<sup>18</sup> Nuquin Papabëd icquido icmenuec mates icsaquid icsho cuidnushe  
quiash abided cuidadec Esuquidistu unëspanëdash quequin chiac, ¿Adpecta  
iquec? quequin tantiesa yec Nuquin Papa yacno puduedtiapimbo iquec.  
Adec adquido onquenubi nuquien Nuquin Papa yacno puduedtequido.  
yec Nuquin Papan nadatiambocquin nac mates icsaquid icsho cuidnushe  
quiash abided cuidadec Esuquidistu unëspanëdash quequin tantiec. <sup>19</sup> Abi  
yacno puduedtemaido chuiquin Nuquin Papan dada uamiampid nad iquec:  
“Comapenen tantiaquidon ambibi dadpen tantiaidtedi ëmendambi.  
Adquidon tantiatipimbo yacpadembi natiamenquin nabanendambi,”  
quequin Nuquin Papan dada uamiampid aidëmbi nëbi naid nec.

<sup>20</sup> Esuquidistu tantiesa ambibi tantiaidtedi naimëdan ¿mitsimbo adquido  
tabadpec? ¿Nidaid abubëd aidën icquidtedimbo mitsipadquidquo icpec?  
quequin isbanquin, Nadquo icpec, quequin comapenen adquidën tantiec.  
Áden tantiaich ambibi tantiaid Nuquin Papan ëmiac ¿mitsimbo adquido tabad-  
pec? ¿Midaquidën bëdamboen tantieque? Adquidën tantiaid tantianu, quec  
onquecuededquid ¿mitsimbo tabadpec Nuquin Papan aidon tantiaid ëmiac?  
Adquidon dadpen tantiaquimbi mates icsaquid icsho cuidnushe quiash  
abided cuidadec Esuquidistu unëspanëdash, quequin utsin-utsinquien tanti-  
auidec. ¿Adsho isun Nuquin Papan abi yacnoda puduedmepadec? Padenquo  
iquec. <sup>21</sup> Nuquin Papan nadatiambocquin nac mates icsaquid cuidnushe  
quiash abided cuidadec Esuquidistu unëspanëdash quequin chuisho amb-  
ibi dadpen tantiaquidon tantiauidec. Ëmbi tantiaidpenquo tantiatipibi  
quequin tantiatipimbo iquec. Adquido tantiatipimbo icnubi ëbi yac-  
padquidon Esuquidistu chuibanac abi tantiaquid utsibo yanec. Nuquin  
Papa yacno puduedtequidtedi adquido nendac. <sup>22</sup> Adquidon aden tan-  
tianubi Nuquin Papan nadatiambocquin nabantequid iste bunquin isadaid-  
bon tantiauidec. Quidieco matesëmbien, Ëbi ënden tantiec papuduedaid  
daëd uanu queboedëmbi Nuquin Papan chiaid tantiauidoaic. <sup>23</sup> Adec tabad-  
nubi mates icsaquid icsho cuidnushe quiash abided cuidadec Esuquidistu  
cuesten dectanac unëspanëdash, quequin ëbi yacpadquidon chuibanoaic.  
Adoquien, Nuquin Papan chomiaid nec, quequin isadaidbon cuesten  
dectanenguiocstënëdash, quequin tantienquo yec tabadec. Isadaidpembo,  
Esuquidistu mimbi chuiboed ëmbi tantiacpadpenquo iquec. Adoac mimbi  
Esus chuibanaid ëmbi ënden tantiaidbëdta daëd uatiapimbo iquebi quec  
tabadec. <sup>24</sup> Adquidon tantiauidnubi isadaidbo utsi-utsiec adecbidi isadaid-  
pembo utsi-utsiec Nuquin Papan cuëmbanaido icquin naden tantiec: Nuquin  
Papan tantiampicpadquiequi mates icsaquid icsho cuidnushe quiash  
abided cuidadec Esuquidistu cuesten dectanac unëspanëdash. Aidi mates  
icsaquid icsho cuidnushe quiash abided cuidtequid icmequin Nuquin Papan

nadatiambocquin naid nendac, quequin nuqui tantiec. <sup>25</sup> Abitedi tantiaquidquid icquin ambi abentséc tantiatsaid Nuquin Papan chiac dadpen tantiaquidên dëniactiapimbo iquec. Adecbidi, Nuquin Papan nadatiambocquin nainquiocquin bêdiactséc natsëcnubi adomboen tantiaquin matsesën dëniactiapimbo iquec.

<sup>26</sup> Utsibo, ¿mitsipadquidquid mibi icponda? Nadquid mibi icpondaque. Chuinu. Tantia. Daëdpactséc tantiatsëcquido mibi icpondac. Namequidpenquo mibi icpondac. Chuiquid dapan bacuëpenquo mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash. <sup>27</sup> Ai, daëdpactséc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiopiapanuna. <sup>28</sup> Ademibidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc <sup>29</sup> ëmbi comapenen tantiaquin nabansho Nuquin Papan cuënoshi quequin matsesën chüitiapimbo iquec. <sup>30</sup> Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bêdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushë quiash abided cuidadec unësaid isun Nuquin Papan cuïtiapimbo nuqui iquec. Icsaisa icsho Nuquin Papan aid bêdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac. <sup>31</sup> Aden nuqui tantiaquin Nuquin Papan dada uamiampicpaden, Èbibi bêdambo ictiapimbocquid icsho mimbi bêdambo icmiaid nebi, Icbo, quequin ëmbi naid chienquiocquin Esusën naidquid quibuana nuquitedi.

## 2

<sup>1</sup> Ademibidi chuinu. Tantia. Mibi yacno nidshun dadpen tantiembi quenquiocquin daëdpactsëqui cuembo chuibanondambi. <sup>2</sup> Esuquidistubêdta abi cüesten dectanaid chuinu quequin auidi mibitedi chuibanondambi. <sup>3</sup> Codinto yacnocquido dacuëdampambo iquec quequin uëdëequimbi mibi chuibanondambi. <sup>4</sup> Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin mibitedi tantiamiondash <sup>5</sup> ma Pabodon tantiamiacpadomboen tantiamioshi, quetiapimbo mibitedi icpanuna.

### *Nuquin Papan Mayanën tantiamiaid*

<sup>6</sup> Nuquin Papan tantiamiac comapenen tantiaquin ëbi yacpadquidon chuibanosaic. Aden chuibeniac Nuquin Papan chiaid tantiabene papuduedquidon bêdamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesanbo nuqui nec. Ademibidi matses chuiquid dapabon comapenen tantiacpaden chuibanesanbo ëbi yacpadquido nec. Matsesën dadpen tantiaid uesadnac. <sup>7</sup> Adnubien Nuquin Papan comapenen tantiaquin, Esuquidistu chuibeneta, quenquiocpamidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bêdambo icmequid con mado nendac, quequin Nuquin Papan tantiapampic. <sup>8</sup> Esuquidistu nuqui bêdambo icmetequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cüesten dectanenquid



ictsenēdash. <sup>9</sup> Aidpadquid chuiquin Nuquin Papan ĕndenquimboshē dada uamiampid nad iquec:

“Nuquin Papan abi tantiaquido ambi cuēmbanaido abi yacno tabadmenun nacenaid bēda tantiesan istiapimbo iquec.

Adecbidi Nuquin Papa yacno nadquō icťsash, quetiapimbo matses iquec.”

<sup>10</sup> Adnubien Nuquin Papan Mayanēn Nuquin Papan abi yacnoshon bēdamboec tabadte nacenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamiaoic. <sup>11</sup> Matsesēn ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocnoc matsesēn tantiatiapimbo iquec. Abipadquid aton

Mayanēnuidquio tantiec. <sup>12</sup> Con mayan ĕbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidēnquio abi yacno bēdamboec tabadaid nuqui tantiamepanuna. <sup>13</sup> Aden

aidēnquio tantiamiac adomboembidi ĕbi yacpadquidon chuibanuoic. Ĕmbibi tantiacpadpenquiocquin Nuquin Papan Mayanēn tantiamiacpadomboen chuibanembi. Adomboembidi ĕbi yacpadquidon chuibanuoic. Aden

Nuquin Papan chiaid chuibanac Nuquin Papan aton Mayan menaidon tantiaquiec. <sup>14</sup> Nuquin Papan abipadquid meniacmaidon aidēn chiaid tantiatiapimbo iquec. Aden Nuquin Papan Mayanēn chiaid tantiatiapimbo ic-

quin Nuquin Papan matses bēdambo icmenu queshun Esuquidistu chomiac matses icsaquid icsho cuidnushe quash abided cuidadec cuesten dectanac

unēspanēdash quequin aidon tantiatiapimbo icoaic. Ĕmbi tantiacpadomboen Nuquin Papan chienquio iquec, quendac Nuquin Papan abipadquid meni-

acmaido. <sup>15</sup> Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquio nec, quequin nuqui tantiec. Adembidi utsi

icsamboec tabadsho isun, Nuquin Papan Mayanēn tantiamiacmaid nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec

tabadquid nec quetiapimbo iquec adquid. Adecbidi Nuquin Papan chi-

acpadpenquio yec tabadquid nec quetiapimbo Nuquin Papan Mayanēn tantiamiacmaido iquec. <sup>16</sup> Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin

ismequid mitsicquid icpec? Adquid nibēdec.”

Nuquin Papan tantiacpadomboen aton Mayanēn tantiamiaido icquin Es-

uquidistu tantiacpadomboen nuqui tantianec.

### 3

#### *¿Esuquidistu tantiaquid utsi icsambo iquec, quecta ique?*

<sup>1</sup> Adembidi chuinu. Adembi tantiatia. Mibi yacno tabadquin Nuquin Papan chiaid tantiabencbicquid mibitedi icsho daēdpactsēc chuibanondambi. Codinto yacnocquido bacuē uidēnabi yacimbocquido

nec queshun Nuquin Papan chiaid daēdpactsēc mibitedi chuibanondambi. <sup>2</sup> ¿Nēbi tishaidēnda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daēdpactsēc

chuibanondambi. Ĕnden iccondacpadquiobi mibitedi adquiobidi icoapec.

<sup>3</sup> Esuquidistu tantiesia yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanēn tantiamiacmaidpadquid yec nēishec chushcananec mibi. <sup>4</sup> Pabadon

tantiamiaid nebi, quec utsi-utsiec chushquenubien; Apodosēn tantiamiaid

nebi, quec chushqueoaic utsi. Adec chushquec Nuquin Papan Mayanën tantiamiabi yac bimboecquido mibitedi nec.

<sup>5</sup> ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosëntsen chuibampanëdash? Padenquo. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. <sup>6</sup> Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushe quiaash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosten mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe qeshun Apodosën chuibanoapanëdash. <sup>7</sup> Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. <sup>8</sup> Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. <sup>9</sup> Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

<sup>10</sup> Nuquin Papa tabadte shubu uashunun buintad teshun abia tabëcac bimboen Esuquidistuba chuibanondambi ma matsesën tantianueshun. Buintad tabëcac bimboen Esuquidistu ëmbi chuibanan utsibon adomboembidi aiddibi chuibeneoaic. Bëdamboen chuibeneuequin ¿Nuquin Papan tantiacpadomboendambi chuibaneque? Tantaranu, qeshun Nuquin Papan chiaid isted-istedtiad ambi chuibeneta caidon. <sup>11</sup> Shubu uashunquidën shubu uidën uatequid nitsinan shubu uashunquid utsibo adomboen tabëcoanu qesa nec. Adquiecbidi Nuquin Papa tabadte uashunu qeshun buintad tabëcac bimboen Esuquidistu ëmbi chuibanan adquid nec, quequin utsi chuibantiapimbo utsibon iquec. <sup>12</sup> Buintad tabëcaid tabadac bimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. <sup>13</sup> Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. <sup>14</sup> Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taudacmaid nidac bimboec abi nidendac. Adsho isun abi bëdamboen chuibanquido Nuquin Papan menetequid nendac. <sup>15</sup> Adomboembidi utsibon abipenquo icnuc chuibanac Esuquidistu tantiatiapimboecquido taudaid bescashun secac bimboen secatequid nendac. Adnubi abipenquo icnuc chuibanquido tauditsenac bimboec abentsëqui ambi chuibanaïdo nibëdnuc Nuquin Papa yacno puduedendac. Adquido Nuquin Papan menetequid nendac.

<sup>16</sup> Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? <sup>17</sup> Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaïdo ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

18 Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquo icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. 19 Esuquidistu tantiesan tantiacpadquiec tsadquidën ëbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo ünësendac.” 20 Adecbidi: “Adquidën tantiaidbidi ënëdtequid nec,” quequin Nuquin Papan tantiec. 21 Ad icnuc, Pabodon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. 22 Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoaic. Nidaid abubëda uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentaquido mibitedi neoaindac. Nidaidën tabadec anëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. 23 Mibitedishun icbo Esuquidistu nec. Esuquidistun icbo, Edoen, aton Papa nec.

## 4

### *Esuquidistu chuishunquido*

1 Icho Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantia. Ènden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantia. 2 Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. 3 Nuquin Icbon, Èbi chuibeneta, caid ëbi icnuc ¿Pabodon bëdamboenda chuiepec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. 4 Ambi chiacpaden niaquenquio iccombi, quetiapimboconobi abitedi isquidquio abitedi tantiaquidquido Nuquin Icho icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. 5 Icsamboen natsiash, quec tsadenda. Nuquin Icho choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanshun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuioaïndac, Bëdamboen mimbi naoc, quequin.

6 Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantianec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. 7 ¿Mitsicquidën adquid mibi icmëbampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiaash, ëmbi tantiacpaden naombi, quepe mibi?

8 Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bëdambo icmiaido tabadpadic? Nuquin Papa yacno

ënden puduedacimboec yash chuiquid dapa nebi, quiacimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. <sup>9</sup> Adecbidi, Bëdambo iquebi, quec mibi tabadnubi naden tantiec tsadebique. Tantia. Chuinu. Ëmbi chuibeneta caido unëseque. Is, Nuquin Papa quiacimboecnuc ambi abi yacnoshon uaido mayan bëdabobëdtan matsesfedishun isbededacimboecquid nebi, quequin ëmbibi tantiec tsadebi aden isbededec aido tabadenquiocnobi. <sup>10</sup> Esuquidistu chuibenequidon chuibansho tantiauidash, Pabiate icsachitashien nec, quequin mamëshumbededashic Codinto yacnocquidon ambibi tantiaquin chuibansho tantiaquidquido nec, quepec Esus tantiesabo. Adecbidi, utsibo dacuëdampambo iquec, quiaash uëdëequin Esuquidistu chuibenequidon Nuquin Papan chiaid chuibanubi cuesambo yacimboen mibitedishun chuibapec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. <sup>11</sup> Esuquidistu chuibenequid yequi pistsëc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëccquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded mëyandedaid nebi. Quenenash iquenquo icquin capcuenequin Esuquidistu chuibenec nebi. <sup>12</sup> Con pete bednuequin shubumpi nacnenguidquido iquec chonoadsho isquin utsibon mamëshunaid nebi. Aden mamëshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiemi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. <sup>13</sup> Adembidi, utsin ëbi mua uaquin chiaqui cuidnanenquiocquin bëdamboen chiemi. Adembidi ëmbi Esuquidistu chuibeniqui icsactsëccquid nec, quequin ambi secanu caidimboecnuc ëbi ispec. <sup>14</sup> Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësqüio yampec, quenquiocquin ëbi tabadaid mibitedi tantiamenuen dada uaombi. Pabadoñ chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësqüio iquec. <sup>15</sup> Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. <sup>16</sup> Ëmbi nacpadomboen naic tabadta quequin mibitedi chiemi. <sup>17</sup> Mibi ëmbi nacpadquiec tabadte tantiamenuequin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquido icquin utsi-utsiec yacnoshon ëmbi chuibeniacpadomboen chuibanuquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aidbidi nec.

<sup>18</sup> Mibi utsi-utsiec Pabado choainquo iquec quequin abimbo tantiacimboen chuibanec. <sup>19</sup> Aden adquidon chuinubi Nuquin Papa bunuc badedquido mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. <sup>20</sup> Nuquin Papa tantiaquido ambibi tantiacpadec onquesa nec. Nuquin Papan Mayanë tantiamiacpadec onquequid Esuquidistu tantiaquido nec. Adquid Ichon tantiamiacpadomboen nabanec tabadquid nec. <sup>21</sup> ¿Mibi yacno puduedshun atotsimbi adquid napeque? Chui. ¿Cuesnu quiacimboendambi adquid

comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

## 5

### *Esuquidistu tantiaquid ambi chudtemaid chudquid cacumeta caid*

<sup>1</sup> Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa ichon chido, anin dauid, bedshun chudesa aido nec. Mibëd icquid abentsëc adquid iquec quec. <sup>2</sup> Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. <sup>3</sup> Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. <sup>4</sup> Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin <sup>5</sup> icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

<sup>6</sup> Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisachimboec mibitedi adquiobidi ictsiac. <sup>7</sup> Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiash aid icsaisa yacpadquiec tabadta. <sup>8</sup> Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenpanuna.

<sup>9</sup> Ambi chudtemaid chudquidbëd iccuededenda, quequin ënden dada uaondambi. <sup>10</sup> Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesada dpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesada dpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac. <sup>11</sup> Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënsnumënuquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adem-bidi aidobëdtan penda.

<sup>12</sup> ¿Esuquidistu tantiesada abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui. <sup>13</sup> Nuquin Papambien Esuquidistu tantiesada icsaid chuiquin cuidendac. Mimbi Esuquidistu tantiaquid icsadenequid cacumeta.

## 6

*Ēbi chushcananaid tantiashun mimbi tantiacpaden chui caid*

<sup>1</sup> Esuquidistu tantiaquid daëd nēishash chushcananec, queoaic. Adquid chuinu. Tantia. Nēishash chushcananash Esuquidistu tantiesa yacno nidshun, Ēbi chushquiaid chuisho tantiashun ¿midapaden mimbi chieque? Ēbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape?

<sup>2</sup> Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiemi, queshun ¿Atotsieshshun Esuquidistu tantiaquidbēd chushcananash tantiesa yacno nidshun mimbi chuibampe? <sup>3</sup> Yuecshun, ¿Ēmbi uaido mayanēn naid midapaden mimbi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? <sup>4</sup> Adquidon naid Ēmbi chiacpadombōen Nuquin Papan cuidendac, quequin tantiaquin ¿atotsieshshun Esuquidistu tantiaquid daëd nēishash chushcananasho tantiashun, Esuquidistu tantiesa yacno nidshun, Ēbi chushquiaid chiacsho mimbi tantiacpaden Ēbi chui, mimbi capec?

<sup>5</sup> ¿Esuquidistu tantiaquid utsibo nibēdpecta ictic? ¿Esuquidistu tantiaquidēn icsamboen chuinushe queshunda Esuquidistu tantiesa yacno nidshun, Ēbi chushquiaid chiacsho mimbi tantiacpaden chui, mimbi capec? ¿Bēdamboec tabadaid Esuquidistu tantiaquid utsibon comapenen tantienquiotsiash, quequinda mimbi tantiape? <sup>6</sup> Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibēd chushcananaid mimbi chieque. Adenda.

<sup>7</sup> Ēbi chushcananaid Ēbi daëdshun chiacsho tantiashun mimbi tantiacpaden chui. Tantanu, quequid mibēd icnuc Nuquin Papan bēdamboquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nēishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nēishash chushcanampe? <sup>8</sup> Cuidnante bunec mibi adpec. Naden natiad. Ēbēd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

<sup>9</sup> ¿Icsadenequin ēnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquieic tabadec icate bunquid yec Esu tantiaquid nebi quec mibibi mua uadenda. Ambi chudtemaid chudquin ēnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin ēnesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bēnēpen chudmequin ēnesa, adecbidi dada daëd chichudnanquin ēnesa, adecbidi chido daëd dachudnanquin ēnesa Nuquin Papa yacno yuedtemaido nendac. <sup>10</sup> Adembidi, ampequin ēnesa Nuquin Papa yacno yuedtemaid nendac. Adembidi, muaquin utsin na bedquin ēnesa, adembidi, ambi tantiacpadpenquiocquidēn chuisho mamēnshunquin ēnesa, adembidi, cuesunianquin ampequin ēnesa. Adquido Nuquin Papan ambi abuschun nacnenaidēn tabadtemaido nendac. <sup>11</sup> Ēnden mibi adquio iccondauidi nēbi utsi-utsiec padenquo icsho isash Nuquin Papa mibi cuidenquo yec mibi icsaid bēpiscudac. Adembidi, Nuquin Papan mibitedi bēdambo icmebanuequin abipadquid aton Mayan mibitedi meniac.

Aidi meneshun Esuquidistu icsapenquiocquid isacpaden Nuquin Papan mibitedi isoaic.

*Ëmbi chudtemaid chudmane qeshun adquid isuidteneta quiaid*

<sup>12</sup> Ëmbi natemaid naden nata caid nibëdec qeshun naic bédambocquid icti-apimbo iquebi, quiash padenquio yec tsadebi. Aden nabanquin ëntiapimbo icmane quiash padenquio iquec tsadebi. <sup>13</sup> Matsesën chebudaid pucu yacno budash dada bédambo icmianquid nec. Yuecash matsesën dada chodquetequid nendac. Padnuen, ëbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbéd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anëdënquequid nësecatequid nendac. <sup>14</sup> Nadatiambocquin Esuquidistu Nuquin Icho Nuquin Papan uincuemepanëdash. Aidëmbi nuquitsen abi tantiaquid icsho uincuemendac. <sup>15</sup> ¿Abi tantiaquid icquin, Esuquidistubéd daëdash tabadquid nebi, quequin tantienquioda mimbi icpe? Ai, aibdëdi daëdtequid nuqui nec. ¿Adquidbéd daëdashabi icsaquidbéd daëdoape? Padenquio iquebi. <sup>16</sup> ¿Dapen chudmequid chudash daëdacbimboecquid nec, quequin mibitedishun tantienquioda icpe? Aid daëdi dada abentsëc yacbimboecquid nec, quequin Nuquin Papan dada uamiampid nec. <sup>17</sup> Nuquin Icbobéd daëdai dien Icbon tantiacpadquiec tabadquid nec.

<sup>18</sup> Ëmbi inacmaid chudmane qeshun chido utsi isuidteneta. Padenquio yec icsaquidbéd daëdquid mibi iquendac. Ambi chudtemaid chudquid aton namibëd ëquëducuësh daëdaid nec. Nami umanucuësh icsaid namibëd daëdtiapimbo iquec. <sup>19</sup> Nuquin Papan Mayan tabadtequid Esuquidistu tantiaquido nec. ¿Nuquin Papan ëbéd tabadmiad abipadquid nec, quequin tantienquioda mibitedishun icpe? Ëbibi nuquin icbo nec, quetiapimbo matses iquec. Adecbidi, Con icbo nibëdec. Ëmbi tantiacpaden naimbi, quetiapimbo mibi iquec. <sup>20</sup> Nuquin Icho cuesten decnanac matses icsaquid icsho cuidnushë quiash abided cuidadec unësquid Nuquin Papan icmiac abi tantiaquid yec aidën na mibitedi nec. Adoaidi ambi chiapaden ismec bédamboec tabadteneta.

## 7

*Dada chidobëdi daëdaid*

<sup>1</sup> Nëbi mimbi dada uaboeq isombi. Aid isun ëmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bedenquio iquembi, qesho chido inta cainda caimbi mibi. <sup>2</sup> Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsëc inquid dada ictiad. Adecbidi dada abentsëcshun inaid chido ictiad. <sup>3</sup> Con chido ëmbi inaid nec, quequin aiduidi chudquid icta. Adecbidi con bënë ëbi inquid nec, quequin aiduidi chudmequid chido nec. <sup>4</sup> Chidon dada daëdash aton bënënen dadabidi nec. Adecbidi dadan dada chidon dadabidi nec. <sup>5</sup> Aid daëdi daëdabi yacbimboec, Padi, quenda. Adboedi, Nuquin Papa chuinnec nëidtedi ushquin padenquio nuqui iquec, qeshun ënta. Aidtedec ushquin padenquiocshon, Ëmbi yuen ëntiapimbocsho isun Satanasën icsamenushë qeshun padpiden nata. <sup>6</sup> Ënta quenquio iquebi. Nëidtedi ushquin padenquio iquembi quiash mibi daëdi aidtedecuidi ushec ënëdta caimbi. <sup>7</sup> Padnuen, chido inesa ëbi yacpadec dadatedi icpashun. Dada

utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

<sup>8</sup> Chido inesa ëbi tabadacpadec dada utsitedi tabadec bēdambo ictsiash. Adecbidi dadan inaidpen bēdambo ictsiash chido. Dada bēnua adecbidi bēdambo ictsiash. <sup>9</sup> Adquid icquin isuidtiapimbo yec comapenec chudte bunquin chido inta. Adecbidi chido bēnua dada isuidtiapimbo iquec dadan inaid icta.

<sup>10</sup> Daēdash niamēnenda. Ēmbibi chienquiocquin Nuquin Icbon aden chuinēdacpadembi chiembique. Tantia. <sup>11</sup> Min bēnē nianash utsin inaid iguenda. Dadan inaid icnu quec mimbi niamboedēn inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

<sup>12</sup> Nēbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantia. Dada aton chidobēdi Esuquidistu tantiesa icboedi aton bēnē Esuquidistu tantiaquid yanuc aton chido padenquo yec, Con bēnē nianu, quenquo ictsiash. Adquid icsho isash. Con chido icsambocquid nec, quenquo yec abēdi tabadquid bēnē. <sup>13</sup> Adecbidi chido utsi aton bēnēbēd Esuquidistu tantiesa icboedi aton chido Esuquidistu tantiaquid yantsiash. Adē Esuquidistu tantias, Con bēnē icsambocquid nec, quenquo yec bēnē nianec nidesa chido. <sup>14</sup> Esuquidistu tantiabi yec daēdacpadec aton chido Esuquidistu tantiaquid yanash aidbēd abentsēc yacimboec tabadec bēnē. Adecc bēdamboec tabadsho isun Nuquin Papan chido bēdamboen tabadmequin bēnēs ten bēdambo icmebampec. Chido Esuquidistu tantiaquid icquin aton bēnē padenquiocnobi aton bacuēbo tantiec, Icsambocquidēn bacuēbo nec, utsibo quenushe quish bēnēbēd abentsēc yacimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuēbo tantiec aton chido Esuquidistu tantiesabēd tabadquid dada. Adecc abentsēc yacimboec tabadsho isun, Bēdamboquidēn bacuēbo nec, quequin utsibon ispec.

<sup>15</sup> Utsimbic ambi bedboedēn aton chidon Esuquidistu tantiasho isun aton chido nidta catsiash. Adoquien, Mibēd tabadte bunebique. Ēbi nidmenda, quetsiash chido bēnē caic. Adoqui, Nidec nid, cac cacuidenquo yec nidquid chido. Chido utsibic aton bēnē Esuquidistu tantiaquid yansho isash, Mibi nianu, quetsiash. Adoquien, Mibi unēsquo iquec, quetsiash bēnē. <sup>16</sup> Adnubien dadan nidta caid aton chido Esuquidistu tantiaquid yec bēdamboquid icsho isash Esuquidistu tantiaquidtsen yantsiash bēnē. ¿Adquid yantsiash, quequin tantienquioda mimbi icpe? Adecbidi, chidon nianu caid aton bēnē bēdamboquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

<sup>17</sup> Mibi Esuquidistu tantiaquid yanash Nuquin Papan tantiacpadec tabadnu quish adequi tabadta. Adomboembidi Esuquidistu tantiec iccuededquid utsibo chuibanombi. <sup>18</sup> Esuquidistu tantiesa shui dēbid dēteshunaid yec Esuquidistu tantiaquid yanash ëbi shui dēbid dēteshunacmaidbimboecnuc nacnemeny quenquo yec tabadta. Adecbidi, Esuquidistu tantiesa shui dēbid dēteshunacmaid yec Esuquidistu tantiaquid yanash shui dēbid dētemeny quenda. <sup>19</sup> Shui dēbid dēteshunaidta nec, quenquo yec Nuquin Papa tsadec. Adecbidi, Shui dēbid dēteshunacmaidta nec, quenquo yec Nuquin Papa tsadec. Adquid nec quenquo yec, Ēmbi chiacpadomboen nadenequidta nec, quec Nuquin Papa tantiec tsadec. <sup>20-21</sup> Adecc Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi,



utsin yuapenquo yec utsin yua icnu quenquo yec tabadoa. <sup>22</sup> Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. <sup>23</sup> Matses icsaquid icsho cuidnushe quiaash abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quiaash utsin yuaid iquenda. <sup>24</sup> Adembidi chuinu. Tantiata. Nuquin Papan mibi cuënu matsec yec Esuquidistu tantiaquid yanash, Èbèd tabadquid con Icbon nec, quec matses yec bédamboec tabadta.

<sup>25</sup> Chido inesa bédta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon èbi chuibeneta caid icquin naden mibitedi chiembique. Tantia. <sup>26</sup> Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. <sup>27</sup> Chido inquit yec chido inesa icnu quenda. Adecbidi, chido inesa yec chido inu quenda. <sup>28</sup> Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobédta con bacuëbo bédambo icmepeba? quec chido inquit tabadec. Chido inesa aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquiec quenquo yec ma mibi tabadneshun.

<sup>29</sup> Èmbi chuiboed mibi bédamboen tantiamembique. Tantia. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mëyanasho isash Esuquidistu chote anoentsèqui yaneque. Abi yacno utsibo pudedtiapimbo icnushe qeshun min chido icnubi Nuquin Papa bunacpadomboen nabanec tabadta. <sup>30</sup> Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. <sup>31</sup> Yueshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

<sup>32</sup> Natiatequid nibèdpashun, qeshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. <sup>33</sup> Chido inquidien, Nuquin Papan tantiacpadenuidi nanu quiaash, ¿mitsipadentsimbi con chidobédta con bacuëbo bédambo iquebi camepeba? quec tabadec. <sup>34</sup> Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bédamboen istsiashi, quec tabadec. <sup>35</sup> Aden mibi chuibanquimbi chido inesa chido bednu qesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe qeshun èmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

<sup>36</sup> Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiaash, Con champi inec cho, quiaash icsatiapimbo adquid icoaic.

<sup>37</sup> Adecbidi, min champi inu queboedi, Bedenquio iquemi, qesho tantiashun menenda. Aden bedmenquio yec mibi bēdambo icpec. <sup>38</sup> Con champi bedec cho, qeshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

<sup>39</sup> Dadan inaid icquin min bēnē nianenda. Min bēnē unēsan utsin inaid icnu quiash adta. Esuquidistu tantiesan inaid iquenda. <sup>40</sup> Bēnuua utsin inacmaid icnu quiash bēdamboshē iquec aid. Ēmbi tantiacpaden ěmbi chuiboed Nuquin Papan Mayanēn tantiamiacpaden chiaid nec.

## 8

### *Nuquin Papan uaidbimboecnuc nacnenaid tantiaquin pambid dasanaid*

<sup>1</sup> Nēbi Nuquin Papan uaidbimboecnuc nacnenaid tantiaquin pambid dasanaid chuinin naden chiembique. Tantiata. ¿Matsesēn nacnenaidda nuqui tantiaid ictic? Padenquio. Aden tantiaquin ěmbi tantiacpadpenquio icquid utsibo nec quequin mamēnshumpec. Aden tantiaquin mamēnshunquin utsi tantienquio iquec. Utsien, Naden nabanquindambi utsibo bēdamboen tabadmepeba, quequin tantiaquidquio nec. <sup>2</sup> Ēmbibi tantiemi quequid tantiabnabictšēcquid nec. <sup>3</sup> Nuquin Papa tantiaquidien Nuquin Papan tantiaidquio nendac.

<sup>4</sup> Aden chuishun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe? quequin mimbi chuiquin dada uaboen isun chuinu. Tantiata. Nuquin Papan uaidbimboecnuc matsesēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec. <sup>5</sup> Nidaidēn samēdquid papa cain utsin cuēnaid dadpen iquec. Adēmbidi abuc samēdquid Papa cain utsin cuēnaid dadpen iquec. <sup>6</sup> Papa cain nuquin cuēnaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adēmbidi Nuquin Icbo cain cuēnaidquio Esuquidistu nec. Aidēmbi aton Papabēdan abitedimbo uabampampid nec. Aidi cuesten dectanac abided cuidadac nuqui cuidtidquid icnubi Nuquin Papan cuēmbanaido yec ambi tantiaido nuqui nec.

<sup>7</sup> Adēmbidi aid abentsēqui nuqui tantiaidquio icnubi Nuquin Papan uaidbimboecnuc matsesēn nacnenaidd utsibon tantiaid iquec. Aden nacnenaidd tantiaquin pambid dasanaid aidon pepec. Aden peboedēmbi Esuquidistu tantiaquid yanshun nacnenaidd tantiaquin pambid dasanaid ěmbi pesho isun, Icsaosh, Nuquin Papan canushe, qeshun adquid petiapimbo yanēbi.

<sup>8</sup> Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesēn nacnenaidd tantiaquin pambid dasanaid penquiocsho isash, Aid bēdambocquid nec, quenquio Nuquin Papa iquec. Adecbidi, nacnenaidd tantiaquidēn dasanaid pesho isash, Aid bēdambocquid nec, quenquio icoaic Nuquin Papa.

<sup>9</sup> Padnuen Nuquin Papan uaidbimboecnuc matsesēn nacnenaidd tantiaquin pambid dasanaid ěmbi bedshun pesho isash, Esuquidistu comapēnen tantiaquidēn tantiaid nacnenaidd nec, Esuquidistu tantiabnabictšēcquid quenushe qeshun padenquio iquemi. <sup>10</sup> Aid pesho isash, Nacnenaidd papa cain cuēnaid nepec, qeshun, Aid tantiaquin ěmbitsen pambid dasanaid penū, quetsiash Esuquidistu tantiabnabictšēcquid. <sup>11</sup> Padnuen ěmbi piaid Nuquin Papa tantiamianesa nec quequin mimbi tantiec. Aden tantiaquin nacnenaidd tantiaquin pambid dasanaid mimbi pec. Aden tantiaquin mimbi penubi Esuquidistu tantiabnabictšēcquidēn Nuquin Papa tantiamiantēquid nacnenaidd tantiaquin pambid dasanaid nec, quequin pec. Esuquidistu comapēnen tantiaquid mibi icquimbi nacnenaidd tantiaquidēn dasanaid ěbi

icsainquo ictequid nec quequin pequin Esuquidistu tantiabenabictsēcquido mimbi icsameyoc. Mimbi icsamiaido tantiec Esuquidistu unēspaneḏdash. <sup>12</sup> Ad icnuc Esuquidistu tantiabenabictsēcquid mimbi icsamequin Nuquin Icbon chiacpadomboen niacquid mibi neyoc. <sup>13</sup> Padnuen Esuquidistu tantiaquid utsibon icamboen tantiaquin penushe qeshun padpiden penquo iquemi ma icsainquo icpanu qeshun.

## 9

### *Esuquidistu tantiaquidon natequid*

<sup>1</sup> Esuquidistu chuibeneta cacmaid Pabado nec quequidotsen chuinu. Tania. ¿Matesēn nata caidtabi nedi? Padenquo. Esuquidistun ēbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ěmbi chuibanac mibitedi abi tantiaquido yanenquioda ictionda? <sup>2</sup> Ai, ěmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ěmbi chuibanacmaid icnubi, ěmbi chuibanaido mibitedi nec, quequin tantiemi. ěmbi chuibanac Esuquidistu tantiaquid mibitedi yanshun, Esuquidistun ēbi chuibeneta caidquio nebi, quequin Pabado chiaid abimbo iquec, quequin bēdamboen tantiaquidquio mibi nepec tantesa uainquiocquin.

<sup>3</sup> Aden ěmbi Esuquidistu chuibanac abi tantiaquid mibitedi icquimbi utsinutsinquin ēbi icsamboen chiec. Naden ēbi chieque. Tania. Pabado Bednabebēḏtan chuibanasho pemenuioctiad, quequin chiec. Aden chiec onquequid ěmbibi tantiaquin naden aido chiembique. Tania. <sup>4</sup> ¿Esuquidistu chuibanec bundoenquiodabi icpe? <sup>5</sup> Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buanasho isash bēdambo iquec quiashic Esuquidistu chuibanec ēbēd capuquimbi Bednaben aton chido buanasho isash, Icsambo iquec, quec mibi. ¿Ěsuquidistu chuibanec ēbēd capuequi aton chido buante bunenquioda Bednabe icpadi? <sup>6</sup> Adembidi, ¿Mibi pemembique. Penuequin nabanenda, capenda Esuquidistu chuibenecquid utsibo mimbi ique? Bednabebēḏta ēbi chiec, ¿Penun daēḏshun shubumpi nacentiad, quepecta mibi ique?

<sup>7</sup> Ad yenquo utsibo iqueque. Tania. Chuinu. ¿Sondado icquinda aton na buanshun pepec? Padenquo. Abi nashunquidombien pemeshun acmec. ¿Icho abi nashunquid aton tiedēn caniquid pemesada nepadic? Padenquo. Pemeshumbien acmepaid. ¿Baca shuma chinshun icbon aquenquioda icpadi? Acquimbien icbon icquid. <sup>8</sup> ¿Aden chuiquin ěmbibi tantiaidtabi chuipo? Padenquo. Nuquin Papan Moises dada uamiampid ěmbi chiaid nec. <sup>9</sup> Nad iqueque. Tania. Chuinu: “Min tiedēn caniquid ēshē chicnueshun min baca tsuc-tsucmequin dēpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquo. <sup>10</sup> Matsesbēḏtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedēn caniquid icbon taneshcaic. Adembidi, penuequin ēshēacsho bedquid icbo nec. <sup>11</sup> Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedi? <sup>12</sup> Mibi chuibanquid utsibo menebanquimbi ěbia mibi chuiquidquio icsho menetiadquidī menianenquio mibi ipoc. Aden ēbi menenquio yaqui ěmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. <sup>13</sup> Nuquin Papa tabadte shubu uashunaid yacnoshon nashunquidēn ashunquio peshun aquec. Adembidi ashunquio nashunquid

utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? <sup>14</sup> Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

<sup>15</sup> Èbi yuedtiadquidi nec, quequin tantiequi ¿adabi pemenu yuedpec? qesa nebi. Adembidi, Èmbi dada uaid buamiascho isun èbi yuedtsiash, quequin dada uainquo iccombi. Bunquieuc unësbugdec mibi caic, Bec cho, quenquo iquendabi. <sup>16</sup> Èbibi Esuquidistu chuibenenu quenquiocobi. Ambi èbi chuibeneta cac Esuquidistu chuibenec nebi. Abi chiesha yanash unësquo ictsiabi. <sup>17</sup> Èmbibi, Esuquidistu chuibenu, quiash, Bec cho, quetsiandabi. Esuquidistun èbi chuibeneta caid yec ambi namiaidquo nebi. <sup>18</sup> Esuquidistu chuidenesho isash, ¿atotsi Pabado bedpash, quepecta mibi ique? Naden Esuquidistu chuibenec nebi. Tanta. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bédambo iquebi.

<sup>19</sup> Bec cho, qesa yec utsin yuacmaid nebi. Adquid yequi utsibo chuineuc nidanec shubu utsin puduedcuenequin aidon namiaidbimboequin aidbéd tabadquin chuibanec nebi. Adec tabadquin èmbi chiac ma aidotsen Esuquidistu tantiaquido yampanuna. <sup>20</sup> Adecbidi, isadaidbo Esuquidistu chuibanec aidobéd tabadquin mimbi natemaid èmbi natemaidpenquo nec, quenquiocquin ambi natemaid nainquo iquemi. Adquieuc tabadquin èmbi chuibanac ma isadaidbotsen Esuquidistu tantiaquido yampanuna. <sup>21</sup> Adecbidi, isadaidpembe chuibanec aido tabadacpade abèdi tabadquin Esuquidistun chiapadec niaquenquo yec tabadec nebi. Èmbi adoac isadaidpembotsen ma Esuquidistu tantiaquido yampanuna. <sup>22</sup> Adecbidi, Esuquidistu tantibenabictscquido chuibanec èmbi tantibenabi iccondacpaden bëyuc tauain chiaidquo tantiamenuen chuibanec nebi. Èmbi adoac ma aidotsen Esuquidistu tantibenquidquo yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquo yampanuna. <sup>23</sup> Adec tabadequi ma èmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

<sup>24</sup> Titinguecuedquido icnuc bëyuc abia titinguec choquid iquendac. Adquid icsho isun, Mibi badedquo tinguic, quequin tingueta quequidèn tinguic abia choquid menendac. Adembidi, Nuquin Papan menete bèda iquec. Aid bednu, qeshun Icbon chiapadomboen nabanta, caimbi mibi. <sup>25</sup> Badedquo tinguenequid bedte bunaid chodquetequid icnuc, Aid bednu, qeshun abi bëdiactsc titincamete pete icsa actequid icsabèda isuidec tinguenequid iquec. Nuquien chodquetemaid bednuequin icsaid isuidec. <sup>26</sup> Utsien, Bednu, quenquo yec tinguic. Adembidi, Bednu, quenquo yec utsibéd mèdanten senanu quequin nibèdacnoshombi mèdanten seded-sedec. Aden tantiaquin naisa nebi. <sup>27</sup> Utsibon ma tantianu qeshun Esuquidistu chuibenash unësacsho Nuquin Papan menete bèda bedtiapimbo icmane quiash icsaid mëmunec tsadebi.

## 10

### *Isadaidbon chieshampicpade tabadenda quiaid*

<sup>1-2</sup> Abi yacno abi tantiesha chosho puduedmenquo icchitoshe quiash Nuquin Papan chiaid chieshënenquo yec bédamboec tabad, quequin tantiamenuen, Nadeq nuquin tsusedpabo tabadpampic, quequin chiembique. Tantiata. Equipito yacnoshon ambi mënichaidobéd Moises puduanec

Nuquin Papan bëyucamiaid abu ushu tëdion nidanequin tsusedpabon Acte Piu potepampic. <sup>3</sup> Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaïd tsusedpatedishun pebededpampic. <sup>4</sup> Adembidi acte bundoacsho isun cuënote cuesquin acte chomiaïd acash, Èbi bëdambo icmequin Nuquin Papan ambi yuecshun chometequid Quidistubëdtan nadatiambocquin naid nec, quequin tsusedpabon utsin-utsinguien tantiabempampic. <sup>5</sup> Aden tantiabenubïen abëd icquid utsibon padenquïo icpampic. Aden tantïesa Nuquin Papan nidaïd Canan caïd menenu caïd yacno niduidequi unësbudnepampic adquïdtedi.

<sup>6</sup> Tsusedpabo chïeshampicpadquïd icnushe queshun Nuquin Papan aïdo chuïquin dada uamepampic. <sup>7</sup> Ad icnuc tsusedpabon Nuquin Papan uaidbimboecnuc nacneshun papa cain tantïampicpaden tantïenda. Naden Nuquin Papan aïdo chuïpampic. Bacabimboecnuc ambibi nacnenaïd tantïaquin peshun acash baïdacuededpampicpaden tantïaquin nainda. <sup>8</sup> Adembidi, tsusedpa utsibon ambi chudtemaïd chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. <sup>9</sup> Adecbidi, ¿Ambi chiaïd niacshodabi Nuquin Papan cuidpeba? quiampicpadec adenda. Aden tantïaquïdo nïsin pebededac unësbudnepampic. <sup>10</sup> Adecbidi, Equipito yacnoshon mënchicaïdo abi mënchicquïd chïeshëc nadpampic. Equipito yacno ïquec bëdambo iccondaidi nëmbo choash bunec capüebi. Anobidï tabadec nïdebi, queded-quededsho ambi abi yacnoshon uaid mayan bëdabo Nuquin Papan budmiaïdën aïtedi cuesunepampic.

<sup>11</sup> Abi tsïbanquïdo tantïamenuëquin tsusedpabo tabadnëdaïd icsa Nuquin Papan chuïquin dada uamepampid ëmbi chuïboed nec. <sup>12</sup> Tsusedpabo Nuquin Papa chïeshënec icsapampicpadec icsamane quequin mïbi tabadte tantïata. <sup>13</sup> Ènden tsusedpabo chïeshëmete icpampid abi ïquec. Adaïd natïatequïd icnuc chïeshënushe queshun Nuquin Papan mïbi tantïaquin uïdën uac mïbi icsainquïo yec chïeshoentïo yec dayacquïo ïquendac.

### *Nuquin Icho Esuquïdistu unësaïd tantïaquin acshumbic mayan icsa tantïaquin mïmbi actïapimbo ïquec quïaïd*

<sup>14</sup> Nuquin Papan chiaïd niacmane quïash, Nuquin Papan uaidbimboecnuc matsesën nacnenaïd tantïanu, quenda. Dacuëdec cuenacbimboec aïd nanacno nidenda. <sup>15</sup> Tantiabenuïd icsho mïbi chïec nebi. Pabadon chiaïd abimbo ïquec quequin tantïec aïd nanacno nïdenquïo yec Esuquïdistu chuïbansho tantïec iccuededteneta. <sup>16</sup> ¿Iccuededquin sïcaïd acnun Nuquin Papa chïec onqueshun acted-actedquin matses icsaquïd icsho cuïdnushe quïash abïded cuïdadec Esuquïdistun intac chïdïdiquïaïd tantïen icquïnda nuquï actï? ¿Adembidi, pete cuësh-cuëshun Nuquin Papa chïec onqueshun aton dada mëyanïd tantïen icquïnda nuquï pedï? <sup>17</sup> Esuquïdistubëd abentsëc yachimboecquïdo nebi, quequin tantïaquin pete cuësh-cuëshun menïac abentsëcshun piachimboen abi tantïec iccuededquïdon pebededec.

<sup>18</sup> Aden nuquï pebededachimboen isadaïdbo icsaïd cuïdnuen nidaidën capuquïdded cuesunëaïd pambïd tauïquin Nuquin Papan shëdtequïd pambïd bedshun cuesunëquïdbëdtan nidaidën capuquïd icbon pepanëdash. <sup>19</sup> Aden ëmbi chïac ¿atotsï Pabado ëbi tantïamete bumpec, quepecta mïbi ïquec? Mïbi naden tantïamembïque. Tantïa. ¿Nuquin Papan uaidbimboecnuc matsesën nacnenaïd tïbopecta ïquec? Padenquïo. <sup>20</sup> Adec adquïd tïboquesa icnuc mayan icsa tantïaquin Esuquïdistu tantïesan Nuquin Papan uaidbimboecnuc matsesën nacnenaïd yacnoshon pambïd dasanec. Aden aïd pambïd penu, queshun mayan icsabëd yachimboecquïd nebi, quequin

pec. Adquidbēdtan penda. <sup>21</sup> Nuquin Icbo Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec. <sup>22</sup> ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquo icquin abitedi isquidquo icquin Nuquin Papan mibi cuidendac.

*Ĕmbi natemaïd naden nata caïd nibēdec, quiash nanueboedi Esuquidistu tantiaquid utsi icsamemane quiash nainquiocte chiaïd*

<sup>23</sup> Nēïd mishtemaïd nec. Nēïd petemaïd nec. Nēïd actemaïd nec, quequin ĩmbi chuitequid nibēdec, quiash Esuquidistu tantiaquid utsi icsamemane quiash nainquio yec tsadebi. Matsesēn ambi nacnenaïd tantiaquin pambid dasanaïd ĩmbi tantiacmaïd nec, quiash pambid dasanaïd petiadquio iquequi Esuquidistu tantiabenabictsēcquidēn, Nēïd nacnenaïd nuquin papa caïd nec, quequin penushe quiash penquio yec tsadebi. <sup>24</sup> Utsi tantienquiocquin nacnenaïd pambid dasanaïd piash bēdambo iquebi, quenda. Naden natiaïd. Matsesēn nacnenaïd pambid dasanaïd ĩmbi pesho isun utsibon icsamboen tantiaïsiash, quequin penda.

<sup>25</sup> Aton na sambededacno nidshun pambid bednuequin, ¿Nuquin Papan uaidbimboecnuc matsesēn nacnenaïd pambid dasanaïd bedaidta nec? quenquiocquin bedta. <sup>26</sup> Abu nidaïdbēdta uashun aidēnquio icquidtedi Nuquin Papan uampidquio nec. Aïdtedimbo aton na nec. Nacnenaïd yacnoshon pambid sambededaid aton na nec. Aidēn bacuēbo iquec aid pambid pequido mibi nec. <sup>27</sup> Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesēn nacnenaïd tantiaquin pambid dasanaïd bedaidta nec, quenda. <sup>28</sup> Adnubien mibi puduedacno isedquid utsi Esuquidistu tantiabenabictsēcquid tsadquin, Matsesēn nacnenaïd papa cain cuēnaïd tantiaquin dasanaïd nēïd pambid nec, cac aid pambid penda. <sup>29</sup> Ĕmbi papa cain cuēnaïd nec, quequin utsin tantianushe queshun aid pambid penda. Matsesēn nacnenaïd con pa nec, quequin cuēnaïd tantiesā icquïn ¿atotsieshumbimbi matsesēn nacnenaïd tantiaquin pambid dasanaïd penquio iqueque? Chuinu. Tanta. <sup>30</sup> Nuquin Papa ĩmbi tantiaïdquio icnuc penun aïd chuïsho isash ¿atotsieshun matsesēn nacnenaïd papa cain tantiaquin pepec utsibo quepec? <sup>31</sup> Edoen utsibo tantiamenuen bēdamboen nabanec tabadteneta. <sup>32</sup> Aden naïc, Esuquidistu tantiaquid isadaïdbo isadaïdpembobēdta Esuquidistu bēdamboen tantiabemequïono, quec bēdamboec tabadta. <sup>33</sup> Naden naïc ĩbibi bēdambo iquebi, quenda. Naden ĩmbi nabanuc ĩbēdi utsi bēdambo ictsiash, quequin tantiaïta mā Nuquin Papa yacno puduedtequid utsibo yanu queshun.

## 11

<sup>1</sup> Ambia tantiaquidēn Esuquidistun icmiacpadquiec tabadec nebi. Adecbidi ĩmbi chuiquin ismiacpadquiec tabadteneta mibitedi.

*Nuquin Papa tantiaquin iccuededquin naïd*

<sup>2</sup> Mimbïa tantianēdaïdquio mibi nec, quequin mimbi chiaïd tantiaquin nabanec nebi, quequin mimbi dada uashun bēmiaïd isash bēdambo iquebi. Adembidi, Esuquidistu tantiabenēdaïdon chuïbanaïd mimbi chiacpadomboen tabadec, quequin mimbi dada uaid bēmiaïdon chuïbansho tantiaïsh bēdambo iquebi.

<sup>3</sup> Mimbï natequid utsi chuïnu. Tantiata. Abi tantiaquid chuïquid Esuquidistu nec. Adembidi chido chuïquid dada nec. Adembidi Esuquidistu chuïquid aton Papa, Nuquin Papa caïd, Edoen nec. <sup>4</sup> Adquid Nuquin

Papa nec, quequin, Aid chuinu, qeshun aton mauete chicquid dadan. Aid chuinen mauec tabadquin, Ēbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. <sup>5</sup> Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. <sup>6</sup> Ēbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. <sup>7</sup> Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ēbi chuiquid Abia Yampid nec, quequin ismenuec aid chiec onquec mauete mauesa dada nec. <sup>8-9</sup> Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. <sup>10</sup> Adquid icmiac dada ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnquo yec Icbon chiacpadquiec tabadec. <sup>11</sup> Nēid chido nec. Nēid utsi dada nec, quenubi nashunanquid abi daēdi nec. <sup>12</sup> Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. <sup>13</sup> ¿Nuquin Papa chuinec ēbi chuiquid nibēdeque. Matasadnu quiash chido bēdamboda icpadic? <sup>14</sup> Chido isadacpadec isadnu quec icsambo dada ictsias. <sup>15</sup> Chido isadacpadec dada icsho isash, Chido nec, quetsiambo. Dada isadacpadec chido isadenquo iquec. <sup>16</sup> Ēmbi chuiboed tantiash, Icsamboen chiosh, quetsias. Adquid naden chuinu. Tantiā. ¿Ēmbentsēquidambi aden chie? Padenquo. Ēbipadquiocquin chuibenquidon adomboebidi chuibanec. Adembidi Esuquidistu tantiec iccuededquid utsibon tantiabedec.

### *Nuquin Icho unēsash uincuenaid tantiaded-tantiadedta quiaid*

<sup>17</sup> Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuedec. <sup>18</sup> Abentsēc yacimboc ec cuededesa Esuquidistu tantiaquido Codinto yacnocquido nec, quiosh. Adsho tantiash, Ābimbo capec, quiobi. <sup>19</sup> Nēidtedi ěmbi bēdamboen isaideo nec. Utsitedi ěmbi icsamboen isaideo nec, quiash cuēshēdacimboc mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. <sup>20</sup> Adec tabadquin Esuquidistu unēste tantienquiocquin utsin-utsinquier peshun acted-actedec. <sup>21</sup> Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquo yec tabadec. <sup>22</sup> ¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobēd iccuedednu, quenquocquinda mibia choshon pebededec? ¿Natiamianquiec pete nibēdchitec pete nibēdquid camenuenda mimbā pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi ique? Padenquo. Aden naquin Esuquidistu unēsaid tantienquiocquin mimbi pec.

<sup>23</sup> Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ēbi chieshēnquido ēbēd icquidēn ēbi bedmendac, quequin Esuquidistun abi unēste tantiaquin nadopanēdash. Pete bedshun <sup>24</sup> Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe

quiash ëbided cuidadec unëste tantiaquin pebededta,” quepanëdash Esuquidistu. <sup>25</sup> Aden chuishumbic aid pebededsho isun pete utsi pebededquin nainshun adembidi dëshote bedshun sananquin naden Esuquidistun chuipanëdash: “Esuquidistu unësqin ëbi chian anëdënquiacno nësecatequid icsho mënchictequid Esuquidistu iquec, quequin tantiaquin sicaid acbededta. Sicaid acquin ëbi mënchictequid iquec quequin tantiaquin acban.” <sup>26</sup> Aden Esuquidistun ismenëdacadomboen pete cuëshëmpi pebededshumbic sicaid acbededta. Nuquin Icho unësaid tantiaded-tantiadedquin aid padpidec choabicnuc adobanta. <sup>27</sup> Abi unëste tantienquiocquin pete cuëshun peshun acquin Esuquidistun chiaid niacquid nec. <sup>28</sup> ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata. <sup>29</sup> Esuquidistu unësaid tantienquiocquin peshun acquin Nuquin Papan cuidendac. <sup>30</sup> Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësaid. <sup>31</sup> ¿Adabi Nuquin Papan chiaid niaquenguo yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. <sup>32</sup> Adesa icsho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquio mibi icmenuen Nuquin Papan mibi natiaic camec ma ëmbi chiacpadomboen nabamenuequin. <sup>33</sup> Adembidi Esuquidistu unësaid tantianuec iccuededquin utsibo choabi iquec quequin aido cainta. <sup>34</sup> Bundoshon min nuntanshun pe. Aden pesho ishah, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

## 12

### *Nuquin Papan Mayanën tantiamiaid*

<sup>1</sup> Nuquin Papan Mayanën tantiametequid chuinu. Tantiata. <sup>2</sup> Ënden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesën ismec, Nëid papa cain cuënaid nec, qesho tantiaquido mibitedi iccondac. <sup>3</sup> Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanën tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icho nec, quetiapimbo icoaic.

<sup>4</sup> Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. <sup>5</sup> Adecbidi, utsi nashunquido Esuquidistu tantiaquido icnubi utsi nashunquidon Icho abentsëcquiobi Esuquidistu nec. <sup>6</sup> Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

<sup>7</sup> Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. <sup>8</sup> Nuquin Papan Mayanën tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. <sup>9</sup> Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bëdamequid utsi-utsiec iquec. <sup>10</sup> Nuquin



Papan Mayanèn tantiamiac nadatiambocquin nabanquid utsi-utsiec iquec. Nuquin Papan Mayanèn tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanèn tantiamiac matses bédambo tabadsho isash, Nuquin Papan Mayanèn tantiamiac nec, quequin tantiaquidquo utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanèn tantiamiac nidaidèn icquid onquiaicmaidèn onquequid utsi-utsiec iquec. Adembidi Nuquin Papan Mayanèn tantiamiac nidaidèn icquid onquiaicmaidèn onquesho tantiaquidèn tantienquiosho isun aidon onqueten chuibanquid utsi-utsiec iquec. <sup>11</sup> Aden Nuquin Papan Mayanèn tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanèn aden tantiamiec.

### *Dada abentsëc yacpadquiec Esuquidistu tantiaquidtedi iquec*

<sup>12</sup> Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. <sup>13</sup> Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

<sup>14</sup> Matsesën dada abentsëqui icnubi uidënaid dadpen iquec. <sup>15</sup> ¿Mëdantepadquidpenquo yec matsesën dada uidënacmaidta taë icpec? Padenquo. Dada uidënaid taë iquec. <sup>16</sup> Adecbidi, ¿ëshëpadquidpenquo yec matsesën dada dëccuësquiaicmaidta dëbiate icpec? Padenquo. Dëbiate dëccuësquequid iquec. <sup>17</sup> Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? <sup>18</sup> Nuquin Papan tantiampicpadquiequi matsesën dada uidënaid nec. <sup>19</sup> Dëccuësquequid abentsëc icnuc dada nec quetiapimbo iquec. <sup>20</sup> Uidënaid dadpembëd dëccuësquequid dadpen icnuc matsesën nami abentsëqui iquec.

<sup>21</sup> Matsesën dada ad icnuc, ¿Mëdante bédambo icnubi ëshë padenquo iquec, quepecta mibi ique? Padenquo. <sup>22</sup> ¿Isadesa uidënaid uquëducquid nibëdnuc matsesën dada bédamboda icpatsiash? <sup>23</sup> Uidënaid uquëducquid ismenquiocquin ompoaidquo utsi nec. <sup>24</sup> Nami isaidquo ompodesa nec. Nuquin Papan tantiampicpadquiequi ompoaid nibëdnuc matses cuëdenquo yec unësec. <sup>25</sup> Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aidtedi nec. <sup>26</sup> Abentsëc paëmbo iquec matsesën dada bédambo iquenquo iquec. Adquidtedi bédambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yachimboec iquec abentsëc icsacsho isash abitedi unësquio iquec. Abentsëc, Bédambo iquebi, quenuc aidbëd abitedi bédambo iquec.

<sup>27</sup> Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yachimboecquid nuqui nec. Abi tabadtequid iquec. <sup>28</sup> Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadece tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiaicmaidèn onquequid utsi iquec. Adquidtedi nuqui iquec abentsëc yachimboec nuqui tabadec. <sup>29</sup> ¿Esuquidistu tantiaquidtedida

ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. <sup>30</sup> Adecbidi, ¿Esuquidistu tantiaquidtedida bédamequid icpadic? Padenquo. ¿Esuquidistu tantiaquidtedida abi onquiacmaidèn onquequid icpadic? Padenquo. ¿Utsi onquiacmaidèn onquesho tantiaquidèn tantienquiocsho isun aidon onqueten onquequin chuibanquidtedida icpadic? Padenquo. <sup>31</sup> Nuquin Papan Mayanèn tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

### *Utsi tantiaquidquo*

Ëmbi chuiboedeti Esuquidistu tantiaquido Nuquin Papan Mayanèn tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquo chuinu. Tantiata.

## 13

<sup>1</sup> Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bédà onquiacpadquiec onquequid icquimbi utsi tantiesa icquin chuibansho abipenquo chuisho utsibon tantien-dac. <sup>2</sup> Utsibic, Nuquin Papan Mayanèn tantiamiac chuibanquid adembidi Nuquin Papan chienquo icampid Nuquin Papan Mayanèn tantiamiac tantiaquid aidi niosh. Aidëmbidi Nuquin Papa nadatiambocquin naquidquo nec, quequin tantiaquin, Mananuc macuësh dapa icboedi acte nantan nënitsinoà, Papa, cacpadomboen nënitsinoac nidquid isquid icquimbi utsi tantiesa icsho, Bédambocquid mibi nec, Nuquin Papan catiapimbo iquec. <sup>3</sup> Utsibic, aton na nibédsho menequidquo niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bédamboen mimbi naoc, Nuquin Papan catiapimbo iquec. <sup>4</sup> Padnuen Nuquin Papan Mayanèn bédamboshë ictequid tantiamiaid nadquo iqueque. Chuinu. Tantiata. Utsi tantiaquidquo utsi tantiamequionuec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquo con na bëpashun quesa nec. Utsi tantiaquidquo dëniacanquidquo yec dëniacanquidquo nebi abibi quesa nec. Utsi tantiaquidquo ëbentsëqui tantiaquidquo nebi quiacamboen nabanesa nec. <sup>5</sup> Utsi tantiaquidquo utsi icsamboen tantiaquin nabanesa nec. Utsi tantiaquidquo, Èmbentsëqui tantiacpadomboenuidi utsitedishun nabantiad, quesa nec. Utsi tantiaquidquo badedquo nëshesa nec. Utsi tantiaquidquo abi icsamboen nasho cuidesa nec. <sup>6</sup> Utsi tantiaquidquo utsi icsambocsho isash, Unësquio iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoaic. <sup>7</sup> Utsi tantiaquidquo utsi icsaid chienquo yec tabadquid nec. Utsi tantiaquidquo ambi nanaid nibédsho isash ampiash badedquo quenquo yec ¿mitsimboembi nampoba? quec onquequid nec. Utsi tantiaquidquid utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bédamboen nasho isnuen cainquid nec. Mëyanahui chieshenquo yec dayacquio yec tabadtenequid utsi tantiaquidquo nec.

<sup>8</sup> Utsi bédamboen tantiaid ënëdtiapimboctequid nec. Nuquin Papan chiaid chuibantsaidien ënëndendac. Adecbidi, matses onquaidtedi ënëndendac. Adecbidi Nuquin Papan ambi uaidtedi ëmiac matsesën isquin tantiaid ënëdoaic. <sup>9</sup> Nabanaidtedi tantiabenabictsëcquidquo nuqui nec. Adecbidi Nuquin Papan chiampidtedi tantiabenabictsëcquidquo nuqui neoaic.

<sup>10</sup> Nidaidën tabadquin aitedi tantiabenabitsëcquidquio nuqui icboedi Nuquin Papa yacno puduedash abitedi tantiaquidquio nuqui iquendac. <sup>11</sup> Bacuë yec bacuëmpi onquiapadec onquepadenebi. Adembidi, bacuëmpin tantiabenabi yacpaden tantiapadenembi. Adquid icboeni caniaidën tantiacpadpenquiocquin tantiapadenembi. Adquid icboedi caniaash bacuëmpin tantiacpadpenquiocquin tantiabenondambi. <sup>12</sup> Nëbi isnanten bëisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bëistuidendac. Nëbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bëisquin nuqui tantiabenendac aid.

<sup>13</sup> Nidaid ënëdnuc nëidtedi ënëdtemaid iqueque. Chuinu. Tantia. Ambi chiapaden nabanquidquio Nuquin Papa nec, quequin tantiaid ënëdtemaid nec. Adecbidi Nuquin Papa yacnoësh abipadquid bëdambocquidquio iquendabi, quequin cainquin tantiaid ënëdtemaidquio nendac. Adecbidi, utsi tantiaid ënëdtemaidquio neoaindac. Aitedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bëdamboshëcquid nec.

## 14

### *Mimbi chiaid chuibanquid ëbi icme, Papa, quaid*

<sup>1</sup> Utsi tantiaquid icta. Nuquin Papan Mayanën adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bëdamboen chuibanquid ëbi icme, Papa, quequin chuiban. <sup>2</sup> Aden tantiamiac tantiamenu queshun tantianuequidën onqueten chuiban. Aton onqueten onquenquiosho aidon tantienquio iquec. Padnuen onquaidtedimbo Nuquin Papan tantieque. Aden nidaidën icquid onquiacmaidënquio Nuquin Papan Mayanën tantiamiacpadec onquequin Nuquin Papa chiec onqueta. <sup>3</sup> Ma Esuquidistu utsibon tantiabenu, queshun Nuquin Papan chiaid chuibanec. Adembidi matses ma bëdamboec tabadnu queshun chuibanec. <sup>4</sup> Nuquin Papan Mayanën tantiamiac nidaidën icquid onquiacmaidën onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu queshun chuibanec. <sup>5</sup> Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiosho isun abi daëdi onquaid tantiaquin chuibanquid nibëdnuc nidaidën icquid onquiacmaidën chuibanenda caimbi.

<sup>6</sup> Adembidi chuinu. Utsibon tantia. ¿Mibi yacno choash puduedshun nidaidën icquid onquiapadec onquenquiocquin ëmbi chuibansho tantienquio yec, Bëdamboe iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibansho mimbi tantiambec. Min onqueten chuibanenquio yec ëbibi onquiacbimboecscho mimbi tantienquio ictsiandac. <sup>7</sup> Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantiash, Adomboen cuëdëmenquio iccosh, quec. <sup>8</sup> Adembidi, utsibo yacno ma cuesnanu queshun chomenuequin sondadon tantiacpadpenquiocnoc shoncac choenquio iquec. <sup>9</sup> Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec.

<sup>10</sup> Onquete utsi-utsiec dadpen iquec. Aton onqueten onquequin chuibansho matsesën tantiec. <sup>11</sup> Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. <sup>12</sup> Ad icnuc, Nuquin Papan Mayanën ëbi tantiamepec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

<sup>13</sup> Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chui-boed chuloaquid icme, Papa, ma tantiapanu, quequin Nuquin Papa chuita.

<sup>14</sup> Nuquin Papa chiec ëbi onquiacmaidën onquesho utsibon tantienquio iquendac. <sup>15</sup> Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdënashic tantiamenuec iccuededquidon onqueten cuëdënnoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquio iquembi. Adecbidi abi onquiacmaidën cuëdënenquio iquebi. <sup>16</sup> Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. <sup>17</sup> Abi onquiacmaidën onquequin Nuquin Papan naboe chuibanac Esuquidistu tantiadonequidquio mibëd iccuededquido yantiapimbo iquec.

<sup>18</sup> Ëbibi utsin-utsinquec onqueten onquequidquio icnubi mibitedi adesa nec. Padnueni adec onquec bëdambo iquec, Papa, quequin chuidedchuidedembi. <sup>19</sup> Padnuen chuinuec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquaidquid icquin aidtedictsëqui chiendambi aido onquiacmaidën onquenquicquimbi.

<sup>20</sup> Adembidi chuinu. Utsibon tantia. Bacuëbo tantiabenabictsëcquid yacpadquiec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. <sup>21</sup> Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquio icoaposh,” quequin Nuquin Papan dada uamiampid nec.

<sup>22</sup> Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. <sup>23</sup> Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuedesho tantiash, Aidon tantiate icsabudpash, quepec. <sup>24</sup> Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. <sup>25</sup> Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobëd mibi iquec, Papa, quequin chuibampec Esuquidistu tantiaquid yanshun.

<sup>26</sup> Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamëquin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënu onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. <sup>27</sup> Aided, Chuinu, quesho ¿mitsicquid chuita nuqui cape? queshun naden chiac bëdambo ictsiash. Chuinu. Tantia. Mibi onquiacmaidën onquequin chuinequid daëd icnuc bëdambo ictsiash. Abentsëc chotsëcnuc adecbidi bëdambo ictsiash. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata. <sup>28</sup> Padnuen abi onquiaid tantiaquin chuibanuequid nibëdnuc, Tsadquin Nuquin Papauidi otacquocquin chuita, cata.

<sup>29</sup> Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiash. Abentsëc chotsëcnuc adecbidi bëdambo ictsiash. Aided icquin abentsëcshun chuibanubi, ¿Nuquin Papan Mayanën tantiamiacpadomboenda chuibanegue? Isnü, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. <sup>30</sup> Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, quesho tantiashun ma aidën chuibanu quiash ambia chuibanquid ënëd. <sup>31</sup> Adquidën iccuededquidtedi tantiamenuequin abentsëcshun-abentsëcshunquien chuibanta. Aden chuibanho tantiansh ma chieshenquo yec bëdambo icpanu. <sup>32</sup> Nuquin Papan Mayanën tantiamiaid utsibëd bëdamboec tabadquid nec. <sup>33</sup> Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, queshun onquenquocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

<sup>34</sup> Esuquidistu tantiaquido iccuededacno otacquo tabadquid chido. Chuibanacnoësh onquenu, quenda chido. Nuquin Papan chiacpadec ëbi chuiquid dada nec, quec chido. <sup>35</sup> Anoshon chiaid tantienquo yec tsadquin cainec shubuno nidash, Tantienuquo iccombique. Nuqui tantiaboed ëbi chui, quesho tantiashun chiec aton bënën. Tantienuquocquin cainenquo iquec chido icsambo iquec. <sup>36</sup> ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictëquida yanondac? Padenquo. <sup>37</sup> Nuquin Papan chiaid chuibanquidquo nebi, mibi quenuc, Nuquin Papan tantiamiacpaden Pabaton chuibanquin dada uaid nec, mibitedi quepec. <sup>38</sup> Aden mimbi tantianubi, Pabaton dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabaton dada uaid nec, quequin tantiamenu, quenda.

<sup>39</sup> Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinesho, Ai, cata. <sup>40</sup> Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuequin abentsëcshun-abentsëcshunquien chuibanta.

## 15

### *Esuquidistu uincuenaid*

<sup>1</sup> Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unësaid ëmbi chuibanho tantiash, Ai, abimbo

iquec. Aid tantiembi, mibi quiampondac. Aden tantiadonec chieshenquio yec mibitedi tabadec. <sup>2</sup> Aden, Aid tantiabenu, guesho Nuquin Papan mibitedi bédambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bédambo icmebanacmaid nec. Adecbidi, ambi yuednu cacmaidquio adquid nec.

<sup>3</sup> Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiapadomboen matses icsaquid icsho cuidnushe quiash abided cuidadec Esuquidistu unësapanédash. <sup>4</sup> Unësacsho shëcuë nacenaidën nauedshun bêtashacsho daëdec ushtanquin ambi chiampicpaden Nuquin Papan uincuen uapanédash. <sup>5</sup> Aden uincuemiach choquin, Uincuenobi, quequin Petedo Esuquidistun ismepanédash. Adshumbic adembidi abéd 12ted icquido ismeoapanédash. <sup>6</sup> Adshumbic adembidi abi tantiaquid dadpen 500ted iccuédesho choquin, Uincuenobi, quequin Esuquidistun ismeoapanédash. Aid uincuenacsho isquido dadpen abi tabadnubi utsiutsiec padenquio iquec. <sup>7</sup> Aden aidtedi ismeshumbic aton utsi Santiacotsen Esuquidistun ismeoapanédash. Adshumbic, ambi ëbi chuibeneta caidtedi ismeoapanédash. <sup>8</sup> Aden aido ismequin nainshun yuecshun ëbitsen ismeoapondashi. Icsactsëcquiocquid nec, quenquiocquin ismebenondashi tsyuecquio. <sup>9</sup> Abi tantiaquid mëyanquin cuesunemequidquio icboedi abi tantiaquid yanacsho Esuquidistun, Ëbi chuibeneta, cainquioctiadquidëmbi adquid icta caid nebi. <sup>10</sup> Esuquidistu tantiaquid yansho isun ëbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmiosi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenequiocnobi. ¿Ëmbentsëquidambi chuibenedio? Aton Mayan Nuquin Papan meniac aibdéd icquin chuibeniombi. <sup>11</sup> Adembidi, ëbi yacpadquidon Esuquidistu chuibanac utsitsen abi tantiaquido yampondash.

### *Matses unësash uincuenaid*

<sup>12</sup> Adec Esuquidistu unësash uincuenondash, quequin chuinubi ¿mitsipaden tantiec uincuenta nibédéc quec utsi-utsiec onquepec? <sup>13</sup> Uincuenta nibédnuc Esuquidistu uincuenenquio ictsempanédash. <sup>14</sup> Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. <sup>15</sup> Nuquin Papan naid chuibanquidtedi muaquidquio icoatsiandac. Aden tantienquiocquin ëbi yacpadquidon chuibanendac. Unësash uincuentequid nibédnuc ëbitedishun Nuquin Papan Esuquidistu uincuen uapanédash quequin chiaid abipenquio ictsiandac. Unësash uincuenta nibédnuc Nuquin Papan uincueniaid nibédtsiandac. <sup>16</sup> Unësash uincuenta nibédnuc Esuquidistu uincuentiapimbo ictsempanédash. <sup>17</sup> Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquio mimbi ictsiandac. Matses icsaquid icsho cuidnushe quiash cuidadquid nibédtsiandac. <sup>18</sup> Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanédash. <sup>19</sup> Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

<sup>20</sup> Ëmbi chuiboedtedi adtiapimbo iquec. Esuquidistu Nuquin Papan uincuen uapanédash, quequin chiaid abimbo iquendac caimbi. Nuquin Papan ambi abia uincueniaid abi yacno puduedmequin ambi uincuemetequid dadpen iquendac, quequin chiaid abimbo iquec. <sup>21</sup> Unëstequid bëyuc dada yanampicpadec matsestedidi adecbidi

iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. <sup>22</sup> Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. <sup>23</sup> Esuquidistubimbocquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. <sup>24</sup> Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nējdtedi min shubu abentsēquēn tabadquido nec, quequin chiendac abi chieshēnquidtedi chēn quetiapimbocnoc. Aido ambi nebudacimbocquido iquendac. <sup>25</sup> Abi chieshēnquido utsitedibēd chuiquid icquin abi chieshēntiapimbocquid aido Esuquidistun icmēbanendac. <sup>26</sup> Adoshombic ēnquimbi unēstequid nibēdquidquio Esuquidistun icmeoaindac. <sup>27</sup> Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. <sup>28</sup> Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

<sup>29</sup> Unēsash uincuentequid nibēdnuc, ¿atotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? <sup>30</sup> Adecbidi unēsash uincuentequid nibēdnuc ēbi unēs uate utsibo comapenec buncuededsho isun ¿atotsieshun, Uincuentequid iquec, quequin ēbi yacpadquidon chuibampec? <sup>31</sup> Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquiocquin Esuquidistu unēsash uincuenta iquec, quequin chuibenec nebī. Aden badiadquidēn-badiadquidēnquien chuibanubi ēbi unēs uate utsibo bunec. <sup>32</sup> Uincuentequid nibēdnuc, ¿atotsi quēnuequini Epeso yacnoshon, Uincuenta iquec, quequin chuibanasho mēyanaqui chieshenquio yec dayacquio tsadpe? quetsiabi. Adecbidi uincuenta nibēdnuc: “Unēsash nibēdquiec iquebi, quequin nua peshun aquembi,” quetsiabi. <sup>33</sup> Aden tantienquio iquēmbi. Adembidi tantienda. “Uincuenta nibēdec quequidbēd capuenda aidēn tantiacpadec icmane quiash.” <sup>34</sup> Adquidpadquid icquin mimbi icsamboen tantiaid ēnquin Nuquin Papan chiaidquio tantiata. Esuquidistu tantiec mibēd iccuededquid utsi-utsiec, Nuquin Papa nadatiambocquin uincuemianquidquio nec, quequin tantiesa nec. ¿Adquid mibēdi icnuc Nuquin Papan bēdambo icmiaido mibitedida icpe? Padenquio.

### *Uincuemequin dada chuca meniaid*

<sup>35</sup> ¿Mitsipadec unēsaid uincuempec? utsi quepec. Adecbidi, ¿mitsipadquid uincuentequidēn dada icpec? utsi queoapec. <sup>36</sup> Adquidēn icsamboen tantieque. Chuinu. Tantiā. Mimbi tiedēn chococaid tauibēd ēshē chococateguic napi dēyuctequidpadpenquio iquec. <sup>37</sup> Mimbi tiedēn chococaid utsi-utsiec iquec. Adecbidi mimbi tiedēn siaid utsi-utsiec iquec. Mimbi chococaid mimbi siaidbidi dēyuctequid utsi-utsiec iquec. <sup>38</sup> Nuquin Papan tantiampicpadec aton dada yanec. <sup>39</sup> Abipadquidpenquio ambi uaidtedi iquec. Abipadquidquio matsestedi iquec. Abipadquidquio nidaidēn capuquidtedi iquec. Abipadquidquio podochoquidtedi icoaic. Abipadquidquio acten icquidtedi icoaic. <sup>40</sup> Abuc tabēcaid icnubi nidaidēn icquid iquec. Abuc tabēcaid abipadquid chēnquesho isec nidaidēn icquid tabadec. <sup>41</sup> Badiadēn ushē comapenquiec chēnquēnubi inchēshēn ushē dauebudquio chēnquēc. Aid

daëdi nua isadnubi uispa pistsëc isadoaic. Uispa utsi-utsiec iquec. Abi bedquec chênquettequid utsi-utsiecbidi iquec.

<sup>42</sup> Aidtedi ênëndendac. Adecbidi tishac matses unësacsho chococac nami chodquec. Adecec nami chodquian Nuquin Papan tantiapadec uincuentequidên dada chuca chodquesa nendac. <sup>43</sup> Tishac icsaisho matses iquec. Adsho uincuemequin ambi icsaisa icmiaid nendac. Nidaidênshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. <sup>44</sup> Nidaidênshun tishac daicsambo yanash unësacsho uincuemequin dada chuca icmetequad nendac. Nidaidênshun tishac matsesên tantiapadquid icboedi Nuquin Papan uincuemiac aidên tantiapadquid iquendac.

Nidaidênshun tishac matsesên tantiapadquid icboedi abuc buanac anocquidên tantiapadquid iquendac. <sup>45</sup> Adembidi Nuquin Papan chuiquin dada uamiampid nad iquec: “Bëyuc matses Adan caid nacnenshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. <sup>46</sup> Nuquin Papan matsesên tantiapadquidba icmiac Esuquidistu tantiaquid icsho isun abipadquid meniac icbon tantiapadquid yanec. <sup>47</sup> Bëyuc matses uanu, queshun nidaid putu bedshun nacnenaaid nepampic. Bëyuc matses Adan caidên tsyuecquid Nuquin Papan abi yacnoshon budmiaid nepanêdash. <sup>48</sup> Nidaid putu bedshun bëyuc matses nacnenshun nidaidên tabadquid icmepampic. Adquiecbidi abipadquid matsesteddi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. <sup>49</sup> Adecbidi bëyuc matses isadac bimboecquid nidaidên tabadquidtedi nec. Nuquin Papan abucshun chomiaid isadac bimboecquid abêd icquido iquendac.

<sup>50</sup> Adembidi chuinu. Tantiata. Matsesên dada nami intacchoquid chodquettequid icnuc Nuquin Papan shubu abentsëquên tabadtiapimbo adquid iquec. Chodquettequid chodquettemaid ictiapimbo iquec.

<sup>51</sup> Nuquin Papan chienquiocpampid chuinu. Tantiata. Abi tantiaquid unësabicquidbêdta ênden abi tantiaquid tsusedpabo dada chuca Nuquin Papan menendac. <sup>52</sup> Ambi namiaidên abucshun shoncanubi êshê badedquio bëbedquiac bimboecnuc badedquio unësesambo Nuquin Papan abi tantiaquido icmendac. <sup>53</sup> Chodquettequid icboedi chodquesa yanendac. Unëstequid icboedi unësesa yanendac. <sup>54</sup> “Adquid icmiac unëstequid nibêdquidendac.

<sup>55</sup> Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?”

<sup>56</sup> Icsaquid unëstequid nec. Nuquin Papan nadomboen nata quequin chi-aid niacquid icash unëstequid matses yanac. <sup>57</sup> Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaisa cuidquid nuqui bédambo icmabanec. Adoac abi yacnoêsh icsaisa unësesambo nuqui iquendac. Aden Nuquin Papan naindac, quequin, Bêdamboecquid mibi nec, Papa, quequin nuqui chuided-chuidendac.

<sup>58</sup> Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adecec tabadquid Nuquin Papan chiãcpadomboen naban Esuquidistupadquid Nuquin Papan êbi icmendac, quequin tantiaquin.



<sup>1</sup> Nuquin Papan bēdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuedēta. Nidaid Cada sia caid yacnocquido Esuquidistu tantiaquido ēmbi chuibanacpadomboen mimbitsen nabanta. Naden Cadasia yacnocquido chiombi. <sup>2</sup> Abentsēcshun-abentsēcshunquien mimbi bedaid musucbudcuenshun dominco ushēn mimbi musucacted dayun uata. Aton na daēdpactsēc icquidēn daēdpactsēc dayun uanubi mitsana dadpen icquidēn dadpen dayun uata. Aden musucbudcuenshun mimbi dayun uaid icnuc ēbi choacsho isash, ¿Tedtsimbi menepeba? quenquo mibitedi iquendac. <sup>3</sup> Ēbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, Ēmbi isaido neque. Yuedta, quequin dada uashun aido menembi ma buanueshun. Aden ēmbi meniac buanquin utsibo ismetuidpec. <sup>4</sup> Adecbidi ambo nidtiadquio iquebi, ēbi quenuc mimbi menenun buantan caido ēbēdi nidendac.

### *Utsi-utsien chuibanaid*

<sup>5</sup> Nidaid Masedonia caid yacno Esuquidistu tantiec iccuededquid utsi-utsiec yacno isedbēquimbi mibi isbētsenembi. <sup>6</sup> Aden isedbēequi mibi isedash tabadebi. Iquenoanquid chonobi mibēd tabadtsiabi. ¿Aid ēnēdan nidnu, qesho, adabi utsi yacno mimbi nidmepatsia? <sup>7</sup> Nēbi mibēdi yuec tabadti-apimbo iquebi, quiash mibi yacno nidenquio iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. <sup>8</sup> Nēbi padenquio iquebi. Epeso yacnocquidobēd iquebi. Nuquin Papan abipadquid aton Mayan matsen meniaid ushē tantiate choan nēuēshquio nidebi. <sup>9</sup> Nēmo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibanasho tanti-aidash utsibo ēbi chieshēnquido nēmo iquec.

<sup>10</sup> Mibi yacno ēbi nidenquio icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. <sup>11</sup> Nuquin Papan namiaidquiobidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nec. Mibi nidsho isash unēsquio iquebi, quequin nidme ma ēbi yacno choanu. Utsibobēd Timoteyo choaic quequin camec tsadebi.

<sup>12</sup> Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdtan istanta, quequin Apodos comapenen chiombi. Adoac, Nēbi Codinto yacno nidte bunenquio iquebi, quiosh aid. Yuecash Codinto yacno nidec bēdambo ictsiash, quiash yuecash aidi mibi yacno nidendac.

<sup>13</sup> Icsamane quequin chieshenquiocquin Nuquin Papan chiaid tanti- adoneta. Esuquidistu tantiabenquido yanta. Adecbidi, natiatequid icnuc chieshtoenguo yec dayacquo yec tabadteneta. <sup>14</sup> Adec tabadquin utsi bēdamboen tantiaquin nabanta.

<sup>15</sup> Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. <sup>16</sup> Aidon namiaido icta. Adembidi, comapenen nashumbanquidtedishun namiaido icta. <sup>17</sup> Codinto yacno Esuquidistu tantiec iccuededquidtedi ēbēdi ictiapimbocnobi mibi yacnoēsh nēidtedi chosh. Estepanas yec Podtunato yec Acaico yec quec choash puduedsho isash bēdambo iquebi. <sup>18</sup> Mibitedi chuibanquin aidon unēsquiocquidi bēdambo icmioshi. Mibi yacno

padpidec nidash puduedshun chuibanquin adembidi mibitedi bēdambo icmendac aidon. Aido mibi yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

*Esuquidistu tantiaquidon mibitedi tantiaquin chuibanaid*

<sup>19</sup> Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisidabēdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. <sup>20</sup> Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

<sup>21</sup> Ēmbi chuibanac ěmbi chiaid utsin dada uashumboed nec. Nēshun bedanquin dēnainquin dada uaimbique. Tantia.

<sup>22</sup> Nuquin Icho tantiesa nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

<sup>23</sup> Ēbi icsaquid icsho cuidenquiocquin Nuquin Icho Esuquidistued Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

<sup>24</sup> Esuquidistun shubun icquido nuquibi icsho ěmbi bēdamboen isaido mibitedi nec.

Padi aidedtada uombique. Isec onquecuedta.

## CODINTO YACNOCQUIDON ISTE 2

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ēmbi dada uaid mibitedishun isbanshun utsibo meneta ma isnueshun.

<sup>2</sup> Matses icsaquid icsho cuidnushe quiash abided cuidadec Esuquidistu uněspanědash, quequin tantiaquiosho isun Nuquin Papan bědamboen isaědquio nuqui nec. Adquido yec utsiboběd ma bědamboec tabadpanuna.

### *Bědambo icmianquidquio Nuquin Papa*

<sup>3</sup> Nuquin Papa nad iqueque. Tantia. Chuinu. Ēbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. <sup>4</sup> Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. <sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. <sup>6</sup> Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. <sup>7</sup> Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ēbi měyanacpaden mibi měnyansho isun Nuquin Papan bědambo icmiaid mibi iquendac.

<sup>8</sup> Nidaid Asia caid yacnoshon ěbi natiambeoed mimbi tantiamboen icchitec, quequin ěbi adoboed mibi chuibanu. Tantia. Dayactiapimboec natiamioshi. Adoac, Uněsebi, quioibi. <sup>9</sup> Uněs uatiad, utsibo qesho tantiaash, Ēbibi měnchiquidtiapimboqcquimbi matses uněsacsho uincumequiděn ěbi měnchictsiash, quequin tantiec tsadobi. <sup>10</sup> Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. <sup>11</sup> Ēbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiaashun mimbi Pabado měnchiccoc. Mibi bědamboquid nec, Papa, quequin ma dadpenshun ambi naid chuipanuna.

### *Něbi mibi yacno nidenquio iquebi, quiaid*

<sup>12</sup> Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquio yec tabadobi. <sup>13</sup> Ma tantiamenueshun abimbo chuiquin mibi dada uashunec nebi. Ēmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. <sup>14</sup> Ēběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin

utsibon chuisho tantiash bēdambo iquebi. Esuquidistu choanuc adquiequi Codinto yacnocquido tabadpashun, quec tsadebi.

<sup>15</sup> Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi. <sup>16</sup> Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, queshe tantiashun nidaid Udeya caid yacno mimbi ēbi nidmetsiac, quequin mibi chiombi. <sup>17</sup> ¿Uquēducshun, Nidenquo iquebi, quequin muaquindambi chuidio? Adenquocquin chiombi.

<sup>18</sup> Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. <sup>19</sup> Ambi chiacpadomboen nabanquidquo Nuquin Papan Madombo, ēmbi chuibeniaid, Esuquidistu nec. Aidi Sidasēn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. <sup>20</sup> Con Madon naden naindac, quequin Nuquin Papan chiacpadomboen Esuquidistun ēnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ēbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. <sup>21</sup> Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. <sup>22</sup> Adembidi aton bacuē icmiaid nuqui nec. Adembidi aton Mayan Nuquin Papan meniaid nuqui nec. Ēbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachimane quiash mibi yacno nidenquo iccobi. <sup>24</sup> Ēmbi Esuquidistu chuibanac abi tantiaquid dadpen iquec. Aidon icbopenquo nebi. Aidon icbopenquiobidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

## 2

<sup>1</sup> Aden tantiaquin comapenen chuiquin unēsquo icmenushe quec mibi yacno nidenquo iquebi caombi. <sup>2</sup> Mibi unēsquo ēmbi icmiac ¿tsuntsin ēbi bēdambo icmepatsiash? ¿Ēmbi icsambo icmeboedēnda ēbi bēdambo icmepadic? Padenquo. <sup>3</sup> Aden tantiaquin mimbi iste dada uaombi ma ēbi bēdambo icmequid unēsquo icmetiapimbo iquebi, qeshun. Bēdambo iquebi, quequin ēbi tantiec adquiobidi mibi icoatsiac, quequin tantiombi. <sup>4</sup> Unēsquo yec shubiquimbi mibi dada uashun, Meneta, caondambi. Unēsquo icmenu, quenquocquin mibi comapenen tantiaquin dada uaondambi.

### *Abi icsaboed bēpiscudneshun yued quiaid*

<sup>5</sup> Anocquidēn ēbi unēsquo icmedenequimbi adembidi comapenquiec unēsquo mibi icmeoaosh. Aidi mibi chiondambi. <sup>6</sup> Aidi mibi dadpenshun cacumiac abi icsaid ēnosh quec. <sup>7</sup> Adoachso abi icsaid bēpiscudshun aidi yuedoaquin bēdambo icme. Yuedenquo yac natiamianquiec unēstiaquid yantsiash. <sup>8</sup> Nuquibi iccuedednuna, quequin aid tantiaquin yued caimbi. <sup>9</sup> ¿Ēmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. <sup>10</sup> Aden ēmbi dada uacpaden mimbi

cacumiac abi icsaid ênsho isun abi icsaid nibêdabimboec bēpiscudshun yued. Adsho tantiashun adomboembidi naimbi. Aidbēdi abentsēc yacimbocquido yanosh, quesho tantiash abi icsaid bēpiscudebi Esuquidistun tantianubi. <sup>11</sup> Nuqui chieshēnquidēn Satanasēn aidi icsamenushe queshun abi icsaid êmboed yuedta. Yuedenda, Satanasēn quequin tantiamiac onquesho tantienda.

*Nuquin Papan con Mayan meniaid adquid êbēdi tabadtequid nec, quiaid*

<sup>12</sup> Esuquidistu chuibanec shubu dadpen icquid Todoas caid yacno ēbi chonoc, Tantanu, quec cho-choquid dadpen icpondash. <sup>13</sup> Adquid dadpen icnubi êmbi con utsi caid, Tito, mibi yacnoēsh choabi icnuc ambo yuec tabadtiapimbo iccobi. Adash, Bēquednu, quianec nidaid Masedonia caid yacno nidoapobi.

<sup>14</sup> Bêdambocquid mibi nec, Papa. Mimbi Esuquidistu tantiaquid ēbi yacpadquido icmeshun mimbi, Esuquidistu chuibeneta, caid êbitedi nec. Êmbi chuibanaid noadte bēdabimboecquid nec. Noadte bēda pushudec noadsho uano-uanoec tabadquidon shēdec. Adembidi, Esuquidistu ēbi yacpadquidon chuibenesho uano-uanoec tabadquidon tantiec. <sup>15-16</sup> Esuquidistu chuibanac noadte bēdan danoshquiaid shēdabimboen utsibon tantiec. Adembidi, Esuquidistun ēbi chuibeneta caido Icho isacimbocquido Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ênēdenquio yec abêd icquido aitedi iguendac. Aden nuqui isquin Esuquidistu tantiesa icsho Nuquin Papan nēsiatequid iguendac. ¿Tsutsi Esuquidistupadquidquio icpec? Adquid nibêdec. Adesa icsho ambi, Êbi chuibeneta, caidquio nebi. Adquid icquin chuibenenubi <sup>17</sup> piucquid bedte bunquin utsin-utsinquien Esuquidistu chuibanec. Adesa êbipadquido iquec. Piucquid bednuequin ēbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

### 3

<sup>1</sup> ¿Pabado bēdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bēdamboec tabadquin Esuquidistu Pabado chuibanosh, quequin dada uata, êmbi cac mimbi dada uaidtambi buampe? Padenquio. <sup>2</sup> Mibēdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chēshēten pinchuguēn tansiabimboecnc paucditiapimboecnoc Nuquin Icbon tantiamioshi. Adembidi icsamboec tabadboedi nēbi bēdamboec tabadsho isun Pabado Esuquidistu chuibanaido Codinto yacnocquido nec, quequin adomboembidi tantiabedec utsibon. <sup>3</sup> ¿Abi tantiaquid icsho isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquio. Esuquidistu tantiasho isun unēstiapimboecquid aton Mayan abipadquidquio mibitedi meniondash.

<sup>4</sup> Nuquin Papan tantiacpadombocquido Esuquidistun, Êbi chuibeneta, cac chuibanac Esuquidistu tantiaquid mibitedi yanacsho tantiec êmbi chuibanaido aitedi nec, quequin tantiemi. <sup>5</sup> Êmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiemi. <sup>6</sup> Êmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenequidquio nebi. Ambi, Nadombocquido nata, quequin dada uamiampicpadombocquido chuibanta caidpenquio nebi. Ambi nadombocquido nata, quequin dada uamiampidtedi

natiapimbo yec aibdēdi matses tabadtiapimbo iquec. Aton Mayan meniaidbēd tabadtequid nec.

*Abi tantiaquido bēdambo icmetequid aton Mayan*

<sup>7</sup> Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uampid meniāc abi chēnquiacpadec Moisesēn bētantiāte comapeneq bēchomauanquieq chēnqueboedi macuēsh budec bēdiāmbō chēnquesho isadaidbōn bēstiapimbo icpampic. <sup>8</sup> Nēbi Esuquidistu tantiaquid bēdambo icmequid aton Mayan abipadquid meniāid ēnēdenquiocquidquio nec. <sup>9</sup> Ēmbi nadomboen nata quequin chiaid niacquid ēbēdi tabadtiapimbo iquec, quequin dada uaid Nuquin Papan meniāc buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimbocnoc tabadmendac. <sup>10</sup> Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniāmpid ēnēdācbimboecquid nendac. <sup>11</sup> Ai, nadomboen nata quequin chiaid Moisesēn bedshun meniāid ēnēdtequid icnubi bēdambo icmiantequid Nuquin Papan chomiaid icsaisa ēnēdtiapimbo iquec.

<sup>12</sup> Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenequid nebi. <sup>13</sup> Moises Nuquin Papabēd onquec bēchomauanquieqboedi auēshquio nidec ushmasushmactscēquo yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. <sup>14</sup> Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdācbimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesā yec adequi tabadec. Abi tantiaquid ambi paucshun tantiamiaido nendac. <sup>15</sup> Nadomboen nata quequin dada uaid Moises menepāmpid isec onquec pamumēdācbimboecquid isadaidbo utsi-utsiec iquec. <sup>16</sup> Esuquidistu tantiaquid icsho Nuquin Papan Mayanēn paucquin tantiamiaid nendac. <sup>17</sup> Nuquin Icho icsaisa icquin ēnden nadomboen nata quequin dada uapāmpicpaden naquidquio nec. Adquid Esuquidistu nec, quequin tantiaquin chuibenec nebi. <sup>18</sup> Paucac, Ēbi icsaid bedshunash Esuquidistuded cuidāpānēdash, quequin nuqui tantiec. Aidēnquioibi icsaisa icquin abipadquid nuqui meniāc aton Mayanēn adquid nuqui icmebanec.

## 4

*Nuquin Papan nadatiambocquin nadenequin Esuquidistu chuibenemiaid*

<sup>1</sup> Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. <sup>2</sup> Icsash ompodquid icboedi nēbi muēsa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. <sup>3</sup> Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. <sup>4</sup> Nuquin Papapadquid Esuquidistu tantiaquid icnushe qeshun icsamiānequidēn Sātanāsēn pamunācbimboen utsi-utsien tantiamenquio iquec. <sup>5</sup> Ēmbibi naid chiesā nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. <sup>6</sup> Abitedi uanuna, qeshun, “Inchēshquio icboedi uēshēmbō yanquiota,” capampic Nuquin Papan. Adomboembidi Nuquin Papan chiaid pamumēdācbimboen

tantienquiochoedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

<sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. <sup>8</sup> Aden chuibansho mëyanaqui abi chuibeneq nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. <sup>9</sup> Èbi chieshëquid dadpen icnubi ëbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. <sup>10</sup> Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedeniوشي. Adoacsho uincuenaidën dayacquio icmedeniaid nec, quequin utsibon isbededebi. <sup>11</sup> Ademi Esuquidistu chuibansho unës uatsiashi, quequin chuibeneq nebi. Aid chuibansho unës uatsenaqui abipadquid unësesa yanebi, quec bëdamboec tabadebi. <sup>12</sup> Aden tantiaquin aid chuibanac abi tantiaquid yanash aidbëdi tabadec unësesa mibitedi yanendac. <sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. <sup>14</sup> Aden tantiaquin Nuquin Papan Esuquidistu uincuemiacpaden aidbëdi tabadmenuen mibitedibëdtabi ëbëd icquidtedi uincuemendac, quequin chiembi. <sup>15</sup> Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibeneq nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquio iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. <sup>17</sup> Natiamiantequid ënëndendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. <sup>18</sup> Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaidtedi ënëndendac. Nuquin Papa yacnocquid ëmbi isacmaidtedibëd ënëndtemaid iquendabi.

## 5

### *Nuquin Papabëd tabadte iquendac quiaid*

<sup>1</sup> Con nami shëniбудаш unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëndtemaid matsesën nacenacmaid nec, quequin tantiembi. <sup>2</sup> U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. <sup>3</sup> Aden meniac ëbibimboec isadsho isendac, quec tsadebi. <sup>4</sup> Nami chodquequid icnuc uëshqhec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. <sup>5</sup> Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

<sup>6</sup> Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. <sup>7</sup> Aton Mayan meniac nuqui isacmaid Esuquidistu cainec nuqui tabadec. Èmbi isaid ëmbi caintemaid nec. <sup>8</sup> Aden aid cainsho nami chodquesa badedquio menepashuni. Aden meniac Nuquin Icbobëd iquendabi, quequin nuqui tantiec. <sup>9</sup> Aden tantiec nidaidën tabadequi Nuquin Papa bunacpadquiec tabadnuna. Abuc nidash

tabadec abi bunacpadquiec tabadoaindabi, quequin tantiembi. <sup>10</sup> Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mïmbi bëdamboen nabanoc, quequin chuibanendac abitedishun naid cuidquin.

*Ma utsibotsen abi tantiaquid icpanu quequin chuibanaid*

<sup>11</sup> Aden ambi tantiacpaden nabansho, Bëdamboen mïmbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mïmbi chuipashun, quec tsadebi. <sup>12</sup> Aden tantiaquin, Mibi bëdambo iquec, ëbi camenun mibi dada uashunquio iquemi. Èbi chienquiocquin, Bëdamboec tabadquin ismiachimboecquidën ëbi icsamboen chuisho aido chuita, quequin mibi dada uashunembi. <sup>13</sup> Aido, Pabodon tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiasih quenquiocquin ma Esuquidistu tantianu qeshun aid chuibenec nebi utsibon chuibenecquiocnobi. <sup>14</sup> Chian anëdënquequid icsamboquid nësianushe quiash matses icsaid bedshunash abided cuidadec icsaisa Esuquidistu unëspanëdash, quequin ma utsibon tantiapanueshun chuibenec nebi. <sup>15</sup> Ma ëmbi naid chiac ëbi tantiaquido ma ëbëdi icpanu, quiash unësash uincuempanëdash Esuquidistu.

<sup>16</sup> Adec unësash Esuquidistu uincuempanëdash, quequin matses unësash uincuenta iquec, quequin abi tantiaquidon tantiec. Ènden, matsesquio Esus nec, quiondaïdi nëbi, Nuquin Papan Chomiaid yec matses tantiec unësash uincuempanëdash, quequin tantiembi. <sup>17</sup> Abi tantiaquid ambi tantiamiaid nec. Ènden matsesën tantiacpadquiec ichoedi Esuquidistun tantiacpadquiec bëdamboec tabadec abi tantiaquidquio. <sup>18-19</sup> Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui ichoedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquio utsibon tantiapanu qeshun ambi naid nuqui chuibenec. <sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Èbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. <sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

## 6

<sup>1</sup> Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta. <sup>2</sup> Nuquin Papan chiampid chuinu. Tantia.

“Mibi bëdambo icmete ushë chonoc cuënsho tantiombi.

Tantiesha ichoedi nëid ushënquio mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquio ambi aton bacuë icmete ushë nendac.

*Pabado natiamiaid*

<sup>3</sup> Icsamboec tabadquimbi Pabodon Esuquidistu chuibansho, Tantiatiapibi, utsibo quetiapimboec bëdamboec tabadec nebi. <sup>4</sup> Nuquin Papan chuimiaid yec naded tabadebi: Chieshenquio yec dayacquiocquin ambi chiaid chuibenec bëdamboec tabadec nebi. Natiamiaid yec adëqui tabadebi. <sup>5</sup> Utsin cuesaquid adëqui bëdamboec tabadebi. Quënën nauedaquid



adequi bēdamboec tabadebi. Nuquin Papan chiaid ěmbi chuibanac cuesnanubi padenquoio yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquieq bēdamboec tabadebi. <sup>6</sup> Icsainquoio yec bēdamboec tabadebi. Nuquin Papan chiaid tantesa uainquoio yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, quequin chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanĕn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. <sup>7</sup> Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanushun. <sup>8</sup> Ĕbi chieq: Pabado bēdambo iquec, quenubi adequi tabadebi. Utsin ěbi chuoiaic: Pabado icsambo iquec, quenubi adequi bēdamboec tabadebi. Ĕbi icsamboen chuinubi adequi bēdamboec tabadebi. Ĕbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. <sup>9</sup> Ĕbi isquidĕmbi, Ĕmbi isacmaid Pabado nec, caqui ěmbi chuibansho tantiaboedo nec caimbi. Ĕbi unĕs uate bunubi abi chuibanec capucuenebi. Mĕyanaqui unĕsabi yec nidebi. <sup>10</sup> Unĕsquio icmiaqui Esuquidistu tantiec bēdambo iquebi. Con na nibĕdsho isun adembidi Esuquidistu chuibanec nebi ma Esuquidistu tantiec utsibo bēdambo icpanushun. Con na nibĕdsho isash Nuquin Papan bacuĕ yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ěbi natiaboedtedi mibi chuibanombi. Mibi comapenen tantiaquin ěmbi nabanaid mibi chuibanombi. <sup>12</sup> Mibi tantiacquioquin chuibanquid ěbi icnubi ěbi tantiaquin chienquoio mimbi iquec. <sup>13</sup> Pabaton con bacuĕbo caido nebi, quequin mimbi naid mimbi tantiadbĕdta ompoenquiocquin ěbi chuiban, caimbi mibi.

### *Esuquidistu tantiesabĕdtambi icsain nainda quiaid*

<sup>14</sup> Esuquidistu tantiesabĕdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bēdambo icmiaidĕnda ambi chiaid niacquidbĕdtan nabampadic? ¿Nuquin Papan Mayanĕn tantiamiaidĕnda Icho chieshĕnquidbĕdtambi chieshĕmpadic? <sup>15</sup> ¿Esuquidistu Satanaspadquidta nedic? Padenquoio. ¿Esuquidistu tantiaquid abi tantiesapadquidta nedic? Padenquoio. <sup>16</sup> ¿Nuquin Papan ambi uaidimboecnuc matsesĕn nacneaid tantiaquidta aton Mayan Nuquin Papan meniaid icpadic? Padenquoio. Abi tantiaquid aton Mayan menec. Nuquin Papan dada uamiampid dada uanu. Ista.

“Ĕbĕd icquidbĕd iquendabi;

Aidbĕdi capuebi;

Aton papa nebi;

Con matses adquido nec,

<sup>17</sup> Con matses icquin ěbi tantiesan ěmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquoio yec tabad.

Adquid ĕbĕd iquec cho caindambi.

<sup>18</sup> Adquidon papa iquendabi;

Adquid ěmbi con madobĕd con champi caid iquendac, quec Nuquin Papa.”  
Abi tantiaquido nadatiambocquidĕn aden chieq.

## 7

<sup>1</sup> Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ēnu, quequin Nuquin Papan chiacpadomboen nabanec tabadtenenuna.

*Unēsquo icboedi mimbi naid tantiaash bēdamboshē iquebi quiaid*

<sup>2</sup> Adembidi, ēbēdtabi ēbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. <sup>3</sup> Pabado tantienquo yec icsaobi mibi camenuen nēid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unēsequi mibi bēshuntiapimbo iguendabi. <sup>4</sup> Mimbi chiacpadpenquochoedēmbi naosh, quequin choquidēn chioshi. Aden chuisho tantiaashun, Nuquin Papan chiacpaden nabanquidquo nec, quequin mibi chiec nebi. Unēsquo icboedi mimbi naid tantiaash bēdamboshē iquebi. Utsin natiamaid icshobi bēdambo iquebi, mimbi ēbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedēmbi tantesa uatsiaash, quec quenenuenquo iccobi. <sup>6</sup> Unēsquo icsho ēbi tantiaquin Nuquin Papan Tito padpiden chomiosh ēbi bēdambo icmeoanuen. <sup>7</sup> Choashun mimbi aid tantiaquin nabanaid Titon chioshi. Adembidi, ēbi iste mibi bunaid chioshi. Mimbi dada uaid isash unēsquo icquin, Codinto yacnocquidon mimbi chiacpaden nabanosh, quequin Titon chioshi. Aden chiac bēdamboshē yanobi ad yenquo icboedi.

<sup>8</sup> Mimbi dada uaid isash Codinto yacnocquido unēsquo iccosh, qesho tantiaash, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unēsquo yacpadequi unēsquo iccobi. Yuec mibi ad yenquo iccoc. <sup>9</sup> Adecbidi nēbi bēdambo iquebi. Ēmbi mibi unēsquo icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquo icmequin mibi icsabudmiambo iccombi. Unēsquo icmiaqui mibi bēdambo yanoc. <sup>10</sup> Unēsquo icmiac, Nuquin Papan chiaid niacombi, quiash unēsquo icquin mibi icsaid mimbi ēnac. Adsho isun Nuquin Papan ēnēdtiapimbo cnoc aidbēd mibi icmendac. Aden unēsquo icmiaqui, Bēdambo iquebi, mibi quendac. Adecbidi mibi icsacpade icsainquo mibi icpendac. Padnuen Nuquin Papan chiacpaden niacquin ēnesa abi natiamaiduidi tantiec Nuquin Papa yacno puduedtiapimbo iguendac. <sup>11</sup> Padnuen mibi unēsquo icmiac nēbi ambi chiaid comapenen tantiate bunec mibi. Aid padpiden tantiaquin, zatotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ēnoc. Adembidi, Ēbi padpiden bēdamboen is, quequin Nuquin Papa mimbi chioc. Icsashun chienquochoedēmbi nēbi cuembo bēdamboen chuinu, quequin mimbi chuibanoc. Aden mibi icsaid ēnacsho isun mibitedi icsaquin ēntiapimbo icquidēn nacpaden naisa nec, quequin tantiembi. <sup>12</sup> Icsaquid ambi icsa uanaidbēdtabi chuinen mibitedi dada uainquo iccombi. Abentsēc icsash abitedi unēsquo iquec. Adquiecbidi ēbi unēsquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin <sup>13</sup> ēmbi tantiacpaden naquin mimbi bēdambo iquebi camiaid nebi.

Adembidi Tito yuedquin mimbi bēdambo iquebi camiaidbidi niosh. Ēbi yuedenquoictsiash queboedi niosh. Yuedoshi, Tito qesho tantiaash bēdamboshē iquebi. <sup>14</sup> Mibi nidmembidi, Tito, qeshun, Ēbi yuedquin nashu-nacpadomboen Codinto yacnocquidon mibi yuedtsiaash quequin chiombi. Aden chiac mibi yacno Tito choacsho ēmbi chuibocpadomboen mimbi

nashunac. Aden tantiash, Abimbo chiombi, quepobi. Ĕmbi mibi muain-  
quiocquin chuibanacpadec adquiobidi mibi nabanec tabadaid abimbo ic-  
cosh. Adomboebidi Titon mibi isbanosh. <sup>15</sup> Ĕbitedi chushcatsiash, quequin  
mibitedishun Tito yuedpanēdac. Aden yuedac, Naden nata, quiosh Pabado,  
cac cacuidanenquiocquin mimbi nabanoc, quec Tito. <sup>16</sup> Adoaidi ambia  
tantaquid icquin Ĕmbi chiac mibitedishun nabanendac, quequin tantiembi.  
Aden tantiec bēdambo yec tsadebi.

## 8

### *Aton na nibēdquid icsho aton na dadpen icquid menequid*

<sup>1</sup> Nuquin Papan tantiamiac nidaid Masedonia caid yacnocquidon,  
Esuquidistu tantiec iccuededquidon, nēbi bēdamboen nabanec tabadaid  
chuinu. Tantia. <sup>2</sup> Natiamiaquī bēdambo iquebi quec aido tabadec. Adece  
tabadquin Esuquidistu tantaquid utsibo tantaquin menenuquin aton na  
daēdpactsēc musucshun dayun uaosh. <sup>3</sup> Ĕmbi, Meneta, cainquiocnobi aton  
na bedtequid naimbudtsēcquien menenuquin bedbanosh. <sup>4</sup> Esuquidistu  
tantaquid utsibo, nidaid Udeya caid yacnocquido, aton na nibēdec  
nataic, quequin chiac Masedonia caid yacnocquidon, Aido menenuna,  
quequin compenen chuiposhi. <sup>5</sup> Mitsana daēdpactsēc icnuc utsibo mimbi  
menetiapimbo icpec, quequin chuinu quenubi Nuquin Icbon tantiamiac,  
Codinto yacnocquidon chiācpadomboen bedbanshun menenuna, quequin  
aidon chioshi. <sup>6</sup> Adomboen menenun bedbamposh. Adosho isun  
Tito nadombi. Mimbi Ĕnden nidaid Udeya caid yacnocquidon natiaid  
chuibanac Nuquin Papan tantiamiacpadomboen menenueshun Codinto  
yacnocquidon tauain bedbanshun dayun uapondash. ¿Ambi chiactedta  
bedbanoshe? Isnu, qeshun istanta, quequin Tito chiombi. <sup>7</sup> Naden  
naquid Codinto yacnocquido nec, quequin mibi tantiembi. Nuquin  
Papan Mayanēn tantiamiaidquio yec compenen Esuquidistu tantaquido  
nec. Esuquidistu tantaquin aid chuibanec. Nuquin Papan chiaid ambia  
tantaquidquio Pabado nec, quequin tantaquin, Naden nata, quequin Ĕmbi  
chiācpadomboen badedquio compenen naquidquio mibi nec. Adembidi  
ēbi tantaquin naquido nec. Adquid mibi nec, quequin, Natiamiaido  
menenun bedbanquin dayun uaimbi, mibi quiacpadomboen nabanquiota,  
quequin mimbi iste dada uaimbi.

<sup>8</sup> Meneta, quenquio iquebi. Natiamiaido tantaquin menenu, abi quiac-  
padenda Codinto yacnocquidon menebampashe. Isnu, quianec, Codinto  
yacno nidta, quequin Tito chiombi. <sup>9</sup> Nuquin Icho Esuquidistu abuc tabadec  
abitedishun Icho icboedi nuquitsen abuc abēdi tabadmenuec matesash  
nidaidēn tabadnuc aton na nibēdpadenec. Aidēn matses tantaquin nabanac-  
paden utsibo tantaquin nabanta.

<sup>10</sup> Ĕmbi tantiacpaden mibi adembi chuinu. Tantia. Mibi bunacpadom-  
boen, Menenun bedbanshun dayun uanuna, qeshun seta utsin mitsana  
bedbanshun dayun uaquin mimbi tauapondac. <sup>11</sup> ¿Aden nanuna, qeshun  
mimbi chiacted ēnquina bedshun dayun uao? Padenquiocquin adota.  
<sup>12</sup> Mitsana daēdpactsēc icnuc daēdpactsēc musucshun menesho isash, Dadpen  
meneta, quenquio Nuquin Papa iquec.

<sup>13</sup> Aton na nibēdquid icsho, Natiacquin meneta, quenquio iquebi. Aton  
na nibēdquid icsho aton na dadpen icquidēn menec. <sup>14</sup> Mitsana dadpen  
icquid mimbi musucshun meniac aton na nibēdquid bēdambo iquebi, quepec.  
Aden meniac mibēdi aton na nibēdquid bēdambo iquendac. <sup>15</sup> Nuquin Papan  
dada uamiampid nad iquec. Chuinu. Tantia. Petequidēmpi Nuquin Papan

mana caid meniaid chuiquin: “Shubun tabadquid dadpeshun aided-aidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aided bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

### *Tito Codinto yacno nidte*

<sup>16</sup> Nëbi Tito mibi chuinu. Tantia. Èbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. <sup>17</sup> ¿Codinto yacno tsutsi nidpatsiash? quequin ëmbi chiac, Èbibi nidebi, quiosh Tito. <sup>18</sup> Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chieç. Bëdambocquid nec. <sup>19</sup> Nidaid Masedonia caid yacnocquidon, Esuquidistu tantieç iccuededquidon ëmbi dayun uaid Pabadobëdtan buanec nid caidbidi Titobëd nidquid nec. <sup>20</sup> Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. <sup>21</sup> Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

<sup>22</sup> Tsyuec nidebi, quequin utsibobëdta Tido mibi yacno nidmembi. Èmbi nata cac bëdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. <sup>23</sup> Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantieç iccuededquidon nëuëshquio puduanec Codinto yacno nidta caboedi Titobëd nidec. <sup>24</sup> Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Èmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapana.

## 9

<sup>1</sup> Ènden Esuquidistu tantiaquid utsibo tantiaquin nashunta quequin ëmbi chiac, <sup>2</sup> Adonona, qeshun mitsana bedbanquin mimbi tauon-dac. Adsho isun nidaid Masedonia yacnoësh Esuquidistu tantieç iccuededquido mimbi menuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoaposh. <sup>3</sup> Aden aidon chuisho tantiashun nuqui con utsi caido mibi yacno nidmembi mimbi chiondacadpen bedbanambo icnushe qeshun. <sup>4</sup> Nidaid Masedonia caid yacnoësh Esuquidistu tantieç iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bëpiutsiabi. Adquiecbidi mibi icoaic. <sup>5</sup> Adquo icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismet-siac, Abimbo chiombi, quequin. Aido chonoc mimbi chiated bedbanquin dayun uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantieç unëshquio icquin menetsiash. Aden tantiaquin menenda.

*Nuquin Papan na dadpen bedmiidën aton na nibëdquid menequid*

<sup>6</sup> Nuquin Papan chiaid chuinu. Adembi tantiata. Tied icbon daëdpactsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec. <sup>7</sup> Adquiobidi aton na icquid iqueque. Tantia. Chuinu. Nëidted menuequin ambi chiated menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiated meniaash, Bëdambo iquebi, quetiapimbocquin menec. <sup>8</sup> Mitsana menete bunquin mimbi chiated menesho isun Nuquin Papan uesadmenquiocquin mimbi bedmec ma utsi-utsien menebanpanueshun. <sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adëcbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adëcbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec.

<sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icsho menëbanquin mimbi bëdambo icmiaid dadpen iquen-dac. Adembi, Nuquin Papa bëdamboshë iquec, quequin aidon chuibanendac. <sup>13</sup> Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. <sup>14</sup> Adquidquo nec, quequin utsibon mibi chiec. Mimbi tantiamiacpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac.

<sup>15</sup> Aden aidon chuinubi naden nuqui Nuquin Papa chiec. Mimi chomiaid Esuquidistu ëbi bëdambo icmenuec ëbi icsaid bedshunash abided quiaidac unësash uincuempanëdash. Aidpadquid utsi nibëdec, Papa, quequin nuqui chiec.

## 10

### *Ëmbi dada uacpaden mibi yacno choshon adomboembidi nabanembi quiaid*

<sup>1</sup> Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistu-padquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdacbimboecquin comapenen Pabado chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh. <sup>2</sup> Adsho tantiash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bëdamboen chuibanembi. <sup>3</sup> Esuquidistu tantiaquid yanshun ic-saquidën tantiacpaden nabanesa nebi. <sup>4</sup> Mibi yacno choshon matsesën tantiacpadenquocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. <sup>5</sup> Satanasën tantiamiaidon Nuquin Papan chiacpadomboen niaquec. Utsi-bon Edoen Nuquin Papa caid nibëdec, qeshun ëmbibi tantiacpaden naic

bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdabimboe yaid ëmenu quequin Nuquin Papan chiaid ëmbi chuibanubi abi pamumëdabimboe yaid padpidec pausudtiapimboecnoc pauchanshun ambi tantiacpaden Nuquin Papan pausunendac ma ambi chiacpadomboen namenuequin. <sup>6</sup> Aden chuibanshun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

<sup>7</sup> Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi quesho tantias, Muec nec, quetiapimbo iquec. <sup>8</sup> Abi tantiaquid ëbi yansho, Esuquidistun, Èbi chuibeneta, cashumbic abi tantiaquido abi tantidonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa pauschun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. <sup>9</sup> Adquid nebi, quequin, Dacuëdampabocquid Pabado nec camenuen dada uainquo iquemb. <sup>10</sup> Mibi aden dacuëdmenu, quenquo icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabado dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istseccombi. Tantiatiapimboecnoc chuibanondash, quequin aidon ëbi chiec. <sup>11</sup> Aden ëbi chiec onquequidën bëdamboen tantia. Chuinu. Èmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Èbi chuibeneta, caid nebi, quepecta ëbi chieshënquido iquec? ¿Adenda Esuquidistun, Èbi chuibeneta, caidënquo utsi icsamboen chuipec? ¿Esuquidistun, Èbi chuibeneta, caid nebi, quequin abimbo chuiquidquo yec muaquin chuiquidpadquid nebi, quepectabi ique? Padenquo iquebi. Esuquidistun, Èbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. <sup>13</sup> Èbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. <sup>14</sup> Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. <sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquo iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esuquidistu tantidonequidquo yampashun, quec mibi tantiec tsadebi. <sup>16</sup> Esuquidistu ëmbi chuiban-chuibanac aid tantidonequiec mibitedi tabadsho isash Esuquidistu utsin chuibanacmanombo chuibanaoaic nidendabi caombi. <sup>17</sup> Aden Esuquidistu chuibanac, Èbiba bëdambo ictiapimboquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. <sup>18</sup> Bëdamboen nabanombi, abibi quesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquido nec.

### *Pabado muesa icnubi muaquido*

<sup>1</sup> Nēbi ěmbi dada uaid isash, tantiesa onquiacbimboen maměmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Něid bedash ěmbi abia dada uaondauid isec mibi onquiacpadec něbi něid mimbi iste dada uaid isec onqueta. <sup>2</sup> Nuquin Papan tantiamiacpadec mibitedi cudasquidquio něbi. Adec cudasquin aton champi utsin, Bednu, cashunac utsin, Bednu, cac Bedadenda, quequin aměn aton champi chiachimboen, Esuquidistun bednu caid yec icsamenuequiděn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque. <sup>3</sup> ěmbi chuibanac Esuquidistu tantiauidquimbi nisi bědambo isadachimboecquiděn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. <sup>4</sup> Adec ěbi tsadnubi Codinto yacno choshon utsin Esuquidistu ěmbi chuibod utsi uain chuisho badedquio tantiec aidon. Adembidi, Mayan utsi iquec, qesho tantiash, ěbi mene, quec mibi. Adembidi, Mibi bědambo icmequid ěsus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuibod utsi uain chuisho tantiec, qesho tantiash Esuquidistu tantesa uatsiash, quec tsadebi. <sup>5</sup> Esuquidistun ěbi chuibeneta cac Nuquin Papan tantiamiacpaden chuibenec něbi. Aden chuibenenubi mibi, Bědamboenshě utsibon chuibanacpaden Pabadon chuibanenuio iquec, qesho tantiash, Icsamboen chiombi, quetiapimbo iquebi. <sup>6</sup> Utsibon bědamboenshě chiacpadec Pabado onquenquio iquec, mibi quenuc Esuquidistun, ěbi chuibeneta, quequin ambia tantiaquiděn tantiamiacpadomboen mibitedi chuibanombi bědamboen tantiaquin.

<sup>7</sup> ¿Codinto yacnocquido ma Esuquidistun bědambo icmepanueshun chuibanequi, Bec cho, quenquio yectabi icsape? <sup>8</sup> Mibi Esuquidistu chuibanu quiash Esuquidistu tantiec iccudedquid utsibon na ampiachimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. <sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoěsh choquiděmbini meniondash. Aden ěnden, Bec cho, mibi cainquio iccondacpadec něbi adquiecbidi tsadebi. <sup>10</sup> Esuquidistun chuimaidquio něbi. Adquid icquin adquid něbi quequin chiembi mibědi nidaid Acaya caid yacnocquid utsidedi, Padi. Aden chienda, quetiapimboenoc. <sup>11</sup> ¿Atotsi quiaishini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. <sup>12</sup> Aden mibi tantiaquin, Bec cho, cainquiocquin Esuquidistu chuibenec něbi mimbi bědamboenshě chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ěbi chuibeneta caid něbi quec muaic. Adec muaquin mibi yuaic. Aidon abi tabadaid icsa ompoec. <sup>14</sup> Aido tantiamequin ismequid Satanas nec. Nuquin Papan abi yacnoshon uaid mayan běda aidbědi tabadquido icsaisa yacpadquid něbi, quequin abipenquiocnoc chuibin ismequin tantiamiac <sup>15</sup> adquiecbidi ambi namiaidtedi bědamboecquidimbboec capucuedec. Cuidte ushě chonoc aido icsaid Nuquin Papan comapenen cuidquin chiendac.

### *Pabadon abi měyanaid chuibanaid*

<sup>16</sup> Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, <sup>17</sup> Chuita, Nuquin Icbon cainquiocnobi. <sup>18</sup> Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. <sup>19</sup> Bëdamboen tantiaquidquo nebi, qeshun mamëmenuequin ambembi chiacbimboen chuisho tantiec mimbi. <sup>20</sup> Ambembi chiacbimboec, Yuanu, qesho tantias icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquo yec tabadec mibi. Aden mitsana ambembi isash, Mibi chuiquid nebi, qesho tantias, ¿Tsuntsin mibi adquid icmiosh? quenquiocquin aidën chiapaden nabanec mimbi. Aton yuabimboecnuc mibi mëyanaqui, Min yuapenquo nebi, quenquo iquec mibi. <sup>21</sup> Nuquin Papan yua icta cac, Padi, quetsias, quequin aden mibi chuitiadquidëmbi chienquo iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsias, quequin tantiaquin ëbi icaid chuibanu. Tantia. <sup>22</sup> ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Ëbi isadaidbo nebi, caimbi. ¿Abadauanën tsyuecquid nebi, quepecta aid iquec? Adembidi, Ëbi Abadauanën tsyuecquid nebi, caimbi. <sup>23</sup> ¿Esuquidistu chuibanquid nebi, quepecta aid iquec? Ëbibi Esuquidistun ëbi chuibeneta caidquid nebi. Esuquidistu chuibanquid ëbi yapadquid utsi nibëdec. ¿Mibi mamënshumenuequindambi aden chuipadi? Padenquo. ¿Ëbi yapadquid utside iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoa id nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. <sup>24</sup> Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquo cacuestonioshi. <sup>25</sup> Adembidi cüesten cuesoshi. Yuecshun padpiden. Yuecshun padpiden. Adembidi cuënoten sesoshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bididac mentoadan abentsëc ushec cano cuëshë bedash mentoadmane quiash noadpondabi. <sup>26</sup> Adecbidi quenenenquo yec capucuenuequin Esuquidistu chuibenioniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpemo adquidbidi icposh. Matses dadpen yacno adquidbidi icposh. Unës uachitoshe, quenquo yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquo yec capucueniobi. <sup>27</sup> Con na bednuec chonoadec uëshquiobi. Padpiden-padpidemboen ushenquo icquin chuibanombi. Piasec acte bunquin adem-bidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquo yaqui adembidi chuibudombi. <sup>28</sup> Ëmbi chuiboed Esuquidistu tantiabenabicquido icpec, quequin capucuenuequin chuibenioniombi. Utsi yacno nidshun, Ëmbi chuiboedo bëpiscudnushe qeshun mibitedi chuiquin dada uaombi. <sup>29</sup> Esuquidistu tantiaquid chieshec dayactapimbo icpec. Adquibidi iccobi, quequin tantiec tsadebi. Esuquidistu tantiaquid icsaosh, qesho tantias, unësquo yec, Nëbimbobi icsamianquid comapenen cuidta, Papa, quec tsadebi.



<sup>30</sup> Aidedtē ēbi icaid icnuc chieshenquo yec ēbi dayacquo yaid chuibanombi. Nēbi ēbi cuenondaid chuinu. Tantia. <sup>31</sup> Abia Yampidēn, Nuquin Icho Esuquidistun Papan nabanaid ēnenquiocquin chuitequidquo iquēc. Aidēn nabanaid chuibanec muesa Pabado nec, quequin ēbi cuenondaid Nuquin Papan tantiec. <sup>32</sup> Ēbi cuenondaid nad icpondashe. Chuinu. Tantiata. Damasco yacnocquido ancanquidēn Adetas cuēmēdquidēn Pabado Damasco yacnoēsh puduēsho bedtā quequin shubu dadpen daquēnē uaid dapa shēcuētedi sondado ēctabēdmepondash. <sup>33</sup> Adec daquēnē uaid shēcuē cuēmanquo sondado tabadnubi bednushe queshun abuc daquēnē uaid iste shēcuēnshun tsitsan dapa antsadunshun daquēnē uaid cachoc budmepondashi. Budmiac ancanquidēn bedadtiapimbo yec cuempondabi.

## 12

### *Nuquin Papan Pabado ismiaid*

<sup>1</sup> Ēbi icaid chuibanquin ēmbi dada uaid isbanash, Esuquidistun ēbi chuibeneta caidquo Pabado nec, quequin Codinto yacnocquidon tantiatshash, quequin adobamboedtedi chuibanquin dada uaombi. Ēbi icaid chuibanquin ēmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ēbentsēqui ismiondaid chuinu. Tantia. Nad iccondashe. <sup>2</sup> Ēndenquimbo seta 14ted matamequin Nuquin Papan bēdamboshē yacno indopondashi. Intacchobi abuc indopondashi, quetiapimbo iquebi. Tantiengquo iquembi. Adecbidi ēmbi tantiateuidi indoac, quetiapimbo icoaibi. Tsaudi, tantienquo iquembi. Nuquin Papambien tantiec. <sup>3</sup> Abuc bēdamboshē yacno indopondashi, quequin abimbo chiembi. <sup>4</sup> Abucshun utsi chuitemaidquo tantiapondambi. Ēmbi tantiondaid chuitiapimbo icpebi. ¿Mitsipadentsimbi ēmbi abucshun tantiaboed con onqueten chuiatsiaba? <sup>5</sup> Bēdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bēdambocquid nebi, quetiapimbo iquebi. <sup>6</sup> Abuc nidshun ēmbi isondaaid chuibanquin dada uaid isash, Bēdambocquid Pabado nec, quequin tantianushe queshun padenquo iquembi. Ēbi bēdamboec tabadsho isash, Pabado bēdamboec tabadec, quesho tantiashe bēdambo ictsiabi. Adecbidi chuibanquo tantiashe, Abimbo chuiquidquo Pabado nec, quesho tantiashe adecbidi bēdambo ictsiabi.

### *Satanasēn natiamiaid*

<sup>7</sup> Bēdambocquid yansho Nuquin Papan abuc indoshon ismiondashi, quequin Pabado chuinushe queshun Satanasēn chomiaidēn ēbi natiameded-natiamededsho isash, Chēn, quenquo Nuquin Papa iquēc. Satanasēn chomiaidēn natiamiac pinchuquēn siadaid namīn nidaēdaid chictiapimbo yacimboc con dada bēdanengquo iquēc. <sup>8</sup> Adec con dada bēdantiapimbo icnubi, Ēbi natiamequid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. <sup>9</sup> Adoaquien, Padi. Bēdambocquid icmenuequin naid nec. Mibi dayacquo icmequid con Mayan mibēdi iquēc, quequin Nuquin Icbon chiondashi. Adoaqui, Bēdanambo icsho Nuquin Icbon ēbi dayacquo icmec quequin tantiec bēdambo iquebi, quec tsadebi. <sup>10</sup> Aden tantiec con dada icsambo icnubi Esuquidistu chuibenec capuebi. Ēbi icsamboen chuiquin mamēnshunaqui adecbidi Esuquidistu chuibenec capuebi. Utsin natiamiaqui adquecbidi Esuquidistu chuibenec capuebi. Utsin mēyanaqui adquecbidi Esuquidistu chuibenec

capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimboquin chuibenec capuebi.

### *Esuquidistu tantiabemenuen chuibanombi quiaid*

<sup>11</sup> Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiateguidquio iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibenquid nec, quenquio utsibo iccosh, qesho tantiashun ëbi icaid chuibanquin dada uaombi. Bëdamboen tantiacimboen chuibanquid dadpen iquec. Aidon icsactëcquio isadtsec, quequin ëbi chiec onquenubi Esuquidistu chuibenquidquio nebi. <sup>12</sup> Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nada-tiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquio Pabado nec, quequin chuitiadquidëmbi padenquio mimbi icpondac. <sup>13</sup> ¿Esuquidistu tantiec iccuededquido utsi tanti-aquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquio iccondabi. ¿Bec cho, qeshoda ëbi bëdamboen mimbi tantiatsemponda? <sup>14</sup> Ënden mibëdi tabadondabi. Yue-cash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtañ ambia tanti-aquid icquin tied uaic adembidi shubu uaic bacuëmpibon nabantiapimbo icnubi. <sup>15</sup> Adquibodi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquio yampe? <sup>16</sup> Bec, cho, quenquio yec mibëdi tabadondabi. Adsho isash, ¿Piacquid bedenquio icpecta Pabado tabadash? Muaquin chuiquin bedpash icnuí, quec mibi. <sup>17</sup> ¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bed-pash? Padenquio. <sup>18</sup> Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbëdi abentsëc yacimboen tantiaquidquio nebi. Aduidequi tabadquid ëbi daëdi nebi. <sup>19</sup> ¿Pabado ampesa nec mibi camenuendambi dada uaquin chuibampo? Padenquio. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. <sup>20</sup> Mibi yacno choash ëbëdi abentsëc yacimboen tantienquio icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquio chuisho tantiamane qeshun adembidi dada uaimbi. Bëdambo icquid ëbi icnubi utsi padenquio iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. <sup>21</sup> Ai, mibi yacno choashun adquid icsho isun, Ëmbi Esuquidistu chuibanaiido nec, quequin Nuquin Papa chuitiapimbo yec natiac bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quiañ unësquio icmane qeshun dada uaimbi. Aidon naid utsin istemaidquio nec. Ambibi ambi chudtemaid chudted-chudtedec icsambo yequi, Bëdambocquid nebi, quec muacuededec.

## 13

*Icsaid ënesa chuiquin cuidendambi quiaid*

<sup>1</sup> Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. <sup>2</sup> Tauamboec puduedshun Esuquidistu chuibanec abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. <sup>3</sup> Esuquidistun tantiamiacpden Pabadon dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiapiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. <sup>4</sup> Aidi matsesash nadatiapenquo icquidbimboecsho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquo icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

<sup>5</sup> Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiacono, quequin Nuquin Papan chiaid isbanta. Aden isbanshun, Ambi chiacpaden niacniaccombi, qeshun Esuquidistu ëbëd ictiapimbo iquec, quequin tantia. Aid mibëd icnuc ambi chiaid niac-niaquenquo mimi iquendac. <sup>6</sup> Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimi. <sup>7</sup> Aden tantiaquin Codinto yacnocquido bëdamboen tabadmeta, Papa, quequin chuidedchuidedembi. ¿Mibi bëdamboec tabadsho isash, Pabadon chuibanaiido nec, quequin mibi isquidon chuitsiash, quequindambi Nuquin Papa chuidedchuidedpadi? Padenquo. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin utsibon chuisho tantiatiadquo iquebi. <sup>8</sup> Nuquin Papan chiaid abimbo iquec, quequin ambi chiaidquo chuibanquidquibidi nebi. Ambi chiaid utsi uain chiesha nebi. <sup>9</sup> Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuidedchuidedec nebi. <sup>10</sup> Aden mibi tantiec tsadquin mimi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. <sup>11</sup> Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Èmbi dada uain chiaid isquin adobanta. Abentsëc yacimboben tantiaquin nabanec tabadeneta. Adec tabadsho isash tantianquidquo utsibëd bëdamboec tabadquidquo Nuquin Papa mibëdi iquendac. Aidënquo mibi adquidquibidi icmendac. <sup>12</sup> Èbi isec cho cananta. <sup>13</sup> Mibi tantiec tabadebi, quec nëmbo tabadquido Nuquin Papan bëdambo icmebanaido. <sup>14</sup> Nuquin Icho Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota.

Padi. Aidtedi dada uaimbi.

## CADASIA YACNOCQUIDON ISTE

### *Pabadon tauamboen chiaid*

<sup>1</sup> Pabado nebi. Esus chuibenecquidquio nebi. Matsesën: —Adquid icta —¿caidtabi nedi? Padenquio. Esuquidistun: —Ëbi chuibeneta —caidquio nebi. Aid uincuenëdaid Nuquin Papantsen: —Con mado Esus chuibeneta —caidquio nebi. <sup>2</sup> Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquio iquec. Adembidi tantiec nëmbo icquido Esus tantiaquidtedi: —Unësquio iquec —quiosh. <sup>3</sup> Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. <sup>4</sup> Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquio icnuec abided cuidadec Esus unëspac caondash. <sup>5</sup> Aidën Papa tantiaquin: —Nuquin Papa bëdamboshë iquec —canuna ënenquio icquin.

### *Esusuidi tantienquio yanaid*

<sup>6</sup> —Esus tantienquio yanosh —quequin mimbi naid chuisho tantias shubitiadquio iccobi. ¿Ëbi chonobida badedquio Esus tantienquio yano? Nuquin Papan tantiamiac abided cuidadec unësaïd Esus tantiec mibi tabadondac. Aden Nuquin Papa aton Mado Esusbëdta tantiaboedëmbi çnëbida Nuquin Papa tantienquio yano? Utsibon icsamboen chiaquien mimbi Esus tantienquio yanac. <sup>7</sup> ¿Aidon chiaïda bëdambo icpec? Aidon chiaïd ma Nuquin Papan chiaïdpenquio neyoc. Esusquio chienquio icquin muaquin chuisho tantiasshun: —Abimboen cachitec —queshun mimbi Esus tantienquio yampac. <sup>8</sup> —Aton Mado Esusuidtsëqui tantiassho Nuquin Papan nuqui bëdamboen isec —quequin abimbo chiondambi. —Nuquin Papan chiaïd abimbo chienquio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasshun aïdtsen: —Nuquin Papan cuidpashun —catsiambi. Utsibontsen muaquin chuisho tantiasshun aïdtsen: —Cuidpashun —quiobi. <sup>9</sup> Tantia. Adembidi mibi chuïnu. Ëmbi chuïbanac mimbi Esus tantiabendonac. Mibi tantiondaïd Esusquio chienquio icsho: —Nuquin Papan cuidpashun —caimbi mibi muauaquin chuïquido. <sup>10</sup> —¿Matsesën: “Mibi bëdambo iquec,” mabi canu —quequindambi aden chuïbampadi? Padenquio. Nuquin Papan chiacpadomboen mambi natiadquio yoc. —Bëdambo iquec —Nuquin Papa camenuen mambi chuïbampaboc. Matsesën chiacpadomboenuïdi natiapimbo iquebi. Adenuïdi naic Esuquidistun yuambo ictiapimbo ictsiabi.

### *Esusën chiaïdquio chiec nebi, quiaïd*

<sup>11</sup> Tantia, con utsibo. Mibitedi chuïnu. —Esus tantiassho Nuquin Papan matses bëdamboen isbentsiassh —quequin ëmbi chuïboed amben chiaïdpenquio nec. <sup>12</sup> Matsesën chiabi Esuquidistun tantiamiac ambi chiaïdquio chuïbanombi.

<sup>13</sup> Tantia. Aden Esusën ëbi tantiamiondaïd mibi chuïnu. Con matses isadaïdbon chiacpadomboenuïdi natiadquio icquin Nuquin Papa tantiesabo danquin Esus tantiaquido comapenen chieshënquin cuesun secatiadquio

icpadenebi. Ĕmbi adodened Ĕmbi chuisho mimbi tantiondac. <sup>14</sup> Nuquin Papa tantiatiaquido icquin con matsesĕn chiaid abitedimbo natiadquido ictenebi. Ĕbĕdta tishaidon caniabon bĕdiactsĕc natiadquido icnubi con tsusedpabon chiaiduidi natiadquido ictenebi. Adquid icquin Esus tantiaquido comapenen chieshĕndenembi. <sup>15</sup> Adshobini Nuquin Papan aton Mado Esus tantiamiondash. Ĕbi tishabi icnubi Ĕbi caic: —Con Mado Esus tantiameshun bĕdamboen isquin <sup>16</sup> Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusĕn chiaid Ĕbi chui —quequin matses chiamo iccondambi. <sup>17</sup> Shubu dadpen icquid Edusaden caid yacnocquido Esusbĕd icnĕdaido ambia Esus chuibanĕdaido chuitanambo iccondambi. Utsibo chienquio yec nidaid utsi Adabia caid yacno matses nibĕdacno badedquido nidtanondabi. Adashic yuec-yuecpambo ictanec auĕshquio choec shubu dadpen icquid Damasco caid yacnobidi choaondabi.

<sup>18</sup> Adashic ambo nidash seta abentsĕc chotsecnuc matametanece Edu-saden yacno Petedo isec nidtanondabi. Adec nidash 15tedec ushec aibĕd tabadondabi. <sup>19</sup> Ambobi Nuquin Icbo Esusĕn utsi Acobo caid isondambi. Esusbĕd icnĕdaid utsi isambo iccondambi. Aid daĕdtsĕqui isondambi. Utsibo padambo. <sup>20</sup> Abimbo chuiquin nĕid dada uaic nebi. Ĕmbi aden chuibansho tantiash: —Ai, abimbo caic —quec Nuquin Papa.

<sup>21</sup> Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auĕshquio nidshun nidaid utsi Sidisia caid yacno istanondambi. <sup>22</sup> Nidaid utsi Udeya caid yacno Esusbĕd icnĕdaido yacno yuec tabadambo iccondambi. Adsho anocquidon Esus tantiaquidon isabi iccondashi. <sup>23</sup> Ĕmbi naid chuishouidi tantiapac caondash. —Nuquipadquid Esus tantiaquido cuesun secatiadquido icnĕdaidĔmbi Esus tantiabenshun Esusquio chuibeniosh —quequin Ĕmbi naid chuishouidi tantiapac caondash. <sup>24</sup> Aden Ĕmbi naid chuisho tantiash: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

## 2

### *Edusaden yacno nidoaid*

<sup>1</sup> Yuecash seta 14ted matamiash Edusaden yacnobidi nidoapondabi. Ĕbĕdi Bednabe caid nidpondash. Titotsen buanondambi. <sup>2</sup> Adec Nuquin Papan tantiamiacpadece ambo nidshun Esus tantiaquido chuiquid dapabo caidouditsĕqui cho-chomeshun Ĕmbi naboed chuibanondambi. —Ĕmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquio isadaidpembo matses utsibo Esusquio chuibeniombi. “Esusuidi tantiasho Nuquin Papan nuqui bĕdamboen istsiash,” quequin chuibeniombi. ĀAdembidida mimbi tantiape? —capondambi Esus tantiaquido chuiquid dapabo chuiquin. Ĕmbi adoac: —Ai, adembidi tantiembi —quepondash aid. <sup>3</sup> Ĕbĕd icquid Tito caid isadaidpembo icshobi: —Shui dĕbid dĕteshune —cainquio iccondash chuiquid dapabon abi utsibon: —Adotiad —canubi. <sup>4</sup> Adec: —Shui dĕbidien dĕteshunetiad —quequido Esus tantiaquid damianquiece Esus tantiaquidombo tabadacno puduedpondash. —Esus tantiaquidon: “Esusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash Ĕbi yacno puduedpondash. Adec puduedshun tantiashic: —Mimbi icsamboen chiece. Nuquin tsusedpa Moisesĕn chiampidtedi nasho Nuquin Papan bĕdamboen istsiash —quepondash. <sup>5</sup> Adec aid: —Nuquin tsusedpan

chiampicpadomboenuidien nametiad —quesho: —Padi. Mimbi icsamboen chiec —quequin aidèn chiapadomboen nainquio iccondambi. —Ma matses utsibon: “Esusènuidsèqui Nuquin Papa èbi bédamboen ismec,” quequin ma Esusquio tantianu —queshun nainquio iccondambi.

<sup>6</sup> Aden Esus tantiaquido chuiquid dapa caidon Esus tantiaquidèn natequid utsi chienquio iccondashi. —Esus tantiabenacsho isun nuquin tsusedpan chiapadomboentsen nameta —quequin chienquio iccondashi. ¿Esusbéd icnèdaidèn: —Moisesèn chiaidtsen nameta —cactambi nametsemponda? Padenquio ictsenondambi. ¿Atotsi Nuquin Papan aido capec? —Esusbéd iccondaidquio neque. Bédamboen isnu —¿capenda iquec? Padenquio.

<sup>7</sup> Naden Petedo chedon chiondashi. —Nuquin Papan chiapadomboen mimbi matses utsibo isadaidpembo Esusèn naid chuibeniác. Nuquin Papan chiapadomboebidi Petedon nuquin matses isadaidbo Esusèn naid chuibeniash. Petedon nacpadomboen mimbi bédamboen nac —capondashi.

<sup>8</sup> —Nuquin Papan namiaid icquin Petedon nuquin matses isadaidbo dadpen Esus tantiamíosh. Adembidi Nuquin Papan namiaid icquin mimbitsen matses utsibo dadpen Esus tantiamiac <sup>9</sup> —queshun bédamboen ispondashi. —Adembidi nanuna. Mimbi isadaidpembo Esusèn naid chuibenubidi adembidi isadaidbombo chuibenendambi —guepondash. Adshumbic: —Esus tantiaquidquio mibi nec —queshun chuiquid dapabon Bednabebèdta mèdimbampondashi. Nèidic Petedo. Nèidic Acobo. Nèidic Uan. Aidtedishun chuiquid dapabo icquin adondashi. <sup>10</sup> Nadentsen chuipondashi. —Aton na nibèdquido bédamboen isnuna —capondashi. Adsho tantiash: —Ai, adonona —quepondabi. Adanec nidpondabi.

### *Antioquiya yacnoshon Petedo chushcaid*

<sup>11</sup> Adash yuectaniash èbi iccondacno shubu dadpen icquid Antioquiya caid yacno Petedo chopondash. Auèshquio icsashobimbi béisquiquin chushcapondac. <sup>12</sup> Abèdtan Esus tantiaquido matses utsibon codocaid pec bédamboec tabadboedi aton pete isuidanec aido béd cuèshèdec Petedo ic-sapondash. Ambo choash Esus tantiaquido con matsesèmpenquio codocaid pec bédamboec tabadondash. Adnubièn Acobon: —Ambo istan —cac con matses Moisesèn chiampid tantiaquido cho-chopondash. Aido cho-chosho isash: —Moisesèn chiampid niacquin matses utsin codocaid pesho chushcanushe —quec dacuèdquin isadaidpembon pete meniaid isuidampondash Petedon. Adec abèdtan Esus tantiaquido matses utsibobèd cuèshèdec ic-sapondash. <sup>13</sup> Adsho isash anocquido isadaidbotsen abèdtan Esus tantiaquido matses utsibobèd tabadenquio yec cuèshèdpondash. Adsho isash èbèd icquid Bednabetsen adecbidi cuèshèdec ic-sapondash. <sup>14</sup> Adec icsaquin Esusèn chiapadomboen nainquio ischobimbi Petedo chushcapondac Esus tantiaquidtedishun tantianuc. —¿Ada mimbi bédamboen naoque? Tantia. Chuiinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibèdi mibi bédamboec tabadoc. Aidon piaid pec bédamboec tabadboedi nèbi aibèd mibi cuèshèdoc. Adsho isash mimbi nianaido: “Petedon matses isadaidbo tabadac bimboec tabadshouidien Nuquin Papan nuqui bédamboen ischitotsiash,” quepec icsamboen chiec. Aden mimbi icsamboen tantiamaque. Tantia. ¿Atotsiequin mimbi naoque? —capondambi Petedo chushcain.

### *Nuquin Papan bédamboen iste chiaid*

<sup>15</sup> Naden con matses Petedo chiondambi. —“Moisesèn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dèbid dèteshun secanèdaido nec. <sup>16</sup> Adquid icquin: “Moisesèn chiaiduidi naquin

Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaguiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

17 Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiapadomboen nainquo yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquo. 18 “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid ichoedi: “Padpiden con tsusedpabon chiaiduidi naquin Nuquin Papa bēdamboen ismembi,” qeshun abi bēdamboen ismequidquo Esus tantienquo yequini icsambo icchitotsiac. 19 Con tsusedpa Moisesēn chiactedi natiadquo ictenebi. Adquid bēdamboen iste danquin abitedi natiadquo icquimbi abitedi nainquo iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ēnondambi. Nēbini Esus tantiec Nuquin Papan chiapadec tabadec. 20 “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquo yanondabi. Nēbi ěmbi tantiaidquo nainquo yec Esuquidistubēdi cuēshēdenquo yec bēdamboec tabadebi. “Ēbi tantiec ēbi cuidmenquo icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. 21 “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen itsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquo icnuec ěbided cuidadec unēsnu,” queboedi Esus padenquo ictsempañēdash —capondambi Petedo chuiquin.

### 3

#### *Nuquin Papan aton Mayan tabadmiaid*

1 Tantia. —Cadasia yacnocquido piushbimboecquin tantienquo yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquo yano? —“Cuesten dectanac abided cuidadaid Esusēnuidsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquo iquec —quequin mibi chuibanondambi. ¿Esus tantiatiapimboda ique? 2 Mimbi tantiaid ēbi chui. Tiantianu. ¿Atotsi quish Nuquin Papan Mayan mibēdi tabadanondash? ¿Nuquin Papan ambi chiaid Moises dadā uamepampid mimbi nabanuda mibēd tabadanondash? Padenquo. Ēmbi chiondaid Esusquo mimbi tantiabensho isashien mibēd tabadanondash. 3 ¿Pabiate shēcuē choquidida mibi nendac? Tantia. ¿Atotsieshan tantienquo ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquo yanecta mibi bēdamboec tabadpatsia? Mibembi bēdamboec tabadtiapimboen mibi iquec. 4 ¿Aden Nuquin Papan aton Mayan mibēdi tabadmiaid icquimbida Esus tantienquo

yano? <sup>5</sup> Nuquin Papan aton Mayan mibēdi tabadmequin comapenen tanti-  
aquin nacnenquin mibi ismiondash. ¿Atotsieshun Nuquin Papan aton Mayan  
mibēdi tabadmec? ¿Con tsusedpa Moisesēn chiampid nashoda Nuquin  
Papan aton Mayan mibēdi tabadmec? Padenquo. Ēmbi chiondaidquo  
Esusquo tantiasho Nuquin Papan aton Mayan mibēdi tabadmec.

### *Nuquin Papa tantiaquidquo Abadauan chiaid*

<sup>6</sup> ¿Tsutsi Nuquin Papa tantiaquidquo icpampic? Abadauan nepampic.  
Nuquin Papan chiac Abadauan: —Abimbo mimi caic —quesho: —  
Adquid bēdamboen isembi —queshun Nuquin Papan bēdamboen isbem-  
pampic. <sup>7</sup> Adec Abadauan: —Nuquin Papan abimbo caic —quequin tanta-  
pampicpadomboen nēbi matsesēn Esus tantiasho Nuquin Papan bēdamboen  
isendac ambi Abadauan ispampicpadomboen. <sup>8</sup> —Esus tantiaquido iquen-  
dac —quequin naden Nuquin Papan Abadauan chuiampic ēndenquimbo.  
“Abadauan, mibi unēsān yuecquimbo ictaneshun min tsyuecquid abentsēc  
tantiaquidtedi bēdambo icmendambi. Nidaid utsi-utsiec yacno tabadquidon  
min tsyuecquid abentsēc tantiasho bēdambo icmendambi,” quequin Nuquin  
Papan chiaid con tsusedpan dada uapampic. <sup>9</sup> Abi tantiaquidquo icsho  
ambi Abadauan bēdamboen isampicpadomboen nēbi aton Mado Esus tanti-  
asho Nuquin Papan nuquitsen bēdamboen isec.

<sup>10</sup> Utsiboen Nuquin Papan cuidtequido nendac. —Moisesēn chiampic-  
padomboenuidi nasho Nuquin Papan bēdamboen istsiashi —quequidēmbi  
abitedimbo nainquico icsho Nuquin Papan cuidendac. Aden ēnden Nuquin  
Papan chiaid dada uapampic. “Ambi chiactedi nainquico icsho Nuquin  
Papan cuidendac,” quepampic. <sup>11</sup> —Ambembi Moisesēn chiampicpadom-  
boenuidi nasho matses bēdamboen isendambi —¿quecta icpanēdash Nuquin  
Papa? Padenquo. Ambi chiaid niacquidquidquo icsho bēdamboen isti-  
tiapimbo icquin Nuquin Papan naden chuiquin dada uamepampic. “  
‘Nuquin Papa ambi chiacpadomboen naquidquico nec,’ quequin abi tantiec  
tabadquidien Nuquin Papan bēdamboen isec,” quequin dada uamepampic.  
<sup>12</sup> ¿Ēmbembi Moisesēn chiactedimbo nanuequidta Nuquin Papambo tantiec  
tabadpec? Padenquo. “Moisesēn chiactedi naquid Nuquin Papabēd  
tabadendac,” quequin chiampicpaden ambembi matsesēn natiapimbo  
iquec. Natiapimbo icsho Nuquin Papan bēdamboen istiapimbo iquec.

<sup>13</sup> Aden Nuquin Papan matses abitedimbo bēdamboen istiapimbo ic-  
nuc Esuquidistu: —Ēbided cuidshun ēbi tantiaquido ma con Pan cuiden-  
quico icnū —quiash abided cuidadec unēsapac caondash cuesten dectanac.  
Aidquico chuiquin Nuquin Papan con tsusedpa dada uamepampic. “Cuesten  
dectanaid Nuquin Papan cuidaidquico nec,” quequin Nuquin Papan chiaid  
dada uapampic. <sup>14</sup> Adec matses utsi-utsien abi tantiaquido cuidmenquico  
icnuec abided cuidadec Esus unēsapac caondash. Ēndenquimbo con tsusedpa  
Abadauan chiec: —Yuecshun bēdambo icmendambi —quequin Nuquin  
Papan chuiampicpadomboen abi tantiaquido bēdambo icmequin aidobēdi  
aton Mayan tabadmenuec Esus unēsapac caondash.

### *Abadauamba chuishun Moisesēn Nuquin Papan chiaid*

<sup>15</sup> Tanta, con utsibo. Mibitedi chuino. Min matsesēn nadoquid. —  
Naden naindambi —quequin dada uashun: —“Abimbo chiaidquico nec,”  
ma isquidon canu —queshun abi cuēmēduidtsen dada uaquid. Aid dada  
uaid dada uaquidbēdtambi utsintsen utsi uatiapimbo icquid: —Chuiquidēn  
cuidnushe —queshun. Adembidi ambi chiaid utsi uatiapimbo icquid ic-  
quin <sup>16</sup> Nuquin Papan: —Nadomboen naindambi —quequin Abadauan  
chuiampic. —Mibi nibēdanān yuecquimbo ictaneshun min tsyuecquid



abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. <sup>17</sup> ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquio ictāneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. <sup>18</sup> ¿—Ēmbi chiaid ěmbi Moises dada uamiacpadomboen nashouidi mibi bēdamboen isembi —qeshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

<sup>19</sup> ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —qeshun Moises dada uamepampic. Nuquin Papan Abadauan chiampid Ēsuquidistu choabi icnuc adopampic. Nuquin Papan abi yacnoshon uaido mayan bēdabon Moises chuuiampampic. Adoac Moisesēn aton matses Nuquin Papan chiaid chuibampampic. <sup>20</sup> Nuquin Papanquo Abadauan chuipampic. Abadauan caic: —Chuītan —cainquo icquin Nuquin Papanquo Abadauan chuipampic.

### *Matses abi icsaid tantiamete chiaid*

<sup>21</sup> Aden Nuquin Papan Abadauamba chuishumbic Moisesēn chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niaquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. <sup>22</sup> —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacbimboec abembi bēdambo ictiapimboen icchitec,” quequin ma matsesēn tantianu —qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Ēsuquidistu tantiaquidouditšēqui Nuquin Papan bēdamboen isec.

<sup>23</sup> Esus choabi icnuc nadquo matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacbimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. <sup>24</sup> Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papan bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Ēsusten tantiamiac: —Esus tantiašho Nuquin Papan nuqui bēdamboen isec icsaisabimboecnuc —nuqui quendac. <sup>25</sup> Aden tantiec: —Isadaidbo tsusedpan chiacdedi nashouidi Nuquin Papan matses

bëdamboen istsiash —quenguio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

### *Nuquin Papan con mado con champi caido*

<sup>26</sup> Aden Esus tantiasho Nuquin Papan: —Con mado mibi nec. Con champi mibi nec —nuqui capec. <sup>27</sup> Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. <sup>28</sup> Aden Esus tantiasho Nuquin Papan nuqui bëdamboen isec. Isadaidbo yec isadaidpembo yec matses yuaido yec matses yuapenguio yec dada yec chido yec quequin Esus tantiasho nuqui bëdamboen isec. —Matses utsibo bëdamboen istiapimbo iquebi —quenguio icquin matses utsibombi aton Mado Esus tantiasho Nuquin Papan bëdamboen isec. <sup>29</sup> Adembi abi tantiasho ambi Abadauan bëdamboen isampicpadomboen Esus tantiasho Nuquin Papan nuqui bëdamboen isquin bëdambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

## 4

### *Yuabimboecquid isadaidbo yaid*

<sup>1</sup> Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. <sup>2</sup> Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenguio yanendac. <sup>3</sup> Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquio icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash. <sup>4</sup> Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanëdash. <sup>5</sup> Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abidedi cuidadec Esus unësa caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

<sup>6</sup> Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cachimboen Nuquin Papa nuqui chianec. <sup>7</sup> Esus tantiabi Moisesën dada uapampiduidi namenuquido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bëdambo icmec ambi Abadauan chiampicpadomboembi.

### *¿Utsin yuameteda bumpe? quiaid*

<sup>8</sup> Tantia. Nëbi matses utsibo mibi chuioanu. Ënden Nuquin Papambo tantiesa icquin matses uaquidpenguio mibi utsi mimbi tantianpanëdac. Papa quequin mimbi tantianëdaidën yuabo yec mëtaniacimbocquido mibi icpanëdac. <sup>9</sup> Nëbi Nuquin Papa mimbi tantiabonondac. ¿Mimbembida adonda? Padenquio. Aidëmbi mibi tantiamepanëdash. Aidën tantiamiaidombo icquin ¿atotsiequin aid tantienquio yanoai? ¿Moisesën dada uapampiduidi namenuquido tanshoda Nuquin Papan mibi bëdamboen ispec? Padenquio. Adquid

mētaniacimboecquid nec. ¿Mētaniacimboecquid icoatiadquioda ique? <sup>10</sup> Aden Nuquin Papa tantienuo icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidsēqui nanuna. Nuquin Papan cuidnushe —quequin mimbi icsamboen chiec. Mimbi chi-acpadomboen naquid Nuquin Papan bēdamboen iste danquin mimbi icsamboen chiec. <sup>11</sup> Mibi caic: —Adosh —quesho tantiash shubitiadquio iquebi. —¿Ēmbi chiondaidonda Esus tantienuo yampash? —quequin tantiac mibi unēsquio iquec.

<sup>12</sup> Con utsibobimboecquido mibi neque. Tantia. Mibitedi chuinu. Isadaid-pembo yec mibi: —Moisesēn chiampiduidi nanu —quenquio yacimboec yanondabi. —Ēmbembi Moisesēn chiampid naquin Nuquin Papa bēdamboen ismembi —quedenedi ēnēdondabi. Nēbi Esusuidi tantiaquid nebi. Adembidi Esusuidi tantiata.

Ēbi adsho tantiash chieshenda. Tauamboen ěmbi Esus chuisho mimbi ěbi chieshēnenquio iccondac. <sup>13</sup> Mibi yacno tauamboec choshon daic-sabudtsēcschumbi mibi Esusēn naid chuibanondambi. <sup>14</sup> Istiapicpambo yec daicsabudacshobi mimbi ěbi cacumenquio iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac. <sup>15</sup> —Min ēshē chicshun ěbi mene —ěmbi cac mimbi ěbi menetsenondac. Aden ěbi mimbi tantiaquiondac. Adondaiddi ¿atotsi quiash chieshcueno? <sup>16</sup> ¿Nēid abimbo chuiquin-dambi mibi chieshēmpē? Padenquio iquembi. ¿Aden chuisho mimbidabi chieshēmpē?

<sup>17</sup> Ista. Esus chienquio icquidon ambi chiacpadomboen mibi name-tiadquio iquec. ¿Mibi tantiaquioquin bēdamboen namenuenda mibi chuipec? Padenquio. Ēbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. <sup>18</sup> Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ěmbi chiaidquio tantiabenondac. Ēbēd icquimbi Esus bēdamboen tantiaboedombi ěbi nidtsēcnubi mimbi badedi utsi tantiac. <sup>19</sup> Aden mimbi naid tantiac mibi unēsquio iquec. Anin bacuē tantiacimboen mibi tantiaquimbi. —Esusimboec icpashun. Aid tantiec ambi chiacpadec bēdamboec tabadpashun —quequin mibi tantiembi. <sup>20</sup> Mibēd icquin bēisquioquin mibi chuītsiambi. Mibēd iquenquio icquimbi mibi bēisquioquin chiachimboen dada uaquin mibi naden chiembi. —¿Atotsieshun Esus tantienuo yanoao? —caimbi.

### *Abadauanēn mado daēd chiaid*

<sup>21</sup> ¿—Moisesēn chiacpadomboenuidi naquin Nuquin Papa bēdamboen ismembi —quequido icquinda mimbi Moisesēn chiampid bēdamboen tantieque? Tantia. Mibi chuinu. <sup>22</sup> Naden chuiquin Moisesēn dada uapampic. Abadauanēn madombo daēd icpampic. Aton chidon yuaid chido bedshun tishmiaid abentsēc icnuc aton shanunquio aton chidon tishaid abentsēcbidi icpampic. <sup>23</sup> Abadauanēn chudac badedquio bacuē usundoshon chido yuaidēn aton mado tishpampic. Abadauanēn chidombo naido icsho: —Mimbi bacuē tishendac —quequin ambi chiacpadomboen Nuquin Papan naidopenquio icmiac aton mado tishpampic. <sup>24-25</sup> Aidi Sada nepampic. Chido yuaid Acad nepampic. Aidēn tishaid yec aton mado yuabidi nepampic. Icbon chiacpadomboenuidi napampic. Yuaidēn madobimboecquido Moisesēn dada uapampiduidi namenuequido nec. Adquibidi Edusaden yacnocquido iquec. Esus tantienuo yec Moisesēn

chiaiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. <sup>26</sup> Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquio iguendac. <sup>27</sup> Nuquin Papan ambi chiaid dada uamepampicpadeç Esus tantiaquido dadpenquio iguendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”  
quequin ambi chiaid Nuquin Papan dada uamepampic.

<sup>28</sup> Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. <sup>29</sup> Ènden Nuquin Papan naidopenquio icmiampidën mado chieshënuquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshëndac. <sup>30</sup> Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquio caidmequin bëdamboen tabadmembì. Yuaidën madoembi padenquio iguendac,” quequin Nuquin Papan Abadauan chiaid dada uapampic Moisesën. <sup>31</sup> Sada caidën mado Isac caidpadquid yuapenquio nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquio tantiaquid yec: —Èmbembi Moisesën chiactedi naquin Nuquin Papa bëdamboen ismembì —quenquio icnuna.

## 5

### *Esus tantiasho Nuquin Papan bëdamboen iste chiaid*

<sup>1</sup> Aden: —Esusënuidtsëqui Nuquin Papa ëbi bëdamboen ismec —matses camenuec abided cuidadec Esus unëspac caondashe. Aidquio tantia. Muaquidën: —Moisesën chiampicpaden nasho Nuquin Papan nuqui bëdamboen istiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

<sup>2</sup> Mimbi isondaid Pabado nebique. Tantia. Mibitedi chuinu. Moisesën chiactedi naquid Nuquin Papan bëdamboen iste danquin Esus tantienquio yanec muaquidën chiacpadeç shui dëbid dëteshuniadacsho isun Esusën Nuquin Papa mibi bëdamboen ismetiapimbo ictsiashe. Adenda. <sup>3</sup> Aden Moisesën chiaid abentsëc natsëcshun aidën chiaid utsitedi nainquio icsho Nuquin Papan mibi bëdamboen istiapimbo ictsiashe. Moisesën dada uapampiduidi namenuequido tanenda. <sup>4</sup> Aido Esus tantiesabo nec. Aden abi bëdamboec ismianquid

Esus tantienquo icsho Nuquin Papan aido bēdamboen istiapimbo iquec.  
<sup>5</sup> Esus tantiaquidoen Nuquin Papan Mayanēn tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac — quequin nuqui tantiec. <sup>6</sup> Shui dēbid dēteshunaidēn Esus tantiasho Nuquin Papan bēdamboen isec. Adembidi shui dēbid dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: —Ambi chiacpadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec — caindac.

<sup>7</sup> —Bednu —quequin nadancacimboben aiduidtsēqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe? <sup>8</sup> ¿Nuquin Papan nacta Esus tantienquo yano? Padenquo. Ma aidēmbi mibi Esus tantiametiadquio yoc. <sup>9</sup> Muaquido tantienda. Nadquio aid iquec. Tosho bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpeshun abimbo tantienquo yantsiashe. Muaid tantienda. <sup>10</sup> —Nuquin Icho Esusēn tantiamiac ēmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuquid Nuquin Papan cuidendac.

<sup>11</sup> —“Con tsusedpan chiacpaden shui dēbid dēteshunaiduidtsēqui Nuquin Papan bēdamboen istsiash,” queposh Pabado —quequin ¿tsundanquieni mauapac caosh? ¿Adendambi chuidio? Aden ēmbi chuisho adembidi chuiquidon chieshēnenquo ictsenoshi. Esus chienquo icsho ēbi chieshēnenquo ictsenosh. Abi tantiaquid cuidmenquo icnuec abided ciudadec unēsaid Esusuidi chuisho mabi chieshēmpaboc. <sup>12</sup> Mibi muaquin chuquido Moisesēn dada uapampiduidi namenuquido caic: —Auēshquo cuemepashun —caimbi.

### *Esus tantiaquido bēdamboec tabadte chiaid*

<sup>13</sup> —Ēbi cuidmenquo icnuec abided ciudadec unēsaid Esusquo tantiasho Nuquin Papan ēbi bēdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta. <sup>14</sup> Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboben utsibotsen bēdamboen tantiaquiota,” quequin Nuquin Papan ambi chiaid Moises dada uamepampic. <sup>15</sup> —Opa penantiadpambo yacimboc nēishnanash chushcananosh —quiosh mibi caic. Aden naic mibi icsacuededeque. Esus tantienquo mimbi yaneeque. Bēdamboec tabadta.

### *Nuquin Papan Mayanēn bēdamboen tabadmete*

<sup>16</sup> Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquo ictsiac. <sup>17</sup> Nuqui icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ēnquin nuqui mēmuntsiac. <sup>18</sup> Nuquin Papan Mayanēn tantiamiacpadomboen tantiec: —Esusēnuidtsēqui Nuquin Papa ēbi bēdamboen ismec —qeshun: —Moisesēn chiactedimbo naquin ēmbimbo Nuquin Papa bēdamboen ismembī —quequin tantienquo nuqui iquec.

<sup>19</sup> Nadquio icsateuidi bunquid matses iqueque. Tantia. Chuinu. Nēidic aton chidopenquo chudquido. Nēidic aton bēnēpenquo chudmequido.

Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamete bunquido. <sup>20</sup> Nëidic Nuquin Papan chiaid niac-niacquin ambi matsesbimboecnuc nacnenaïdi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmë nec chushcananquido. Nëidic cudasquido. Nëidic nëishëmënquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatiapimbo iquebi. Èmbentsëqui bëdamboen chiembi —quequido. <sup>21</sup> Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquo icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabditiapimbo iquec. Aden mibi chuibanondambi ënden.

<sup>22</sup> Padnuen Nuquin Papan Mayanën namiaid yec nadquiec tabadquid. Nuquin Papabëdta matses tantiaquiec tabadquid. Esus tantiec cuishon-quec tabadquid. —Nuquin Papan ëbi bëdamboen isec —quec bëdambo yec dacuëdenquo yec tabadquid. Utsibon chieshënaqui chieshëmënenquo yec tabadquid. Nëishëmënenquo yec tabadquid. Bëdamboen isquin utsibo nashunec tabadquid. Muainquo yec tabadquid Nuquin Papan namiaid. <sup>23</sup> —Con nauidi naimbi. Èbiuidtsëqui bëdambo iquec —quenquo icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquo yec Nuquin Papan Mayanën namiaido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuiampic. Nuquin Papan Mayanën tantiamiacpadec tabadquin aden chuiampid nuqui niaquenquo iquec. <sup>24</sup> Adoenquo icquin cuesten decanac abidedi cuidadec unësaid Esus tantiaquin nuqui icsate bunaid ënquin nuqui mëmuntsiac. <sup>25</sup> Aden icsamboen nainquo yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

<sup>26</sup> —Èbiuidtsëqui bëdambo iquec —quenda. Adenquo yec nuqui chuiquid dëniacte bunenquo yec bëdamboec tabadnuna. —Èbi bunacpaden ëbi namianquenien icchitec. Utsien namechitec —quec chieshëmë nec tabadenda. Nëishnanenquo yec bëdamboec tabadnuna.

## 6

### *Esus tantiaquido bëdamboec isnante chiaid*

<sup>1</sup> ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishëc ëbitsen icsamane —queshun nëishenquo icquin aden chuiquid yendac. Abibi datantiadec: —Icsaquid nebi. Esus bëdamboen tantienquo yec adecbidi icsatsiabi —quequin tantiec: —Bëdamboec tabadta —quequid yendac. <sup>2</sup> Adec bëdamboec isnanec: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

<sup>3</sup> Utsien: —Utsibëd onquetiapimbo iquebi. Èbiuidtsëqui bëdambo iquebi —quec abibi muauadquid icsambo iquec. <sup>4</sup> Adenquo yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi ëbiuidtsëqui bëdambo iquebi —quenda. <sup>5</sup> ¿Mimbi utsibon naid chuibanashoda Nuquin Papan: —Mibi

bëdambo iquec —capatsiash? Padenquo. Mimi bëdamboen naid isun: — Mibi bëdambo iquec —catsiash.

<sup>6</sup> Esus tantiaquidon nadoquid yendac. Nuquin Papan chiaid abi chuibanquid nashunquid yendac. <sup>7</sup> Piacbo sequidbimboec matses iquec. Tantienuo icquidën icbompin uestsaidi siac canienquio ictsiash. Padnuen tantiaquidën êshë bëdaidquio siac bëdamboec canitsiash. Tantienuo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unêsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unêsash Nuquin Papa yacno nidendac. Èbi adsho tantiash: —Icsaido Nuquin Papan cuidenquio ictsiash —quec muaic tabadenda. Ambi chiacpadomboen mibi cuidendac. <sup>8</sup> Ambi chiaid niac-niaquec abi icsate bunaiduidi naquid cuidendac. Nuquin Papan Mayanën fantiamiacpadomboen naquidien bëdamboec tabadec unêsash Nuquin Papa yacno tabadendac. <sup>9</sup> Èmbi aden chuisho tantiash bëdamboec tabadta. Bëdamboec tabadec chieshtoenquio icsho isun ambi tantiacpadën Nuquin Papan abëdi nuqui tabadmendac. <sup>10</sup> Adec bëdamboec tabadquin utsibo bëdamboen isquin nashununa. Aden utsibo bëdiactsc tantiec Èsus tantiaquido yec tantiananguiec nashunanquionona. —Shubu abentsëquën tabadquidobimboec Esus tantiaquido iquec —queshun adonona.

### *Pabadon ênquimbi chiaid*

<sup>11</sup> Is. Nua-nua icnuc dada uaquin êmbimbo ênquimbi dada uanu. <sup>12</sup> Muaquin chuiquidon mibi con tsusedpan chiacpadomboenuidi nameitiadquio iquec. Aidon chuisho tantienda. Con matses isadaidbo: —Mibi bëdambo iquec —camenuen mibi adometriadquio iquec. —Esusuidi chuisho con matsesën chieshënuin cuidnushë. Moisesën chiacpadomboen namenu —quequin mibi shui dëbid dëteshunemetiadquio icchitec. Aido muasho tantienda. <sup>13</sup> Aden mibi: —Adota —caquidombi Moisesën chiactedi nainquien icchitec. Adquid yec: —Is. Bëdambo iquebëc. Èmbi chiacpadomboen nëidon naosh —quenuembien mibi shui dëbid dëteshunemetiadquio icchitec. Aidon chiacpadomboen nainda. <sup>14</sup> Èbien adtiapimbo iquec. Esus tantiesabimboec: —Èbibi bëdambo iquebi —quetiapimbo iquebi. Esusuidtsëqui bëdambo iquec. Abi tantiaquid cuidmenquio icnuec abided cuidadec unëspac caondash cuesten dectanac. —Aidquio tantiec bëdambo iquebi —caimbi. Aden Esus tantiec: —Èmbimbo Moisesën chiactedi naquin Nuquin Papa bëdamboen ismembï —quec ênëdondabi. Adecbidi Esus tantiec èbi bunaid ênash icsate bunenquio iquebi. <sup>15</sup> —Moisesën chiactedi naquiduidi Nuquin Papan bëdamboen istsiash —quetiapimbo iquebi. Shui dëbid dëteshuniadëmbi Esus tantienuo icsho Nuquin Papan cuidtsiash. Adembidi shui dëbid dëtiacmaidën Esus tantienuo icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bëdamboen isquin bëdamboen tabadmec. <sup>16</sup> Èmbi aden chuisho tantiash: —Ai, abimbo mimi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con matsesquio nec —caindac.

<sup>17</sup> —Abimbo chienquien icchitec —èbi cainda. Esusën chiaidquio chiombi. Aidquio tantiaquin ambi chiacpadomboen nabanta. Èmbi Esusën chiacpadomboen nasho isun chieshënuin cuesaniondashi. Cuesonaid bish abi iquec. <sup>18</sup> Tantia, con utsibo. Mibi Nuquin Papa chianembï naden. —Mimi nabocpadomboen con Icbo Esuquidistubëdtan Cadasia yacnocquido

bëdamboen ista, Papa —quequin Nuquin Papa chianembi. Padi. Aidedi  
chuiquin dada uaombi.



## EPESO YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedēta.

<sup>2</sup> Aden Nuquin Papan bēdamboquid icmenu caidombo icquin ma Nuquin Papan Nuquin Icho Esuquidistubēdan ēnenquocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

### *Nuquin Papan abēd abuc bēdamboec tabadacpadquiocnoc icmiaid*

<sup>3</sup> Edoen, Nuquin Papa, Nuquin Icho Esuquidistun Papa bēdamboquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec. <sup>4</sup> Nidaid abubēda uabicquin aidēnquiocquidtedi uabicquin, Nēidtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin <sup>5</sup> abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec. <sup>6</sup> Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmebanec. Adoac, Bēdamboquid mibi nec, Papa, quequin Nuquin Papa nuqui chuidenec. <sup>7</sup> Matsestedi icsaid bedshunacsho Nuquin Papa cudasaidquio Esuquidistu icsamboquid bimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. <sup>8</sup> Naden nanuna, quequin ambi tantiampicpadomboen aton bacuē icmebanac abēd icquido nuqui nec. <sup>9</sup> Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi mates tantiamenquio icpampid nēbi ambi cuēmbanaido Nuquin Papan tantiamebanec. <sup>10</sup> Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

<sup>11</sup> Esuquidistu tantiaquid icsho isun ambi tantiampicpadomboen, Con bacuē icmiaido nec, quequin Nuquin Papan cuēmbanaido <sup>12</sup> abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma utsibo cuēdēmpanuna. <sup>13</sup> Mibi icsaid bedshunash abided ciudadec Esuquidistu unēsapanēdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. <sup>14</sup> Aidēmbi mibi bēdambo icmiac Nuquin Papabēd tabadendac. Mibitedi bēdamboec tabadsho isash Nuquin Papa bēdambo iquec, quequin chiec ma utsibo cuēdēmpanuna.

### *Nuquin Papa chiec onquianiaid*

<sup>15</sup> ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abēd icte bunanec iccuededec, quequin chuisho tantiapombi. <sup>16</sup> Aden tantiaishun mibitedi bēpiscudenquiocquin badiadquidēn-badiadquidēnquien naden Nuquin

Papa chian-chianembi. <sup>17</sup> Esuquidistun Papa, icsaisambo, tantiaquidquo mibi cadoque. Mibi bédamboen tantiaquid yacpadquionoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. <sup>18</sup> Adecbidi, Abuc ebëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bédamboec tabadendabi, quequin Epeso yacnocquidon ma tantiapanuna, Papa. <sup>19</sup> Aden tantiamiac Nuquin Papan nadatiambocquin nabanquin Esus unësacsho uincuemenedacpaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bédamboequid icmebanec, quequin ma Epeso yacnocquidon tantiaquiopanuna, Papa. <sup>20</sup> Esuquidistu unës uacsho uincuemeshun mibi yacno aidi indoshon min dayunquo mimbis tsadumpanëdac, quequin tantiec Nuquin Papan nadatiambocquin naidquionec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. <sup>21</sup> Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquo tsadunquin utsibo mimbi ismepanëdac, Adquid nebi, chuiquid utsi quetiapimboconoc. Nuquin Papan nadatiambocquin nac ënenquiocquin abitedi chuiquidquo Esuquidistu iquendac, quequin Epeso yacnocquidon ma tantiaquiopanuna. <sup>22</sup> Abitedishun con icbo caidquo Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquido nec. <sup>23</sup> Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yac bimboec abëdi nuqui tabadendac.

## 2

### *Nuquin Papan Esuquidistubëd icmiaido*

<sup>1</sup> Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. <sup>2</sup> Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënnid dapan Satanasën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac. <sup>3</sup> Adquiduidquio yec nuqui tantiacpadec icsadenecc nuqui tabadpadenecc. Adecc tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. <sup>4</sup> Adecc cuidnu queboedëmbi nuqui tantiec nësquiocquin Nuquin Papan companenen nuquitedi tantiamepondash. <sup>5</sup> Ambi cuidnu caido icsaquido yec abëd ictiapimbo nuqui tabadpondac. Adecc tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. <sup>6</sup> Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoac bimboecquido icsho Nuquin Papan nuqui bédamboen isec. Adecbidi abuc Esuquidistubëd icquid nendabi, quequin tantiec nuqui tabadec. <sup>7</sup> Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. <sup>8</sup> Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiembi, quetiapimbo nuqui icnubi, Mibi tantiamiombique.

Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. <sup>9</sup> Icsaquido icquin bëdamboen naic nuqui icsaid cuidadtiapimbo nuqui iquec. Bëdamboen naic cuidadpebi, quiash abi icsaquid yequi, Bëdamboequid nebi, quec tabadsho isun utsibon icsamboen tantianushe qeshun Nuquin Papan icsaisa aton Madoded cuidpanëdash. <sup>10</sup> Nuquin Papan uaido nuqui nec. Aidëmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

### *Esuquidistubëd abentsëc yachimboecquido*

<sup>11</sup> Nuquin Papan, Cuidnu, quenquiocquin comapenen tantiamiaidquio mibitedi icquin mibi ënden tabadaid tantiata. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuënondash. Nuquin Papan matsesquio nebi, quequin shui dëbid dëtemequidquio isadaidbo nec. <sup>12</sup> Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ëbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. <sup>13</sup> Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unëspanëdash, quequin tantiaquid icsho aidënuquio abi yacno yuedendac. Nëbi aid tantiaquid yec abi tantiaquid utsibobëd abëdi tabadachimboecsho Nuquin Papan nuqui bëdamboen isec.

<sup>14</sup> Isadaidpembo isash isadaidbo, Ëbëd icquidpenquio nec, quequin tantiec datamëncuenepondash. Adecbidi isadaidbo isash adquiecbidi isadaidpembo datamëncuenepondash. Adquido icchoedi ëbi icsaid bedshunash Esuquidistu unëspanëdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamëncuenequio yec matses abentsëc yachimboecquido yanac. <sup>15</sup> Esuquidistu matsesash nidaidën tabadquin isadaidbo icquin isadaidbon, Naden nata, quequin chiapadomboen utsitedishun natiapimbochnobi Esuquidistu uesquin nabampanëdash icsainquiocquin. Adec tabadquin näimbudsho icsaquidbimboecnu unës uapanëdash. Aden unësmesho isec Nuquin Papa, Padi. Chën, quenquio icpanëdash. Ëbi yacno isadaidbo isadaidpembobëdtabi con madon yuedendac, quiash chën quenquio icpanëdash. Datamëncueneboedi aido Esuquidistu tantiaquid yanash datamënenquio yanac. <sup>16</sup> Naden nata, quequin chiaidtedi nuqui natiapimbochno nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. <sup>17</sup> Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësqin isadaidbo isadaidpembobëdta Nuquin Papan bëdamboen isaido icmepanëdash. <sup>18</sup> Adoac nëid isadaidbo nec. Nëdic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedenec.

<sup>19</sup> Aden chiec onquec ambi yuedtiapimbo icchoedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid

mibitedi iquec. <sup>20</sup> Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaid cueste nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic. <sup>21</sup> Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. <sup>22</sup> Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

### 3

#### *Isadaidpembo Esuquidistu chuibenequid Pabado*

<sup>1</sup> Isadaidpemboëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboën mibi chuibanquidquio nebi. <sup>2</sup> Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. <sup>3</sup> Ëbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. <sup>4</sup> Ëmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. <sup>5</sup> Ëndenquio Nuquin Papan Esuquidistu nidmëmbi, quequin chienquiocpampidëmbi nëbi ambi, Esuquidistu mattses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. <sup>6</sup> Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

<sup>7</sup> Nuquin Papan, Cuidnu, quenquiocquin nadatiambocquin ëbi ismi-aid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. <sup>8</sup> Esuquidistu tantiacbicquid utsi bëdiactsäc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaïdquio tantiamequiopondashi. Adëmbidi ambi, Esuquidistu chuibeneta, caidquio nebi. Adquid icquimbi Esuquidistun mattses bëdamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidedi mattsesën bëdamboen tantiatiapimbo icoapec. <sup>9</sup> Ëbëdtambi abitedi uampidquio Esuquidistu aid tantiaquido ëbi yacno yuedquid iguendac, quequin Nuquin Papan tantiamenquiocboedi nëbi mattses tantiamenuen Esuquidistu chuibeneta caidquio nebi. <sup>10</sup> Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmëbanec. Aden icmëbansho isun abí yacno tabadquin namequidon tantienquiocboedëmbi nëbi tantien- dac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. <sup>11</sup> Mattses bëdambo icmete- quid Esuquidistu iguendac, quequin ambi tantiampicpadomboen Nuquin Papan Esuquidistu Nuquin Icho icmëpanëdash. <sup>12</sup> Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. <sup>13</sup> Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiaata, Epeso yacnocquido mibi caimbi.

Ëmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdambocquid icmenu, caid mibitedi neque. Chieshenda. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

*Epeso yacnocquido tantiec Nuquin Papa chiec Pabado onquaid*

14-15 Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. <sup>16</sup> Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. <sup>17</sup> Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquo yec utsibëd tantianec tabadquid ma Epeso yacnocquido icpanuna. <sup>18</sup> Aden pausunac, Ëbi utsibobëdta comapenen tantiaquid Esuquidistu nec. Ambì bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aitedi icsaid bedshunacsho Nuquin Papan cuidpanëdash, quequin ma Epeso yacnocquidon tantiaapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. <sup>19</sup> Aden tantiaquidquo yec Esuquidistu unësnëdash, quequin tantiec papuduedash Esuquidistun matses tantiacpadquidquo Nuquin Papan ma mibitedi icmebampanuna.

<sup>20</sup> Nadquid Nuquin Papan ëbi icmetsiash, quequin nuqui tantiatipimboconobi nadatiambocquin nabanquin ambi tantiacpadomboen abi yacpadquidquo nuqui icmebanendac. <sup>21</sup> Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambì uaid utsidedi naimëdec, quenubi ma adomboembidi Nuquin Papan Esuquidistubëdtan naid matsesën chuibanopanuna. Ai, ma ënenquiocquin adopanuna.

## 4

*Abentsëc yacimboecquido Esuquidistu tantiaquido*

<sup>1</sup> Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembigue. Tantia. Esuquidistu tantiaquido aton shubun icquido yec icbo bëdamboec tabadacpadquiec tabadteneta. <sup>2</sup> Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. <sup>3</sup> Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. <sup>4</sup> Esuquidistu tantiaquidtedi abentsëc yacimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. <sup>5</sup> Abentsëcquiobi mibitedishun con Icbo caid iquec. Abentsëcquiobi mibitedishun tantiaidquido Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yacimboecquid nec. <sup>6</sup> Abia yampid Nuquin Papa Esuquidistun Papambo abentsëcquiobi iquec. Abitedi uaquidquo yec abitedi Chuiquid Dapambo nec. Aidbidi Esuquidistu tantiaquido bëdambo

icmequid neoaic. Aidēmbi Esuquidistu tantiaquidobēd tabadnuequin abipadquid meniac nuquibēd aton Mayan iquendac.

<sup>7</sup> Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. <sup>8</sup> Ēndenquio chiampicpadembi nēbi pausumbanec. Naden ėnden chiampid neque. Tántia. Chuínu. “Nuquin Papan abucquio indoac, Ēbi tantiaquidtedi ěbēdi tabadendac, quequin Esuquidistun bedbanshun buanachimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ėnden chiampid nec. <sup>9</sup> “Abucquio indoac,” quequin ¿mitsipadomboen tantiampampiba? mibi quepec. Aidquio chuínu. Tántia. Esuquidistu abia yampid yec abucquio tabadboedi, Matses icsaid bedshunash ěbided cuidadnu, quianacsho nidaidēnshun chidon tishpanēdash. <sup>10</sup> Aid nidaidēnshun tishacsho unēs uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanēdash. Adquid icmiac ma ěbi tantiaquidobēd icpanueshun abipadquidquio aton Mayan aido menebanec. <sup>11</sup> Aden aid menebanac aidēnquio Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chīaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abēd iccuededquido isbanquin chuiquin tantiaquid icmebanoaic. <sup>12</sup> Bēdamboec tabadtenequido ěbi tantiaquidtedi icmeta, cac aidēn tantiacpadomboen adquido icmebanac <sup>13</sup> ma shubu dapan icquid dadpen yanec abentsēc yacimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

<sup>14</sup> Ambi pausunaidquio icquin abimbo chiachimboen utsibon chuisho tantiabenabicquidēn badedquio tantiacpaden tantienquio nuqui iquendac. <sup>15</sup> Tantiananec abimbo chuinanquido Esuquidistu tantiadonequido icmiac chuiquid Esuquidistupadquid yanash abēdi abentsēc yacimboecquid nuqui yanendac. <sup>16</sup> Ēbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abēdi abentsēc yacimboecquid nuqui iquec. Esuquidistun pausunacpadomboen abentsēcshun-abentsēcshunquien nabanequi tantiananquiec abi tantiaquidtedi Esuquidistupadquidquio abēdi abentsēc yacimboecquid yanendac.

### *Esuquidistun nua pausunacpadquiec tabadteniaid*

<sup>17</sup> Esuquidistubēd abentsēc yacimboecquid abi tantiaquidtedi iquendac, quīash, aidpadquid icnu, quec ėnden icsamboec tabadnēdacpadquiec tabadenda caimbi mibi. Esuquidistun ěbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. <sup>18</sup> Pashuachimboen tantienquio iquec. Nuquin Papabēd tabadte iquec, utsibo qesho tantiesa yec, Tantiatiapibi, quepec aido. <sup>19</sup> Icsaquid nebi, quequin badedquio chienquio aidon iquec. Adquid icsamianquidēn yuaid yec, Icsanu, quiacpadec tabadec. Adec icsasho utsin istemaid nec. <sup>20</sup> Adpenquio Esuquidistun tantiaquidquid pausunaid iquec. <sup>21</sup> Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiashun Esuquidistu chuibenequidon, Abēd icquid yec abipadquid yanebi quec adquiec bidi tabadteneta, quequin mibi chuipondash. <sup>22</sup> Adoac mimbi tantianēdacpadec tabadoainda. Mibi ėnden

icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. <sup>23</sup> Mibi icsate bunaid ënta. <sup>24</sup> Adsho isun ma Esuquidistun tantiacpadomboen tantiapanu queshun Nuquin Papan Mayanën mibi nua pausunendac. Adoac adomboembidi mimi tantiapec. Adecbidi aid bunacpadquieq bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. <sup>25</sup> Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta. <sup>26</sup> Nëishëc icsainda. Nëishash abi ushëmbi bëdanta. <sup>27</sup> Satanasën yuanushe quiash badedquio bëdanta. <sup>28</sup> Ampequid icboedi Esuquidistu tantiaquid yanshun ampnda. Adquid icboedi chonoadquin mitsana bedshun utsin na nibëdsho isun menequid icta.

<sup>29</sup> Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. <sup>30</sup> Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. <sup>31</sup> Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. <sup>32</sup> Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquieq utsi icsaid bëpiscudoata.

## 5

<sup>1</sup> Nuquin Papan bacuëbo yec <sup>2</sup> tantianec tabadteneta. Nuquin Papan chiampicpadquieq Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

<sup>3</sup> Esuquidistu tantiaquid yec, Mimi inacmaid isec chudnu, quesambo icta, dada. Adecbidi, Ëbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. <sup>4</sup> Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamëshunesambo icta. <sup>5</sup> Chudtemaid chudnu, quequiduidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequiduidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. <sup>6</sup> Ambembi chiec onquiaid tanties icta. Adquid Nuquin Papan chiacpadomboen naisa nec. Adquid Nuquin Papan comapen cuidendac. <sup>7</sup> Adquidbëd icsainda.

<sup>8</sup> Ënden Esuquidistu tanties icta icquin inchëshquiocnoc isacbimboen tantienquo icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacbimboen tantiaquiota. Aden tantiec Nuquin Papan bacuëbo yec Nuquin Papan tantiamiacpadquieq bëdamboec tabadteneta. <sup>9</sup> Esuquidistun ambi tantiacpadomboen pausunac abi yacpadquieq nuqui bëdamboec tabadtenendac. Adembidi aid yacpadomboen

abimbo chuidenequid icta. <sup>10</sup> ¿Nadec tabadshodabi Nuquin Papan bēdamboen istciashe? Tanu, quequin adomboen nabanec tabadteneta. <sup>11</sup> Utsibēd icsainda. Utsi icsadenenubi mibi bēdamboec tabadtenesho isun abi icsaid utsin ēmpec. <sup>12</sup> Icsaquidēn ompoquin naid chuitemaid nec. <sup>13</sup> Adquidēn Esuquidistu tantiaquid bēdamboec tabadtenesho isun, Icsambocquid nebi, qeshun Esuquidistu tantiabempec. <sup>14</sup> Bēdamboec tabadquin ismedeniac icsambocboedēmbi bēdamboen tantiabentsiash. Esuquidistu tantiaquido chuiquin dada uaid nad iqueque. Tantia. Chuinu. “Unēsacimboen tantienquiochoedi isucunshun tantiabenacimboec bēdamboec tabadta.

Adquid icsho Esuquidistun mibi nua pausunendac.”

<sup>15</sup> Adec bēdamboec tabadnuec Esuquidistun tantiamiacmaid tabadacpadec tabadenquio yec Esuquidistun tantiamiacpadquiec tabadteneta. <sup>16</sup> Icsaquid dadpen iqueque. Aidpadquid iquenda. Esuquidistun pausunaid mibidēdi bēdamboec tabadtenesho isec ma Esuquidistu tantiesia icboedi abi tantiaquid yampanuna. <sup>17</sup> Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. <sup>18</sup> Icsachitomane quequin nua paēmbocquid aquenda. Aden aquec icsaindac. Icsate bunenquioquin Nuquin Papan Mayanēn tantiamiacpadomboen nua pausunaid icquin bēdamboen nabanta.

<sup>19</sup> Adec icsate bunenquioquin Esuquidistu tantiaquid utsibōēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta. <sup>20</sup> Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

### *Utsi tantiaquin nashunta quiaid*

<sup>21</sup> Esuquidistu con icbo nec, quequin ambi chiaid niacmane qeshun utsi tantiaquin nashunta.

<sup>22</sup> Adembidi Esuquidistun chiacpadomboen dadan inaidēn min bēnēn chiacpadomboen nabanta. <sup>23</sup> Adembidi abi tantiaquidtedi chuiquidquido Esuquidistu nec. Abi yacno indoshon ēnēdenquio yec icsainquiocnoc tabadmendac. Adembidi aton chido chuiquidbidi aton bēnē nec. <sup>24</sup> Esuquidistun chiacpadomboen abi tantiaquidon nabanacpadomboen aton bēnēn chiaid nauquidquido aton chido neoaic.

<sup>25</sup> Esuquidistu abuc tabadboedi abi abuc bēdamboec tabadtequid tantienquio yec unēs uanushe quenquio yec matses tantiec nidaidēnshun tishaid yec matses icsaid bedshunash abided cuidadec unēsapanēdash. Abuc ēbēdi abentsēc yacimboecnuc tabadmenu, quec unēsapanēdash. <sup>26</sup> Adecbidi,

Ēbi tantiaquido icsaisa icmenu, quiaish abided cuidadec unēsapanēdash. <sup>27</sup> Adecbidi, icsaid nibēdquid bēdaidquio abi tantiaquido icmeshun Nuquin Papa yacno yuedshun, Ēmbi yuedboed min shubun ictequid nendac, quequin ismemb, quec Esus unēsapanēdash. <sup>28</sup> Adomboembidi chido inquidēn abibi tantiadacpadomboen ma con chido tantiaquin, Bēdamboquid icmenu, quequin nashundeniash ma aidbēdi bēdamboquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbēdi abentsēc yacimboecquid neoaic. <sup>29</sup> Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimboen <sup>30</sup> dadan abēd icquid aton chido icsho aidi tantiaquin nashunquid.



Dadaba uashun aidën shictodobi chicshun chido uapampic. Adoshon dadan nami aton canitebêdta chido uashun daëd uac abentsêc yac bimboec aid daëdi yanac. <sup>31</sup> Nuquin Papan ênden dada uampid nad iqueque. Tantia. Chuinu. “Aidbêd icnu, qeshun bedash aton papa aton titabêdta nianac bimboec daëdash aton chidobêdi abentsêc yac bimboec tabadtenec.” <sup>32</sup> Adec dada aton chidobêd daëdash abentsêc yac bimboecncu ambi icmiampic-padec Esuquidistu tantiaquido aton shubun icquido abentsêc yac bimboec tabadendac, quequin chiec. <sup>33</sup> Nêbi adomboembidi chido inquit ambi in-aidbêdta chuiôaimbique. Tantiata. Mibibi tantiadacpadomboen min chido bêdamboen tantiata dadan. Con bënë êbi chuiquid nec, quequin aidën chiaid tantiata chidon.

## 6

### *Bacuêbobêdta bacuêchoquid tantiamequin chuibanaid*

<sup>1</sup> Bacuêbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. <sup>2</sup> Nuquin Papan, Naden nata, quequin ambi chiaid cuênoten dada uaid Moises meniampid abentsêc nad iqueque. Tantia. Chuinu: “Êbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: <sup>3</sup> “Amên anibêdta chiacpadomboen naquid Nuquin Papan bêdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

<sup>4</sup> Amên anibêdta con bacuêbo chieshemane qeshun bêdamboen chuiquin tantiamequin isme. Adembidi, aido pemeshun acme. Adembidi, Êmbi chiacpadomboen ma nabampanuëshun Nuquin Icbon chiaid tantiamenu, quequin adobanta.

### *Utsin yuaido yuaquidobidi tantiamequin chuibanaid*

<sup>5</sup> Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. <sup>6</sup> Min icbon chuishun isnuc ambi chiacpadomboen bêdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidën chiacpadomboen nanuna, quequin nidaidênshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. <sup>7</sup> Min Icho Esuquidistun aton Papan chiacpadomboen chieshenquiocquin nacpadomboen nidaidênshun min icbon chiacpadomboen chieshenquiocquin nabanta. <sup>8</sup> Bêdamboen nabanquido yuacmaidbêdta yuabo Nuquin Papan bêdamboen cuidquin menendac, quequin tantiaquin bêdamboen nabanta.

<sup>9</sup> Yuaquidon min yuabo chieshênquiocquin bêdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nêdic yua icsho daëdpactsêc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

### *Satanas cuemetequid dasiuidaid*

<sup>10</sup> Nuquin Icho nadatiambocquin nabanquid iquec, quiash aidênquio nua pausunaid icta. <sup>11</sup> Satanac cacumetequid dasiuiu, quiash, Nuquin Papa mibi nua pausunuesho, Ai, cata Satanasên mua uaquin bedchitoshe qeshun. <sup>12</sup> Matses isadacpadpenquio nami intacbêd isadesa Satanasbêd

icquido nec. Aidedi Nuquin Papan abi tabadaid tēdion tabadmec. Aido icsamianquido nec. Matses yuanuequid Satanās nec. Nuquin Papan uaid tantiash bēdambo mibi iquendac, quequin muaquin aidon chiec. <sup>13</sup> Aden muaquin chuiquid aidedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushē chonoc Satanās mibi icsamenuēc choacsho bēcuniacimboen cacumec abi mibi nidtoash Esuquidistu tantiaquid yec nidendac. <sup>14</sup> Aid cacumec abi nidquid icnuec Nuquin Papan abimbo chi-aidquio nacnēshēdacimboec tabadteneta. Adembidi, Nuquin Papan abi bēdamboec tabadtequid shictoncacimboec tabadteneoata. Adec tabadec abi nidtoash mibi nidendac. <sup>15</sup> Adecbidi, Esuquidistu tantiaquid ēbēd icquid iquendac, quequin Nuquin Papan tantiamequin pausunaidēn tapucudacimboen adomboembidi chuibenequin Satanās cacumec nidacimboec abi mibi nidendac. <sup>16</sup> Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidēnquo dēcatemēnquiash abi mibi nidendac. Aden Nuquin Papan tantiamequin pausunaidēnquo dēcatemēnquiash Satanāsēn abi tantiamenequin pian sedo-sedoacimboen pausantemaid yec abi mibi nidendac. <sup>17</sup> Adecbidi, Esuquidistu tantiaquid ēmbi yuedtequid nendac, quequin Nuquin Papan tantiamiac utsin machicti- apimbo yec shocosh mauete uaid mauiacimboec tantiec tabadteneta. Aden pausunac tabadquin Satanās, Esuquidistu mibi bedec choenquo iquendac, qesho cacumiash abi nidquin mimbi ēnenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanēn tantiamiaidquio icquin mimbi chuisho tantiash Satanās cuenendac. <sup>18</sup> Adecbidi, Nuquin Papan chiaid aton Mayanēn tantiamiaid icquin utsibo tantiaquin baded-badedquiec Nuquin Papa chiec onqueta. Satanāsēn icsamenushe quiash Esuquidistu tantiaquid utsibo Nuquin Papa chiec onquedeneta.

<sup>19</sup> Ēbitsen tantiaquin Nuquin Papa chuioata. Dacuēdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ēbitsen chuioa. <sup>20</sup> Esuquidistun chuibeneta caid icquin abi chuibenesho mētaneshun quēnēn nauedaid nebi. Adoaid ēbi icnuc mimbi tantiacpaden chuibanquid Pabado icme, Papa, quequin chuioata.

### *Ēnquin chiaid*

<sup>21</sup> Nēbi ēbēd icquid chiembique. Tantia. Tiquico mibi yacno nidec. Aibidi Esuquidistu tantiaquid icsho nuqui con utsi caid nec. Nuquin Icbon chuimaidquio aidi nec. <sup>22</sup> Mibi yacno puduedshun ēmbi naidtedi ēbi tabadaidbēda mibi chuibanendac. Ēbi mimbi chuisho tantiash, Bēdambo iquebi, quepen- dac Epeso yacnocquido, quequin Tiquico mibi yacno nidmembī.

<sup>23</sup> Mibēd icquido Esuquidistu tantiaquid utsibobēd ma bēdamboec tabadpanuna caimbi mibitedi. Esuquidistun Nuquin Papabēdtan abi tantiamiantequidbēda utsi tantiatequid pausunaid ma icpanuna caimbi mibitedi.

<sup>24</sup> Ēnenquiocquin Nuquin Icho tantiaquidtedi ma abipadquid icpanuna.

## PIDIPOS YACNOCQUIDON ISTE

### *Pabadon tauamboen chiaid*

<sup>1</sup> Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. <sup>2</sup>—Con Icho Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

### *Pabadon Nuquin Papa chianiaid*

<sup>3</sup> Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. <sup>4</sup> Aden mibi tantiaquin Nuquin Papa chiec bëdambo yec cuishonquebi. <sup>5</sup> Ènden ëmbi chuibanac Esus tantiabenguin mimbi ëbi piucquid meniondac. —Esusën naid ma Pabadon matses utsibosen chulbanu —qeshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. <sup>6</sup> Nuquin Papan tantiamiac mimbi Esus tantiabengondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. <sup>7</sup> —Èbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi. <sup>8</sup> Esusën matses tantiacpadomboen mibi tantiac unësquo iquec. Mibi istiadquo iquebi. Èbi adsho tantiaish Nuquin Papatsen: —Abimbo caic —quendac. <sup>9</sup> Aden mibi tantiaquin Nuquin Papa chianembi. —Aido bëdiactšëc tantianansho compenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. <sup>10</sup> Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantierendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. <sup>11</sup> Adec con Icho Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

### *Utsibon Esus chuibeniaid*

<sup>12</sup> Quënën nauedac ëmbi Esus chuibenetiapimbo icnubi utsibon chuibeniac utsin-utsinquin Esus tantiabengac caosh. <sup>13</sup> Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanansho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. <sup>14</sup> Quënën nauedaquid dacuëdenquo iquebi. Èbi adquo icnuc: —Pabadon nacpadomboen dacuëdenquo icquin Esusën naid chuibanembi —quepac caosh Esus tantiaquido dadpen. Adshun dacuëdboedombi dacuëdenquo yanquin Nuquin Papan chiaidquo chuibeniac caosh.

15-16 Aidon ëbi bédamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bédamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado mëyadbudchitono. <sup>17</sup> Aidën chuibantiapimbo icnuc ëmbiquien nanu. Aden ëmbentsëqui chuibanac dadpeshun tantiashun: “Mibi bédambo iquec,” ëbi catsiash —quequin Esusquo tantiengio icquimbi Esusën naid chuibenec. <sup>18</sup> —Ëbi chieshënec —çquiashtabi nëishpe? Padengio. —Ëbi chieshënquidon ëbi bédamboen tanti aquidobëdtambi Esusën naid chuibanac matses utsibo utsi-utsiec Esus tanti aquido yanec —quiash bédambo yec cuishonquebi. Adecbidi cuishonquebi: <sup>19</sup> —Pidipos yacnocquidon Nuquin Papa ëbi chianiac caosh —quiash. —Mëyadsho Pabado chieshtomenda, Papa. Abi quënën nauedquidon puduemquin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquo iquendabi. Adembidi aidën nac quënën tsadenquo iquendabi. <sup>20</sup> Ëmbi naondacpadomboen dacuëdenquo icquin Esusën naid chuibanti adquo iquebi. Chieshtotiapimbo iquebi. —Ma utsibon: “Esuquidistu bédambo iquec,” canu —quiash aduidequi iquebi unësabi yec. Utsin: —Cuesunechitono —caqui adecbidi chieshtoenquo ictsiabi.

<sup>21</sup> Unësabi Esuquidistu tantiec bédambo iquebi. Unësash Esusbëd tabadequic bédamboshë ictsiabi. <sup>22</sup> ¿Mitsipadtebi bumpeba? ¿Unëstedabi bumpeba? ¿Unësenquo yec tsadtedabi bumpe? Unësabi icquin ëmbi Esusën naid chuibanac utsibon Esus tantiabentsiash. <sup>23</sup> Nuquin Papa yacno nidash Esus isec bédamboshë ictsiabi. Esus iste bunquiebi. <sup>24</sup> Aden tantiequi: —Unësabi yec Pidipos yacnocquido Esus tanti aquido Esus bédamboen tantiamec ano nidtsiabi —quequin tantiec unëstiapimbo icoaibi. <sup>25</sup> Unësabi yec mibi yacno nidoatsiabi. Aden tantiec: —Nuquin Papan nëbi ëbi unës uamenquo iquec —queoaibi. Mibëd tabadquin Esusën naid bédamboen chuibantsiambi. Adoac bëdiactsëc Esus tantiatsëcboedombi Esus tantiaquiec mibi bédambo ictsiac. <sup>26</sup> Ëbi choacsho isash: —Pabado padpidec chomequid Esus bédamboshë iquec —mibi quetsiac. Adec mibi cuishonquetsiac.

### *Chieshtoenda, quequin Pabadon chiaid*

<sup>27</sup> Ëbi ano nidtiapimbo icnuc Esusën chiacpadec chieshtoenquo yec bédamboec tabadta. Quënën ëbi nauedboedën puduemiac mibi yacno nidshun mibi bédamboec tabadsho isash: —Pidipos yacnocquidon ëmbi chiapaden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuëshëdenquo yec Pidipos yacnocquido bédamboec tabadosh. <sup>28</sup> Esus chieshënquidon: “Esusën naid chienda. Cueschitomane,” caqui dacuëdenquo icquin Esusën naid adembi chuibanosh —quequin mimbi naid chuisho tantiash bédambo ictsiabi. Adec cuesambo yec nuqui: —Nuquin Papan icmiacpadec dacuëdenquo iquebi. Ëbi dacuëdenquo icmequidën ambi chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac. <sup>29</sup> —Con Mado Esus tantiasho utsibon chieshënsiandac —quequin Nuquin Papan tantiacpadomboen utsibon mibi chieshëndac. <sup>30</sup> Ëbi nacpadomboen mibi chieshënoaic. Mimbi isnuc ëbi chieshënondash. Adembidi ëbi chieshënoaic nëbi. Nëid dada uaid isquin: —Pabado padpiden chieshënoac —quequin mimbi tantiendac.

## 2

*Utsi tantiec tabadta, quiaid*

<sup>1</sup> Tantia, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquio yacbimboec iquec. Adecbidi Esusën tantiaido yec bēdambo icquido nec. Adecbidi Nuquin Papan aton Mayan abēd icmequin bēdamboec tabadquid icmiaidobidi nendac. Adoaido matses tantiaquidombo nec. <sup>2</sup> —Adquidbidi nebi —quec adquiecbidi bēdamboec tantianancuededta. Ēbi cuishoncamenuc adta. Abitedi: —Esusën chiacpadomboen nanuna —quecuededec chieshēnänenquio yec bēdamboec tabadta. <sup>3</sup> Nadec onquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashunti-adquio iquebi —quec bēdamboec tabadta. <sup>4</sup> Mimbi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiaata.

<sup>5</sup> Esuquidistun nacpadomboen naic mibi bēdamboshē ictsiac. Aidēn chieshto-enquio icquin Nuquin Papan chiacpadomboenuidi napanēdash.

<sup>6</sup> Aton Papa Nuquin Papapadquidquio yec Esus abitedishun Icbombo nepanēdash.

Aton Papabēd yec bēdamboshē icboedi: —Padi icnuna. Nuquibi namec bēdambo iquebi —quenquio yec Nuquin Papan chiacpadomboen naic auēshquio chopanēdash.

<sup>7</sup> Adec aton Papan yuabimboecquid yanash ambi chiacpadecec matsespanēdash chidon tishac.

<sup>8</sup> Adashic matses yec aton Papan chiacpadequi abided ciudadec unēspac caondash.

Matses icsamboshē icquido cuidacimboen cuesten dectanquin icsaisambobi Esus unēs uapac caondash.

<sup>9</sup> Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abēdi Esus tabadmepanēdash. Aden abitedishun Icbombo icmeopanēdash.

<sup>10-11</sup> —“Nuquin Icbombo Esuquidistu bēdamboshē iquec,” ma abitedi quenu —qeshun aden Nuquin Papan abitedishun Icbombo Esus icmeopanēdash.

—Ēmbi ēbi yacnoshon uaido mayan bēdabo yec nidaidēn tabadquido matses yec unēsacsho uincuemiaido yec quequido: “Nuquin Icho Esuquidistu bēdamboshē iquec. Abi abitedishun Icho icmeoaquid Nuquin Papatsen bēdamboshē iquec,” ma quenu —qeshun adopanēdash.

*Utsibo Esus tantiamete chiaid*

<sup>12</sup> Mibi tantiaquiembi que. Tantia, con utsibo. Mibitedi chuinu. Esusën nacpadomboen mimbitsen bēdamboen nata. Ēbi mibēd icnuc mimbi nadeniondacadomboen ēbi nibēdnuc adembidi bēdamboen nata. —Nuquin Papa dacuēdampambo icquidēn chiaid niacmane —quiash ambi chiacpadomboen naic aibēdi tabadnush bēdamboec tabadta. <sup>13</sup> —Ma bēdamboec tabadnu —quequin Nuquin Papan ambi chiacpadecec tabadte bumequin nuqui bēdamboen tabadmeque. Bēdamboec tabadta.

<sup>14</sup> Adec bēdamboec tabadec chushcananenda. Adecbidi: —Bēdamboen nanuna —cac chieshec tabadenda. <sup>15</sup> —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquo icsamboshē icnubi adequi bēdamboec tabad. Adec bēdamboec tabadquin icsambo icquido mimbi

Esus bēdamboen tantiametsiac paposhquiacbimboecnuc. <sup>16</sup> Mimbī adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aibbēd tabadendac —quequin tantiatsiash. Aden mimbī chuibanaido Esus tantiaquido yansho isash cuishonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnocquido ambi Esus tantiamiaidobēd choeque. Is —quec bēdambo ictsiabi. <sup>17</sup> —“Bēdambo mibi iquec,” Nuquin Papan mabi canu —queshun Esus tantiaquin mimbī bēdamboen nac. Utsibo nashunquin Esusēn naid chieshtoenquo icquin mimbī chuibanac. Mimbī adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —queshun mibi tantiec bēdambo yec cuishonquetsiabi. <sup>18</sup> Ēbi unēs uaid chuisho tantiash adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

### *Pabadon Timoteyo chiaid*

<sup>19</sup> Con madobimboecquid ēbēd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistu adembidi tantianuc adotsiambi. Adoac istanshun chuituidac bēdambo ictsiabi. <sup>20</sup> Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquiec. <sup>21</sup> Utsibombien aton nauidsēqui tantiaquin Esuquidistu chiacpadomboen natiapimbo iquec. <sup>22</sup> —Timoteyon bēdamboen naondash —quequin mimbī tantiec. Mimbī tantianubi ēbēdtan Esusēn naid chuibanondash con mado icbobimboecquin. Aid bēdambo iquec. <sup>23</sup> Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —quesho tantiabono. Tantiashun: —Ēbi quēnēn nauedquidon chiaid Pidipos yacnocquido chuitan, Timoteyo —catsiandambi. <sup>24</sup> Ēbitsen nēbi mibi yacno nidtiadquio iquebi. Ēbi caic Nuquin Icho: —Ma nidnu —quenuc anobi nidtsiabi.

### *Epapadodito chiaid*

<sup>25</sup> Epapadodito con buchibimboecquid mimbī: —Pabado nashuntan —cac Pidipos yacnuēsh chonēdaid nēmo iquec. Utsibon chieshēnubi dacuēdenquo icquin ēbēdtan Esusēn naid chuibanondash. Adondaiddi nēbi: —Mibi iccondacno tabadec nid, buchi —caombi. <sup>26</sup> Aid mibi tantiec unēsquo yec tsadposh. —Ēbi unēstsemboed con matses chuinuēc Pidipos yacno nidaccosh —quiash mibi ismete bunquiec shubiantiadtsēcquio tsadposh. Adsho isun: —Min shubuno nidec nid —caombi. <sup>27</sup> Adec unēstsenquiondash. Adshobien Nuquin Papan bēdamboen isquin bēdamepondash. Ēbitsen bēdambo icmenuen Nuquin Papan adopondash. Epapadodito unēsquo icnu ēbi shubiec tsadsho isash: —Aid unēsān unēsquo icnu Pabado mēyadnushe —queshun Nuquin Papan Epapadodito bēdamepondash. <sup>28</sup> Adoacsho mibi yacno aid badedquio nidmetiadquio iquebi. Aibbēd iquec mibi bēdambo ictsiac. Mibi yacno nidsho isash ēbitsen bēdambo ictsiabi. <sup>29</sup> Epapadodito nidacsho bēdamboen ista cuishonquequin. —Nuquin Ichon mibi bēdamaic. Aid bēdambo iquec. Mibitsen bēdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bēdamboen ista. <sup>30</sup> Esuquidistu chiacpadomboen naic ēbēdi tabadec Epapadodito chondash. Chieshēmēnquido dadpen icnubi ēbi nashunec tabadec daicsabudash unēstsenondash. Chotiapimbo icquin mimbī: —Pabado nashuntan —cac choash nibēdantsenondashe. Mibi yacno nidacsho bēdamboen ista.

## 3

*Esusuidtsëqui tantiasho Nuquin Papan bēdamboen isaid*

<sup>1</sup> Nuquin Icho Esus tantiec cuishonquenuna. Aduidequi icac bēdambo ict-shash. Tantia, con utsibo. —Tantienquo yanushe —quequin ěmbi chiondaid dada uaqin padpden mibi chiuoanu. <sup>2</sup> Muaquidon chuisho tantienda. Aidon: —Shui dēbid dēteshun secaiduidi Nuquin Papan bēdamboen istsiash —quequin chuisho tantienda. Aden chiec icsa uanquidombo neque. Uimanēmēnquidoen nechitec. <sup>3</sup> —Shui dēbid dēteshun secaid nec —¿queshunda Nuquin Papan nuqui bēdamboen ispec? Padenquo. Aidon Esus tantienquo icsho bēdamboen isenquo icquin aton Mado Esus tantiaquidoen Nuquin Papan bēdamboen isec. Aton Mayanēn tantiamiac: —Nuquin Icho Esuquidistu bēdamboshē iquec. Abided cuidadec unēsaid tantiasho Nuquin Papan nuqui bēdamboen isec. Ĕmbembi naquin Nuquin Papa bēdamboen ismetiapimbo iquebi —quequin nuqui tantiec. <sup>4</sup> Matsesēn tsusedpan chiaiduidi tantiasho Nuquin Papan bēdamboen iste icnuc nadsabi. —Tsusedpan chiaid utsibon daēdpactsēc nanuc ěmbimbo naquin dadpenquo nabanombi. Aden ěmbimbo dadpenquo nasho Nuquin Papan ěbi bēdamboen isec. Adembidi isadaidbombo icsho ěbi bēdamboen isoaic —quetsiabi. Nēbi adtiapimbo iquebi. <sup>5</sup> Isadaidbo nebi. Isadaidbon chidon tishacsho sietetedec ushun Moisesēn chiampicpadomboen shui dēbid dēteshunenēdaidquo nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidēn onqueten onquequid nebi. Moisesēn chiampid namequidquo padiseyobo caid niondabi. <sup>6</sup> Adquid icquin icşambo icquido danquin Esus tantiaquido cuesun secatiadquo iccondabi. Nuquin Papan chiacpadomboen natiadquo iquequi adondabi. Moisesēn chiampiduidi nate bunquiondabi.

<sup>7</sup> Adquid icquin Esus tantiabi: —Ĕmbimbo naic bēdamboshē iquebi —quequin icşamboen tantiapondambi. Adondaiddi Esus tantiabenash: —Ĕmbimbo naiquini icşambo iccoc. <sup>8</sup> Nēbi con Icbombo Esuquidistu tantiec bēdambo iquebi —quequin tantiabenondambi. Aiduidtsëqui tantiatadquo icquin icsa secacimbomboen ěmbimbo naid ěnondambi. <sup>9</sup> Esus tantiate bunquiebi. Adquid yec: —Moisesēn chiampicpadomboen ěmbimbo naiquini bēdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bēdamboen isquin ěbi bēdamboen tabadmec —quequin tantiabenondambi. <sup>10</sup> Aden tantiabenshun Esusuidtsëqui comapenen tantiatadquo iquebi. —Comapenen tantiaquin Nuquin Papan uincuemiaid icquin Esusēn bēdamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho mēyanac Esus unēsac caondash. Adembidi Nuquin Papan namiacpadomboen nasho mēyanac chieshtotiapimbo ictsiabi. <sup>11</sup> Unēsambo icsho Esusēn bēdamboen tabadmetsiashi. Unēsacsho Nuquin Papan uincuemetsiashi —quec adec Esus tantiate bunquiebi.

*Nuquin Papan chiacpadomboenuidi nate bunaid*

<sup>12</sup> Tantia, con utsibo. Mibitedi chuinu. —Nuquin Papan chiaid ni-aquesambo nebi —¿quectabi ique? Padenquo. Adquid ictiadquidi adquio yenquieni icchitec. —Bēdamboshē icmenuen Esuquidistun yuapondashi —quequin tantiec bēdamboshē icte bunquiebi. <sup>13</sup> Adec bēdambo yanabi yec: —Ĕmbi naboed naic bēdamboshē iquebi —quenquo icquin Esusquo tantiaquin ambi chiacpadomboen natiadquo iquebi. <sup>14</sup> —Bednu —quequin

bedteuidtsëqui tantiec titinquiabimboen Esusquo tantiaquiec ambi chi-  
acpadquiec bēdambo ictiadquio iquebi. —Adec tabadec unēsacsho Nuquin  
Papan abi yacno ëbi tabadmec —quec bēdambo icte bunquiebi.

<sup>15</sup> Nuquin Papan chiacpadomboen natiadquio icquin ëmbi chuibocpadom-  
boen mibi tantiatsiac. Utsien: —Padi. Pabadon chiaid abitedi nainquio  
icquin abentse-abentsen naindambi —quesho Nuquin Papan ambi tantiaid  
bēdamboen tantiametsiash. <sup>16</sup> Nēbi nuqui icbocpadquiec tantiananquiec  
bēdamboec tabadnuna.

<sup>17</sup> Ēbi yacpadquiec bēdamboec tabadta. Ēmbi chiacpadomboen utsibon  
nasho isun adomboembidi bēdamboen nata. <sup>18</sup> Ēmbi chuideniondacadom-  
boen mibi padpiden chiemi shubiquimbi. Mibi yacno utsi-utsiec icsam-  
boec tabadpec. —Abided ciudadec cuesten dectamēdaid Esus tantiaquid  
nebi —quetsëboedi icsamboec tabadec. Adquido Esus tantiaquidpenquio  
nec. <sup>19</sup> Peteuidtsëqui tantiec icsambo yequi: —Bēdambo iquebi —quec  
tabadec. Nuquin Papa tantienquio icquin nidaidën icquiduidtsëqui tantiec.  
Unēsash Nuquin Papa yacno nidtiapimbo yec icsambo icquido cuidacio  
nidendac. <sup>20</sup> Padnuen Nuquin Papan bēdamboen isaïdo yec aïdbēd tabadte-  
quido nuqui nec. Abi yacno buanuec abucuësh Nuquin Icho Esuquidistu  
choso isnuec nuqui tabadec. <sup>21</sup> Choshon aïdëmbi nuquin dada chuca uain-  
dac aton dada chuca uacpadomboen. Adoac unëstiapimbo icquiduidquio  
nuqui iquendac. Abitedishun Icbombo icquin ambi chiacpadomboen  
abitedi namequidquio icquin aden nuquin dada chuca uaindac.

## 4

### *Esus tantiec cuishonquiaid*

<sup>1</sup> Ēmbi aden chuïsho tantiash Nuquin Icon chiaïd niaquenquio yec  
bēdamboec tabadta. Mibi tantiaquin mibi istiadquio iquebi. Mibi caic: —Ēmbi  
chui banondaido Esus tantiabenash bēdambo ictiadquio iccondash —quec  
bēdambo iquebique. Adquiec chieshtoenquio icquin Esus tantiec bēdamboec  
tabadta.

<sup>2</sup> Tantia. Nēbi chido daēd Ebodia caïd Sintique caïdbēdtatsen chuïnu.  
Amicananenda. Esus tantiaquido yec: —Ai, Nuquin Icho Esusën tan-  
tiacpadomboembien natiad —quec tabadta. <sup>3</sup> Tantia, buchi. Ēbēdtan  
Esus chuïbanondaid icsho mibitsen chuïnu. Aïd chido daēd chuïquin: —  
Bēdamboec insanta —cata. Utsibon chieshënubi ëbēdtan aïd daēdshun Es-  
usën naid chuïbeniondash. Adembidi Quedemente caïdëntsën ëbēdtan  
chuïbanondash. Adembidi utsibontsen. Adquidotedi Nuquin Papan: —  
Esusbēda ëbi tantiaquido mibi neque. Ēbēd tabadec cho —caïndac.

<sup>4</sup> —Nuquin Icho Esus tantiaquiec bēdambo yec cuishonquenuna —caïmbi.  
Esus tantiaquiec cuishonquenuna. <sup>5</sup> —Ma utsibo: “Esus tantiaquido  
chieshëmēnenquio yec bēdambo iquec,” ma quenu —quiash bēdamboec tabad-  
nuna. Nēbi Nuquin Icho Esus choeque.

<sup>6</sup> Adecbidi chishpiquiec tabadenda. —¿Atotsimbi napeba? ¿Atotsimbi  
pepeba? ¿Nēbida con matses unēspeba? —quequin uesquin tantienda.  
Padenquio icquin nuqui dacuēdquïn tantiaïdtedi Nuquin Papa chuïnuna. —  
Ēbi nashunquin utsibotsen nashunta, Papa. Aden nashunec mibi bēdambo  
iquec, Papa —quequin Nuquin Papa chuïnuna. <sup>7</sup> Aden nuqui chiac  
aïdëmbi nuqui bēdambo icmec dacuēdenquio icnuc. Adoac bēdambo icnuc  
utsibo: —¿Mitsipadec dacuēdenquio yampash? —quetsiash. Nuquitsen: —  
¿Mitsipadequini bēdambo yampo? —quetsiac. Adec: —Nuquin Papan ëbi



nashunquidquio nec —quequin Nuquin Papa chianequin Esus tantiaqueic nuqui dacuēdenquio yec bēdamboec tabadtsiac.

*Bēdamboshē iquec, caiduidi tantiata, quiaid*

<sup>8</sup> Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Ttsutsi bēdamboec tabadquid icpec? Adquidtsen tantiata. Aden: —Bēdambo iquec —caidtedi tantiata. <sup>9</sup> Adembidi ěmbi chuisho mimbi tantiondac. Aden ěmbi chiondaid tantiaquin ěmbi naondacpadomboen nata. Adsho isash mibi dacuēdenquio icmequid Nuquin Papa mibēd iquendac.

*Pidipos yacnocquidon bēmiaid*

<sup>10</sup> Nēbi mimbi bēmiaid bedash bēdambo iquebi. Ęnden mimbi aden menianiondashumbic yuectaneshun nēbi ěbi tantiaquin mimbi meneoaid bēacsho bedombi. —Nuquin Icbon tantiacpadomboen padpiden Pidipos yacnocquidon ěbi ma menuequin piucquid bēmiac —quiash bēdambo iquebi. ¿Ěbi tantienquioda mimbi ictionda? Ěbi tantiaquin ěnden bēmetiadquidi tsundan bētiambo icnuc mibi nepanēdac. <sup>11</sup> —Con na nibēdeque. Beccho —¿quectabi ique? Padenquio. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. <sup>12</sup> Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. <sup>13</sup> ¿Ěbenquiodabi adti? Padenquio. Esusēn namiaquini adquio iquec. Aidēmbi namiac ambi chiacpadomboen naimbi. <sup>14</sup> Adnuc: —“Mēyadec,” quiosh —qeshun mimbi ěbi ma menuequin bēmiaid bēdambo iquec.

<sup>15</sup> Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquio iccondashi. Adnubi tauamboen menequin mimbiuidtsēqui ěbi meniondac. Esus tantiabentsēcshun mimbi adondac. <sup>16</sup> Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —qeshun mimbi piucquid bēmiaccondac. Yuectaneshun adembidi. Adshumbic padpiden. <sup>17</sup> —Mimbi bēmiaid bēdambo iqueque. Utsi beccho —¿quequindambi aden chuipe? Padenquio. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. <sup>18</sup> Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ěbi bunaid dēniaquec con na dadpenquio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. <sup>19</sup> Abitedishunquio Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquio nec. ¿Ada mitsana nibēdnuc mēyadac bimboec tabadpe? Adec mēyadsho isun Nuquin Papan mitsana icmendac. Unēsquio icsho aidēmbi mibi bēdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenquio iquendac. —Aid nibēdnuc unēsebi —mimbi caid Nuquin Papan icmendac. <sup>20</sup> Ěbi adsho tantiaashun: —Bēdamboshē mibi iquec, Papa —quequin Nuquin Papa chuinuna ěnenquio icquin.

*Pabodon ěnquimbi chiaid*

<sup>21</sup> Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. <sup>22</sup> Adembidi nēmbi Doma yacnoshon Esus tantiaquido abitedishun mibi tantiec. Chuiquid dapa

Sesad caidēn shubun icquido Esus tantiaquido icquin adembidi mibi tantiec.  
<sup>23</sup> Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa—quequin Nuquin Papa chianembi. Padi. Aidedi chuiquin dada uaombi.

## CODOSAS YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. <sup>2</sup> Aidhëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdamboquid icmebanaid nebi, quequin tantiec mibitedi Codosas yacnocquido adquec ma mibi tabadpanuna. Adechidi, Nuquin Papabëd icquido nebi, quequin tantiec ma tabadpanuna.

### *Nuquin Papa chuidoniaid*

<sup>3-4</sup> Nuquin Papa, Nuquin Icho Esuquidistun Papa chiec nadec onquebi. Bëdamboquid icquin mibipadquiocnoc Codosas yacnocquido Esuquidistu tantiaquido bëdamboquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yansho. Adquid yanshun Esuquidistu tantiaquid utsibo bëdamboen tantiec, quequin chuisho tantias bëdambo iquebi, Papa, quequin mibitedi tantiec Nuquin Papa chiec onquedenebi. <sup>5</sup> Esuquidistu Nuquin Papa yacno yuedanquid nec, quequin, Nuquin Papan chïaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. <sup>6</sup> Ëbi icsaid cuidtiadtsëcquo Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquo yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembi ismebanoaic. Adoac nïdaid utsin-utsinquiec tabadquidon Esuquidistu tantiashun adomboembidi ismebanoaic. <sup>7</sup> Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquo nec. <sup>8</sup> Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

<sup>9</sup> Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiapadomboen min Mayanën pausunacsho Codosas yacnocquido bëdamboen tantiam, Papa, quequin chian-chianembi. <sup>10</sup> Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquo utsi iquendac. Adec tabadquido mibi tantiadonequido yanendac, Papa. <sup>11</sup> Adembi mimbi dayacquo icmenu caid Codosas yacnocquido iquec natiatquid icnuc aido chïeshenquo yec abi tantiec mibi nidendac. Aden chïeshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. <sup>12</sup> Mimbi bëdamboquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

13 Ënden adquidpenquoio yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mënchicpundash. Aden nuqui mënchicquin abi cudasaidquoio aton Madombo Esuquidistu icsaisapadquid nuqui icmenuequin aids Nuquin Papan nuqui tantiampondash. 14 Abipadquid icmenuec matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquoio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

*Abia yampidquoio iquec abitedishun icbombo Esuquidistu nec quiaid*

15 Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. 16 Nidaid abubëdtabi uashun aidënquicquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquoio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. 17 Esuquidistu abia yampidquoio iquec. Aidëmbi, Ëmbi uabanaido namebanu, quequin ambi chiacpadomboen namebanec. 18 Nidaid utsi-utsiec yacnocquido abi tantiec iccuededquidtedi chuiquidquoio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash. 19 Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquoio con mado nec, quiash, Bëdambo iquebi, quec Nuquin Papa tsadec. 20 Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cuستن dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

21 Ënden Nuquin Papan matsespenquoio mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac. 22 Adquid icboedi, Ëbi yacno yuednu queshun Esuquidistu tantiaquidotedi cuidenquoio yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec. 23 Ënenquicquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquicquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

*Esuquidistu tantiadoneta, quequin Pabardon chuibanaid*

24 Ëbi tantiaquid Nuquin Papan bëdamboen isendac. Aden isac, Ëbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoalui, Cuishon, quebi. Ënden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuioapondashi. Aden aidën chiondacpaden mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc. 25 Ai, Nuquin Papan, Esuquidistu ambi naidbëdta chuibeneta, caidquoio nebi. Abi chuiquidquoio nebi. 26 Nuquin Papan ambi tantiampicpaden chienquicochoed nëbi aid tantiamiac Esuquidistu

tantiaquido yanec. <sup>27</sup> Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

<sup>28</sup> Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun. <sup>29</sup> Badiadquidën-badiadquidënquien aton Mayanën nadatiambocquien nac natiatquid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

## 2

<sup>1</sup> Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. <sup>2-3</sup> Esuquidistu tantiadonequido ma yampanueshun dayacquiocquin chuibenec nebi. Abentsëc yacimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bëdamboen tantiapanuna. Adembidi, abimbo chiacimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. <sup>4</sup> Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. <sup>5</sup> Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

*Esuquidistu tantiaquid iquec utsin chiacpaden naic abuc nidendabi, quequin tantienda.*

<sup>6</sup> Adechidi Esuquidistu tantiaquid yec abëd icquido iquec, Aidi con Icho nec, quec ambi chiacpadquiec tabadteneta. <sup>7</sup> Adec tabadquin cuëte tapun uguëduccuicquidën cuëte uidënash canidoacimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin baded-badedquien Esuquidistu chuidoneta. <sup>8</sup> Adembidi aid tantiadonequid icquin aid tantiesan ëndenquio ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chiesa nec, quequin tantiaquiota.

<sup>9</sup> Matsesash Nuquin Papapadquidquibidi Esuquidistu icpanëdash. <sup>10</sup> Esuquidistubëd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibëd icquid Esuquidistu nec. <sup>11</sup> Aidën, Èbëd icquid nec, quequin mimbi tantiaid icsa cuëte cuidi pateshuniacimboen mibi ëmebanec. Chështen tiacimboen nainquiocquin bëdamboen tantiamequin aton Mayanën mibi icsaid ëmendac. <sup>12</sup> Adembidi Esuquidistu unësascho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincumenëdachimboecnuc icsaisa icmenu, quequin acten mentotanquin mibitedi cadobampondash.

13 Ènden Nuquin Papan matsespenquo icquin mimbi tantiaid icsa icnuc unèsacimboec icquin Nuquin Papan ènden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobèd icquido nec, quec Nuquin Papa nauqui icsaidtedi bèpiscudac. 14 Ènden, Matses icsaid bèpiscudnu, quenquiocquin, èmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanèdash. Adquid icshobi icsaquidbimboecnuc matsesèn unès uaquin cuesten dectanac matses icsaidtedi bedshunash abibi cuidadec unèsapanèdash. Aid unèsò isun, Matses icsaid cuidosh, quequin abi tantiaquidquìo icsaid ambi naden nata quequin dada uamiaid ucacimboen tantiec bèpiscudtenec Nuquin Papa. 15 Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unèsash uincuenquìn Nuquin Papan chiaid niacquido mayan icsabo dèniaquec Esuquidistu abitedi chuiquid yampanèdash. Aden dèniacshun, Nèidtedi èbi tantiaquido chuiquid ictiapimbo iquec, quequin bedshun mètaneshun buanacimboen Nuquin Papa Esuquidistun ismepanèdash.

16 Aden chuiquid utsitedi dèniacquid Esuquidistu nec, quequin tantias, Nadquid peshun nadquid utsi acsho Nuquin Papan èbi bèdamboen isec, quenda. Adembidi, Nèid ushèmbi abi tantiec iccuededsho isun Nuquin Papan èbi bèdamboen isec, quenda. Adembidi, ushè chuca choaid usudsho isec cuèdèsho Nuquin Papan èbi bèdamboen isendac, quequin tantienda. Esuquidistuidi tantiaquidquìo icsho Nuquin Papan èbi bèdamboen isec, quequin tantiata. 17 Matses icsaquid yec ambi naidènquo abembi bèdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Èmbi bèdamboen isaidquìo matses bèdambo icmequid choendac, quequin tantiaquin ambi naden nata quequin chiaidba Moises menepampic. 18 Esuquidistun bèdambo icmiaid nebi, qeshun utsi icsamboen chiec onqesho tantienda. Ambibi chiec onqesho tantiasun Esuquidistu tantesa uaindac. Adquidbèd Esuquidistu ictiapimbo iquendac. Adquidèn, Mibi chuiquidpenquo nebi, qeshumbic ambia tantiaquidbimboecquin ambi tantiaid Nuquin Papan uaid mayan bèda mibi tantiamenuequin chuibancho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onqesho tantienda. 19 Adquidèn Esuquidistu abi tantiaquidon icombo nec, quequin tantienquo iquec. Adecbidi Nuquin Papan tantiaquidquìe Esuquidistu tantiaquid dadpen yanash aton utsibobèd tantiananec nashunanec aton icbopadquid yanec, quequin tantiesa adquid nendac.

20 Tantanu. Èbi chui. ¿Atotsi quias Esuquidistu tantiaquid yanash èbi icsaid cuidnuec Esuquidistudèd unèsash uincuenacimboec bèdamboec tabadebi, qeshumbic, 21 Nèid bedtemaid nec. Aid bedsho mayanèn mibi cuidendac, quequin utsi chuisho mimbi tantiapè? Adembidi ¿atotsieshun mimbi tantiaid icsa unèsacsho chococabi yacimboen, Nèid petemaid nec. Aid pesho mibi cuidendac, qesho mimbi tantiapè? Aden Esuquidistu tantienquo icquidèmbimboen, Nèid mishtemaid nec. Aid misho mibi cuidendac, qesho mimbi tantiapèc. 22 Nadquid petemaid nec. Nadquid mishtemaid nec, quequin matsesèn ambibi chuiquin tantiamete nec. Ambibi petemaidbèdi ambi mishtemaid ènèdendac. 23 Matsesèn bèdamboen tantiacimboen chiaid aidtedi nec. Nèid èmbi tantiaid nec, qeshun aid bèdamboen ismenuen naden nanuna, quequin matsesèn chiec. Aden ambibi tantiasun, Naden nata, quequin mibi chuitiapimbo iquebi, qeshumbic namenuquin comapenen adquidèn chuibanec. Adecbidi, Damèyamèdsho èmbi

tantiaidën ëbi bëdamboen istsiash, quequin ambibi tantiash damëyamëdec. Adec damëyamë-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

### 3

#### *Bëdamboec tabadaid chiaid*

<sup>1</sup> Esuquidistu tantiaquid yec abia uincuemenëdac abuc nidash Nuquin Papa yacno icsate bunquid nibëdacno tabadacpadquiec tabadteneta. Adec tabadec, Nuquin Papan dayunquio Esuquidistu tsadec bëdambo iquec, quequin abëd icte bunquin Esuquidistu tantiadonec tabadta. <sup>2</sup> Abuc abëdi ëbi icnuc aton na con na iquendac, quequin tantiaquin nidaidënshun bednu, quequinuidi tantienda. <sup>3</sup> Esuquidistu unësaid tantiaquin aidbëdtabi mibi icsaid chococashunac bimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Ëbi tantiaquidtedi bëdaidquio iquec. Aido ëbi cudasaidquio nec, quequin aidën dayun uaid nuqui nec. <sup>4</sup> Aidën padpidec choshon abi yacno buanac abipadquidquio bëdaidquio nuqui iquendac.

<sup>5</sup> Adec abi yacnoësh abëdi bëdaidquio iquendabi, quequin mibi icsaidtedi cuesun secac bimboen ëmbanta. Ëmbi inacmaid chudnu, quenquiocquin ënta dadan. Adembidi, Ëbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Ëmbia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaid bimboecnuc matsesën ambibi nacenaid tantiac bimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. <sup>6</sup> Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. <sup>7</sup> Adquid icboedi <sup>8</sup> nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiadquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. <sup>9</sup> Adecbidi, mua uanamboedi ënëdta. Adquid icboedëmbi icsactsëcquid niac bimboen mibi icsaid ënta. <sup>10</sup> Min tantiate chuca uac bimboecnuc abi tantiadonequidquio icnuequin mibi tantiamequid tantiadeditantiadedita. <sup>11</sup> Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembonec nec, quequin tantiesha mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesha mibi neoaic. Adecbidi, Nëid chotac nec. Nëidic mayu nec, quequin tantiesha mibi neoaic. Adecbidi, Nëid yua nec. Nëidic yuaquid nec, quequin tantiesha mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

<sup>12</sup> Aden Nuquin Papan cuënaido yec ambi bëdamboequid icmebanaidobi abi cudasaido yec ambi tantiamiaid nebi, quia sh bëdamboequid isadac bimboec nadec tabadteneta. Utsibo natiamiaid icsho isun bëdambo icmenuequin nashumbanta. Adecbidi, Mimbia bedan bedembi, comaqid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bëdamboen chuiban. Tantesha uasho isun ismeded-ismededita.

<sup>13</sup> Mimbi nacpadomboen utsibon natiapimbocsho isun, Padi, quenquiocquin abi tantiameban. Adecbidi utsin mibi icsamboen nasho isash cuidnannenquo yec bēpiscudta. Nuquin Papa ēbi icsaid cuidenquo yec bēpiscudosh, quec adta. <sup>14</sup> Adec tabadtenec tantiantana. Adec tantiananec Esuquidistubēd abentsēc yac bimboec icsaisa mibitedi yanendac.

<sup>15</sup> Adec Esuquidistubēd abentsēc yac bimboecnuc icmiaid nebi, quequin tantiec bēdamboec tabadtenenu, quec mibitedi tabadteneta. Adec tabadtenequin, Mibi bēdambo iquec, Papa, quequin chuideneta. <sup>16</sup> Nuquin Papan Esuquidistu tantiadonemiaido icta. Adquido yec abi tantiaquid utsibobēd Esuquidistu chuinanec, Bēdamboec tabadta, quec adquiecbidi tabadec ismenanta. Aden naic chuiquid dapa Dabidēn dada uampid sadmo caidbēdta cuēdēnte utsi Nuquin Papan mibi bēdambo icmiaidbēdtabi ambi naid utsi chiec cuēdēncuededta. <sup>17</sup> Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bēdambo iquebi, Papa, quequin Nuquin Papa chuideneta.

#### *Aton shubun icquidbēd tabadaid*

<sup>18</sup> Bēdamboec tabadnu, qeshun nadota. Chidon min bēnēn chiacpadomboen nabanta. Esuquidistu tantiaquid icquin adobanta.

<sup>19</sup> Chido inquidēn, Con bēnēbēd tabadec bēdambo iquebi, camenuen yuac bimboecquin aid chuiquin min chido namenda. Mibibi tantiadquinuidi min chido namenda.

<sup>20</sup> Bacuēbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bēdambo iquebi, quependac Nuquin Papa.

<sup>21</sup> Anibēdtan min bacuēbo namenuc comapenen cuēdquin chieshmenda.

<sup>22</sup> Yuan mibi yuaquidēn chiacpadomboen nabanta. Aidēn aden chuishun isnuc adobanta. Aden chuishun min ichon isenquiocnoc adomboembidi nabanta. Aden nabansho mibi bēdamboen isendac. Nuquin Icho, Esuquidistu tantiaquid nebi, qeshun adobanta. <sup>23</sup> Con Icho Esuquidistu nashunu, quiac bimboen mibi yuaquidēn chiacpadomboen chieshenquiocquin bēdamboen nabanta. <sup>24</sup> Con Icho Esuquidistun abi yacno ēbi nidacsho isun ēmbi bēdamboen nabanaid cuidquin ambi ismiambo yaid menendabi, quequin tantiaquin adobanta. Nidaidēnshun abi nashunquid mibi neque. Adobanta. <sup>25</sup> Min ichon chiacpadomboen nata. Abi chieshēnquid ichon cuidendac. Adembidi Nuquin Papan Esuquidistu tantiaquid nebi, qesho abi chieshēnesa mēnequin bēdamboen cuidendac. Abi chieshēnquid menenquiocquin comapenen cuidendac. Adenuidi tantiaquin cuidendac.

## 4

<sup>1</sup> Yuanquidēn, mimbi yuaido ambi nabanacpaden bēdamboen mēnebanta. Abuc con Icbombo iquec, quequin tantiaquin mimbi yuaido bēdamboen mēnebanta.

#### *Chuibanaid utsi*

<sup>2</sup> Esuquidistu tantiaquid utsibo natiatequidbēd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ēbi tantiaquin nabanaid tantiec bēdambo iquebi, Papa, quequin Nuquin Papa chuideneta. <sup>3</sup> Adecbidi ēbipadquid utsibobēdta ēbi tantiec Nuquin Papa chiec onqueta. Mimbi chienquicnēdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Ēbi chuibeneta, cac aid chuibenesho



bedshun mētaniaid nebi. <sup>4</sup> Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. <sup>5</sup> Esuquidistu tantiesan ëbi tabadaid istenec, quequin tantiec bēdamboec tabadteneta. Adec tabadquin Esuquidistu tantiesatsen tantiamenuquin Esuquidistu chuideneta. <sup>6</sup> ¿Mitsicquid mimbi tantiaid ipcec? quetsiash tantiesa. Adsho tantiashun mibi onquaidbēd sa batambo iquec daēdacimboecnuc Esuquidistu mimbi tantiaid utsibo chuita ma aidon tantiapanu qeshun.

### *Abēd icquid chuibanaid*

<sup>7</sup> Nēbi ēbēd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquo icsho ëmbi con utsi caid nec. Aidi Nuquin Icho nashunquid neoaic. <sup>8</sup> Ēbēd icquid utsibo naic tabadaid mibitedi tantiamenuquin aidi mibi yacno nidmimbi. Adoac mibi yacno nidash puduedshun ëbi naic tabadaidbēdtabi Nuquin Papan chiaid chuibanac mibitedi ëbi tantiec unēsquicoeboedi cuishon queta. <sup>9</sup> Onesimobēd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquicquin ëbi nashunquid nec. Aid daēdshun ēbēd icquidon nabamboed mibitedi chuibanendac.

<sup>10</sup> Nēbi mibi yacno nidesa chuinu. Tantiata. Adistadico ēbēd icnuec abembi quēnēn nauedadondaid nec. Aidēmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosēn chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. <sup>11</sup> Esus cashumbic Ustus caidēn, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsēqui isadaidbo nec. Aidon ēbēdtambi Esuquidistu chuibanquin ëbi bēdambo icmequido neoaic. <sup>12</sup> Epapadas mibi yacnoshon tishaid Esuquidistu chuibanquidquo nec. Aidēmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuquid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidēnbadiadquidēnquiec Nuquin Papa chiec onquec Epapadas. <sup>13</sup> Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quiash mibitedi chiec onquedenec. <sup>14</sup> Adembidi Ducasēn dauēchoquidēn Demasbēdtan, Codosas yacnocquido tantiec tabadebi, quequin chiacpadomboen dada uaimbi.

<sup>15</sup> Codosas yacnocquidon nēid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuēmēdquidēn shubun Esuquidistu tantiec iccuededquido chuioata. <sup>16</sup> Adembidi, nēid ëmbi dada uaid isec onquequin mibēd iccuededquido tantiameshun Daudiseya yacno iccuededquido tsusiobo mēnequin, Nēid Pabadoen dada uaid isec onquequin mibēd iccuededquido tantiamēoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqueshun mibēd iccuededquido tantiamēoa.

<sup>17</sup> Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

<sup>18</sup> Mibitedi tantiaquin ēmbi nēid dada uaombique. Ēbi tantiec nidtipimbo yec Pabado quēnēn tsadeque. Aid puduemeta, Papa, quequin Nuquin Papa chiec onquedeneta. Nuquin Papan ma mibitedi bēdamboen ispanu, quec tsadebi.

Padi. Aidtedi dada uaombi.

# TESADONICA YACNOCQUIDON ISTE 1

## *Pabodon tauamboen chiaid*

<sup>1</sup> Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icho Esus tantiaquido mibi chuiquin dada uaic nebi. — Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

## *Tesadonica yacnocquidon Esus tantiaid*

<sup>2</sup> Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. <sup>3</sup> “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. <sup>4</sup> Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. <sup>5</sup> Ambembi chiaid chienquo icquin Esusēn naid mibi chuibanon-dambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonodac. Adembidi Esus tantiamenuec Sidbanochodobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. <sup>6</sup> Aden Nuquin Papan Esus tantiamiaido yec ēbi Nuquin Icho yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. <sup>7</sup> Adec mibi bēdamboec tabadaid chuisho tantiaish min nidaidēn icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembidi tantiaish nēid nidaid Acaya caid yacno tabadquidotsen adtiadquo icpac caosh. <sup>8</sup> ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiaishun: —Tantiaish —qeshun nēmo icquido mimbi naid chienquo iccombi. <sup>9</sup> Mimbi naid naden chuisho tantiombi. —Pabado chedon Esus chuibansho tantiaish: “Nuquin Papapadquid utsi nibēdec,” qeshun Nuquin Papabēdta Esus tantiabēnac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquo yanac caosh —quequin chioshi. <sup>10</sup> Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided cuidadec unēsacsho Nuquin Papan uincuemaiid Esus choec,” qeshun aid istiadquo iquec —quequin mimbi naid chioshi.

## 2

## *Pabodon bēdamboen chuibanonaid*

<sup>1</sup> Mibi yacnoshon tauamboen ěmbi chuibanac Esus tantiaquid yanshun mibitsen utsibo Esus chuibanondac. <sup>2</sup> Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac

mibi yacno nidshun Esusën naid mibi chuibanondambi. Utsibo dadpeshun chieshënubi Nuquin Papan namiacpadomboen cuesambo icquin mibi Esus chuibanondambi. <sup>3</sup> ¿Ëmbi naidquoio namenuendambi adodionda? Padenquoio. ¿Ëbi tantiamenuendambi chuibandionda? Mambi padenquoio iccondac. ¿Ambembi chiaidtambi mibi chuibandionda? <sup>4</sup> Mambi mibi abimbo chuibampondac. Matsesën naidtedi tantiaquidënquoio Nuquin Papan: —Aidën abimbo chuibantsiashe. Con Mado Esusën naid chuibenequid icmenu —caidquoio nebi. Adquid yec matses: —Mibi bédambo iquec —cameteuidi bunenquoio iquebi. Nuquin Papa: —Mibi bédambo iquec —camenuembimbi ambi chiacpadomboen naic. <sup>5</sup> Ëmbi tantiacpadomboen mibi namenuc: —Mibi bédambo iquec —quenquoio iccondabi. Min piucquid bednuen muaquin chiambo iccondambi. Nuquin Papan isubi abimbo chiondambi. <sup>6</sup> ¿—Pabado bédambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bédamboen chuibanondac.

<sup>7</sup> —Ëbi chuibeneta —Esuquidistun caidquoio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquoio iccondac. Anin bacuë nëishmenquoio icquin bédamboen namiacbimboembimbi nëishmenquoio icquin mibi chuibanondac. <sup>8</sup> Mibi tantiaquioquin chieshtoenquoio icquin Esusën naid chuibanec yec mibéd tabadondabi. Aden naic tabadec bédambo iccondabi. <sup>9</sup> ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoadteniondabi. Mimbis isubi adondabi.

<sup>10</sup> Mibéd yec Nuquin Papan chiaid niaquenquoio yec bédamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanédashi. <sup>11</sup> Amën aton mado: —Naden na —quequin nëishmenquoio icquin chiacbimboen mibi abentse-abentsen bédamboen chuibanquin <sup>12</sup> mibi bédambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bédamboec tabadquid neque. Ambi chiaid niaquenquoio yec bédamboec tabadnuna —mibitedi cadeniondambi.

<sup>13</sup> Aden Nuquin Papan chiaidquoio chuibanac: —¿Ambembida chuidiosh? Nuquin Papan chiaidquoio ma Pabado chuibo —mibi quianondac. Aden Nuquin Papan chiaidquoio tantiash Esus tantiaquido yanash aidquibidi chuisho tantiash mibi bédambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bédamboen tabadmequid yec mibi bédamboshë iquec, Papa —quequin Nuquin Papa chianembi. <sup>14</sup> Nidaid Udeya caid yacnocquido yacpadquiec chieshtoenquoio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquoio icquin chieshënac chieshtoenquoio iccondash. Adomboembidi aid matses mibi yacno tabadquin chieshënac mibi chieshtoenquoio iccondac. <sup>15</sup> Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unës uapac caondash. Adomboembidi chieshënquin mibi yacnoshon cuemepondashi. Aden Nuquin Papa chieshënquinc matses abitedi chieshënquinc caquin <sup>16</sup> isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bédamboen isquin mibi cuidenquoio iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquoio icquin niac-niacsho Nuquin Papan aido cuidquendac.

*Pabado istante bunaid*

<sup>17</sup> ¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquo icnuc mibi istantiadquo iccondabi. <sup>18</sup> Adec: —Padpiden istanu —quesho Satanasēn nac padenquo iccondabi. Padpidec: —Nidnu —quesho ademibidi. Padpidec: —Nidnu —quesho Satanasēn nacbidi padenquo iccondabi. Nēbi adecbidi mibi istantiadquo iquebi. <sup>19</sup> Nuquin Icbo Esuquidistu choan aibdēd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ēmbi chuibanac Esus tantiahenondaido neque —capatsia? Mibibimbi caic. <sup>20</sup> —Esus tantiec bēdamboec tabadosh —quesho tantiahs mibi tantiec cuishonquebi. Ademibidi mimbi naid isun: —Mimbi bēdamboen naondac. Mimbi chuibanac ēbi tantiahenondash —ēbi caindac Nuquin Icbon.

**3***Istan, quequin Timoteyo chiaid*

<sup>1</sup> Aden mibi tantiec: —“¿Mitsipadec tabadpec?” quequiditdsēqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ēbēd icquid utsi Sidbano chuiquin: —Timoteyo nidan nuquiditdsēqui icnuna —caondambi. <sup>2</sup> Ēmbi: —Nid —caondaid Timoteyo Esus tantiaquid yec nuquin utsi nec. Ēbēdan Esus chuibeneguidquo nec. Adquid icsho nadopondambi. —Tesadonica yacno nidshun Esus bēdamboen chuibanatan. Ademibidi: “Esus tantiec chieshtoenquo yec nadquec tabadquid nendac,” quequin bēdamboec tabadquin ismetan, Timoteyo. <sup>3</sup> Aton matēsēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiapadomboen Esus tantiaquid chieshēnendac —quequin mibi chiondambi. <sup>4</sup> Aden mibēd icquin chuideniondambi. Adsho ēmbi chiacpadomboen nuqui chieshēnondash. <sup>5</sup> —“Ēbi nidan chieshēnac ¿adecbidida Tesadonica yacnocquido chieshtoenquo icpatsiashba?” quequiditdsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ¿Ada ēmbi Esus chuibanondaido bēdamboec tabadeque? —caondambi Timoteyo chuiquin.

*Timoteyon chuituidaid*

<sup>6</sup> Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chēdo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Ademibidi mibi istantiadquo iquebi. <sup>7</sup> Timoteyon chuiboed tantiahs bēdambo yanobi. Nēmbo icquidon chieshēnac shubiantiadtsēcquid iccobi. Adboedi mibi caic: —Chieshtoenquo icquin Esus tantiosh —quesho tantiahs bēdambo yanobi. <sup>8</sup> Mimbi aden naid tantiahs dayacquio yacsimboec iquebi. <sup>9</sup> Aden tantiahsun Nuquin Papa chianembi naden. —“Tesadonica yacnocquido bēdambo iccosh,” quesho tantiahs cuishonquebi, Papa. Mimbiditdsēqui namiac chieshtoenquo iquec. Aden namec mibi bēdamboeshē iquec, Papa. <sup>10</sup> Aido istiadquo iquebi. Mimbi chiaid bēdiactsēc tantiahsō aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

11 —Nuquin Icho Esusbëdtan Nuquin Papan nëbimbobi ambo nidmepashuni —caimbi. 12 Adec mibëd ictiadquo icquin Nuquin Papa mibi chianembi. —Ëmbi aido tantiaquiapadomboen utsibobëd tantianameta, Papa. Bëdiactsëc tantianantsëcboedobi comapenec tantianamequiota, Papa. Adembidi utsibotsen bëdamboen ismeta. 13 Aden bëdamboec tabadquid icmeta, Papa. Mimi adoac chieshtoenuio yec bëdamboec tabadtsiash. Adsho mimi mibi yacnoshon uaido mayan bëdabobëd nidaidën padpidec choshon con Icho Esusën: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimi ictsiac, Papa —quequin Nuquin Papa chianembi mibi chuiquin.

## 4

### *Chidobëd bëdamboec tabadte chiaid*

1 Tanta, con utsibo. Chiaid utsitsen mibi chuinu. —“Bëdambo mibi iquec.” Nuquin Papa camenuc bëdamboec tabadta —quequin ëmbi chiondacadquieci tabadta. Nuquin Icho Esus tantiaquieci adta. —Bëdamboec tabadsho —quesho tantiasun: —Adquiequi tabadta —caimbi mibi. 2 Nuquin Icho Esusën namiac aidën chiaidquo mibi chuibanondambique. Aid tantiaquieci bëdamboec tabadta. 3 Nuquin Papan tantiamiacpadquieci tabadquidën nadoquid yendac. Utsin chido chudenguio icquin aton chidoudtsëqui chudquid yendac. Adembidi chidon dada utsi chudmenquo icquin aton bënëuidtsëqui chudmequid yendac. 4 Adec Nuquin Papan chiaid niaquenguio yec abi bunaid mëmunec dada ambi inaidquo aton chidoudtsëqui chudec aidbëd bëdamboec tabadsho: —Bëdambo iquec —catsiash Nuquin Papan. 5 Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesaci icquin chidon utsin shui bunquin aton bënëpenquo chudmendac. Adec tabadenda. 6 Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacadpadomboen. 7 —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquo. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. 8 Aden chuiquin aton Mayan nuqui meneguidën Nuquin Papan chiaid chiec nebi. Aden ëmbi chuiboed niacquin Nuquin Papan chiaidquo mimi niactsiac.

### *Adecbidi tantiananquiota, quequin chiaid*

9 —Bëdamboec tantiananta —quequin padpiden chienquo iqumbi. Nuquin Papan tantiamiac Esus tantiaquido yec mibi tantiananec. 10 Min nidaid Masedonia caidën tabadquido Esus tantiaquido utsibotedi mimi tantiec. Mibi yacpadquiecbidi tantiananquiouquin utsibotsen tantiaquiota. 11 Ëmbi chiondacadquieci chieshëmënenquo yec bëdamboec tabadta. Utsi icsaiduidi chienquo yec bëdamboec tabad. Chieshenquo yec dayacquo yec chonoada. 12 Adash bunenquo mibi ictsiac. —Con na nacenambo iccombique. Mitsana beccho —mibi quenguio ictsiac. Mibi adquo icsho isash Esus tantiesabo: —Esus tantiaquido bëdamboec tabadec —quetsiash.

### *Esusën abi yacno abi tantiaquido buante chiaid*

13 Tanta, con utsibo. —“Esusën abi tantiaquido uincuemendac,” quequin chuisho mimi tantiabi icnushe —queshun mibi bëdamboen chuinu. Esus tantiesabo: —Ëmbi tantiaidquo padpidec isadenquo iquec —quec yuecquo shubiabimboec shubienda. —Ëbipadquid Esus tantiaquid Nuquin Papa

yacno istuidendambi —quec ma yuecquio shubianenquio icnueshun Esusën uincuemete mibi chuinu. <sup>14</sup>—Unës uaqui Esus uincuenacpadecebidi nuquit-sen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantiec. <sup>15</sup>Tantia. Nuquin Icho Esusën chiaidquio mibi chuinu. Nuquin Icho Esus nidaidën padpidec chonoc aid istuidéc Esus tantiaquido unësabi icquido abia nidenquio iguendac. <sup>16</sup>Padenquio icnubien Nuquin Papa yacnuësh choec Nuquin Icho Esusba nua cuëdtuidendac. Adnubien Nuquin Papan abi yacnoshon uaido mayan bédabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uaquin uincuemendac. <sup>17</sup>Adoquien aidobëdi Esus tantiaquido unësabi icquido tsidadash aidotedi abuctoendac Nuquin Papabéd tabadec nidec. Abitedi abuctoquimbi abi bëquedec Esus chosho istuidendac. Adash Esusbéd Nuquin Papa yacno nidash anobi nuqui quenenendac. <sup>18</sup>Ëbi adsho tantiaahun nadota. Aton matses unësaid tantiec shubiquido bédambo icmenuen ëmbi chuibod chuita.

## 5

### *Esus chote chiaid*

<sup>1</sup> Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Ademibidi: —Nëidted seta matamiash choec —quequin dada uatiapimbo iquebi. Tantienuio iquembi. Naden mibi chiondambi. <sup>2</sup>—“Nëid inchëshëmbi ampequid choec,” quequin tantiatiapimbo yacnimboec: “Aid ushën Nuquin Icho choec,” quequin tantiatiapimbo icnu Esus choaindac —quequin mibi chiondambi. <sup>3</sup> Esus tantienquio yequi matses dadpen: —Cüesnanenquio yec nuqui bédamboec tabadec —qeshobien ambi: —Ëbi cuidendac —cacmaidënquio padpidec choshon cuidquiendac. ¿Mitsipadquio chido bacuë usunquid icpec? —Aid ushënquio tishembi —quequin tantiatiapimbo yequi badedquio nëncuenec. Adecbidi ambi: —Choec —cacmaid Esus badedquio chosho abi tantiesaben cuenëntiapimbo iguendac. <sup>4</sup> ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquio iguendac. <sup>5</sup> ¿Pacuënédacnimboecquidoda nuqui nedi? Padenquio. Pabiäte paposhuacnimboecnu Esus bédamboen tantiamiaido yec bédamboec tabadquid ma nuqui neyoc. Adecbidi bédamboec tabadnuna. <sup>6</sup> Ushquin pabiäten tantienquio yacnimboen utsibon Nuquin Icho Esus tantienquio iquec. Adec tabadenquio icnuna. —Esus tantienquio icmane —qeshun nuqui icsate bunaid nainquio icquin mëmununa. Nuquin Icho chosho istiadquio yec bédamboec tabadnuna. <sup>7</sup> Esus tantiesaboen inchëshën ushquin tantienquio yacnimboec iquec. Adquiecbidi tantiadenuen acte paëmbo icquid acquido nec. <sup>8</sup> Adquidpenquio yec Esus tantiaquido yec bédamboec tabadnuna. Nuqui icsate bunaid nainquio icquin mëmununa. Sondado: —Shocosh tsasimbo icquid shictonquenu. Sicsenushe —quiacnimboec icnuna. Satanasën Esus tantiamenquio icnushe. Esus tantiaquioquin matsetsen tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacnimboecbidi icnuna. Satanasën icsamboen tantiamequin chieshtomenushe. —Esus tantiaشو cuidenquio icquin Nuquin Papan abi yacno ëbi tabadmendac —quequin bédamboen tantianuna. <sup>9</sup> ¿Cuidnuenda Nuquin Papan nuqui Esus tantiamediac? Padenquio. Abëdi tabadmenuen Nuquin Icho Esuquidistu nuqui

tantiamic. <sup>10</sup> Aidi abi tantiaquid cuidmenquo icnuec abided cuidadec unēsac caondash. Aidēn padpidec choshon abi tantiaquidotedi buanshun abēdi tabadmendac. Unēsaid uincuemiaidobēdta unēsabi icquidotedi adoendac. <sup>11</sup> Ēbi adsho tantiashun mimbi nabocpadomboembidi Esus tantiec bēdambo icnuec ěmbi chuiboed chuinanquiota. Adecbidi bēdamboec tabadec: —Adequi tabadnuna —cananta.

### *Bēdamboec tabadte Pabodon chiaid*

<sup>12</sup> Esus mibi chuibanquido bēdamboen ista. —Nuquin Icbon chiacpadomboen chieshtoenquo icquin nuqui chuiquidēn nuqui bēdamboen chuibanec —quequin aido bēdamboen tantiata. Mibi nashunquidombo neque. Aidon: —Nuquin Papan chiaid niaquenquo yec bēdamboec tabadnuna —quequin chuisho bēdamboen tantiata. <sup>13</sup> —Nuquin Papan chiaid bēdamboen tantiaguidombo nec —quequin bēdamboen ista. Adec chieshēmēnenquo yec bēdamboec tabadta. <sup>14</sup> Mibēd icquido naden chuiban. Chieshquid icsho: —Mibitsen chooadta —cata. Dacuēdsho: —Dacuēdenda —cata. Esus bēdiactšec tantiatsēcsho bēdamboen chuiquin Esus tantiamequiota. Dada padishquo icsho nashunta. Aden nēishenquo icquin abitedi bēdamboen ista. <sup>15</sup> Utsin chieshēnac cuidnanenquo yec bēdamboec tabadta. Mibēdtan Esus tantiaguidobēd bēdamboec isnanquin utsibotsen bēdamboen ista.

<sup>16</sup> Aden Esus tantiec ěnēdenquo yec cuishonquianeta. <sup>17</sup> Adembidi Nuquin Papa chianequin: —Ěmbi chiacpadomboen ěbi nashunquin utsibotsen nashunta, Papa, —quequin chianeta. <sup>18</sup> ěMimbi chiacpadomboen Nuquin Papan nasho isunuidida mimbi: —Nuquin Papa bēdambo iquec —cape? Nadoac bēdambo ictsiash. Bēdamboec tabadquin: —Mibi bēdamboshē iquec, Papa, —cac bēdambo ictsiash. Daicsabudshumbic adembidi nac bēdambo ictsiash. Paēmo icnubi adembidi. Mitsana icnuc adembidi. Mitsana nibēdnubi adembidi. Utsibon chieshēnaqui adembidi: —Mibi bēdamboshē iquec, Papa —cac bēdambo ictsiash. Aden Nuquin Papan: —Ma Esus tantiaguidon adono —quequin tantiacpaden mimbi natsiac. <sup>19</sup> Nuquin Papan Mayanēn Nuquin Papan chiaid tantiamic pamumēdacimboec tabadenda. <sup>20</sup> Aden Nuquin Papan Mayanēn tantiamic utsibotsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —qesho mamēnshunenda. <sup>21</sup> Adenquo icquin: —ěNuquin Papan chiaidquibida chuibaneque? Tantiabono —cata. Aden tantiashun Nuquin Papan chiaidquo isbanta. Aden isbanquin abimbo chuisho tantiashun: —Āi, Nuquin Papan chiaidquo chiec —qeshun aidēn chuisho bēdamboen tantiata. <sup>22</sup> Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —qeshun aidēn chuisho tantienda. Aidēn chiacpadomboen nainda.

<sup>23</sup> Mibi Nuquin Papa chianembi. —Matses bēdambo icmequid icquin mimbi chiacpadomboen aido name, Papa. Mimbi chiaidquo bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icho Esusēn: “Aido bēdambo iquec,” catsiash, Papa —quequin Nuquin Papa chianembi mibi. <sup>24</sup> Nuquin Papa nuqui Esus tantiamequid muēsambo nec. Adquid icquin ambi chiacpadomboen nuqui chieshtomenquo iqwendac. <sup>25</sup> Nuquin Papa ěbi chianeta. —Abēd icquidobēdta Pabado bēdamboen nameta, Papa —quequin Nuquin Papa chianeta. <sup>26</sup> Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. <sup>27</sup> Nuquin Icbon tantiacpaden chuiquin dada uaombique. Ěmbi dada uaboed nēid isquin ambocquido Esus tantiaquidotedi

chuihan. <sup>28</sup> —Nuquin Icbo Esuquidistun bēdamboen ispashun —quequin  
mibi tantiemi. Padi. Aidtedi dada uaombi.



## TESADONICA YACNOCQUIDON ISTE 2

### *Pabadon tauamboen chiaid*

<sup>1-2</sup> Pabado nebi. Tesadonica yacnocquido Nuquin Papabēdta Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icnepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

### *Nuquin Papan Esusbēdtan matses cuidte chiaid*

<sup>3</sup>—Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēcboedombi nēbi Esus tantiabededosh,” quiosh, Papa. “Adechbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. <sup>4</sup> Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsiniquen chuibeniombi.

<sup>5</sup> Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. <sup>6</sup> Nuqui chieshēnquidon naidtsen tantiaquid icquin Nuquin Papan aido cuidendac. <sup>7</sup> Aden nuqui chieshēnquido cuidquin aidon nuqui natiamiaid nuqui bēpişcudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icho Esusēn adoendac. <sup>8</sup> —Icsaisambo yec matses cuidquid nebi —quequin tantiamenuec bēchamauanquiec choshon Nuquin Papa tantiesabo cuidendac. —“Nuquin Icho Esus tantiasho Nuquin Papan mibi bēdamboen istsiash,” quequin chuisho tantiatiapimbo iquebi —quequin abi tantienquo icsho Esusēn cuidendac. <sup>9</sup> Cacumiachimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bēdamboshē isadsho isec tabadtiapimbo iquendac. <sup>10</sup> Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuec abided cuidadaid Nuquin Icho bēdamboshē iquec —quequin aton Icho isec tabadendac. Ēmbi Esus chuibanac aid tantiabenondaido icquin mimbitsen Esus chosho isendac.

<sup>11</sup>—Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquio iquebi,” qesho ambi chiacpadomboen name, Papa. Comapenen tantiaquidquo mibi neque. Adota, Papa. <sup>12</sup> Aden mimbi con Icho Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icho Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

## 2

*Icsamboshë icquidba chote chiaid*

<sup>1</sup> Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icho Esus ënden choac —quesho tantiaish <sup>2</sup> dacuëdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icho Esus ënden choac —quec muapash. Ambembi chiaidien chuichitash. —Naden Pabadon chiaid iquec —quequin ëmbi dada uaidbimboecquid isquimbien chuichitash. <sup>3</sup> Adec muaid tantiaish: —Abimboen cachitosh —quenda. ¿Nuquin Icobada chopadic? Padenquo. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshënquidquio icsamboshë icquidba choash matses dadpenquo chuiquid dapa iquendac. Aid Nuquin Papan cuidtequidquio nendac. Aidba choabi icnuc Esus choenquo iquendac. Icsamboshë icquidbain choendac. <sup>4</sup> Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquio nec,” quequin mimbi Nuquin Papa caid nibëdeque. Èbiuidtsëqui tantiaata —caindac matses abitedi chuiquin.

<sup>5</sup> Aden mibi chuideniondambi. ¿Tantienquioda ique? <sup>6</sup> Nuquin Papan tantiacpadënquo chomenuen uidënuac icsamboshë icquid nëbi choenquo iquec. Nuquin Papan tantiacpadënquo choendac. Èmbi chiondacadquid abi chomenquo icquid mimbi tantiec. <sup>7</sup> Nëbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien <sup>8</sup> icsamboshë icquid matses chuiquid dapa iquendac. Adnubien Nuquin Icho Esusën: —Èbien matsesën Icbombo nec —quequin matses abitedi tantiamenuec choshon icsamboshë icquid: —Unësta —caquinuidtsëqui unës uashunendac.

<sup>9</sup> Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquio nëbique. Istac —quequin ambembi chiaid tantiamenuen aden nadatiambo icquin nabanquin ismendac. <sup>10</sup> Adec icsauidequi tabadquid yec comapenec muasho tantiaish: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdabimboen tantiatiapimbo icquin ambembi chiaiduidtsëqui tantierendac. <sup>11</sup> Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapannuna —quequin namiac: —Mue nec —quequin tantienquo iquendac. Utsi muasho tantiaish badedi: —Abimbo chiec —quetsiash tantienquo yec. <sup>12</sup> Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquendac.

*Nuquin Papan tantiamiaid*

<sup>13</sup> Nuquin Icbon mibi tantiaquie. Èndenquimboshë matses uabi Nuquin Papa nuqui caic: —Èbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquio tantiaish Èsus tantiec

mibi bēdamboec tabadcuenondac. —Adquiobidi iccosh —quesho tantiashun Nuquin Papa chianembi naden. —Aden aido bēdamboen namequid yec mibi bēdamboshē iquec, Papa —quequin chianembi mibi tantiaquin. <sup>14</sup> Nuquin Papan chiaidquio ěmbi chuibanac mimbi Esus tantibenondac. Abi yacnoshon Nuquin Icho Esuquidistupadquio bēdamboshē icmenuen aden Nuquin Papan mibi Esus tantiamiac. <sup>15</sup> Ębi adsho tantiashun ěmbi chiondacadomboen chieshtoenquio icquin Esus tantiaata. Ęmbi mibi bēisquin chiondaidbēdta ěmbi dada uaquin abimbo chiondaid bēpiscudenda.

<sup>16</sup> Nuquin Icho Esuquidistubēdtan Nuquin Papan nuqui tantiaquin bēdamboen isec. Adembidi: —Nuquin Papa yacno Esusbēd iquendabi —quequin tantiamequin dayacquo yacimboecnuc nuqui icmec. <sup>17</sup> Adquid icsho chianembi naden. —Tesadonica yacnocquido chieshtomenquio icquin Esus tantiamequin bēdamboec tabadquid icme, Papa. Adembidi bēdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

### 3

#### *Nuquin Papa ěbi chianeta, quiaid*

<sup>1</sup> Tanta, con utsibo. Mibi chuinu. Nuquin Papa ěbi chianeta. —Nidaid utsi-utsiec yacno nidmeshun Pabado chedo matses dadpenquio Esusēn naid bēdamboen chuibame, Papa. Mimbi bēdamboen chuimiac ěmbi Esus tantibenondacadomboen utsibon dadpeshun Esus tantiabentsiash, Papa.

<sup>2</sup> Aden Esus chuibansho isun Esus tantiesabo chieshēmēnquidon: “Pabado cueschitono,” casho cuesmenda, Papa —quequin Nuquin Papa ěbi chianeta.

<sup>3</sup> Nuquin Icho bēdambo iquec. Muesambo icquin ambi chiacpadomboen nuqui bēdamboen dayun uaindac. —Ębi tantienquio yanushe —queshun nuqui chieshtomenquio icquin Satanas nuqui yuametiapimbo iquendac.

<sup>4</sup> —Aden Nuquin Icbon bēdambo icmiac ěmbi chiacpadomboen naboedi adembidi Tesadonica yacnocquidon naindac —quequin tantiombi. <sup>5</sup> Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ěbi tantiaqueic,” quequin Tesadonica yacnocquido tantiameta, Papa. Esusēn chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

#### *Esus tantiaquido uspuenquio icquid*

<sup>6</sup> Tanta, con utsibo. Nuquin Icho Esuquidistun: —Ębi chuibeneta —caidquio icquin mibi chuinu. Esus tantiaquido utsi-utsiec ěmbi mibi chiondaid niac-niaquec chieshuidequi icsho isash aaidbēd chieshec tabadenda.

<sup>7</sup> —“Ębēd iquec Pabado dayacquo iccondacadquiech chieshenquio yequien tabadtiad,” quiosh —quiosh mibi caic. Abimbo mimbi cac. Mibēd yec dayacquo iccondabi. Chieshenquio yec chonoadteniondabi.

<sup>8</sup> Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ębi meniac aton na naimēdnushe —quiash con piucquid bednuec chonoadteniondabi.

<sup>9</sup> —Esus tantiaquidon abi chuibanquid menenquio icquid —¿quectabi ique? Padenquio. Esusēn naid chuibanquid ambi chuibanaidon meniaquin bēdambo ictsiash. —Chieshenquio icquin ěmbi nacenusho isun ma adembidi Tesadonica yacnocquidontsen nanu —quiashini chonoadteniondac.

<sup>10</sup> Mibēd tabadquin naden chiondambi. —Aton na nacenenquio yec chieshuidequi icsho pemenquio icquid —quequin chiondambi.

<sup>11</sup> Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh. <sup>12</sup> Uspun tantia. Nuquin Icbo Esuquidistun chiaid mibi chuinu. Chieshuidequi tabadenda. Mitsanabi penuec chonoadta. <sup>13</sup> Nuquin Papan chiacpadomboen naic chieshtoenda. Chieshtoenuo icquin bēdamboen-uidi nata. <sup>14</sup> Nēid dada uaqin ěmbi chiaid niacniacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda. <sup>15</sup> Aid chieshēnenquo yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuita.

### *Pabadon ěnquin chiaid*

<sup>16</sup> Mibi tantiaquin Nuquin Papa chianembi naden. —Bēdambo icmianquidquo icquin Con Icbonquo ma aido dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa —quequin Nuquin Papa chianembi. <sup>17</sup> —Ista. Ěmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquo nec —quequin mimbi tantiendac. <sup>18</sup> —Nuquin Icbo Esuquidistun bēdamboen ispashun —caimbi mibi. Padi. Aidtedi dada uaombi.

## TIMOTEYON ISTE 1

### *Tauamboen chiaid*

<sup>1</sup> *Padabo nebi.* Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. <sup>2</sup> *Ëmbi chiondac Esus tantiabenash con mado icbobimboecquid mibi neque.* Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubédtan con mado bédamboen isquin bédambo icmepashun —quiobi.

### *Chiaid utsi chienda, quequin chiaid*

<sup>3</sup> *Tantia.* Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnoquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibédta nact-suaquin Nuquin Papan chiaid chienda —cata. <sup>4</sup> *Nadembidi chuibanta.* —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmédpampic. Aidën tsyuecquiduidtsëqui bédambo iquec.” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec.” quec mibédi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. <sup>5</sup> *Adshumbic aidobidi naden chuita.* —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. <sup>6</sup> *Mimbi aden chiapadomboen nainquio icquidoen Nuquin Papan chiaid bédamboen tantienquio yec abembi onquec.* <sup>7</sup> *Adquidon:* —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuec aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

<sup>8</sup> —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chié? Padenquio. Ma aidi bédambo iqueyoc. —Nëid tantiashun ma abi icsaid ënu —queshun aid abimbo chiac bédambo ictsiash. <sup>9</sup> *¿Bédambo icquid chuiquinda Nuquin Papan Moises dada uamepampic? Padenquio.* Icsambo icquido chuiquimbien adopampic nadquido chuiquin. Nèidic Nuquin Papan chiaid niac-niacquido. Nèidic aton chuiquidën chiaid niac-niacquido. Nèidic Nuquin Papa tantiesabo. Nèidic Nuquin Papa mamënshunquido. Nèidic anibi cuesunequido. Nèidic amëbi cuesunequido. Nèidic cuesunianquido. <sup>10</sup> *Nèidic aton chidopenquio chudquido.* Nèidic aton bënëpenquio chudmequido chido. Nèidic aton chido bunenquio yec dada daéd chichudnanquido. Nèidic matses utsi bedshun yuaquido. Nèidic muaquido. Nèidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. <sup>11</sup> *Adembidi Esus chuibeneguidon:* —Adquid icsambo iquec —quequin chiec. Bédamboshë icquin Nuquin Papan aden Esus chuibeneguido chuimec. Esus chuibeneguidbidi icquin adembidi chiemi.

*Nuquin Icbon Pabado bēdamboen isbenaid*

<sup>12</sup> Tantia, mado. Mibi chuinu. Nuquin Icho Esuquidistun: —Pabadon ēbi bēdamboen chuibantsiash —quequin tantiashun: —Ēbi chuibenequid icta, Pabado —qeshun ēbi bēdamboen namec. Adoaid icquin: —Ēbi namequid yec mibi bēdamboshē iquec, Icho —quequin Nuquin Icho Esus chianembi.

<sup>13</sup> Ēnden adenquio iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshēnquin cuesun secate bunondabi. —Aton Mado Esus tantiasho Nuquin Papan ēbi bēdamboen istsiash —quenquo icquin adopondambi. Adshobini: —Pabadon abimbo tantiabi iquec —qeshun Nuquin Icbon cuidenquo icpanēdash. <sup>14</sup> Adec icsambo icquid icsho Nuquin Icbon tantiamiac: —Ābi tantiasho ēbi bēdamboen isbentsiash —quequin Esusquo tantiabonondambi. Esus tantiaquin matsetsen tantiaquiemi.

<sup>15</sup> Tantia, mado. Naden chiaid bēdambo iqueque. —Icsambo icboedēn abi tantiasho cuidmenquo icnuec Esus matsesac caondash —quequin chiaid bēdambo iquec. Ēbibic icsamboshē icpondabi. Utsibon Nuquin Papan chiaid bēdiactšec niac-niacnubi ěmbimbo comapenen niac-niaccondambi. <sup>16</sup> Adec ēbi yuec icsambo icsho Nuquin Icho Esusēn baded cuidenquo icquin abibi tantiamequin bēdamboen isbempondashi. —Pabado bēdamboen isaīd chiac utsibo: “Pabado icsambo icboedi Nuquin Papan bēdamboen isbenac. Adem-bidi Esus tantiasho Nuquin Papan ěbitsen bēdamboen isendac,” quequin ēbi tantiendac. Adquid unēsacsho ēbi yacno tabadmendambi —qeshun abi tantiamequin Esusēn bēdamboen isbempondashi. <sup>17</sup> Aden tantiaquin nadoembi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquo icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdamboshē iquec, Papa,” capashun ēnenquo icquin —caimbi.

*Matsesēn mibi chiondacadombota, quiaid*

<sup>18</sup> Mibi con mado icbobimboecquid neque. Ēmbi chiacpadomboen Nuquin Papan chiaidquo chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mimbi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mimbi chuibante chuipondash. Aidēn chiacpadomboen chieshtoenuquo icquin Nuquin Papan chiaidquo chuibanta. <sup>19</sup> Aden Nuquin Papan chiaid niaquenuquo icquin Esus tantiaquiec bēdamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. <sup>20</sup> Adecandedo caidbēdtan Imeneyo caidēn aden Esus tantienquo yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasēn natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

## 2

*Nuquin Papa bēdamboen chianete chiaid*

<sup>1</sup> Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēdta mibi bēdamboen tantiamequin bēdamboen ista, Papa. Matses nashunquidquo yec mibi bēdamboshē iquec, Papa —quequin Nuquin Papa chianenuna. <sup>2</sup> Adem-bidi Nuquin Papa chuiquin: —Chuiquid dapambo pedesidente caidtedibēdta chuiquid dapa utsibotedi bēdamboen tantiameta, Papa. Adoac aidon bēdamboen namiac

cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. <sup>3</sup>—Con matses Esus tantiameta, Papa —quequin nuqui aden chianesho tantiaash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid. <sup>4</sup> Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiashun abided cuidadec unēsaid ma tantiapanu —quec Nuquin Papa. <sup>5</sup> Nuquin Papan chiaidquo tantiashun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiec. Abēd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanēdash. Adecbidi aton Papa matses bēdamboen ismequid yampanēdash Esus. Aid abentsēqui Nuquin Papa bēdamboen ismequid nec. <sup>6</sup> Abi tantiaquid cuidmenquo icnuec abided cuidadec unēspac caondash —quequin chiaidquo nuqui tantiec. Nēbien Nuquin Papan tantiacpadomboen matsesēn aden chiaidquo chuiben-chuibenec. <sup>7</sup> Adomboembidi Esus chuibeneguidquo nebi. —Matses utsibo isadaidpembo ěbi chuibeneta —Esusēn caonaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

### *Esus tantiec cuēdēnacnoshon nate chiaid*

<sup>8</sup> Tanta. Dadatedi chuinu. Cuēdēnacno puduedshun Nuquin Papa chuinec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad. <sup>9</sup> Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidacimboc dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuēdēnacno puduedta. <sup>10</sup> —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

<sup>11</sup> Esus tantiaquido cuēdēnacnoshon dadan Nuquin Papan chiaid chuibanesho tantiaquid chidon. —Aidēn chiacpadomboen natiapimbo iquebi —quequin tantienquo yec bēdamboen tantiec otacquo tabadquid chido. <sup>12</sup> Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi. <sup>13</sup> Dada Adan caidba Nuquin Papan matses uapampic. Adshumbic aton chido Eba caidtsen. <sup>14</sup> Aden dadabēdta chido nacnenacsho isumbien Satanasēn: —Icsamequin tanu —queshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. <sup>15</sup> Adec abia icsasho isun Nuquin Papan cuida paēmbo icnuc bacuē tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiacpadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bēnēuidtsēqui chudmequid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

## 3

### *Esus chuibanquid chiaid*

<sup>1</sup> Tanta. Utsitsen mibi chuinu. —Esus chuibanquid ictiadquo iquebi —quesho: —Bēdamboen nate mibi bunec —cata. <sup>2</sup> —Nuquin Papan

chiaid chuibanquid nadquien ictiad —quequin anocquido chuita. — Bëdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsëc inquid nendac. Abi bunaid ënshun mëmunquidquio nendac. —Bëdamboen tantiaquidquio nec —utsibon caidquio nendac. Isedanguido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantiamequin chuibanquid nendac. <sup>3</sup> Tantiadenuen acte paëmbo icquid aquenquio icquid nendac. Badedquio nëshenquio icquid nendac. Uimanëmënenquio icquid nendac. Chushcananteuidi bunenquio icquid Nuquin Papan chiaid chuibanquid. Pucquid bedteuidi bunenquio icquid nendac. <sup>4</sup> Aidën chiacpadomboen aton chidon aton bacuëbobëdtan naquid. Chieshenquio icquin aton papan chiacpadomboen naquid aton bacuëbon. <sup>5</sup> ¿Ambi chiacpadomboen aton chidobëdta aton bacuëbo bëdamboen namenquio icquinda Esus tantiaquido bëdamboen namepatsiash? Padenquio ictsiash. <sup>6</sup> Ënden Esus tantiabonaid chuiquin: —Ëbi chuibanquid icta. Ëbi bëdamboen chuiquin ëbi bëdamboen nameta —Esus tantiaquidon cac bëdambo ictsiash. Nëbimbo Esus tantiabenuid aden chienda. Chuibanquid icmiac adquidën Nuquin Papan chiaid badedquio niactsiashe. Satanasbimboec: —Ëbiuidtsëqui bëdamboshë iquebi —quetsiashe. Adquid: —Ëbi chuibanquid icta —cainda. <sup>7</sup> Ënden Esus tantiabonaid mibi chuibanquid icmenun Esus tantiesabon: —Bëdambo icquid nec —casha tantiata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamëshuntsiash. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

### *Esus tantiaquido nashunquid chiaid*

<sup>8</sup> Tantia. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Pucquid bunquin ampenquio icquid nendac. <sup>9</sup> Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash. <sup>10</sup> Esus tantiaquido nashunquid icmenuen: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi qesho tantiasahun: —Esus tantiaquido nashunquid icta —cac bëdambo ictsiash. <sup>11</sup> Adquidën chido: —Bëdambo icquid nec —utsibon caidquio nendac. Utsi icsaiduidi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash. <sup>12</sup> Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. <sup>13</sup> Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquo icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

<sup>14</sup> Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —queshun nëid dada uac nebi. <sup>15</sup> Ëbi mibi yacno badedquio nidabi icnuc: —“Esus tantiaquidon nadoquid,” quequin Pabardon chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan



chiaidquoio tantiaquin nuqui Esus chuibenec. <sup>16</sup> Ĕndenquoio abi bēdamboen ismequid ambi tantiamiabi icnēdaidi nēbi Nuquin Papan tantiamiad Esus bēdamboshē iquec.

Aid Nuquin Papan matsesmepeanēdash.

Nuquin Papan Mayanēn: “Nuquin Papapadquidquoio icsaisambo Esus nec,” quequin tantiamec.

Matsesēn unēs uaqui uincuenaid yec Nuquin Papan abi yacnoshon uaido mayan bēdabon isaidquoio Esus nec.

Abi chuibenequidēn nidaid utsi-utsiec yacno nidshun chuibeniac utsin-utsinquien Esus tantiabenac caosh.

Aidquioibi Nuquin Papan abuc nidmeshun abēdi tabadmeoapanēdash.

## 4

### *Utsibon icsamboen chiaid*

<sup>1</sup> Tantia, mado. Nuquin Papan Mayanēn tantiamiad mibi chuinu. — Esus chote nēbi icnuc abi tantiaquidon utsin-utsinquien Esus tantienquoio yanendac. Satanasēn yuabo podobitsi icsabon muaquin pausunac matsesēn chuisho tantiaishun Esus tantienquoio yanendac —quequin Nuquin Papan Mayanēn abimbo tantiamiohi. <sup>2</sup> Aden muaquidon: —Abimbo caimbi —quequin bēdambo icquid dīanquien adu muaquin chiendac. —Nuquin Papan cuidnushe —quequin tantienquoio iquendac. <sup>3</sup> Adquidon naden chiendac. —Dadan chidō bedenda. Chidon dada bedmēda. Padenquoio yec tabadta —quequin icsamboen chiendac. Adembidi: —Aidquoio petemaid neque. Penda —quequin pete abentse-abentsen chiendac aid pete bēdambo icnubi. <sup>4</sup> Atotsi quequin Nuquin Papan pete uapampic? —Ĕmbi chiaidquoio bēdamboen tantiaishun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. <sup>4-5</sup> Aidēn pete uaidtedi bēdamboshē iquec. —Ĕmbi pete uaid bēdambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —queshun pete isuidenquoio icquin penuna.

### *Esus chuibanquid icquin bēdamboen nata, quiaid*

<sup>6</sup> Esus tantiaquido Ĕmbi chuibocpadomboen chuibanquin mimbi bēdamboen natsiac, mado. Bacuētsēcsho min matsesēn Nuquin Papan chiaidquoio mibi chuibanēdash. Aidēn chiaid tantiaquid icquin Esusēn chiacpadomboen nate bunquin Ĕmbi chiacpadomboen mimbi chuibantsiac.

<sup>7</sup> Con tsusedpabon ambembi chiampidbēda nēbi matsesēn adembidi ambembi chiaid tantienda. Nuquin Papan chiaidquoio niactiapimbo yec bēdambo icte bunquiota. <sup>8</sup> Aton dada uidēnquoio icmenuec titinquetanequid nuquin matses nec. Esus tantiaquido bēdambo icnuec <sup>9</sup> mitsipadquoio icpec? Nuquin Papa tantiaquieci ambi chiaid niaquenquoio yec bēdamboec tabadquid nec. Adquid unēsash Nuquin Papa yacno nidash bēdamboshē icquid iquendac. <sup>9</sup> Ĕbi adsho tantiaish: —Abimboen caic —queta. <sup>10</sup> Adec: —Abi yacno abēdi tabadendabi —quequin Nuquin Papan chiacpadomboen Ĕnenquoio icquin nanuna. —Esus tantiaquid unēsacsho cuidenquoio icquin unēstiapimbo icquidēn Nuquin Papan abēdi tabadmendac —quec chieshtoenquoio yec bēdamboec tabadnuna.

<sup>11</sup> Ĕmbi chuiboed chuibanta, mado. —Nuquin Papan chiacpadomboen nanuna —quequin chuibanta. <sup>12</sup> Mibi nēbi caniaid neque. Bēdamboec tabadta, mado. Ĕnden caniaidēn: —Nēbi caniaid icquin Nuquin Papan chiaid mimbi tantienquoio iquec —canushe. Bēdamboec tabadta. —Esus tantiaquido utsibotsen ma Ĕbi yacpadec bēdamboec tabadnu —quiaish adta. Bēdamboen

chuiبانquinc matses tantiaquinc Esus tantiaquinc Nuquin Papan chiaid niaquenquio icquinc caic bēdamboec tabadta.

<sup>13</sup> Ēbi ano nidabi icnuc Nuquin Papan chiaid adenuidi chuibanta. — Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. <sup>14</sup> Ēnden mibi mamishquin chionaid ¿ada tantie? Ēnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquio yec adquid icta, mado. <sup>15</sup> Ēmbi dada uaquin chuiboedtedi isbanshun ēnenquio icquinc ēmbi chiacpadomboen bēdamboen nabanta, mado. —Ēmbi adosho isun ma ēmbi chuibanaidon: “Nuquin Papan chiaid chuibanquidquio yanosh,” ma ēbi canu —qeshun bēdamboen chuibanta, mado. <sup>16</sup> —Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bēdamboec tabadquin Nuquin Papan chiaidquio ēnenquio icquin chuibanta. Aden Nuquin Papan chiacpadomboen naic aibdēd mibi tabadendac. Mimbi chuibanaidobidi adoaindac.

## 5

### *Esus chuibanquidēn bēdamboen chuite*

<sup>1</sup> Nuquin Papan chiaid chuibanquid icquin dada ēnden caniaid chushcainda, mado. —Esus tantiaquidēn nadoquid yendac —quequin bēdamboen chui: —Con pabimboecquid nec —quequin. Nēbi caniquid: —Con ut-sibimboecquid nec —quequin adembidi bēdamboen chuiban, mado. <sup>2</sup> —Con tabimboecquid nec —qeshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiaquio ichitebi —quenquio icquin Nuquin Papan chiaidquio chuibanta, mado.

### *Chido niantembo chiaid*

<sup>3</sup> Tantia, mado. Esus tantiaquidon abēdtan Esus tantiaquid icsho niantē nashunte chuinu. Niantē aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. <sup>4</sup> ¿Ada nianten tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbi aton shanuachotsen nashuntsiash. —Ēbi nashundenēd neque. Nēid nashunu —qeshun nashuntsiash. Aden ambi chiacpadomboen nasho isash: —Bēdamboen naic —quetsiash Nuquin Papa. <sup>5</sup> Padnuc aton matses nibēdquidēnquio nianten Nuquin Papa chianequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niantē icsho abēdtan Esus tantiaquidon nashunquid. <sup>6</sup> Niantē utsimbien ambi tantiaiduidi naic. Petebēdta acteuide tantiaquin abi bunaiduidi naic. Adquidēn unēsacimboecquin Nuquin Papa tantienquio iquec. Adquid Esus tantiaquidon nashunenquio icquid. <sup>7</sup> Ēmbi aden niantē nashunte chuiboed Esus tantiaquido utsibotsen chuita, mado. —Aton matses nibēdquid niantē nashunenquio icsho: “Esus tantiaquido icsambo iquec,” utsibon canushe —qeshun chuita. <sup>8</sup> Aton shubun icquidotsen Esus tantiaquidon nashunquid. Abēd icquido menenquio yec pemenuio yec quec nashumēnenquio icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshē iquec.

9—Nëidtedi chido Esus tantiaquido nashunquidombo iquec —quequin abi cuëmédquid abi cuëmédquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëqui chudmedenedquio. 10 —Matses nashunquid nec —utsibon caid. Bacuë bédamboen caniuadened machon. Isedanquido bédamboen isquid. Esus tantiaquido nashundenequid. Matses daicsabudacsho nashunquid. Adec bédamboec tabadquid: —Esus tanti-aquido nashunquid icta —cata.

11-12 Utsi niante machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. 13 Adquid shubu utsin shubu utsinquien isedben-isedbenec uspumbo yanash onqueteuidtsëqui buntsiashe. Utsibo icsaiduidi chuibenequidquio ictsiash. 14 —Adquid niante machobudabi icquid dadan bedac bédambo ictsiash —caimbi. Adoac bacuë tishoatsiashe. Adshun codocaquinc sicaquinc daëdcaquinc catsiashe. Adec bédamboec tabadsho: —Icsambo icquid nec —Esus tantiesabon catiapimbo ictsiash. 15 Adquid niante machobudabi icquidën utsin-utsinquien Esus tantienquio yanshun Satanasën tantiamiacpadomboen nac caosh. 16 Niantebêd icquid utsi çada Esus tantiaquid chido ipcec? Aidëmbi niante nashunac bédambo ictsiash. —Ëmbi nëid nashumbanuc niante utsi aton matses nibêdquidquio Esus tanti-aquido utsibon nashuntsiashe —qeshun abêd icquidën nashunac bédambo ictsiash.

### *Esus tantiaquido chuibanquid chiaid*

17 Tanta, mado. Esus tantiaquidon abi chuibanquid nashuntetsen mibi chuinu. Çada Esus chuibanquidën bédamboen naosh? Adquidën Nuquin Papan chiaid bédamboen tantiamequinc Esus bédamboen chuiban-quinç casho ambi chuibanaidon bédamboen isquin nashunquid. —Ma penu —qeshun menequid. 18 Adembidi chuiquin Nuquin Papan ambi chiaid dada uamepampic. “‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bédamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tanti-aquidon abi chuibanquid nashunquid.

19 Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tantiata. 20 Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiash dacuëdec: “‘Ëbitsen adembidi chushcapanundac,” qeshun ma utsibon Nuquin Papan chiaid niaque-nquio icnu —qeshun chushcata. 21 Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bédabon nuqui iseqe. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquio neque. Chushcainquio iquemi —cainda.

22 Nuquin Papan chiaid chuibanquid icmenuen nuqui naondacpadom-boen badedquio mamishenda. Amba naid yuen isquioshon ambi chiaid yuen tantiaquioshon: —Bédambo icquid nec —quequioshon nata. —Esus

chuiبانquid icta —mimbi badedquio caboedën Nuquin Papan chiaid badedquio niacsho isash: —Ambi: “Adquid icta,” caidbëd Timoteyo icsamboshë iquec —utsibo quenushe. —Ëbëdtan chuiبانquid icta —badedquio cainda. <sup>23</sup>—Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidi acashien mibi niaque. Actequid utsi paëmbo icquid pistëc ac ma pucu bëdanuequin. <sup>24</sup>Tantia. Mibi padpiden chuinu. —Ëbëdtan namembi —canuen matsesën naid bëdamboen tantiata. Utsi aton matses ismec icsasho: —Icsambo icquid nec —badedi catsiash aton matsesën. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. <sup>25</sup>Utsien ismequin bëdamboen nasho: —Bëdambo icquid nec —badedi catsiash aton matsesën. Utsimbic ismenquio icquin bëdamboen nabansho: —Bëdambo icquid nec —quequin badedquio tantienquio icquin yuecshun istuidshun adembidi tantiatsiash. Ëbi adsho tantiashun: —Nuquin Papan chiaid chuiبانquid icta —badedquio cainda.

## 6

### *Matses yuaido chiaid*

<sup>1</sup> Matses yuabo Esus tantiaquido icsho naden chuita. —Min icbo Esus tantiesha icsho bëdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbön chiacpadomboen nata —quequin yuabo chuita. <sup>2</sup>Utsibi chuiquin: —Min icbo Esus tantiaquidbidi icsho: “Ëbipadquidi nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bëdamboen nashunta —quequin yuabo chuita. Ëmbi chuiboedtedi Esus tantiaquido chuiبان. —Adota —quequin chuibanta, mado.

### *Piucquid bunquin utsibon ambembi chiaid*

<sup>3</sup> Mimbi: —Nuquin Papan chiaid niaquenquio yec bëdamboec tabadnuna —quequin Nuquin Icbon chiaidquio chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidën chuisho tantienda, mado. <sup>4</sup> Aden icsamboen tantiaquidën: —Ëmbi chiaiduidtsëqui bëdambo iquec —quequin icsamboen chuiبانendac. —Mimbi icsamboen chuinuc ëmbimbo bëdamboen chiec —quec chushcanantiadquio iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsëqui onquebudec —quec utsibo nëishendac. Adquidbëd chushcananec muauanane icsamboec tantiashunanendac. <sup>5</sup> Pabiash shëcuë nibëdacimböen Nuquin Papan chiaidquio bëdamboen tantienquio yec chushcananendac. Nuquin Papan chiaid chuiبانquidën piucquid dadpen bedte danec chuiبانquidbidi ictiadquio iquendac.

<sup>6</sup> Nuquin Nuquin Papa tantiaquiec bëdamboec tabadec nuquin na dadpen bedte bunenquio yec bëdambo ictsiac. <sup>7</sup> Tishac chucactscnuc nuquin na nibëdpanëdash. Adembidi unësquin nuquin na nuqui buantiapimbo iquec. <sup>8</sup> Nuquin pete dashcutebëd icnuc utsi bunenquio yec bëdambo nuqui ictsiac. <sup>9</sup> Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mëmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unësash icsambo icquido cuidacno nidendac. <sup>10</sup> Adec piucquid natiambo bunquido aid

bednuec baded-badedquieec icsadenendac. Adquido: —Esus tantiembi — queboedobi padenquio yanash: —Esus tantienquio yanchitombi —quec natiaic tabadendac.

### *Bëdamboec tabad, quiaid*

<sup>11</sup> Mibi Nuquin Papa tantiaquidquio neque. Piuquid bedteuidi bunenquio yec bëdamboec tabadte bunquiota, mado. Nuquin Papan chiaid ni-aquenquio yec chieshtoenquio icquin Esus tantiata. Matsessten tantiecc nëishëmënenquio yec bëdamboec tabadta. <sup>12</sup> Utsibon chieshënaqui chieshtoenquio icquin Esus tantiaquiecc bëdambo icta. Unësash Nuquin Papabëd tabadnuec adta. —Con Madö Esus tantiaquiecc unësacsho ëbëdi tabadmendambi —qeshun Nuquin Papan Esus tantiamiac mimi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimi tantiamiondaque. Adembidi aid tantiaquiecc bëdamboec tabadta. <sup>13</sup> Abitedi uampidën Nuquin Papan nuqui iseqe. —Adquid nebi —quequin ancانquid dapa Ponsio Pidato chiecc dacuëdenquio icnëdaidën Nuquin Icho Esuquidistuntsen nuqui iseqe. <sup>14</sup> Esus tantiaquin chieshtoenquio icquin aidën naidquio chuibanta. Nuquin Icho Esuquidistu choabi icnuc ëmbi chuiboed niaquenquio yec bëdamboec tabadta. —Esus tantiaquido icsambo iquec —utsibo quetiapimbo icnuc adta. <sup>15</sup> Nuquin Papan tantiacpadënquio aid ushëmbi Esuquidistu nidaidën padpidecc choendac. ¿Esus chomequid mitsipadquio icpec? Icsaisambo yec bëdamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquio chuiquid utsin dëniactiapimbo iquendac. <sup>16</sup> Aid abentsëqui unëstiapimbo icquid nec. Bëchamauanquiescho istiapimbo yec utsibo tabadec. Aidi matsesën istiapimbo icquid nec. Adquid icsho: —Mibiuidtsëqui abitedishun Icho yec mibi bëdamboshë iquec, Papa —quequin Nuquin Papa chianenuna ënenquio icquin.

### *Aton na dadpen dayun uaquido chiaid*

<sup>17</sup> Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bëdambo iquebi,” guenda. Nibëdantiapimbo icquid danquin mimi dayun uaiduidtsëqui tantienda. Nuquin Papambo tantiaquiota. Aidëmbi matses bëdambo icmenuen aton na bedmec —cata. <sup>18</sup> Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta. <sup>19</sup> “Mimi bëdamboen naoque. Èbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpidecc unëstiapimbo icnuc —quequin aton na dadpen dayun uaquido chuifa.

### *Pabadon ënquin chiaid*

<sup>20</sup> Èmbi chuiboedquiobidi adembidi bëdamboen chuibanta, mado. Nuquin Papan chiaid chienquio yec abembi onquesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcananenda. <sup>21</sup> Aden icsamboen chuisho tantiashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bëdamboen isplashun —quequin mibi tantiembi. Padi. Aidtedi chuiquin dada uaombi.

## TIMOTEYON ISTE 2

### *Tauamboen Timoteyo chiaid*

<sup>1</sup> Pabado nebi. Nuquin Papan tantiacpadomboen Esuquidistun: — Èbi chuibeneta —caidquoio nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac — quequin Esus chuibenequidquoio nebi. <sup>2</sup> Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icho Esuquidistubēdtan bēdamboen isquin bēdambo icmepashun —quequin mibi tantiembi.

### *Chieshtoenquio icquin Esus chuiban, quiaid*

<sup>3</sup> Con tsusedpabon nacpadomboen Nuquin Papauidi tantiaquin ambi chiacpadomboen natiadquoio iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquoio icmec mibi bēdamboshē iquec. Adquiouidi icmeta, Papa —quequin Nuquin Papa chianembi. <sup>4</sup>—Èbi nidnu —quesho tantiash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. <sup>5</sup> Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiabenquiacpadomboen Timoteyonsen nēbi Esus tantiaquiec — quequin mibi tantiembi. <sup>6</sup> Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquoio icquin Esus chuibanta, mado. <sup>7</sup> ¿Nuquin Papan aton Mayan nuquibēd icmiacta nuqui natia dacuēdpe? Padenquoio. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquoio icquin mēmunquidquoio icnuc nuqui bēdambo icmec.

<sup>8</sup> —Adoaid nebi —queshun dacuēdenquoio icquin Nuquin Icho Esus chuibanta. Adembidi dacuēdenquoio icquin: —Pabado tantiaquiembi —cata. —Quēnēn nauedtsaid Pabado tantiatipi —quenda. Utsibon cuestiadquoio icquin chieshēnaqui Nuquin Papan namiacpadec chieshtoenquio icquin Esus chuibanuna. <sup>9</sup> Nuquin Papan: —Bēdamboec tabadquid icmequin con Mado Esus tantiamembi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempodash? Padenquoio. Èndenquimboshē nidaidbēdta matses uabi Nuquin Papan: —Èmbi chiaid niac-niaquec icsambo icboedēmbi con Mado Esus tantiasho cuidenquoio iquendambi —quequin ambi chuipampicpadomboen nuqui Esus tantiamiac. <sup>10</sup> Aden ambi chuipampid tantiamiabi icshumbic nēbi Esuquidistu matsesmeshun matses tantiamiac. Adoac: —Abi tantiaquid unēsacsho ic-saido cuidacno nidmenquoio icquin unēstiapimbo icquid icmequin Nuquin Papa yacno abēdi Esuquidistun tabadmendac —quequin nuqui tantiec.

<sup>11</sup> Aden tantiaquin Esus chuibenequidquoio nebi. —Èbi chuibeneta —Esusēn caondaidd yec Nuquin Papabēdta Esus tantiamequidquoio nebi. <sup>12</sup> Aden chuibeneshobini chieshēnquin quēnēn nauedondash. Adoqui chieshtoiapimbo icquin Esus tantiembi. —Èmbi tantiaidquoio comapenen tantiaquin nabanquidquoio Esus nec. Adquid icquin: “Èbi tantienguoio yanushe,” quesun abi tantiamequin èbi chieshtomenquoio iquendac. Nidaidēn choabi icquin Esusēn èbi chieshtoenquio icquid icmendac —quec dacuēdenquoio

iquebi. <sup>13</sup> Tantia, mado. Mibi chuinu. Ēmbi abimbo chiondaidquo chuiban: —Nuquin Papan chiaidquo nec —qeshun. Esuquidistu tantiaquinc matses tantiaquinc caquin adenuidi chuibanta, mado. <sup>14</sup> Nuquin Papan Mayan nuquibēd iqueque. Aidēn namiac ēmbi chiondacpadomboen Nuquin Papan chiaidquo chuiquin Esus chuibanta, mado.

### *Onesipodo chiaid*

<sup>15</sup> Ēmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. <sup>16</sup> Onesipodo caidēn nēbi bēdamboen isposhi. Ēbi quēnēn nauedacsho dacuēdenquo icquin isuanisuanquin bēdambo icmioshi. Adsho isun: —Aton shubun icquidobēdta aid bēdamboen ista, Papa —quequin Nuquin Papa chianembi. <sup>17</sup> Aidēmbi nēmo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibēmbenequin istuidpondashi. <sup>18</sup> Mimbi isnubi Epeso yacnoshon aidēmbidi baded-badedquien nashundeniondashi. Adsho tantiashun: —Nidaidēn padpidec choshon Nuquin Icbon Onesipodo bēdamboen ispushun —caimbi.

## 2

### *Chieshtoenquo icquin chuiban, quiaid*

<sup>1</sup> Chieshtoenquo icquin Esus chuibanta, mado. —Esuquidistun ēbi bēdamboen isec. Aidēn bēdambo icmiac dayacquo icquin naimbi —qeshun chieshtoenquo icquin Esus chuibanta. <sup>2</sup> Matses dadpenshun tantianuc ēmbi chuibansho mimbi tantiondac. Ēmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nēidēn chieshtoenquo icquin Esus chuibantsiash —qeshun: —Mimbitsen chuiban —cata, mado. <sup>3</sup> Sondado bēdambo icquidēn nacbimboen chieshtoenquo icquin bēdamboen nabanuna. Matsesēn chieshēnubi Esuquidistun chiacpadomboenuidi nanuna chieshtoenquo icquin. <sup>4</sup> Sondadon: —Mibi bēdambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado. <sup>5</sup> Ma nuquin matses titinquequidquo. ¿Mitsipadquo icpec? Aton uidēn tanec aton matsesēn chiaction abia titinquec chosho: —Bēdamboec titinquiosh —qeshun mauete menequid. Ambi chiaction titinquabi icsho mauete menenquo icquid. Adembidi: —Mimbi bēdamboen naoc —Nuquin Icbon camenuen ambi chiacpadomboen chieshtoenquo icquin nabanuna, mado. <sup>6</sup> Ma nuquin matses tied uaquidquo. ¿Mitsipadquo icpec? Chonoadquidēnquo dayacquo icquin aton tied uashun ambi nitsinaid pequid. Adembidi Esus chuibanquid icquin dayacquo icquin Esus chuiban-chuibanuna ēnenquo icquin. Adoac utsibon Esus tantiabentsiash. <sup>7</sup> Aden ēmbi chuiboed tantiata. Adsho Nuquin Icbon mibi bēdamboen tantiametsiash.

### *Esuquidistu tantiata, quiaid*

<sup>8</sup> Utsibon chieshēnubi Esus tantiata, mado. Aidi matsesash isadaidbo tsusedpa Dabidēn tsyuecquid nepanēdash. Nuquin Papan uacuemenēdaidquo yec abi iquec. Aidquo tantiaquiota. Aid chuibenequidquo nebi. <sup>9</sup> Aden chuisho chieshēnquin bedshun icsambo icquid uidēn uacimboen shocosh nacnenaidēn mētaniac mēyadebi. ¿Ēbi aden uidēn uacimboenda Nuquin Papan chiaid uidēn uapadic? Padenquo.

Ĕmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. <sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unēsacsho cuidenquiu icquin abēdi tabadmendac —quec chieshtoenquiu iccobi quēnēn nauedondaid yequi. <sup>11</sup> Naden abimbo chiaidquiu tantiash chieshtoenquiu iccobi.

—Abi bunaid ěnshun Nuquin Icbon chiacpadomboen naquid chieshēmēnquidēn unēs uacsho Nuquin Icbon abi yacno abēdi tabadmendac.

<sup>12</sup> Utsibon chieshēnaqui chieshtoenquiu icquin Esus tantiec unēsash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ĕmbi tantiacmaido neque. Nēid nuquibēdi tabadmenquien ictiad, Papa,” quequin Esusēn Nuquin Papa chiendac.

<sup>13</sup> Aden abi tantiesabon ambi chiaid niac-niacsho isun Nuquin Icbo Esusēn ambi chiacpadomboen naquidquiu icquin icsaido cuidendac.

Adembidi ambi chiacpadomboen abi tantiaquido bēdambo icmendac —quequin chiaid tantiashun ambi chiacpadomboen naquin Esusēn naid chuibanuna chieshtoenquiu icquin.

### *Nuquin Papan chiaid isbanta, quiaid*

<sup>14</sup> Ĕmbi dada uaqin chuiboed mibēd icquido naden chuibanta, mado. —Nuquin Icbon nuqui isnubi Esusquiu chienquiu yec ambembi chiaid chiec mibi chushcananqueque. Adenda. Adec chushcanansho tantiash matses icsambo yaneeque. Padi —cata, mado. <sup>15</sup> —Mibi bēdambo iquec —Nuquin Papa camenuen bēdamboen nata. —Dacuēdtiapimbo iquebique. Ĕmbi naid ma Nuquin Papan isnu —qeshun adota. Ambi chiaid bēdamboen isban-shun chieshtoenquiu icquin Nuquin Papan chiaidquiu chuibanta, mado.

<sup>16</sup> Ambembi chiaid chuiquidobēd onquec tabadenda. Adec onquequido icsambo icboedi buēdanquec Nuquin Papan chiaid niac-niaquec icsamboshē yaneeque. <sup>17</sup> Tosho bedacsimboec adquidēn chiaid tantiaquido dadpen yaneeque. Adquidēn chuisho tantienda. Aden chuiquid Imeneyo caid nec. Adquidbidi Pideto caid nec. <sup>18</sup> Aidon Nuquin Papan chiaidquiu chienquiu icquin muaquin chiec. —Esus tantiaquido unēsabi icquido nēbimbobi uincuenacimboec icpec. Unēsacsho aton dada chuca uaqin uincuenmenquiu iquendac —quequin muaquin chuisho tantiashun utsibon Nuquin Icbon chiaid tantienquiu yanac. <sup>19</sup> Aidon Esus tantiabien ichitash. Nuquin Papan Esus tantiamiac ěnenquiu icquin Esus tantiatsempanēdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Ĕbi tantiaquidombo nec,’ quequin Nuquin Icbon tantiec.” Adnuc Esus tantiaquidēn: —Con Icbo Esus nec —qeshun ambi icsamboen naid ěnendac.

<sup>20</sup> Esus tantiaquido nadquiu iquec. Shubu dapan tsitsan tabēcaid tabadacimboecquid nec. Tsitsan abentse-abentsec icsactsēcquiu icnubi utsi-utsiec bēdambo iquec. Icsactsēcquidēn icsa secanun sandoquid yendac. Bēdambo icquidēn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquiu yec Esus tantiaquidquiu icnubi utsi-utsiec abi icsaid ěnabi: —Esus tantianu —quetsēcquid iquec. <sup>21</sup> Esus tantiaquidquiu ictiadquiu yec: —Muaid chuisho tantiatiapimbo icquin nēbi Nuquin Icbon chiacpadomboen natiadquiu iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.



<sup>22</sup> Caniabon mēmunenquo icquin abi bunacpadomboen naquid tanenda, mado. Adenquo yec bēdamboec tabadte bunquiota. Nuquin Papan chiaid niacte bunenquo yec: —Nuquin Icho Esus nec —quequidobēdan chieshtoenquo icquin Esus tantiata. Matsetsen tantiec bēdamboec isnanec bēdamboec tabadta. <sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidēn chuisho tantiash matses chushcananondashe. Aidēn chiac chienda. <sup>24</sup> Nuquin Papan chiaid chuibanquid chushcananenquo icquid nendac. Chieshēmēnenquo icquin aton matses bēdamboen isquid nendac. Adembidi nēishēnenquo icquin Nuquin Papan chiaid tantiamequid nendac. Utsibon chieshēnaqui chieshēnanenquo icquid nendac. <sup>25</sup> Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nēishenquo icquin Nuquin Papan chiaidquo chuibanendac. —Nuquin Papan ambi chiaidquo tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. <sup>26</sup> —Aden Nuquin Papan ambi chiaidquo tantiamiac Esus tantienquo icboedēmbi Esus tantiabenshun abi yuaquidēn Satanasēn namiaid ēnenac. Aden Nuquin Papan chiacpadomboen naindac —qeshun chieshtoenquo icquin Nuquin Papan chiaidquo chuibanendac abi chuibanquidēn.

### 3

#### *Icsambo icquido iquendac, quiaid*

<sup>1</sup> Tantia, mado. Mibi chuinu. Esus padpidec choabi icnuc matses dadpenquioshē icsamboshē iquendac. <sup>2</sup> Nadquido iquendac. Nēidic utsi tantiatiapimbo yec abiuidsēqui datantiadquido. Nēidic piucquid bedte comapenec bunquidombo. Nēidic: —Is. Ēmbimbo naiduidi bēdambo iqueue —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquo icquido. Nēidic Nuquin Papan chiaid niac-niacquidombo. <sup>3</sup> Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. <sup>4</sup> Nēidic bēdambo icquid damianquiashic cuesunianquido. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. <sup>5</sup> Nēidic: —Nuquin Papa tantiacquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

<sup>6</sup> Adquidon mibi yacnoshon shubu utsin shubu utsinquier isben-isbenac caosh. Adash chidoidquido icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquido tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. <sup>7</sup> Aden icsambo icquidēn ambembi chuidenesho tantianeshun Nuquin Papan chiaidquo tantiatiapimbo icpac caosh aid chidobo. <sup>8-9</sup> Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquo chuisho tantiashun aidon: —Mue nec. Ēmbimbo comapenec tantiaquin ismenu —queboedombi bēdiactšēc tanti-aquin nacnenuidpampic. Adsho isun: —Abimbo cainquo iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo

iquec. Adembidi aidon muaquin chuisho tantiashun matses dadpeshun: —Muequi nec —capendac.

*Nuquin Papan chiaid isbanec bēdamboec tabadte*

<sup>10</sup> Ēbien muaquidpenquo nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquo icquin matses tantiaquin Esusēn naid chuibeniondambi. Chieshēnaqui chieshtoengui icquin adembi chuibeniondambi. <sup>11</sup> Ēmbi aden chuibancho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adem-bidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsengui iccondabi. <sup>12</sup> Ēbipadquido Esus tantiaquidotedi bēdamboec tabad-tiadquo icsho adembidi utsibon comapenen chieshēnendac. <sup>13</sup> Padnuen chieshēmēnquidobēd bēdambo icquid damianquiec muaquido bēdiactsēc ic-sambo icboedi muauananquiec buēdanquiec icsamboshē yanendac.

<sup>14</sup> Mibi adquidpenquo nec, mado. —Ēmbi isondaion bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. <sup>15</sup> Ēnden bacuēmpi icquin Nuquin Papan chi-aidquo min matsesēn chuibancho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabēdac. Aden Nuquin Papan bēdamboen iste tantiam-tembo Nuquin Papan chiaid nendac. <sup>16</sup> Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdamboeshē iquec. Aid isec onquequin: —Nuquin Papan chiacpadec bēdamboec tabad-nuna. Esus tantiaquido yec icsainquien icfiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. <sup>17</sup> Nuquin Papan: —Ēmbi chiaidquo tantiashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquo dada uamepampic.

## 4

*Nuquin Papan chiaid chuisho tantienquo yaid*

<sup>1</sup> Nuquin Papabēdan Esuquidistun mibi iseqe. Bēdamboen nata. Es-usēn nidaidēn padpidec choshon abitedishun Icbombo icquin unēsaido uincuemiaido unēsabi icquidobēdta chiendac. —Nēid ēbi tantiaquid ebēdi tabadmembī. Nēid ēbi tantiesa cuidembi —quequin chiendac. <sup>2</sup> Aidēn chiacpadomboen naquin Nuquin Papan chiaidquo chuibanta, mado. Matsesēn tantiatadquo icnuc adōta. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquo icquin chuita, mado. Ut-sibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoengui icquin chuita. Bēdiactsēc tantiatsēcquido: —Esus tantiaquidon nadoquid —quequin chuibanta, mado. <sup>3</sup> —Yuecshun Nuquin Papan chiaidquo matses dadpeshun tantiatiapimbo iguendac —queshun nata, mado. Aden tantiatiapimbo icquidēn Nuquin Papan chi-aidpenquo chuisho tantias: —Mimbi ēbi bunaidquo chuisho tantianu. Ēbi chiec cho —quequin muaquid utsi-utsien abi yacno puduedmendac. <sup>4</sup> Pamumēdacimbocquin Nuquin Papan chiaid tantienquo icquin tsused-pabon ambembi chiampiduidi tantiendac. <sup>5</sup> Aidēn nacpadomboen nainda, mado. Nuquin Papan chiaidquo bēdamboen tantiaquid yec bēdamboec

tabadta. Adsho utsibon chieshēnaqui chieshtoenquo icquin Esusquo tantiaata, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

6 —Ēbi unēs uan ěmbi nacpadomboen: “Adota,” mibi caquid nibēdtsiash —qeshun mibi aden chiec nebi. Nēbi Nuquin Papan tantiapadēn chieshēmēnquidon ěbi unēs uaic. 7 Utsibon chieshēnubi ěnenquo icquin Esusēn naid chuibeniombi. —Ēbi bunaid bednu —quec comapenec titinguacimboen dayacquio icquin Nuquin Papan chiaidtedi naombi. Chieshtoenquo icquin Esus tantiaquidquido nebi. Adshobini nēbi unēs uaic. 8 Unēs uacshobini matsesēn naid abitedimbo tantiaquidēn Nuquin Icbon: —Ēbi tantiaquin ěmbi chiapadomboenuidi naic mibi bēdambo iccoque. Nuquin Papa yacno ěbēdi tabadmequin mibi bēdamboshē ěmendambi —caindac. Abi chote ushēn choshon aden Nuquin Icbon ěbi chiendac. Adembidi abi chosho iste bunquidotedi abi tantiaquido Nuquin Icbon abēdi tabadmendac.

### *Timoteyo: Cho, caid*

9 Nēbimbobi ěbi isec cho, mado. 10 Utsibo nidanebon ěbentsēqui tsadebique. Demas caid aton na bedteuidi bunec ěbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidedi nidanebon 11 Ducas abentsēqui ěbēd iquec. Madcos bedbētsenec cho, mado. Ēbēdtan aidēmbi nēshunquo Esus chuibantsiashe. 12 Tiquico caid Epeso yacno mibi yacno nidmiombi. 13 Shubu dadpen icquid Todoas caid yacno Cadpo cuēmēdquidēn shubun con na niamēdaccondashe. Con dashcute ěmbi dada uaidbēdta bedbētsenec cho, mado. —Abitedi buantiapimbo iquebi —qeshun nēish yua bitsi nacenaid dada uaiduidtsēqui bēta.

14 Shocosh nacenquidēn Adecandedo caidēn comapenen chieshēnondashi. Aid Nuquin Papan cuidendac, mado. 15 Nuquin Papan chiaid ěmbi chuisho tantiatiapimbo icquin icsamboen chuishunondashibique. Choquin aid isenda: —Ēbitsen icsamboen chuishunushe —qeshun. 16 Ēnden tauamboen bedshun: —Quēnēn nauednu —cac cuidte chuiquid dapa ěmbentsēqui chuibampondambi. —¿Mitsipadosho isun ěbi bedo? Icsamboen nambo iccombi —capondambi. —Ēbēd icboedon dadpenhshun: “Bēdambo icquid nec,” quequin ěmbi naid chuibanac ěbi quēnēn nauedquidon ěbi nidmetsiash —qeshun ěbēd icboedo: —Chiec cho —caqui chōenquo iccondash. Aden ěbi cacuidondaido tantiaquin: —Nuquin Papan aido cuidenquo icpashun —caimbi. 17 Nuquin Icbombini nianenquo iccondash. —Isadaidpambo matses utsibo ma ěmbi naid chuibenenu —quequin cuesambo icmepondashi. Adondaic icshobini chieshēmēnquidon: —Cuesnu —cabededpondash. Nuquin Icbon nac aid matsesēn unēs uainquo icpondashi. 18 Padpiden chieshēmēnquidon ěbi caic: —Ma mēyanac chieshtoshon Esus tantienquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abēdi ěbi tabadmendac —qeshun: —“Nuquin Icho bēdamboshē iquec,” canuna ěnenquo icquin —caimbi.

19 Mibi yacnoquido: —Mibi caic: “Unēsquo iquec,” quiosh Pabado —quequin chuiban, mado. Nēidic Aquida caid. Nēidic aton chido Pidisida caid. Nēidic Onesipodo caid chedo. Aidedi aden chuiban. 20 Mimbisonaid Edasto caid shubu dadpen icquid Codinto yacno tēshēdondash ěbi chonoc. Utsibic Tēdopimo caid aton dada icsabudacsho shubu dadpen icquid Mideto caid yacno nianondambi. 21 Ue tsasi iquenuanquid taēnushe. Baded cho,

mado. Doma yacnocquido nēmbō icquidon: —“Timoteyo unēsquio iquec,”  
quequin dada ua —caposhi. Nēidic Eyobudo caid. Nēidic Pudente caid. Nēidic  
Dino caid. Nēidic Quēdaudia caid. Nēidic Esus tantiaquido nēmbō icquido  
utsibotedi. Aidedi adosh. <sup>22</sup> —Nuquin Icho Esusēn abēd icquin con mado  
bēdamboen ispashun —quequin mibi tantiemi. Padi. Aidedi chuiquin dada  
uaombi, mado.

## TITON ISTE

<sup>1</sup> Pabado nebi. Nuquin Papan chiacpaden chuibenequid nebi. Adem-bidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquo ma icpanuna. Adquid iquec ma bēdamboec tabadpanuna. <sup>2</sup> Muesa Nuquin Papa nec. Adquid icquin, Ēmbi ėnden chiampicpadomboen ėnenquiocquin Esuquidistu tanti-aquido ėbēdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi. <sup>3</sup> Ambi tantiampicpadēn ambi chuiampid Esuquidistu tantiamenuequin aidēn chuibeneta caid nebi.

<sup>4</sup> Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ėmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ėbi icsaid cuidenquo yec Nuquin Papa bēpiscudac, quequin ma ėnenquiocquin mimbi tantiapanuna. Adecbidi Nuquin Papabēd tabadendabi, quequin tantiapanuna, Tito.

### *Quideta yacno nidshun Titon natequid*

<sup>5</sup> Ēmbi nauidboed mimbi naimenu, quequin mibi Quideta yacno ni-nombi ma mimbi ambi tantiaid icsa chiac ma Quideta yacnocquidon ėmpanuna. Adem-bidi, shubu dadpen icquid uano-uanoecquid yacno nidshun ėmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquidquidquo chuita, Tito. <sup>6</sup> Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquo ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēda aton titan chiaid chieshenquiocquin nabantiad. <sup>7</sup> Aidi utsibēd bēdamboec tabadquin, Nuquibi nanuna, queshun utsibēd onquenquiocquin ambibi tantiacpadomboenuidi nabanesa ictiad. Adecbidi badedquo nēishesa ictiad. Adecbidi paēmboecquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. <sup>8</sup> Adecbidi Esuquidistu tantiaquid utsibo yuedquid ictiad. Adecbidi utsibobēd bēdamboec tabadte bunquid ictiad. Adecbidi utsi bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, queshun naisa ictiad. Adecbidi, Naden naic bēdamboecquid yantsiabi, queshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquo icta, quequin chuita, Tito. <sup>9</sup> Aden utsibo isbanquin bēdamboen tabadmenuequin chuiquid icta, cashun nēid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adem-bidi Nuquin Papan chiaid chuca uaquidēn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuioata, Tito.

<sup>10</sup> Quidetabo nad iqueque. Chuinu. Tantia. Abi chuiquidën chiacpaden naisa Quidetabo dadpen iquec. Abimbo chiosh, camenequin abimbo chiacbimboec aido onquec. Dadpeshun isadaidbon nacpadomboen nanuequin, Shui dëbid dëtemeta, quequin Quidetabon chiec. <sup>11</sup> Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiaish cuëshëdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bëdamboen chuibanquin ambi muaquin chiaid ëmeta, Tito. <sup>12</sup> Quidetabon matses ënden icnëdaid abentsëcshun naden aton matses chuipanëdash. “Quidetabo muaic chuinanquidombo nec. Aben icquid yuatemaïdbimboec uimanëmënquido nec. Chonoadenquiocquin nua peshun nua actenequido neoaic,” quequin Quidetabo ënden icnëdaïdën chuipanëdash. <sup>13</sup> Abimbo chuiquidënquio aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. <sup>14</sup> Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuïsho tantiesa ma icpanuna. Aden mimbi chuibanac abimbo chuiquidën chiacbimboen niacquidon chuïsho ma tantiesa icpanuna. <sup>15</sup> Nuquin Papan Esuquidistu tantiamiaïdën icbon chiaid bëdamboen isoaic. Adomboembidi ambi uabanaïd isec. Adash abitedi bëdambo iquec, quec tsadec. Ambï tantiaïd icsambocquid icnuc Esuquidistu tantienquiocquin, Nëid mishtemaïd nec. Nëid utsi petemaïd nec. Nëid utsi actemaïd nec, quequin chuibanquidën chiaid tantiec. Aden tantiec aton tantiate icsabudec, İcsaobi, quequin tantienquio iquec. <sup>16</sup> Nuquin Papa tantiembi, qeshumbic Nuquin Papan chiacpadomboen niacquin tantiesa nebi, quiachimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bëda natiapimbo icquid neoaic, Tito.

## 2

### *Esuquidistu tantiec iccuededquido tantiametequid*

<sup>1</sup> Icsateuïdi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiaime. <sup>2</sup> Mimbi paëmbocquid nua aquenquio icteniaccpadomboen Esuquidistu tantiaquid tsusiobo chuibanquin tantiaime. Adembidi, Mibi bëdamboecquid nec, utsibo camenu, quec bëdamboec tabadtenequin tsusiobo ismequin tantiaimeoa. Adembidi, Naden naic icsatsiabi, qeshun mimbi nainquio yacpadomboen mimbi bëdamboen tantiaid aido chuibanquin tantiaimeoa. Adembidi, Naden naic bëdamboecquid yantsiabi, qeshun adomboembidi naquid nebi, quequin tsusiobo chuibanquin tantiaimeoa. Adembidi mimbia Esuquidistu tantiadoniaccpadomboen pausunaïd icquin ma adquiobidi tsusiobotsen yampanueshun tantiaimequin chuïbanta. Adembidi, Esuquidistu tantiec utsibobëd tantiananec mibi tabadtenciacpadomboen chuibanquin tantiaime. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudaccpadomboen chuïquin tantiaimeoa, Tito.

<sup>3</sup> Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdamboecquid icmiaïd nebi, quec bëdamboec mibi tabadtenciacpadomboen tantiaimequin chuïoa. Adembidi, utsi icsamboen chuiquid iquenda, quequin chuibanquin tantiaimeoa. Adembidi, mimbi paëmbocquid nua aquenquio yacpadomboen chuiquin tantiaimeoa. Mimbi bëdamboen nabanaïd nëbi machocuenaïdo ismequin tantiaime, quequin ënden machoaido chui, Tito. <sup>4</sup> Aden chiac ënden machoaidon aton bënë

aton bacuëbo chedobëd abi tabadaid tantiamenuequin nëbi machocuenaido bëdamboen ismepec. <sup>5</sup> Adembidi aidën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiameoapec. Adembidi, Mibi inesa chudmenquio yec tabadta, quequin ënden machoaidon nëbi machocuenaido chuiquin tantiameoapec. Adembidi, aton shubun tabadquin ambi nabanacpadomboen ismequin aidon nëbi machocuenaido tantiameoapec. Adembidi, utsibo bëdamboen tantiaquin ambi nashunacpadomboen ismequin ënden machoaidon nëbi machocuenaido tantiameoaic. Adembidi, aton bënën chiacpadomboen nabanquin nëbi machocuenaido ismequin tantiameoaic. Aden ënden machoaidon abi ismiacpadomboen nëbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

<sup>6</sup> Adembidi, caniabo chuibanquin tantiamé, Tito. Naden naic icsatsiabi, quequin nainquio iquembí, quequin mimbi bëdamboen tantiacpadomboen caniabo tantiamequin chuiöa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiamequin chuiöa. <sup>7</sup> Bëdamboec tabadaid tantiamequin ismenu, quec mibibi bëdamboec tabadteneta. Mibibi icsainquiocquin ismequin tantiamé. Adembidi mamënenquiocquin bëdamboen chuiquin tantiamé. <sup>8</sup> Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesä mibi chïeshëñquid mibi icsamboen chuitiapimbo yec tabadendac.

<sup>9</sup> Adembidi yuabo chuiquin, Bëdambo iquebi, min icbo camenuequin ambi chiaidtedi chïeshenquiocquin nabanta, quequin tantiameta, Tito. <sup>10</sup> Adembidi, min icbon na ampenquiocquin bëdamboen dayun uaquin nashunquin min icbo ismeta, quequin yuabo tantiamé. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboshë yanac. Con yua bëdambo icmequidën chiaid tantianu, quendac icbo.

<sup>11</sup> Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. <sup>12</sup> Aden chomiac nidaidën tabadquin utsibo tantiaquin Nuquin Papan chiacpadomboen naquin ismiac adomboembidi naic bëdamboec tabadquid. Nuquin Papan bëdamboen tantiamiac bëdamboen tantiasho, Aidën bëdambo icmiaid icquin naden naic bëdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetäbo Esuquidistu tantiaquido chuiquin tantiamé, Tito. <sup>13</sup> Nuquin Papapadquid con Icho Esuquidistu choaic, quequin cainbudec bëdamboec tabadebi, quequin chuiquin tantiaméoa. <sup>14</sup> Nuqui cainaid: Ëmbi con utsibo caid ëbipadquid iquendac, quïash nuqui icsaid bedshunash abided cuidadec unëspanëdash. Adacsho aid tantiaquidquio yec bëdamboec tabadquid nec, quequin chuiquin tantiamé, Tito. <sup>15</sup> Ëmbi chuiboedtedi chuibanquin tantiamé. Mimbïä tantiaquid icquin, Ëmbi chiacpadomboen nabanec tabadteneta, quequin Quidetäbo chuiöata. Mimbïä chiacpadomboen nainquocsho isun cuembo chuiöata. Adecbidi, utsibon mibi icsamboen chuitiapimbocon bëdamboec tabadteneta.

### 3

#### *Utsi tantiaquin nabantequid*

<sup>1</sup> Esuquidistu tantiaquidtedi bëpiscudmenquiocnuequin naden chuibanta, Tito. Min tsusiobon bëdamboen chiaid naquimbi adembidi mibi chuiquid

utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui. <sup>2</sup> Adembidi, Utsi muaquin chienda, quequin chuiōata. Adecbidi, Utsibobēd tantiananec bēdamboec tabad, quequin chuiōa. Adembidi, Mimbi naiduidi tantienquiocquin nabanta, quequin chuiōa.

<sup>3</sup> Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac.

<sup>4</sup> Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash. <sup>5-6</sup> Adec choash tantiadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ěmec. <sup>7</sup> Adec aton Mayan nuquibēd icsho isun, Bēdamboquid nec. Aidtedi ēbēdi tabadendac, quequin Nuquin Papan tantiec. <sup>8</sup> Ēmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

<sup>9</sup> Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinēdaid chuiquin chushcanu qesho adembidi adenda, cata. Aden chiaid Nuquin Papa yacno mibi pudued-metemaic nec, quequin chuita. <sup>10</sup> Adec onquequin Esuquidistu tantiaquido cuēshēdmenequin chuibanquid icsho bēdamboen tantiamenequin chuiban. Aden chiaqui niacbidanquin adomboembidi aidēn chuiōasho tantiasun aidi comapenen chuibanquin tantiamēoa. Aden chiaqui padpiden niacbidanquin adomboembidi chuiōasho tantiasun cacumēta, Tito. <sup>11</sup> Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

### *Utsibo chuiquin chiaid*

<sup>12</sup> Nēbi utsibo chuinu. Tantia. Adtemas Tiquico chedo ēbēdi iquec. Abentsēqui Quideta yacno nidmēmbi. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenec Nicopodis yacno tabadnu, quianec nidendabi. <sup>13</sup> Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho isun menequin bēdamboen nidme. <sup>14</sup> Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

<sup>15</sup> Mibi tantiec tabadebi, quequin Tito chuita, ēbēd icquidon cacpadomboen dada uaimbi. Adembidi mibēd icquido Esuquidistu tantiaquido tantiec ēbēd icquido tabadoaic.

Esuquidistun, Bēdambo iquebi, camiaido ma mibitedi icpanuna. Padi. Aidted chiombi, Tito.



## PIDEMONËN ISTE

<sup>1</sup> Pabado nebi. Esuquidistun ëbi chuibeneta cac chuibansho quënën nauedaïd nebi. Èbëdi Timoteyo iquec. Aidi Esuquidistu tantiaquid icsho nuqui con utsi caïd nec.

Èbi yuedquid Esuquidistu chuibanquidquio mibi neque. Èmbi dada uaid isec onqueta, Pidemon. <sup>2</sup> Mibëd icquid, Apia, Esuquidistu tantiaquidquio icsho nuqui con chu caïd nec. Adquipo mibëd icquidbidi nuqui con utsi caïdbidi nec. Sondadon matses icsambocsho cacumiäcbimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Èmbi dada uaid bedash isec onquequin aido chuioata, Pidemon. <sup>3</sup> Esuquidistu tantiaquido icsho Nuquin Papan ëbi icsaïd cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaïdquio ma icpanuna.

### *Nuquin Papa chiec onquiaïd*

<sup>4-5</sup> Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. <sup>6</sup> Aden mibi tantiaquin Pidemon ambi tantiaïd Esuquidistu chuibanquid icme. Aden aïdën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

<sup>7</sup> Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

### *Onesimo tantiaquin chuidoniaïd*

<sup>8</sup> Esuquidistun ëbi chuibeneta caïd icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaïdtsen bëdamboen tantiaquin nashunta, quequin mibi chuitiadquio icquimbi padenquio iquembi. <sup>9</sup> Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. <sup>10</sup> Quënën nauedaïd icquin ëmbi Esuquidistu chuibanac aid tantiaquidbidi Onesimo yanash. Adquid yansho ëmbi con mado caïd nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. <sup>11</sup> Ènden min yua icquin mimbi chiacpadomboen mibi nashunquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

<sup>12</sup> Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. <sup>13</sup> Esuquidistu chuibansho quënën nauedshun tataniac caputiapimbochsho mimbi ëbi nashuntiapimbo iquec. Adec mibi nashumëntiapimbochnobi Onesimombini nashunosh, qeshun nidmetiapimbocquimbi mibi yacno nidmemb. <sup>14</sup> Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. <sup>15</sup> Yuecash cuëshëdenquio yec Pidemombëd Onesimo tabadoaindac, quequin

Nuquin Papan tantiondacadquieci mibi yacnoësh cuenëdaid mibi yacno nidash Onesimo tabadtsiash. <sup>16</sup> Onesimo min yua iccondaidd Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

<sup>17</sup> Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. <sup>18</sup> Con na utsibëdtabi con na bedtequid Onesimon bedaccondash, quequin mimbi chiacdedi mibi meneoaimbi. <sup>19</sup> Aidedi meneoaimbi, quequin ëmbibi dada uambique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. <sup>20</sup> ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. <sup>21</sup> Ëmbi chiacdedi daëd uaquin mimbi natsiac, quequin tantiec tsadebi, Pidemon.

<sup>22</sup> Nëidtsen chuinu. Tantia. Ëmbi tantienquiocnoc Pabado chonoshe qeshun abi ushondaid nacnenueshun nacnenfa, Pidemon. Mibi ëbi tantiec Nuquin Papa chiec onquiacpadomboen badedquio Nuquin Papan mibëd icmepashuni.

### *Utsibo chuinu quiaid*

<sup>23</sup> Esuquidistu tantiaquid utsibo ëbëdi iquiec. Aidon chiaid chuinu. Tantia. Epapadas, abembi ëbëdicnuec quënën nauedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. <sup>24</sup> Madcos yec Adistadico yec Demas yec Ducas yec quec ëbëd icquido iquiec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

<sup>25</sup> Nuquin Icho Esuquidistun mibitedi bëdambocquid icmebanacadquieci ma tabadoapanuna, Pidemon.

Padi. Aided dada uaombique. Isec onqueta.

## EBEDEYON ISADAIDBON ISTE

### *Abi yacnoshon ambi uaidon Icbombo Esuquidistu nendac*

<sup>1</sup> Ēndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoa-pampic. Adoshombic yuecquiocshon ambi chiaid utsitsen tsusedpa utsitsen chuimeoa-pampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi natatiambocquin uabanquin ismequin chiac adomboembidi chuioapampic.

<sup>2</sup> Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo cami-aidquo nec. Nidaid abubēdta uashun aidēnquiocquidtedi aton Papabēdta uabanampidquo aton Madombo nec. <sup>3</sup> Aidi, aton Papa bēdaidquo yampid-padquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ēmbi bēdambocquid icmebanaido matses nendac, quequin tantiashic abuc nidoash Nuquin Papabēd tabadoapanēdash aidquiobi. <sup>4</sup> Ad icnuc ambi abi yacnoshon uaido abipadquid nibēdec. Aidon con Icbombo caidquo nec.

<sup>5</sup> ¿Ambi abi yacnoshon uaid mayan bēda isec:

“Con mado mibi nec.

Ēbi min papa nendac, quepecta Nuquin Papa iquec? Padenquo.

Adecbidi:

¿Nēidēn Papa nebi.

Adecbidi: Con mado nec, quepecta Nuquin Papa iquec aido caic? Padenquo.”

<sup>6</sup> Abēd Abiambo Yampidi nidaidēn tabadash choasho isun Nuquin Papan ismequin:

“Nēid con Madombo Abentsēqui nec. Aidquo tantiec con Icho nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

<sup>7</sup> Ambi abi yacnoshon uaido mayan bēdabo naden Nuquin Papan chiec:

“Ēmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

<sup>8</sup> Padnuen ambi uacmaid abipadquid aton Madombo utsi uatiapimbo iquec. Adquidquo icsho Nuquin Papan naden chiec:

“Ēnenquiocquin ebēdta Chuiquid Abentsēcquio mibi iquendac.

Adecbidi nāmequid bēdaidquo mibi iquendac.

<sup>9</sup> Ēbipadquid iquec bēdamboec tabadquin nabante bunquidquo mibi nec.

Adquid yec icsamboec tabadquin nabante bunesambobidi mibi nec.

Adquid yec ēbi yacpadquidquo Icho Abentsēcquibidi mibi nec. Mibēd icquido adquid nibēdec.

Mibi abentsēqui adquidquo iquec. Adquid iquec, Bēdambo iquebi, quec mibi cuishon quendac.”

<sup>10</sup> Adembidi Nuquin Papan naden aton Mado chuioaic,

“Tauamboen nidaid abubēdta uashun aidēnquiocquidtedi mimbi uabampic.

Aidtedishun icbombo mibi nec.

11-12 Aidededi enēdendac.

Mibien nibēdantiapimbo yec abi tabadendac.

Aidededi dashcute shēnibudaid niacbimboen chuca uaindac.

Mibien Abiambu Yampid yec abi enēdesa mibi iquendac.

13 Nēbi cainec ēbēdquoio tabadec cho.

Mibi chieshēnquidtedi nibēdquoio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bēda aden chuipampidta nepadic? Padenquoio. Esuquidistu aden chuipampic.

14 Ambi abi yacnoshon uaido mayan bēdabo Nuquin Papan, Ēbēd tabadtequidombo nashunta, caido nec.

## 2

### *Ambi chiaid tantiesa icchitomane, qeshun tantiadonequiota caid*

1 Adec abitedishun Icbombo aton Mado icnuc ambi chiaid

chieshēnchitomane qeshun tantiadonequiec tabadnuna. 2 Ēndenquimboshē

ambi, Naden nata, quequin chiaid ambi abi yacnoshon uaido mayan bēdabo

chuiamiapadomboenuidi naisa icsho isun Nuquin Papan cuidpampic.

¿Aden ēndenquimboshē ambi chiaid chieshēnquid ambi cuidpampicpaden

3 nēbi icquidtsen ambi chiaid chieshēnsho isun cuidenquioda icpadic? Ambi

chiaid niacquid ambi cuidtiadquidi icnubi aton Madoded cuidpanēdash.

Adoac, Ēbi yacno Yuedanquid nebi, quequin aton Madonquoio Esusēmba

chiambic adomboebidi abi tantiaquidontsen chuiopondashi. Aden

Esusēn chiaid tantiaquidon chuibanubien, 4 Ēmbi chiaidquoio chuibanoapec,

quequin ismenuequin aton Mayanēn Nuquin Papabēd icquidēn

tantiamebanacpadomboen nadatiamboquin utsi-utsien bēdamebanquinc,

mayan icsa dapudedmequinc, unēsaid uincuemquinc caquin adquidēn-

adquidēnquien nabadepanēdash.

### *Matses icnu quiash Esuquidistu matsespanēdash*

5 Adembidi chuinu. Tantiata. Abi yacno Esuquidistu tantiaquido choash

tabadsho isun, Nēido ēbi yacnoshon ēmbi uaido mayan bēdabo mibi chuiquid

nec, quenquoio Nuquin Papa iquendac. 6 Ēndenquimbo aden tantiaquin dada

uaquin naden Nuquin Papa chiec Dabid pado onquepampic:

“Tantiaquiono. Ēbi chui, Papa. ¿Atotsieshun matses mimbi uaid pistēcquoio

icsho mimbi comapenen tantiatequid aido icpec? Papa.

Adembidi, ¿Atotsieshun Adanēn tsyuecquido mimbi nashumpe? Papa.

7 Nēbi chuitan mimbi cac mibi yacnoshon uaid mayan bēdan adomboebidi

chuioc matsesēn nabanec.

Yuecquiocshon mibipadquid matses mimbi icmendac.

8 Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nēbi abitedishun icbo matses mimbi icmi-

ambo iquec. 9 Utsien Nuquin Papapadquidquoio yequi matsesun Nuquin

Papan tantiamiacpaden ambi abi yacnoshon uaido mayan bēdabon chiac

nabamboedi nēbi aton Papabēd tsadec abitedishun Icbombo yanac. Aidi

Nuquin Papan chiapadomboen nanuec nidaidēnshun tishac matsesash

matses tantiec matses icsaid bedshunash abided cuidadec unēsash abite-

dishun Icbombo yampanēdash.

10 Nuquin Papa abitedi uaquidquoio icnuc ambi tantiacpadec iquec.

Adquid icquin ambi, Matses icsaisa icmeshun con bacuē icmembī, quequin

tantiacpaden ēbi yacno abi tantiaquid yuedquid con Madombo iquendac,

quequin ambi chiampicpadquiequi aton Mado matsespanēdash. Aidi matses

yec natiamianquiequi icsaisa yec unēsash uincuenash bēyucanec abi yacno

dectatonepanēdash ma Nuquin Papan, Matses con bacuē icmembali, quequin tantiaido ēbi tsibanec dectatonepanu quiash. <sup>11</sup> Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnu Esuquidistu Nuquin Papa yacno choash, Con utsibo nec, quependac <sup>12</sup> aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tantia, Papa, quependac.”

<sup>13</sup> Adembidi chuioaic:

“Mibi tantiaquin mimbi chiampicpadomboen nabanash choaobi, Papa.

Ēbi tsibantequid mimbi bēdaidquio icmiaidquio bēec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuiampic.

<sup>14</sup> Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash <sup>15</sup> ma mayan icsan ambi dacuēdmiaido ambi yuaido ichoedi matses ěmibi mēnchictequid ma icpanuna. <sup>16</sup> Ēmibi uaido mayan bēdabo unēstequid icsho mēnchicnu, quenquio yec matsesash Esuquidistu unēspanēdash. Abadauanēn tsyuecquido mēnchicnu, quiash matsespanēdash.

<sup>17</sup> Aden ambi chiacpaden nanuec matsespadquid yampanēdash. Adec matsesash matses nēnacpadquieic nēmpañēdash. Abi bundoacpadquieic bundopanēdash. Abi natiacpadquieic natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēspanēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. <sup>18</sup> Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquio icmec cho, cac badedquio choquin chieshesa nuqui icmendac.

### 3

#### *Abi yacno yuedanquidquio icquin Moises dēniacquid Esuquidistu*

<sup>1</sup> Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icoata caid Esuquidistu nec, quequin aidquio tantiaquionona.

<sup>2</sup> Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuidedchuidedampicpaden Esuquidistun adomboembidi chuibampanēdash. <sup>3</sup> Aidi

Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. <sup>4</sup> Nēditēd con shubun ēbēdi tabadendac, quequid shubu icho nec. Aden Nuquin Papan chiacpadomboen aton shubun icquido bēdambocquid icmequid Esuquidistu nec. <sup>5</sup> Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. <sup>6</sup> Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepañēdash.

Aidēn shubun icquid nebi, qeshun chieshenquiocquin cainquidquio aton shubun icquidquio nuqui nendac.

*Chieshenda*

<sup>7</sup> Aton shubun tabadnuequid naden Nuquin Papan Mayanën ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

<sup>8</sup> Equipito yacnoēsh cuēte nibēdacno capuquin tsusedpabon, ¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

<sup>9</sup> Cuēte nibēdacno seta 40ted matamec capucuenequin tsusedpabon Nuquin Papan nadatiambocquin naded-nādedsho isquimbi

¿Ambi chiaid niacshoda Nuquin Papan ēbi cuidpeba?

Isbono, quiacpadquiec tsusedpabo icsamboec tabadpampic.

<sup>10</sup> Adec tabadsho isash nēishpondabi.

Ēmbi chiaid chieshēnec ambibi tantiacpadequi icsadenepampic.

<sup>11</sup> Adquid icsho isun chushcain: Ēmbi abitedi uabanquin nainash ēbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

<sup>12</sup> Abiambo Yampid Nuquin Papa abi iquec, quequin tantiasch chieshēdchitomane qeshun tantiadonequiota. <sup>13</sup> Nuquin Papan

chiacpadquiec tabadnuna, quec badiadquidēn-badiadquidēnquiec chuinanec onqueta ma adoac icsamianquidēn chiac Nuquin Papan

chiaid chieshēnenquiocpanuna. <sup>14</sup> Esusbēd icquid nebi, quiondapaden tantiadenequin caimbudec aton matses yec Esus yacno nidanetequidquio

mibi nendac. <sup>15</sup> Nuquin Papan chiampid utsitsen chuinu. Tantia:

“Nēbimbobi Nuquin Papan chiaid tantesa uampicpaden tantesa uainda.”

<sup>16</sup> ¿Tsuntsin Nuquin Papan chiaid tantiaschun chieshēmpampic? ¿Equipito yacnoshon bēyucanquin Moisesēn buanaido Nuquin Papan chiaid tantiasch

chieshquido yanenquioda icpampic? <sup>17</sup> ¿Tsutsibidi seta 40ted matamec chiesho isash Nuquin Papa aidtedbidi seta matamec nēishted-nēishtedpampic?

Adoac ¿Cuēte nibēdacnoēsh icsaquidtedi unēsbudnenquioda icpampic?

<sup>18</sup> ¿Abitedi uabanquin nainash ēbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshēnquid

Nuquin Papan chienquioda icpampic? <sup>19</sup> Ai, tsusedpabon Nuquin Papan chiaid tantiasch, Bēdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshēnsho Nuquin Papan

abi yacno puduedmetiapimbo icpampic.

**4***Ēbi yacno puduedash ēbēd tabadtequid quiaid*

<sup>1</sup> Ēbi yacno puduedash ēbēd tabadtequid iquendac, quequin Nuquin Papan chiampicpadomboen nēbimbobi chuioaique. Abi yacno abēdi ic-

tiapimbo icchitomane quequin Esuquidistu tantiadonequionona. <sup>2</sup> Ēbi yacno puduedash tabadtequid iquendac, quequin ēndenquimboshē Nuquin

Papan nuquin tsusedpabo chiampicpadomboen nēbi nuqui chuioaic. Aden ēndenquimbo chuisho tantiasch, Nuquin Papan chiaid abimbo iquec, quiasch

tantienquio yanash, Aid cainu, quetiapiimbo tsusedpabo utsi-utsiec yampampic. <sup>3</sup> Ambi chiaid tantiaquidomboen nēbi aidbēdi tabadec.

“Ēnden yampidon tantienquiocsho isash, Abitedi uabanquin nainash ēbi tabadacno chotiapiimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash

tabadpampic. <sup>4</sup> Abi tabadaid chuiquin Nuquin Papan naden dada uamiampique. Tantia: “Seistedec ushquin abitedi uabanash badiad utsin ênash tabadpobi.” <sup>5</sup> Ashumbic nadentsen dada uamiampic:

“Ëbi ênash tabadacno ëmbi chiaid chieshênquido chotiapimbo iquendac,”  
quequin chuipampic.

<sup>6</sup> Aden chuimiac êndenquimboshê ambi chiaid tantiesa icquin niacniacquec Nuquin Papabêd tabadtiapimbo icpampid icnubi ambi chiacpadomboen naquin caimpampidobêd nêbi nidaid utsi-utsiec icquido Nuquin Papabêd tabadtequid nendac. <sup>7</sup> Ambi tantiacpadên Nuquin Papan chuimiapaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uapampic. <sup>8</sup> Chuiquid dapa Dabid tishambocnoc Equipito yacnoêsh nidaid Canan yacno abi chuiquid dapa Osuebêd isadaidbo chopampic. Capuec ênêdash nidaid Canan yacno cho-choash isadaidbo ênêdenquio yec tabadte icnuc, Ëbi yacno ênêdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. <sup>9</sup> Aden Dabid pado chuimiad tantiash abi tantiadonequidombo Nuquin Papabêd tabadquido nendac. <sup>10</sup> Aden uabanquin nainash Nuquin Papa tabadacpadec ambi bêdambo icmenuequin tantiactedi nabanquin nainash aidbêdi tabadendac. <sup>11</sup> Nuquin Papabêd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

<sup>12</sup> Nuquin Papan chiaid ambia chuipampidquio abi iquec. Nadatiambocquïn tantiamete ambi chiaid nec. Shocosh siante abiuc daëdi cuënumbocquidên siaid uguëduc sênquin nami icsaid isendac. Adomboembidi Nuquin Papan chiaid chiac papuededquin matsesên tantiaidtedi uguëduc sênaid isacimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimi tantiaid icsa nêid icnubi mimi tantiaid utsi bêdambo iquec. Adecbidi, mibi bunaid icsa nêid icnubi mibi bunaid utsi bêdambo iquec, quequin tantiamebanshun mimi tantiaid icsa mibi bunaid icsabêdtabi ênta, quequin Nuquin Papan chiaidênquio mibi tantiamendac.

<sup>13</sup> Abitedi isquidquio Nuquin Papa nec. Adquid icquin matses ompodtiapimbocnoc isendac. Adembidi, Ëmbi chiacpadomboenda matsesên nabanoshe. Tantanu, qeshun, abi yacno tabadnuequin cainquido bêsiquoquin ambi nabanaidtedi chuimendac.

### *Matses chuibanec Nuquin Papabêd onquequid dapa Esuquidistu*

<sup>14</sup> Adec Nuquin Papa abitedi isquidquio icnubi icsambocquid icquin ambemi matsesên aid chuitiapimbocsho isun abi tantiaquido chuibanec Nuquin Papabêd onquequid dapa ênden abi yacno dectatonêdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona. <sup>15</sup> Matses chuibanec Nuquin Papabêd onquequid dapa matses yequi natiamiacmaidbimboec tsadpondash, que-tiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquio Esuquidistun icpanêdash. <sup>16</sup> Adquid nuqui chuibanec Nuquin Papabêd onquequid dapa iquec, quequin tantiec dacuëdenquio yec abi yacno ênden Esuquidistubêd puduedquidëmbimboen Nuquin Papa êmbitsen chuinnuna. Icsashun Nuquin Papa chiac, Con mado Esus mibi icsaid bedshunash abided cuidadpanêdash, quequin tantiec mibi icsaid bêpiscudobi, quequin mibi tantiamec. Adembidi mibi natiamiaid

abi chuisho Nuquin Papan Mayanën mibi chieshmenquiocquin dayacquoio icmendac.

## 5

<sup>1</sup>Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cuesunedenequin taidenenpampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taidenenpampic. <sup>2</sup>Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin <sup>3</sup>nidaidën capuquid yua utsi-utsien cuesunedenepampic.

<sup>4</sup>Aidi, Con matses chuibanec Nuquin Papabëd onquequid dapa icnu, quenquoio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. <sup>5</sup>Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquoio Esuquidistu icpanëdash. Aton Papambien:

“Mibi con Madombo neque.

Con shubun icquido mimi icmiaido chuibanec ëbëd onquequid dapa icta,” capampic aton Papan Esuquidistu chuiquin. Adembidi Esuquidistu chuoiaquin aton Papanquoio:

“Matsesash icsaisa yec min utsibo icsaid bedshunash cuidadec unësash uincuenash matses chuibanec ëbëd onquequid dapa icta,”

capampic. <sup>6</sup>Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquoio mibi nendac.”

<sup>7</sup>Adec, Con Pan chiampicpadquid icnu, quish matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquio icmepanëdash. <sup>8</sup>Nuquin Papan Madombo iquequi matsesacsho mëyanac Nuquin Papan chiacpadomboen tantiabepanëdash. <sup>9</sup>Aden tantiabesh matses icsaid bedshunash abided cuidadash Nuquin Papa yacno Yuedanquid yanguiopanëdash. <sup>10</sup>Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

### *Nuquin Papan chiaid ënden tantiaboedi tantiesa yanenda*

<sup>11</sup>Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidtedi chuitiadquiocquin mibi eme uacsho ¿mitsipadomboentsimbi chuibanquin mibi tantiamete? <sup>12</sup>Mibia utsin tantiamiaid icquin ënden tantiabempatecnëdan mibitedishun. Adembidi mimi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatipimbo mimi icpec. <sup>13</sup>Shuma chishquid bacuëmpi, Bëdamboen nata, quequin chiaid tantiesa nec. <sup>14</sup>Pete pequidëmbien, Nadomboen nata, quequin ismiac adomboembidi isbanec



mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquo yanshun adomboen nabandene. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

## 6

<sup>1</sup> Aden Esus chuiquin abia tantiamiaid bëdamboen tantiashun abipadquid icnequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquo icta. <sup>2</sup> Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquo icta. Adembidi, Abi tantiesa cuidtequid iquendac, quequin tantiec bëdamboec tabadteneta. <sup>3</sup> Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. <sup>4</sup> Aden Esuquidistu tantiasho isun aton Mayan Nuquin Papan meniaid icboedi <sup>5</sup> Nuquin Papan chiacpadomboen nadatiambocquin nabamboed, <sup>6</sup> Esus matsesquio yec ic-samboquid nepanëdash, quiash, Esus cuesten decan, quequidbimboecquid icsho Nuquin Papan aid isendac. Aidën oncain Esus mamëshunec. Aden Esus tantienquio yanacsho bëdamboen tantiamenuen chuiquin, Icsaobique. Èbi icsaid ënu, cametiapimbo Nuquin Papan iquendac.

<sup>7</sup> Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. <sup>8</sup> Echobëd cana shëta chedo ëshë idash dadpen yanushë qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

<sup>9</sup> Aden mibi chuiquimbi, Nuquin Papan nësiatemaid mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. <sup>10</sup> Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. <sup>11</sup> Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. <sup>12</sup> Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unësash Nuquin Papa yacno puduedampicpadece Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

### *Naden nanu quec Nuquin Papa muatiapimbo iquec*

<sup>13</sup> Èndenquimboshë Abadauan bëdamboec tabadsho isun ambia tantiaquidquo abi yampidquibidi icquin, Èmbibi tantiacpadomboen nanuna. Abimbo caimbi, quequin Nuquin Papan naden chuipampic: <sup>14</sup> “Mimbi tishmiaidën tsyuecquido dadpen iquendac, qeshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. <sup>15</sup> Aden chuisho tantiashun caimbudquin tishpimpocquidëmbi Abadauanën chidon aton mado tishpampic.

<sup>16</sup> Abimbo caimbi, quequin abitedi tantiaquidënu Nuquin Papan chiac utsi, Muenec, quetiapimbo iquendac. <sup>17</sup> Adembidi, Èbi yacno tabadte iquendac, quequin ënden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi,

quequin chuipanēdash. <sup>18</sup> Adec Nuquin Papa muatiapimbo icquin ambi chi-acpadomboen naquidquo Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ěbi puduedmequid Esus iquec, quequin caimbudquid nuqui nendac. <sup>19</sup> Aden caimbudquin, Ēnden Nuquin Papa yacno puduedshun ěbi yuedquid iquec, quequin nuqui tantiec. <sup>20</sup> Nuqui caintequid Esuquidistu ěnden Nuquin Papa yacno bēyucanec abi tantiaquido chuibanec Nuquin Papabēd onquenuec puduedash Medquisedecpadquid yampanēdash.

## 7

### *Medquisedec matses chuibanec Nuquin Papabēd onquequid dapa*

<sup>1</sup> Medquisedec nad icpampic, Saden yacnocquido chuquid dapa nepampic. Ambi Saden cain cuēnāidi yuecshun Edusaden cain cuēnoapampic. Aidbidi Nuquin Papan, Matses chuibanec ěbēd onquequid dapa icta, caid nepampic. Adquid icquin aton mado bedboedo tsibānshun cuesuniash Abadauan chosho bēquedshun, Nuquin Papan bēdamboen isaidquio mibi nec, quequin Medquisedequēn Abadauan chuipampic. <sup>2</sup> Adsho tantias, Nuquin Papan con mado bedmiaid nebi, quequin ambi cuesunboēn na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanēn menepampic. Bēdamboen tabadmequid icsho Medquisedec cuēmpampic. Adembidi, Saden yacnocquido chuquid dapa icquin bēdamboen tabadmequid icsho Medquisedec cuēmpampic. <sup>3</sup> Aidi aton papabēd aton tita nibēdquid nec. Nēid ushēn tishaid nebi, quetiapimbo aid iquec. Abi unēste ushē adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabēd onquequid dapa yanash adquidquidquid iquec. Utsi yantiapimbo iquec.

<sup>4</sup> Aidi ěbi chuibanec Nuquin Papabēd onquequid dapa nec, quequin ismequin ambi bedaid aton na musuctanquin Abadauanēn Medquisedec menepampic. <sup>5</sup> Yuecquiocshon Nuquin Papan: Min matses chuibanec ěbēd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unēsan aton tsyuecquid abentse-abentsec icpampic. Debi Abadauanēn tsyuecquid yec aton utsibonquio aton na musucaid bedquid icpampic. <sup>6</sup> Medquisedequēmbien tsyuecquidpenquio icquimbi Debin tsusedpa Abadauanēn na musucaid bedshun, Nuquin Papan bēdamboen isaidquio mibi nec, quequin Abadauan chuipampic. <sup>7</sup> Bēdambo mibi icmenu, quequin Nuquin Papan chiaid ambia chuquid Medquisedec icpampic. <sup>8</sup> Yuecshun ambia chuibanec Nuquin Papabēd onquequid dapapadquiocquin aton matsesēn na musucaid bedquid Debi unēspampic. Adēcbidi aton tsyuecquido unēspampic. Padnuen Abadauanēn na musucaid bedquid Medquisedec unēsesa yampampic. <sup>9</sup> Adquid icsho Debin buchisio Abadauan caidēn, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. <sup>10</sup> Aton tsyuecquid tishambocnobi Debin buchisio Abadauan caidēn Medquisedec bēquedtuidshun menepampic.

### *Medquisedec yampidpadquid Esuquidistu*

<sup>11</sup> Abadauanēn tsyuecquido Debipadquidon Nuquin Papan nadomboen nata quequin chiaid nadenequin aton matses bēdamboquid icman Medquisedecpadquid choenquio ictsempampic. <sup>12</sup> Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabēd onquequid dapa yampanēdash.

Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. <sup>13</sup> Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. <sup>14</sup> Aton tita Uda cuëmëdquidën tsyuecquid icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. <sup>15</sup> Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. <sup>16</sup> Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquio Esuquidistu yampanëdash. Matsesash icsaisa yec unëssh uincuempanëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. <sup>17</sup> Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa Medquisedecpadquid mibi nendac,”  
quequin chuipampic.

<sup>18</sup> Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. <sup>19</sup> Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadacbimboec nuqui tabadec.

<sup>20</sup> Abimbo caimbi. ¿Matses chuibanec Nuquin Papabëd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouditsëqui chuipampic. Debi unësan aton tsyuecquid aton matses chuibanec Nuquin Papabëd onquequid dapa icpampic. <sup>21</sup> Nëbi Nuquin Papan aton Madombo caic:

“Icbo icquin matses chuibanec ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiembi,”

quequin chiampicpadec aton Madombo adquid yanquiopanëdash. <sup>22</sup> Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibëd aton tsyuecquid adecbidi adquid ictiapimbo iquec.

<sup>23</sup> Debi adecbidi aton tsyuecquido unëstequidquio iquec yuen chuibanec Nuquin Papabëd onquequid dapa ictiapimbo iquec. <sup>24</sup> Esusien abi yacno chuibanec bëyucanec puduedash ënëdenquio yec Nuquin Papabëd onquequid dapa nendac. Adquid utsi nibëdendac. <sup>25</sup> Adec Nuquin Papa yacno ënëdenquio yec tabadquin abi tantiaquido chuibanec aton Papabëd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

<sup>26</sup> Adec aidi abi yacno yuedanquid, icsa nibëdquid, icsa uatiapimbocquid, icsa nibëdquiec yacno tabadquid yec abi tantiaquido chuibanec Nuquin

Papabēd onquequid dapa yampanēdash. <sup>27</sup> Debipadquidpenquoio yec, Mat-  
ses icsaquid neque. Nuquin Papan chiampicpaden baded-badedquien  
nidaidēn capuquid yua cuesunenu, quenquoio icpanēdash Esuquidistu. Mat-  
ses icsaid bedshunash abided unēspanēdash padpidec unēsenquoio icnush.  
<sup>28</sup> Debibēdi abipadquid icsaquid icsho, Min matses chuihanec Nuquin Pa-  
papabēd onquequid dapa aid icmeta, Nuquin Papan cac Moisesēn Debī adquid  
icnepampic. Nēbi Medquisedecpadquidien Bēdamboquid icpampid ēbēd on-  
quec ēbi yacno Puduedquid Abentsēcquioibi mibi iquendac. Abimbo caimbi,  
quequin Nuquin Papan chiampidquio Esuquidistu nendac.

## 8

### *Matses chuihanec Nuquin Papabēd onquec abi yacno puduedquid*

<sup>1-2</sup> Adec Esuquidistu abi tantiaquido chuihanec Nuquin Papabēd on-  
quequid dapa Nuquin Papa tabadacnombobi puduedoash aton Papa  
Abiambo Yampidbēdquio onquec tabadec. Debipadquidoen aton mat-  
ses chuihanec nidaidēnshun Nuquin Papa tabadte shubu uashunaidēn  
puduedash auēshquio Nuquin Papabēd onquepanēdash.

<sup>3</sup> Con matsesbēdi icsaposh icmanendac, queshun aid shubun puduednu  
queshun umanucshun nidaidēn capuquid yua aidon cuesunepampic.  
Adembidi Nuquin Papa tantiaquin menenuequin aton matsesēn bē-béaid  
bedshun nadenepampic. Esusien Nuquin Papa yacno puduedoanush, Ēbi  
icsaid ēbibi cuidadnu, quenquoio yec matses icsaid bedshunash abided  
cuidadpanēdash. <sup>4</sup> Aidi unēsabi yec nidaidēn tabadnuc Moisesēn chiacpadec  
Debipadquid matses chuihanec Nuquin Papa chiec onquequid icpanēdash.  
Adquid icnuc nidaidēnuēsh matses chuihanec Nuquin Papabēd onquequid  
dapa ictiapimbo Esuquidistu icpanēdash. <sup>5</sup> Nidaidēn tabadquin Nuquin Papa  
tabadte shubu uashunaidēn puduedshun Debipadquidēn nashumpampic.  
Ēndenquimbo Nuquin Papan shubu naden icchitec, quequin abi tabadte  
shubu uanu, qesho tantiashun: “Macuēsh yacnoshon chuibocpadom-  
boen shubu uame,” Nuquin Papan cac Moisesēn chuiopampic. Aden  
chiac Nuquin Papa tabadte shubu uashumpampic. <sup>6</sup> Adnubien yuecash  
Nuquin Papa tabadacnombo aton Madombo abi tantiaquido chuihanec  
Nuquin Papabēd onquec puduedpanēdash. Aidi abi tantiaquido yuedquid  
nec. Aid ambo puduedabicnuc ambi naden nata cain chiaid Nuquin Pa-  
pan Moises meniampicpadomboen naquin aton matses chuihanec Debi-  
padquid Nuquin Papabēd onquec abi yacnombo yuedanquid ictiapimbo  
icpampic. Esuquidistuen Nuquin Papabēd abia yampid bēyucanec abi yac-  
nombo nidoash abi tantiaquido chuihanec Nuquin Papabēd onquequid yec  
yuedanquidquio nec.

<sup>7</sup> Ēndenquimbo nadomboen nata cain chiacpadomboen nadenequi matses  
icsaisa yanuc naden nata cain chiaid utsi Nuquin Papan chienquoio ict-  
sempanēdash. <sup>8</sup> Nadomboen nata caqui ambi chiacpadomboen nadenequi  
matses icsaisa yantiapimbo icsho isash:

“Yuecash ēmbi chiaid utsi iquendac.

Aid isadaidbo chiendambi. Aidbidi Udan tsyuequido chiendambi.

<sup>9</sup> Aidēn tsusedpabo Equipito yacnoshon bēyucamequin

ēmbi chiacpadpenquiocnoc chiaid utsi iquendac.

Ēmbi abia naden nata cain chiaid Isadaidbon chieshēnsho  
utsibon natiacquin mēyansho isun isadaidbo mēnchicamboccondambi.

<sup>10</sup> Ēnden chiaid adquio icnuc:

Nēbi ēbēd tabadmetequid chiaid nendac, quequin isadaidbo chiemi.

Ēmbi nadomboen nata cain chiaid isadaidbo pausunendambi tantiate bunquionoc.

Aden tantiamiash aton Papa iquendabi.

Adecbidi adquidquo con matses iquendac.

<sup>11</sup> Adoaid Nuquin Papa tantiaquid icta, quesa iquendac.

Abitedi ēbi tantiaquidquo iquendac.

Nēidtedishun ēbi tantierendac:

Nēidic, bacuēbo; nēidic, caniabo; nēidic, tsusiobo aidtedshun.

<sup>12</sup> Aido icsaidtedi padpiden tantienquo yec bēpiscudendabi,”

quequin Nuquin Papan chiaid utsi nendac. <sup>13</sup> Chiaid utsi nec, quequin ēnden abia nadomboen nata cain chiaid ēnēdendac.

## 9

### *Nuquin Papa tabadte shubu uashunaidēn puduedshun naid*

<sup>1</sup> Nuquin Papan ambi, Ēbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ēbi tabadte shubu uashun cacpadomboen abi nidaidēn tabadte shubu uashumpampic.

<sup>2</sup> Nuquin Papa tabadte shubu uashunaid nitsinaid anquēnē uaid daēd icpampic. Baded-badedquieic puduedte anquēnē uaidēn tabote dectantebēd pan sante cueste nacenaid icpampic. Icsaisa anquēnē uaid nec caid niosh.

<sup>3</sup> Aid nuntambidi bitsipambocquid daēdcashun dectanēdaid shēcuē anquēnē uaid dayun uequid Isaisa Bēdaidquo cain chianiaidquo niosh. <sup>4</sup> Aid nuntan bēdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonēn cueste tiaid dēyucaid icpampic. Aid sauedaid utsi cuēnote pada uashun Nuquin Papan nadomboen nata quequin dada uaid icpampic. <sup>5</sup> Aid sauedte matincash tabadquid ambi abi yacnoshon uaid mayan bēdambocquidbimboecnuc nacenaid daēd icpampic. Aid daēd Nuquin Papa icsaisambo bēchomauanquieic nac-nacquio ismiantequid icpampic. Nidaidēn capuquid cuesuniaidēn intac daseccaid isun Nuquin Papan matses cuidenquioctsiash, quequin aidēn podon dēcatequin dectanaid diadpampic. Aid Icsaisa Bēdaidquo anquēnē uaid sanaidtedi chiombi.

<sup>6</sup> Aden shubu uashun aidēn icquidtedi nambanash icsaisa anquēnē uaidēn baded-badedquieic puduedquidon Nuquin Papan Moises chiacpadomboen uesquin nabampampic. <sup>7</sup> Padnuen Isaisa Bēdaidquo anquēnē uaidēn setan-setanquieic matses chuibanec Nuquin Papabēd onquequid dapa puduedpampic. Baded-badedquieic puduedtemaid aid nec. Ēmbi con matseshēdtan Nuquin Papan chiaid niacposh icmanendac, quequin nidaidēn capuquid yua cuesuneshun intac bēdshun buanec nuntan bitsipambocnoc daēdcashun dectanēdaid shēcuē anquēnē uaid dayun uequid Icsaisa Bēdaidquo caidēn puduedquid abentsēqui nepanēdash. Unēsaidēn intac buanenquo yec puduedtemaid aid anquēnē uaid nec. <sup>8</sup> Adec aid anquēnē uaidēn puduedquid isadaidbo abentsēqui icnubi Nuquin Papa yacno aton matses puduedte nibēdec, quequin Nuquin Papan Mayanēn tantiamete nendac. <sup>9</sup> Adembidi, baded-badedquien nidaidēn capuquid yua cuesunedenec, Ēbibi bēdambocquid nec, quetiapimbo icpampic. Adembidi aton matses icsaisa icmetiapimbo icpampic. <sup>10</sup> Adecbidi, Nēidic petequid nec. Nēidic actequid nec. Nēid nanush mēpamēdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanēn nuqui tantiamec.

*Esuquidistu abided unēsec intac chiuidaid*

11 Ambi chiaid utsi tantiamenuc ambi uacmaid yec abipadquid Esuquidistu Nuquin Papabêd tabadboedi nidaidên budash matsesash icsaisa yec matses icsaid bedshunash abided cuidadec unêsash Nuquin Papa yacno matses chuibanec aton Papabêd onquequin chuiquid dapa iquec abi yacno Yuedanquid yampanêdash. 12 Nidaidên capuquid yua cuesuneshun intac bedshun buanec Nuquin Papa yacno puduedenquio Esuquidistu icpanêdash. Aidi abia yampidi icsaisa matses icsaid bedshunash abided cuidadec unêsascho cudan siac aton intac chiuidash Nuquin Papa yacnombo puduedoapanêdash. 13 Aidi matses icsaid bedshunash abided cuidadabicnuc nidaidênshun natemaid nasho matses cuêshêdmepanêdash. Adoac utsibêd ictiapimbocsho isun nidaidên capuquid yua cuesuneshun aidên intacbêdta sisapuc daêd uashun daseccac icsaisa icmiabi yequi aton shubun puduedoapanêdash. 14 Abia abêd yampid unêsesa aton Mayabêd iquec Esuquidistu icsaisambo yec, Matses icsaid bedshunash êbided cuidadebi, Papa, quianec unêsascho siac aton intac chiuidacsho isun uincuemaidên nuqui pauquec ma Nuquin Papan chiacpadomboen nate bunquidquio nuqui icpanueshun. 15 Adoaidi Nuquin Papan chiaid utsi chuiquin tantiamequid Esuquidistu icpanêdash. Ênden matses yampid icsaidbêdtabi nêbi matses icsaid bedshunash abided cuidadec unêspanêdash êbi tantiaquido êbêdi tabadmenu quiash.

16 Adnubien abi unêste tantiec, Êbi unêsan êmbi chiacpadomboen con na abitedi menebanta, matses quepec. Aden chuiquid unêsabi icnuc ambi chiacpadomboen utsibon menetiapimbo iquec. Icbon na abi iquec. Aid unêsan aidên na icboedi utsin na yanec. 18 Adembidi ambi nadomboen nata cain chiaid Moises menequin, Êmbi chiaidtedi nadenesho isun êmbi chiacnombo mibi buanemi, quequin Nuquin Papan chuipampic. Aden menequin chiac Moisesên nadopampic. 19 Nuquin Papan chuibocpaden chuishun nidaidên capuquid yua cuesuneshun intac bedshun actebêdta daêd uain cacushun cuête shubi madquênaid podo mêsequiabicquid bedshun sedquid piu uaid potaneshun daêd uaboed nênanshun Nuquin Papan chiaid dada uaidbêdta matses daseccabampampic: 20 “Nêid Nuquin Papan chuibocpaden mimbi natequidquio nec,” quequin ismequin Moisesêmba abitedi daseccabampampic. 21 Adoshombic Nuquin Papa tabadte shubu uashunaidbêdta aidên tabêcaidtedi daseccabampampic. 22 Cuesuniaiidên intac daseccatequid nec. Shubu chedo cuesuniaiidên intaquên daseccabicquid mishtemaid nec. Adecbidi cuesuniaiidên intac chiuidenquiocnec matses icsaid Nuquin Papa bêpiscudenquio iquendac.

23 Nuquin Papa yacnombo puduednush icsaisa unêsendac, quequin ismenuen matses chuibanec Nuquin Papabêd onquec nidaidên capuquid yua cuesuneshun intac bedshun buanec Nuquin Papa nidaidên tabadte shubu uashunaidên puduedpampic. 24 Esuquidistu matses icsaid bedshunash abided cuidadec unêsash nidaidênshun Nuquin Papa tabadtebimboecnuc shubu uashunaid yacno puduedenquio icpanêdash. Abi tabadacnombo abi tantiaquido chuibanec aton Papabêd onquec puduedash abi tabadec. 25 Ambo puduedash, Matses icsaid bedshunash êbided padpidec cuidadnu, quenquio yec tabadec. Nidaidênshun setan-setanquien Nuquin Papa tabadte shubu uashunaidên puduedquin aton intacpenquio bedshun daseccadenec. 26 Matses icsaid bedshunash abided cuidadec unêsambo yec Nuquin Papa yacno puduedoash padpidec nidaid yacno choash unêsash abuc Esuquidistu puduedoatsiandac. Adenquio iquec matsesash abi unêste ushênquibi matses icsaid bedshunash abided cuidadpanêdash nêid nidaid naimêdbudte anoentsêqui icnuc. 27 Nidaidên icquid unêste ushê abentsêc iquec. Unêsascho

ambi naid Nuquin Papan chuitequid ushë choendac. <sup>28</sup> Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choaindac.

## 10

### *Abided cuidadec unëste abentsëquënniobi*

<sup>1</sup> Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinec bëyucanec Nuquin Papa yacnoësh yuedanquidquo choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. <sup>2</sup> Aidënquo dasecaquin matses icsaisa icmiac nidaidën capuquid yua padpiden cuesunenquo ictsempampic. Adecbidi, Icsambocquid nebi, quenquo matses ictsiandac. <sup>3</sup> Aton matses isaisa icmetiapimbocquin setan-setanquien nidaidën capuquid yuaded cuesunepanëdash. <sup>4</sup> Adshun yuan intac bedshun daseccaidën matses icsaisa icmetiapimbo iquec.

<sup>5</sup> Adoaquien Esuquidistu nidaidënshun tishac caniaash onquec: “Nidaidën capuquid yua cuesunenubi ëmbi chiacpadomboen matsesën natiapimbo iquec qeshun yua cuesunete bunenquo mibi iquec, Papa. Matsesën tishtequid mimbi icmiaidquo nebi, Papa.

<sup>6</sup> Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

<sup>7</sup> Adsho isun mimbi chuiquin dada uamiampicpadomboen naimbi, Papa.”

<sup>8</sup> Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquicoشو isash, Padi. Aid nainquiocquin ënta, quequin mimbi matses chuinuc <sup>9</sup> mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unës Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. <sup>10</sup> Aden Nuquin Papa bunacpadomboen nash unëstiapimbo yanshun abi unëste ushënquo abi tantiaquid paucpanëdash.

<sup>11</sup> Aden matses icsaid paucpec, quetiapimbocnoc badiadquiën-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac.

<sup>12</sup> Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. <sup>13</sup> Ambobi tabadquimbi abi chieshënquido ambi chiacpadomboen naquidquo icmete ushë cainec. <sup>14</sup> Abided unëste ushënquo abi tantiaquid ambi icsaisa icmiac abëd cuëshëdesambo yampanëdash.

<sup>15</sup> Adembidi Nuquin Papan Mayanën Nuquin Papan chiaid utsi naden chiec:

<sup>16</sup> “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquo icmendambi, quec Icbo.”

<sup>17</sup> Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquo yec bëpiscudendabi, queoac Icbo,”

quequin chuipanëdash aton Mayanën. <sup>18</sup> Adec abi icsaid bëpiscudash nidaidën capuquid yua cuesuneta quenquo Nuquin Papa iquec.

### *Nuquin Papa yacno puduedte cainta*

<sup>19</sup> Adoaidi Esuquidistu unēsacsho isun cudan siac aton intac chiuidan, Ambi paucaid nebi, quec dacuēdenquo yec Nuquin Papan shubu icsaisa caid yacnombo puduedte ushē nuqui cainendac. <sup>20</sup> Matsesash abided cuidadec unēsash Nuquin Papa yacno puduedoash tabadquid Esuquidistu nec. <sup>21</sup> Ambo nidash Nuquin Papabēd onquequin aton shubun icquido nuqui Esuquidistun chuibanubi, <sup>22</sup> Ambi paucaid ambi dapanacnimboeccquidbidi nebi, quequin tantiaquin abi yacno choacnimboen nidaidēnshun Nuquin Papa chiec onquec tabadnuna. <sup>23</sup> Nuquin Papa ambi chiacpadomboen naquidquo nec, quequin abi tantiaquid yec abi yacno puduedebi, quequin caimbudnuna. <sup>24</sup> Aden tantiaquin abi tantiaquid utsibobēd tantiananec bēdamboec tabadquin nashununa. <sup>25</sup> Aden nabanec abi tantiaquid utsibobēd iccuededtiapimbo iquebi, utsi-utsiec quiacpadec adenquo icnuna. Adec iccuededec, Nuquin Papan chiacpadquiec bēdamboec tabadnuna, quec chuinenta. Niacquid dadpen icscho isash, Matsesēn naid chuibanquin cuidte ushē badedquo choec, quiaish baded-badedquiec chuinenta bēdamboec tabadte bunec.

<sup>26</sup> Ēbi icsaid bedshunash abided cuidadec Esuquidistu unēsapanēdash, quequin tantiaish icsaded-icsadedquid iquec, Adquidquo Esus nec, queti-apimbo iquec. <sup>27</sup> Aid cuidte ushē chonoc nēishun comapenen chushcaindac Nuquin Papan abi chieshēnquido nibēdamequin. <sup>28</sup> Nadomboen nata cain Moisesēn chiaid niacsho isun daēdshun chiac niacquid unēsmiampic. <sup>29</sup> Nuquin Papan abia naden nata cain chiaid niactenequid adomboen cuidnushē quiaish ēbi icsaid bedshunash abided cuidadec Esuquidistu unēsapanēdash, queboedi, Ēmbi tantiaquid Nuquin Papan Madopenquo matsesquo ēbipadquid icsacsho cuesuniac, quequin chieshēnsho ¿comapenen Nuquin Papan cuidenquioda icpadic? Adquid Nuquin Papan Mayanēn bēdambocquid icmenu quequin chiaid chieshēnquid nec. <sup>30</sup> Nuquin Papan: “Ēmbimbo ēmbi chiaid chieshēnquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedēmbi tantienquo yansho cuidquidquo Nuquin Icho iquendac. <sup>31</sup> Abi cuidantequid dacuēdampambo iquec,” quequin Nuquin Papan chiaid nec.

<sup>32</sup> Esuquidistu tantiaquid yanash mibi bēdamboec tabadondacpaden tantiamec chuinentaneta. Esuquidistu tantiaquid nebi, quec dayacquio yec bēdamboec mibi tabadteniondac. <sup>33</sup> Dadpen tabadnubi, ēmbi tantiaid Esus nec, qesho mibi utsibon mamēnshunondash. Adembidi aidon natiambocquin mēyanac. Adomboembidi Esuquidistu tantiaquid utsi mēyansho isun, Aidbēd icquid nebi, quequin ismequin mimbi nashundenepondac. <sup>34</sup> Esuquidistu tantiaquid utsi quēnēn nauedaid icsho isash abēdi tabadachimboec natiavianquiec unēsquo yec mibi tabadpondac. Adecbidi mibi chieshēnquidēn mitsana bedacsho isash Nuquin Papan ēbi menetequid ampetiapimbo iquec, quequin tantiec, Bēdambo iquebi, quec mibi tabadpondac.

<sup>35</sup> Adoaidi Nuquin Papan bacuē yec bēdambo iquebi, quiaish dacuēdenquo yec bēdamboen nabanec mibi ēnden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac. <sup>36</sup> Utsin mēyanquid Nuquin Papan chiaid chieshenquicoquin tantiaideneta. Adec tabadquin Nuquin Papa bunacpadomboen nabanash abi yacno tabadendac. <sup>37</sup> Nuquin Papan chiaid nadquo iquec: “Chiata. Nēbien mimbi cainaid mibi mēnchictequid choendac.



<sup>38</sup> Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. <sup>39</sup> Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

## 11

### *Nad iquendac, quequin tantiaquin cainquid*

<sup>1</sup> Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacimboen ëmbi tantiaid nec, quec tabadquidquio nebi. <sup>2</sup> Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

<sup>3</sup> Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi isaiddedi nibëdnuc çmitsipadomboentsi aiddedi icmëbampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

<sup>4</sup> Adembidi, Mibi tantiaquin mibi bunacpadomboen nidaidën capuquid con yua cuesuneshun tainu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

<sup>5</sup> Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdamboequid nec, quequin Nuquin Papan buanacsho nibënquin Enoc istuidambocpampic. <sup>6</sup> Abi tantiesa icsho isashien, Ëmbi bëdamboen isaidquio nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

<sup>7</sup> Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, qeshun, Èbëd icquid unës uanushe qeshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

<sup>8</sup> Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. <sup>9</sup> Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isaactsen aid shububidi buanash tabadoapampic. Adecbidi Isaquën mado Acobotsen tabadoapampic. <sup>10</sup> Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabatnenpampic.

<sup>11</sup> Adembidi Abadauanën Nuquin Papa tantiaquin aton chido Sada machobudash bacuë tishtiapimboquid icnubi, Nuquin Papan chiacpadquieci

con mado iquendac, quequin tantiacpadomboen Abadauanën chidon machobudquioshon aton mado tishpampic. <sup>12</sup> Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

<sup>13</sup> Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. <sup>14</sup> Nuquin Papa tantiaquid yec Nuquin Papabëd tabadendabi, quiash nidaidën quenënenquo yec aidtedi tabadpampic. <sup>15</sup> Ëbi tishondacnombo tantiec unësquo iquebique. Ambo nidoaibi, quiash nidtsempampic. <sup>16</sup> Adenquo yec, Nuquin Papa yacno tabadendabi, qesho tantiaash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

<sup>17-18</sup> Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiaasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cüesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. <sup>19</sup> Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

<sup>20</sup> Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

<sup>21</sup> Adnubien adembidi Nuquin Papa tantiaquin tsusio budash unësbudquimbi aton cüeste bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

<sup>22</sup> Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitidi: Aid nidaid yacno nidnu, qeshun con canite buanta, quequin chuiopampic Osen.

<sup>23</sup> Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cüesuneta, quequin chiaid niacquin dacuëdenquiocquin aton mado adopampic.

<sup>24</sup> Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshënec, Aidën madopenquo nebi, queopampic. <sup>25</sup> Ancanquid Nuquin Papa tantiesha nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. <sup>26</sup> Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic. <sup>27</sup> Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquo icpec, quenquo yec Nuquin Papa isacbimboec Moises tabadtenepampic. <sup>28</sup> Yuecsh Equipito yacno choashun adembidi tantiaquin, Bëyuec tishaid

unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquid Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

<sup>29</sup> Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnocquido acte chomiaidën men-toadbudnepampic.

<sup>30</sup> Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

<sup>31</sup> Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunquimbi.

<sup>32</sup> Adecbidi Nuquin Papa tantiaquid dadpen icpampic. Nëdic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpeshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. <sup>33</sup> Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquido icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adoshö isun piantiapimbo noc Nuquin Papan quiuëccac deonën penquiocpampic. <sup>34</sup> Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquioctiapimboedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. <sup>35</sup> Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuquin shoyombededtsëcquin cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. <sup>36</sup> Utsi-utsien shocosh bucun mëtaneshun quënën nauedacsho isun mamënsunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic.

<sup>37</sup> Adembidi utsitsen cuënoten seshunepampic. Adembidi utsitsen sënten nacsënsunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. <sup>38</sup> Nuquin Papa chieshënquid ëbëd tabadtemaido nec, quequin tantiec adpampic. Adoac quentiapimbo yec uano tabadnubien nidaid shëcuë uaidën utsi tabadpampic.

<sup>39</sup> Aidtedishun, Ebi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. <sup>40</sup> Aidtedi icnubi abi icsaid bedshunash abided

cuidadec unēsash uincuenash abi yacno nidoash Yuedanquid Abentsēcquiobi Esuquidistu yanabi icpampic adboedēmbi ma nuqui nēbi icquidobēdta yuedpanuna.

## 12

### *Aton bacuē Nuquin Papan dayacmenuequin namiaid*

<sup>1</sup> Aden Nuquin Papa tantiec chieshesa dadpen icpampic, quequin dada uasho isun ēbi chieshtometequid utsi ēbi icsaidbēdtabi nainquiocquin ēnuna. Adembidi dayacquiocquin Nuquin Papan chiacpadomboen nabanec tabadnuna. <sup>2</sup> Esuquidistu, abitedishun icbombo abia yampidquio ēbi chuibanec Nuquin Papabēd onquec bēyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ēbi yacno matses yuednu, quiash aton Papabēd tabadteneboedi matsesash icsambocquid-bimboecnuc cuesten dectanac chieshenquio yec unēsacsho uincuen uaid yanash aton Papabēdi Icbombo iquec. Aidquio tantiec isacbimboec nidaidēn nuquiibi tabadnuna. <sup>3</sup> Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenuquo icpanuna.

<sup>4</sup> Ēbi icsaid padpiden nainquio icnu, queshumbi natiatequid icnuc mimbi ēnambo iccoc. <sup>5</sup> ¿Con bacuē cain Nuquin Papan mibi dayacquo icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquo icmenuequin chiaid cacuidenda.

Adecbidi ambi natiamianquiopec camiaid icash chieshenda.

<sup>6</sup> Ambi matiamianquiopec camiaid dayacquo icmenuequin nametequid con bacuēbo nec,” quequin Nuquin Papan chiampid nec.

<sup>7</sup> Natiatequid mibi dayacquo icmetequid nendac. ¿Ēbi cudasaidquio con mado dayacquo icmenuequin namebanesa nebi, quecta aton papa icpadic? Padenquio. Ambi: Con bacuē nec, caid natiatequid icnuc, Dayacquo icmenu, quequin ancaquin chono uaic. <sup>8</sup> Natiatequid icnuc ambi dayacquo icmenu quequin namiaidpenquio yec, ambi, Con bacuē nec, caidpenquio mibi nec. <sup>9</sup> Ēnden dayacquo icmenu quequin mibi ancaquidēn mibi tishmequidēn chiacpadomboen natiatequid icnuc naquidquio mibi icpondac. Nēbi Nuquin Papan dayacquo icmenu quequin chiacpadomboen natiatequid icnuc naquidquio icnuna abēdi tabadnuen. <sup>10</sup> Abi tishmequidēn ambibi tantiacpaden dayacquo icmenu quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac. <sup>11</sup> Adoac nuqui natiaquieq tabadec. Adoaidi yuecash nuqui bēdamboec tabadendac. Adecbidi natiatequid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquio yec natiatequid dacuēdēnesa nuqui yanec.

<sup>12</sup> Aden tantiec dayacquo ictiapimbochoedi: Abipadquid iquendabi, quiash dayacquo yec tabadta. <sup>13</sup> Adenuidi naic tabadquin utsibo isme ma dayacquo ictiapimboquin niaquec cuēshēdte bumboedi bēdambo yampanuna.

<sup>14</sup> Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquieq nuquiibi icnuna, quiash aid tantiec tabadec isanec chuinanec adquid yanta. Adoesa Icbobēd tabadtapiimbocquid nendac. <sup>15</sup> Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban. <sup>16</sup> ¿Ada aton

chidopenquo chudquid icpec? Adecbidi, ¿Ada adembidi aton bēnēpenquo chudmequid icpec? quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe qeshun ¿ada Nuquin Papan bēdamboen tantiaid chieshēnquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. <sup>17</sup> Yucshun, Aton utsi Acobo aton papan chuibanosh, qesho tantiaish shubiquin, Mimbi bēdamboen tantiaid ēbitsen chui, papa, cac chuitiapimbocquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

<sup>18</sup> Adembidi, Nuquin Papan nadatiambocquin uabanaid tsusedpapan isampicadomboen mimbi isabiccoc. Macuēsh Sinai caid yacno choshon aidon isbenampid nēid iquec: natia nēdēnquedote; utsibic, inchēshacimboc isadquid; utsibic, cunquequid dapabimboec isadquid; <sup>19</sup> utsibic, shocosh shoncaten shoncacimboc onquenec pabiate paēmboshē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. <sup>20</sup> Adec macuēsh yacnombo icquin: “Ēmbi nadatiambocquin uabanaid ismenubi macuēsh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. <sup>21</sup> Aden Nuquin Papan nadatiambocquin uabansho isash: “Dacuēdampambo iquec, quiaish, Dacuēdebi,” queoapampic Moisessten uēdēquec.

<sup>22</sup> Mibien dacuēdenquo yec Macuēsh Sion cashumbic Edusaden Chuca Bēdamboquid caid Nuquin Papa ēnēdesambo tabadacno choacimboc mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ēmbi nashunaidtedi, Esus tantiaquid chotequid iquec, quiaish bēdambo iquebi, quec cuēdēdonec tabadendac. <sup>23</sup> Abi tantiaquidtedi Nuquin Papan bacuē icho yacpadquiec aton shubu abentsēquēnuēshi Icbobēd onquec ėnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ėnden tabadacimboc abēdi onquec mibi taēpoc. <sup>24</sup> Abēd icquin Nuquin Papan ambi ėnden chiaid ėmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ėnden mibi onquepoc. Mibi icsaid bedshunash abided cuidadec unēsō isun cudan siac intac chiuidnēdaid tantiec aibdēdi mibi onquepoc. Abedēn nidaidēn capuquid yua cuesuniampicpadquidēn intac chiuidēc unēsaid tantiec Icbobēd mibi onquetiapimbo iquec.

<sup>25</sup> Nuquin Papan chiaid niacchitomane quequin isquiota. Macuēsh Sinai yacno choquid Nuquin Papan ėnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? <sup>26</sup> Ēnden Macuēsh Sinai yacno Nuquin Papan chiacnoshonquo nidaid ishcumpampic. Nēbien: “Padpidemboen nidaidbēdta abu ėnēdmenuen ishcunoaindambi,” quec Nuquin Papa. <sup>27</sup> Aden chuiquin ambi uaidtedi ėnēdmenuen padpidemboen ishcunoaindac abi yacno choaidtedi icsaisa icmiaido yec ėnēdtiapimbo iccuedednuc.

<sup>28</sup> Adoaidi Nuquin Papabēd abi tantiaquido ambi bēdambo icmiaido yec abēd tabadte ėntiapimboenoc Nuquin Papan nadatiambocquin nabanaid

tantiec cuëdëndonec tabadta. <sup>29</sup>Nadatiambocquid Icsaisabidi icquin aidëmbi, Esuquidistu tantiata, quequin nëbi chiaid tantiesa chian anëdënquequid nësecaindac.

## 13

### *Nadomboen nata cain chiaid*

<sup>1</sup> Esuquidistu tantiaquid yec aid tantiaquidtedi con utsibo nec, quia sh tantiananec nashunanta. <sup>2</sup> Adembidi Nuquin Papa yacnoësh choquid abi tantiaquido nashuntequid ambi uaido mayan bédabo chosho yuedampic-paden mimi isacmaidquio Esus tantiaquid chosho yuedta. <sup>3</sup> Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

<sup>4</sup> Adecc tabadec con chidopenquio chudnu guesa iquec chido utsi isuidquid icta. Adesa icsho Nuquin Papan mibi cuidendac. <sup>5</sup> Adecbidi, piuccquid con na bedtequid dadpen bednu, quec bunquiduidi iquenda. Adesa iquec: Con na icnuc bédambo iquebi, quec tabadta. Adecc tabadquid Nuquin Papan ënden dada uamiampid naden chiecc:

“Mibëdi iquebi.

Nianenquiocquin mibi dayun uanuna.”

<sup>6</sup> Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënquid dacuëdënenquio iquembi,”

nuqui quendac. <sup>7</sup> Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bédamboec tabadpanëdash. Aido tanec bédamboec tabadoata. <sup>8</sup> Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

<sup>9</sup> Adquid Esus icnuc Nuquin Papa chieshënquidën chuisho tantiesa icta. Aidën naden chiecc, Nëid petequid icnubi nëid utsi petemaid nec, quequin chiecc. Mimi piaidën mibi bédambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bédambo icmiaidquio nendac. <sup>10</sup> Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adecc tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquio matses Nuquin Papabëd tabadmetiapimbo iquec. Adembidi aidënquio nuqui icsaisa icmetiapimbo iquec.

<sup>11</sup> Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedäcbimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin taupampic. <sup>12</sup> Adembidi matses tabadenquio yacno Esus buanshun dectanac unëscacsho siac aton intac chididiepanëdash nuqui icsaisa icmenuec. <sup>13</sup> Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaquid chieshenquio yec tabadta. <sup>14</sup> Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

<sup>15</sup> Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bédambo iquec, quequin Nuquin Papa

chuidenenuna. <sup>16</sup> Adodenequin utsibobéd tantiananquin nashunquin aton na nibédquid menequid icta. Adsho isash, Con mado yec con champi yec quec bédamboec tabadquid nec, quiash bédambo iquebi, quependac Nuquin Papa.

<sup>17</sup> Ambia Esus tantiashun chuiquidon chiacpaden nabanta. Nuquin Papan, Ēbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bédambo iquebi camepanuna. ¿Chieshecta mibi bédambo icpe? Padenquio.

<sup>18</sup> Chieshenquiocquin ebéd icquid Nuquin Papa chui. Bédamboen nabanec tabadteniobi. Adequi tabadebí utsibo: Icsambocquid nec, quetiapimbocnoc. <sup>19</sup> Adembidi ēbi tantiaquin Nuquin Papa chuidoneta. Mimbí adonoc badedquio mibéd iquendabi.

<sup>20</sup> Adembidi utsibéd bédamboen tabadmequid Nuquin Papan aton Mado matsesacsho utsibon unēs uashun siacsho isun uincuemiāc bēyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanēdash. <sup>21</sup> Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ēbi puduedmenuen Nuquin Papan naid nec, quequin ēnenquiocquin chuiquid ma icpanuna.

<sup>22</sup> Mibi tantiamenuen ēmbi dada uaquin chiaid daēdpactsēcquio icsho bédamboen isec onquequin tantiadoneta.

<sup>23</sup> Nēbi utsi chiembique. Tantia. Timoteyo quēnēn nauedboedi nēbi puduemiac aid badedquio nēmbo choan aibēdi mibi yacno nidendabi.

<sup>24</sup> Mibéd icquid Esus tantiaquid utsibobēda mibi chuiquidtedi tantiec tsadebi quequin Pabadon dada uaosh, quequin chuita. Adecbidi ēbitsen tsadebi quequin chuiōata, queoapēc nēuēsh Itadia yacno tabadquido.

<sup>25</sup> Nuquin Papan bédambo icmiaid ma mibitedi icpanuna. Padi. Aitedi dada uaombi.

## SANTIACON DADA UAID

1 Santiacono nebi. Nuquin Papan namiaidquio, Nuquin Icho Esuquidistun namiaidquibidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

### *Natiametequid*

2 Utsibo, mibi u tabadnuc mibi nēnaid, mibi bundoaid, utsin mibi mēyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. 3 Adaid icnuc, ¿Ēbi tantiaquidquioda neque? Isnu, quequin, Nuquin Papan Ēbi dayacquio icmec, quequin tantiec adecbidi tabadoata. 4 Aden tantiec tabadsho isun bēdamboec tabadte uesquin tantiabənquidquio mibi icmendac ma Esuquidistupadquid yampanueshun.

5 Mimi tantienquio yaid Nuquin Papa chuita. Aden chiaquien, Ma tantianu, queshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. 6 Ēbi tantieme, queboedi, ěbi tantiamenquiocpec quequin tantienda. Ēbi tantiemepec queboedi padenquio yanec cuēshēdec capuidequi yampec. 7 Adquid Nuquin Icbon pausuntiapimbo icpec. 8 Adquid, Nuquin Papan ěbi tantiamec, queboedi capuidequi icquidbimboec icpec.

9 Shubu abentsēquēn tabadacpadquiec tabadquid icta. Adecec tabadec mitsana daēdpactsēc icquid yec, Con na daēdpactsēc iquec, quequin mitsanauidi tantienquiocquin naden tantiata. Nuquin Papan bacuē nebi. Abēdi cuēshēdenquio yec tabadebi, quequin aiduidtsēqui tantiec tabadeneta. 10 Aton na dadpen icquidombien aton na bēdiactsec tantiaquin naden tantiendac: Con na nēidic chodquec; utsibic chiuidec. Adecbidi con nami shēnibudequi Nuquin Papan bacuē nebi. Abēdi cuēshēdenquio yec tabadebi quequin tantiec tabadta. 11 Tanunquiocquidēn tiedēn caniquid unēsec podo tididiquec. Bēdamboeboedi nibēdquiec. Adquiecbidi icho aton nabi bedbanequi aton nami shēnibudequi unēsec. Icho ichoedi icho ictiapimbo yanec. Adecec icho ictiapimbo yanebi, quequin mitsana comapenen tantienda.

12 Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bēdambo icmiaid nendac. Adquiecbidi, Ēmbi chiaid niaquenquio yec mibi tabadsho isembi. Ēbēd icquid mibi neque. Pudued. Nēuēshquio mibi unēstiapimbo iquec, quendac Nuquin Papa. 13 Mibibi icsash, Nuquin Papan namiac nebi, quenda. Nuquin Papa Icsapənquiocquid nec. Aidi icsa uantiapimbo iquec. Icsa uanesa nec. 14 Nidaidēn tabadquidien icsate bunec abibi icsaic. Adecbidi ambibi tantiapadec icsaoaic. 15 Icsamane quequin tantienquio yec unēsacsho abi yacno puduedmenquiocquin Nuquin Papan uquē nēsacaindac adquid.

16 Utsibo, Nuquin Papan chiaid chieshēnesa nebi, quec mibibi mua uadenda. 17 Nuquin Papan pausunaid bēdambouidi iquec. Utsi uaquin nami antiapimbo iquec. Adenuidi namec. Adquiouidi Nuquin Papa iquec. 18 Ēmbi chiaid tantiaquidquio icsho con bacuē nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidēn budmepadenece. Adece budash nidaidēn capusho isash abēd ichoedo abi tantiaquido nuquitedi nec. Adquid icsho ambi bēyuc bacuē



icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

### *Nuquin Papan chiaid tantiaquin nabanta quiaid*

<sup>19</sup> Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienuiocquin aid badedquio chienda. Adecbidi badedquio nëishenda. <sup>20</sup> Badedquio nëishquidën Nuquin Papan chiapadquieç bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec. <sup>21</sup> Bëdamboec tabadesa icquin mimbi icsamboen tantiapaden naid ënquiota. Aden ënu quiash, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshëdenquio yec abëdi mibi iquendac.

<sup>22</sup> Nuquin Papan chiaid tantiashun nainquio yequi Nuquin Papan chiaid bëdambo iquec, quec mibibi mua uadenda. Nuquin Papan chiaid tantiabocpadamboen nabanta. <sup>23</sup> Nuquin Papan chiaid tantiashun naisa isnanten <sup>24</sup> bëisadash bëpiscudacimboec bëpiscudendac. <sup>25</sup> Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Ichon chiapadomboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac. <sup>26</sup> Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquidbidi bëdamboec tabadaid ismesa nec. <sup>27</sup> Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantesan nabanacpaden naisa nendac. Adquid icsho isash, Èmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

## 2

### *Nëid bëdambo iquec. Nëidien icsambo iquec, qesa icta quiaid*

<sup>1</sup> Utsibo, Nuquin Icho Esuquidistu Bëdaidquio nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta. <sup>2</sup> Mibi iccuededacno Esus tantiaquid mimbi isacmaid choec. Abentsëc bëdaidquio dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia? <sup>3</sup> Bëdaidquio dasiuidquid isun naden mimbi tantiatsiac: Bëdambocquid nec. Aton na dadpen icquid nec, quiachimboen, Tsusion dayunquio tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiachimboen uano tsad mimbi caoapec. <sup>4</sup> ¿Nëid icsambocquid nec. Nëidien bëdambocquid nec, quiachimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bëdamboen tantiaquin naisa mibi neyoc.

<sup>5</sup> Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi

Nuquin Papan tantiaid nec. Aidi Esus tantiaquid yec abi yacno puduedtequid iquendac. <sup>6</sup> Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidën utsinutsinquenti chono uashun mibi daëdpactsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? <sup>7</sup> ¿Adoanquidën baded-badedquien Esus quec onquequin mamënshunenquioda ictiosh?

<sup>8</sup> Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiaicpadomboen tantiaquin nashunquidquio iquec mibi bëdambo icpec. <sup>9</sup> Nëid bëdambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. <sup>10</sup> Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. <sup>11</sup> “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

<sup>12</sup> Mibi tantiaquin mibi icsaid pauquec Esuquidistuded icsambocquidbimboec yec unësapanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta. <sup>13</sup> Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsamboembidi nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënquid icquin icsambocquid nec quiacbimboen icsamboen nashuntiapimboquid mibi nec.

### *Esus tantiaquid nebi quequin ambi tantiacpadomboen nabanquin isme quiaid*

<sup>14</sup> Utsibo, Nuquin Papan bacuë nebi, queshun ¿Icbon chiaid nainquiocquinda utsi bëdambo mimbi icmepadi? Padenquio. <sup>15</sup> Esus tantiaquid abi dasiuidtebëd pete nibëdquid, Bec cho, quesho <sup>16</sup> menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bëdambo icpadic? Padenquio. <sup>17</sup> Adembidi, Nuquin Papan bacuë nebi, queshun Icbon chiaicpadomboen naisa Icbon bëdambo icmiaidpenquio nec. Nuquin Papan bacuë nebi, queshun naisa Nuquin Papa yacno puduedtiapimbo icoaic.

<sup>18</sup> Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiaicpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tantianu, quequin mimbi chuitsiac.

Adoqui, Esus tantiaquid nebi, quequimbi Nuquin Icbon chiaicpadomboen naisa naden chuitsiambi. ¿Nuquin Icbon chiaicpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiaicpadomboen nainquiocquin ismetiapimboecnobi, Esus tantiaquid nebi, quequin chienquiocquimbi Esusën chiaicpadomboen naquin mibi ismembidi, caimbi. <sup>19</sup> Nuquin Papa Abentsëcquiobi iquec, quequin mimbi tantieque. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdëquec.

<sup>20</sup> Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. <sup>21</sup> Nuquin Papa tantiemi, qeshun ambi chiacpadomboen naquidquo icpampid chuinu. Tantia. ¿Abadauan ëbi tantiaquidquioda neque? Tantuanu, qeshun, Min mado abentsëc mibi cudasaidquio ëbi tantiaquin cuesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic? <sup>22</sup> Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic. <sup>23</sup> “Mimbi tishmiaidën tishmiaid dadpenquioshë iguendac,” quequin chiondashumbic Nuquin Papan yuecshun adembidi: “Min mado abentsëc cuesuneshun tauita,” quequin chuoiaqui, Nuquin Papa abimbo chuiquidquio nec, qeshun ambi chiaid niacchitomanë quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiäid Abadauan chiemi,” quepampic Nuquin Papa.

<sup>24</sup> Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec. <sup>25</sup> Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, qeshun abi yacnoidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquobi Dababëd icquido cuesunianenquio yec isadaidbobëd icquidobimboec isec tabadpampic. <sup>26</sup> Nuquin Papa tantiaquid Daba yanshun bëdamboen nasho isun mënchicäid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdabimboec tabadec.

### 3

#### *Anan icsamboen chiec onquiaid icsa ënta quiaid*

<sup>1</sup> Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. <sup>2</sup> Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

<sup>3</sup> Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec. <sup>4</sup> Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec. <sup>5</sup> Cabayo canobidi nua icnuc abi bidiacmete aniactëc iquec. Adecbidi icbo nua icnuc aton ana aniactëc iquec. Aniactëcquidi oncamequin icbon ambi naid dadpen comapenen chuibanec. Adembidi oncamequin onquiaid icsa

chuiabanec. Nēdēnquiaid dētsisidash badedquoio nidacimbocue onquiaid icsa badedquoio nidoaic. <sup>6</sup> Ana onquiaid icsa chuiabanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

<sup>7</sup> Nidaidēn capuquid podochoquidbidi matsesēn yuampicpaden abi yuaid iquec. Yua quenenash cuenenquiocquid. <sup>8</sup> Ad yenguio ana iquec. Quenenquo yec ana onquebudec. Onquiaid icsa adecbidi ēnēdtiapimbo iquec. Ana onquiaid icsa tantiabanec adecbidi icsabudquieic tabadendac.

<sup>9</sup> Nuquin Icho bēdambo iquec, qeshumbic ana icbon, Nuquin Icbon uaid matses icsambo iquec, quequin chuiabanoaic. <sup>10</sup> Ana shēcuēn utsi bēdamboen chuishumbic utsi icsamboen chuioaic. Aden nuqui chienquio ictiad. <sup>11</sup> ¿Acte batapenquiocquid choaidēnuēsh batambocquidta chopadic? Padenquoio. <sup>12</sup> Adecbidi ¿cuēte bacuē batambocquidēn ēshē bēchi chopecta dēyuctic? Padenquoio. Adecbidi, ¿Isitodo dataniadaidēn bacuē batambo yecta dēyucpadic? Padenquoio. Aidi adesa yacpadquieic Esus tantiaquidēn ana shēcuēn utsi bēdamboen chuishun utsi icsamboen chiesha ictiad.

### *¿Tsutsi Nuquin Papan chiaid tantiabenquidquo icpec? quiaid*

<sup>13</sup> ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bēdamboec tabadquin ismequid utsi-utsien ma icmebampanuna. <sup>14</sup> Utsin tantiamenushe qeshun ēmbia chiacpadomboen ma napanu guesa icta. Nuquin Papan chiacpadomboen nabanquin ismequid icta. <sup>15</sup> Adembidi, utsin dēniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. <sup>16</sup> Aden aidēn icsamboen tantiacpadomboen abēd icquidon adomboembidi tantiec. Aden tantiec, Utsi dēniacnu, quiash utsi-utsiec dēniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec. <sup>17</sup> Nuquin Papan tantiacpadomboen pausunaid ad yenguio iquec. Ambi tantiacpadomboen pausunaid yec utsibēd bēdamboec tabadquid iquendac. Adembidi utsi tantiaquin nashunquidquo icoaindac. Adembidi ēbēdtan nabanec cho cac nabanendac. Adembidi, Icsambocquid nec, quenquiocquin bēdamboen nabanquin ismendac. Adembidi, Esus tantiaquid nebi, abi quiacpadomboen bēdamboen naic. Adecbidi utsibo chiech muaisa nendac. <sup>18</sup> Ambia tantiaquid utsibēd bēdamboec tabadquin ismiac adecbidi utsibēd bēdamboec tabadquid dadpen yanendac.

## 4

### *Ēbi nua pausun, quequin chiash Nuquin Papan dayunquoio tsadta quiaid*

<sup>1</sup> ¿Atotsi quiash Esus tantiaquido cuididianante buncudedepc? Mibi icsate bunacpadequi mibi cuididianante bunec. Aiduidquoio tantiabudequi mibi chushcanancudedec. <sup>2</sup> Nēid bunebi, queboedēmbi bedtiapimbo yanquin mimbi cuesunec. Adecbidi, Utsi dēniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. <sup>3</sup> Aden naisa icquēn Nuquin Papan chiaid niacmane quenquiocquin aidi mimbi chiech. Adec icsanuēshun chuisho Nuquin Papan mibi menetiapimbo iquec.

<sup>4</sup> Mimbi inaiduidi chudenquoio yacpadquiequi Nuquin Icbouidi tantienquoio yec Esus tantiesan icsate bunquin nacpadomboen mimbi nadenec. Adquid yec Nuquin Papan chieshēnquid nec. <sup>5</sup> Adenquiocquin Esus tantiaho isun aton Mayan Nuquin Papan Esus tantiaquidtedi meniāc bēdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantia. Chuinu. Con bacuē nec, quequin aton Mayan

Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? <sup>6</sup> Aidëmbi abi chieshenquoio yacpaden tantiamëbanac icsamane quiaish chieshenquoio yec bëdamboec tabadta. Nuquin Papan dada uamiampid nad iqueue. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Èbi tantiamë, Papa, qesho Nuquin Papan nua pausunac aton icbo chieshënenquiocquid iquëndac adquid.”

<sup>7</sup> Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiasch Nuquin Papan dayunquoio tsadac bimboecquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquoio nabanu, qeshun nabanuc mayan icsa cuenendac. <sup>8</sup> Aton dayunquoio tsadquid bimboecquid bëd tabadquidquoio Nuquin Papa nec. Icsash uano tsadquid icboedi bëchishash acten dapanudac bimboen mimbi tantiata icsa ënta. Adash, Tantiataid bëda pausumenu, quiaish Nuquin Papan dayunquoio tsadac bimboecquin chieshenquiocquin ambi chiaiduidi tantiatieneta. <sup>9</sup> Aden tantiec tsadboedi, Ëmbibi tantiambi, quec Nuquin Papa chieshënuquidën dayunquoio uano tsadashic, Con Icbo tantiec unësquoio iquebi, quiaish shubiec mamënenquoio yec tsadta. Mibibi uano tsadquid yash unësac bimboec icboedi choec isadcuënac bimboec Nuquin Papan dayunquoio tsadac bimboec yec chieshenquoio yec bëdamboec tsadoata. <sup>10</sup> Uano icboedi choash, Èbibi icsaobi. Nëbi icsate bunenquoio iquebi. Mimbi chiapadtiadquoio iquebi, Papa, quequin chui. Aden mimbi chuisho tantiash, Pudedash nëmbo ëbëd tsadac bimboec mibi yanoaic, quependac Nuquin Papa.

<sup>11</sup> Utsibo, Esus tantiaquidtedi min utsibimboecquid nec. Mibëd icquid icsamboec chuinanenquoio yacpadquieci Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiac bimboecquid nec. <sup>12</sup> Nuquin Papa Chuiquid Dapa Abentsëcquiobi iquec. Ambi chiacpaden naquidquoio nec. Nuquin Papa abitedi Isquidquoio Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquoio abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquid uquë nësëcaindac. Nuquin Papan ambi chiacpadomboen naquid bëdtabi ambi chiacpadomboen naisa isquidquoio icquin ambi isacpaden cuidendac. ¿Adquidbidida mibi ne? Padenquoio. Adquidpenquoio icquin ¿atotsieshun, Icsambocquid nec, quequin mimbi chuipe?

### *Ma badiadshun nanun chiaid tantiesa neyoc, quequin chiaid*

<sup>13</sup> Tantiacquidquoio nebi, quiaish, Piucquid bednuc seta abentsëc matamec chonoadec nidebi, quequid chuinu. Tantiata. <sup>14</sup> Ma adquid badiadshun nanun chiaid tantiesa mibi neyoc. ¿Tëdtsi seta matamec mibi tabadpe? Badiadbudnuc cuen-cuempambo yash badedquoio nidac bimboec matses nidaidën tabadash adecbidi mibi nibëdanendac. <sup>15</sup> Naden nanu quenquiocquid nadembien tantiatiad: Nuquin Papa bunaid icnuc badiadash isedec nidebi, quietiad. Adecbidi, Nuquin Papa bunaid icnuc badiadshun tied neshcaimbi, quietiad. <sup>16</sup> Aden chienquiocquimbi mibi utsi dëniaquec onquaid mimbi chiec. Aden chiec icsaic. <sup>17</sup> Nuquin Papan chiaid tantiambi, qeshun adomboen natiadquidi naisa iquec icsaic.

## 5

*Na dadpen bedbanquin dayun uaquido chiaid*

<sup>1</sup> Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquio buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiash shubita. <sup>2</sup> Unēsosh, quequin chiac mimbi dadpen dayun uaid nibēnquin isac ēnden chodquiac. Adembidi mimbi bēdaidquio dectanaid capishton ēnden piac. <sup>3</sup> Min shocosh piucquid ēnden chiuidac. Adecbidi min piucquid utsi ēnden tiadac. Adenuidi tantiaquin bedbanquid unēsacsho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquio shubu nēdēnquiash nibēdacpadquieq mimbi bedbanaid nibēdquiendac. Adenuidi tantiaquin, Esus ēbi bedec chonoshe queshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. <sup>4</sup> Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquieq. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedēn caniquidtsen dayun uanu, quequin mimbi bedmiaido uēshquieq bunec sidquesho Nuquin Papan, Nadatiambocquid Abentsēcshun tantieq. <sup>5</sup> Aido bunec sidquenubi chonoadenquiocquin nua pec mibi tsadec. Adeq tsadquin min nami bunaiduidi tantiaquin mimbi bedbanoaic. Nua pec cubudacimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adeq tabadec unēsash abi yacno mibentsēqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. <sup>6</sup> Mimbi chiaid mimbi chono uaidon niaquequiocquin nabanacshobi, Icsamboen mimbi naoc, quequin daēdpactsēq mimbi menebampoc. Aden nabanec mimbi cuesuniachimboec bunquieq chonoadequi unēsposh.

*Ma Nuquin Icho chono quiash chieshesa icta quiaid*

<sup>7</sup> Nēbi utsibon chono uaido chuinu. Tantiata. Nuquin Icho choec quequin tantieq chieshenquio yec tabadta. Nitsinash ma caninu quianec pec nidash cainec icho tabadec. <sup>8</sup> Adembidi, Nuquin Icho ēbi bednuec choec, queq bēdamboec tabadquin caimbudta. <sup>9</sup> Adeq tabadquin Esus choate cainec Esuquidistu tantiaquid utsibobēd chieshēnanenda. Adeq utsibobēd bēdamboec tabadsho isun abitedi tantiaquidēnquio Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquio chiendac, queq chieshenquio yec bēdamboec tabadta.

<sup>10</sup> Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. <sup>11</sup> Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsi-utsiectsēcquieqquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iqueq, queq chieshenquiocpampic Obo. Adquid icsho isun daēd uaquin Nuquin Papan meneopampic. Matses tantiaquin naquidquio Nuquin Papa nec, quequin <sup>12</sup> abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquio, quiacpaden nabanoata. Mua uanec onquequid Nuquin Papan cuidendac.

*Nëidic bēdampec quequin abimbo tantianuc quiaid*

<sup>13</sup> ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec cuēdēntiad. <sup>14-15</sup> ¿Aton dada icsabudquidta icpec? Adquidēn ambia Esus tantiaquido chuiquin, Nuquin Papa ēbi chiec cho, catiad. Adsho tantiaash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuēte bacuē ēnē chinshun dashunquinquin, Mimbi utsibo bēdamenēdacpadomboen mimbi tantiacpaden nēidtsen bēdame, Icho, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bēdamepanuna. <sup>16</sup> Abi icsaid uesquin Nuquin Papa chias bēdamboec tabadendac. Adquidēn chiac dada icsamboquid Nuquin Papan bēdamendac.

<sup>17</sup> Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabincnuc ue sequenquo icpampic. <sup>18</sup> Adembidi, aidēmbi yuecshun, Ue secame, Papa, cac ue sequenuc tiedēn caniquid canipampic.

<sup>19</sup> Esus tantiaquidēn Nuquin Papan chiapadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabēd yachimboec icoaindac. <sup>20</sup> Aden mimbi chiac chieshenquo yec tabadsho isun Nuquin Papan uquē nēsatiapimbo adquid iquendac. Adecbidi abi icsaid bēpiscudoaic Nuquin Papa.

Padi. Mibi tantiaquin aiteded dada uaombi.

## PETEDON DADA UAID 1

### *Petedon tauamboen chiaid*

1 Petedo nebi. Abëd icquid icsho Esuquidistun: —Èbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidënsnun ènden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidedi nidaid yacno tabadquidon iste nëid dada uaic nebi. 2 Èndenquio Nuquin Papa: —Èmbi tantiactedi matses èbëdta Esus tantiamendambi —quepampic. Nèbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuëc abided cuidadaid Esus tantiasho Nuquin Papan èbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ènenquio icquin aido bëdamboen ista, Papa. Adem-bidi dacuëdenquio icnuc bëdambo icmeta, Papa —quequin Nuquin Papa mibi chianembi.

### *Esus tantiaquid Nuquin Papa yacno tabadte chiaid*

3 —Nuquin Icho Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbim-boecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adem-bidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. 4 Ambi chiampicpadomboen bëdamboshë yacno Esusbëdquio èbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. 5 Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën èbi yacno tabadmendambi —quec Nuquin Papa nuqui cudasec.

6 Èmbi aden chuisho tantias mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenendabi —quec yuec nuqui shubienquio iquendac. 7 Nuqui cudasec yec çatotsi quiash Nuquin Papa: —Padi. Chën. Esus tantiaquido natiamenta —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaid tauiec. Adem-bidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: —¿Bëdambo icquidida neque? Isnu —quetanquin matsu tauiec. Adem-bidi: —¿Esus tantiaquidquibida neque? Isnu —quequin: —Natiamenta —cainquio iquec Nuquin Papan. Aden natiamiaquid chieshtoenquio icquid icsho Esuquidistun padpidec choshon: —Mibi bëdambo iquec. Èbëdi tabadec cho —quequin utsibo tantiamequin chuishun abi yacno buanendac.

8 Aden mimbi isacmaid Esus mimbi tantiaquiec. —Nèbi isadenquio icquidi Nuquin Papan Madombo Esus èbi bednuëc choendac —quec mibi cuishonquianec. 9 —Abi tantiasho icsano nidmenquio icquin Esusën abi yacno èbi yuedendac —quec Esus tantiec mibi cuishonquianec.



### *Esus chote tsusedpabon chiampid*

<sup>10</sup> Ēndenquimboshē Nuquin Papan tantiamiac isadaidbo tsusedpabon Nuquin Papan chiaid chuiquidon Esusēn matses cuidmenquoio icte dada uapampic. Esusēn nate abitedi tantienquoio icquin daēdpactsēc tantiaquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. <sup>11</sup> Aidobēd icquin Esuquidistun Mayanēn tantiamiac Esus chote abentse-abentsen chuipampic. —Matsesēn chieshēnquin cuesten dectanac matses cuidmenquoio icnuec abided cuidadec unēsēndac. Adec unēsacsho uincuemiāc padpidec abitedishun Icho icoaindac —quequin Esus chote chuipampic. —¿Tsutsi chopec? ¿Tedetsi yash chopec? —quequin abitedi tantiatiaquido icquimbi daēdpactsēc isadaidbo tsusedpabon tantiapampic. <sup>12</sup> Naden Nuquin Papan tantiamēpampic. —Mibi nibēdanan ěmbi chuiboed ěmbi matsesmiācsho utsibon isendac —quequin tantiamiac Esusēn nate chuipampic. Aden chiampicpadomboen Esusēn naondash. Nuquin Papan Mayanēn tantiacpadomboen aid chuibenequidon aidēn naid mibi chiac caondash. Aden Esusēn naid Nuquin Papan abi yacnoshon uaido mayan bēdabontsen tantiatiaquido icquimbi abitedi tantienquoio iquec.

### *Bēdamboec tabadte tantiamiaid*

<sup>13</sup> Ēmbi chuiboed Esus tantiaquido icquin paposhquiachimboen Esusuidi tantianuna. Nuqui icsate bunacpadece icsainquoio yec bēdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ěnenquoio icquin. <sup>14</sup> Ambi: —Con mado nec. Con champi nec —caido icquin Nuquin Papan chiacpadomboen nanuna. Ēnden Nuquin Papan chiaid tantiabi mibi bunaid naic mibi icsanēdacpadece icsainda. <sup>15</sup> Mibi Esus tantiamēquid icsaisambo Nuquin Papa neque. Ambi chiaid niaquenquoio yec bēdamboec tabadnuna. <sup>16</sup> Nuquin Papan ambi chiaid naden dada uamepampic. “Nuquin Papa icsaisambo nec,” quiash icsaisa ictiadquoio yec bēdamboec tabad,” quequin Nuquin Papan ambi chiaid dada uamepampicpadece bēdamboec tabadnuna.

<sup>17</sup> Papa quequin nuqui chianeboed Nuquin Papa matsesēn naidtedi chuiquid nendac. —Nēid ěbi tantiesā neque. Icsano nidmenu. Nēid ěbi tantiaquid neque. Ēbēdi tabadmenu —quequin matses abitedi chiendac. —Abēdi tabadmenquoio icnushe —quiash Nuquin Papabēd icte bunec bēdamboec tabadnuna. <sup>18</sup> Nuquin tsusedpabon chiaiduidi naquin Nuquin Papa tantienquoio nuqui icpondac. Aden Satanasēn yuaido icsho Nuquin Papan nuqui bēdamboen istiapimbo icpanēdash. Adshun Satanas nuqui bedshunuen ¿pīucquidida Nuquin Papan menapanēdash? Padenquoio. Adquid icsabudtequid menenquoio icquin <sup>19</sup> aton Mado Esus icsaisambo icsho matsesmēpanēdash. Aden matsesmiācsho chieshēmēnquidēn cuesten dectanac Esus aton intac chididiquec abided cuidadec unēspondash. Nēbi aton Mado Esus tantiaquido bēdamboen isquin Nuquin Papan Satanas bedshunec. Aden Nuquin Papan bedshunaid yec bēdamboec tabadnuna. <sup>20</sup> Ēndenquimboshē abitedi uabi Nuquin Papa nadpampic. —Ēmbi tantiacpadēn yuecash matsesash matses cuidmenquoio icnuec mibided cuidadec unēsta, Mado —quepampic. Aden ambi chiampicpadomboen badedquoio namenquoio icboedēmbi nēbi nameshun Esus tantiasho mibi bēdamboen isec. <sup>21</sup> Abi tantiasho Esusēmbi Nuquin Papatsen nuqui tantiamēc. Adoac nuqui naden tantiec. —Esus unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquoio Nuquin Papa

nec. Ĕbi unēsacsho uincuemeshun abi yacno ěbi tabadmendac —quequin Nuquin Papatsen nuqui tantiec.

### *Esus tantiaquido tantiananquiote chiaid*

<sup>22</sup> Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec. Adecbidi muenquio yec tantiananquionona. <sup>23</sup> Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac. <sup>24</sup> Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin. “Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

<sup>25</sup> Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,” quequin abimbo chuiampic. Aidēn chiaidquio mibi chiac caondash.

## 2

### *Nuquin Papan chiaid iste bunquionona, quiaid*

<sup>1</sup> Aden Nuquin Papan chiaid tantiash chieshēmēnec tabadenda. Utsi muauaında. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. <sup>2</sup> Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiacbimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —qeshun Nuquin Papan chiaid isbanuna. <sup>3</sup> —Esus tantiec bēdambo iquebi —qeshun Nuquin Papan chiaid isbanuna.

### *Buintadbimboecquid Esus nec, quiaid*

<sup>4</sup> Nuqui tantiaid nadquio iquec. Shubu uanun buintadquio nacinnsinuen istuidshun: —Nēid bēdambo iqueque. Nēidquio naimbi —quiacbimboen Nuquin Papan: —Ĕmbi tantiaidquio yec mibi bēdambo iqueque. Ĕmbi chiacpadomboen mibi namenu —capanēdash Esus. Adoaidi matses dadpeshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac. <sup>5</sup> Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantieme, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidī natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. <sup>6</sup> Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’ quiacbimboen Edusaden yacno ěbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ěbi yacno tabadmendambi,” quequin Nuquin Papan ambi chiaid dada uamepampic. <sup>7</sup> Aid tantiec: —Bēdamboshē iquec —quependac Esus tantiaquido. Utsibombien Esus

chieshēnec. Ēndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinembi,’ quetiadquidi isuidacimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.”

quequin Nuquin Papan dada uamepampic. <sup>8</sup> Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiacsho ambocquidon chieshēnendac.

Aid chieshēnquid nadquio iguendac. ‘Cuēte mabud iquec,’ quequin tantienquio yec nidec focoshquetanec uebudacimboec

ēbi bēdamboen ismequid tantienquio yec unēsash icsano nidendac.”

quequin Nuquin Papan ambi chiaid dada uamepampic. Aden Nuquin Papan chiaid tantiatiapimbo icquin Esustsen tantiatiapimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

### *Nuquin Papan matses nuqui nec, quequin chiaid*

<sup>9</sup> Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamepondash paposhquiacimboecnuc. Adoac: —Nuquin Papa bēdambohē iquec. Ambi chiacpadomboenuidi natiadquio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. <sup>10</sup> Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

### *Bēdamboec tabadte chiaid*

<sup>11</sup> Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquio yamane —quiash bēdamboec tabadta. <sup>12</sup> Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

<sup>13</sup> Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. <sup>14</sup> Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. <sup>15</sup> Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ēntsiash.

<sup>16</sup> Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. <sup>17</sup> Matses abitedi bēdamboen isnuna. Esus tantiaquido icquin

nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

### *Yuabo chiaid*

<sup>18</sup> Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanguidquo icnubi adembidi nata. <sup>19</sup> Adec Nuquin Papa tantiaquid yec bēdambo icsho cuesaqui chieshēmēnenquo icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. <sup>20</sup> ¿Icsamboec tabadquid cuesac chieshēmēnenquo icquidta Nuquin Papan: —Aid yua bēdambo iquec —capatsiash? Padenquo. Nuquin Papan chiacpadquiec bēdamboec tabadquidi cuesaqui chieshtoenquo icsho: —Aid yua bēdambo iquec —Nuquin Papan catsiashe. Bēdambo icta.

### *Chieshtoenquo yec Esus unēsaid*

<sup>21</sup> —Chieshēnaqui chieshtotiadquo iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquo icnu —qeshun Nuquin Papan nuqui Esus tantiaquid icmenpondash. Esus nadondash. Nuquin Papa nuqui cuidmenquo icnuec abided cuidadec mēyadec unēspondash. <sup>22</sup> Nuquin Papan dada uamepampicpadquo “muesambo yec icsaisambo icpondash.” <sup>23</sup> Adquid icsho abi chieshēnquidon mamēnshunaqui Esusēn chushcainquo icpondash. Aidon matonbudnetanquin buanshun cuستن dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan masesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquo icpondash. <sup>24</sup> Adash: —Ēbi tantiaquid ma icsaid ucudacimboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdanshun Nuquin Papan aton Mado tantiaquido bēdamboen isec. <sup>25</sup> Yuan icbo cuenēnacimboen Nuquin Icbo nuqui tantienquo icpondac. Adoboedi nēbi: —Con Icbon ēbi bēdamboen dayun uaqin ēbi bēdamboen namendac —qeshun nuqui Esus tantieque. Bēdamboen nanuna.

## 3

### *Bēnēbēda chido chiaid*

<sup>1-2</sup> Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquo icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chiambobi Esus tantiabentsiash —qeshun min bēnēn chiacpadomboen nata. <sup>3</sup> Bēdamboec tabadquid ictiadquo icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. <sup>4</sup> —Bēdambo mibi iquec —camenuc bēdamboec tabadta. Nēishēmēnenquo icquin bēdamboen nabanta. Chieshenquo icquin min bēnēn chiacpadomboen naquid icta. Mibi adquo icsho isash: —Mibi bēdambo iquec —quendac Nuquin Papa. <sup>5</sup> Ēndenquimbo isadaidbo tsusedpan chido Nuquin Papa tantiaquid yec adquo icpampic. Aton bēnēn chiacpadomboen naic bēdambo icpampic. <sup>6</sup> —Con bēnē con icbobimboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid

icsho mamēnshunaqui min bēnē dacuēdēnenquo icquin aidēn chiacpadom-boen naic bēdamboec tabadec Sadapadquo mibi ictsiac. Adquid bēdambo iquec. <sup>7</sup> Tantia. Bēnētsen chuinu. Abia uimabudquid icscho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbi chiaid Nuquin Papan tantienquo icnushe. Min chido bēdamboen ista.

### *Bēdamboec tabad, quequin chiaid*

<sup>8</sup> Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bēdamboec isnanuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquo icquin utsibon chiaidtsen nanuna. <sup>9</sup> Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —qeshun Nuquin Papan nuqui Esus tantiaquido icmiaye. Bēdamboec tabadnuna. <sup>10</sup> Adec bēdamboec tabadte chuiquin Nuquin Papan dada uamepampic naden.

“Bēdamboec tabadte bunquidēn nadoendac.

Adonante bunenquo icquidēmbi utsibo muauainquo iquendac.

Chieshēnquin utsibo icsamboen chienquo iquendac.

<sup>11</sup> Icsamboec tabadboedi bēdamboec tabadendac. Utsibo chieshēnansho isash: ‘Padi. Chieshēnanenda,’ quendac.

<sup>12</sup> Adec bēdamboec tabadsho Nuquin Papan bēdamboen isendac.

Aden bēdamboen isaidon: ‘Ēmbi chuisho tantia. Ēbi bēdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac,” quequin Nuquin Papan dada uamepampic.

### *Cuesaqui dacuēdenda, quequin chiaid*

<sup>13</sup> ¿Bēdamboec tabadshoda bēdambo icquidēn badedquo mibi cuespatsiash? Padenquo ictsiash. <sup>14</sup> Bēdamboec tabadsho isun icsambo icquidēn cuesacsho mibi Nuquin Papan bēdamboen istsiashe. Mibi chieshēnquido dacuēdēnenda. <sup>15</sup> Dacuēdēnenquo icquin: —Con Icho Esuquidistu nec —quequin ambi chiacpadomboen nanuna. Aden mimbi Esus tantianuc utsibo: —¿Atotsieshun Esus tantie? —qesho: —“Abided cuidadec unēsaid Esus tantiasho Nuquin Papan ēbi bēdamboen isquin unēsacsho abi yacno ēbi tabadmendac,” qeshun Esus tantiembi —quequin Esus tantiesabo chuibanuna.

<sup>16</sup> Aden nēishēmēnenquo icquin Esusēn naid chuibanuna. Aden bēdamboen chuinuc Esus tantiaquieq bēdamboec tabadnuna. —Ēbi bēdamboec tabadsho isash ēbi chieshēnquin muauaquid: “Bēdambo icquidi muauachitombi. Icsachitobi,” ma quenu —quiash bēdamboec tabadnuna. <sup>17</sup> —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bēdamboec tabadquid icscho utsibon chieshēnaqui nuqui chieshtoengquo icscho isash: —Mibi bēdambo iquec —quetsiash Nuquin Papa nuqui caic. Icsambo icscho quēnēn nauedaidi nēishenquo icscho: —Mibi bēdambo iquec —cainquo ictsiash Nuquin Papan.

### *Esus unēsaid tantia, quiaid*

<sup>18</sup> Chieshēnaqui Esusbimboec chieshtoengquo yec bēdamboec tabadnuna. Aid icsaisambo yequi nuqui icsaid bedshunec abided cuidadec unēspondash.

Aden Nuquin Papa abi tantiaquido bēdamboen ismenuec abentsecquiobi unēspondash padpidec unēsenquio icnuec. Aton dada unēsambi aton tantiate unēsabi icpanēdash. <sup>19</sup> Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboed chuibampanēdash. <sup>20</sup> Naden Nuquin Papan aido cuidquin unēs uapampic. Ēndenquimboshē aton matsesbēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquido abitedi uesquin unēs uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chūipampic. Adoac badedquio cano dapa nacnemēdenquio yacpadembi Nuquin Papan badedi cuidenquio icpampic: —Ma abi icsaid ēnshun ēbi tantianu —qeshun. Adnubien cano dapa nacnentanec Noe chedo 8tedpactsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Ūtsiboen acte mabudadmiaidēn mentoadbudnepampic. Noe abi tantiaquidquio icsho Nuquin Papan cuidenquio icpampic.

<sup>21</sup> Adembidi Esus tantiasho nuqui cuidenquio iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bēchish ucquinda nuqui adodi? Padenquio. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquio iquebi, Papa —quequin nuqui adoec. Aden abi tantiasho Nuquin Papan uincuenēdaidēn Esuquidistun nuqui cuidmenquio iquec. <sup>22</sup> Aidi uincuenash Nuquin Papa yacno nidash aidbēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namdac. Nuquin Papan abi yacnoshon aido mayan bēdabo bēdamboen namequimbic Satanash aton yuabo mayan icsabobēdta Esusēn cuidendac.

## 4

### *Bēdamboec tabadnuna, quiaid*

<sup>1</sup> Nuquin Papan tantiacpadomboen nasho utsibon chieshēnquin mēyanaqui Esus chieshtoenuio icpondash. Adembidi chieshēmēnquidēn chieshēnaqui adecbidi chieshtoenda. Abided cuidadec unēsaid Esus tantiaquin nuqui icsaid nuqui ēnendac. <sup>2</sup> Aden nuqui tantiacpadomboen nainquio icquin Nuquin Papan chiacpadomboen natiadquio nuqui iquendac. <sup>3</sup> Nuquin Papa tantiesabon nacpadomboen Nuquin Papan chiaid mimbi yuen niacniacpondac. Utsin chido chudquinc utsin bēnē chudmequinc tantiadenuen acte paēmo icquid acquinc: —Nēid papa canu —quequin matsesbimboecnuc nacnenquinc mimbi capondac. Adec icsateuidi bunec mēmuntiapimbo mibi icpondac. Adquid iccondaidi nēbi bēdamboec tabadta. <sup>4</sup> Adec bēdamboec tabadsho isun mibēd icsaondaidēn: —¿Atotsieshun nuqui naondacpadomboen nainquio ique? Mimbī Nuquin Papa caid nībēdec —quequin mibi icsamboen chuiquin mibi mamēnshunendac. <sup>5</sup> Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin chiendac. <sup>6</sup> Aden abēdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unēsquid icmiacpadec unēsquid yec unēsashic Nuquin Papabēd tabadendac padpidec unēsenquio yec.

*Utsibo nashununa, quiaid*

<sup>7</sup> Tantia. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmunc bēdamboec tabadnuna. —Ma ěmbi abi chianesho Nuquin Papan bēdamboen tantianu —quiash adta. <sup>8</sup> —Tantianquido chieshēnanc cuidnante bunenquio iquec —quiash ēnēdenquio yec tantiananquionona. <sup>9</sup> Nuquibēdtan Esus tantiaquido isedec chosho bēdamboen isnuna. Shubu utsinquido ēnapenuēsh chosho adembidi chieshēnenuio icquin min shubun yued. <sup>10</sup> Nuquin Papan tantiamiacpadomboen nuquibēdtan Esus tantiaquido nashuntiād. Esus tantiaquidquio icmenuen chieshenquio icquin nanuna. <sup>11</sup> ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ĕbi nashunquid bēdamboen namequid Nuquin Papa bēdamboshē iquec,” ma ěmbi nashunaido quenu —qeshun utsibo nashununa. —Abitedishun icombo yec Nuquin Papa bēdamboshē iquec —canuna ēnenquio icquin.

*Chieshēnaqui chieshtoenquio icte chiaid*

<sup>12</sup> Ĕmbi tantiaido mibi neque. Tantia. —¿Atotsieshun matsesēn ěbi chieshēmpēba? —¿quecta ique? ¿Mibentsēquida chieshēndic? Ma Esus tantiaquido dadpenquio chieshēmpayoc. <sup>13</sup> —Chieshēnquin Esuquidistu comapenen mēyanacimboben Esus tantiesabon ěbitsen mēyanosh. Esus tantiaquid icshoeni adochitosh —quiash Esus tantiec bēdambo icnuna. —Utsibon chieshēnaidi abi tantiaquid ambi namiacno buanuec Nuquin Icbo Esus choec —quiash abi chote ushēn cuishonquenush adnuna. <sup>14</sup> —Esuquidistu tantiaquid nec —qeshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papa yacno tabadte mibi tantiamequin mibi bēdambo icmendac. <sup>15</sup> Utsibo icsasho abi chuiquidēn natiamequin cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda. <sup>16</sup> Esus tantiaquid icsho ut-sibon chieshēnac dacuēdēnda. Adec dacuēdenquio icquin: —Nuquin Papa bēdamboshē iquec. Aton Mado Esus tantiaquid icmiac bēdambo iquebi —quequin ēnenquio icquin Esus tantianuna. <sup>17</sup> —Nuquin Papan cuidte ushē nēbi icnuc ambi con matses caido Esus tantiaquidō chieshēmēnquidon natiamendac —quiacpaden nēbi tauaquin mibi natiamec. Adsho isun: —Chieshēmēnquidēn chieshēnac ěmbi tantiacpadomboen abi icsaid ěntsiash —qeshun Nuquin Papan: —Natiamēnda —cainquio iquec. Aden abi tantiaquido icsaid ěmete bunquin nashun ¿bēdiactsēcta abī tantiesabo cuidpec? <sup>18</sup> Naden chuiquin Nuquin Papan dada uamepampic. “Aden chieshēndeniac natiambo yan-yanēqui unēsash Nuquin Papabēd abi tantiaquido tabadendac. Nuqui adnuc ¿bēdiactsēcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. <sup>19</sup> Nuquin Papan tantiacpadec mēyadec Esus tantiaquid ma nadpanuna. —Ĕbi uaquidēn Nuquin Papan ambi chiacpadomboen ěbi bēdamboen namec. Aid tantiec bēdambo iquebi —quiash ma bēdamboec tabadpanuna.

## 5

*Esus tantiaquido chuibanquid Petedon chiaid*

<sup>1</sup> Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paēmboshē icmequin Esuquidistu unēs

uasho isondambi. Aidën padpidec nidaidën choshon abi yacno buanuen nuqui beduanegue. Tantia. <sup>2</sup> Icbo yua cudasacimboec mibëd icquido Esus tantiaquido cudasta. —Esus tantienquo yanushe —queshun: —Nuquin Papan chiaid niaquenquo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quengquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Piucquid dadpen bednun nanu —quengquo icquin Nuquin Papan chiacpadomboen natiadquo yec Esus tantiaquido chuibanquid icta. <sup>3</sup> —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquo yec: —Ëbi yacpadec ma tabadnu —quec bëdamboec tabad. <sup>4</sup> Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —queshun chuibanquid ambi namiaidobëdta abi yacno buanendac.

### *Esus tantiaquidon nate utsi chiaid*

<sup>5</sup> Tantia, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quengquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic. “Nuquin Papa tantienquo icquin aton matses utsibo tantienquo icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic. <sup>6</sup> Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan.

<sup>7</sup> Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

<sup>8</sup> Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshënequec. Esus bedshunuen nuqui icsametaidquo icquin bëdin nëish nibënacimboen ambi icsametequid Satanasën ënenquo icquin nibëmbeneque. <sup>9</sup> Ista. Icsamenda. Chieshtomenda. —Satanasën icsamechitoshe —queshun Nuquin Papan chiaid niacniaquenquo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsiec yacno tabadquido utsibon chieshënac caosh —queshun chieshtoenquo icquin Esus tantianuna. <sup>10</sup> Aden utsibon chieshënaido yec yuec-yuecpactsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanus nuqui icsa uamenquo iguendac. Ademebidi Nuquin Papan nuqui bëdamboen isquid icquin dayacquo yacimbocnuc chieshtoenquo icquid nuqui icmendac.

<sup>11</sup> Ëmbi aden chuisho tantiaahun: —Mibi bëdamboshë iquec, Papa. Mimi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquo icquin.

### *Petedon ënquimbi chiaid.*

<sup>12</sup> Esus tantiaquidquo Sidas caid nëidtedtsëqui ëmbi dada uaboed mibi yacno buamembi. —Esusquo isondambi. Aid tantiaho Nuquin Papan



matses bēdamboen isbenendac —quequin abimbo mibi chiombique. Chieshtoenquoio icquin Esus tantianuna. <sup>13</sup> Nuquin Papan tantiamiac nuquibēdtan Esus tantiaquido ěm̄bi Babidonia caid yacnocquidon: —Aido unēsquoio iquec —mibi caosh. Babidonia caidbidi Doma cáic. Con madobimboecquid Madcosēn —Aido unēsquoio iquec —mibi caosh. <sup>14</sup> —Ěbēdtan Esus tantiaquido nec —quiash: —Mibi unēsquoio iquec —cananuna. —Ma Nuquin Papan mibi Esus tantiaquidotedi bēdambo icmepanu —quequin Nuquin Papa chianembi. Padi. Aidtedi chuiquin dada uaombi.

## PETEDON DADA UAID 2

### *Tauamboen chiaid*

<sup>1</sup> Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuiবেনeta —caidquio nebi. Ëbëdtan Esus tantiaquido mibi neque. Mimbì iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec.

<sup>2</sup> Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

### *Nuquin Papan bëdambo icmete chiaid*

<sup>3</sup> Comapenen tantiaquid icquin Nuquin Papan namiac aidën chiaid niacniacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. <sup>4</sup> Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

<sup>5</sup> Aden Nuquin Papan Esus tantiamiaido yec dayacquo yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. <sup>6</sup> Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënuquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. <sup>7</sup> Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. <sup>8</sup> Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquiotsiac. <sup>9</sup> Ëmbi chuibocpadomboen naisa pamumëdacbimboec iquec. Adquidon: —Aton Mado Esus tantiasho icsaid ucudachimboecnu Nuquin Papan nuqui bëdamboen isec —queboedombi bëpiscudquin tantienquio yanec.

<sup>10</sup> Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiash chieshtoenquio icquin Esus tantiec bëdamboec tabadnuna. Adec tabadquin naden nuqui tantierendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantierendac. Aden tantiec Esus tantienquio icquid nuqui yanenquio ictsiac. <sup>11</sup> Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icbo Esuquidistun nuqui bëdambo icmendac padpidec unësenquio icnuc.

<sup>12</sup> Ëmbi aden chuiboedtedi mimbì tantiondac. Aden tantiabosh Esus tantiec mibi bëdamboec tabadcuendondac. Aden mimbì tantiondaidi mibi chuidedchuidendambi. <sup>13</sup> —Nëbi unësendabi —queboedi ëbi unësabi yacpadembi mibi chuided-chuidendambi. <sup>14</sup> —Adënquio mibi unësendac —quequin Nuquin Icbo Esuquidistun chiacpadën nëbi unësebi. <sup>15</sup> —Ëbi unësan ëmbi chiondaid ma bëpiscudenquio icnu —qeshun mibi chuiquin dada uanu.

### *Nuquin Papan Esus chiaid*

<sup>16</sup> ¿Muaquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquio. Ëmbimbo isondaidquio mambi mibi chiondac. —Nëid con Madombo nec —quequin Nuquin Papan ismiac Esus isondambi. <sup>17-18</sup> Nadquio iccondash. Macuësh dapan dectatoash Esus bëchamauanquieic iccondash. Adnubien Nuquin Papan: —Con Madombo nec. Ëmbi tantiaidquio yec bëdamboshë iquec. Nëid isec bëdambo iquebi —quequin abucshun dacuëdampamboecnuc chuipondash.

<sup>19</sup> ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiaimequin Nuquin Papan isadaidbo tsusedpabo dada uamepampic. Pacuënëdacimboen utsibon tantienquio icnubi paposhquiabimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bëdamboen tantianuna. <sup>20</sup> —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio. <sup>21</sup> Ambembi chiaid dada uainquio icquin Nuquin Papan chiaidquio dada uapampic. Nuquin Papan Mayanën tantiamiac abimbo chuipampic.

## 2

### *Muaquido iquendac, quequin chiaid*

<sup>1</sup> Nuquin Papan chiaidquio isadaidbo tsusedpabon chuinubien utsibo: —Nuquin Papan nadoendac —quec muapampic. Nëbi adquidbidi iquendac. Mibi yacno pudedash ambembi chiaid chiec muasho tantiaishun: —Mibi muequi nec —badedquio cainquio mimbi iquendac. —Abided cuidadec unësaid Esus tantiaquid nebi —queboedi: —Esusën chiacpadomboen natiapimbo iquebi. Adshobi Nuquin Papan ëbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. <sup>2</sup> Aden muaquidën chuisho tantiaishun Esus tantiauidtsëcboedombi dadpeshun aidën chiaid tantiendac. Adashic Nuquin Papan chiaid niac-niaquec muaquido tabadachimboec padpidec icsamboec tabadoindac. Adsho isun: —Esus tantiaquidobi icsambo iqueque. Is —caindac utsibon. <sup>3</sup> Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiaishun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapenen Nuquin Papan cuidendac.

<sup>4</sup> Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —queshun aden tauamboen Satanas chedo cuidpampic. <sup>5</sup> Adshumbic yuecquio ictanquin matses abitedishun ambi chiaid niac-niacsho isun nidaid abichobi mabadadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquio icpampic.

6 Adshumbic yuecquio ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucūesh taboadampamboec paēdquidēn pichiquepampic matses nibēdquio yec. —Aden icsambo icquido cuidquid nebi —quequin Nuquin Papan adopampic. 7-8 Sodoma caid yacnocquid abentsēqui Dod caid pichiquenquio icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmo icquido icsamboecuidi tabadec —quec shubiec tsadsho cuemetsaidi pichiquiambo ictsampic. 9 Aden abi tantiaquido daēd Noebēdta Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnāidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

10 Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdācbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidsēqui bunebi —qeshun ambi naiduidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. 11 Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactšec tantiaquido icnubi cōmapenen tantiaquido icquin mayan bēdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsēqui tantiaquid Nuquin Papa nec —qeshun adoenquio iquec. 12 Padnuen ěmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

13 Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēnsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidibidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo. 14 Muaquido utsin chido mēismec tabadec. Nuquin Papan chiaid niac-niaquec icsaic ěnēdenquio iquec. Adquid icquin Esus tantiatsēcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. 15 Nuquin Papan chiaid niac-niaquec icsateuidi bunquiec. ěndenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen buncē Nuquin Papan chiaid niac-niatadquio icpampic. 16 Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec buncē Nuquin Papan chiaid niactiadquio iquec.

17 —Mibi bēdambo icmete chuinu —quequin muaquidon chuisho tantiaquid: —Ai, mimbi chiapadte bunebi —queuidtsiash matses. Uispa dadpen icboedi badiadnuc abu chēshēn bētīnacsho isash: —Tanunquien badiadec —queuidācbimboec: —Ambi chiapadquio bēdambo icnu —queuidtsiash matses. Adec muasho tantiaquid: —Adquid chian anēdēnquiacno nēsecaindambi —quendac Nuquin Papa. 18 Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —

Mibi bunacpadec mibitsen icsata —cac Esus tantiatsëcquin Nuquin Papan chiaid nauidsëcquimbi abi icsaid ênuidboedi padpidemboec icsaqueic. <sup>19</sup> Muaquidon: —Nuqui bunaiduidi nanuna. Adec nuqui bëdambo ictsiac —quequin chuiabanec. Adboedi abi icsaid ambembi êntiapimbo yec icsamboshë iquec. Adec icsamianquidên chiacpadomboen naic matses icsaquid nendac. Adecbidi ambi naiduidi naic icsaquid matses nendac. <sup>20</sup> Nuqui cuidmenquoio icquid Esuquidistu tantiatsëcquin abi icsaid ênuidboedi padpiden Nuquin Papan chiaid niac-niaquec icsamboshë muaquido yanec. <sup>21</sup> Ênden Esus chiondac: —Ai, aid tantiembi —quetsëccondaidi aden Esus tantienquoio yanec icsamboshë yansho isun: —“Esus tantiembi,” quenquoio icpatecnëdan —caimbi. <sup>22</sup> Adquid chuipanëdash naden. —Ambi ucbudaid opan chequid. Opa nesmiaqui nidaidên nocoshquec padpidec bëchishoaquid —quepanëdash. Adecbidi Esus tantiauidtsëcquido icsaid ênuidboedi muaquid padpidemboec icsadenechitequien iquec.

### 3

#### —Esus chote chiaid

<sup>1</sup> Tantia. Êmbi tantiaido mibi neque. —Pabiate cuembo icquin Nuquin Papan chiaid tantiaqueic bëdamboec tabad —quequin mibi chuiquin dada uaondambi. Adomboembidi mibi chuiquin nëid dada uanu. <sup>2</sup> Esus chote chuiquin Nuquin Papan isadaidbo tsusedpabo dada uamepampid çada tantie? Adomboembidi nuqui cuidmenquoio icquidên Nuquin Icho Esusên chuibanondash. Aidên chiondaid abëd ictened utsin mibi chuinëdash. Aden chiaid tantiaata. Aiddidi chuinu. <sup>3</sup> Esus nidaidên padpidec choabi icnuc Esus tantiesabon abi icsate bunaiduidi naquin Esus mamënshunendac. <sup>4</sup> —“Utsi uanuec padpidec nidaidên choaindabi,” çquenëdaidda chopec? Ma choenquoio icpayoc. “Nëbi Esus choec,” quedenedi con mëdimbo abitedi unësbudniac. Esus choambobi —quependac Esus tantiesabo. Nadembidi chiendac. —Taëec nidaid yanubi matses nidaidên tabadpampic. Adecbidi aton tsyuecquido tabadpampic. Nëbi adecbidi matses nidaidên tabadec. Êbi nibëdnuc adiquendac. Utsi uanuec Esus choenquoio iquec —quependac Esus tantiesabo. <sup>5</sup> ÇAbimboda capec? Aden chuiquin Nuquin Papan chiaid tantienquoio iquec. Êndenquimboshë ambi uaidtedi nibëdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo ichoedi nidaid nënantan yampampic. Aden Nuquin Papan abitedi uapampic. <sup>6</sup> Aden abitedi uambic yuecquoio ictaniash matses icsambo icscho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unës uapampic. <sup>7</sup> Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbëdta nëdêncaindac. Adembidi matses Esus tantiesabo cuidendac.

<sup>8</sup> Êmbi aden chiac: —ÇTedectsiash Esus chopeba? —Çquecta ique? Tantia. Mibi chuinu. Ambi tantiacpadëmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsëcbimboecquid nec. Adecbidi seta abentsëqui icquidquoio iquequi dadpen seta icquidbimboecquid nec —quequin Nuquin Papan tantiec. <sup>9</sup> —Êndenquoio: “Padpidec choendabi,” quenëdaiddi Nuquin Icho Esus choenquien icchitec —quenubien Nuquin Papan: —Chiata. Cuidte bunenquoio iquebique. Utsibontsen Esus tantiashun ëmbi chiaid niac-niachoedi ênushe. Isbono. Ênacsho icsamboshë yacno nidmenquoio ictsiambi —qeshun Nuquin Papan Esus chomiabi iquec.

<sup>10</sup> Adnubien matses: —Nëbi choec —quenquo icnuc Esus badedquo choendac. —¿Nëid ushëmbi ampequidën con na ampec —quequina tantiapec? Padenquo. Adembidi: —Nëbi choec —quequin tantienquo icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac. Nidaid abichobimbo nëdënquenuc aidën icquidtedi nëdënquendac nibëdquo yec. <sup>11</sup>—Nuquin Ibon nac adquidtedi nëdënquendac —quiash Esus tantiec bëdamboequien tabadtiad. <sup>12-13</sup> Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo icquiduidquo nuqui tabadmendac. Ëmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusën naid chuibanec bëdamboec tabadnuna.

<sup>14</sup> Ëmbi tantiaido mibi neque. Tantia. —Choshon abi yacno Esusën nuqui tabadmendac —quec chieshtoenquo yec bëdamboec tabadnuna. Choshon Esusën: —Mibi icsambo iquec —cainquo icnuc Nuquin Papan chiaid niaquenquo yec bëdamboec tabadnuna. <sup>15</sup> Adec tabadquimbi ëmbi chuiboed tantiashun naden tantia. —“Utsitsen ma Esus tantiacid yanu. Aden Esus tantiasho aid cuidenquo ictsiambi,” qeshun Nuquin Papan Nuquin Ibo chomiabi iquec —quequin tantiec tabadta. Adembidi mibi chuiquin nuquin buchibimboecquidën Pabaton dada uapaccondash. Nuquin Papan tantiamiac bëdamboen chiaccondash. <sup>16</sup> Ëmbi chuiboedbidi chuiquin dada uadenapaccondash. —Pabaton dada uaid abentse-abentsec badedquo tantiadenquo iquec —qeshun utsibon aidën chiacpadomboen chienquien icchitosh. Nuquin Papan chiaid niac-niaciadquo icquidon Pabaton chiaidquo tantienquo icquin icsamboen chiosh cashnacshnadacbitsëcquiecnuc. Nuquin Papan chiaidquo nuquin tsusedpabon dada uapampidtsen isbanshun adembidi tantienquo icquin icsamboen chiec. Adquido Nuquin Papan cuidendac.

<sup>17</sup> Ëmbi tantiaido mibi neque. Tantia. Chuinu. —Abimbo tantienquo icquin Nuquin Papan chiaid niac-niacquidon muauaic —ëbi qesho tantiashun: —Esus tantienquo yamane. Muasho tantiatiapimbo iquebi —quequin ënenquo icquin Esus tantianuna. <sup>18</sup>—Abi tantiacid cuidmenquo icnuec abided cuidadec Esus unëspandash. Aid tantiasho Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiacionona. Adshumbic: —Nuquin Ibo Esuquidistu bëdamboshë iquec —canuna ënenquo icquin. Padi. Aidedi chuiquin dada uaombi.

## UANËN DADA UAIÐËMPI 1

### *Nuquin Papabëd ënëdenquoio yec tabadte chianiaidquoio*

<sup>1</sup> Abia Yampidënenquoio matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. <sup>2</sup> Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan isteneshun chuibanec nebi. <sup>3</sup> Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadacimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. <sup>4</sup> Esuquidistu tantiaquidtedi shubu abentsëquën tabadacimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpanushun.

### *Nuquin Papa Bëdamboquid Abentsëcquiobi nec quiaid*

<sup>5</sup> Esuquidistun Nuquin Papa chuibansho nuqui tantiondacadomboen chuoaimbique. Tantiata. Nuquin Papa Bëdamboquid Abentsëcquiobi nec. Icsapenquiocquid aidi nec. <sup>6</sup> Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. <sup>7</sup> Nuquin Papan chiacadomboen nabanquidquoio iquec abi tantiaquid ut-sibobëd shubu abentsëquën tabadacimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspandash. Aid unësnëdaidënenquoio nuqui icsaidtedi paubantequid nendac. <sup>8</sup> Icsaisa nebi, quequi mua uadquin abipenquoio chuiquid nendac. <sup>9</sup> Icsaobique. Ëbi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacadomboen niaquenquiocquin Nuquin Papan nuqui paucoindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. <sup>10</sup> "Matses icsaisa nibëdquiec", quequin Nuquin Papan dada uaimpid icnubi, Icsaisa nebi, quequin chiec, Muaquid Nuquin Papa nec, quiacimboec adquid onquepec. Aden chuiquid Nuquin Papan pausntemaid nendac. Adquid Esuquidistu tantiesa nec.

## 2

<sup>1</sup> Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. <sup>2</sup> Aidi matsestedi icsaid bedshunash abided cuidadec unëspandash.

<sup>3</sup> Ambi chiacadomboen nabanquin Esuquidistu tantiaquid nebi, qeshun nuqui tantiendac. <sup>4</sup> Esuquidistu tantiaquid nebi, qeshun Icbon chiacadomboen nainquiocquin abipenquoio chiendac adquidën.

<sup>5</sup> Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. <sup>6</sup> Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

<sup>7</sup> Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. <sup>8</sup> Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantianec tabadquin nabanec nec. Chieshëmquid icboedi aidën pausunac tantianquidquio yanec.

<sup>9</sup> Esuquidistu tantiaquid nebi, geshun abi tantiaquid utsi chieshënc Nuquin Papan tantiacpadomboen pausunacmaid adquid nec.

<sup>10</sup> Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. <sup>11</sup> Esuquidistu tantiaquid utsi chieshëncquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

<sup>12-14</sup> Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquid utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

### *Icsate bunesa icta, quequin chiaid*

<sup>15</sup> Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. <sup>16</sup> Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshëncquid nec. Adquid icquin Nuquin Papan chiaid mua uaqun chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. <sup>17</sup> Mayan icsan tantiaid ënëndendac. Aidën tantiacpadomboen tantiaquid icbobëd Nuquin Papa yacno tabadtiapimbo iquec. Nuquin Papan chiacpadomboen naquidien ënëndenquio yec Icbobëd tabadendac.

### *Esuquidistu chieshëncquid dadpen choendac, quequin chiaid*

<sup>18</sup> Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshëncquid dadpen choendac, quequin chiondacadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. <sup>19</sup> Esuquidistu chieshëncquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshëncquid



iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquo icquido niosh, quequin nuqui tantiendac.

<sup>20</sup> Esuquidistu chieshënesa mibi nendac. Nuquin Papan aton Mayan meniäc abimbo chiaid tantiaquid mibi nendac. <sup>21</sup> Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquo ictsi-ambi. Abimbo chuiquid muatiapimbocquid nec, quequin mimbi tantiendac. <sup>22</sup> ¿Tsutsi muaquid nepec? ¿quepecta mibi ique? Nuquin Papan Madombo nidaidënsnun chidon tishac matsesash aton Papan chuimiäidquo nec, quesa muaquid nendac. Adquid Esuquidistu chieshënuquid nendac. Abentsëcquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. <sup>23</sup> Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

<sup>24</sup> Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquo yec Nuquin Papan Mado Esuquidistubëd shubu abentsëquën tabadacximboecquido mibi iquendac. <sup>25</sup> Èbëd shubu abentsëquën nidaidën tabadacximboecquido èbëd abuc ènëdenquo yec tabadte iquendac, quequin Esuquidistun chiaid nendac.

<sup>26</sup> Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. <sup>27</sup> Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquo mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquo nebi. Esuquidistun abimbo chiaid tantiasbëdambo iquebi, mibi quendac. Aden Esuquidistun tantiamiaidquo yec abëd cuëshëdesa icnuec adequi tabadta.

### *Nuquin Papan chiaid tantiaquid ambi bacuë icmiaid*

<sup>28</sup> Adembidi con nabo quequin mibi chuioaimbique. Adembi tantia. Esuquidistun chiaid tantiadonequieç tabadteneta. Adec tabadquin Esuquidistu choasho isash cuenenquo yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. <sup>29</sup> Nuquin Papa bëdamboquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquo nebi, quequin nuqui tantiendac.

## 3

<sup>1</sup> Matses tantiaquin naquidquo Nuquin Papa nec. Ma ëmbi unësquiocquin comapenen tantiaido èbëdi tabadpanuëshun con bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. <sup>2</sup> Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiembi, nuqui quendac. <sup>3</sup> Aid choabicnuc, Abipadquid iquendabi, quequin caindonequido nëbi Esuquidistu icsainquo yec tabadacpadquieç tabadte bunquid nuqui nendac.

<sup>4</sup> Nuquin Papan naded bēdamboec tabadta, quequin chiaid niacquid abibi icsaquid nendac. <sup>5</sup> Adnubien, Esuquidistu abuc tabadboedi nidaidēnshun chidon tishac matsesun nuqui icsaid bedshunash abided cuidadec unēspaniedash, quequin nuqui tantiendac. Icsapenquiocquid Esuquidistu nec. <sup>6</sup> Icbopadquidquio icnu quiash Esuquidistubē tabadacimboecquid icsadenesa nec. Icsadenequid, Nuquin Papan Esuquidistu tantiamioishi, quetiapimbo iquec. Esuquidistu tantiesa adquio iquec.

<sup>7</sup> Con nabo, tantesa uamane qeshun muaquin chuibanaid tantiesa icta. Esuquidistu bēdamboec tabadacpadquiec tabadquid icsaisa nec. <sup>8</sup> Abia icsadenequid mayan icsa nec. Aidēn yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidēn choash matses icsaid bedshunash abided cuidadec unēspaniedash ma abi tantiaquid yec mayan icsan yua icboedi aidēn yuadtiapimbo yampanuna. <sup>9</sup> Nuquin Papan con bacuē caido icsadenesa nec. Ambi con bacuē caido Nuquin Papapadquidquio yec icsadenetiapimboquid nendac. <sup>10</sup> Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuē nec. Icbon bacuē yec utsi tantiaquidquio nendac.

### *Esuquidistu tantiaquido tantiananaid*

<sup>11</sup> Esuquidistu tantiaquid utsibo tantiaquiota, quequin chiaid nuqui abia tantiondaid nendac. <sup>12</sup> Aton utsimbo chieshēnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaiēn aton utsi Abedēn abi tantiaquin nadenesho Nuquin Papan aid bēdamboen isnubi Cainēn ambibi tantiacpaden nadenesho Nuquin Papan bēdamboen istiapimbo icpampic. Aden isac Cainēn aton utsimbo Abed chieshēnquin cuesunepampic. <sup>13</sup> Cainēn aton utsimbo chieshēnacpadomboen Nuquin Papa tantiesan Nuquin Papan con bacuē caidtedi chieshēnoaic. Nuquin Papa tantiesan mibi chieshēnsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. <sup>14</sup> Esuquidistu tantiaquid tantienquicochedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabēd tabadquidbimboecquid nebi, quequin nuqui tantiendac. Aton utsibo tantiesa cuēshēdacbimboecquid nec. <sup>15</sup> Aton utsibo chieshēnquid, Con utsi cuesunenu, quiacbimboecquid nec. Adquid Nuquin Papabēd tabadtemaid nendac, quequin nuqui tantiendac.

<sup>16</sup> Matses tantiaquin nashunquidquio Esuquidistu icpondash. Nuqui tantiec, ma ēbēd ēnēdenquio yec tabadpanu quiash unēsmane, quenquio yec nuqui icsaquido icsho cuidnushe quiash abided cuidadec unēspondash. Abi tantiaquid icquin abi tantiaquid utsibo tantiaquin nashunec unēsmane quenquio yec nuqui tabadendac. <sup>17</sup> ¿Aton nachoquid icnuc Esuquidistu tantiaquid utsin na nibēdquiocsho isec, Con utsi menenquio iquembī, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. <sup>18</sup> Ēmbi con nabo caid, Utsi tantiec bēdamboec tabadquidquio nebi, quec onquequinnuidi tantiec tabadenda. Utsi tantiembī, quequin mimbi chiacpadomboen nabanquin ismeta. <sup>19</sup> Aden mimbi chiacpadomboen nabansho isun Nuquin Papan tantiamiac dacuēdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. <sup>20</sup> Utsien Nuquin Papan chiacpadomboen abentse-abentsen naquid, Nuquin Papa dacuēdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ēmbi paucaid, ēmbi con bacuē caid mibi nec. Mimbi chuisho

tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

<sup>21</sup> Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënuquo Nuquin Papa bëisquidëmbimboen, Èbi menepec, quequin dacuëdenquiocquin chianendac. <sup>22</sup> Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. <sup>23</sup> Naden tantiata, quequin Nuquin Papan chiaid nad iquec: Abëd Abia Yampidquio, Esuquidistu, nidaidënsnun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembiidi Esuquidistun chiacpadecec abi tantiaquid utsibobëd tantiananendac. <sup>24</sup> Aden ambi chiacpadomboen naquidbëd Nuquin Papa iquec. Adquiduidquio Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

## 4

*¿Nuquin Papan chiaidquiobida chuibanoshe? Isnu, qeshun Nuquin Papan chiaidquio isteneta quiaid*

<sup>1</sup> Utsibo, Nuquin Papa chieshënuquidën chuimiaindo dadpen iqueque. Aidën chuimiaindën chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaidquio isteneta. ¿Adquiobida iqueque? Isnu, qeshun isteneta. <sup>2</sup> Nuquin Papan pausunaidën naden chiendac: Nidaidënsnun chidon tishac matse-said Nuquin Papan chomiaid aton Madombo nec, quequin chuibanendac. <sup>3</sup> Nuquin Papa chieshënuquidën chuimiaindën naden chiendac: Nuquin Papan chomiaicmaid Esus niondash. Aid aton madopenquio nec, quequin chiendac. Aden chuiquid Esuquidistu chieshënuquid nec. “Èmbi chomiaid chieshënuquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

<sup>4</sup> Con nabo quequin Nuquin Papan aton Mayan meniac aidënuquo tantiamiac Esuquidistu chieshënuquidon chuisho, Tiantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacpadquieci mibi chieshënuquid cuenendac. <sup>5</sup> Esuquidistu chieshënuquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. <sup>6</sup> Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibanoshe Nuquin Papa tantiabenuquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibanoshe, Tiantianu, quesa iquendac. Adsho isun, Abipenquio chuiquidën yua nec, quequin nuqui tantiendac.

*Nuquin Papan ismiac adecbidi tantiananquidquio ma nuquitedi icoapanuna quiaid*

<sup>7</sup> Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. <sup>8</sup> Utsi tantiaquidquio Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. <sup>9</sup> Matses tantiaquin Nuquin Papan aton Mado Abentsëcquiobi Esuquidistu matsesmiac

matses icsaid bedshunash abided cuidadec unëspondash. Adoac abi tanti-aquido abëdi ënëdenquoio yec tabadendac. <sup>10</sup> Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuid-menquiocnoec abided cuidadec unëspondash. <sup>11</sup> Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. <sup>12</sup> Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

<sup>13</sup> Aton Mayan meniac ambi tantiamiaidquoio yec Nuquin Papa ëbëd iquec, nuqui quendac. <sup>14</sup> Nuquin Papan Madomboen nuqui isaidquoio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

<sup>15</sup> Esuquidistu Nuquin Papan Madombo nec, quequin tantiaquidquoio Nuquin Papan pausunquin aton Mayan meniaid nec. <sup>16</sup> Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquoio nendac. Adecbidi Icbo abëd icquidquoio nendac. <sup>17</sup> Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquoio yec Nuquin Papa tantiaquid aton Madopadquiocquid Nuquin Papa yacno puduedendac. <sup>18</sup> Nuquin Papan tantiaid dacuëdenquoio iquendac. Ambi tantiamiaid dacuëdesa nec. Abi tantiesa, Ëbi icsaquid icsho cuidtsiash, quec dacuëdendac. Aidi utsi tantiesa yec dacuëdec.

<sup>19</sup> Nuquin Papa Ambia Tantiaquid icquin ismiac tantiananquidombo nuqui nendac. <sup>20</sup> Ëmbi isacmaidquoio Nuquin Papa icsho, Aid tantiaquid nebi, quequin Esuquidistu tantiaquid utsi ambi istëniacaid chieshënquid iquec muaquid nendac. Ambi istëniacaid chieshënquid iquec ambi isacmaidquoio Nuquin Papa chieshënquid nendac. <sup>21</sup> Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

## 5

### *Nuquin Papan Madombo abimbo tantiaquid*

<sup>1</sup> Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquoio Nuquin Papa tantiendac. Adem-bidi Nuquin Papan con bacuë caid utsibo nuqui tantiendac. <sup>2</sup> Ambi con bacuë caidën Nuquin Papa tantiaquin ambi chiacpadomboen naquidquoio icquin ambi con bacuë caido nuqui tantiendac. <sup>3</sup> Aden tantiaquin Nuquin Papan, Naden nata, cac nabanendac. Ambi, Naden nata, quequin chi-aid natiamantemaïd nec. <sup>4</sup> Aden Nuquin Papan con bacuë caid icquin ambi chiacpadomboen nabanec tabadquin dëniacacbimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. <sup>5</sup> Esuquidistu Nuquin Papan Madombo Yampid nec, quequin tantiaquidënquoio ismiac icsamenuequid cuenendac. Ai, icsamenuequidën yuadesa Esuquidistu tantiaquidquoio nendac.

<sup>6</sup> Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidènsun chidon tishac matsesash capusho acten mentoacsho: “Èmbi bédamboen tanti-aidquo mibi nec. Mibi isash bédambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unèsec aton Papa chiec: “Èbi yuedta, Papa,” quiaish Esuquidistu unèsacsho nacsias aton intac chididiquepondash. Adashic, Nuquin Papa abimbo chuiquidpadquidquo icquin aton Mayanèn tantiamiac, Esuquidistu Nuquin Papan Madombo nec, quequin tantiaquin chiendac nuqui. <sup>7</sup> Nuquin Papa yec aton Mado yec aton Mayan yec quequin abucshun aitedishun abentsèc yac bimboecquin Esuquidistu Nuquin Papan nidmiac chosho nidaidènsun tishac matsesaid nec, quequin chuided-chuidedec. <sup>8</sup> Adecbidi nidaidènuèsh Esuquidistu matsesacsho isun, Nuquin Papan Madombo nec, quequin ismenuec aton Mayan abucuèsh budash aibèd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unèso isun, Con madombo nec, quequin inchèshac bimboecnuic imequin Nuquin Papan nadatiambocquin ismebampondash. <sup>9</sup> Aden ismiac isonaidèn naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unèso isombi, quequin isonaidèn chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. <sup>10</sup> Adembidi Nuquin Papan Mayanèn tantiamiac, Esuquidistu Nuquin Papan Madombo nec, quequin tantiaquin adomboembidi chuiopaec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiac bimboen chuiquid nendac. <sup>11</sup> Con Madombo, Esuquidistu nec, quequin Nuquin Papan chiaid tantiaquidquo abi yacno nidash abèdi ènèdenquo yec tabadendac. Matses icsaid bedshunash abided cuidadec aton Mado unèspanèdash, quequin tantiaquid Nuquin Papa yacno tabadtequid nuqui nendac. <sup>12</sup> Esuquidistu tantiaquid ènèdenquo yec Nuquin Papa yacno tabadendac. Aid tantiesa aibèd tabadtiapimbo iquendac.

### *Ma tantiaquidquo mibi icpanuequin chiaid*

<sup>13</sup> Nuquin Papan Madombo Esuquidistu nec, quequin tantiaquid, Icbobèd ènèdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. <sup>14</sup> Adece abèd ictequid icquin ambi tantiamiacpaden chuisho, Nuquin Papan tantiec, quequin nuqui tantien- dac. <sup>15</sup> Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

<sup>16</sup> Esuquidistu tantiaquid nebi, queboedi icsasho isun, Cuèshèdnushe queshun aid bédamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuèshèdnushe queshun aid bédamboen tabadme, Papa, cainda. Nuquin Papan chiaid tantiate bunesa aid nec. <sup>17</sup> Nuquin Papan chiaid niaquec icsaic. Padnuen, Nuquin Papan bacuè nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuèshèdenquo yec Nuquin Papabèd tabadendac.

<sup>18</sup> Nuquin Papan con bacuè caid iquec icsadeneza nec, quequin nuqui tantien- dac. Nuquin Papan chiaid niacmane quiaish icsate bunesa nebi, quiacpaden nanuesho tantiamiequin pausunen- dac. Adoac Nuquin Papa chieshènquidèn adquido yuadtiapimbo iquendac. <sup>19</sup> Esuquidistu tantiec Nuquin Papan con bacuè caid nebi, quequin nuqui tantiec. Adesa Nuquin

Papa chieshënquidën yua nec, quequin nuqui tantiec. <sup>20</sup> Nuquin Papan Madombo abuc abëd ichoedëmbi nidaidënsnun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

<sup>21</sup> Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aided chiombi.

## UANËN DADA UAIÐËMPI 2

### *Nuquin Papan chiaid abimbo iquec, quequid tantiaid*

<sup>1</sup> Ëmbia Esuquidistu tantiondaidquio Uan nebi. Nèid chido Esuquidistu tantiaquid nendac, quequin Nuquin Papan tantiacpadquieic icquin mibèd Nuquin Papan chiaid tantieic iccuededquidobèdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiaish mibitedi tantieic tsadebi. ¿Ëbentsëquidabi mibitedi tantieic tsadpe? Padenquio. Aden chuisho tantiaish utsibotsen adechidi mibi tantieic tabadoaic. <sup>2</sup> Nuquin Papan chiaid abimbo iquec, quequin ënenquiocquin nuqui tantiendac.

<sup>3</sup> Uquë nësiatiadquido nuqui icsho isash abèdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspendash. Adembidi ambi chiaid tantiaquido utsibobèdta bédamboen tabadmiadio nuqui nendac. Nuquin Papabèdta aton Mado Esuquidistun adquid icmiac, Ambi chiaid abimbo iquec, quequin tantieic utsibobèd tantiananquidquio nuqui nendac.

<sup>4</sup> Mimbi chiac utsi-utsieic Nuquin Papan chiacpadomboen nabanec tabadsho isash bédambo iquebi. <sup>5</sup> Naden nata, quequin chiaid utsipenquio nèid dada uaid nendac. Esuquidistu tantiaquidtedi nuquibi tantiananuna. <sup>6</sup> Esuquidistu tantiaquid utsibèd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

### *Muaquin chuiquid*

<sup>7</sup> Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec.

<sup>8</sup> Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. <sup>9</sup> Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabèd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobèd tabadac bimboec tabadendac. <sup>10</sup> Esuquidistu Nuquin Papan Madombo nec, quequin chiesa chosho isun yuedenda. Adembidi, Bédambo icta, quequin adquid chienda. <sup>11</sup> Adquid yuedquid ambi yuedaidbèdta muaquin chuiquin ismequid nendac.

### *Ënquin chiaid*

<sup>12</sup> Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibèdi onquebi.

<sup>13</sup> Mibitedi tantieic tsadebi, quequin chuita quiosh ëbèd Nuquin Papan chiaid tantieic iccuededquido. Adembidi dada uaombi.

Padi. Aidtedi dada uaombi.

## UANËN DADA UAIÐËMPI 3

### *Cayon naid chuiquin utsibon chiaid*

<sup>1</sup> Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

<sup>2</sup> Mimbì Nuquin Papan chiaid tantiacpadquiec min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna. <sup>3</sup> Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. <sup>4</sup> Mimbì chuibanac Esuquidistu tantiaquin muainquiocquin utsibon chuioaic, quequin chuisho tantiash bëdambo iquebi, quec tsadebi. Ëmbi con mado caidën bëdamboen naid chuisho tantiash bëdambo iquebi.

<sup>5</sup> Mimbì yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi. <sup>6</sup> Mimbì yuedshun nashunaid utsi-utsiec nëmbo choshon mimbì abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbì naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimaidquio nec. <sup>7</sup> Aido isadaidpëmbo chuinuec nidshun aido yacno choshon Esuquidistu tantiesha nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac. <sup>8</sup> Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

### *Diotedepesën icsamboen naid*

<sup>9</sup> Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. <sup>10</sup> Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

### *Demetedio caid bëdamboquid nec, quequin chiaid*

<sup>11</sup> Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. <sup>12</sup> Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdta chuioaimbi. Uanën chiaid abimbo iquec, quequin mibitedishun tantiendac.

### *Ënquin chiaid*

<sup>13</sup> Dadpen dada uatiadquiocquimbi daëdpactsëc dada uaombi. <sup>14</sup> Daëdec ushtanquin mimbì isplashuni. Mibi yacno nidash mibëdi onquendabi.



<sup>15</sup> Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuïbanoata.  
Padi. Aided dada uaombi.

## UDASËN DADA UAID

### *Tauamboen chiaid*

<sup>1</sup> Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasec. <sup>2</sup>—Aido bēdamboen isquin bēdambo icme, Papa —quequin Nuquin Papa chianembi mibi tantiaquin.

### *Muaquido iquendac, quequin chiaid*

<sup>3</sup> Ëmbi tantiaido mibi neque. Tantia. Nuqui cuidmenquoio icnuec Esus abided cuidadec unēsaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantia-boshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquoio mimbi chiec. Aid tantiatiapimbo iquebi —cata. Nuquin Papan tantiacpadomboen Esusën abēd icquido chuibanēdaid nuqui tantiaid neque. Utsi tantienda. <sup>4</sup> Esus tantiaquido mimbi danubi mibi icsamenuec mibi yacno muaquido puduedac caosh. Ambi ëndenquoio tantiacpadomboen Nuquin Papan icsaño nidmetequido aido neque. Muasho tantienda. —Nuquin Papan bēdamboen isaïdo icsauidequi icsho nuqui cuidti-apimbo iquec. Chido chishpidambo yec dada cuiddimbo yec quec icsashobi nuqui bēdamboen isec —quec comapenec muaique. Muasho tantienda. Esuquidistu Nuquin Icho abentsēcshun chiaid niac-niaquec icsaique.

<sup>5</sup> Adquid Nuquin Papan comapenen cuidendac. Tantia. Nuquin Papan cuidampid mimbi tantianēdaid mibi chuinu. Equipito yacnoshon unēsmenuen ancanquidēn icsamboen chonoa uasho isun ashunquoio Nuquin Papan con matses isadaidbo tsusedpabo puduamepampic. Adoac yuectanquin puduamiaiombi ambi chiaid niac-niacsho isun Nuquin Papan uesquin unēs uapampic. <sup>6</sup> Adembidi utsibotsen cuidpampic. Abēd icpampido ambi abi yacnoshon uaido mayan chedo abēdan namequido icboedobi Nuquin Papan chiaid niac-niacte buncuenash Nuquin Papabēd icte bunenquoio yampampic. Adec Satanas chedo abēd icte bunenquoio icsho isun puduentiapimbo yacno icsamboshē yacno Nuquin Papan nidmepampic. —¿Ada mibi bēdambo icti? Mibi icsamboshē iqueque. Mibi cuidnu —quetequid ushën padpiden uesquin cuidnumbi adopampic. <sup>7</sup> Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bēnēpenquoio chudmepampic. Dada aton dada utsibēdi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nēdēncapampic nibēdquiecncuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anēdēnquiacno nēsecaindac —quequin nuqui tantiec.

### *Muaquido icsaid*

<sup>8</sup> Cuidte tantienquoio yec adecbidi muaquido icsamboecuidi tabadec. Aton dada utsibēdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bēdabo caic: —¿Nadatiambo icquidta nedic? —quequin muauaic. <sup>9</sup> Mayan bēdabo chuiquid dapa Miqued caidēn adotiapimbo icpampic. Aidi Moises unēsacsho isash: —Chococanu —quesho

podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miquedën. Adenquoio icquin: —Nuquin Papambien mibi cuidec —capampic Miqued caidën mayan bédabo namequid dapa icquin. <sup>10</sup> Muaquidombien ambi tantienquoio yaid icsamboen chuishunec. ¿Ada bēdi cuidnushē quepadic? Adembidi abi cuidec tantienquoio icquin ambi tantiaiduidi naic tabadsho Nuquin Papan cuidentac.

<sup>11</sup> Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niactiadquio yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidentac. <sup>12</sup> Muaquido icsambo iquec. Mibi icsametiadquien icchitec. Esus tantiaquidon pebedacno puduedshun mibēdtambi muaquidon piac caosh. —Esus tantiaquidquio nebi —quiash puduedash dācuēdenquoio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquoio. Ambi naiduidi naquin ambembi chiaid chiac matses nadquio iquec. Uispa dadpen icboedi badiadnuc abu chēshēn bētinacsho isash: —Tanunquien badiadec —queuidacimboec matses iquec. Pete ambi nitsinaid unēsacsho istuidash: —Pete nitsinuidombi —quiachimboec muaquidon chuisho tantiaquido: —Bēdamboen chiaid tantianu —queuidendac. <sup>13</sup> Acte tēccuasquequidën cuēmano nushan uaquin icsa uacbimboen icsaquin muaquidon mibitsen icsamec. Abi capuaid tantienquoio yequi: —Ëbi capuaid tantiaquidquio nebique. Isec cho —queboedi bēnudtaniacimboen: —Nuquin Papan chiaid tantiaquidquio nebi —queboedēmbi tantiamenquoio iquec. Adec muasho cuidquin Nuquin Papan puduentiapimbo yacno icsamboshē yacno nidmendac.

<sup>14</sup> Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshē Nuquin Ichobēd choendac. <sup>15</sup> ‘¿Ada mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. <sup>16</sup> Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshēmēnec tabadec. Abi bunacpadecuidi icsaquiec. —Ëmbentsēqui bēdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquio mibi nec —quec muaic.

### *Esus tantiaquionona, quiaid*

<sup>17</sup> Ëmbi tantiaido mibi neque. Tantia. Esusbēd iccondaidon chiaid mibi chuinu. <sup>18</sup> Nadpondash. “Esus padpidec choabi icnuc Nuquin Papan chiacpadec bēdamboec tabadsho Esus tantiesabon mamēnshunendac. Nuquin Papan chiaid niac-niaquec abi bunacpadec icsaquientac,” quepondash.

<sup>19</sup> Adquido muaquido iquec. Aton padī yec icsaiqui chieshēmēnquin mibi cuēsh-cuēshēdmec. Nuquin Papan aton Mayan aidobēd tabadmenquoio iquec.

<sup>20</sup> Adquid icsapadec icsainquoio icquin Esus tantiatēcboedēmbi Nuquin Papan chiaid isban-isbanquin ēnenquoio icquin Esusbēda Nuquin Papa tantianuna. Nuquin Papan Mayanēn tantiamiacpadomboen Nuquin Papa chianenuna. <sup>21</sup> —Abi tantiasho bēdamboen isquin abi yacno Esusēn nuqui

tabadmendac —qeshun Esus chosho isnuen cainquin aiddëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. <sup>22</sup> Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiash: —¿Abimbobida capeba? —qesho tantiashun nëishenquo icquin Nuquin Papan chiaidquo tantiamenuna. <sup>23</sup> Bacuëmpi cuëten pichiquetsensho: —Baded bed. Taidnushe —quiacbimboen —Icsano nidmequin Nuquin Papan cuidnushe —qeshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadeç icsainda. <sup>24</sup> Nuquin Papa bëdamboshë iquec. Aid tantiasho nuqui icsamenquo iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. <sup>25</sup> Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Içbo Esusedë cuidshun abi tantiaquido cuidenquo icquid nec. Abitedishun Içbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bëdamboshë iquec —canuna ënenquo icquin. Esus tantiaquido icquin adonona. Padi. Aitedi chuiquin dada uaombi.

## ESUSËN UAN ISMIAID

### *Nëidba chuiquin Uanën dada uaid*

<sup>1</sup> Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. <sup>2</sup> Esusën namiac abi yacnoshon uaid mayan bëdabontsen ismeposhi. <sup>3</sup> Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. <sup>3</sup> Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenuo icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

### *Esus tantiaquidon iste dada uaid*

<sup>4</sup> Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup> Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemaidquio nec. Adquid yec abitedishun Icbombo nec. Ambiuiddtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. <sup>6</sup> Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. <sup>7</sup> Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac. <sup>8</sup> Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

### *Dacuëdampamboecnu Esusën ismiaid*

<sup>9</sup> Esusbëd ictened Uan nebi. Mibëdtan Esus tantiaquid yec min utsi-bimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenuo iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedachimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. <sup>10</sup> Dominco ushën Esus tantiec

tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenquo icquimbi ushquin isacimboen tantiombi. <sup>11</sup> Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nêitedishun iste dada uata. Nêidic shubu dadpen icquid Epeso caid yacnocquidon. Nêidic shubu dadpen icquid Esmidina caid yacnocquidon. Nêidic shubu dadpen icquid Pedcamo caid yacnocquidon. Nêidic shubu dadpen icquid Tiatida caid yacnocquidon. Nêidic shubu dadpen icquid Sadis caid yacnocquidon. Nêidic shubu dadpen icquid Pidadepia caid yacnocquidon. Nêidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

<sup>12</sup> Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaidquo neposh. <sup>13</sup> Aid nënantanquo Esusquo icposh. Con matses isadaidbo chuiguid dapabimboec dasiuidacosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh. <sup>14</sup> —Icsaisambo nec —camenuc aton mapi aton manëdaibëdi abu ushubimboec ushumbohë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh. <sup>15</sup> —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaidbimboec nac-nacquo aton taë icposh. —Nuquin Papapadquidquo nec —camenuc acte chododoquiacbimboec comapenec onquesosh. <sup>16</sup> Abiuchshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquo nec —camenuc adposh. Aton bêtantete ushëbimboec bëchamuanquiecposh. —Bëdambo icquidquo nec —camenuc ad icposh.

<sup>17</sup> Dacuëdampamboecsho istanequini Esusën dayumbi uebudpaccoc unësanibimboec padishec. Adshobini Esusën camishquin bëdameposh. —Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi. <sup>18</sup> Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Èbi tantiesaboembi icsaïdo cuidacno nidmendac —queposh Esus.

<sup>19</sup> Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chui-boedbëda ëmbi ismeboedtsen chuiquin dada uabanta. <sup>20</sup> Tantia. Èmbi uispa 7tedi icquid abiuchshun sanamboed mibi chuino. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Èmbi namiaïdo nec,” quequin uispa sananquin ismec nebi. “Èbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquo ëbibi iquebi —quequin aden ismeposhi Esusën.

## 2

### *Epeso yacnocquido Esusën chiaïd*

<sup>1</sup> Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquo abibi icquin ismioshi. —Èbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido.

Mibitedi chuinu. <sup>2</sup> Mimbi naidtedi tantiaquid nebi. Dayacquoio icquin èmbi chiacpadomboen mimbi dadpen nabanoc. Utsibo chieshtonobi chieshtoenquoio icquin mimbi èbi tantioc. Èbi tantiaquido icsamenuen chiec: ‘Esusèn namiaidquoio yec mibi chuinec chopobi,’ quequin muaquidon chuisho: ‘Mua. Nuquin Papan chiaidpenquoio mimbi chuibanoque. Utsibo chienda,’ quequin mimbi aidon chiaid tantienguoio iccoc. Aden mimbi bèdamboen naoc. <sup>3</sup> Adembidi utsibon chieshènaqui chieshtoenquoio icquin Nuquin Papan chiaidbèdta èmbi naid mimbi chuibanoc.

<sup>4</sup> Aden bèdamboen nasho isun mibi icsaid abentsèc chuitsècnu. Tauamboen mimbi èbi tantiaquiopadenec. Aden èbi tantiaquidquoio icquin mimbi utsibotsen tantiaquiopadenec. Adodenedèmbi pacuènèdadbimboen èbi bèdiactsèc tantiatsècquin utsibotsen mimbi bèdiactsècbidi tantiatsec. Adec mibi ic-sacuededec. <sup>5</sup> Èmbi chuiboed tantiaash: ‘Ai, abimbo caic. Tauamboen Esus tantiaquiondaidi nèbimbi bèdiactsèc tantiachitec. Adchitequini icsaoc,’ qeshun tauamboen mimbi naondacpadomboen èbi tantiaquiota. Adembidi utsibotsen tantiaquiota. Adoenquoio icshoembi mibi yacnoshon èmbi chiaid mibi chuibanquid nibèdmendac. Adnuc èbi tantiec cuèdènuec mibi pudued-puduedenguoio ictsandac. <sup>6</sup> Mibi icsaid ènquin chiombi. Nèbi mimbi naid utsitsen isash bèdambo iccobi. Mibi cuèdènacno puduedshun nicodaitabon mibi icsamenuen icsamboen chuisho tantiashun: ‘Aido icsamboshè iquec,’ mimbi caoc. Adembidi aido bèdamboen istiapimbo icoalbi. <sup>7</sup> Nèbi èbi tantiaquido utsibo chuinu. Èmbi Epeso yacnocquido chuibocpadomboen con Mayanèn mibitsen tantiametsiashe. Pabiäte cuembo icquin èmbi chiaid tantiata. Satanasèn: ‘Icsamenu,’ caqui chieshtoenquoio icquin èbi tantiasho Nuquin Papa yacno èbèdi tabadmendambi. Tauamboen matses uashun Nuquin Papan aid dada tsadacno tied bèdamboshè yacno tied nènantan icquid cuète matses unèstiapimbo icquid icmete icmepampic. Aid cuète bacuè meniachimboecnuc mibi padpidec unèsenquoio icnuc èbèdi tabadmendambi,” quequin èmbi chuiboed dada uata —quequin Esusèn chuiposhi.

### *Esמידina yacnocquido Esusèn chiaid*

<sup>8</sup> Adshumbic Esusèn padpiden chuioaposhi. Aid nidaid uabi yec icpampidi nèbi adquid yec nibèdantiapimbo icquid nec. Adquid yec abitedishun Icbombo icshobi chieshèmènquidon unès uacsho chococaqui uincuempacondash. Adondaid yec unèsaid uincuemquidquoio nec. Aidèn naden chuiposhi. —Esmidina yacnocquidon èbi tantiaquidon iste èmbi naden chuiboed dada uata. “Tantia, Esmidina yacnocquido. Mibitedi chuinu. <sup>9</sup> Èbi tantiaquido icsho utsibon chieshènac mimbi dayun uaid nibèdquindac. Nèbi mitsana nibèdquid yequi con Pa yacnuèsh dadpen dayun uaquidbimboec mibi bèdamboshè iquendac. Chieshèmènquidon mibi icsamboen chuishumboedtsen tantiembi. Mibi yacnoshon Satanasèn namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenguoio yec Satanasèn yuaboen nec. <sup>10</sup> Aido tantiaash: ‘Ashibi mèyampatsiashe,’ quec dacuèdenda. Satanasèn: ‘¿Ada Esus tantiaquido chieshtoenquoio ictsiashe? Tanu,’ quequin namiacpadomboen chieshèmènquidon mibi utsi-utsien quènèn nauedbanendac. Adoac daèdpactsèc ushec mibi mèyadendac. Puduenabi yec chieshtoenda. Chieshèmènquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun èbèdi tabadmendambi. <sup>11</sup> Nèbi èbi tantiaquido utsibotsen chuinu. Èmbi Esmidina yacnocquido chuibocpadomboen con Mayanèn mibitsen tantiametsiashe. Pabiäte cuembo icquin èmbi chiaid tantiata. Chieshtoenquoio icquin èbi

tantiasho isun icsaido cuidquiagno nësecainquo iquendambi,” quequin ëmbi chuiboed dada uata —quequin chuiposhi Esusën.

### *Pedcamo yacnoquido Esusën chiaid*

<sup>12</sup> Adoshombic ana shëcuënuësh chështe cuënumboshë icquid cueshqueboedën Esusën naden chuioaposhi. —Pedcamo yacnoquidon ëbi tanti-quidon iste ëmbi naden chuiboed dada uata. “Tantia, Pedcamo yacnoquido. Mibitedi chuinu. <sup>13</sup> Mibi yacno Satanasën yuabo dadpen icnuc ëbi tantiec mibi chieshtoenquo iquec. Ënden Satanasën namiac mibi yacnoshon chieshëmënuquidon con yua Antipas caid cuesunepdash. Aidën chieshtoenquo icquin ëmbi naid chuibansho cuesuniacsho isumbic ademibidi chieshtoenquo icquin mimbi ëbi tantiaquiopondac. Aden mimbi bëdamboen naid tantiembi.

<sup>14</sup> Adondaaid tantiaquin mibi icsaidtsen chuinu. Mibi cuëdüncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec chö,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquo tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. <sup>15</sup> Adec nicadaitabo caido ëbi tantiäte shubun puduedash mibëdi cuëdüncuedec icsamianta bumpec.

<sup>16</sup> Aidon chiaid tantienda. Ëmbi chiaid mibi ñiac-niacmenushe. Aidobëd tabadenda. Mibi cuëdüncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesachimboen mibi cuidtsiambique. <sup>17</sup> Nëbi ëbi tantiaquido utsibotsen chuinu. Ëmbi Pedcamo yacnoquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquio yec ëbi yacno puduedtequid nec,’ qeshun cuënote ushu menendambi. Abi cuëmédquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuidtsëqui ma isnu,’ quequin adoendambi,” quequin ëmbi Pedcamo yacnoquido chuiboed dada uata —quequin chuiposhi Esusën.

### *Tiatida yacnoquido Esusën chiaid*

<sup>18</sup> Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquio yequi aton taë shocosh piubimboec nacnacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec —camenuec adquio isadquidën naden chuiposhi. —Tiatida yacnoquidon ëbi tantiaquidon iste ëmbi naden chuiboed dada uata. <sup>19</sup> “Tantia, Tiatida yacnoquido. Mibitedi chuinu. Mimbi naid abitedi tantiembi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaiddi nëbi ëbi tantiaquioshon ëmbi chiacpadomboen mimbi dadpen naic.



<sup>20</sup> Adec utsi-utsiec bēdambo icnubi icsamianquid chido abi iquec. Aid mimbi cuemepatecnēdan. Aid cuemenquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshē icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaiduidquio chuibanosh. Adoac ēbi bēdiactsēc tantiauidtsēcboedi aidēn chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nēish pichicaid pec tabadcuededquimbi aton chidopenquio chudbededposh.

<sup>21</sup> Adsho isun aid chido: ‘Ma abi icsaid ēnu,’ queshun badedquio cuidenquio iccombi. Adoboqui abi icsaid ēnte bunenquio iccosh. <sup>22</sup> Adec abi icsaid ēntiapimbo icsho isumbimbi nēbi cuidendac. Ēmbi nac daicsabudash mēyadquiec aton ueten uendac. Ambi chiacpadomboen naquido adembidi mēyadquionoc cuidendambi. Aidon ambi naid ēnshoembi cuidenquio ictsiac. <sup>23</sup> Aid chido cuidquioquimbi aton bacuēbobimbocquido aidēn chiacpadomboen naquin ēntiapimbo icquido adembidi cuidquiendambi. Ēmbi adsho isun ēbi tantiaquidtedishun: ‘Matsesēn otacquio tantiaid tantiaquidquio Esus nec. Adquid icquin abi icsaid ēnenquio icquido cuidquin abi tantiaquido bēdambo icmēndac,’ quequin tantiaisiash.

<sup>24</sup> Tantia. Ambocquido ēbi tantiaquidombotsen chuinu. Aden Satanasēn chuimiaidēn chuisho: ‘Aden chuisho tantiatiapimbo iquebi,’ mimbi capoc. Aden bēdamboen nasho isun utsi chienquio iquembi. <sup>25</sup> Nēiduidtsēqui chuinu. Mimbi bēdamboen nabocpadomboen chieshtoenquio icquin ēbi tantiaata. Ēbi choabi yacpadembi adota. <sup>26</sup> Choshombimbi chieshtoenquio icquin ēmbi chiacpadomboen naquidombo ēbēdtan chuiquid dapabo icmēndac. Adoac ēbēdtan matses utsibo abitedi namēndac. <sup>27</sup> Aden Nuquin Papan aido ēbēda tchiuquid dapa icmiacsho utsibon: ‘Dēniacquin ēmbiquen nanu,’ catiapimbo iquēndac. Ēbi chieshēnquido: ‘Esus dēniacquin ēmbiquen matses namenu,’ quesho tantiaishun matsu nacnenquidēn ambi nacnenaid icsambo icsho isun pos-posacimbomboen cuidquiendambi. <sup>28</sup> Badiadte anoentsēc uispa dapa choded-chodedbocpadquiec ēnēdenquio yec ēbi tantiaquidobēd iquēndabi. <sup>29</sup> Ēbi tantiaquido utsibotsen chuinu. Ēmbi Tiatida yacnocquido chuibocpadomboen Nuquin Papan Mayanēn mibitsen pausuntsiashe. Pabi-ate cuembo icquin tantiaata. Chieshtoenquio icquin ēbi tantiaisho adembidi bēdambo icmēndambi,” quequin ēmbi chuiboed dada uata —quequin chuiposhi Esusēn.

### 3

#### *Sadis yacnocquido Esusēn chiaid*

<sup>1</sup> Adoshombic Nuquin Papan Mayan abi tantiaquidobēd tabadmequidquio icquin Esusēn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedēn naden chuiposhi. —Sadis yacnocquidon ēbi tantiaquidon iste ēmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bēdamboec tabadquido danquin utsibon: ‘Bēdambo icquido nec,’ mibi canubi ēmbien adotiapimbo iquec. Mibi bēdapenquio iquec. Unēsacimbomboen mimbi ēbi bēdamboen tantienquio iquec. <sup>2</sup> Isucunacimbomboen ēbi padpiden tantiaquiota. Nuquin Papan chiacpadomboen mimbi nauidtsēcquoque. Mimbi ēbi tantienquio iqueque. ‘Nuquin Papan chiacpadquiec bēdamboec tabadnuna. Esus tantiaquionona,’ cananta.

<sup>3</sup> Mimbi ēbi tantiabonondacpadomboen ēbi tantiaquiota. Bēpiscudenda.

Nëbi mibi icsaid ënshun ëmbi chiacpadomboen naoata. Isucunenquo yac bimboen ëbi tantienquo icshoembi mibi cuidendac. ‘Ampequid choec,’ quequin tantienquo yac bimboen ëmbi cuidte tantienquo icsho mibi cuidtsiambique. Ëbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daëdpactsëc ambi naid icsa ucudac bimboec icsainquo yec bëdamboec tabadec. Adec bëchish ucudac bimboec abi icsaid ënash bëdamboec tabadsho isun ëbëdi tabadmequin icsaisa icmendambi. <sup>5</sup> Ëbi tantiaquido utsibotsen chuinu. Ëmbi chuibocpadquidën chieshtoenquo icquin ëbi tantiasho adem bidei bëdamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquo yac bimboen bëshunenquo icquin ëbëdi tabadtequido abitedi tantiembi. <sup>6</sup> Ëmbi Sadis yacnoquido chuiboed Nuquin Papan Mayanën mibitsen tantiametsiashe. Pabiäte cuembo icquin bëdamboen tantiata. Chieshtoenquo icquin ëbi tantiasho adem bidei bëdambo icmendambi,” quequin ëmbi chuiboed dada uata —quequin Esusën chuiposhi.

### *Pidadepia yacnoquido Esusën chiaid*

<sup>7</sup> Adoshombic icsaisambo icquin ambi chiacpadomboen naquidënquo Esusën padpiden chuiposhi. Con tsusedpa Dabid yampicpadquid matses namequidquo yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnoquidon ëbi tantiaquidon iste ëmbi naden chuiboed dada uata. <sup>8</sup> “Tantia, Pidadepia yacnoquido. Mibitedi chuinu. Mimbi naid tantiembi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquo icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. <sup>9</sup> Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiadombo mibi nec,’ aidon mibi caindac. <sup>10</sup> Ëmbi chiacpadech chieshtoenquo icquin ëbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquo icquid icmendambi.

<sup>11</sup> Tantia. Nëbi choendabi. Utsibon chieshënaqui mibi icbocpadquiech chieshtoenquo yec bëdamboec tabadta. ‘Ëbi adenquo icsho isun Esusën abi yacno puduedmenquo ictsiashi,’ quiashe bëdamboec tabadta. <sup>12</sup> Aden chieshtoenquo icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yac bimboecnuc con shubun icquido mibi icmendambi auëshquo cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaqin ismepec? Adem bidei abitedi ismequin: ‘Con Pabëdan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucüësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. <sup>13</sup> Ëmbi

Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuibod dada uata —quequin Esusën chuiposhi.

### *Daudiseya yacnocquido Esusën chiaid*

<sup>14</sup> Adoshombic abitedishun naid tantiaquin abimbo chuiquidënquo Esusën padpiden chuioposhi. Nidaidbêdta abitedi uaquidënquo abitedishun Ichon chuiposhi naden. —Daudiseya yacnocquidon ëbi tantiaquidon iste naden ëmbi chuibod dada uata. “Tantia, Daudiseya yacnocquido. Mibitedi chuinu. <sup>15</sup> Mimi naid tantiemi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bédamboen tantiaquidon adopendacti? Padenquo. ‘Esus tantiaquid nebi,’ quiondaidëmbi mimi naiduidi naquin mimi ëbi bēdiactšec tantiatsēccoc. Adsho tantiashun: ‘Dayacquio yacimboen ëbi tantiaquiopashun,’ caimbi mibi. <sup>16</sup> Mibi adec chieshtonoc ëbitsen chieshtotiadquido iquebi. ‘Cacumiabimboen Nuquin Papa yacno ëbēdi mibi tabadmenquo iquendambi,’ mibi catiadquido icchitebi. <sup>17</sup> ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabēd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiatiadquido iquebi. Bēchish ucabi yacimboen mibi icsaid ënabi icsho mibi bédamboen istiapimbo iquebi. Pacuënēdabimboen ëbi tantienquo mimi iquec. <sup>18</sup> Adboedëmbi Nuquin Papabēd tabadte bunquin ëbi tantiaquiota. Ëbi tantiaquin bēchish ucabimboen mibi icsaid ënta. Adsho icsaisabimboecnuc mibi bédamboen isquin ëbēdi tabadtequid icmetsiambique. Pacuënēdaid paposhquiabimboecnuc ëmbi naid mibi bédamboen tantiametsiambique. Ëbi tantiata.

<sup>19</sup> Ëmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuē ëmiabimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimi icsamboen naid ënash bédamboec tabadta. <sup>20</sup> Mibi tantiaquiembrie. ‘Ëbi tantiata,’ ëmbi cac mibi: ‘Ai,’ qesho tantiash mibēd iquendabi. Pec tabadec bēisnanguiabimboec mibēd iquendabi. <sup>21</sup> Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibēdi tabadquid nebi. Adquid yec aibēdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbēdi tabadmequin ëbēdan chuiquid icmendambi. <sup>22</sup> Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuibod dada uata —quequin chuiposhi Esusën.

## 4

### *Nuquin Papa Uanën isaid*

<sup>1</sup> Asia yacnocquido Esusën ëmbudquin chuibon abuc ispombi. Adshun isquien shēcuē shēcniabimboec isadpec. Adnubien chuibocpadquiec shoncabimboec comapenec onqueoposh. —Nëmbo cho. “Nadquid iquendac. Nadotsiadac,” quequin mibi dadpen ismenu —caposhi.

<sup>2</sup> Adoac Nuquin Papan Mayanën tantiamiac ambo nidabimboen ispombi. Ushquin isacimboembimbi caindac. Adshun isquien Nuquin Papambo

chuiquid dapan tsadte dapanquo isadpec. <sup>3</sup>—Chuiquid dapa abentsēcquiobi nec. Bēdamboshē iquec —camenuc matses bunaidquo casēdubimboec nacnacquo yec piumbo yec bēdamboshē isadposh. Abi tsadaid nēnantanquo uenquebudpamboec uen podquedbipamboec umu-umupambo icposh. —Bēdamboshē icquidquo nec —camenuc adquo icposh. <sup>4</sup> Nuquin Papa nēnantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icboicboec aid tsadten tabadcuededposh. Abēdi tabadmequin Nuquin Papan icsaisa icmiaido yec ushumboshē icquidquo dasiuidcuededposh. Chuiquid dapan mauetembo shocosh nacenaidquo mauecuededposh. <sup>5</sup> Adnubien Nuquin Papa yacnuēsh abubimboec bēd-bedquetanenubien abu tesquianiacbimboec cuēdtoposh. —Abitedishun Icbombo nec —camenuc adec cuēdposh. Nuquin Papan bēntsiaucquo tabote taboaid 7tedi icnuc tabēcaid icposh. —Aton Mayan abentsēcshun Nuquin Papa bēisquioquimbi abi tantiaquido chianequid yequi Esus tantiaquidobēdtsen icoaic —camenuc aden ismeposhi. <sup>6</sup> Bēntsiaucbidi actepenquo chian dapa acte-actectsēcquo isadposh.

Nuquin Papa tsadaid anoen daēdtsēcquo abi dacuenadec aben icquidbimboecquid 4tedi icposh. Dadano chedobi ēshē ictsēcquiec icposh. Utsi tanenquo. Abimbouidquo istequidquo icposh. Cachoc icnubi tacbiduc adquibidi icposh. <sup>7</sup> Abentsēc bēdi dapambo tēbuchoquidbimboec icposh. Utsibic bacā bēnēbimboec isadposh. Utsibic matsēsēn bētantetebimboec bēisadposh. Utsibic chiqui dapabimboec isadposh. <sup>8</sup> Icbo-icboec aton podo uicchunēn podobimboec 6tedi icposh. Podonotsen adquibidi ēshēuidquo isadposh. Podo ananquo adquibidi icposh. Aidonquiobi ēnenquo icquin Nuquin Papa chuiposh nadec cuēdēnquin.

—Icsaisambo yec bēdamboshē icquidquo mibi nec.

Abitedishun Icbombo mibi icnuc mibipadquid utsi nibēdec.

Abitedimbo tantiaquidquo mibi icnuc mimbi tantiacmaid nibēdec.

Matses uabi yec icpampidi mibi nec. Nēbi adquid yec mibi nibēdantiapimbo icquidquo nec

—quec badiadquidēn badiadquidēnquiec cuēdēnashic inchēshēntsen cuēdēndeneposh.

<sup>9</sup> Aden dadanobi ēshēcquidon: —Mimbi nac bēdambo iquebi. Mibi bēdamboshē iquec, Papa. Abitedishun adembidi: “Bēdambo iquec,” mibi cac bēdambo ictsias, Papa —Nuquin Papa cadonenubi <sup>10</sup> tsusiobo 24ted icquido ambo tabadquido danēshēn tinuebudcuededposh. Adtanquimbi mauete chichededtanquin Nuquin Papan tayun sambededposh: —Abitedishun Icbombo mibiuidtsēqui nec —quequin. Adotanquimbic aidontsen Nuquin Papa chuiposh nadec cuēdēnquin.

<sup>11</sup> —Mibi bēdamboshē iquec, Papa. Adembidi abitedishun mibi: “Bēdambo iquec,” capashun.

Abitedishun Icbombo mibiuidtsēqui nec.

Chuiquid dapambo abentsēcquiobi mibi nec.

Mibipadquid utsi nibēdec.

Nadatiambo icquidquo mibi nec.

Comapenen tantiaquidquo icquin mimbi abitedimbo uapampic.

Mimbi tantiacpadomboen mibiuidtsēcquiobi abitedi uapampic.

Adoac mimbi tantiacpadequi mimbi uaido nibēdanabi yec abi iquec.

—quec tsusiobo cuēdēncuededposh.

## 5

*Nuquin Papan chiacpadomboen namequid Esus isadaid*

<sup>1</sup> Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitaccatempin bitaccabanaid neposh. <sup>2</sup> Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chichbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashbã? —quequin tantiec adposh. <sup>3</sup> Adoaquien ëbedanenquio icposh abitedimbo. Nëidic Nuquin Papabëd tabadquidotedi. Nëidic nïdaidën tabadquidotedi. Nëidic unësaidotedi. Aidedi dada uaid bedshun bitaccaid chichbanquin istequid nibëdposh. <sup>4</sup> Adsho isashini unësqüo icnuc shubipoc: —Aid dada uaid bedshun chichbanquin chuibanquid nibëdec —quiash. <sup>5</sup> Adshobini anocquid tsusion: —Otat. Shubienda. Ënëd. Is. Dada uaid bedshun chichbanquin chuibanquid abi iqueue. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

<sup>6</sup> Adoac isquien isadaidbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëctscë tsusiobouidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbö aitededquio-bidi icposh. —Abitedishun Icbombo yec utsin dëniacadiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nïdaid utsi-utsiec yacno matses abitedi yacno nïdmiaid icnuc ompodëmëdtiapimbo icquid Esus nec —camenuc ëshë 7tedi ismeposhi ushquin isacbimboecnuc. <sup>7</sup> Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. <sup>8</sup> Bedsho istanequien dadanobi ëshëcquidobëd tsusiobo 24ted icquido Esus ismec danëshën tinguëbudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncamiacbimboec Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushdquid Nuquin Papa yacno nidacbimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuc mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboëd dada uaid bedshun bitaccaid chichbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nïdaid utsi-utsiec yacno tabadquido.

Aidedi mibi tantiaquido yansho Nuquin Papan bëdamboen isendac.

<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac —quec cuëdëncuededposh tsusiobo.

<sup>11</sup> Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidoudiquio dacuenadec tabadposh. Abi uquëctšëc dacuenadec tsusioboudiquio tabadposh. Aid uquëctšëc dacuenadequic mayan bëdaboudiquio tabadposh. <sup>12</sup> Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidacimboec matses icsaid bedshunec abided cuidadec Esus unëšpondash.

Esusquio bëdamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun çapashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun çapashun.

Adembidi: “Mibi bëdamboshë iquec. Mibi tantiaquiemi,” abitedishun çapashun

—quec cuëdëncuededposh mayan bëdabo Esus tantiec.

<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemaiadotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bëdamboshë iquec.

Obeca bacuëbimboecquid abided cuidadec unësaid Esussten bëdamboshë iquec,” canuna, ënenquio icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

<sup>14</sup> Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bëdamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

## 6

### *Bitaccaid chicaid chiaid*

<sup>1</sup> Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdäcimboc comapenec cuëdquin: —Cho —çaposh.

<sup>2</sup> Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshëncquido uesquin cuesun se-caquidquio mibi nec —quetanquin chuiquid dapan mauetembo mauemeposh. Adoac adecbidi abi chieshëncquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac

<sup>4</sup> cabayo piumbo icquid catsadec dada choposh. —Matses cuesun secanenquio icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa

matses siante dapa meneposh. Adomboen Nuquin Papan matses cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dabi choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiyosh. —Pucquid dadpenquio meniac aton yuë daëdpactsëcnc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiyosh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —quequin chuiyosh. —Nuquin Papan cuidac adec pete nibëdnuc matses pete bunquindac —quequin cuidte utsi aden ismeposhi.

<sup>7</sup> Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac <sup>8</sup> cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aitedebidi unësbudnendac. Daicsaidëmbic aitedebidi. Aben icquid uinsadpambo icquidën aitedebidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënuquidon cuesun secaido Esus tantiaquido tabadsho ispombi. Aido chieshtoenuquo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Ichombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënuquin cuesun secaboëdo ztedetsicsahun mimbi cuidpe? —caquin chuidoneposh. <sup>11</sup> Adoaquien: —Chiata. Yuec-yuepactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënuquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembï —queshun abitiombi dasiuidbudte ushumbo icquid dasiuibamposh.

<sup>12</sup> Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboc comapenec uëdëqueposh. Nidaid uëdëquenubi abucüesh chënquequidtedi dacuëdampambo yamposh. Ushë dashcute chëshën bëpucacimboc inchëshquio icposh. Inchëshën ushëbic intacimboc piumboshë isadposh. <sup>13</sup> Uispabic nati-ambo cunquenuc cuëte bacuë tididiquiacimboc nidaidën tididieposh. <sup>14</sup> Abubic dashcute bidiquiacimboc isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aiteddi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidsash:

—Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adem-bidi abided cuidadec unësaid Esusëntsen cuidnushe. <sup>17</sup> Aidon ambi tantia-padënquibini nëbimbobi cuidchitec. Padtembo. ¿Tsutsi cuidenquio icpatsi-ashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

## 7

### *Isadaidbo Nuquin Papa tantiaquidombo bësiaid*

<sup>1</sup> Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabädsho isombi. Aidon cunquequid dapa 4tedbidi icbo-icboen uidën uaqin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuète yec quenuc icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaqin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuète yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquiden matses tsyuequido nec. Aidedti tambanac 144,000tedi icposh dadpenquioshë. <sup>5</sup> Nëidic Acobo caidën mado Uda caidën matses tsyuequido 12,000tedi. Nëidic Acobon madobidi Duben caidën matses tsyuequido 12,000tedbidi. Nëidic Acobon madobidi Cad caidën matses tsyuequido 12,000tedbidi. <sup>6</sup> Nëidic Acobon madobidi Ased caidën matses tsyuequido aidtedquibidi. Nëidic Acobon madobidi Netadi caidën matses tsyuequido aidtedquibidi. Nëidic Acobon madobidi Manases caidën matses tsyuequido aidtedquibidi. <sup>7</sup> Nëidic Acobon madobidi Simeyon caidën matses tsyuequido aidtedquibidi. Nëidic Acobon madobidi Debi caidën matses tsyuequido aidtedquibidi. Nëidic Acobon madobidi Isacad caidën matses tsyuequido aidtedquibidi. <sup>8</sup> Nëidic Acobon madobidi Sabadon caidën matses tsyuequido aidtedquibidi. Nëidic Acobon madobidi Ose caidën matses tsyuequido aidtedquibidi. Nëidic Acobon madobidi Benamin caidën matses tsyuequido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

### *Esus tantiaquido Nuquin Papa yacno tabadaid*

<sup>9</sup> Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iguec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedti Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmi-aido yec ushumbo icquid dasiuidcuededposh. Con matsesën chuiquid dapa ismiachimboen: —Nuquin Papa bëdamboshë iqueque. Ismenü —quequin niste podobieccquid sananquin uic-uiccaposh. <sup>10</sup> Aido comapenec cuëdücuededposh.



—Abitedishun Icho icquin Nuquin Papan ambi tantiacpadomboen isadaidbon obeca bacuèded cuidacimboen aton Mado Esused cuidpanèdash.

Adoac nuqui icsaid bedshunec abided ciudadec unèspondash Esus.

Aid tantiasho icsaido cuidacno nidmenquio icquin nuqui abèdi tabadmec.

Aton Papabèd bédamboshè iquec

—quec cuèdèncuededposh.

<sup>11</sup> Adsho tantiash ambo tabadquido mayan bédabotedi danèshèn tinquebudcuededposh. —Nuquin Papabèd Esus abided ciudadaid bédamboshè iqueque. Ismenuna —guiash adposh. Nènantanquio Nuquin Papabèd Esus tabadnuc abi uquètsèc dacuenadec dadanobi èshècquido 4tedi icquiduidquio tabadposh. Abi uquètsèc dacuenadec tsusiobo 24tedi icquiduidquio tabadnuc abi uquètsèc dacuenadeguic mayan bédabouidquido tabadposh. <sup>12</sup> Aid mayan bédabotedi danèshèn tinquebudcuededequi comapenec cuèdèncuededposh.

—Aden abi tantiaquido abèdi tabadmequid bédamboshè iquec.

Esusbèdi Nuquin Papa bédamboshè iquec.

Adembidi abitedishun: “Mibi bédambo iquec, Papa,” quequin chuipashun.

Esusbèdi Nuquin Papa bédamboshè iquec.

Abipadquid utsi nibèdec.

Comapenen tantiaquidquico icnuc ambi tantiacmaid utsi nibèdec.

Aiduidtsèqui bédamboen tantiaquidquico nec.

Aidèn nashunac bédamboshè iquebi.

Nadatiambo icquid nec. Abitedishun Icbombo nec.

“Esusbèd Nuquin Papa bédamboshè iquec,” canuna

—quecuededposh mayan bédabotedi.

<sup>13</sup> Adshumbic èmbi 24ted icquid isboed abentsècshun tsusion chuiposhi.

—Ma ushumbo icquid abitiombi dasiuidquido ¿tsutsi nepec? ¿Mitsiuèshquico

aido chosh? —cac: <sup>14</sup> —Tsauid, tsusio. Mimbibien tantiec —capombi.

Adsho tantiash: —Tantia. Mibi chuinu. Satanasèn: “¿Ada chieshtoenquico

ictsiash? Tanu,” qeshun natiamboshè icmiac Esus tantiec chieshtoenquico

ictenedo nec. Adec chieshtoenquico icsho isun Satanasèn tantiacpadomboen

chieshèmènquidon unès uapondash. Abided ciudadec unèsaid Esus tantiaquido

icsho icsaisa icmiaido yec dashcute ushumbo icquid dasiuidcuededposh. <sup>15</sup> Esus tantiaquido icsho Nuquin Papan abi yacnombo

puedemeshun aton yuabo icmepondash. Adoac Nuquin Papa yacnombo tabadquimbi

abi ènenquico icquin tantiendac. Adembidi Nuquin Papan: “Con mado mibi nec.

Con champi mibi nec. Nuquibi icnu. Cho,” qeshun abèdi tabadmequin

bédamboen dayun uaic. <sup>16-17</sup> Isadaidbo matesèn nèish yua obeca dadpen dayun

uacpaden abided ciudadec unèsaidèn Esusèn abi tantiaquido bédamboenshè

dayun uaindac padpidec unèstiapimbo icnuc. Adoac petè bunenquico iquendac.

Actetsen bundoenquico iquendac. Abi yacnuèsh ushèn pichiquenquico

iquendac. Chun mèyadenquico iquendac. Nidaidènuèsh shubidenedi Nuquin

Papa yacnuèsh shubitiapimbo iquendac. Natiamiante nibèdquiec iquendac.

Unèsquico icmiente nibèdquiec iquendac. Bacuè shubisho anin bèucquin

bédambo icmiacimboen abi yacnoshon Nuquin Papan Esus tantiaquido

bédambouidquico icmendac —quequin chuibamposhi tsusion.

## 8

### *Dada uaid bitaccaid nainquin chicaid*

<sup>1</sup> Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin

Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquoio tantiec tabadposh. <sup>2</sup> Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. <sup>3</sup> Adnubien mayan bēda utsi ambobidi choposh. Choash bēdambo nuadquid tauinuequin shocosh nacenaid tauite dapa dayun nidtuidposh. Shocoshēmpin bēdamboshē nuadnuc tauitempi utsi sanamposh. Adsho isun bēdambo nuadquid nua meneposh. Adoac: —Nēid tauiac pushudquid Nuquin Papa yacno nidacimboec Esus tantiaquidon chianiaid iquec —quequin bēdambo nuadquid sanshun tauite nacenaid dapan tauiposh bēdambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiahsun Nuquin Papan abi tantiaquido chieshēnquido cuidendac —quequin aden ismeposhi. <sup>5</sup> Adshumbic aid mayan bēdan tauite dapan samēdquid cuēte dētsisadaid isquidquo icquid bedshun shocoshēmpin sandoposh. Aden sandotanquimbic shocoshēmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquiianiachimboec cuēdtoposh. Adnubien nidaid abichobi saca-sacaquemboec uēdēqueposh. —“Nuquin Papan ēbi chieshēnquido cuidpashun,” quequin Esus tantiaquidon chianesho tantiahsun aden Nuquin Papan comapenen cuidendac —quequin aden ismeposhi.

### *Shoncate shoncaquin ismiaid*

<sup>6</sup> Matses tabadacno cuēte dētsisadaid isquidquo icquid masiabudnubien shoncate bedboedon mayan bēdabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquoio icposh. Ue tsasi yec cuēte dētsisadaid isquidquo icquid yec intac yec quenuc chomeposh ue dapa choacbimboecnuc. Aden chomiadēn nidaid nuamboshē taidposh. Cuēte dadpenquioshē taidposh. Uasin dadpenquioshē pichiqueposh.

<sup>8</sup> Adnubien mayan bēda utsin shoncaposh 5tedishun shoncabi icnuc. Shoncanubien macuēsh dpatembi icquid nēdēnquepamboec abucuēsh paēdec chian dapa mad caid nēpaēdposh. Adnuc chian nuamboshē intac yamposh. <sup>9</sup> Adec intac yanaidēn acten icquid dadpenquioshē unēsbudneposh. Adecbidi cano dapa antabēdquidotedi abi canochobi mentoadbudneposh.

<sup>10</sup> Adnubien mayan bēda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nēdēn-nēdēnquepamboec abucuēsh budec acte nēpaēdposh. Aid acte nēpaēdboedēn acte utsi-utsiec dadpenquioshē actiapimbo yamposh. <sup>11</sup> Aid uispa acte muca uaquid niosh. Aid nēpaēdquin muca uaid acte acash matses dadpenquioshē unēsbudneposh.

<sup>12</sup> Adnubien mayan bēda utsin shoncaposh 3tedshun shoncabi icnuc. Shoncanubien Nuquin Papan namiac chēnquequidtedi icsa uaposh. Ushē cuesquinc inchēshēn ushē cuesquinc uispa dadpenquioshē cuesquinc caquin icsa uaposh. Adoquien bēdambo chēnqueboedi bēdiactsëcquo chēnquiantsëccosh.

<sup>13</sup> —Aden Nuquin Papan matses cuidquiendac —quequin ēbi ismenubien chiqui dapa cuenequi matsesbimboec cuēdec comapenec cuēdciemposh. —Esus tantiesabo Nuquin Papan cuidtequido tantiac unēsquioshē iquec. Shoncabi icboedon mayan bēda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshē iquendac —quec cuēdciemposh abuc cuenequi.

## 9

*Mayan bëda utsin shoncanuc isaid*

<sup>1</sup> Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempi meneposh. Podobitsi icسابو uidën uacno nidaid shëcuë uquëduccio icquid bëtashte chichte neposh. <sup>2</sup> Aid chictempin chicaquien uquëduccio tied nëdënquedoacbpamboec pushud-toposh. Abuc inchëshquio pushudquid icnuc ushë isadenquio icposh. <sup>3</sup> Adsho isaquien pushudacnuëshquio tsectsebiecquid dadpenquioshë choposh. Chichumbimboec sianquidquio niosh. <sup>4</sup> Adsho isun aido chuiposh. Aton petembo caic: —Nuquin Papan tantiapadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidoidquio sebudneta —quequin chuiposh. <sup>5</sup> Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. <sup>6</sup> Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

<sup>7</sup> Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetebimboecquid mauceduedposh. Matsesën bëtantetembobi bësiadposh. <sup>8</sup> Chidon tëbucshumbimboec isadposh. Bëdin shëtabimboec aton shëta icposh. <sup>9</sup> Bëntsiac shicdiadquid cudaste shocosh nacnenaiddimboec sictsasimbo icposh. Aid abi maisi cuensho tantiac tied nëdënquiacimboec comapenec cuëdposh. <sup>10</sup> Aid tsectsebiecquid chishpi-choquid yec chichumbimboec sianquidquio neposh. Inchëshën ushë 5tedi nidmequin adquidën dadpenhun natiamboshë icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

<sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

*Chiqui dapan chuiboed utsi*

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiac tsadunaid yacnuëshquio onquedosho tantiombi. <sup>14</sup> Adec onquidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiapadomboen naic nid,” quequin chuitan —caquien chuitamposh. <sup>15</sup> Aden chuitan aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquobi adoendac —quequin tantiapadomboen adoposh. <sup>16</sup> Adoquien ambi namiaido cabayo catsadquido sondado chedo matses utsibo cuesun scanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —quepsh.

<sup>17</sup> Èmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec quepsh. Cabayon

mapi bëdi dapan mapibimboec isadposh. Ana shëcuënuësh nêdênquepamboec pushud-pushudpambo yec choposh. Cachinan bacuë pisenaid nuadacimboc asupede caid icsamboshê nuadposh. <sup>18</sup> Adshumbien ana shëcuënuësh choaidên matses dadpenquioshê cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquiao niosh. Aidêntsen matses dadpenquioshê unês uabudnequin ismeposhi.

<sup>20</sup> Adnubien aden Nuquin Papan cuidaidên unês uamiabi yaidon matsesën abi icsaid êntiapimbo icposh. Ambi naiduidi nabamposh. Êntiadquidi abi icsaquioposh. Nuquin Papa tantiengquo icquin podobitsi icsabo tantiaquin êntiapimbo icposh. Adembidi ambibi nacnenaid ambi papa caid ênenquo icquin tantiaposh. Utsibon shocosh nacnenaid tantiaposh. Utsibombic cuênote. Utsibombic cuête. Adquid ambibi nacneshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taên caputiapimbo icposh. Adquid papa quequin tantiabededposh. Aid tantiengquo icquin Esusquo tantiatiadquidi ambi nacnenaiduidi tantiaposh. <sup>21</sup> Cuesanquidon abi cuesun secaposh. Nênêchoquidombic abi unês uabudneposh. Cuête podo dauë icsa chodcaquidombic adembidi matses dadpen unês uabudneposh. Aton chidopenquo chudquidombic adembidi utsi chudshumbedeposh. Adembidi aton bënëpenquo chudmequidên abi icsaid êntiapimbo icposh. Adembidi aben uequidon abi chudmebedeposh. Ampequidombic abi ampebedeposh. Adêc matses abitedi: —Nuquin Papan cuidnushe. Êbi icsaid ênu —quetiadquidobi adenquo icposh.

## 10

### *Mayan bëdan dada uaidêmpi pemiaid*

<sup>1</sup> Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuêdampambo icquidquiao Nuquin Papa yacnuëshquo budsho ispombi. Abu ushubimboec isadec abitiombi dasuidbudpaccosh. Uen podqued uenquebudachipamboec mapino icposh. Ushëbimboec bêtantete bëchamauanquiecposh. Buintad nitsinaid nêdênquiacbipamboec isquid-isquidpambo nidte icposh. <sup>2</sup> Dada uaidêmpi bëcadotsaid sanamposh. Budash nidtuidposh. Tsiembudcuenshun taê abiucshun chian dapa mad caid nêtincaquimbi taê opiocshon mananuc tincaposh. Ênapenquioshê icquid niosh. <sup>3</sup> Adashien bëdi noshquiacbimboec nuamboshê cuêdtoposh. Adêc cuêdquin chiac abu 7tedec cuêdtonquin êcbedtonpesh Nuquin Papan chiaid chuiquin. <sup>4</sup> Aden abu cuêdquin êcbedtonesho tantiaashun: —Abu cuêdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuêdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

<sup>5</sup> Adnubien mayan bëda tsiembudcuenshun chian dapa nêtincaquin utsiucshun mananuc tincaboedên ambibi podo abiucquo cadoposh. —Nuquin Papan isnubi abimbo chuiquidquiao nebi —quequin tantiamenuen aden ambibi podo abiucquo cadoposh. <sup>6</sup> Adotanquin chuiposhi. —Tantia. Mibi chuinu. ¿Tsutsi nidaid uabi yec êndenquimboshê icpampic? Aidi Nuquin Papa nêbi adquid yec nibêdantiapimbo iquendac. Adquid icquin abitedi uapampic. Abu uashun aidên icquidtedi uapampic. Nidaid uashun aidên icquidtedi uapampic. Acte uashun aidên icquidtedi uapampic. Aden abitedi uaquidên chiaidquiao chuinu. Nêbi Nuquin Papan ambi tantiacpadomboen icsambo icquido cuidquimbi abi tantiaquido abêdi tabadmendac. <sup>7</sup> Êbi padquid

mayan bēda utsin shoncate sanamboedēn: “Nēbi nainquin shoncanu,” cac-padēnquo Nuquin Papan ambi chiampicpadomboen adoendac —queposh mayan bēda chuiquid dapa dacuēdampambo icquid Nuquin Papan matses cuidquin naimpanuda.

<sup>8</sup> Adnubini abucueš cuēdquidēn chuiposh. —Aid mayan bēdan sanamboed dada uaid bed —cac: <sup>9</sup> —Dada uaid beccho —capombi. Adoaquien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacimboen Nuquin Papan chiaid cuishonquequin isbanisbanash mucambo yanacimboec Nuquin Papan cuidte tantiaš shubitiadquo mibi yanendac —quequin tantiamenuen aden chuiposhi.

<sup>10</sup> Adoac aid bedshun chiash adquo yanobi. <sup>11</sup> Adquo yansho isun mayan bēdabo chuiquid dapan chuioposhi. —Nuquin Papan ambi chiaid tantiamiac matsesēn nabante dadpen mimbi chuiabanendac. Nidaid utsi-utsiec yacno tabadquidon nabantebēda chuiquid dapabon nabante mimbi chuiabanendac. Aden Nuquin Papan tantiacpadomboen mimbi chuiabanendac —quequin chuiposhi mayan bēdabo chuiquid dapan.

## 11

### *Nuquin Papan namiaidon daēdshun naid*

<sup>1</sup> —Nuquin Papan tantiacpadomboen mimbi chuiabanendac —quequin chuishumbic mayan bēda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bēdambo nuadnuc tauinuequin nacenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. <sup>2</sup> Shubu nuntanquo tambanshun umanucquid daquēnē uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsē chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquēnē uaidēn pudued-puduedendac,” qeshun aid shubu daquēnē uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquo icquin Esusbēda ēbi tantiaquidombo nec,” quequin Nuquin Papan fantiec —camenuen aden tambanaido tantiameposhi. <sup>3</sup> Adnubini Nuquin Papan chuiposh. —Aden Edusaden icsa uanubi matses daēdquiobi ēmbi chuiboedquo chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsē chotsecnuc matamequin ēmbi chiacpadomboen chuiabanendac. Adquid yec: “Matses abitedi icsamboshē icsho isash shubitiadquo iquebi,” quequin icsambo icquid abi icsaid ēmenuec dashcute icsactsēcquidquido dasiuidendac —quequin Nuquin Papan chuiposhi.

<sup>4</sup> Adshobini mayan bēdan chuioposh. —Aido Nuquin Papan oncamiaid daēd isadaidbo matses tsusedpan chuiampid nendac. “Nuquin Papan bēntsiac cuēte odibos caid nitsinaid daēd bēdambo icquid iquendac. Ambobidi tabote daēd bēdambo icquid iquendac,” quequin chuiampid nendac. —Nuquin Papan Mayanēn tantiamiaidquio icquin ambi chiaidquo chuiabanendac,” camenuen aden chuiampic. <sup>5</sup> Aden abi chuibansho abi chieshēnquidēn: “Mibi cuesunenu,” caqui cuesuniadenquo iquendac. Nuquin Papan dayan uaid icquin ana shēcuēnuēsh choaedēn nibēdquiecnuc pichicacimboen abi cuesunenuquidotedi unēs uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanēn namiaidquio icquin comapenen tantiaquin ismebanendac. Aden ismequin nac abi nidabi yacpadequi

ue choenquio iquendac seta 3tedi matamec. Adembidi aidon acte in-tacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. <sup>8</sup> Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icbo Esus cuesten dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquidò cuesun secaindac. <sup>9-10</sup> Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menencuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menencuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

<sup>11</sup> Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. <sup>12</sup> Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënnquidon isnubi adendac. <sup>13</sup> Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatid,” quecuededendac —quequin chuiposhi mayan bëdan. <sup>14</sup> Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

### *Nainquin shoncaquin Uan ismiaid*

<sup>15</sup> Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided ciudadec unësaid bëdamboshë iquec.

Abi chieshënnquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icbo nec

—quec cuëdëncuededposh. <sup>16</sup> Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bëdamboshë iquec —quequin ismec danëshën tinquëbudcuededposh. <sup>17</sup> Adtanequi naded cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

18 Nidaid utsi-utsiec yacno tabadquidon abi chuiquidobëdta mibi chieshëndenc.

Mimbi uaidtedi icsa uadenc.

Adsho mimbi tantiacpadënuio nëbi mimbi cuidendac.

Matses abitedi uincumetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo mibi yacno mibëdi mimbi tabadmendac.

Chuiquid dapambobëdta chuiquidpenquo mibi tantiaquidotedi bëdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacimboen.

19 Adshun isquien Nuquin Papa yacombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. —Ëndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ëbi ismenubien bed-bedquetanec abu teshquianiacimboec nua cuëdtoneposh. Nidaid saca-sacaquemboec uëdëqueposh. Ue dapa nuamboshë choacimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

## 12

### *Chidobëdta nisibimboecquid dapa ismiaid*

1 Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacimboec bëchamauanquiescho ispombi. Inchëshën ushë tincash tsadposh. Uispa 12tedi nacnenaid mauete maueposh. 2 Bacuë nua usunec tishtiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. 3 Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuededposh. Satanas niosh. 4 Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo ichoedo utsi-utsien yuapampic. Aden yuash aton yuabobëdi nidaidën choshon matsesten icsamete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. 5 Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. 6 Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquo seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

7 Adshumbic Nuquin Papa yacnoshon pappiden ismiac nëidtedi isoapombi. Nëdic nisibimboecquid dapa Satanasquobi. Nëdic mayan bëdabo ichoedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëdic Nuquin Papabëd icquidombo mayan bëdabo dadpen. Nëdic aido chuiquid dapambo Miqued caid.

Aidtedi ispombi. Adnubien Satanas nadposh. —Aton yuabo mayan bédabo cuemiasch Nuquin Papa dëniaguec ëbimbo abitedishun icbo yantsiabi — quiasch nicantiadquio icposh. Satanas chedo nidaidën nidmiabi icnuc neposh. <sup>8</sup>Adshumbic: —Niunchitono —quequin bedbidan-bedbidanaquien Nuquin Papan yuabo Miqed chedo uidënquio icquido yec niadenquio icposh. Adshumbic Miqed chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. <sup>9</sup>Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquieç.

<sup>10</sup>Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdta abi dëniacnuequido dëniacmenquio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bédambo icquidoda nedic? Ëmbi natiamiac aidë chieshtot-siasch,” quequin Nuquin Papa chuidenequid Satanas nec.

Satanas chedo cuemiasch Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. <sup>11</sup>Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided cuidadec unësaid Esus tantiec chieshtoenquio icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenquio icquin adenuidi Esus tantiasho cuesun secameposh Satanasën aton yua icmiambobi.

<sup>12</sup>Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquieç Satanas chieshëmënquieç tabadec.

Mibi icsamete bunquieç. “Nëbi Nuquin Papan ëbi cuidquieque.

Abi tantiaquido yashunchitono,” quec mibi icsamete bunquin mibi nati-ambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

<sup>13</sup>Adshumbic ëmbi isadaidbon chido isboed padpiden ismeposhi.

Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —queshun chieshënquin nisibimboecquid Satanasën aid chido nadancaposh. <sup>14</sup>Adnubien Nuquin Papan chiqui dapan podobieçquid meniac bedanec aid podombi cuenec

matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh.

<sup>15</sup>Adnubien nisibimboecquidën: —Aid chido unës uachitono —quequin ambibi ana shëcuëshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec.



16 Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. 17-18 Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bédamboen naquido Esus tantiaquido caimbi.

## 13

### *Bëdibimboecquid dapa ismiaid*

1 Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icbombo icnu —quequin aton mapitedi bédada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh. 2 Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi. 3 Adshumbic padpiden ismeposhi. Adoac aid bëdi dapabimboecquid acte uquëducuësh choboedën mapi abentsëc mëmuntiapimbo icnuc cuesuniaid uincuemaiid icsho ispombi. Aden uincuemaiid icsho isash: —Comapenen tantiaquidien nechitec —qeshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh. 4 Adshumbic: —Èbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac èbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquëducuësh choboedtsen tantiaquioposh. 5 Aden matsesën tantiaid icquin Satanasën tantiamiacpadomboen Nuquin Papa chieshënquiec: —Nuquin Papa caid nibëdquiec. Èbiuidtsëqui namembi —quequin matses abitedimbo nameposh. Aden Nuquin Papan tantiacpadembí inchëshën ushë 42tedi nidmeposh seta abentsë chotsecnuc matamequin. 6 Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. 7 Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacimboecnuc ismeposhi. 8 Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Èndenquimboshë matses uabi Nuquin Papan tantiampicpadec abided ciudadec unësaid Esusquio tantiesabo nec. —Adquido yec Nuquin Papan: “Èbëdi tabadmendambi,” quequin chiacmaidombo nec —quequin aden ismeposhi.

9 Pabiate cuembo icquin bédamboen tantia. Esus tantiaquido icsho mibi chuinu. 10 Nuquin Papan: —Èbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Èbi

adsho tantiash mimbi nacpadequi chieshtoenguo icta. Chieshtoenguo icquin Esus tantiaquin ambi chiacpadomboenuidi nabanta.

### *Nidaid shëcuënuësh choboedtsen ismiaid*

<sup>11</sup> Adshumbic padpiden ismeposhi. Adoac aben icquidbimboecquid utsisen nidaid shëcuënuësh pudunsho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh.

<sup>12</sup> Adsho isun Satanasën abia chuiquid dapa icmeboedën nidaid shëcuënuësh puduemoed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. — Seshuniaid uincuemiondaidën nuqui chuiquid dapan chiaiduidtsëqui natiad —caposh. <sup>13</sup> Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpeshun isnubi abuchsun ambemi taboadaid budmequin ismeposh. <sup>14</sup> Aden Satanasën namiacpadomboen comapenen tantiaquin ismiac matses dadpeshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Pampambo tantienquo icquin. Abi chuiquid tantinamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh.

<sup>15</sup> Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquiobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. <sup>16</sup> Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquo dada uaquin bësiadmeposh nëdtedi. Nëdic chuiquid dapabo. Nëdic chuiquidpenquo. Nëdic dadpen dayun uaquido. Nëdic aton na nibëdquido. Nëdic matses yuabotedi. Nëdic yuapenquio. Aidtedi matses dadpenquioshë dada uaquin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquo mësiadmeposh. —Acte uquëducuësh choboedën ëbi chuiquid dapan yuabo nec —qeshun nameposh. <sup>17</sup> Adshumbic nidaid shëcuënuësh choboedën chuiposh. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. <sup>18</sup> ¿Ada ëmbi chuiboed tantio? Bëdamboen tantiaquidën: —Abi cuëmëdquidquio chienquo icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isachimboecnuc aden ismeposhi.

## 14

### *Nuquin Papan cudasënaido ismiaid*

<sup>1</sup> Adoshombic padpiden ismiac abided cuidadec unësaid Esusquo macuësh dapa Sion caid mananënguo tabadsho ispombi. Abëdi abi tantiaquido dadpenquo 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿midapadpamboec cuëdtoposh? Acte nua chododoquiachipamboequien

niacchiposh. Abu tesquianiacchipamboequien nechitosh. Ten-tencate dapa dadpen icbo-icboen sananquin ten-tencacchipamboec comapenec cuèdèncuededposh. <sup>3</sup> Adec Esusbèdi macuèsh mananènquo tabadboedo 144,000tedi icquido cuèdèncuededposh. Nuquin Papa chuiquid dapan tsadten tsadacnomo cho-choash tabadec cuèdènte chucan cuèdèncuededposh. Tsusiobo 24tedi icquidobèdtan dadanobi èshècquido 4tedi icquidèn ambobidi tabadquin tantianuc adcuededposh. Abi icsaid bedshunuec abided cuidadec unèsaid Esus tantiaquidon matsesènuidsèqui aid cuèdènte chuca tantiec cuèdènos. <sup>4</sup> Aido Nuquin Papa yacno nidabi yec nidaidèn tabadnuc matses utsibo abitedimbo icsamboecshè tabadnubi aidoen bédamboec tabadpanèdash. Utsibon Nuquin Papa Esusbèdta tantiatiapimbo icnubi aidoen tantiaquiopanèdash. Abided cuidadec unèsaid Esus tantiaquid icquin ambi chiacpadomboen nabampanèdash. Adonèdaid icquin Nuquin Papabèdta Esus cuishoncamequidombo niosh. <sup>5</sup> Chieshtoenquo icquin Esus tantiec miesabo icpanèdash. —Adquido iquendac —quequin ushquin isacbimboecnuc aden ismeposhi.

### *Mayan bèda utsi 3tedshun chiaid*

<sup>6</sup> Aido ismeboshombic utsitsen ismiac Nuquin Papan abi yacnoshon uaid mayan bèda uicchun cuenacimboec abuc cuensho ispombi. Bènudtiapimbo icquid Nuquin Papan chiaidquido matses chuinuec niosh nèidtedi. Nèidic matsesquo. Nèidic matses utsibo. Nèidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh.

<sup>7</sup> Abuc cuenquimbi chuibemposh. —Nuquin Papauidsèqui tantiata. “Abu uaquinc nidaid uaquinc acte uaquinc caquid bédamboshè iquec. Abipadquid utsi nibèdquo iquec,” quequin tantiata. Nèbi ambi chiaid niac-niacquido cuidqueque. Aidquido tantiata —quequin chuibemposh abuc cuenquimbi.

<sup>8</sup> Adnubien mayan bèda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshè icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquo icquin icsamequioposh. Aduidequi icsho èndènquimboshè cuidampicpadomboen Nuquin Papan uesquin cuidquiendac —quequin chuibemposh mayan bèda utsin abuc cuenquimbidi.

<sup>9</sup> Adnubien mayan bèda utsitsen abuc cuenoaposh. Aidèntsen chuibenoaposh. —Tantia. Nuquin Papan cuidtequido chuinu. Chuiquid dapa icsamboshè icquid acte uquèdücüèsh choboed tantiaquin aйдimboecnuc nacnenaid tantiaquioposh. Aden abi chuiquid icsamboshè icquid tantiec: “Aton yua nebique. Ismenu,” quiash ambi tantiaidèn chiacpadec utsi-utsiec bèsiadcuedednubi utsi-utsiec mèsiadcuededposh. Aden abi chuiquid icsamboshè icquid tantiaquidon abi tantiatiapimbo icsho Nuquin Papan cuidquiendac. <sup>10</sup> Aidtedi chuiquid icsamboshè icquidèn yuabo icsho icbobèdtabi Nuquin Papan nèishènquioshon cuidquiendac. Icsaquido cuidquiacno chian anèdènquiacno nèsecain adoendac. Abided cuidadec unèsaid Esusènquo mayan bédabobèdtan isnubi adoendac. <sup>11</sup> Ènenquo icquin adoendac. Aden Nuquin Papa chieshènquidquido tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ènenquo icquin —quequin chuibemposh mayan bédan. Aden ismeposhi.

<sup>12</sup> Èmbi chuiboad tantiaashun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshènquin: —Padi. Esus tantienda. Cueschitomane —caqui adenuidi ènenquo icquin Nuquin Papabèdta Esus tantiaquiota.

<sup>13</sup> Adnubi Nuquin Papa yacnuësh comapenec onquequin chuiapooshi. — Naden chuiquin dada uata. Chieshëmëñquidon: “Esus tantiec,” qeshun cuesun secaido Esus tantiaquido cuishonquendac —quequin chuiapooshi. Adnubien Nuquin Papan Mayanëtsen: —Ai, abimbo caosh. Esus tantiaquido natiaic tabadtenedobi unësash bédamboshë iguendac shubitiapimbo yacno tabadec. Ambi chiacpadquiec bédamboec tabadec unësacsho Nuquin Papan aden bédamboshë icmendac —quequin chuiapooshi.

### *Intac nua icnuc Nuquin Papan cuidtequid chiaid*

<sup>14</sup> Adoshombic padpiden ismiac abu ushunquio Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaid maueshun chështebimboecquid sanamposh. <sup>15</sup> Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata <sup>16</sup> —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

<sup>17</sup> Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. <sup>18</sup> Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquio icquid nidaid masiabudboedën tautie dapa dayunuëshquio choshon comapenec cuëdquín chuiapooshi. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando <sup>19-20</sup> —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididquiec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshënquido cuidendac —quequin ismeposhi.

## 15

### *Nuquin Papan cuidtequid 7tedbidi nabanaid*

<sup>1</sup> Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamëquin cuidquido dacuëdampambo icquido 7tedi icsho ispombi. Mayan bëdabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec actectesëcquio isadposh. —Nuquin Papa icsaquido cuidquidquio nec —camenuec tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uguëducuësh choboedën chuiquid dapa icsamboshë icquidën; —Yuanu —cauidaido niosh. Chuiquid dapa icsamboshë icquidbimboecnuc nacnenaid tantiatipimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan

meniaid ten-tencate cuëdëmec cuëdëncuededposh. <sup>3</sup> Nuquin Papan nami-aid Moises: —Nuquin Papan nac ëbi chieshënquidon ëbi cuesun secain-quio icposh —quec cuëdëmpampicpadec cuëdëncuededposh. Nuquin Papa bëdamboen ismenuec abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa. Mimi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abite- dishun Icbombo mibi nec.

<sup>4</sup> Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo ic- quido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

<sup>5</sup> Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadac- nombo tantiamenuen aden ismeposhi. <sup>6</sup> Auëshquio Nuquin Papan chiac- padec ëmbi isboedo mayan bëdabo 7tedi cho-choposh. Matses icsaquido cuidquido niosh aid. —Nuquin Papan yuabombo nec —camenuc dash- cute nac-nacquio icquid dasiuidcuededash dashcute bëshpiu-bëshpiumbo ic- quid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaid icho-icboen menëbamposh. Unëstiapimbo icquidën Nuquin Papan nêishënquioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaid nun- tanuësh pushud-pushudpambo icposh. Adece dacuëdampamboecsho isash

Nuquin Papa chuinec puduedtiapimbo icposh. Ënquin cuidambi pad- pidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden isme- poshi.

—quec cuëdëncuededposh Esus tantiaquido.

<sup>5</sup> Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadac- nombo tantiamenuen aden ismeposhi. <sup>6</sup> Auëshquio Nuquin Papan chiac- padec ëmbi isboedo mayan bëdabo 7tedi cho-choposh. Matses icsaquido cuidquido niosh aid. —Nuquin Papan yuabombo nec —camenuc dash- cute nac-nacquio icquid dasiuidcuededash dashcute bëshpiu-bëshpiumbo ic- quid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaid icho-icboen menëbamposh. Unëstiapimbo icquidën Nuquin Papan nêishënquioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaid nun- tanuësh pushud-pushudpambo icposh. Adece dacuëdampamboecsho isash

Nuquin Papa chuinec puduedtiapimbo icposh. Ënquin cuidambi pad- pidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden isme- poshi.

Nuquin Papa chuinec puduedtiapimbo icposh. Ënquin cuidambi pad- pidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden isme- poshi.

Nuquin Papa chuinec puduedtiapimbo icposh. Ënquin cuidambi pad- pidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden isme- poshi.

## 16

### *Maspanëmpin cushtoaid*

<sup>1</sup> Adece pushudacnuësh abi tabadacnuësh Nuquin Papambo cuëdsho tanti- omi. Maspanëmpi bedboedo chuiposh. —Matses yacno nidshun mas- panëmpin cushtoaid chiuinquin matses uesquin cuidta —quequin chuiposh Nuquin Papan.

<sup>2</sup> Adoaquien abentsëcshun ambi bedboed maspanëmpin cushtoaid nidaidëshun chiuimposh. Adnubien ëmbi isboed acte uguëducuësh chobedo chuiquid dapa icsamboshë icquidën yuaidotedi natiambo yec chiuë- chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaid tantiaquido yec aton icho cuëmëdquid dada uaquin siadmiaido icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intachipamboecnuc intacuac. Intacuidpambo icnuc acten ic- quidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëndamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ëmbi chiaid chuibanquidobëdta ëbi tantiaquido nua intac icnuc chieshëmënkquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëndamboshë iquec,” caimbi, Papa

—queposh mayan bëda acte dayun uaquid.

<sup>7</sup> Aden acte dayun uaquidën chuisho tantias Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëndamboshë iquec,” Papa, caimbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadecec matses baded-badedquiecc ushën pichiebudneposh. <sup>9</sup> Adec pichiebudneshumbien Nuquin Papa chushcabededposh. —Icsauideequi icsho Nuquin Papan nuqui cuid-ecque. Nuqui icsaid ënash ambi chiacpadecec bëndamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuim-benequin acte uguëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshpish inchëshquio yec. Badiadenquio icpish. Adsho isash matses abitedi natiambo dacuëdcuededposh. <sup>11</sup> Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadecec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadpish. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

<sup>13</sup> Adec aid matses cho-choabi icnuc ushë choacmishun chochometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëdic nisi dapabimboecquid Satanasën ana shëcuënuësh choquid. Nëdic acte uguëducuësh choboed chuiquid dapa icsamboshë icquidën ana shëcuënuësh choquid. Nëdic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidedi chosho isombi. <sup>14</sup> Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac.

Nuquin Papan tantiacpadënquiobi adendac —camenuen mayan bēdan aden ismeposhi.

<sup>15</sup> Adnubien Esusquo cuēdposh. —Tantia. Chuinu. Mimbi: “Nëbimbobi aid choec,” cacmaidquiēni choendac. Ushenquo yacimboben ëbi ënenquo icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bēdamboec tabadnuna,” quec bēdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

<sup>16</sup> Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobēdi cho-chosho ispoc. Nidaid Isadaid caid yacno macuēsh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanēmpi bedboed utsintsen ambembi chiuinguin Nuquin Papan cuidte ënquimbi ismeposh. Ambembi chiinubien abi tabadacnuēshquo Nuquin Papa cuēdposh. —Padi. Nēbi ëmbi tantiacpadomboen ënquimbi cuidec —queposh. <sup>18</sup> Adnubien abu bedbedquetanepamboec abu tesquianenuec natiamboshë shëc-shëcquemboec nidaid uēdë-uēdëquiamposh. Nuquin Papan tauamboen matses uambi adec nidaid uēdëquiambo. Bēdiactšëc nidaid uēdëquedenedi acquimboec uēdëquiamposh. <sup>19</sup> Adnubien matses dadpen yacno Babidonia caid yacnuēsh nidaid abichobi ichoedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquiosh. Adec nidaid uēdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uēdëquenubi chian dapa mad caid yacno acte nēnantan nidaid icquid abitedimbo nibēdambudneposh. Adechidi macuēsh abitedi nibēdambudneposh. <sup>21</sup> Abucuēshquo ue dapa choachimboec ue tsasi nuacquid dapa quidos 50 icnuc yuē tanaid dadpenquo paēdbudnequimbi matses tish-tishbudneposh. Aden ue tsasi dapan mëyansho isun padenquo ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacbimboecnuc aden ismeposhi.

## 17

### *Chido chishpidabimboecquid ismiaid*

<sup>1</sup> Adshumbic maspanēmpi icquid chiuimboedën abentsëcshun chuiamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquo icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquidendac,” quequin mibi ismenu. <sup>2</sup> Aido icsamboshë iquec. Matses utsi-utsien abi chuiquid dapabobēdta uisma uanten danoshcachimboen Nuquin Papambo tantiamenquo icquin ambi chiaid niac-niacmequiosh. Aido cuidsho isec cho —queposh.

<sup>3</sup> Adshumbic ushquin isacbimboecnuc ismeposhi. Nuquin Papan Mayanën tantiamiac masiuidquo yacno shubu nibēdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibēdquio iquec —quequin uesquin dada uapaidquio icposh. Aton mapi sietetedi icnuc aton país 10tedi icposh. —Mimbi isboed acte uguēducuēsh chochoed chuiquid icsamboshë icquidquo nec —quequin aden aben icquid ismeposhi. <sup>4</sup> Aid catsadquid chido

dashcute piumbo icquidbèd umumbo icquid dasiuidposh. Shocosh piu nacnenaid chedo cuènotempi nac-nacquio icquid chedo payuec aibbidi mèsiuidposh. Dèshote bédambo icquid sanamposh. Aden sanansho dèshote anisquin isaquien icsambo icquiduidquo icposh. —Chido chishpidabimboec Babidonia caid yacnocquido icsamboshè iquec. Uisma uanten danoshcachimboen: “Nuquin Papa caid nibèdquiec,” quequin tantiamequin matses utsibo dadpenquo icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuèmedquid bétanteteno bédada uadac. —Babidonia yacnocquido bédambo icquido damianquidi icsamboen tabadmequido nec —quequin dada uaid icposh. <sup>6</sup> Aid chido paèmbo icquid acachimboec Esus tantiaquidon intac acash tantiadenguio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuèdampamboecsho isash: —¿Mitsipadquioequini ique? —quebudquiobi.

<sup>7</sup> Adbudquioshobini aid mayan bédan: —“Tantiadenguio iquec,” ¿quecta ique? Tantia. Chido chishpidabèdta abi catsadaid aben icquid chuinu.

<sup>8</sup> Mimbi isboed aben icquid icsamboshè icquid ictenedi nèbi nibèdec. Yueshshun Satanasèn abi tabadacnoshon padpiden chomendac. Adoacsho yueshshun Nuquin Papan chian anèdènquiacono nèsecaindac. Aden cuidabi Satanasèn chomebocsho isun Nuquin Papa tantiesabon: “Comapenen tantiaquidien nechitec. Matses nibèdanèdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Èbi tantiaquido iquendac,” cacmaidonquo adoendac —queposh mayan bèda.

<sup>9</sup> Adshumbic padpiden chuiposhi. —Tantia. Èmbi chuiboed bédamboen tantiamenuen chuinu. Naden tantiamenuen aben icquidèn mapi 7tedi icquid mibi ismiombi. “Babidonia caid yacno matses icsa uaquido tabadacno macuèsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibèdnubi utsi abi iquec. Nèbi aidèn aton matses namec. Utsitsen choendac. Choshon aton matses nametantsequi badedquio nibèdanendac. <sup>11</sup> Nibèdanèdaidi choashic èmbi ismeboed acte uguèducuèsh choboed chuiquid dapa icsamboshè icquidquo iquendac. Aidèn èmbi chuiboedo chuiquid dapabo 7tedishun namiacimboen aton matses icsamboshè namendac. Adoacsho isun Nuquin Papan icsaido cuidquiacono nèsecaindac —queposh mayan bèda.

<sup>12</sup> Adashic abi onquec: —Naden tantiamenuen aben icquidèn pais 10tedi icquid mibi ismiombi. Chuiquid dapa utsibo 10tedi iquendac. Nèbi aton matses namiabi iquec. Padabi. Adquido yanendac. Satanasèn acte yacnuèsh choeboedbèdta chuiquid dapabo icmiac matses icsamboenshè namiash yuec tabadabi badedquio nibèdanendac. <sup>13</sup> Nibèdanabi icquin aidon acte uguèducuèsh choboed abi chuiquid dapambo icmendac. “Aidèn namiac abi tantiaquidobèdta Esus nuquitedishun cuesun secatsiac nibèdquo icnuc,” qeshun aden icsamboshè icquid abi chuiquid dapa icmendac. <sup>14</sup> Aden Esus chieshènquidon: “Chieshtomenu,” cac Esusèn yuaido abi tantiaquidotedi chieshtoenquo iquendac. Aton Icho Esusèn abided cuidadec unèsaidèn namiac chieshtoenquo iquendac. Aden abi tantiaquidobèdta chieshènquin cuesun secanuec cho-chosho isun Esusèmbi cuesun secaindac. “Èbien matsesèn Icbombo nec,” quetanquin adoendac —queposh mayan bèda.

<sup>15</sup> Adashic padpidec: —“Nidaid utsi-utsiac yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpidabimboecquid acte dapa bèntse tsadsho mibi ismiombi.

<sup>16</sup> Aden Babidonia caid yacnocquidon nasho isun mimbi isboed chuiquid



dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden chieshënquin cuesun secatanquin shububëdtabi nêdëncaindac nibëdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducësh choboed chedo chuiquid dapabo icmendac. <sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nêbi ismiombi —quequin mayan bëdan chuiposhi.

## 18

### *Nuquin Papan Babidonia caid yacnocquido cuidaid*

<sup>1</sup> Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. <sup>2</sup> Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. <sup>3</sup> Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bëdabon chuiposhi. <sup>4</sup> Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqeta —quesho tantiombi. <sup>5</sup> Nuquin Papa yacnoshombidi utsin chuiposh. —Ënëdenquio yec icsauidequi icsho isun ambi tantiacpadomboen Nuquin Papan cuidquiendac. <sup>6</sup> Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nêbi nêishquioshon uesquin cuidquiopashun —queposh mayan bëda. <sup>7</sup> Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bëdambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquio tantiec: “Nuquin matses yuabo dadpen icnuc nuqui bëdamboec tabadec. Chido niantie bënë unësaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. <sup>8</sup> Adsho ambi: “Nêbi ëbi cuidec,” cacmaidënquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquio nêdënquendac —queposh mayan bëda.

<sup>9</sup> Adashic abi onquec: —Adec Babidonia yacnuësh nêdënquec pushud-tonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup> “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquio icpadenec. Ambi dayun uaid dadpenquio icpadenec. Matses utsibo dadpen namepadenec. Aido tantiac unësquimboshë iquec. Badedquio

uesquin cuidquiopac,” quec sedenquecuededendac Babidonia caid yacnoquido tantiec —queposh mayan bēda.

<sup>11</sup> Adashic abi onquec: —Babidonia caid yacnoquido aden cuidasho isash utsibotsen: “Ēmbi meniaid bedshun piucquid dadpen menedenebi. Nēbi adquid nibēdquiec. ¿Tsuntsimbini ěmbi meniaid cuidquin piucquid menepatsiashba?” quec sedenquecuededendac. <sup>12</sup> Aidobidi: “Nadquid Babidonia caid yacnoquido menequin piucquid dadpen bedtenembī. Nēdic shocosh piu. Nēdic shocoshquio. Nēdic casēdubimboecquid cuēnote bēdambo icquid. Nēdic dashcute bēdambo icquid. Nēdic dashcute piumbo icquid. Nēdic dashcute umumbo icquid. Nēdic sēntebimboecquid nacnenaid. Nēdic aben icquid edepanten shēta nacnenaid. Nēdic cuēte utsi bēdaidquio nacnenaid. Nēdic shocosh utsi nacnenaid. Nēdic cuēnote nacnacquo icquid nacnenaid. Piucquid dadpen menequin adquidtedi Babidonia caid yacnoquidon bedpadenec. <sup>13</sup> Utsitsen dadpen bedpadenec. Nēdic batambo icquid sabimboecquid. Nēdic bēdambo nuadte. Nēdic bēdambo nuadec danoshquete. Nēdic acte paēmbō icquid. Nēdic bēchi. Nēdic pan nacnentequid. Nēdic nēish yua baca caid. Nēdic nēish yua utsi obeca caid. Nēdic nēish yua cabayo caid. Nēdic matses antsadsho cabayon nimbanquin buante. Nēdic ambi chonoa uatequido matses ambi ampequin bedaīdo dadpen. Babidonia caid yacnoquidon aidtedi dadpenquio bedtenesho aton piucquid dadpen bedpadenembī,” quependac nidaid utsi-utsiec yacno tabadquido —queposh mayan bēda.

<sup>14</sup> Adashic abi onquec: —Abi piucquid menedenedēn dayun uaid nibēdanesho isash: “Aid matses bunaidquio ambi dayun uaid pete nibēdquiec. Ambi dayun uaid dashcute bēdambo icquidbēd aton na utsi dadpen abitedi nibēdquiec,” <sup>15</sup> quiash natiambo dacuēdec uanoshon isec tabadec sedenquecuededendac abi piucquid menedenedo tantiec. <sup>16</sup> “Aid matses tantiac unēsquimboshē iquec. Matses dadpen yuaquin matses dadpen namepadenec. Aton matses dashcute bēdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casēdubimboecquid shocosh piu nacnenaid payudenec. Utsibic casēdubimboecquid utsi payuec mēsiuidtenec. Adec: ‘Con na dadpenquio icnuc bēdamboec tabadebi,’ quepadenec Babidonia caid yacnoquido. <sup>17</sup> Adsho isun Nuquin Papan abi ushēmbi cuidquiac ambi dayun uaidbēd aid matses badedquio nibēdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nēdic cano dapa dancha icbo. Nēdic dancha icbobēd nidquido aton yuabo. Nēdic icbo piucquid meniaish dancha antabēdtoquido. Nēdic nuēcquid bedshun piucquid bednuen menequido. Aidtedi uanoshon isec sedenquecuededendac. <sup>18</sup> Nēdēnquec pushudtonesho uanoshon isash: “Adquido utsi nibēdec,” <sup>19</sup> quiash natiaguec sedenquecuededendac. Adec shubiec: “Ēbipadquid dancha icbon bēdaidtedi bedshun piucquid dadpen menedenedo tantiac unēsquimboshē iquec. Is. Cuidquiac badedquio nibēdanaque,” quec sedenquecuededendac —queposh mayan bēda.

<sup>20</sup> Adashic mayan bēdabidi: —Ēbien cuishonquendac. “Nuquin Papa yacno tabadquidotsen ěbēdi cuishonque,” quequin chiendambi. Esus tantiaquido chuiquinc Esusbēd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnūna. Mibi chieshēnquin natiamicpadomboen mibi chieshēnquido Nuquin Papan uesquin cuidquioshe,” quequin chiendambi —queposh mayan bēda.

<sup>21</sup> Adnubien mayan bēda utsin uidēnquio icquidēnquio nidaid moco nuacquid dapa yuēmboshē icquid cadotanquin acquimboen acte

nënebidaanquimbi chuiposh. —Ëmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibëdquiecnuc. <sup>22</sup> Adoac aido ictenecnombo nadimbo iquendac. Ten-tencate tentencainquo iquendac. Utsibobic cuëdënenquo iquendac. Utsibombic shoncate shoncainquo iquendac. Cuëte chëshun nacenenoquo iquendac. Piacbo macuesenquo iquendac. Nadimboshë iquendac. <sup>23</sup> Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaequin icsamepadenec,” quendac. <sup>24</sup> Nuquin Papan cuidabi icnuc aden icsamequin Babidonia caid yacnocquidon Nuquin Papa chieshëninquo ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuado matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

## 19

### *Chieshënquido cuidacsho isash cuishonquiaid*

<sup>1</sup> Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquo Esus tantiaquido dadpenquioshë comapeñec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided cuidadec unësaid tantiaquo matses bëdamboen isec.

<sup>2</sup> Muesambo icquin ambi chiacpadomboen naquidquio nec.

Abi tantiesabo ënëdenquo yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido

Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

—quec cuëdëncuededposh.

<sup>3</sup> Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncain Babidonia caid yacnocquido uesquin cuidquioshe

—quec cuëdëncuededposh Esus tantiaquido dadpenquioshë.

<sup>4</sup> Adsho tantiaquid Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icho nec —quequin ismenuec danëshën tinquebudcuededposh. Adec tinquebudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi. <sup>5</sup> Adashic auëshquiobidi abentsëc cuëdposh.

—Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna. Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

—queposh.

### *Esusën abi tantiaquido beduante chiaid*

<sup>6</sup> Adsho tantiaquid abu tesquianiabimboec acte nua chododoquiacbimboec Nuquin Papa yacnocquido dadpenquo cuëdëncuededposh.

—Abi chieshënquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bédamboshë iquec.

<sup>7</sup> Nuquin Papa tantiec cuishonquenuna. Nuquin Papa bédamboshë iquec.

Dadan aton chido buntacquio beduanachimboen abided cuidadec unësaid  
Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nac-  
nemëdquiachimboec:

“Nëbien con Icho chochitec,”

quiash Esus tantiaquido bédamboec tabadec.

<sup>8</sup> Abi tantiasho Nuquin Papan bédamboen isaido yec abi icsaid ënash:

“Nëen con Icho chochitec,” quiash bédamboec tabadec.

Aden abi tantiasho Esusën dashcute chuca ushumbo icquid dasiuinachim-  
boen abitedi icsaisa icmendac

—quec comapenec cuëdëncuededposh.

<sup>9</sup> Adnubi mayan bédan chuiapoashi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bédamboec tabadquid. Adembidi abí tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

<sup>10</sup> Adsho tantiashini Nuquin Icho danec ismenuc danëshën tinquebuduid-  
poc. Adshobini: —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

### *Cabayu ushu catsadquid bédamboshë icquid*

<sup>11</sup> Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. <sup>12</sup> —Matsesën ompodëmëdtiapimbo icquidquio nec

—camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bédada uadaid tantiadenquio icposh. Utsibon tantiatiapimbo icnuc ambentsëqui tantiate niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bédada uadaid ismeposhi.

<sup>13</sup> Abi cuëmëdquid utsiembi tantiatsëccoc. —Nuquin Papapadquidquio yec abi tantiamanquid nec —quequin cuënaid niosh. Aton dashcute bëntse icquid cuidaidën intaquën punachimboec piumboshë isadposh. —

Abi tantiesabo cuidquidquio nec —camenuc aden ismeposhi. <sup>14</sup> Esus bëyuc nidnuc abi tsibanec abi tantiaquidobëd mayan bédabo cabayo ushuc-

quidquidquio catsadcuëdedec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuëdedposh. <sup>15</sup> Abi bëyucquid ana shëcuënuëshquio chështe cuënumbo icquid cueshqueposh. —Ambi chi-

acpadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsaudequi icsho uesquin cuesun secaindac. Nuquin Papan chiacpadomboen

naquin shancuinbimboecquid uba caid nua ënë icnuc tish-tishachimboen nua intac icnuc cuesun secaindac. <sup>16</sup> Aton dashcute bëntse icquidën abi

cuëmëdquid utsi dada uaccosh. —Abipadquid utsi nibëdnuc abitedimbo

chuiquid dapambo yec abitedishun Icbombo nec —quequin dada uaccosh. Aton bēusudquid yacnombo adembidi dada uaccosh.

<sup>17</sup> Adnubien ushè mèducquio tabadquin mayan bēda utsin edeste chedo abuc cuen-cuensho comapenec cuēdquin chuiposh. —Nuquin Papan cuidquin cuesun secaidon nami chec cho-cho. <sup>18</sup> Ēmbi chiacpadec cho-choshon matsesèn nami mimbì nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobēdtabi. Nēidic matses utsibo abitedimbo. Nēidic matses yuabo. Nēidic matses yuapenquo. Nēidic bacuēbo. Nēidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

<sup>19</sup> Adshumbic mayan bēdan ismeboedo Esus chedo cuesun secanuec cho-chosho ispombi. Acte uquēducuēsh choboed chuiquid dapa icsamboshē icquid chedo nidaid utsi-utsiec yacno tabadquido abi chuiquid dapa chedobēdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquo abi tsibanquidobēda cuesun secanu —caqui <sup>20</sup> cuesun secadenquo icposh. Adshobien Esusèn acte uquēducuēsh choboed chuiquid dapa icsamboshē icquid bedposh. Adotanquimbic aid tantiamequid nidaid shēcuēnuēsh choboed Satanasèn oncamiadtsen bedposh. Aid comapenen tantiaquin ismequin mauquin abi chuiquid dapan icsamboshē icquidēn chiacpadomboen matses namequidquo niosh. Adec mauquin abi chuiquid dapabimboecnuc nacnemequidtsen niosh. Adecbidi: —Ēbi chuiquidēn yuabo nec —quequin matses dadpen bēsiadmequid niosh. Adec icsamianquidquio icsho bedposh. Abi chuiquid dapabēda bedshun unēs uabi chīan dapa ēnēdenquo yec anēdenquequid icsamboshē nuadquidquid nēsecaposh. <sup>21</sup> Adshumbic Esusèn ana shēcuēnuēsh chēshte cuēnmo icquid cūeshquequidēn: —Ēbi chieshēnquidotedi unēsta —caquin cho-choboeđ utsibo abitedi unēsbudneposh. Adsho isun caimboeđon edeste chedon nua-nuaic tēpuisquin matsesèn nami chebededposh. —Aden Esusèn abi chieshēnquido nibēdamendac —camenuen aden ismeposhi.

## 20

### *Satanas uidēn uaid*

<sup>1</sup> Adshumbic padpiden ismeoaposhi. Adoac mayan bēda utsi Nuquin Papa tabadacnuēsh budsho ispombi. Podobitsi icsabo Satanasèn yuabo shēcuēn tabadacno bētashaid chictēbēda shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuec nisipampid Satanasquo bedposh. Bedtanquimbic shocosh bucubimboecnuc nacnenaidēn ambi sanamboeđēn uidēn uaposh. <sup>3</sup> Uidēn uatanquimbic aton yuabo uidēn uacno shēcuē aneposh. Adotanquimbic shēcuē bētashquioposh puduentiapimbo icnuc. Seta dadpenquo 1000tedi matameshun bētashte chicshun Satanas cuemenuen adoposh. —Aden seta 1000tedi matamiabi icquin abi uidēn uactedembi matses mauaquin icsametiapimbo iquēc —queshun chicten bidiacquin uidēn uaquioposh. Aden ismeposhi.

<sup>4</sup> Adshumbic utsitsen ismeoaposhi. Adoac chuiquidēn tsadten icho-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbēdtambi matsesèn naid abimbo chuibamposh. Aden matses bēdamboen nameposh. Satanas uidēn uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquēducuēsh

choboed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapimbo icquido niosh. Utsibic mësiadiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadposh. <sup>5</sup> Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemiaido bëdambo yec cuis-honqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

### *Satanasquio chian anëdënquequid nëniaid*

<sup>7</sup> Adshumbic aidtedquio seta 1000tedi matameshun uidën uaid chicquin Satanas cuemendac. <sup>8</sup> Adoquien matses icsamenuc muaquin chiec nidaid utsi-utsiec yacno nidendac. Aden aidën muaquin namaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

<sup>9</sup> Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanatsen nënendac. Adoac aido ënëdenquio yec natiamboshë iquendac. Aden ismeposhi.

### *Icsambo icquido cuidte chiaid*

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadiapimbo yec. <sup>12</sup> Nuquin Papa yacno unësaïdo uincuemiaido abitedimbo tabadposh. Adnubien bëshunenquio icquin dada uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo compapen cuidnun aden chuibamposh. <sup>13</sup> Unësaïdo abitedi icposh. Utsi-utsiec unësaïcho chian dapa mad caid nëniaïdo uincuemiaido niosh. Utsi-utsiec nidaïdën chococaid uincuemiaido niosh. Adsho aidon naidtedi Nuquin Papan chuibamposh. <sup>14-15</sup> Adshumbic Esus tantiesabo icsho documento nibëdquidbimboecsho abi yacno tabadmenquio icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquidoudiquio icposh. —Adquid iquendac —quequin aden ismeposhi.

## 21

### *Nuquin Papabëd tabadaidquio*

<sup>1</sup> —Esus tantiesabo chian anëdënquequid nësecaindac —quequin ismëboshombic padpiden ismeoposhi. Adoac abu chucambo icsho ispombi.

Nidaidtsen chucambo icposh. Abubëdi nidaid shëni nibëdnuc utsi chucambo icquiduidquo icposh. Ënden iccondaïd chian dapa mad caïdtsen nibëdposh. <sup>2</sup> Adnubien Esusbëdi Nuquin Papa tabadaïdquo abichobi Edusaden chuca caïd abucuësh budposh. Chido nëbi bedboedën aton bënë cuishoncamiacimboc cuishoncamiandquid yec bëdamboshë icposh. <sup>3</sup> Adnubien Nuquin Papa tsadacnuëshquo comapenec cuëdposh naden chiec. —“Con matses nec,” quïash nëbi Nuquin Papa matsesbëdi tabadendac cuëshëdenquo yec. Adsho isun aton yuabo icquin matses abitedishun: “Nuquin Icbombo nuquin tantiaïdquo nec,” caïdac. <sup>4</sup> Ambo Nuquin Papan abitedi chuca uacnombo aïdbëdi tabadec matses shubtiapimbo iquendac bëun ucacimboc. Nidaid shënin tabadec abitedi unëstequiduidquo icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaqin chuca uaindami bëdamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaïd nec —queposh Nuquin Papa Esusbëdi.

<sup>6</sup> Adashic Nuquin Papa padpidec onquec: —Ëmbi chuiboctedimbo nainquin naindami utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboc ëbëd tabadte bunquidon con Mado Esus tantïasho ëbëdi tabadmendambi. <sup>7</sup> Satanasën: “Chieshtomenu,” cauidaïdo Esusbëdta ëbi chieshtoenuo icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caïndambi. <sup>8</sup> Adshumbic utsibo chian dapa anëdënquequid icsamboshë nuadquid nësecaindami. Nëidtedi icsamboshë icquido adoendambi. Nëidic ëbi bëdiactsëc tantiauidtsëchoedobi chieshëmënuquidon: “Cuesnu,” cac chieshtoash tantïesa yanoaïdo. Nëidic Esus tantïesabo abitedi. Nëidic icsamianquido, Nëidic chieshëmë nec cuesunianquido, Nëidic dada aton dada utsibëdi chichudnanquido. Nëidic aton chidopenquo chudquido. Nëidic aton bënëpenquo chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaïdi papa caquin tantiaquido. Nëidic muauanquido. Aïdtedi chian dapa anëdënquequid nësecaindami —queposh Nuquin Papa.

### *Abi tantiaquido Esusbëd icte chiaïd*

<sup>9</sup> Adnubien mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuishoncamiacimboen abided ciudadec unësaïd Esus cuishoncamequido tabadaïd mibi ismenu. Cho —caposhi Esus tantiaquido ismenuen. <sup>10</sup> Adshumbic Nuquin Papan Mayanën tantiamiac ushqin isacimboen isombi. Mayan bëdan ëbi buanquin ispombi. Aden buanshun macuësh dapa mananënuo tsadumposhi. Adoac anoshon isquien abucuësh Nuquin Papa abi tantiaquidobëd abi tabadaïd abichobi shubu dadpen icquid budposh. Aïd tabadaïd Edusaden chuca caposh. <sup>11</sup> Aïd tabadaïdquo aïd shubutedi Nuquin Papa tabadaïd yec abi yacpadquo abichobi bëchamauanquiecposh. Casëdu bëdambo icquidimboc isquid-isquidquo isadposh. <sup>12</sup> Shubu abitedi nënantan icnuc abichobi daquënë uaid icposh. Abucquo icnuc daquënë uaid nïosh. Daquënë uaid puduedte shëcuë 12tedi icposh. Aïd

shëcuë icbo-icboen isquid yec mayan bédabo 12tedbidi icposh. Aid shëcuë bétashte 12tedbidi icposh. Aid bétashten Acobon mado cuëmédquid 12tedbidi dada uabampaccosh naden. Bétashten Acobon mado Ose cuëmédquid dada uatanquin bétashte utsin Acobon mado utsi Uda cuëmédquid dada uatanquimbic adenuidi bétashten bétashtenquien Acobon mado cuëmédquid cuëmédquidquien dada uabampaccosh. <sup>13</sup> Aid daquënë uaid puduedte shëcuë ushë choauc 3tedi icposh. Ushë nibédauc nodte yauc aidtedbidi shëcuë icoaposh. Ushë nibédaucbidi sud yauc aidtedbidi shëcuë icposh. Ushë budauc aidtedbidi shëcuë icposh. <sup>14</sup> Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbéd icquido ëbitedi cuëmédquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmédquid Uan dada uatanquin cuënote utsin Petedo cuëmédquid dada uapaccosh. Adenuidi cuënoten cuënotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uédëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiquido Nuquin Papa yacno Esusbëdi tabadëndac —quequin tantiamenuen Acobon mado cuëmédquidotedi dada uaidbëda Esusbéd icquido cuëmédquid dada uaid aden ismeposhi.

<sup>15</sup> Adshumbic ëbi chuibodën mayan bédan shocosh bédaidquio nacenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh.

<sup>16</sup> Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionuibidi icposh. <sup>17</sup> Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacenaid tambanten tanac metedos 65ted cactiombi icposh nuamboshë bitsipambo.

<sup>18</sup> Daquënë uaid abichobi isquid-isquidquio isadposh. Bédamboshë icposh. Padnuen shubu abitedi shocosh bëshpiu-bëshpiuctsëcquid nacenaiduidquio yec nac-nacquio icposh. <sup>19</sup> Aid daquënë uaqin tauaquin sandoaid nidaid cuënote dapa casëdubimboecquid bédambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumbocttsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. <sup>20</sup> Utsibic onise caid piumbo icquid. Utsibic conadina caid piu-piupacttsëcquid. Utsibic quidisodito caid bëshpiu-bëshpiupacttsëcquid. Utsibic bedido caid umu-umupacttsëcquid utsi. Utsibic topasio caid piu-piupacttsëcquid utsi. Utsibic quidisopadasa caid nushan-nushanabitsetcquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaicosh. —Nuquin Papa yacnombo bédamboshë iquendac —camenuen aden ismeposhi. <sup>21</sup> Daquënë uaid puduedte shëcuë 12tedi icposh. Aid bétashtetedi acte chiumbimboecquidën casëdu ushu uaid nuacquid dapambo abichobi-abichobien nacenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiucttsëcquid acte-actecttsëcquio icnuc mabiunaid icposh. —Esusbéd Nuquin Papa tabadacnombo bédambo icquiduidquio iquendac —camenuen aden ismeposhi.

<sup>22</sup> Ambobi abi bëisec tabadacnombo Nuquin Papa tabadte shubu uashunaid nibédposh. Ambo Nuquin Icho Esus abided ciudadec unësaibéd Nuquin Papa icsho bëisiquoquin tantiec anocquido tabadëndac. <sup>23</sup> Ambobidi inchështanec badiadenquio iquendac. Badiadën ushë isadenquio iquendac.



Inchëshën ushëtsen isadenquoio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquoio iquendac. —Nuquin Papa icsaisambo icnuc abi yacno icsaido nibëdquoio iquendac —camenuen aden ismeposhi. <sup>24</sup> Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombö quenenec tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. <sup>25</sup> Nuquin Papa matsesbëdi tabadacnombö inchëshenquoio icnuc: —Icsambo icquido puduednushe. Bëtashnu —quetiapimbo icsho isun daquënë uaid shëcuë bëtashenquoio iquendac. Shëcniacchobi iquendac. <sup>26</sup> Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombö puduedash: —Daëdpactsëc tantiaquin matses daëdpactsëc namebampadenmbi. Nuquin Papa aton Mado Esusbëdi comapenen tantiaquido yec abitedishun Icbombo nec. Abipadquid utsi nibëdec —quendac abitedi. <sup>27</sup> Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquoio icquin dada uacbmboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquoio iquendac —quequin aden ismeposhi mayan bëdan.

## 22

### *Nuquin Papa yacno acte ismiaid*

<sup>1</sup> Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquoio tsadte dapan tabadacnuësh matses unëstiapimbo icmetequad acte bëdambo icquid nushan nibëdquidquoio chëuëdsho ispombi. <sup>2</sup> Nuquin Papa yacnuëshquoio choec chëuëdec ambo tabadquido Esus tantiaquido tabadaid shubu nënantanquoio chëuëdposh. Aid cuëmambi matses unëstiapimbo icmetequad cuëtetsen icposh. Baded-badedquiecc bacuëquidquoio niosh. Inchëshën ushë choan-choanquiecc badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequad niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. <sup>3</sup> Aden abitedi bëdambo icmiac cuidtequido nibëdquoio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiecc Esus tantiaquido tabadendac. <sup>4</sup> Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquiecc tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. <sup>5</sup> Ambo bëdambouidquoio yec inchëshenquoio iquendac. Nuquin Papa bëchamauanquieccquidëmbi ushëmbouidquoio iquendac inchëshaid tantiadenquoio yec. —Aden abi tantiaquido bëdamboen isquin ënenquoio icquin bëdamboshë icmendac. Chuiquid dapabo icmiac Esusbëdtambi ënenquoio icquin namendac —quequin ismeposhi.

<sup>6</sup> Adshumbic mayan bëdan chuioposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi.

“Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

### *Esus chote chiaid*

<sup>7</sup> Adnubini Esusënquio naden chuiposh. —Chieshtoenquio icquin ëbi tantiaata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bédambo icmendambi —caposhi Esusën.

<sup>8</sup> Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. <sup>9</sup> Adshobini: —Padi. Aden ëbi ismenda. Mibipadquid Nuquin Papan yuabidi nebique. Ëndenquimboshë Nuquin Papan tantiamiac min tsusedpabo isadaidbon ambi chiaidquido dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

<sup>10</sup> Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushë. Chieshtoenquio icquin Esus tantiec ma tabadnu,” qeshun dada uata. <sup>11</sup> Nëbimbobi Esus chonoc Esus tantiesabo badedquido bédamboec tabadcuentiapimbo iquendac. Abi icsaid badedquido ëntiapimbo iquendac. Esus tantiaquido abi bédamboec tabadacpadquiecbidi nëdamboec tabadpashun —queposh mayan bëda.

<sup>12</sup> Adnubini Esusën chuioposh. —Chieshtoenquio icquin ëbi tantiaata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. <sup>13</sup> Nuquin Papapadquidquido nebi. Ëmbi tantiacmaid nibëdnuc abitedi comapenen tantiaquidquido nebi. Nidaid uabi yec ictenedi nëbi adquidquido yec nibëdantiapimbo icquid nebi. Adquid yec abitedishun Icbombo nebi.

<sup>14</sup> Icsambo ichoedon ëbi tantiasho icsaisabimboecnu Nuquin Papan bédamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiachimboen. <sup>15</sup> Padnuen ëbi tantiesabo bédamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaidquido naic mauanquido. Aidtedi Nuquin Papa yacno puduedtiapimbo iquendac.

<sup>16</sup> Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquido nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusën.

<sup>17</sup> Adsho tantiashtun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquido tantiantenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquido tantianuna —cac bédambo ictsiash. Adsho tantiashtun Esus tantiesabo acte bunachimboec Esus tantiate bunsho Nuquin Papan bédamboen isendac. Nuquin Papa bédamboen ismenuen menete

nibëdnuc Esusuidi tantiashe Nuquin Papan bëdamboen isquin abëdi tabadmendac.

<sup>18</sup> Tantia. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. <sup>19</sup> Adembidi ëmbi dada uaboed utsi uainquio icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquio ictsiashe. Adembidi bëdamboshë yacno abëdi mibi tabadmenquio ictsiashe.

<sup>20</sup> —Ma aitedi tantianu —quequin Esusën chiacpadomboen mayan bëdan aitedi ismeposhi. Ëmbi chuibocpadomboen Esusën: —Nëbimbobini choendac —caposhi. Adsho tantiashe: —Ai, nëbimbobi chota —capombi.

<sup>21</sup> Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bëdamboen isquin bëdambo icmepashun —caimbi. Padi. Aitedi chuiquin dada uaombi.